


Nuevo Testamento
Guaraní Pe



New Testament in Guaraní, Western Bolivian (BL:gnw:Guaraní,
Western Bolivian)

Nuevo Testamento Guaraní Pe

New Testament in Guaraní, Western Bolivian (BL:gnw:Guaraní, Western Bolivian)

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

09a8356f-416c-5877-91cf-40f681db481e

Contents

SAN MATEO	1
SAN MARCOS	44
SAN LUCAS	70
SAN JUAN	115
HECHOS	146
ROMANOS	183
1 CORINTIOS	200
2 CORINTIOS	216
GÁLATAS	226
EFESIOS	232
FILIPENSES	238
COLOSENSES	242
1 TESALONICENSES	246
2 TESALONICENSES	249
1 TIMOTEO	251
2 TIMOTEO	256
TITO	259
FILEMÓN	261
HEBREOS	262
SANTIAGO	276
1 PEDRO	280
2 PEDRO	285
1 JUAN	288
2 JUAN	292
3 JUAN	293
JUDAS	294
APOCALIPSIS	296

EL SANTO EVANGELIO SEGUN SAN MATEO

Jesucristo itenondegua reta (Lc 3.23-38)

¹ Tamimbeu cua tupapire pe Jesucristo itenondegua reta. Jesucristo co jae David inemoña reta pegua. Jae ramiño vi jae co Abraham inemoña reta pegua.

² Abraham inemoña Isaac, jare Isaac inemoña Jacob, jare Jacob inemoña reta Judá jare tiquei reta jare tivi reta. ³ Jare Judá umiñemoña Tamar güi Fares jare Zara. Jare Fares inemoña Esrom, jare Esrom inemoña Aram. ⁴ Jare Aram inemoña Aminadab, jare Aminadab inemoña Naasón, jare Naasón inemoña Salmón. ⁵ Jare Salmón umiñemoña Rahab güi Booz. Jare Booz umiñemoña Rut güi Obed. Jare Obed inemoña Isaí. ⁶ Jare Isaí inemoña David. Jae co Israel pegua reta juvicha guasu.

Jare mburuvicha guasu David umiñemoña Urías jembirecocue güi Salomón. ⁷ Jare Salomón inemoña Roboam, jare Roboam inemoña Abías, jare Abías inemoña Asa. ⁸ Jare Asa inemoña Josafat, jare Josafat inemoña Joram, jare Joram inemoña Uzías. ⁹ Jare Uzías inemoña Jotam, jare Jotam inemoña Acáz, jare Acáz inemoña Ezequías. ¹⁰ Jare Ezequías inemoña Manasés, jare Manasés inemoña Amón, jare Amón inemoña Josías. ¹¹ Jare Josías inemoña reta Jeconías jare tivi reta. Jare Jeconías ico yave, ivi Babilonia pegua reta umiamiri Israel pegua reta jare güiraa jeta Israel pegua reta Babilonia pe.

¹² Jare yugüiraa ma Babilonia pe yave, Jeconías inemoña Salatiel, jare Salatiel inemoña Zorobabel. ¹³ Jare Zorobabel inemoña Abiud, jare Abiud inemoña Eliaquim, jare Eliaquim inemoña Azor. ¹⁴ Jare Azor inemoña Sadoc, jare Sadoc inemoña Aquim, jare Aquim inemoña Eliud. ¹⁵ Jare Eliud inemoña Eleazar, jare Eleazar inemoña Matán, jare Matán inemoña Jacob. ¹⁶ Jare Jacob inemoña José - jae co María ime. Jare María imembi Jesús - jae co Cristo jee vae.

¹⁷ Jáeramo yaipapa catorce ñemoña Abraham güi David pe. Jae ramiño vi yaipapa catorce ñemoña David güi Jeconías pe. Echa'á Jeconías ico yave, Israel pegua reta uyereraca Babilonia pe. Jae ramiño vi yaipapa catorce ñemoña Jeconías güi Cristo pe.

Jesucristo oa vae regua (Lc 2.1-7)

¹⁸ Añave tamimbeu quirái Jesucristo oa ichi güi vae regua. María José ndive umendata yave, ndei José güireco mbove, uyecuaa ipurúa oí. Ipurúa co Espíritu Santo imbaepuere pe. ¹⁹ Jayave José ipia pe uyemingueta jei vaerá chupe ndarau umenda jae ndive, ñerei uipota'á uyapo opaete vae reta jovaque. Echa'á José penti cuimbae jupi vae co jare uipota'á umimaraca María opaete vae reta jovaque. ²⁰ Ñerei cua re ipia pe uyemingueta oí rambueve, penti ángel yandeYa pe uyeyocui vae uyecuaa chupe ipau pe jare jei chupe:

—José. Nde co jae David inemoña reta pegua. Ndepuere nemenda María ndive ndequiye mbae reve. Echa'á ipurúa oí Espíritu Santo imbaepuere pe —jei—. ²¹ Jare imembita penti cuimbae jare nembijeeta Jesús. Echa'á jae umbiasata ivi pegua reta. Echa'á umbaita imbaeyoa reta —jei.

²² Jare opaete cua uyeyapo, Tumpa iñee aracae umimbeu vae rupi yandeYa jei vae uyeyapo vaerá. ²³ Echa'á jei cuarái:

“Mase, penti cuñatai cuimbae güireco'á etei vae ipuruata jare imembita penti cuimbae. Jare umbijeeta reta Emanuel.”

Jucuarái jei. (Cua tee uipota jei: “Tumpa ime yande ndive oí”.)

²⁴ Jayave José usareco yave, umenda María ndive ángel yandeYa pe uyeyocui vae jei chupe rami. ²⁵ Ñerei José opoco'á María re ndei imembita oí mbove. Jare María imembi oa ma yave, José umbijee Jesús.

2

Cuimbae yasitata re uyemboe vae reta

¹ Jesús oa ma yave tenta guasu Belén ivi Judea pegua pe, Herodes ico mburuvicha guasurá. Jare jocua ara rupi yugüero cuimbae reta yasitata re uyemboe vae reta guarasi oé vae coti güi uváe tenta guasu Jerusalén pe. ² Jare jei reta:

—¿Quiape pa ime oí sambiaí judío reta juvicha guasurá icota vae? Echa'á nduecha yasitata uicuaaca oreve vae guarasi oé vae coti. Jáeramo ndoyu ma nuváe numbiadora vaerá —jei reta.

³ Mburuvicha guasu Herodes cua uyandu yave, uyemipia'ã. Opaete Jerusalén pegua reta uyemipia'ã vi. ⁴ Jayave Herodes umbatica opaete sacerdotë reta itenondegua reta jare mboroyocui re oporomböe vae reta, jare upirandu chupe reta quiäpe ra oata Cristo, Tumpa ombou vae. ⁵ Jare jae reta jei chupe:

—Oata Belén Judea pegua pe. Echa'ã Tumpa iñee aracae umimbeu vae jei cuarãi:

⁶ 'Belén Judea pegua penti tenta guasu Herodes pegua icavi vae.

Echa'ã joco pe oata penti mburuvicharã.

Jae oyocuita Israel pegua reta.

Israel pegua reta chembae co.'

Jucuarãi jei —jei reta chupe.

⁷ Jayave Herodes uenica viari jocua yasitata re uyemböe vae reta, jare upirandu chupe reta quirãi yave ra uyecuaa jocua yasitata. ⁸ Jayave Herodes jei chupe reta:

—Pecua Belén pe peeca cavi jocua sambiaí. Jare pevãe ma chupe yave, peyu ye cua pe pemimbeu cheve, che vi aa vaerã ambadora —jei.

⁹ Uyandu reta ma yave mburuvicha guasu jei vae, cuimbae reta yugüiraa Jerusalén güi. Jare uecha reta ye jocua yasitata guarasi oë vae coti ñugüinoi yave uecha vae. Jare yasitata oo jae reta jenonde uyemboi sambiaí oí vae iárambo. ¹⁰ Jocua yasitata uecha reta yave, cuimbae reta tuicha rupi uyerovia. ¹¹ Jare uique reta yave sambiaí oí vae pe, uecha reta sambiaí ichi ndive - jae co María jee vae. Jayave jae reta uyeatica jare umbadora sambiaí. Jayave uipea jivita reta jare umee sambiaí pe güeru reta chupe vae - oro jare mbae ipiche cavi vae reta incienso jare mirra jee vae.

¹² Jare Tumpa umimbeu cuimbae reta pe ipau pe agüiye vaerã yugüiraa ye Herodes jenta rupi. Jáeramo yugüiraa ye iivi pe ñru tape rupi.

Herodes uyucaca sambiaí reta

¹³ Jare cuimbae reta yugüiraa ma yave, penti ángel yandeYa pe uyeyocui vae uyecuaa José pe ipau pe jare jei chupe:

—Epüa. Eraa sambiaí jare ichi pecua Egipto pe. Pepita joco pe amimbeu ye ndeve regua. Echa'ã Herodes uecacata sambiaí uyucaca vaerã —jei.

¹⁴ Jayave José upüa, jare pítu oí reve güiraa sambiaí jare ichi ivi Egipto coti. ¹⁵ Jare jae reta upita Egipto pe Herodes umano regua. Jucuarãi uyapo José, uyeyapo vaerã Tumpa iñee aracae umimbeu vae rupi yandeYa jei vae. Echa'ã jei cuarãi: “Egipto güi aeni cheRai.”

¹⁶ Jayave Herodes uicuaa jocua yasitata re uyemböe vae reta uyapo'ã co jae jei vae. Jáeramo tanta rupi pochi jare omondo sundaro reta uyua vaerã opaete sambiaí cuimbae mi retañö Belén pe jare Belén iyipi rupi ñugüinoi vae reta ndei mocui año güinoi vae. Echa'ã yasitata re uyemböe vae reta opou Herodes pe yave, Herodes upirandu cavi chupe reta quirãi yave ra uecha yasitata.

¹⁷ Jare jucuarãi uyeyapo Tumpa iñee aracae umimbeu vae Jeremías jei vae. ¹⁸ Echa'ã jei cuarãi:

“Ramá pe uyendu ñee.

Uyendu uyao ñugüinoi tuicha ipiatiti vae reta.

Raquel uyao oí imembi reta re.

Ipuere'ã etei quía umbipiacatu imembi reta umano ma ramo.”

Jucuarãi jei.

¹⁹ Ërei Herodes umano ma yave, José Egipto pe oí rambueve, penti ángel yandeYa pe uyeyocui vae uyecuaa José pe ipau pe. ²⁰ Jare jei chupe:

—Epüa. Eraa ye sambiaí jare ichi Israel pegua reta iivi pe. Echa'ã uipota tēi uyucaca sambiaí vae reta umano ma —jei.

²¹ Jayave José upüa jare güiraa sambiaí jare ichi Israel pegua reta iivi pe. ²² Ërei uyandu quirãi Arquelao ico mburuvicha guasurã Judea pe. Echa'ã Arquelao Herodes tai co. Jayave José uquiye oo vaerã Judea pe. Ërei Tumpa umimbeu José pe ipau pe oo vaerã ivi Galilea pe. Jáeramo jocoti oo. ²³ Jare José oo uvãe penti tenta guasu Nazaret jee vae pe jare joco pe ico, uyeyapo vaerã Tumpa iñee aracae umimbeu vae reta jei vae. Echa'ã jei reta cuarãi: “Ñru vae reta umbijeeta penti Nazaret pegua.”

3

Juan upurumbibautiza vae umimbeu Tumpa iñee

(Mr 1.1-8; Lc 3.1-20; Jn 1.19-28)

¹ Jocua ara reta rupi ou Juan ñana Judea pe oí vae pe upurumbibautiza jare umimbeu Tumpa iñee. ² Jae jei:

—Peeya piyemingueta icavi mbae vae pepia pe oĩ vae. Echa'ã outa ma uvãe mboroyocua ara pegua —jei.

³ Tumpa iñee araca umimbeu vae Isaías jee vae imiari Juan re. Echa'ã Isaías jei cuarãi: “Jae iñeeãta reve jeita ñana pe: ‘Piyapicatu yandeYa japerã. Pemisimi tape.’ ” Jucuarãi jei.

⁴ Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembíu co jae tucu jare ei ñana rupigua. ⁵ Jare jeta Jerusalén pegua reta jare Judea pegua reta jare jeta tenta iãca Jordán iyipi rupi ñugüinoi vae pegua reta yugüiraa Juan oĩ vae pe. ⁶ Jare Juan umbibautiza reta iãca Jordán pe imbaeyoa reta opa umimbeu yave. ⁷ Jare jeta fariseo reta jare saduceo reta yugüeru Juan oĩ vae pe, jae umbibautiza vaerã. Jare Juan uecha reta yave, jei chupe reta:

—Pe reta co jae mboi reta rami. ¿Quía pa umimbeu peve piyero vaerã Tumpa coti agüiye vaerã Tumpa uiporara peve? ⁸ Piyapo icavi vae, jucuarãi picuaaca vaerã añetete peeya co piyemingueta icavi mbae vae pepia pe oĩ vae. ⁹ Agüiye pere piyupe pepia pe: ‘Yandetenondegua co jae Abraham.’ Echa'ã che jae peve cua: Tumpa ipuere uyapo cua ita reta güi Abraham iñemoña retarã —jei Juan chupe reta—. ¹⁰ Yamijaanga penti temiti. Temiti ía icavi'ã yave, iya uyasia japo reve jare uapi. Jae ramiño vi piyapo'ã yave icavi vae, Tumpa uiporacata peve —jei—. ¹¹ Che pumbibautiza i pe piyemingueta icavi mbae vae pepia pe oĩ vae peeya yave. Ërei cheraicue rupi outa ipuere ete chegüi vae. Jupi'ã co che amboi araa vaerã ipipasa. Jae pembibautizata Espiritu Santo pe jare tata pe —jei—. ¹² Jae co trigo uipoo vae rami. Echa'ã trigo uipoo vae umbiveve trigo uequi vaerã iti. Jayave uñuvatu trigo jiru pe. Ërei uapi iti tata pe. Tata Cristo uiporuta vae opa mbae vae co —jei.

Juan umbibautiza Jesús
(Mr 1.9-11; Lc 3.21-22)

¹³ Jare Jesús ou Galilea güi uvãe Jordán pe Juan oĩ vae pe, Juan pe uyembibautizaca vaerã. ¹⁴ Ërei Juan ñatëi umbibautiza Jesús. Jáeramo jei chupe: —¿Maera pa ndipota che numbibautiza vaerã? Echa'ã icavi co nde chembibautiza vaerã —jei.

¹⁵ Jayave Jesús jei chupe: —Icavi co nde chembibautiza vaerã añave. Echa'ã jucuarãi icavi co yayapo vaerã opaete jupi vae —jei.

Jayave Juan umbibautiza Jesús. ¹⁶ Jare Juan umbibautiza ma yave, Jesús oë i güi. Jare jupivoi uecha ara uyepea oĩ, jare uecha vi Tumpa iEspiritu ugüeyi jese picasu rami. ¹⁷ Jare jupivoi uyendu ñee ara güi jei:

—Cua co jae cheRai aau ete vae. Chembiyerovia ete —jei.

4

Aña guasu umingueta Jesús uyavica vaerã tõi chupe
(Mr 1.12-13; Lc 4.1-13)

¹ Jayave Espiritu Santo güiraa Jesús ñnaa pe. Jare joco pe aña guasu umingueta uyavica vaerã tõi chupe. ² Jare Jesús jou'ã mbae ave cuarenta ara. Jáeramo cuarenta ara uasa ma yave, iyembai. ³ Jayave aña guasu umingueta uyavica vaerã tõi chupe.

—Nde co jae Tumpa Tai yave, ere cua ita reta pe uyeyapo vaerã mbiyaperã —jei.

⁴ Ërei Jesús jei chupe: —Tumpa iñee pe uyecuatía oĩ cuarãi: ‘Icavi co ivi pegua reta jou vaerã mbiyape güinoi vaerã tecove. Ërei icavi ete co uyapisaca vaerã Tumpa iñee re jare uyapo vaerã jei vae güinoi vaerã tecove opa mbae vae.’

Jucuarãi uyecuatía oĩ —jei.

⁵ Jayave aña guasu güiraa Jesús Jerusalén pe jare umbuyupi Tumpa jo iyapite re. ⁶ Jayave jei chupe:

—Nde co jae Tumpa Tai yave, ea cua güi. Echa'ã Tumpa iñee pe uyecuatía oĩ cuarãi: ‘Tumpa oyocuita ángel reta uyandareco vaerã nderé. Ipo pe ndepisi ndeocota reta, agüiye vaerã ndepi uyererocua ita re.’

Jucuarãi uyecuatía oĩ —jei.

⁷ Jayave Jesús jei chupe:

—Tumpa iñee pe uyecuatía oĩ cuarãi: ‘Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.’ Jucuarãi uyecuatía oĩ —jei.

⁸ Jayave aña guasu güiraa Jesús penti ivitu guasu ivate vae re jare uechaca chupe opaete mburuvicha guasu reta iporoyocuaa ivi pe ñugüinoi vae reta opaete ipõra vae reve. ⁹ Jayave aña guasu jei chupe:

—Tamee ndeve opaete cua, ndiyeatica yave chembiadora vaerã.

¹⁰ Jayave Jesús jei chupe:

—Esiri chegüi, Satanás. Echa'ã Tumpa iñee pe uyecuatía oĩ cuarãi: ‘Che co jae ndeYa Tumpa. Chembiadora. Jaeño cheve iyeyocui.’ Jucuarãi uyecuatía oĩ —jei.

¹¹ Jayave aña guasu usiri Jesús güi, jare jupivoi yugüeru ángel reta ombori Jesús.

Jesús umbipi iparaviqui

(Mr 1.14-15; Lc 4.14-15)

¹² Jare Jesús uicuaa ma yave Juan uyemiñgueca ma co peresoriru pe, oo Galilea pe. ¹³ Oo Nazaret güi uvãe tenta guasu Capernaum pe jare joco pe íco, (Capernaum oĩ i guasu jembei pe Zabulón jare Neftalí ivi pe) ¹⁴ uyeyapo vaerã Tumpa iñee aracae umimbeu vae Isaías jei vae. Echa'ã jae jei cuarãi:

¹⁵ “Zabulón ivi jare Neftalí ivi, i guasu jembei pe, Jordán jovaicho pe, Galilea judío mbae vae reta pegua.

¹⁶ Pitumimbi pe yugüireco vae reta uecha ma tembipe tuicha vae.

Mano iguarasía pe yugüireco vae reta pe uyecuaa tembipe.”

Jucuarãi jei.

¹⁷ Jayave Jesús umbipi umimbeu Tumpa iñee. Jae jei:

—Peeya piyemingueta icavi mbae vae pepia pe oĩ vae. Echa'ã outa ma uvãe mboroyocuaa ara pegua —jei.

Jesús ueni irundi cuimbae pira uipisi vae reta

(Mr 1.16-20; Lc 5.1-11)

¹⁸ Jare uguata rambueve Galilea pe i guasu jembei rupi, Jesús uecha Simón - jae co Pedro jee vae - jare Simón tiví Andrés jee vae. Jae reta omombo ñugüinoi pisa i guasu pe, pira uipisi vaerã. Echa'ã jae reta pira uipisi vae reta co. ¹⁹ Jare Jesús jei chupe reta:

—Peyu cherupíe, jare che chembaepuere pe pemboeta ñru vae reta güirovia vaerã cheré.

²⁰ Jayave jae reta ueya voi ipisa, jare yugüiraa jae jupíe.

²¹ Jesús oo catu ye joco güi, jare uecha Zebedeo tai reta. Pentí jee Jacobo jare tiví jee Juan. Uyapicatu ñugüinoi pisa reta chalana pe tu ndive. Jayave Jesús ueni. ²² Jayave jae reta ueya voi chalana jare tu, jare yugüiraa jae jupíe.

Jesús omboe jeta vae

(Lc 6.17-19)

²³ Jare Jesús oo opaete Galilea rupi, jare oporomböe judío reta itupaopao rupi. Umimbeu ñee icavi vae Tumpa iporoyocuaa pegua, jare umbigüera imbaerasi vae reta ipotave mbaerasi güi. ²⁴ Jare opaete ivi Siria pegua reta uyandu Jesús uyapo vae regua. Jare ñru vae reta güeru jae oĩ vae pe imbaerasi vae reta. Amocue vae uiporara ete jasi vae, jare aña oya amocue vae re, jare amocue vae imbiquere, jare amocue vae ipuere mbae omi vae. Jayave Jesús umbigüera reta. ²⁵ Jare yugüiraa Jesús jaicue jeta vae Galilea güi, jare ivi Decápolis jee vae güi, jare Jerusalén güi, jare Judea güi, jare iäca Jordán jovaicho güi.

5

Ivitu guasu re Jesús jei vae

(Lc 6.20-23)

¹ Jare Jesús jeta vae reta uecha yave, uyupi penti ivitu guasu re. Joco pe uguapi oĩ, jare jemimboe reta yugüeru jae oĩ vae pe. ² Jayave Jesús umbipi omböe reta. ³ Jei chupe reta:

—Tuyerovia icoi Tumpa ueca vae reta. Echa'ã Tumpa umeeta chupe reta yugüireco vaerã mboroyocuaa ara pegua pe —jei—. ⁴ Tuyerovia ipiatiti vae reta. Echa'ã Tumpa umbipiacatuta reta —jei—. ⁵ Tuyerovia uñemimichi vae reta. Echa'ã Tumpa umeeta chupe reta ivi imbaerã —jei—. ⁶ Tuyerovia iquirëi jupi vae uyapo vae reta. Echa'ã Tumpa umbujupita reta —jei—. ⁷ Tuyerovia ñru vae reta uiparareco vae reta. Echa'ã Tumpa uipararecota reta —jei—. ⁸ Tuyerovia ipia iquia mbae vae reta. Echa'ã uechata reta Tumpa —jei—. ⁹ Tuyerovia ñru vae reta umbipiacatu vae reta. Echa'ã Tumpa jeita chupe reta: ‘Pe co jae cheraí reta’ —jeita, jei—. ¹⁰ Tuyerovia jupi vae uyapo ramo ñru vae reta icavi mbae vae uyapo chupe vae reta. Echa'ã Tumpa umeeta chupe reta yugüireco vaerã mboroyocuaa ara pegua pe —jei—.

¹¹ Īru vae reta jeita icavi mbae vae peve jare uyapota icavi mbae vae peve. Ipotave icavi mbae vae jeita pecoti iyapu reve, pe reta cherau ramo. Ērei piyeroviaño peī —jei—. ¹² Piyerovia ete. Echa'ā Tumpa güinoi ara pe mbae icavi ete vae pembaerā. Echa'ā jae reta itenondegua reta uyapo cua nunga icavi mbae vae Tumpa iñee aracae umimbeu vae reta pe —jei—.

Yuqui rami vae

(Mr 9.50; Lc 14.34-35)

¹³ Pe reta co jae yuqui rami cua ivi pe. Ērei yuqui jembochi'ā ma yave, ¿quirāita ra jembochi ye? Icavi'ā ma mbaerā. Icavi co yamombo vaerā jare ñapīro jese vaerā —jei—.

Mechero rami vae

¹⁴ Pe reta co jae penti mechero ivi pegua reta pe tembipe umee vae rami. Yayapo yave tenta guasu penti ivitu re, yandepuere'ā etei ñañomi. Opaete vae ipuere uecha —jei—. ¹⁵ Jae ramiño vi mechero yamiendi yave, ndarau ñañono yapepo uyembovapo oī vae igüi pe. Ñañono co mechero jenda pe, opaete o pe ñugüinoi vae reta güinoi vaerā tembipe —jei—. ¹⁶ Mechero umee yandeve tembipe. Jae ramiño vi pe reta pico cavi ĩru vae reta jovaque, jae reta uicuaa vaerā pe reta piyapo co icavi vae. Echa'ā jucarāi yave, umbiadorata reta peRu ara pe oī vae —jei—.

Jesús jare mboroyocui

¹⁷ Aramoi pe reta pepia pe piyemingueta che ayu co ambai vaerā Moisés iporoyocui jare Tumpa iñee aracae umimbeu vae reta jei vae. Ērei jucarāi'ā co. Che ayu ayapo vaerā, ayu'ā co ambai vaerā —jei—. ¹⁸ Añete che jae peve, ara jare ivi uasa regua ndarau uyembai penti cuatia michi ete vae yepe Moisés iporoyocui güi ndei opaete uyeyapo mbove —jei—. ¹⁹ Ime yave quía penti mboroyocui michi vae uyapo'ā jare umimbeu ĩru vae reta pe agüiye vaerā uyapo vae, ĩru vae reta jeita jae co taicuegua vae mboroyocua ara pegua pe. Ērei ime yave quía uyapo jare umimbeu ĩru vae reta pe uyapo vaerā vae, ĩru vae reta jeita jae co tenondegua vae mboroyocua ara pegua pe —jei—. ²⁰ Echa'ā che jae peve cua: Jupi vae pe reta piyapo vae jupi ete'ā yave jupi vae mboroyocui re oporomboe vae reta jare fariseo reta uyapo vae güi, ndarau etei pico mboroyocua ara pegua pe —jei—.

Jesús iporomboe mbochi regua

(Lc 12.57-59)

²¹ Piyandu ma quirāi Moisés jei yandetenondegua reta pe cuarāi: 'Agüiye epuruyua. Echa'ā upuruyua vae uñeācata co.' Jucarāi jei —jei—. ²² Ērei che jae peve, ime yave quía pochi tiví pe vae, uñeācata co. Jare ime yave quía tiví güiriro vae, judío reta itenondegua reta uāata. Jare ime yave quía tiví pe: 'Nembiquere', jei vae, tata guasu pe uiporarata —jei—. ²³ Jáeramo nderu yave penti ofrenda uñemearenda pe, jare joco pe nemandúa yave quirāi nderivi pochi ndeve mbae re, ²⁴ eeya joco pe jocua ofrenda uñemearenda jovai. Ecuá rani iyeyapicatu nderivi ndive. Jayave taicue rupi ndepuereta neme jocua ofrenda Tumpa pe —jei—.

²⁵ Iyeyapicatu imambae uipota uñeapo nderé mbae re vae ndive jae ndive ndeo ram-bueve tape rupi mburuvicha oī vae coti. Echa'ā ndiyeyapicatu'ā yave, uñeapota nderé mburuvicha pe, jare mburuvicha nemondota peresoriru iyandarecoa pe jare peresoriru iyandarecoa neñonota peresoriru pe —jei—. ²⁶ Añete che jae ndeve, ndarau etei neé peresoriru güi ndei opaete ndepía nembiepi mbove —jei—.

Jesús iporomboe menda re uyuvanga vae regua

²⁷ Piyandu ma quirāi Moisés jei yandetenondegua reta pe cuarāi: 'Agüiye iyuvanga menda re.' Jucarāi jei —jei—. ²⁸ Ērei che jae peve, ime yave quía uma cuña re uipota reve vae, uyuvanga ma menda re ipia pe —jei—. ²⁹ Jare nderesa ndeacata cotigua uyapoca yave mbaeyoa ndeve, enoē emombo ndiyugüi. Icavi co penti nderesa ucañi vaerā ndegüi, tata guasu pe opaete nderete reve Tumpa nemondo vaerā tēi güi —jei—. ³⁰ Jae ramiño vi ndepo ndeacata cotigua uyapoca yave mbaeyoa ndeve, iyasia emombo ndiyugüi. Icavi co penti ndepo ucañi vaerā ndegüi, tata guasu pe opaete nderete reve Tumpa nemondo vaerā tēi güi —jei—.

Jesús iporomboe omombo jembireco vae regua

(Mt 19.1-10; Mr 10.1-12; Lc 16.18)

³¹ Aracae Moisés jei vi cuarāi: 'Jembireco omombo vae tumee chupe tupapire umimbeu vaerā pipe omombo ma vae co.' Jucarāi jei —jei—. ³² Ērei che jae peve, penti cuimbae ipuere omombo jembireco, cuña aguasa uyapo yave. Ērei cuña uyapo'ā yave aguasa jare cuimbae omombo yave jembireco, jocua cuña uyuvanga co menda re umenda yave ĩru

cuimbae ndive. Jae ramiño vi jocua cuimbae cuña ndive umenda vae uyuvanga co menda re —jei—.

Jesús iporomboe Tumpa jee re jei vae

³³ Piyandu ma quirái Moisés jei yandetenondegua reta pe cuarái: ‘Agüiye ere: YandeYa jee re ayapota, ndepurumbítaví vaerá. Echa’á ndere yave: YandeYa jee re ayapota, iyapo.’ Jucuarái jei —jei—. ³⁴ Èrei che jae peve, agüiye ere jucuarái. Agüiye ere: ‘Ara jee re ayapota.’ Echa’á ara Tumpa iguapia co. ³⁵ Agüiye vi ere: ‘Ívi jee re ayapota.’ Echa’á ívi Tumpa ipi jenda co. Agüiye vi ere: ‘Jerusalén jee re ayapota.’ Echa’á Jerusalén Mburuvicha Guasu mbaepuere güinoi vae jenta guasu co. ³⁶ Agüiye vi ere: ‘Cheáca jee re ayapota.’ Echa’á ndepuere’á ndiyapo ndea tí ani jü —jei—. ³⁷ Èrei ndipota yave ndere: ‘Ayapota’, ere: ‘Ayapota.’ Jae ramiño vi ndipota yave ndere: ‘Ndarau ayapo’, ere: ‘Ndarau ayapo.’ Echa’á jeta cua güi ndere yave, ndiyapota icavi mbae vae —jei—.

Jesús iporomboe uyeepe vae regua

(Lc 6.27-31)

³⁸ Piyandu ma quirái Moisés aracae jei cuarái: ‘Ime yave quía ñru vae jesa urucumegua vae, ñru vae reta turucumegua vi jae jesa. Jae ramiño vi ime yave quía ñru vae jái omopê vae, ñru vae reta tomopê vi jae jái.’ Jucuarái jei —jei—. ³⁹ Èrei che jae peve, emaeño ñru vae re uyapo vaerá ndeve icavi mbae vae. Ime yave quía ocua nderovaique re vae, erova ipuere vaerá ocua ye jovaicho re. ⁴⁰ Jae ramiño vi ime yave quía ñneapo nderé ndecamisa upíro vaerá ndegüi vae, emaeño jese upíro vaerá ndegüi ndeasoya vi —jei—. ⁴¹ Jae ramiño vi ime yave quía ndeocui nderaa vaerá jivita penti kilómetro, eraa chupe mocui kilómetro rupi —jei—. ⁴² Jae ramiño vi ime yave quía uyerure ndeve mbae re vae, emee chupe, jare ime yave quía mbae uiporu ndeve vae, iporuca chupe —jei—.

Peau perovaicho reta

(Lc 6.27-36)

⁴³ Piyandu ma quirái Moisés aracae jei cuarái: ‘Eau neñru jare emítarêi nderovaicho.’ Jucuarái jei —jei—. ⁴⁴ Èrei che jae peve, peau perovaicho reta. Piyerure Tumpa pe umivendise vaerá uyepipeyu peré vae reta. Piyapo icavi vae pemítarêi vae reta pe. Piyerure Tumpa pe icavi mbae vae uyapo peve vae reta re —jei—. ⁴⁵ Jucuarái piyapo yave, picota peRu ara pe oí vae tai retará. Echa’á peRu umee guarasi icavi mbae vae uyapo vae reta jare icavi vae uyapo vae reta pe, opaete vae güinoi vaerá tembipe. Jae ramiño vi umee ama jupi vae reta jare jupi mbae vae reta pe, opaete vae güinoi vaerá i —jei—. ⁴⁶ Echa’á peau yave perau vae retaño, jocua mbaeti etei co mbae icavi vae. Jáeramo Tumpa ndarau umee peve mbae jocua jeco pegua. Echa’á mburuvicha peguará ocovara vae reta vi uyapo jucuarái —jei—. ⁴⁷ Jae ramiño vi pembisaluda picuáva reve vae periví retaño, jocua mbaeti etei co mbae icavi vae. Echa’á upurugüirovia mbae vae reta vi uyapo jucuarái —jei—. ⁴⁸ Jáeramo jecuaeño piyapo icavi vae. Echa’á peRu ara pe oí vae jecuaeño uyapo icavi vae —jei—.

6

Quirái neme vaerá mbae iparavete vae reta pe

¹ Jupi vae piyapo yave, agüiye piyapo opaete vae jovaque jae reta uecha vaeraño. Echa’á piyapo yave opaete vae jovaque, peRu ara pe oí vae ndarau umee peve mbae jocua jupi vae piyapo vae jeco pegua —jei—.

² Jáeramo neme mbae iparavete vae reta pe yave, agüiye iyapo upurumbítaví vae reta uyapo rami. Echa’á jae reta omondo jenonde judío reta itupao reta pe jare calle rupi uyemimbi vae, ñru vae reta icavi uyemingueta jese vaerá umee mbae iparavete vae reta pe yave. Añete che jae peve, jocua upurumbítaví vae reta güinoita’á imbaerá jucuarái uyapo ramo —jei—. ³ Èrei nde neme mbae iparavete vae reta pe yave, agüiye tuicuaa ndepo ndeaso cotigua ndepo ndeacata uyapo vae, ⁴ agüiye vaerá quía ye uicuaa nde ndiyapo vae regua. Èrei ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

Jesús oporomboe yerure re

(Lc 11.1-4)

⁵ Jare ndiyerure Tumpa pe yave, agüiye iyapo upurumbítaví vae reta uyapo rami. Echa’á jae reta uyerure Tumpa pe yave, uipota quía reta uecha vaerá. Jáeramo uyemboi judío reta itupao reta pe jare calle uyerea pe uyerure Tumpa pe yave. Añete che jae peve, jocua upurumbítaví vae reta güinoita’á imbaerá jucuarái uyapo ramo —jei—. ⁶ Èrei nde ndiyerure Tumpa pe yave, ique ndero pe jare iyukuenda onque. Jayave iyerure ndeRu pe

quía reta uicuaa mbae reve. Jare ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

⁷ Ērei piyerure Tumpa pe yave, agüiye iyapo upurugüirovia mbae vae reta uyapo rami. Echa'ã jae reta jecuaeño umbiaicuerecuere jei penti vaeño. Echa'ã ipia pe uyemingueta tēi Tumpa uyapisacata jese reta jucuarāi uyapo yave —jei—. ⁸ Jáeramo agüiye piyapo jae reta uyapo rami. Echa'ã peRu uicuaa mbae uata peve vae ndei piyerure chupe jese mbove —jei—. ⁹ Jáeramo piyerure Tumpa pe cuarāi:

'OreRu ara pe neĩ vae, tuyembiaadoraca nderee.

¹⁰ Tou ndeporoyocua.

Tuyeyapo nde ndere vae cua ivi pe ara pe uyeyapo oĩ rami.

¹¹ Emee oreve opa ara orerembiurā.

¹² Embiasa oreve orembaeyoa reta, ore numbiasa ipotave iyoa orecoti vae pe rami.

¹³ Jare agüiye emaeño aña guasu re uyapoca vaerā oreve mbaeyoa.

Orerepi aña guasu güi.

Echa'ã nembae co mboroyocua.

Nde nenoĩ opaete mbaepuere.

Opaete vae nembiaadorata jaeño mai pegua.

Amén.'

Jucuarāi piyerure —jei—.

¹⁴ Echa'ã pe reta pembiasa yave iyoa pecoti vae reta, peRu ara pe oĩ vae umbiasata vi peve pembaeyoa reta —jei—. ¹⁵ Ērei pembiasa'ã yave iyoa pecoti vae reta, peRu ndarau vi umbiasa peve pembaeyoa reta —jei—.

Tembíu güi uyecuacu vae reta

¹⁶ Piyecuacu tembiu güi yave, agüiye piyapo upurumbitavi vae reta uyapo rami. Echa'ã jae reta uyecuacu tembiu güi yave, uyecuua ipiatiti, ĩru vae reta uicuaa vaerā uyecuacu co ñugüinoĩ tembiu güi. Añete che jae peve, jae reta güinoita'ã imbaerā jucuarāi uyapo ramo —jei—. ¹⁷ Ērei nde tembiu güi ndiyecuacu yave, iyapicatu ndea jare iyovae, ¹⁸ agüiye vaerā ĩru vae reta uicuaa ndiyecuacu co neĩ tembiu güi. Jaeño ndeRu uicuaata ndiyecuacu co neĩ tembiu güi vae. NdeRu uicuaata nde ndiyapo viari vae jare umeeta ndeve mbae opaete vae jovaque —jei—.

Piñuvatu mbaembae icavi vae piyupegarā ara pe

(Lc 12.32-34)

¹⁹ Agüiye piñuvatu cua ivi pe jeta mbaembae icavi vae piyupegarā. Echa'ã cua ivi pe cupiĩ reta urucumegua mbaembae jare ĩru mbaembae iyuquĩri urucumegua, jare imonda vae reta uique viari mbaembae oñomi vaerā —jei—. ²⁰ Piñuvatu mbaembae icavi vae piyupegarā ara pe. Echa'ã joco pe ndarau cupiĩ reta urucumegua vaerā mbaembae jare ndarau mbae iyuquĩri, jare ndarau imonda vae reta uique viari mbaembae oñomi vaerā —jei—. ²¹ Echa'ã piñuvatu yave mbaembae icavi vae piyupegarā ivi pe, jecuaeño pepia pe piyeminguetata ivi pegua re. Ērei piñuvatu yave mbaembae icavi vae piyupegarā ara pe, jecuaeño pepia pe piyeminguetata ara pegua re —jei—.

Tembipe yanderete pegua

(Lc 11.34-36)

²² Tembipe uique yanderete pe yanderesa rupi. Icavi yave nderesa, nderete tineeta tembipe pe. ²³ Ērei icavi'ã yave nderesa, nderete tineeta pĩtumimbi pe. Nderete tineeta tēi tembipe pe. Ērei tinee yave pĩtumimbi pe, pĩtumimbi ete co —jei—.

Mocui patrón

(Lc 16.13)

²⁴ Pentĩ uyeyocui vae uipota yave uyeyocui mocui patrón pe, umitarēita pentĩ patrón jare uaata ĩru vae, ani uparaviqui cavita patrón pe jare güĩrĩrota ĩru vae. Pepuere'ã piyeyocui Tumpa pe corepoti peau reve —jei—.

Agüiye piyemipia'ã mbaembae re

(Lc 12.22-31)

²⁵ Jáeramo che jae peve, agüiye piyemipia'ã mbae re. Agüiye piyemipia'ã perembiurā vae re. Jae ramiño vi agüiye piyemipia'ã peremimonderā vae re. Ndarau pepuere pico cavi jecuaeño piyemipia'ã yave perembiurā vae re jare peremimonderā vae re —jei—. ²⁶ Pemae güira reta re. Jae reta umaeti'ã jare umbaeviro'ã. Uñuvatu'ã vi avati avatío pe. Ērei peRu ara pe oĩ vae umingarũ reta. Jare Tumpa perau ete güira reta güi —jei—. ²⁷ Aramoĩ piyemipia'ã pipota tēi pepucu ramo. Ērei ndarau etei pepuere piyembicuacuaa pepucu ete vaerā —jei—

²⁸ ¿Maera pa piyemipia'ã peremimonderã vae re? Pemaie mbaepoti reta re, quirãi ucuacuaa reta. Uparaviqui'ã reta. Umaepova'ã reta vi. ²⁹ Èrei che jae peve, mbaepoti reta ipõra ete Salomón jemimonde ipõra vae güi. ³⁰ Tumpa omopõra ñana, yepe tõi penti ara ñana oĩ co pe jare piareve pe ocai. Jáeramo Tumpa umeeta co peve peremimonderã. Michi ete co pepurugüirovia —jei—. ³¹ Agüiye piyemipia'ã mbae re. Agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re —jei—. ³² Echa'ã opaete ivi pegua reta uyemipia'ã cua mbaembae re. Jare peRu ara pe oĩ vae ucucaa icavi co penoi vaerã opaete cua mbaembae —jei—. ³³ Èrei icavi co pipota ete vaerã Tumpa iporoyocua jare pipota vaerã piyapo jupi vae Tumpa jupi vae uyapo rami. Jucuarãi yave, Tumpa umeeta peve opaete cua mbaembae —jei—. ³⁴ Jáeramo agüiye piyemipia'ã piareve peguarã vae re. Echa'ã piareve pe uyeyapo yeta mbae pemipia'ã vaerã. Opa ara uyeyapo mbaembae pemipia'ã vaerã —jei—.

7

Agüiye piñera ñru vae re
(Lc 6.37-38, 41-42)

¹ Agüiye piñera ñru vae re, agüiye vaerã ñru vae iñera peré. ² Echa'ã piñera yave ñru vae re, ñru vae iñerata vi peré. Jae ramiño vi icavi vae piyapo yave ñru vae pe, ñru vae uyapota vi icavi vae peve. Jae ramiño vi icavi mbae vae piyapo yave ñru vae pe, ñru vae uyapota vi icavi mbae vae peve —jei—. ³ Agüiye emae iti michi vae neñru jesa pe oĩ vae re, ime yave nenoĩ iti tuicha vae nderesa pe —jei—. ⁴ Ndarau ndepuere ndere neñru pe: 'Cherivi, taequi nderesa güi jocua iti michi vae.' Echa'ã nde nenoĩ iti tuicha vae nderesa pe —jei—. ⁵ Nde co jae upurumbitavi vae. Eequi rani iti tuicha vae nderesa güi. Jayave neme cavita ndepuere vaerã ndeequi iti michi vae neñru jesa güi —jei—.

⁶ Agüiye pemee mbae uñeñoño tee Tumpa peguarã vae yimba reta pe. Jae ramiño vi agüiye piñoño ita ipõra vae reta cuchi reta ñugüinoĩ vae rupi. Echa'ã jucuarãi piyapo yave, upirotata jese reta jare aramoi uyerovata pesuu vaerã —jei—.

Yerure regua
(Lc 11.9-13; 6.31)

⁷ Piyerure Tumpa pe mbae re, jare Tumpa umeeta peve. Peeca, jare pevãeta. Pembopu onque, jare onque uyepeta peve —jei—. ⁸ Echa'ã piyerure yave Tumpa pe mbae re, Tumpa umeeta peve. Jare peeca yave mbae, pevãeta. Jare pembopu yave onque, uyepeta peve —jei—. ⁹ Nde nenoĩ yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe —jei—. ¹⁰ Jae ramiño vi nderai uyerure yave ndeve pira re, ndarau nemee chupe penti mboi pira ipepica pe —jei—. ¹¹ Yepe tõi pe reta jecuaeño piyapo icavi mbae vae, èrei pemee co mbaembae icavi vae pesambiai reta pe. Jáeramo peRu ara pe oĩ vae iquirẽi umee mbaembae icavi vae uyerure chupe jese vae reta pe —jei—.

¹² Jáeramo piyapo ñru vae reta pe pipota ñru vae reta uyapo vaerã peve vae rami. Echa'ã cua co jae mboroyocui jei vae jare Tumpa iñee aracae umimbeu vae reta jei vae —jei—.

Onque ipi-rai vae
(Lc 13.24)

¹³ Pique onque ipi-rai vae rupi. Echa'ã onque ipiguasu vae rupi uique vae reta uguata tape ipiguasu vae rupi, èrei yugüiraa cañitei pe. Jare jeta vae uique jocua onque ipiguasu vae rupi —jei—. ¹⁴ Echa'ã onque ipi-rai vae rupi uique vae reta uguata tape ipi-rai vae rupi, èrei yugüiraa tecove opa mbae vae güinoĩ vae reta ñugüinoĩ vae pe. Jare mbovifo uvãe jocua onque ipi-rai vae —jei—.

Ía icavi vae jare ía icavi mbae vae
(Lc 6.43-45)

¹⁵ Amocue upurumbitavi vae reta jeita: 'Che co jae Tumpa iñee umimbeu vae.' Agüiye perovia. Jae reta jei peve uipota co umimbeu peve Tumpa iñee, èrei uipota uyapo icavi mbae vae peve —jei—. ¹⁶ Picuaata jae reta upurumbitavi vae reta co icavi mbae vae uyapo ramo. Yaequi'ã uva penti yai jãti vae güi. Jae ramiño vi yaequi'ã iva penti yai jãti vae güi —jei—. ¹⁷ Penti temiti icavi vae umee ía icavi vae. Jae ramiño vi penti temiti icavi mbae vae umee ía icavi mbae vae —jei—. ¹⁸ Penti temiti icavi vae umee'ã ía icavi mbae vae. Jae ramiño vi penti temiti icavi mbae vae umee'ã ía icavi vae —jei—. ¹⁹ Temiti ía icavi'ã yave, iya uyasia jare uapi —jei—. ²⁰ Jáeramo picuaata jae reta upurumbitavi vae reta co icavi mbae vae uyapo ramo —jei—.

Pucuaa'ã etei
(Lc 13.25-27)

²¹ Jeta vae jeita cheve: ‘CheYa, cheYa.’ Ērei amocue jucuarāi jei vae ndarau yugüireco mboroyocua ara pegua pe. Echa’ã jaeño cheRu ara pe oĩ vae jei vae uyapo vae reta yugüirecota joco pe —jei—. ²² Jeta vae jeita cheve jocua ara: ‘CheYa, cheYa, ore numimbeu Tumpa ñee nderee pe. Jae ramiño vi nderee pe numbisiri aña reta oya jese vae reta güi. Jae ramiño vi nderee pe nduyapo jeta miacañi reta.’ Jucuarāi jeita —jei—. ²³ Ērei che jeta chupe reta: ‘Che pucuaa’ã etei. Pesiri chegüi. Echa’ã pe reta piyapo icavi mbae vae.’ Jucuarāi jaeta —jei—.

Tenta iguapica
(Lc 6.46-49)

²⁴ Jáeramo ime yave quía uyapisaca cheré vae, jae uyapo yave che jae chupe uyapo vaerã vae, jae co penti cuimbae iyaracuaa vae jentarã uyapo vae rami. Echa’ã cuimbae iyaracuaa vae oñono jenta iguapicarã itape re —jei—. ²⁵ Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyaparata tēi tenta. Ērei uyapara’ã. Echa’ã iguapica oĩ penti itape re —jei—.

²⁶ Ērei ime yave quía uyapisaca cheré vae, uyapo’ã yave che jae chupe uyapo vaerã vae, jae co penti cuimbae iyaracuaa mbae vae jentarã uyapo vae rami. Echa’ã cuimbae iyaracuaa mbae vae uyapo jentarã ivicuñi re —jei—. ²⁷ Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyapara. Opa uyembai jocua tenta —jei—.

²⁸ Jare Jesús opaete cua jei ma yave, opaete uyapisaca jese vae reta ipiacañi iporomboe re. ²⁹ Echa’ã ombore reta mbaepuere güinoi vae rami. Jucuarāi’ã oporomboe mboroyocui re oporomboe vae reta.

8

Jesús umbigüera cuimbae ipire ocui vae
(Mr 1.40-45; Lc 5.12-16)

¹ Jare Jesús ugüeyi ma ivitu guasu güi yave, jeta yugüiraa jaicue. ² Jayave ou Jesús oĩ vae pe penti cuimbae ipire ocui vae. Uyeatica Jesús jovai.

—CheYa, ndipota yave, ndepuere chembigüera —jei chupe.

³ Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui’ã ma ipire. ⁴ Jayave Jesús jei chupe:

—Agüiye emimbeu quía pe. Ecu a iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei—.

Jesús umbigüera sundaro reta juvicha jembiocui
(Lc 7.1-10)

⁵ Jare Jesús oo uvãe yave Capernaum pe, ou jae oĩ vae pe penti sundaro reta juvicha uyerure vaerã chupe mbae re. ⁶ Jae jei Jesús pe:

—CheYa, cherembiocui imbaerasi oĩ cherenta pe. Ipuere’ã omi. Jasi ete oĩ chupe —jei—.

⁷ Jayave Jesús jei chupe:

—Taa tambigüera.

⁸ Ērei sundaro reta juvicha jei chupe:

—CheYa, agüiye ecua cherenta pe. Echa’ã mbae’ã co che. Ndepuere ndere cua güiño cherembiocui ucuera vaerã jare ucuera co —jei—. ⁹ Echa’ã ime mburuvicha mbaepuere güinoi cheré vae reta. Jae ramiño vi che anoi mbaepuere sundaro reta re. Che jae penti sundaro pe: ‘Ecu’, jare jae oo. Jae ramiño vi che jae ñru sundaro pe: ‘Eyu’, jare jae ou. Jae ramiño vi che jae cherembiocui pe: ‘Iyapo cua’, jare jae uyapo —jei—.

¹⁰ Jare Jesús cua uyandu yave, ipiacañi sundaro reta juvicha re, jare jei yugüiraa jaicue vae reta pe:

—Añete che jae peve, avãe’ã cua nunga mburugüirovia tuicha vae Israel pegua reta ipite pe. ¹¹ Jare che jae peve, jeta vae yugüeruta guarasi oẽ vae coti güi jare guarasi uique vae coti güi jare uguapita reta Abraham jare Isaac jare Jacob ndive mboroyocua ara pegua pe —jei—. ¹² Ērei mboroyocua pe yugüirecota tēi vae reta uyemombocata oca pe pitumimbi oĩ vae pe. Joco pe uyaota reta jare jai umbiquiririuta —jei—.

¹³ Jayave Jesús jei sundaro reta juvicha pe:

—Ndepuere ndeo. Ayapo ma ndipota ayapo vaerã vae nderovia cheré ramo —jei—.

Jare jocua ora pe etei sundaro reta juvicha jembiocui ucuera.

Jesús umbigüera Pedro jaicho
(Mr 1.29-31; Lc 4.38-39)

¹⁴ Jare Jesús uique Pedro jenta pe yave, uecha Pedro jaicho jacu oĩ jupa pe. ¹⁵ Jayave Jesús uipisi ipo pe jare jacu upita voi chugüi. Jayave cuña upũa jare emee mbae jou vaerã.

Jesús umbigüera jeta imbaerasi vae reta

(Mr 1.32-34; Lc 4.40-41)

¹⁶ Jare guarasi uique ma yave, tenta guasu pegua reta güeru Jesús pe jeta aña oya jese vae reta. Jayave Jesús oyocui aña reta usiri vaerã opaete oya jese vae reta güi, jare umbigüera opaete imbaerasi vae reta. ¹⁷ Jucuarãi uyapo Jesús uyeyapo vaerã Tumpa ifnee aracae umimbeu vae Isaias jei vae. Echa'a jae jei cuarãi: "Jae etei güiraa vandegüi yanembaerasi reta."

Jesús jupie uipota yugüiraa vae reta

(Lc 9.57-62)

¹⁸ Jare jeta yugüeru Jesús oĩ vae pe. Jare Jesús uecha yave, jei jemimboe reta pe yugüiraa vaerã i guasu jovaicho pe. ¹⁹ Jare penti mboroyocui re oporomboe vae ou Jesús oĩ vae pe jare jei chupe:

—Oporomboe vae, taa nderupie opaete que rupi ndeo vae rupi.

²⁰ Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerã ayeyapo vae mbaeti cherenta —jei.

²¹ Jare ñru jemimboe jei Jesús pe:

—CheYa, emaeño rani cheré aa vaerã aico cheru re umano regua.

²² Ërei Jesús jei chupe:

—Eyu cherupie. Tecove opa mbae vae güinoi mbae vae reta toñoti umano vae reta —jei.

Jesús umiquüi ivitu jare i guasu

(Mr 4.35-41; Lc 8.22-25)

²³ Jayave Jesús uyupi chalana pe jare jemimboe reta vi uyupi pipe. ²⁴ Jare ou ivitu tanta uyepeyu, jare i uyembiaparoaroa uique chalana pe, jare umitinee seri ma. Ërei Jesús oque oi. ²⁵ Jayave Jesús jemimboe reta yugüiraa omomba. Jei reta chupe:

—OreYa, orerepi. Ñamanota ma.

²⁶ Jayave Jesús jei chupe reta:

—¿Maera pa pequiye? Michi ete co pepurugüirovia —jei.

Jayave upüa jare ñneengata ivitu jare i guasu pe. Jare opaete voi quüi ngatu upita. ²⁷ Jare Jesús jemimboe reta ipiacañi jare jei:

—¿Mbae nunga cuimbae pa cua? Ivitu jare i guasu uyapo jae oyocui vae.

Mocui cuimbae aña oya jese vae reta

(Mr 5.1-20; Lc 8.26-39)

²⁸ Jayave yugüiraa uvãe i guasu jovaicho pe, gadareno reta iivi pe. Jare yugüeru teögüerirurenda güi oovãiti Jesús mocui cuimbae aña oya jese vae reta. Pochi reta. Jáeramo mbaeti quía ipuere uguata jocua tape rupi. ²⁹ Jare jae reta ifneeãta reve jei:

—¿Maera pa ndeyu oremambeco, Jesús? Nde co jae Tumpa Tai. ¿Ndeyu pa ndiporaraca oreve añave? Taicue rupi ramo co ndiporaracata tēi oreve —jei reta.

³⁰ Jare mbiri catu jeta cuchi reta ucara ñugüinoi. ³¹ Jare aña reta uyerure Jesús pe:

—Cua cuimbae reta güi orembisiri yave, emaeño oreré ndoo vaerã ndoya cuchi reta re.

³² Jayave Jesús jei chupe reta:

—Pecua.

Jare yugüiraa ma yave cuimbae reta güi, aña reta yugüiraa oya cuchi reta re. Jayave opaete cuchi reta tanta osi ivia rupi oa i guasu pe, jare joco pe opa ipitupa reta.

³³ Jayave cuchi iyandarecoa reta opa osi, jare yugüiraa tenta guasu pe, jare umimbeu joco pegua reta pe opaete uyeyapo vae regua. Umimbeu vi chupe reta mbae aña oyase jese vae reta pe uyeyapo vae. ³⁴ Jayave opaete joco pegua reta yugüeru oovãiti Jesús. Jare uecha yave, umiñera oo ye vaerã jae reta iivi güi.

9

Jesús umbigüera cuimbae ipuere mbae omi vae

(Mr 2.1-12; Lc 5.17-26)

¹ Jare Jesús uyupi ye penti chalana pe jare oo ye i guasu jovaicho pe. Jayave oo uvãe jenta guasu pe. ² Jayave amocue vae güeru penti cuimbae imbaerasi vae. Cua cuimbae ipuere mbae omi vae. Jupa pe oi. Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Iyerovia, cherivi. Nembaeyoa reta uyembai ma —jei.

³ Jayave amocue mboroyocui re oporomboe vae reta ipia pe uyemingueta: "Cua cuimbae jei icavi mbae vae Tumpa coti."

⁴ Ërei Jesús uicuaa jae reta ipiayemingueta, jare jei chupe reta:

—¿Maera pa penoi pepia pe yemingueta icavi mbae vae reta? ⁵ Chepuere jae cua cuimbae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epüa eguata.’ ¿Mbae nunga pa yavai jae vaerã? —jei—. ⁶ Ërei aipota picuaa vaerã cua: Che cuimbaerã ayeyapo vae chepuere ambiasa quía pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

—Epüa evoi nderupa, jare ecua nerenta pe.

⁷ Jayave cuimbae upüa, jare oë oo jenta coti. ⁸ Ërei jeta joco pe ñugüinoi vae reta uecha yave, uquiye jare umbiadora reta Tumpa, mbaepuere tuicha vae umee Jesús pe ramo.

Jesús ueni Mateo

(Mr 2.13-17; Lc 5.27-32)

⁹ Jare Jesús joco güi oo yave, uecha penti cuimbae Mateo jee vae uguapi oĩ mburuvicha peguarã ocovara ñugüinoi vae pe, jare jei chupe:

—Eyu cherupie.

Jayave Mateo upüa, jare oo jae jupíe.

¹⁰ Jare Jesús ucaru oĩ rambueve Mateo jenta pe, jeta mburuvicha peguarã ocovara vae reta jare teco icavi mbae vae uyapo vae reta yugüeru ucaru vaerã Jesús jare jemimboe reta ndive. ¹¹ Jare fariseo reta cua uecha yave, jei Jesús jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

¹² Ërei Jesús cua uyandu yave, jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. ¹³ Pecua piyemboe mbae uipota jei cua: ‘Aipota pepuruparareco vaerã, aipota'ã maemimba uyeyucacue reta pemee cheve vaerãño.’ Echa'ã che ayu aeca vaerã iyoa vae reta. Ayu'ã aeca vaerã jupi vae reta —jei.

Maera Jesús jemimboe reta uyecuacu'ã tembiú güi

(Mr 2.18-22; Lc 5.33-39)

¹⁴ Jayave yugüeru Juan jemimboe reta Jesús oĩ vae pe jare upirandu chupe:

—¿Maera pa ore jare fariseo reta nduyecuacu tembiú güi, Ërei nderemimboe reta uyeucuacu'ã tembiú güi?

¹⁵ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembiú güi, umendata vae jae reta ndive oĩ rambueve. Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembiú güi —jei—.

¹⁶ Icavi'ã yamboya vaerã temimonde indechi vae maemboyaa ipiaü vae pe. Echa'ã jucuarã yayapo yave, maemboyaa ipiaü vae umiãta temimonde indechi vae, jare temimonde jeiete osoro —jei—. ¹⁷ Jae ramiño vi icavi'ã yambiru vaerã vino ipiaü vae vino jiru guacapi indechi vae pe. Echa'ã jucuarã yayapo yave, vino omondoro jiru, jare vino uyepiyere, jare jiru icavi'ã ma. Jáeramo yambiru vino ipiaü vae jiru ipiaü vae pe. Echa'ã jucuarã yayapo yave, jiru osoro'ã jare vino uyepiyere'ã —jei.

Jairo tayi jare cuña Jesús jemimonde uyaviqui vae

(Mr 5.21-43; Lc 8.40-56)

¹⁸ Jare Jesús cua jei chupe reta rambueve, ou Jesús oĩ vae pe uvãe penti mburuvicha. Jae uyeatica Jesús jovai jare jei:

—Cherayi umanota ma oĩ. Ërei yaa iñono ndepo jese embigüera, agüiye vaerã umano —jei.

¹⁹ Jayave Jesús jare jemimboe reta yugüiraa mburuvicha jupíe.

²⁰ Jare penti cuña doce año ma uiporara tugüiguasu vae oya Jesús re icupe coti jare uyaviqui jemimonde jembei. ²¹ Echa'ã jae jei ma iyupe ipia pe: “Yepe tēi jemimondeño tayaviqui, acuerata co.” ²² Ërei Jesús uyerova, jare uecha yave, jei chupe:

—Cherindi, ndepiacatu. Ndecuera ma nderovia cheré ramo.

Jare jupivoiño cuña ucuera.

²³ Jare Jesús uique mburuvicha jo pe yave, uecha uyemimbi vae reta umiñee ma jemimbi reta teõgüe güiraa oñoti vaerã jare jeta joco pe yati ñugüinoi vae reta umbiapu ñugüinoi.

²⁴ Jayave jei chupe reta:

—Pecua oca pe. Cua cuñatai umano'ã co. Oqueño co oĩ —jei.

Ërei joco pe ñugüinoi vae reta oyoyai Jesús. ²⁵ Jayave Jesús omoë opaete vae oca pe. Jayave uique ye o pe jare uipisi cuñatai ipo pe, jare cuñatai upüa voi. ²⁶ Jare opaete jocua ivi pegua reta pe jerãcua quirã Jesús uyapo cua miacañi.

Mocui cuimbae jesa mbae vae reta

²⁷ Jare Jesús joco güi oo yave, mocui cuimbae jesa mbae vae reta yugüiraa jaicue, jare ñeeäta reve jei chupe:

—Nde co jae David ñemoñaáa reta pegua. O reparareco.

²⁸ Jare Jesús uique ma yave o pe, cuimbae jesa mbae vae reta vi uique jaicue. Jayave Jesús upirandu chupe reta:

—¿Perovia pa chepuere co ayapo cua peve?

—Ndugüirovia, oreYa —jei reta.

²⁹ Jayave Jesús uyaviqui jae reta jesa, jare jei chupe reta:

—Perovia ramo, pemae.

³⁰ Jare mocui reve ipuere umae. Jayave Jesús jei chupe reta:

—Agüiye pemimbeu quía pe ave.

³¹ Ërei jae reta yugüiraa ma yave, umimbeu jeta jocua ivi pegua reta pe Jesús uyapo chupe reta vae.

Iupa vae umbipi uyemingueta

³² Jare jae reta yugüiraa ma yave, ñru vae reta güeru Jesús oñ vae pe penti cuimbae iupa vae, aña oya jese vae. ³³ Jayave Jesús umbisiri aña chugüi jare iupa vae umbipi uyemingueta. Jare jeta vae reta ipiacañi jare jei reta:

—Yaecha'ái cua nunga miacañi Israel pe.

³⁴ Ërei fariseo reta jei:

—Aña guasu imbaepuere pe umbisiri aña reta oya jese vae reta güi.

Jeta co yaaviro vaerã

³⁵ Jare Jesús oo opaete tenta guasu reta jare tenta guasu-rai reta rupi, jare oporombocue judío reta itupaopao pe. Umimbeu ñee icavi vae Tumpa iporoyocua pegua, jare umbigüera imbaerasi vae reta ipotave mbaerasi güi. ³⁶ Ërei uecha yave jeta vae, uiparareco umae jese reta. Echa'á jae reta uyempia'á jare ipiatiti. Ovecha mbaeti iyandarecoa güinoi vae reta rami co. ³⁷ Jayave Jesús jei jemimboe reta pe:

—Jeta ete co yaaviro vaerã. Ërei mbovi ete co umbaeviro vae reta. ³⁸ Jáeramo pe reta piyere yandeYa pe omondo vaerã uparaviqui vae reta umbaeviro reta vaerã —jei.

10

Jesús jemimondo reta jee

(Mr 3.13-19; Lc 6.12-16)

¹ Pentí ara Jesús umbati jocua doce jemimboe reta, jare umee chupe reta mbaepuere umbisiri vaerã aña reta oya jese vae reta güi jare umbigüera vaerã imbaerasi vae reta ipotave mbaerasi güi. ² Cua co jae jocua doce Jesús jemimondo reta jee: Simón (Pedro jee vae), jare Simón tiví Andrés jee vae, jare Zebedeo tai reta Jacobo jare Juan jee vae, ³ Felipe, Bartolomé, Tomás, Mateo ocovara vae, Alfeo tai Jacobo jee vae, Tadeo, ⁴ Simón (jae co Zelote pe ueni vae), jare Judas Iscariote (cua cuimbae umee Jesús jovaicho reta pe).

Jesús omondo jocua doce jemimboe reta

(Mr 6.7-13; Lc 9.1-6)

⁵ Jare ndei omondo reta mbove, Jesús oyocui cua doce reve.

—Agüiye pecua judío mbae vae reta ñugüinoi vae pe. Agüiye pecua Samaritano jenta guasu reta pe —jei—. ⁶ Pecua Israel pegua reta ñugüinoi vae pe. Echa'á jae reta ovecha ucañi vae reta rami co —jei—. ⁷ Jare peguata rambueve, pemimbeu ñru vae reta pe cuarái: 'Mboroyocua ara pegua outa ma uvãe' —jei—. ⁸ Pembigüera imbaerasi vae reta. Pembigüera ipire ocui vae reta. Pembijecove ye umanocue vae reta. Pembisiri aña reta oya jese vae reta güi. Che amee ma peve cua mbaepuere jepi mbae reve. Jáeramo agüiye pecovara mbae quía pe piyapota chupe vae re —jei—. ⁹ Agüiye peraa oro jare corepoti. ¹⁰ Agüiye vi peraa peurupucu, jare agüiye peraa mocui camisa. Peraa jaeño pentí pepopoca jare pepipasa pemonde vae. Echa'á icavi co ñru vae reta umbiepi vaerã uparaviqui vae pe —jei—.

¹¹ Jare peo yave pentí tenta guasu pe ani pentí tenta guasu-rai pe, pepirandu quía ra pepuere perovia catu joco pe. Jayave pico joco pe peo ye regua —jei—. ¹² Jare pevãe yave pentí tenta pe, pere: 'Tumpa tunece peve mbiacatu.' ¹³ Jare pepuere yave perovia catu joco pe yugüireco vae reta, Tumpa uameeta chupe reta mbiacatu. Ërei pepuere'ã yave perovia catu, pe retaño penoita mbiacatu —jei—. ¹⁴ Jare ime yave tenta pegua reta ani tenta guasu pegua reta uipota'ã pepita vaerã joco pe jare uipota'ã uyapisaca peré vae, pecuaño joco güi, jare pemitimo ivicuii pepi güi —jei—. ¹⁵ Añete co jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei—.

Uiporarata co

¹⁶ Mase, pomondo icavi mbae vae uyapo vae reta ipite rupi. Pe reta ovecha reta rami co. Jae reta co yaguapīta reta rami. Jáeramo pearacuaa catu mboi iyaracuaa catu rami. Jae ramiño vi agüiye piyapo icavi mbae vae picasu uyapo'ã icavi mbae vae rami —jei—. ¹⁷ Piñemoa ngatu. Echa'ã ĩru vae reta pereraata mburuvicha reta yati vae pe, uñeapo vaerã perẽ. Jare penupata judío reta itupao reta pe —jei—. ¹⁸ Jare piyeraacata mburuvicha reta jare mburuvicha guasu reta jovai chereco pegua, pepuere vaerã chemimbeu chupe reta jare judío mbae vae reta pe —jei—. ¹⁹ Ĕrei jae reta pemee yave, agüiye piyemipia'ã mbae pereta mburuvicha reta pe vae re. Echa'ã Espĩritu Santo uicuaacata peve jocua ora pe etei mbae pere vaerã —jei—. ²⁰ Echa'ã peRu iEspĩritu pemborita piyemingueta vaerã, pe retaiño'ã co piyemingueta —jei—.

²¹ Jare penti cuimbae umeeta tivĩ uyeyucaca vaerã. Jae ramiño vi penti cuimbae umeeta tai uyeyucaca vaerã. Jare sambiaĩ reta oyovaichota tu jare ichi ndive, jare uyucata —jei—. ²² Jare piñemitarẽicata opaete vae pe chereco pegua. Ĕrei jõsata oo uvãe iyapi pe vae uyembiasacata co —jei—. ²³ Ĕrei penti tenta guasu pe uyapo reta icavi mbae vae peve yave, pesi ĩru tenta guasu pe. Añete che jae peve, ndarau peo opaete Israel pegua reta jenta guasu pe ndei che cuimbaerã ayeyapo vae ayu ye mbove —jei—.

²⁴ Penti uyemboe oĩ vae uicuaa ete'ã oporombœ vae uicuaa vae rami. Jae ramiño vi penti uyeyocui vae imbaepuere tuicha'ã ete ipatrón imbaepuere rami —jei—. ²⁵ Icavi co penti uyemboe oĩ vae uyemboe cavi vaerã oporombœ vae uicuaa vae re. Jae ramiño vi icavi co penti uyeyocui vae uiporu cavi vaerã mbaepuere ipatrón umee chupe vae. Che co jae peYa, jare ĩru vae reta chembijee Beelzebú. Jáeramo pembijeeta Beelzebú tai reta. Echa'ã pe reta piyeyocui cheve —jei—.

*Pequiye Tumpa güi
(Lc 12.2-7)*

²⁶ Ĕrei agüiye pequiye chugüi reta. Ime yave mbae uyeyasoi vae, yeechacañotai co. Jare ime yave mbae uñeñomi vae, uyecuaañotai co —jei—. ²⁷ Pĩtumimbi pe che jae peve vae re piyemingueta tembipe pe. Jare che jae viari peve vae pemimbeu opaete vae pe —jei—. ²⁸ Agüiye pequiye upuruyuca vae reta güi. Echa'ã pereteño ipuere uyuca. Ipuere'ã uyuca perecove. Pequiye Tumpa güi. Echa'ã jae ipuere omondo quĩa jete jare jecove tata guasu pe —jei—. ²⁹ Picuaa co quirãĩ umaemee vae reta umee mocui güira-rai mbovi ete corepoti re. Ĕrei mbaeti penti yepe umano oa ivi pe peRu uicuaa'ã reve —jei—. ³⁰ Tumpa uicuaa mbovi pea penoi peãca re vae —jei—. ³¹ Jáeramo agüiye pequiye. Echa'ã Tumpa perau ete jeta güira-rai reta güi —jei—.

*Ĕru vae reta jovaque uyecuaaca vae
(Lc 12.8-9)*

³² Ime yave quĩa ĩru vae reta jovaque jei yave: 'Che co jae Jesús jemimboe', che jaeta cheRu ara pe oĩ vae jovaque: 'Cua co jae cheremimboe' —jaeta, jei Jesús—. ³³ Ĕrei ime yave quĩa ĩru vae reta jovaque checuacu vae, che vi aicuacuta cheRu ara pe oĩ vae jovaque —jei—.

*Ayu uyembiyao vaerã uyugüi ivi pegua reta
(Lc 12.51-53; 14.26-27)*

³⁴ Aramoi pepia pe piyemingueta che ayu co amee vaerã mbiacatu ivi pegua reta pe. Ĕrei jucuarã'ã co. Che ayu uyembiyao vaerã uyugüi ivi pegua reta, mbaeti güinoi vaerã mbiacatu —jei—. ³⁵ Ayu penti cuimbae oyovaicho vaerã tu ndive, jare cuñatai oyovaicho vaerã ichi ndive, jare cuña oyovaicho vaerã imesi ndive —jei—. ³⁶ Jare cuimbae jenta pegua reta oyovaichota jae ndive —jei—. ³⁷ Ime yave quĩa uau ete tu jare ichi chegüi vae, ndarau ipuere ico cheremimboerã. Jae ramiño vi ime yave quĩa uau ete isambiaĩ reta chegüi vae, ndarau ipuere ico cheremimboerã —jei—. ³⁸ Jare ime yave quĩa ovoĩ'ã icurusu oo vaerã cherupie vae, ndarau ipuere ico cheremimboerã —jei—. ³⁹ Uipota uñuvatu jecove vae ndarau ipuere. Ĕrei umeeta jecove chereco pegua vae uñuvatuta co —jei—.

*Ambijecoviata co chupe
(Mr 9.41)*

⁴⁰ Ime yave quĩa uyapo icavi vae peve, cheve uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei—. ⁴¹ Ime yave quĩa icavi vae uyapo penti Tumpa ñee umimbeu vae pe Tumpa ñee umimbeu ramo, Tumpa umeeta chupe ñee umimbeu vae pe umeeta vae. Jae ramiño vi ime yave quĩa icavi vae uyapo penti jupi vae uyapo vae pe jupi vae uyapo ramo, Tumpa umeeta chupe jupi vae uyapo vae pe umeeta vae —jei—. ⁴² Añete che jae peve, ime yave quĩa umee penti vaso i roĩa vae yepe penti

sambiai jou vaerã vae, uyapo yave jucuarã jae co cheremimboe ramo, ambijecoviata co chupe—jei.

11

Juan ombou vae reta
(Lc 7.18-35)

¹Jare Jesús opa ma oyocui yave jocua doce jemimboe reta, jae etei oo joco güi oporomboc vaerã jare umimbeu vaerã Tumpa iñee Israel pegua tenta guasu reta pe.

²Jare Juan peresoriru pe oĩ rambueve, uicuaa Cristo uyapo oĩ vae regua. Jayave ombou mocui jemimboe reta Jesús oĩ vae pe ³jei vaerã chupe:

—¿Nde pa co jae Cristo outa vae? aní ¿nuãrota pa ñru vae ou vaerã?

⁴Jayave Jesús jei chupe reta:

—Pecua ye pemimbeu Juan pe piyandu jare peeche vae regua. ⁵Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umanocue vae reta icove ye ma. Iparavete vae reta uyapisaca ñee icavi vae re—jei—. ⁶Jare Tumpa umivendiseta jecuae güirovia cheré vae reta—jei.

⁷Jare yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñuu pe pemae? Jae ipirãta mbae vae'ã co tacuarãsi omi ivitu uipeyu yave vae rami—jei—. ⁸¿Quía re pa co peo pemae? Jae omonde'ã temimonde ipõra vae. Mase, temimonde ipõra vae omonde vae reta yugüireco mburuvicha guasu reta jenta pe—jei—. ⁹¿Quía re pa co peo pemae? ¿Peo ra pemae vaerã penti Tumpa iñee umimbeu vae re? Añete che jae peve, Tumpa umee chupe uyapo vaerã jeta ete ñru Tumpa iñee umimbeu vae reta uyapo vae güi—jei—. ¹⁰Tumpa iñee uyecuatía oĩ jese cuarã: 'Mase'—jei Tumpa—, 'che amondota chiñee güiraata vae nderenonde, uyapicatu vaerã nderaperã.'

Jucuarã uyecuatía oĩ—jei—. ¹¹Añete che jae peve, Tumpa umee Juan upurumbibautizase vae pe uyapo vaerã jeta ete ñru Tumpa iñee umimbeu vae reta uyapo vae güi. Ërei taicuegua vae ara pegua mboroyocua pegua uyembutuichaca eteta Juan güi—jei—. ¹²Juan upurumbibautizase vae umbipi Tumpa iporoyocua regua umimbeu güive, opaete vae uipota uique jocua mboroyocua ara pegua pe—jei—. ¹³Echa'ã opaete Tumpa iñee aracaé umimbeu vae reta uicuatía vae jare mboroyocui vi uicuaaca Tumpa iporoyocua regua ndei Juan ou mbove—jei—. ¹⁴Jare pipota yave perovia, jae co Elías. Echa'ã Tumpa iñee aracaé umimbeu vae jei outa co Elías—jei—. ¹⁵Uipota uyandu vae tuyapisaca cua re—jei—.

¹⁶Tamimbeu peve mbae ndive amboyovaque añave yugüireco vae reta. Jae reta co sambiai plaza pe uguapi ñugüinoi vae reta rami. Jae reta jei uyupe cuarã: ¹⁷'Nduyemimbi ma peve, Ërei pe reta pepirae'ã. Orepiatiti perovaque, Ërei pe reta piyao'ã.' Jucuarã jei—jei—. ¹⁸Echa'ã Juan ou, jare jae uyecuaa tembiu jare vino güi. Jáeramo uicuaa vae reta jei aña oya co Juan re—jei—. ¹⁹Che cuimbaerã ayeyapo vae ayu, jare che ayecuaa'ã tembiu jare vino güi. Jáeramo checuaa vae reta jei cuarã: 'Mase, jae jou jeta tembiu jare vino. Jae co mburuvicha peguarã ocovara vae reta jare teco icavi mbae vae uyapo vae reta iamigo.' Jucuarã jei—jei—. Ërei opaete iyaracuaa vae reta uicuaaca aracuaa icavi co—jei.

Tenta guasu pegua uiporarata vae reta
(Lc 10.13-15)

²⁰Jayave Jesús umbipi uñeengata jocua tenta guasu jeta miacañi uyapo pipe vae reta pe. Echa'ã jocua tenta guasu pegua reta ueya'ã iyemingueta icavi mbae vae ipia pe oĩ vae. Jae jei:

²¹—Corazín pegua reta uiporarata co. Betsaida pegua reta uiporarata co. Echa'ã jeta miacañi reta ayapo ipite pe chembaepuere pe. Jucuarã ayapo yave mona Tiro jare Sidón pe, joco pegua reta ueyata tēi aracaé ma iyemingueta icavi mbae vae ipia pe oĩ vae. Omondeta tēi temimonde jaimbe vae jare oñonota tēi tanimbu iñaca re uicuaaca vaerã ipiatiti co—jei—. ²²Ërei che jae peve, Tumpa uña yave ivi pegua reta, Corazín jare Betsaida pegua reta tanta uiporarata Tiro jare Sidón pegua reta güi—jei—. ²³Jare Capernaum pegua reta ipia pe uyemingueta tēi icavi co yugüireco vaerã Tumpa ndive. Ërei Tumpa omondota reta yugüireco vaerã cañitei pe. Echa'ã jeta miacañi reta ayapo ipite pe chembaepuere pe. Jucuarã ayapo yave mona Sodoma pe, Sodoma ndarau tēi uyembai—jei—. ²⁴Ërei che jae peve, Tumpa uña yave ivi pegua reta, Capernaum pegua reta tanta uiporarata Sodoma pegua reta güi—jei.

Peyu checoti peputuu vaerã
(Lc 10.21-22)

²⁵ Jayave Jesús jei:

—CheRu, nde co jae ara pegua reta jare ivi pegua reta iYa. Ameer yasurupai ndeve quirã nde nemaño'ã cua ivi pegua iyaracuaa vae reta re uicuaa vaerã cua mbaembae, ãrei ndicuaaca sambia'i rami vae reta pe. ²⁶ Icavi co, cheRu. Echa'ã icavi co ndeve ndiyapo vaerã jucuarã —jei.

²⁷ Jayave jei vi:

—CheRu umee ma cheve opaete. Mbaeti quã uicuaa cavi cheregua, jaẽno cheRu. Jae ramiño vi mbaeti quã uicuaa cavi cheRu regua, jaẽno che jare che aicuaaca chupe vae reta —jei—.

²⁸ Opaete piyemipia'ã jare pepiatiti pico vae reta peyu checoti. Che tambuputuu perecove —jei—. ²⁹ Piñemiru che ndive jare piyemboe che aipota pomboe jese vae re. Echa'ã che añemimichi. Ayembutuicha'ã etei. Jucuarã piyapo yave, perecove uputuuta —jei—. ³⁰ Echa'ã piñemiru yave che ndive, ndarau piyemipia'ã jare ndarau pepiatiti —jei.

12

Jesús jemimboe reta uipoo trigo mbutuu ara pe
(Mr 2.23-28; Lc 6.1-5)

¹ Mbutuu ara pe Jesús oo co rupi jemimboe reta ndive. Jesús jemimboe reta iyemba'i jare umbipi uipoo trigo jare jou. ² Ërei fariseo reta uecha yave, jei Jesús pe:

—Mase, nderemimboe reta uyapo ñugüinoi agüiyeta tã uyapo mbutuu ara pe vae.

³ Jayave Jesús jei chupe reta:

—¿Pemingueta'ã pa David uyapocue vae regua, jae jare jae ndive ñugüinoi vae reta iyemba'i yave? ⁴ David uique Tumpa jo pe jare jou mbiyape Tumpa jo pe uñeño tee vae reta. Agüiyeta tã co David jare jae ndive ñugüinoi vae reta jou jocua mbiyape. Jaẽno sacerdote reta ipuere jou —jei—. ⁵ Jare ¿pemingueta'ã etei pa mboroyocui pe quirã mbutuu ara pe sacerdote Tumpa jo pe ñugüinoi vae reta uyapo agüiyeta tã quã uyapo mbutuu ara pe vae? Ërei Tumpa umbijeco'ã reta —jei—. ⁶ Ërei che jae peve, che cua pe aĩ vae ayembutuichaca ete Tumpa jo güi —jei—. ⁷ Ërei picuaa'ã mbae uipota jei cua Tumpa iñee pe uyecuatia oĩ vae: 'Aipota pepuruparareco vaerã' —jei Tumpa—, 'aipota'ã maemimba uyeyucacue reta pemee cheve vaerãno.' Jucuarã uyecuatia oĩ. Echa'ã picuaa yave mona, ndarau tã pembijeco mbaeti teco güinoi vae reta —jei—. ⁸ Echa'ã che cuimbaerã ayeyapo vae chepuere jae mbae icavi uyeyapo vaerã mbutuu ara pe —jei.

Cuimbae ipo jovaicho tipa vae
(Mr 3.1-6; Lc 6.6-11)

⁹ Jare Jesús oo joco güi uique judío reta itupao pe. ¹⁰ Jare joco pe oĩ penti cuimbae ipo jovaicho tipa vae. Jare joco pe ñugüinoi vae reta upirandu Jesús pe:

—¿Icavi pa yambigüera vaerã quã mbutuu ara pe? ¿Mbae pa jei mboroyocui cua re? —jei reta.

Echa'ã jae reta uipota tã umbijeco Jesús.

¹¹ Jayave Jesús jei chupe reta:

—Penti cuimbae güinoi yave penti ovecha, jare ovecha oa yave ivicua pe mbutuu ara pe, cuimbae uipisi voita güinoẽ ivicua güi. ¹² Ërei penti cuimbae jepi ete penti ovecha güi. Jáeramo jupi co yayapo vaerã icavi vae mbutuu ara pe —jei.

¹³ Jayave jei cuimbae pe:

—Eupi ndepo.

Jayave cuimbae ipo uupi, jare ucuera voi. Oyovaque ma ipo jovaicho ipo icavi vae ndive. ¹⁴ Jayave fariseo reta oẽ judío reta itupao güi, jare uyemboemboe quirã ra uyucacata Jesús.

Cherembiocui aiparavo vae

¹⁵ Ërei Jesús cua uicuaa yave, oo joco güi. Jare jeta vae reta yugüiraa jaicue, jare Jesús umbigüera opaete imbaerasi vae reta. ¹⁶ Jare Jesús oyocui reta agüiyete vaerã umimbeu quã co jae vae. ¹⁷ Cua uyapo, uyeyapo vaerã Tumpa iñee aracae umimbeu vae Isaías jei vae. Echa'ã jae jei cuarã:

¹⁸ "Mase, jae co cherembiocui aiparavo vae" —jei Tumpa—.

"Aau ete. Ayerovia tuicha jese.

Ameeta chupe cheEspíritu, jare jae uãata judío mbae vae reta.

¹⁹ Ndarau uyeaca quã ndive. Ndarau vi quã uyandu iñee calle rupi.

²⁰ Ndarau uaquio tacuarãsi uyeca vae.

Ndarau vi ombove mechero michi ete jendi oĩ vae, ndei upurumiamiri upuruãa vaerã mbove.

²¹ Jare jae jee re judío mbae vae reta güiroviata.”
Jucuarãi jei.

Jei reta icavi mbae vae Espiritu Santo coti
(Mr 3.20-30; Lc 11.14-23; 12.10)

²² Jayave amocue vae güero Jesús oĩ vae pe penti cuimbae añã oya jese vae. Cuimbae jesa mbae vae jare iupa vi. Jare Jesús umbigüera. Cuimbae uma ma jare uyemingueta ma.

²³ Jare opaete joco pe ñugüinoi vae reta ipiacañi jare jei:

—¿Cua ra co jae David iñemoñaa reta pegua?

²⁴ Ërei fariseo reta cua uyandu yave, jei reta:

—Aña guasu Beelzebú imbaepuere pe umbisiri añã reta oya jese vae reta güi.

²⁵ Jesús uicuaa fariseo reta ipiayemingueta jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—. ²⁶ Jare Satanás umbisiri yave Satanás oya jese vae reta güi, imbaepuere uyembiyao ma co. Jáeramo ndarau etei ma oĩ iporoyocua —jei—. ²⁷ Ërei che ambisiri yave añã reta oya jese vae reta güi Beelzebú imbaepuere pe, ¿quía imbaepuere pe ra umbisiri añã reta oya jese vae reta güi perentarã reta? Pepuere pepirandu chupe reta jese —jei—. ²⁸ Ërei che ambisiri añã reta oya jese vae reta güi Tumpa iEspiritu imbaepuere pe. Jáeramo pepuere picuaa ou ma co uvãe peve Tumpa iporoyocua —jei—.

²⁹ Ime yave quía uipota uique cuimbae ipirãta vae jenta pe upiro vaerã imbaembae chugüi vae, uipocuata rani cuimbae ipirãta vae. Jayave ramo ipuereta upiro imbaembae chugüi —jei—.

³⁰ Ime yave quía uipota'ã ico cheirurã vae, oyovaicho co che ndive. Jae ramiño vi ime yave quía chembori'ã vae, uyapo co icavi mbae vae checoti —jei—. ³¹ Jáeramo che jae peve, opaete ivi pegua reta imbaeyoa reta jare opaete iñee icavi mbae Tumpa coti vae Tumpa ipuere umbai. Ërei Tumpa ndarau etei umbiasa jei icavi mbae vae Espiritu Santo coti vae pe —jei—. ³² Jare ime yave quía jei icavi mbae vae che cuimbaerã ayeyapo vae coti vae, Tumpa umbiasata chupe. Ërei ime yave quía jei icavi mbae vae Espiritu Santo coti vae, Tumpa ndarau etei umbiasa chupe, añave jare ara reta outa vae pe —jei—.

Ía icavi vae jare ía icavi mbae vae
(Lc 6.43-45)

³³ Penoi yave temiti icavi vae, penoita vi ía icavi vae. Jae ramiño vi penoi yave temiti icavi mbae vae, penoita vi ía icavi mbae vae. Echa'ã peecha yave temiti ía, picuaata icavi ra temiti —jei—. ³⁴ Pe reta co jae mboi pochí vae reta rami. Echa'ã pe reta piyapo icavi mbae vae. Jáeramo pepuere'ã etei pere icavi vae. Echa'ã penti penti uyemingueta ipia pe güinoi vae rupi —jei—. ³⁵ Quía nunga jecocavi vae güinoi icavi vae ipia pe. Jáeramo jei icavi vae. Jae ramiño vi quía nunga jecopochí vae güinoi icavi mbae vae ipia pe. Jáeramo jei icavi mbae vae. ³⁶ Ërei che jae peve, jocua ara Tumpa upuruãa yave, jae umbijecota ivi pegua reta opaete ñee icavi mbae vae regua re —jei—. ³⁷ Echa'ã Tumpa jeita icavi vae co piyapo, icavi vae pere yave. Jae ramiño vi Tumpa jeita icavi mbae vae co piyapo, icavi mbae vae pere yave —jei—.

Uipota reta uecha miacañi
(Mr 8.12; Lc 11.29-32)

³⁸ Jayave amocue mboroyocui re oporomboe vae reta jare fariseo reta jei Jesús pe:

—Oporomboe vae, nduipota ndiyapo vaerã mbae ndicuaaca vaerã oreve quía co nde.

³⁹ Jayave Jesús jei chupe reta:

—Añave yugüireco vae reta icavi mbae vae uyapo vae reta co. Upurugüirovia'ã. Jáeramo uipota uyapo vaerã miacañi chupe reta. Ërei jaeño uyeyapota mbae Tumpa iñee aracae umimbeu vae Jonás pe uyeyapo vae rami, jae reta uicuaa vaerã quía co che —jei—. ⁴⁰ Echa'ã Jonás upita mbapi ara jare mbapi piare jocua pira guasu jie pe. Jae ramiño vi che cuimbaerã ayeyapo vae apitata mbapi ara jare mbapi piare ivigüi pe —jei—. ⁴¹ Tumpa upuruãa yave, Nínive pegua reta upũata umbijeco vaerã añave yugüireco vae reta. Echa'ã jae reta ueya iyemingueta icavi mbae vae ipia pe oĩ vae, Jonás umimbeu chupe reta yave Tumpa iñee. Ërei chembaepuere tuicha ete co Jonás imbaepuere güi —jei—. ⁴² Tumpa upuruãa yave, jocua cuña mburuvicha guasu ico sur coti vae upũata umbijeco vaerã añave yugüireco vae reta. Echa'ã jae ou mbiri ete güi uyapisaca vaerã Salomón iyaracuaa catu vae re. Ërei che chearacuaa catu ete Salomón güi —jei—.

*Aña usiri jare ou ye vae
(Lc 11.24-26)*

⁴³ Penti aña usiri ma yave oya jese vae güi, uguata ñana rupi ueca quiape ico vaerã. Ērei ipuere'a yave uvãe quiape ico vaerã, ⁴⁴ jei iyupe: Taa ye jocua chero ayu chugüi vae pe — jei, jei—. Echa'ã yandepuere yamijaanga penti o jocua cuimbae aña usiri ma chugüi vae re. Aña ou ye uvãe yave jocua o pe, uecha ipo'ã. O iya utupe i ma jare uyapicatu —jei—. ⁴⁵ Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerã. Tenonde yave, penti aña oya jese yave, jocua cuimbae uiporara. Ērei taicue rupi ocho aña reta oya jese. Jáeramo tanta uiporara. Jae ramiño vi uyeyapota aña yugüireco vae icavi mbae vae uyapo vae reta pe —jei.

*Jesús ichi jare tivi reta
(Mr 3.31-35; Lc 8.19-21)*

⁴⁶ Jare Jesús uyemingueta rambueve joco pe ñugüinoi vae reta pe, Jesús ichi jare tivi reta yugüeru uvãe jae oí vae pe, jare oca pe ñugüinoi. Jae reta uipota uyemingueta Jesús ndive. ⁴⁷ Jayave penti joco pe oí vae jei Jesús pe:

—¡Aipol! Ndesi jare nderivi reta oca pe ñugüinoi. Uipota uyemingueta nde ndive —jei.

⁴⁸ Ērei Jesús jei chupe:

—¿Quía nunga pa co jae chesi jare cherivi reta?

⁴⁹ Jayave uupi ipo jemimboe reta coti, jare jei:

—Cua nunga reta co jae chesi jare cherivi reta. ⁵⁰ Echa'ã opaete cheRu ara pe oí vae jei vae uyapo vae reta co jae cherivi jare cherindi jare chesi —jei.

13

*Jesús umijaanga umaeti vae
(Mr 4.1-9; Lc 8.4-8)*

¹ Jocua ara Jesús oē tenta güi oo uguapi i guasu jembei pe. ² Jare jeta vae uyembati Jesús oí vae pe. Jáeramo Jesús uyupi penti chalana i guasu pe oí vae pe, jare uguapi pipe. Jare yati vae reta uyemboi ñugüinoi i guasu jembei pe. ³ Jare Jesús omboe reta jeta mbaembae re umijaanga reve. Jei chupe reta:

—Penti cuimbae oo umaeti vaerã. ⁴ Umaeti yave, umiai temiti, jare amocue oa tape rupi. Jayave yugüeru güira reta opa jou —jei—. ⁵ Īru temiti oa mboviño ivi itape iárambo oí vae pe. Cua imambae oē, jeta'ã ivi chupe ramo —jei—. ⁶ Ērei guarasi jasi yave, ipiru. Jare japo quipe'ã oí ramo, utini —jei—. ⁷ Īru temiti oa ñanapite pe. Ñana ucuacuaa yave, opa uyuca temiti. ⁸ Jare Īru temiti oa ivicavi pe. Cua reta ucuacuaa cavi jare ía. Amocue jeta ete jái, jare Īru jeta catu jái, jare Īru mboviño jái —jei—. ⁹ Uipota uyandu vae tuyapisaca cua re —jei.

*Maera Jesús oporomboe umijaanga reve
(Mr 4.10-12; Lc 8.9-10)*

¹⁰ Jayave Jesús jemimboe reta yugüeru upirandu chupe:

—¿Maera pa nemingueta reta nemijaanga reve?

¹¹ Jayave Jesús jei chupe reta:

—Amimbeu ma peve mboroyocua ara pegua regua. Cua uyecuaa'ã Īru vae reta pe — jei—. ¹² Echa'ã güinoi vae pe uñemñruta, jeta güinoi vaerã. Ērei mbaeti güinoi vae güi mbovi ete güinoi vae uyeequita —jei—. ¹³ Jáeramo amingueta reta amijaanga reve, agüiye vaerã uicuaa cavi, yepe tēi uecha, jare agüiye vaerã uicuaa, yepe tēi uyandu —jei—. ¹⁴ Jare uyeyapo chupe reta Tumpa iñee aracae umimbeu vae Isaías jei vae. Echa'ã jae jei cuarã: 'Piyandu tēita, ērei ndarau picuaa.

Peecha tēita, ērei ndarau picuaa cavi.

¹⁵ Echa'ã cua reta ipiatanta,

jare iyapisa pe uyandu tēi,

jare usapimiño,

agüiye vaerã uecha jesa pe,

jare agüiye vaerã uyandu iyapisa pe,

jare agüiye vaerã uicuaa ipia pe,

jare agüiye vaerã uyero va checoti.

Echa'ã uyerova checoti yave, ambaita tēi imbaeyoa reta' —jei Tumpa.

Jucuarãi jei Isaías —jei—.

¹⁶ Ērei Tumpa pemivendise ma. Echa'ã pe reta peeche peresa pe, jare piyapisaca peapisa pe —jei—. ¹⁷ Añete che jae peve, jeta Tumpa iñee aracae umimbeu vae reta jare jupi vae reta uipota tēi uecha pe reta peeche ma vae, ērei uecha'ã. Jae ramiño vi jae reta uipota tēi uyandu pe reta piyandu ma vae, ērei uyandu'ã —jei—.

Umaeti vae uyemijaanga jese vae
(Mr 4.13-20; Lc 8.11-15)

¹⁸ Amimbeu ma peve amijaanga reve cuimbae umaeti vae. Jáeramo piyapisaca ye jese — jei—. ¹⁹ Ime yave quía uyapisaca Tumpa iporoyocua re vae, uicuaa cavi'ã yave uyandu vae, ou voi jocua icavi mbae vae jare umiacañi Tumpa iñee güi. Amijaanga cua nunga re temiti tape rupi oa vae —jei—. ²⁰ Jae ramiño vi jocua temiti uñeñoti mboviño ivi itape iárambo oĩ vae pe vae uyemijaanga ñru vae reta Tumpa iñee uyandu vae re. Jupivoiño uyerovia reta, jare uipota cua ñee —jei—. ²¹ Ërei cua reta jocua temiti japo quipe'ã oĩ vae rami co. Jáeramo imambae icueri reta. Mbaesusere uyeyapo chupe reta ani ñru vae reta uyapo icavi mbae vae chupe reta Tumpa iñee uicuaa ramo. Jare jupivoiño uipota'ã ma uyapisaca reta Tumpa iñee re —jei—. ²² Jae ramiño vi jocua temiti uñeñoti ñanapite pe vae uyemijaanga ñru vae reta Tumpa iñee uyandu vae re. Ërei jae reta umbipi uyemipia'ã ivi pe mbaembae uyeyapo vae re, jare uyembitavi, uipota icocatu ramo. Jare opaete cua umiacañi reta Tumpa iñee güi. Jáeramo jae reta jocua temiti ia'ã vae rami co —jei—. ²³ Ërei jocua temiti uñeñoti ivicavi pe vae uyemijaanga ñru vae reta Tumpa iñee uyandu vae re. Cua reta uicuaa cavi Tumpa iñee. Amocue vae jocua temiti jeta ete jãi vae rami co. Ñru vae reta jocua temiti jeta catu jãi vae rami co. Jare ñru vae reta jocua temiti mboviño jãi vae rami co —jei.

Trigo jare trigo-raanga

²⁴ Jesús imiari ye yati vae reta pe umijaanga reve. Jei chupe reta:
—Mboroyocua ara pegua penti cuimbae temiti icavi vae ico pe oñoti vae rami co. ²⁵ Ërei opaete vae oque rambueve, cuimbae jovaicho ou oñoti trigo-raanga trigo ipite rupi, jare oo ye —jei—. ²⁶ Trigo ucuacuaa jare ía. Ërei ucuacuaa vi trigo-raanga trigo ipite rupi — jei—. ²⁷ Jáeramo co iya jembiocui reta yugüeru ipatrón pe jei chupe: 'Patrón, ¿niñoti'ã pa trigo icavi vae ndeco pe? ¿Maera pa ucuacuaa trigo-raanga?' —jei reta, jei—. ²⁸ Jayave ipatrón jei chupe reta: 'Penti cherovaicho oñoti.' Jayave jembiocui reta jei chupe: '¿Ndipota pa ndoo vaerã nduequi trigo-raanga?' ²⁹ Ërei ipatrón jei: 'Agüive peequi. Echa'ã peequi yave trigo-raanga, aramoi peequita vi trigo trigo-raanga ndive' —jei, jei—. ³⁰ 'Tucuacuaa pãve mocui reve trigo yaipoo regua. Jare yaipoo yave, jaeta uipoo vae reta pe: Pembati rani trigo-raanga piyocua peapi vaerã. Ërei pembati trigo jiru pe' —jei, jei.

Mostaza jáicue

(Mr 4.30-32; Lc 13.18-19)

³¹ Jesús imiari ye yati vae reta pe umijaanga reve. Jei chupe reta:
—Mboroyocua ara pegua penti mostaza jáicue cuimbae güiraa oñoti ico pe vae rami co. ³² Cua jáicue michi-rai ete opaete ñru temiti reta jáicue güi. Ërei ucuacuaa ma yave, tuicha ete opaete ñru temiti penti año peguaño ucuacuaa vae reta güi. Uyeyapo penti ivira. Jáeramo güira reta ipuere uyapo jaitirã jáca reta re —jei.

Levadura

(Lc 13.20-21)

³³ Jesús imiari ye yati vae reta pe umijaanga reve. Jei chupe reta:
—Mboroyocua ara pegua levadura rami co. Cuña umbiyea levadura jeta catu harina ndive, levadura uñemiai vaerã opaete masa rupi —jei.

Maera Jesús oporomboe umijaanga reve

(Mr 4.33-34)

³⁴ Opaete cua jei Jesús yati vae reta pe umijaanga reve. Jare jecuaeño imiari chupe reta umijaanga reve, ³⁵ uyeyapo vaerã Tumpa iñee aracaе umimbeu vae jei vae. Echa'ã jei cuarãi:

“Chemiarita amijaanga reve.

Amimbeuta ivi uyeyapo güive uyecuaa mbae vae.”

Jucuarãi jei.

Mbae trigo jare trigo-raanga uyemijaanga jese vae

³⁶ Jayave Jesús omondo ye yati vae reta, jare uique o pe. Jare Jesús jemimboe reta yugüeru jei chupe:

—Nemimbeu ma oreve nemijaanga reve jocua co trigo-raanga ucuacuaa pipe vae. Emimbeu oreve mbae uipota jei vae.

³⁷ Jayave Jesús jei chupe reta:

—Temiti icavi vae oñoti vae uyemijaanga che cuimbaerã ayeyapo vae re. ³⁸ Jocua co uyemijaanga opaete ivi re. Trigo icavi vae uyemijaanga Tumpa iporoyocuaa pegua reta re. Ërei trigo-raanga uyemijaanga icavi mbae vae uyapo vae reta re —jei—. ³⁹ Jocua co

iya jovaicho trigo-raanga oñoti vae uyemijaanga aña guasu re. Mbaepoo uyemijaanga cua ara reta iyapi re. Umbaepoo vae reta uyemijaanga ángel reta re —jei—. ⁴⁰ Jocua trigo-raanga uyembatica jare ocai tata pe. Jae ramiño vi jucuarãita uyeyapo cua ara reta iyapi pe —jei—. ⁴¹ Che cuimbaerã ayeyapo vae ambouta ángel cheve uyeyocui vae reta, jare jae reta umbatita opaete iyoa vae reta jare icavi mbae vae uyapo vae reta, omombo reta vaerã cheporoyocua güi —jei—. ⁴² Jare omombota reta tata guasu pe. Joco pe uyaota reta jare jãi umbiquiririuta —jei—. ⁴³ Jayave jupi vae reta uyecuaata Tu iporoyocua pe guarasi jembipe ramí. Uipota uyandu vae tuyapisaca cua re —jei—.

Corepoti uñeñoti vae

⁴⁴ Mboroyocua ara pegua corepoti uñeñoti vae rami co. Echa'ã penti cuimbae uvãe yave jocua corepoti uñeñoti vae, oñomi ye, jare uyerovia reve oo umee corepoti re opaete imbaembae ogua vaerã jocua co —jei—.

Ita ipõra vae

⁴⁵ Mboroyocua ara pegua penti umaemee vae ita ipõra vae reta ueca vae rami co —jei—. ⁴⁶ Uvãe yave penti ita ipõra vae jepi ete vae, oo umee corepoti re opaete imbaembae ogua vaerã jocua ita ipõra vae —jei—.

Pisa jare jevae i rupigua reta

⁴⁷ Mboroyocua ara pegua penti pisa rami co. Echa'ã cuimbae reta omombo pisa i guasu pe omboa vaerã ipotave jevae i rupigua reta —jei—. ⁴⁸ Jare pisa tinee ma yave, cuimbae reta güeru i guasu jembei pe. Jayave uguapi joco pe jare umbati umbiru jevae i rupigua icavi vae reta jiru pe, ãrei omombo jevae i rupigua icavi mbae vae reta —jei—. ⁴⁹ Jae ramiño vi jucuarãita uyeyapo cua ara reta iyapi pe. Ángel reta yugüeruta jare umbatita icavi mbae vae uyapo vae reta omombo vaerã jupi vae reta ipite güi —jei—. ⁵⁰ Jare omombota reta tata guasu pe. Joco pe uyaota reta jare jãi umbiquiririuta —jei—.

Mbaembae ipiau vae jare indechi vae

⁵¹ Jayave Jesús upirandu chupe reta:

—¿Picuaa cavi ma pa opaete cua?

—Nduicuaa cavi ma, oreYa —jei reta chupe.

⁵² Jayave Jesús jei chupe reta:

—Penti mboroyocui re oporomboe vae mboroyocua ara pegua re uyemboe vae, penti tenta iya rami co. Echa'ã tenta iya umee jenta pegua reta pe mbaembae ipiau vae jare mbaembae indechi vae jo pe uñuvatu vae güi —jei—.

Jesús Nazaret pe

(Mr 6.1-6; Lc 4.16-30)

⁵³ Jare Jesús opa ma yave cua jei umijaanga reve, oo ye joco güi. ⁵⁴ Jare oo uvãe yave livi pe, oporomboe judío reta itupao pe, jare uyapisaca jese vae reta ipiacañi jare jei.

—¿Quiápe ra uyemboe cua cuimbae iyaracuaa catu vaerã? ¿Quiá ra umee chupe mbaepuere cua miacañi reta uyapo vaerã? ⁵⁵ Jae co carpintero tai. Jae co María imembi. Jae co Jacobo, José, Simón jare Judas tiquei —jei reta—. ⁵⁶ Jare opaete jindi reta yugüireco yandepite pe. Jáeramo ¿quirã ra ipuere uyapo opaete cua? —jei reta.

⁵⁷ Jáeramo jae reta pochi Jesús pe. Jayave Jesús jei chupe reta:

—Opaete vae uipiu penti Tumpa iñee umimbeu vae. Jaefo jentaigua reta jare jenta pegua reta uipiu'ã reta —jei—.

⁵⁸ Jare joco pe ipuere'ã uyapo jeta miacañi reta jae reta güirovia'ã jese ramo.

14

Juan imano

(Mr 6.14-29; Lc 9.7-9)

¹ Jare jocua ara reta pe mburuvicha guasu Herodes uyandu Jesús regua. ² Jare jei jembiocui reta pe:

—Jae co Juan upurumbibautizase vae. Icove ye ma oo umanocue vae reta ipite güi. Jáeramo uyapo cua miacañi reta —jei—.

³ Echa'ã ndei Juan imano mbove, Herodes uipisica Juan, jare oñonoca peresoriru pe, Herodías jei ramo. Herodías co jae Herodes tivi Felipe jee vae jembireco. ⁴ Echa'ã tenonde yave Juan jei Herodes pe: “Icavi'ã nemenda vaerã nderivi jembireco ndive.” ⁵ Jáeramo Herodes uipota tãi uyucaca Juan. Ërei uquiye tenta guasu pegua reta güi. Echa'ã jae reta güirovia Juan co jae penti Tumpa iñee umimbeu vae.

⁶ Ērei Herodes uyembiara yave oa vae regua, Herodías imembi cuña ou upirae ipite pe jare umbiyerovia Herodes. ⁷ Jayave Herodes jei Tumpa jee re umeeta co cuñatai pe ipotave mbae ueca chupe vae. ⁸ Jayave cuñatai jei Herodes pe:

—E mee cheve cua pe Juan upurumbibautizase vae iñāca penti plato pe.

Echa'ā cuñatai ichi umimbeu ma chupe jucuarāi jei vaerā.

⁹ Jayave mburuvicha guasu ipiatiti. Ērei Tumpa jee re jei chupe ramo, jare ĩru vae reta uyandu ramo, omondo sundaro Juan iñāca güeru vaerā umee chupe. ¹⁰ Jayave oo sundaro peresoriru pe uñācasia Juan. ¹¹ Jayave güeru iñācacue penti plato pe, jare umee cuñatai pe. Jayave cuñatai güiraa umee ichi pe. ¹² Jare Juan jemimboe reta yugüeru güiraa jetecue jare oñoti. Jayave yugüiraa umimbeu Jesús pe.

Jesús umingaru cinco mil cuimbae reta
(Mr 6.30-44; Lc 9.10-17; Jn 6.1-14)

¹³ Jare Jesús cua uyandu yave, oo penti chalana pe quĩ ngatu vae pe. Ērei jeta vae uicuaa yave, yugüiraa ivi rupiño tenta guasu reta güi Jesús oo vae pe. ¹⁴ Jesús ugüeyi yave chalana güi, uecha jeta vae, jare uiparareco reta. Jayave umbigüera imbaerasi vae joco pe ñugüinoi vae reta.

¹⁵ Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oĩ. Emondo cua jeta vae, oqua vaerā jembiurā tenta tenta rupi —jei reta.

¹⁶ Ērei Jesús jei chupe reta:

—Agüiye tuyugüiraa. Pe reta pemee tucaru —jei.

¹⁷ —Jaeño ime cua pe nonoi pandepo mbiyape jare mocui pira —jei reta chupe.

¹⁸ —Peru cheve cua pe —jei.

¹⁹ Jayave Jesús oyocui jocua jeta vae reta uguapi vaerā capiichape re. Jayave uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisāa mbiyape, jare umee jemimboe reta pe, jae reta umee vaerā yati vae reta pe. ²⁰ Opareve ucaru, jare iyangapii reta. Jayave Jesús jemimboe reta umbati tembiu uñepisāacue jembire vae, jare umitinee doce canasta. ²¹ Jare ucaru vae reta güi cuimbae retaño uyepapa cinco mil rupi. Uyepapa'ā cuña reta jare sambia'i reta.

Jesús uguata i iárambo
(Mr 6.45-52; Jn 6.16-21)

²² Jare jupivoiño Jesús oyocui jemimboe reta uyupi vaerā chalana pe, jare yugüiraa vaerā jenonde i guasu jovaicho pe, jae omondo rambueve uyembati vae reta. ²³ Jare opa omondo yave, Jesús uyupi ivitu guasu re uyerure vaerā Tumpa pe. Jare pita ma yave, jaeño Jesús joco pe oĩ. ²⁴ Ērei chalana oo ma uvāe i guasu mbite pe. Yavai Jesús jemimboe reta uruguata vaerā. Echa'ā tuicha i uyembiaparoaroa jare ivitu tanta oovāiti. ²⁵ Jare cōeta ma yave, Jesús uguata oo i iárambo güiraa uepiti. ²⁶ Jare Jesús jemimboe reta uecha yave uguata ou i iárambo rupi, quuiye. Jei reta:

—Penti mbae iācue co.

Usapicai reta quuiye güi.

²⁷ Ērei jupivoiño Jesús ombou iñee chupe reta.

—Piñemiatangātu. Che co. Agüiye pequiyi —jei.

²⁸ Jayave Pedro jei chupe:

—CheYa, jae co nde yave, cheocui aguata vaerā aa i iárambo rupi ndecoti.

²⁹ —Eyu —jei Jesús chupe.

Jayave Pedro ugüeyi chalana güi, jare umbipi uguata i iárambo oo vaerā Jesús coti. ³⁰ Ērei uecha yave quirāi ivitu tanta chupe, Pedro quuiye. Jayave umbipi uique i pe, jare iñeeāta reve jei:

—CheYa, cherepi.

³¹ Jupivoiño Jesús uupi ipo jare uipisi Pedro. Jayave jei chupe:

—Michi ete ndepurugüirovia. ¿Maera pa nderovia'ā cherē? —jei.

³² Jare uyupi reta yave chalana pe, upita ivitu. ³³ Jare chalana pe ñugüinoi vae reta umbiadora Jesús. Jei reta:

—Añete co, nde co jae Tumpa Tai.

Jesús umbigüera Genesaret pegua imbaerasi vae reta
(Mr 6.53-56)

³⁴ Jare i guasu uasa reta yave, yugüiraa uvāe ivi Genesaret pe. ³⁵ Jare joco pegua reta uicuaa jae co Jesús. Jáeramo jae reta yugüiraa opaete jocua ivi rupi, jare güeru Jesús oĩ vae pe imbaerasi vae reta. ³⁶ Jare güeru vae reta uyerure Jesús pe umaño imbaerasi vae reta uyaviqui vaerā jemimonde jembeyi yepe. Jare opaete jemimonde uyaviqui vae reta ucuera.

15

*Yandepia umingüia vae
(Mr 7.1-23)*

¹ Jayave fariseo reta jare mboroyocui re oporomböe vae reta yugüeru Jerusalén güi Jesús oĩ vae pe jare jei chupe:

² —¿Maera pa nderemimboe reta uyapo'ã yandetenondegua reta iporomböe? ¿Maera pa ucaru reta uyepoe mbae reve? —jei reta.

³ Jayave Jesús jei chupe reta:

—¿Maera pa pe reta piyavi Tumpa iporoyocui piyapo vaerã yandetenondegua reta iporoyocui? ⁴ Tumpa oporoyocui cuarãi: 'Ipiu nderu jare ndesi.' Jare oporoyocui vi cuarãi: 'Jei icavi mbae vae tu ani ichi coti vae uyeyucacata co.' Jucuarãi oporoyocui Tumpa —jei—.

⁵ Èrei pe reta pere cuarãi: 'Penti vae ipuere jei tu jare ichi pe umeeta tõi chupe reta ombori vaerã vae umee ma Tumpa pe.' Jucuarãi pere —jei—. ⁶ Jare jucuarãi ombori'ã tu jare ichi. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui —jei—. ⁷ Pe reta co jae upurumbitavi vae reta. Añete yepe Isaías imiari peré. Echa'ã jae jei cuarãi:

⁸ 'Cua reta chepiu iyuru peño' —jei Tumpa—.

Èrei ipia pe chepiu'ã etei.

⁹ Chembiaadora-raangaiño.

Oporomböe cuimbae iporoyocui re.

Che jucuarãi'ã aporoyocui' —jei Tumpa.

Jucuarãi jei Isaías —jei.

¹⁰ Jare Jesús ueni opaete joco pe ñugüinoi vae reta.

—Piyapisaca cua re, picuaa cavi vaerã —jei—. ¹¹ Ipotave mbae peu vae ipuere'ã umingüia pepia. Jupi mbae vae pere vae, jocua umingüia pepia —jei.

¹² Jayave Jesús jemimboe reta yugüeru jei chupe:

—¿Ndicuaa pa fariseo reta pochi co ndeve jocua ndere chupe reta vae re?

¹³ Jayave Jesús jei chupe reta:

—Opaete temiti reta cheRu ara pe oĩ vae oñoti'ã vae uyeequita co. ¹⁴ Pemaefño jese reta. Echa'ã jae reta jesa mbae vae reta uechaca ñugüinoi tape ñru jesa mbae vae reta pe vae rami co. Jare jesa mbae vae uechaca yave tape ñru jesa mbae vae pe, mocui reve uasavita ivicua pe —jei.

¹⁵ Jayave Pedro jei Jesús pe:

—Emimbeu oreve mbae uipota jei cua nemijaanga reve ndere vae.

¹⁶ Jayave Jesús jei chupe reta:

—¿Pe retave pa picuaa cavi'ã? ¹⁷ Picuaa cavi cua: Ipotave mbae peu vae oo perie pe, jare pemombo —jei—. ¹⁸ Èrei jupi mbae vae pere vae, jocua umingüia pepia. Echa'ã pere vae ou pepia güi —jei—. ¹⁹ Echa'ã pepia güi oẽ opaete icavi mbae vae: pepia pe piyemingueta icavi mbae vae, pepuruyuca, piyuvanga menda re, piyapo aguasa, pemonda, peapu ñru vae reta re, icavi mbae vae pere ñru vae reta coti —jei—. ²⁰ Cua reta umingüia pepia. Èrei pecaru yave piyepoe mbae reve, jocua umingüia'ã pepia —jei.

*Cuña Canaán pegua ipurugüirovia
(Mr 7.24-30)*

²¹ Jayave Jesús oo ye joco güi Tiro jare Sidón iyipi rupi. ²² Jare penti cuña ivi Canaán pegua joco pe ico. Jae ou Jesús oĩ vae pe jare iñeeãta reve jei chupe:

—CheYa, cheparareco. Nde co jae David iñemoñaeta reta pegua. Chemembì cuña uiporara oĩ. Echa'ã penti aña oya ma jese —jei.

²³ Èrei Jesús jei'ã mbae chupe. Jayave Jesús jemimboe reta yugüeru jei chupe:

—Emondo ye jocua cuña. Echa'ã iñeeãta ou yanderaique.

²⁴ Jayave Jesús jei:

—Tumpa chembou Israel pegua reta peño. Jae reta ovecha ucañi vae reta rami co —jei.

²⁵ Jayave cuña ou uyeatica Jesús joval, jare jei chupe:

—Carai, chembori.

²⁶ Èrei Jesús jei chupe:

—Icavi'ã yaequi vaerã tembiú sambiaia reta güi, ñamee vaerã yimba-rai reta pe —jei.

²⁷ —Añete tõi co, carai —jei cuña Jesús pe—. Èrei yimba-rai reta jou tembiú usururucue iya imesa güi oa vae —jei.

²⁸ Jayave Jesús jei chupe:

—Cuña, tuicha co ndepurugüirovia. Tuyeyapo ndeve nde ndipota rupi —jei.

Jare jupivoiño cuña imembì ucuera.

Jesús umbigüera jeta vae

²⁹ Jayave Jesús oo joco güü uvãe i guasu Galilea pe oĩ vae pe. Jayave uyupi penti ivitu guasu re, jare uguapi joco pe. ³⁰ Jare jeta vae yugüeru jae oĩ vae pe. Jae reta güeru icõcho vae reta, jare ipo jovaicho mbae vae reta, jare jesa mbae vae reta, jare iupa vae reta, jare jeta İru imbaerasi vae reta ofõno Jesús jovai. Jayave Jesús umbigüera reta. ³¹ Jáeramo joco pe yati vae reta ipiacañi. Echa'ã uyandu iupa vae reta uyemingueta, jare uecha ipo jovaicho mbae vae reta ucuera, jare icõcho vae reta uguata cavi, jare jesa mbae vae reta umae. Jare opaete vae umbiadora Israel pegua reta iTumpa.

*Jesús umingaru cuatro mil cuimbae reta**(Mr 8.1-10)*

³² Jayave Jesús ueni jemimboe reta jare jei chupe reta:
—Aiparareco cua yati vae reta. Echa'ã mbapi ara ma ñugüinoi che ndive, jare mbaeti mbae güinoi jou vaerã. Ndarau amondo ye reta ucaru mbae reve, agüiye vaerã ipitu tape rupi —jei.

³³ Jayave Jesús jemimboe reta upirandu chupe:
—¿Quirãita pa yandepuere ñamee mbiyape cua jeta vae reta pe cua mbaeti quiaive ico vae pe, jae reta ucaru cavi vaerã?

³⁴ Jayave Jesús upirandu chupe reta:
—¿Mbovi pa mbiyape penoi?
—İme nonoi siete, jare mbovi pira —jei reta.

³⁵ Jayave Jesús oyocui yati vae reta uguapi vaerã ivi pe. ³⁶ Jayave uipisi jocua siete mbiyape jare mbovi pira, jare umee yasurupai Tumpa pe. Jayave upisãa mbiyape jare pira, jare umee jemimboe reta pe, jae reta umee vaerã yati vae reta pe. ³⁷ Opareve ucaru, jare iyangapii reta. Jayave Jesús jemimboe reta umbati tembüu uñepisãacue jembire vae, jare umitinee siete canasta. ³⁸ Jare ucaru vae reta güi cuimbae retaño uyepapa cuatro mil rupi. Uyepapa'ã cuña reta jare sambia'i reta.

³⁹ Jayave Jesús omondo ye yati vae reta. Jayave uyupi chalana pe, jare oo uvãe ivi Magdala pe.

16*Uipota reta uecha miacañi**(Mr 8.11-13; Lc 12.54-56)*

¹ Jare fariseo reta jare saduceo reta yugüeru Jesús oĩ vae pe, jare jei chupe uechaca vaerã chupe reta miacañi ara güi. Echa'ã jae reta uipota uicuaa uyapota ra miacañi chupe reta.

² Ĕrei Jesús jei chupe reta:
—Amo pe pıtuta ma yave pe reta pere: 'Ara cavita co curiye. Echa'ã pıta co amapıtu reta.'
³ Jae ramiño vi amo pe neimbove yave pere: 'Ara pochita co cua ara. Echa'ã pıta co amapıtu reta jare ara uyasoi oĩ' —pere, jei—. Pe reta co jae upurumbıtavi vae reta. Echa'ã ara re pemae yave, picuaa mbae uyeyapota vae. Ĕrei picuaa'ã etei mbae añave uyeyapo oĩ vae —jei—. ⁴ Añave yugüireco vae reta icavi mbae vae uyapo vae reta co. Upurugüirovia'ã. Jáeramo uipota ayapo vaerã miacañi chupe reta. Ĕrei jaeño uyeyapota mbae Tumpa iñee araca'e umimbeu vae Jonás pe uyeyapo vae rami, jae reta uicuaa vaerã quia co che —jei.

Jayave Jesús oo ye chugüi reta.

*Fariseo reta ilevadura**(Mr 8.14-21)*

⁵ Jesús jare jemimboe reta uyupi chalana pe yugüiraa i guasu jovaicho coti. Jare i guasu jovaicho pe yugüiraa ma uvãe yave ramo, Jesús jemimboe reta uicuaa ñacañi co güeru vaerã mbiyape. ⁶ Jare Jesús jei chupe reta:

—Piñemoa ngatu fariseo reta jare saduceo reta ilevadura güi.

⁷ Jayave jemimboe reta jei uyupe:
—Cua jei, yaru'ã mbiyape ramo.

⁸ Jesús uicuaa chugüi mbae jei reta vae, jare jei chupe reta:
—Michi ete co pepurugüirovia. ¿Maera pa piyemingueta mbiyape peru mbae vae re? —jei—. ⁹ ¿Ndeĩño pa picuaa cavi? ¿Pemandua'ã pa? Cue yave apisãa pandepo mbiyape ucaru vaerã cinco mil vae reta. Tembüu jembirecue pembati yave, ¿mbovi canasta pa pemitinee? —jei—. ¹⁰ Jare siete mbiyape apisãa vi, ucaru vaerã cuatro mil vae reta? Tembüu jembirecue pembati yave, ¿mbovi canasta pa pemitinee? —jei—. ¹¹ ¿Maera pa picuaa'ã che jae peve vae? Che jae peve piñemoa ngatu vaerã fariseo reta jare saduceo reta ilevadura güi. Jae'ã peve mbiyape re —jei.

¹² Jayave ramo jemimboe reta uicuaa Jesús jei'ã co chupe reta uñemoa ngatu vaerã mbiyape ilevadura güi. Jaeño uipota jei chupe reta uñemoa ngatu vaerã fariseo reta jare saduceo reta iporomboe güi.

*Pedro jei Jesús co jae Cristo, Tumpa ombou vae
(Mr 8.27-30; Lc 9.18-21)*

¹³ Jare Jesús coiño ma oo uvãe tenta guasu Cesarea Filipo güi. Jayave upirandu jemimboe reta pe:

—¿Quía pa co che cuimbaerã ayeyapo vae ñru vae reta pe?

¹⁴ Jayave jae reta jei chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae Jeremías ani ñru Tumpa ñnee aracae umimbeu vae —jei reta.

¹⁵ Jayave Jesús upirandu chupe reta:

—Ërei ¿quía pa co che peve?

¹⁶ Jayave Simón Pedro jei chupe:

—Nde co jae Cristo, Tumpa ombou vae. Nde co jae Tumpa jecuaeño ico vae Tai —jei.

¹⁷ Jayave Jesús jei Pedro pe:

—Simón, nde co jae Jonás tai. Tumpa nemivendise ma. Echa'ã cheRu ara pe oí vae uicuaaca ndeve cua. Mbaeti quía ye uicuaaca ndeve —jei—. ¹⁸ Jare che jae ndeve, nde co jae Pedro. (Pedro uipota jei: "ita".) Jare che etei amimirátata aiparavo vae reta, ipirãta vaerã penti tenta ita tuicha vae iárambo oí vae ipirãta rami. Jáeramo cañitei ndarau ipuere jese reta —jei—. ¹⁹ Jare ameeta ndeve mboroyocua ara pegua illave reta. Jare ime yave mbae ivi pe niñapítita vae, Tumpa vi uñapítita ara pe. Jae ramiño vi ime yave mbae ivi pe ndiyorata vae, Tumpa vi oyorata ara pe —jei.

²⁰ Jayave Jesús oyocui jemimboe reta agüiye vaerã umimbeu quía pe jae co Cristo, Tumpa ombou vae.

*Jesús umimbeu umanota co
(Mr 8.31-9.1; Lc 9.22-27)*

²¹ Jare jocua ara reta güiye Jesús umimbeu jemimboe reta pe quirãi jae oota co Jerusalén pe, jare quirãi tenta guasu pegua reta itenondegua reta jare sacerdote reta itenondegua reta jare mboroyocui re oporomboe vae reta uiporaracata co chupe, jare quirãi jae uyeyucacata, jare quirãi mbapi ara rupi icove yeta ou manocue vae reta ipite güi.

²² Jayave Pedro güiraa Jesús ñru reta ipite güi, jare umbipi umbieta chupe. Jei:

—Tumpa tanembori, cheYa. Agüiye etei tuyeyapo ndeve cua —jei.

²³ Ërei Jesús uyerova jare jei Pedro pe:

—Esiri chegüi, Satanás. Ndiporta chembiavai. Echa'ã nde ndiyemingueta neí ivi pegua reta uyemingueta rami, ndiyemingueta'ã Tumpa uyemingueta rami —jei.

²⁴ Jayave Jesús jei jemimboe reta pe:

—Ime yave quía uipota oo cherupie vae, tiñacañi iyugüi, tovoi icurusu, jare too cherupie —jei—. ²⁵ Uipota uñuvatu jecove vae ndarau ipuere. Ërei umeeta jecove chereco pegua vae uñuvatuta co —jei—. ²⁶ ¿Mbae ra uminganata quía, umingana yave opaete ivi pegua, Ërei ipuere'ã yave uñuvatu jecove? ¿Mbovi ra umbiepita quía ogua ye vaerã jecove? —jei—. ²⁷ Echa'ã che cuimbaerã ayeyapo vae ayu yeta cheRu imbaepuere reve ángel cheve uyeyocui vae reta ndive. Jare jayave ameeta opaete vae pe penti penti uyapo vae rupi —jei—. ²⁸ Añete che jae peve, ndei amocue cua pe ñugüinoi vae reta umano mbove, cherechata che cuimbaerã ayeyapo vae cheporoyocua pe —jei.

17

*Jesús uyembiambie
(Mr 9.2-13; Lc 9.28-36)*

¹ Seis ara ma uasa yave, Jesús güiraa Pedro, Jacobo jare Juan - jae co Jacobo tiví - ñru reta ipite güi penti ivitu guasu ivate vae re. ² Jare joco pe uyembiambie jae reta jovai. Jova jembipe guarasi jembipe rami, jare jemimonde tí asi jare uvera. ³ Jare uyecuaa chupe reta Moisés jare Elías uyemingueta ñugüinoi Jesús ndive. ⁴ Jayave Pedro jei Jesús pe:

—OreYa, icavi co ñai vaerã cua pe. Nde ndipota yave, turuyapo cua pe mbapi guarasía ñanarوقي pegua, penti nembraerã, penti Moisés peguarã jare penti Elías peguarã —jei.

⁵ Pedro uyemingueta oí rambueve, amapítu jembipe vae umiguarasía reta, jare amapítu güi uyendu ñee.

—Cua co jae cheRai aau ete vae. Chembiyerovia ete. Piyapisaca jese —jei.

⁶ Jare Jesús jemimboe reta cua uyandu yave, oa ivi re. Echa'ã uquiye ete reta. ⁷ Jayave Jesús ou oñono ipo jese reta jare jei:

—Pepña. Agüiye pequiye.

⁸ Jare umae reta ye yave, uecha'ã ma quía jae reta ndive, jaño Jesús.

⁹ Jare ivitu guasu güi ugüeyi yugüeru rambueve, Jesús oyocui reta:

—Agüiye pemimbeu quía pe cua peecha vae, ndei che cuimbaerã ayeyapo vae aicove ye ayu umanocue vae reta ipite güi mbove.

¹⁰ Jayave jemimboe reta upirandu chupe:

—¿Maera pa jei mboroyocui re oporombocue vae reta Elías rani co outa?

¹¹ —Añete Elías rani co outa —jei Jesús—, jare opaete uyapicatuta. ¹² Ërei che jae peve, Elías ou ma co, jare Israel pegua reta uicuaa'ã. Jáeramo uyapo reta chupe jae reta uipota vae. Jae ramiño vi jae reta uiporacata cheve —jei.

¹³ Jayave Jesús jemimboe reta uicuaa jae imiari oĩ chupe reta Juan upurumbibautizase vae re.

Jesús umbigüera cunumi añã oya jese vae

(Mr 9.14-29; Lc 9.37-43)

¹⁴ Jare yugüeru uvãe yave jeta ñugüinoi vae pe, penti cuimbae ou oovãiti Jesús. Uyeatica jae jovai, jare jei chupe:

¹⁵ —CheYa, iparareco cherai. Echa'ã imbaerasi iñãca pe jare uiporara oĩ. Jeta vese ma oa tata pe. Oa vi i pe —jei—. ¹⁶ Aru nderemimboe reta pe umbigüera vaerã tẽi, Ërei jae reta ipuere'ã —jei.

¹⁷ Jayave Jesús jei joco pe ñugüinoi vae reta pe:

—Yavai pe reta cua ivi pe pico vae pepurugüirovia vaerã. ¿Quirãĩ regua ra apitata pe reta ndive? ¿Quirãĩ regua ra arupiata peve? Peru cheve cua pe joca cunumi —jei.

¹⁸ Jayave Jesús uñeengata añã pe, jare añã usiri cunumi güi. Jare jupivoiño cunumi ucuera.

¹⁹ Jayave Jesús jemimboe reta yugüeru Jesús oĩ vae pe upirandu chupe, jae retaño jae ndive ñugüinoi yave:

—¿Maera pa ore orepuere'ã numbisiri añã?

²⁰ —Pepurugüirovia'ã ramo —jei Jesús chupe reta—. Añete che jae peve, aramoi pepurugüirovia michi ete penti mostaza jãicue michi-rai vae rami. Ërei jocua nunga mburugüirovia penoi yave, pepuereta pere cua ivitu guasu pe: 'Ecuã cua güi epita joco pe', jare oota co. Ndarau mbae yavai peve —jei—. ²¹ Ërei ndarau pepuere pembisiri cua nunga añã, jaño piyerure yave Tumpa pe piyecuaçu reve tembũu güi —jei.

Jesús umimbeu ye umanota co

(Mr 9.30-32; Lc 9.44-45)

²² Jare Galilea pe ñugüinoi rambueve, Jesús jei jemimboe reta pe:

—Che cuimbaerã ayeyapo vae penti vae chemeeta ñru vae reta pe. ²³ Jae reta cheyucata. Ërei amano ma yave, mbapi ara rupi aicove yeta ayu umanocue vae reta ipite güi —jei.

Jayave jemimboe reta ipiatiti tuicha.

Mburuvicha ocovara vae

²⁴ Jare Capernaum pe yugüiraa uvãe yave, mburuvicha peguarã ocovara vae reta yugüeru upirandu Pedro pe:

—¿Umbiepi pa pemboe vae mburuvicha ocovara vae?

²⁵ —Umbiepi —jei Pedro chupe reta.

Jare uique yave tenta pe, Jesús jei Simón Pedro pe:

—Simón, mburuvicha ivi pegua reta ocovara ñru vae reta pe. ¿Ocovara reta vi pa tai reta pe ani ñru vae reta peño? ¿Mbae pa ndepia pe ndiyemingueta cua re? —jei.

²⁶ —Ñru vae reta peño —jei Pedro.

Jayave Jesús jei chupe:

—Jáeramo tai reta umbiepi'ã chupe reta. ²⁷ Ërei agüiye vaerã yayapo icavi mbae vae echa chupe reta, ecua epindapo i guasu pe. Ipea jocua pira tenonde ndipisi vae iyuru. Joco pe nevãeta penti corepoti. Eraa emee mburuvicha peguarã ocovara vae reta pe cheve peguarã jare ndeve peguarã —jei.

18

Tenondegua vae

(Mr 9.33-37; Lc 9.46-48)

¹ Jayave jemimboe reta yugüeru jei Jesús pe —¿Quía pa co jae tenondegua vae mboroyocua ara pegua pe?

² Jayave Jesús ueni penti sambiaí, jare ofño jae reta ipite pe.

³—Añete che jae peve, piyero va'ã yave Tumpa coti jare piyeyapo'ã yave sambiaí reta rami, ndarau pique mboroyocua ara pegua pe —jei—. ⁴ Ime yave quía uñemimichi cua sambiaí rami vae, jae icota tenondeguarã mboroyocua ara pegua pe —jei—. ⁵ Jare ime yave quía uyapo icavi vae cua nunga sambiaí pe cheree pe vae, cheve co uyapo icavi vae —jei—.

Mbaeyoa uyapoca vae

(Mr 9.42-48; Lc 17.1-2)

⁶ Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tēi co ĩru vae reta uñapĩti vaerã iyayu re penti ita tuicha vae umbaesõ pipe vae, omombo vaerã i tipĩ pe i guasu pe jae ipitupa vaerã —jei—. ⁷ Amocue ivi pegua reta uiporara ĩru vae reta uyapoca chupe reta mbaeyoa ramo. Jecuaeño amocue vae reta uyapoca mbaeyoa ĩru vae reta pe. Ĕrei jocua mbaeyoa uyapoca vae reta uiporarata vi co —jei—.

⁸ Jáeramo ndepo jovaicho anĩ ndepĩ jovaicho uyapoca yave mbaeyoa ndeve, iyasia emombo ndiyugũi. Icavi co tecove opa mbae vae nenoĩ vaerã ndepo jovaicho mbae reve anĩ ndepĩ jovaicho mbae reve, tata guasu opa mbae vae pe mocui ndepo reve anĩ mocui ndepĩ reve Tumpa nemondo vaerã tēi güi —jei—. ⁹ Jae ramiño vi nderesa jovaicho uyapoca yave mbaeyoa ndeve, eequi emombo ndiyugũi. Icavi co tecove opa mbae vae nenoĩ vaerã nderesa jovaicho mbae reve, tata guasu pe mocui nderesa reve Tumpa nemondo vaerã tēi güi —jei—.

Ovecha ucañi vae

(Lc 15.3-7)

¹⁰ Agũye perĩro penti upurugũirovia vae. Che jae peve, ara pe ángel uyandareco cua nunga sambiaí reta re vae reta jecuaeño ñugũinoĩ cheRu ara pe oĩ vae jovai —jei—. ¹¹ Echa'ã che cuimbaerã ayeyapo vae ayu ambiasa vaerã ucañi Tumpa güi vae reta —jei—.

¹² Pepia pe piyemingueta cua re. Ime yave penti cuimbae cien ovecha güinoĩ vae, penti ovecha ucañi yave, cuimbae ueya jocua noventa y nueve ovecha reta oo ivitu guasu rupi ueca ucañi vae —jei—. ¹³ Jare uvãe chupe yave, añete che jae peve, uyerovia tuicha jocua ovecha re noventa y nueve ovecha ucañi mbae vae reta re güi. ¹⁴ Jae ramiño vi peRu ara pe oĩ vae uipota'ã cua upurugũirovia vae reta güi penti ave ucañiteĩ vaerã —jei—.

Nderivi iyoya yave ndecoti

(Lc 17.3-4)

¹⁵ Jare nderivi iyoya yave ndecoti, ecua emimbeu chupe uyapo vae regua quía uicuaa mbae reve. Jare nderivi uyapisaca nderé yave, ndiyeyapicatuta jae ndive —jei—. ¹⁶ Ĕrei uipota'ã yave uyapisaca nderé, eraa nderupie penti anĩ mocui neĩrurã, ĩru vae reta uicuaa vaerã mocui anĩ mbapĩ vae rupi mbae pere vae —jei—. ¹⁷ Jare uipota'ã yave uyapisaca jese reta, emimbeu upurugũirovia vae reta pe. Ĕrei nderivi uipota'ã yave uyapisaca upurugũirovia vae reta re, emae jese penti upurugũirovia mbae vae rami anĩ mburuvicha peguarã ocovara vae rami —jei—. ¹⁸ Añete che jae peve, ime yave mbae ivi pe piñapĩtita vae, Tumpa vi uñapĩtita ara pe. Jae ramiño vi ime yave mbae ivi pe piyorata vae, Tumpa vi oyorata ara pe —jei—.

¹⁹ Jare che jae ye peve, mocui vae ivi pegua omboyovaque iyemingueta jei yave: 'Yayerure Tumpa pe jocua re', cheRu ara pe oĩ vae uyapota chupe reta uyerure chupe jese vae —jei—. ²⁰ Echa'ã mocui anĩ mbapĩ vae uyembati yave cheree re, jae reta ipite pe che aĩta —jei—.

²¹ Jayave Pedro ou jei Jesús pe:

—CheYa, cherivi iyoya yave checoti jeta vese, ¿mbovi vese pa ambiasata chupe? ¿Siete vese pa? —jei—.

²² Jayave Jesús jei Pedro pe:

—Che jae ndeve, embiasa chupe setenta vese siete, mbaeti siete veseño.

Mocui cuimbae ipía vae reta

²³ Echa'ã mboroyocua ara pegua penti mburuvicha guasu jembiocui reta pe ipía uipota ocovara vae rami co —jei—. ²⁴ Mburuvicha guasu umbipĩ ocovara chupe reta yave, ou uyemboĩ jae jovai penti jembiocui jeta ete corepoti re ipía chupe vae —jei—. ²⁵ Jocua jembiocui ipuere'ã umbiepi. Jáeramo mburuvicha guasu oyocui uñemee vaerã corepoti re jembiocui jare jembireco jare isambiaí reta, jare opaete imbaembae, jembiocui ipuere vaerã umbiepi chupe —jei—. ²⁶ Jayave jembiocui uyeatica mburuvicha guasu jovai, jare

jei chupe: 'Agüiye ndepochi cheve. Ndepiaguasu cheve yave, ambiépita ndeve opaete' — jei, jei—. ²⁷Jayave mburuvicha guasu uiparareco jocua jembiocui jare oyora. Umbai chupe ipía —jei—.

²⁸ Èrei jocua uyeyocui vae oë mburuvicha guasu oï vae güi jare uvãe Ìru uyeyocui vae mbovi corepoti re ipía chupe vae. Jayave uipisi uyasiombiri jare jei chupe: 'Embiépi cheve ndepía.' ²⁹ Jayave jocua Ìru uyeyocui vae uyeatica jae jovai, jare uyerure chupe: 'Agüiye ndepochi cheve. Ndepiaguasu cheve yave, ambiépita ndeve opaete' —jei, jei—. ³⁰ Èrei uipota'ã ipiaguasu chupe. Umiñgueta peresoriru pe opaete ipía umbiépi regua —jei—. ³¹ Jare Ìru uyeyocui vae reta uicuaa yave uyeyapo vae, ipiatiti, jare yugüiraa umimbeu mburuvicha guasu pe opaete uyeyapo vae regua —jei—. ³² Jayave mburuvicha guasu ueni jocua jembiocui, jare jei chupe: 'Nde co jae cherembiocui icavi mbae vae. Che ambai ndeve opaete ndepía, nde ndiyerure cheve jese ramo' —jei, jei—. ³³ '¿Maera pa ndiparareco'ã nderapicha, che nduparareco rami?' —jei, jei—. ³⁴ Jayave mburuvicha guasu pochí jembiocui pe, jare oyocui peresoriru iyandarecoa reta uiporacua vaerã chupe opaete ipía umbiépi regua —jei—.

³⁵ Jae ramiño vi cheRu ara pe oï vae uyapota jucuarãi peve, pembiasa'ã yave opaete pepia reve perivi iyoa pecoti vae pe —jei.

19

*¿Jupi pa cuimbae omombo vaerã jembireco?
(Mr 10.1-12; Lc 16.18)*

¹ Jare Jesús opaete cua jei ma yave, oo Galilea güi Judea pe Jordán jovaicho pe. ² Jare jeta vae yugüiraa jaicue. Jayave Jesús umbigüera imbaerasi vae joco pe ñugüinoi vae reta. ³ Yugüeru vi fariseo reta Jesús oï vae pe. Jae reta uipota tõi uyavica chupe. Jáeramo upirandu reta chupe:

—¿Jupi pa cuimbae omombo vaerã jembireco ipotave mbae jeco pegua?

⁴ Jayave Jesús jei chupe reta:

—¿Pemingueta'ã pa Tumpa iñee pe quirãi Tumpa uyapo ramo yave, uyapo cuimbae jare cuña? —jei—. ⁵ Jare Tumpa jei cuarãi: 'Jáeramo cuimbae usirita tu jare ichi güi, jare oota ico vaerã jembireco ndive. Jare mocui vae uyeyapota penti ramiño.' Jucuarãi jei Tumpa —jei—. ⁶ Jáeramo mbaeti ma mocui rami. Yugüireco penti ramiño. Jáeramo agüiye quía tumbisiri Tumpa umiñru vae reta —jei.

⁷ Jayave fariseo reta jei chupe:

—¿Maera pa Moisés oyocui cuimbae uicuatía vaerã tupapire jembireco omombo vaerã?

⁸ —Moisés umaño peré pemombo vaerã pembireco pepiatanta ramo —jei Jesús—. Èrei Tumpa uyapo ramo yave, jucuarãi'ã —jei—. ⁹ Jare che jae peve, penti cuimbae ipuere omombo jembireco, cuña aguasa uyapo yave. Èrei cuña uyapo'ã yave aguasa, jare cuimbae omombo yave jembireco, jocua cuimbae uyuvanga co menda re umenda yave Ìru cuña ndive. Jae ramiño vi Ìru cuimbae umenda yave jocua cuña uyemomboca vae ndive, jae vi uyuvanga menda re —jei.

¹⁰ Jayave Jesús jemimboe reta jei chupe:

—Jucuarãi yaveño cuimbae ipuere omombo jembireco, icavi'ã cuimbae umenda vaerã.

¹¹ Èrei Jesús jei chupe reta:

—Amocue vaeño ipuere uicuaa cua che jae peve vae. Jocua Tumpa umee uicuaa vaerã vae reta peño ipuere uicuaa —jei—. ¹² Echa'ã amocue vae ichi güi oa güiye yugüireco eunucorã reta. Jare amocue vae yugüireco eunucorã reta Ìru vae reta uapiavo reta ramo. Jare amocue vae yugüireco eunucorã reta rami mboroyocua ara pegua jeco pegua. Ime yave quía ipuere uicuaa cua, tuicuaa —jei.

*Jesús uyerure Tumpa pe sambiai reta re
(Mr 10.13-16; Lc 18.15-17)*

¹³ Jare amocue vae güeru Jesús oï vae pe sambiai reta, Jesús oñono vaerã ipo jese reta jare uyerure vaerã Tumpa pe jese reta. Èrei jemimboe reta uñeengata güeru vae reta pe. ¹⁴ Èrei Jesús jei:

—Pemaño sambiai reta re yugüeru vaerã checoti. Echa'ã cua nunga uyeyocui Tumpa pe mboroyocua ara pegua pe —jei.

¹⁵ Jayave oñono ipo jese reta. Jayave oo joco güi.

*Cuimbae icocatu vae
(Mr 10.17-31; Lc 18.18-30)*

¹⁶ Jare penti cuimbae ou jei Jesús pe:

—Oporombœ vae, nde ndepiacavi co. ¿Mbae nunga mbae icavi vae pa ayapota anoi vaerã tecove opa mbae vae? —jei.

¹⁷Jayave Jesús jei chupe:

—¿Maera pa ndere cheve chepiacavi vae co? Mbaeti quã ipiacavi, jaefio co Tumpa. Êrei ndipota yave nenoi tecove opa mbae vae, iyapo mboroyocui reta —jei.

¹⁸—¿Mbae nunga reta pa? —jei Jesús pe.

Jayave Jesús jei chupe:

—‘Agüiye epuruyuca. Agüiye iyuvanga menda re. Agüiye nemonda. Agüiye ndapu ïru vae reta re. ¹⁹Ipiu nderu jare ndesi. Jare eau nderapicha nde ndiyerau rami’ —jei.

²⁰Jayave cuimbae jei Jesús pe:

—Ayavi’ã penti ave cua mboroyocui reta chemichi güiye. ¿Mbae ye pa uata cheve ayapo vaerã? —jei.

²¹Jayave Jesús jei chupe:

—Ndipota yave ndiyapo opaete icavi ndiyapo vaerã vae, ecua emee opaete mbaembae nenoi vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

²²Êrei cua uyandu yave, cuimbae oo ipiatiti reve. Echa’ã jeta mbaembae güinoi.

²³Jayave Jesús jei jemimboe reta pe:

—Añete che jae peve, yavai ete icocatu vae uique vaerã mboroyocua ara pegua pe. ²⁴Che jae ye peve, yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

²⁵Jesús jemimboe reta cua uyandu yave, ipiacañi jare jei:

—Jucuarãi yave, ¿quã pa ipuere uyembiasaca?

²⁶Jayave Jesús umae jese reta jare jei:

—Ivi pegua reta ipuere’ã uyembiasa. Êrei Tumpa ipuere umbiasa reta. Echa’ã Tumpa ipuere uyapo opaete mbaembae —jei.

²⁷Jayave Pedro jei chupe:

—Mase, ore opaete mbaembae ndueya, ndoyu vaerã nde ndive. ¿Mbae pa nonoita ore?

²⁸Jayave Jesús jei jemimboe reta pe:

—Añete che jae peve, che cuimbaerã ayeyapo vae aguapita cheguapia pe ayembia doraca vaerã, opaete uyeyapicatu yave. Jae ramiño vi pe reta che ndive peyu vae peguapia doce guapia pe, jare peãata doce ati Israel pegua reta —jei—. ²⁹Jare ime yave quã ueya jenta, ani tiquei reta, ani tivi reta, ani jindi reta, ani tu, ani ichi, ani jembireco, ani isambiai reta, ani iivi reta chereco pegua vae, cien rupi jecoviata co chupe, jare güinoita imbaerã tecove opa mbae vae —jei—. ³⁰Êrei Tumpa umbitaicueta uyembutuicha vae reta, jare umitenondeta uñemimichi vae reta —jei—.

20

Co pe uparaviqui vae reta

¹Echa’ã mboroyocua ara pegua penti co iya rami co. Co iya oẽ neimbove asi ueca quã ipuere uparaviqui vaerã ico pe —jei—. ²Upirandu amocue vae pe uparaviquita ra chupe umbiepi yave chupe reta penti denario ara rupi. (Penti denario co penti ara mbaraviqui jepi pegua.) Jare jae reta jei uparaviquita co chupe. Jayave co iya omondo reta ico pe —jei—. ³Jayave co iya oẽ ye guarasi ivate catu mi yave, jare uecha ïru vae reta uyemboi ñugüinoi plaza pe. Mbaeti co jae reta iparaviqui. ⁴Jayave co iya jei chupe reta: ‘Pe reta vi pecua peparaviqui checo pe. Tambiepi peve jupi co ambiepi peve vaerã vae’ —jei, jei—. Jayave jae reta yugürraa co pe —jei—. ⁵Jayave co iya oẽ ye guarasi ara mbite ma oĩ yave, jare omondo ïru vae reta ico pe uparaviqui vaerã. Jae ramiño vi oẽ ye mbapi ora ma caaru yave, jare omondo ye ïru vae reta ico pe uparaviqui vaerã —jei—. ⁶Jare co iya oẽ ye caaru ete yave, jare uecha ïru vae reta uyemboi ñugüinoi mbaeti iparaviqui ramo. Jayave jei chupe reta: ‘¿Maera pa pei cua pe opaete ara peparaviqui mbae reve?’ —jei, jei—. ⁷‘Mbaeti quã oremimbaraviquica ramo’ —jei reta, jei—. Jayave co iya jei chupe reta: ‘Pe reta vi pecua peparaviqui checo pe. Tambiepi peve jupi ambiepi peve vaerã vae’ —jei, jei—.

⁸Guarasi uique ma yave, co iya jei jembiocui pe: ‘Eeni uparaviqui vae reta embiepi chupe reta. Embiepi rani taicue rupi umbipi uparaviqui vae reta pe, jare taicue rupi embiepi tenonde yave umbipi uparaviqui vae reta pe’ —jei, jei—. ⁹Jare co güi yugüeru ye yave caaru ete umbipi uparaviqui vae reta, co iya jembiocui umee penti penti pe penti denario —jei—. ¹⁰Jare neimbove asi umbipi uparaviqui vae reta co güi yugüeru yave, ipia pe uyemingueta tẽi co iya jembiocui umbiepita co chupe reta jeta caaru ete umbipi uparaviqui vae reta pe umbiepi vae güi. Êrei co iya jembiocui umbiepi vi chupe reta penti denario ïru reta pe rami —jei—. ¹¹Jayave penti denarioño güinoi yave, ñfeenguru co iya pe —jei—. ¹²Jae reta

jei chupe: ‘Cua taicue rupi umbipi uparaviqui vae reta penti oraño uparaviqui. Ērei nde nembiepi chupe reta penti denario oreve nembiepi rami, yepe tēi ore nduparaviqui tanta guarasi jasi reve’ —jei reta, jei—. ¹³ Ērei co iya jei penti vae pe: ‘Cheamigo, ayapo’ã etei icavi mbae vae ndeve. Echa’ã nde ndere cheve ndeparaviquita checo pe che ambiepi ndeve yave penti denario’ —jei, jei—. ¹⁴ ‘Ecuá eraa cua neminganacue. Aipota ambiepi taicue rupi umbipi uparaviqui vae pe penti denario ndeve ambiepi rami’ —jei, jei—. ¹⁵ ‘Echa’ã jupi co che ayapo vaerã aipota vae chembaembae ndive. Agüiye neacatãa cua ĩru vae re che ayapo icavi vae chupe ramo’ —jei, jei—.

¹⁶ Jae ramiño vi Tumpa umbitaicuetá uyembutuicha vae reta, jare umitenondeta uñemimichi vae reta —jei.

Jesús umimbeu ye umanota co

(Mr 10.32-34; Lc 18.31-34)

¹⁷ Jae Jesús Jerusalén coti oo rambueve, ueni jocua doce jemimboe reta ĩru reta ipite güi, jare jei chupe reta:

¹⁸ —Mase, yaa co ñã Jerusalén pe. Jare che cuimbaerã ayeyapo vae penti vae chemeeta sacerdote reta itenondegua reta jare mboroyocui re oporombocue vae reta pe. Jae reta jeita amano vaerã, ¹⁹ jare chemeeta judío mbae vae reta pe. Jae reta cheyoyaita, chenupata chicote pe, jare checututa curusu re. Ērei mbapi ara rupi aicove yeta ayu umanocue vae reta ipite güi —jei.

Jacobo jare Juan uipota vae

(Mr 10.35-45)

²⁰ Cua jaicue rupi ou Jesús oĩ vae pe Zebedeo jembireco imembi reta Jacobo jare Juan ndive. Cuña uyeatica Jesús jovai jare jei chupe uipota uyapo vaerã mbae chupe. ²¹ Jayave Jesús upirandu cuña pe:

—¿Mbae pa ndipota?

—Emaeño cua mocui chemembi re uguapi vaerã ndeyipi pe ndeporoyocua pe, penti ndeacata coti jare ĩru ndeaso coti —jei cuña chupe.

²² Ērei Jesús jei Jacobo jare Juan pe:

—Picuaa’ã mbae re piyure vae. ¿Pepuereta pa piporara che aiporarata vae rami? ¿Pepuereta pa piyembibautizaca che ayembibautizacata vae rami? —jei.

—Orepuereta co —jei reta.

²³ —Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús chupe reta—. Ērei chepuere’ã jae peve peguapi vaerã cheyipi pe, penti cheacata coti jare ĩru cheaso coti. Echa’ã cheRu umicuatiro ma joco pe uguapita vae reta peguarã —jei.

²⁴ Jare ĩru diez Jesús jemimboe reta cua uyandu yave, pochi reta Jacobo jare Juan pe. ²⁵ Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güinoi vae reta jei ĩru reta pe mbae uyapo vaerã —jei—. ²⁶ Ērei pe reta agüiye piyapo jucuarã —jei—. Ime yave penti pepite pe oĩ vae uipota mbaepuere güinoi vae, tuyeyocui ĩru reta pe —jei—. ²⁷ Jare ime yave penti pepite pe oĩ vae uipota tenondeguarã ico vae, tuyeyocui ĩru reta pe —jei—. ²⁸ Echa’ã che cuimbaerã ayeyapo vae ayu ayeyocui vaerã ĩru vae reta pe. Ayu’ã ĩru vae reta uyeyocui cheve vaerã. Ayu amano vaerã, jeta vae aepi vaerã —jei.

Mocui cuimbae jesa mbae vae

(Mr 10.46-52; Lc 18.35-43)

²⁹ Jare yugüiraa yave tenta guasu Jericó güi, jeta vae yugüiraa Jesús jaicue. ³⁰ Jare mocui cuimbae jesa mbae vae uguapi ñugüinoi joco pe tape jembei pe. Jare uicuaa reta Jesús uasa oo oĩ yave, ñeeãta reve jei reta:

—OreYa, orepurareco. Nde co jae David ñemoñaá reta pegua.

³¹ Jeta joco pe ñugüinoi vae reta uñeengata chupe reta. Uipota tēi umiqui. Ērei jae reta jeiete ñeeãta reve jei:

—OreYa, orepurareco. Nde co jae David ñemoñaá reta pegua.

³² Jayave Jesús uyemboi, jare uenica cuimbae jesa mbae vae reta.

—¿Mbae pa pipota ayapo vaerã peve? —jei chupe reta.

³³ —Nduipota numae, oreYa —jei reta chupe.

³⁴ Jayave Jesús uiparareco reta jare uyaviqui jesa chugüi. Jare jupivoiño mocui reve ipuere umae, jare yugüiraa Jesús jaicue.

21

*Jesús oo Jerusalén pe**(Mr 11.1-11; Lc 19.28-40; Jn 12.12-19)*

¹ Jare coiño ma Jerusalén güi ñugüinoi yave, yugüiraa uvãe tenta guasu-rai Betfagë iyipi pe, ivitu guasu Olivos jovai. Jayave Jesús oyocui mocui jemimboe reta:

²—Pecua pea tenta guasu-rai yanderovai oi vae pe —jei—. Peo pevãe yave, pevãeta penti mburica uñeñapiti oi, jare pevãeta vi mburica tairusu vae jae ndive. Piyora peru —jei—. ³Jare ime yave quia mbae jei peve, pere chupe: ‘YandeYa uipota uiporu, ñerei imambae güeruruca yeta cua pe’ —pere, jei.

⁴ Opaete cua uyeyapo, Tumpa iñee aracae umimbeu vae jei vae uyeyapo vaerã. Echa’ã jae jei cuarã:

⁵ “Pemimbeu Jerusalén pegua reta pe:

‘Mase, peRuvicha Guasu ou peve.

Uñemimichi oi.

Echa’ã opo ou mburica tairusu vae re.’ ”

Jucuarãi jei.

⁶ Jayave Jesús jemimboe reta yugüiraa, jare uyapo Jesús jei chupe reta uyapo vaerã vae.

⁷ Jare güeru mburica jare mburica tairusu vae Jesús oi vae pe. Jayave Jesús jemimboe reta oñono iyasoya maemimba reta icupe re, jare Jesús opo mburica tairusu vae re. ⁸ Jare jeta vae uipiso iyasoya tape rupi mburica tairusu vae jenonde, jare Iru vae reta uyasia ñanarوقي jare oñono tape rupi. ⁹ Jare Jesús jenonde yugüiraa vae reta jare jaicue rupi yugüiraa vae reta iñeeãta reve jei:

—¡Icavi co! Cua co jae David iñemoñaã reta pegua. Tuyembadoraca yandeYa jee re ou vae. Tei reta ‘icavi co’ ara pe —jei reta.

¹⁰ Jare Jesús oo ma uvãe yave Jerusalén pe, opaete Jerusalén pegua reta ipiacañi reve jei: —¿Quia pa co jae?

¹¹ Jare jeta vae reta jei:

—Cua co jae Jesús. Jae co penti Tumpa iñee umimbeu vae Nazaret pegua. Nazaret Galilea pegua co —jei reta.

*Jesús Tumpa jo pe uyapo vae**(Mr 11.15-19; Lc 19.45-48; Jn 2.13-22)*

¹² Jayave Jesús uique Tumpa jo pe, jare omoë joco güi opaete umaemee vae reta jare mbae ogua vae reta, jare umbiyapara corepoti uipepica vae reta imesa reta jare picasu reta umee vae reta jenda reta. ¹³ Jare jei chupe reta:

—Tumpa iñee pe uyecuatía oi cuarã: ‘Chero uyembijeeta o yerure pegua pe.’ Jucuarã uyecuatía oi. Ñerei pe reta piyapo ma imonda vae reta iñemia rami —jei.

¹⁴ Jare yugüeru Jesús oi vae pe Tumpa jo pe jesa mbae vae reta jare icõcho vae reta, jare Jesús umbigüera reta. ¹⁵ Jare sacerdote reta itenondegua reta jare mboroyocui re oporomboe vae reta uecha miacañi Jesús uyapo vae reta, jare uyandu vi sambiaí Tumpa jo pe ñugüinoi vae reta iñeeãta reve jei:

—¡Icavi co! Cua co jae David iñemoñaã reta pegua.

Jáeramo jae reta pochi. ¹⁶ Jayave jei reta Jesús pe:

—¿Ndiyandu pa cua reta jei vae?

Jayave Jesús jei chupe reta:

—Ayandu. ¿Pemingueta’ã pa cua Tumpa iñee pe uyecuatía oi vae?

‘Nde neme sambiaí reta jare imeño ucambu vae reta pe nembidora vaerã.’

Jucuarãi uyecuatía oi —jei.

¹⁷ Jayave Jesús ueya reta. Oo Jerusalén güi Betania pe, jare joco pe ico.

*Iva ía mbae vae**(Mr 11.12-14, 20-26)*

¹⁸ Piareve pe neimbove yave Jesús oo ye Jerusalén cõti, jare iyembai. ¹⁹ Jare uecha penti iva coiño tape güi. Jayave oo umaee jese, ñerei uvãe’ã ía, jaeño joqui. Jayave jei iva pe:

—Ndarau etei ma ndeía.

Jare imambae iva yipi.

²⁰ Jare Jesús jemimboe reta uecha yave iva yipi vae, ipiacañi jese jare jei:

—Imambae yipi jocua iva.

²¹ Jayave Jesús jei chupe reta:

—Añete che jae peve, pepurugüirovia yave, pe reta vi pepuereta piyapo che ayapo iva pe vae rami. Ñerei pepurugüirovia yave, pepuereta vi pere cua ivitu guasu pe: ‘Pecua cua güi piyemombo i guasu pe’, jare jucuarãita uyeyapo. Pere’ã yave pepia pe: ‘Ndarau ndipo

uyeyapo', uyeyapota co peve —jei—. ²²Jare ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei.

Jesús imbaepuere

(Mr 11.27-33; Lc 20.1-8)

²³Jare Jesús uique ye yave Tumpa jo pe, sacerdote reta itenondegua reta jare tenta guasu pegua reta itenondegua reta yugüeru jae oí vae pe oporomboe rambueve, jare upirandu chupe:

—¿Mbae nunga mbaepuere pa nenoí cua mbaembae ndiyapo vaerã? ¿Quía pa umeen deve mbaepuere cua ndiyapo vaerã? —jei reta.

²⁴Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã —jei—. ²⁵¿Quía pa ombou Juan upurumbibautiza vaerã? ¿Tumpa pa ombou? aní ¿ivi pegua reta pa ombou? —jei.

Jayave jae reta jei uyupe:

—Yae yave: 'Tumpa co ombou', jae jeita yandev: 'Jucuarãí yave, ¿maera pa perovia'ã?' — jei reta uyupe—. ²⁶Èrei yandepuere'ã yae: 'Ívi pegua reta co ombou.' Echa'ã yaquiyee tenta guasu pegua reta güi. Echa'ã opaete vae güirovia Juan co jae penti Tumpa iñee umimbeu vae —jei reta uyupe.

²⁷Jayave jei reta Jesús pe:

—Nduicuaa'ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta—.

Mocui tai reta

²⁸¿Quirãí pa pepia pe piyemingueta cua re? Pentí cuimbae güinoi mocui tai reta. Ou jei pentí tai pe: 'Cheraí, cua ara ecua eparaviqui checo pe.' ²⁹Tai jei chupe: 'Aata'ã aparaviquí.' Èrei taicue rupi iquirëí oo. Jáeramo oo uparaviqui tu íco pe —jei—. ³⁰Jare cuimbae jei ñru tai pe: 'Cheraí, cua ara ecua eparaviqui checo pe.' Tai jei chupe: 'Aata aparaviqui, cheru.' Èrei oo'ã —jei—. ³¹¿Quía nunga pa cua mocui vae güi uyapo tu jei vae? —jei.

Jayave jae reta jei chupe:

—Jocua tenonde tu oyocui vae.

Jayave Jesús jei chupe reta:

—Añete che jae peve, mburuvicha peguarã ocovara vae reta jare cuña aguasa rupi yugüireco vae reta uiqueta perenonde Tumpa iporoyocua pe. ³²Echa'ã Juan oo uicuaaca peve jupi vae, èrei pe reta perovia'ã. Èrei mburuvicha peguarã ocovara vae reta jare cuña aguasa rupi yugüireco vae reta güirovia. Jare yepe tēi cua picuaa, èrei peeya'ã piyemingueta icavi mbae vae pepia pe oí vae. Jecuae peatēi perovia Juan —jei—.

Co iporúa icavi mbae vae reta

(Mr 12.1-12; Lc 20.9-19)

³³Tamimbeu ye peve amijaanga reve cua: Ico pentí cuimbae icorã uiquēse vae. Jayave oñoti pipe jeta uva. Jayave oyoo ivi, jare uyapo uva uitami pipe vaerã. Uyapo vi pentí chapapa, umae vaerã ivate güi opaete co re. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe —jei—. ³⁴Jare uva yagüiye ma yave, co iya ombou amocue jembiocui reta co iporúa reta pe, jae reta umbiyao vaerã tēi uva reta, iya güinoi vaerã imbaerã —jei—. ³⁵Èrei co iporúa reta uipisi co iya jembiocui reta, jare uinupa pentí vae, jare uyuca ñru vae, jare uyapi ita pe ñru vae —jei—. ³⁶Jayave co iya ombou ye jeta catu ete jembiocui reta tenonde ombou vae güi. Èrei co iporúa reta jecuae jucuarãí uyapo ye chupe reta —jei—. ³⁷Jayave taicue rupi co iya ombou tai. Jei tēi iyupe: 'Aramoi uipiuta cheraí' —jei, jei—. ³⁸Èrei co iporúa reta uecha yave co iya tai, jei reta uyupe: 'Cua co jae iyarã vae. Yaa yayuca, jare yande yaicota co iyarã' —jei reta, jei—. ³⁹Jayave jae reta uipisi co iya tai omombo co güi jare uyuca —jei—.

⁴⁰Jáeramo co iya ou ye yave, ¿mbae ra uyapota jocua co iporúa reta pe? —jei.

⁴¹Jayave jae reta jei Jesús pe:

—Opata uyuca jocua cuimbae icavi mbae vae reta, jare uiporucata ico ambie vae reta pe. Jae reta umeeta co iya pe imbaerã uva yagüiye ma yave —jei reta.

⁴²Jayave Jesús jei chupe reta:

—¿Peminguetã pa cua Tumpa iñee pe uyecuatía oí vae?

'Ita tenta iyapoa reta omombo vae uyeyapo ma ita tenondegua vae.

YandeYa uyapo cua.

Yaecha ma, jare yandepiacañi jese.'

Jucuarãí uyecuatía oí —jei—.

⁴³ Jáeramo che jae peve, pe reta ndarau pico Tumpa iporoyocua pe. Tumpa umeeta ñru reta pe yugüireco vaerã joco pe. Jae reta uyapota jupi vae —jei—. ⁴⁴ Ime yave quía jocua ita re uyepiaca vae, uñemopëta co. Jare ime yave quía jocua ita oa jese vae, opata umbiperasoraso —jei.

⁴⁵ Jare sacerdote reta itenondegua reta jare fariseo reta cua uyandu yave, uicuaa cua Jesús umijaanga reve jei vae uicuaaca quirãï jae reta teco güinoi. ⁴⁶ Jare jae reta uipota tēi uipisi Jesús. Ërei ipuere'ã. Echa'ã uquiye jeta vae reta güi. Echa'ã jocua jeta vae reta güirovia Jesús co jae penti Tumpa ñnee umimbeu vae.

22

Parea menda pegua

(Lc 14.15-24)

¹ Jare Jesús imiari ye joco pe ñugüinoi vae reta pe umijaanga reve. Jei chupe reta:

²—Mboroyocua ara pegua penti mburuvicha guasu rami co. Jocua mburuvicha guasu tai umendata. Jáeramo mburuvicha guasu uyapo parea —jei—. ³ Uparea ma amocue vae pe yugüeru vaerã menda pe. Jayave omondo jembiocui reta ueni reta vaerã. Ërei jae reta ñatēi yugüeru —jei—. ⁴ Jayave mburuvicha guasu oyocui ye ñru jembiocui reta. Jei chupe reta: 'Pecua pemimbeu aparea chupe vae reta pe: Mase, jáema oï peu vaerã. Ayucaca ma chegüeyeta jeta jare ñru cherimba ñiquira vae reta. Ayapicatu ma opaete. Pecua menda pe' —pere, jei, jei—. ⁵ Ërei jae reta uipota'ã yugüiraa. Penti vae oo ico pe. ñru vae oo umaemee. ⁶ Jare ñru reta uipisi mburuvicha guasu jembiocui reta, uyapo icavi mbae vae chupe reta jare uyuca reta —jei—. ⁷ Ërei mburuvicha guasu uicuaa yave cua regua, pochí ete co. Jáeramo omondo isundaro reta opa vaerã uyuca jocua upuruyuca vae reta jare uapi vaerã jenta guasu —jei—. ⁸ Jayave mburuvicha guasu jei jembiocui reta pe: 'Opaete uyeyapicatu ma oï yayapo vaerã menda. Ërei aparea chupe vae reta uyapo'ã jupi vae' —jei, jei—. ⁹ Jáeramo pecua calle rupi jare pere opaete pevãe chupe vae reta pe yugüeru vaerã menda pe' —jei, jei—. ¹⁰ Jayave mburuvicha guasu jembiocui reta yugüiraa calle rupi jare umbati opaete uvãe chupe vae reta - icavi vae uyapo vae reta jare icavi mbae vae uyapo vae reta. Jare mburuvicha guasu jo tinee ma —jei—.

¹¹ Jare mburuvicha guasu ou uvãe yave uma vaerã yugüeru vae reta re, uecha joco pe penti cuimbae temimonde menda pegua mbaeti güinoi vae —jei—. ¹² Jayave jei chupe: 'Cheamigo, ¿quirãï pa ndique cua pe temimonde menda pegua mbae reve?' Ërei cuimbae jei'ã mbae ave —jei—. ¹³ Jayave mburuvicha guasu jei jembiocui reta pe: 'Piñapiti ipo rupi jare ipi rupi, jare peraa cua güi pemombo oca pe pñtumimbi oï vae pe. Joco pe uyaota jare jäi umbiquiririuta' —jei—. ¹⁴ Echa'ã Tumpa ueni jeta vae reta Ërei mbovño uiparavo —jei.

¿Jupi pa yambiepi vaerã César pe?

(Mr 12.13-17; Lc 20.20-26)

¹⁵ Jayave fariseo reta uyembati, jare uyemboemboe quirãï ipuere uyavica Jesús pe jae uyemingueta yave. ¹⁶ Jayave jae reta omondo jemimboe reta Jesús oï vae pe herodiano reta ndive. Jae reta jei Jesús pe:

—Oporomboe vae, nduicuaa nde ndere vae añete co. Nde ndeporomboe cavi quirãï Tumpa uipota yaico vaerã vae re. Nde nemea oyovaque opaete pãve re. Nembutuicha'ã penti ave ñru vae güi —jei reta—. ¹⁷ Jáeramo emimbeu oreve, ¿quirãï pa ndepia pe ndiyemingueta cua re? César yandeocui yambiepi vaerã chupe corepoti pe. ¿Jupi pa yambiepi vaerã chupe? ani ¿jupi'ã pa? —jei reta.

¹⁸ Ërei Jesús uicuaa jae reta uipota tēi co uyapo icavi mbae vae chupe, jare jei chupe reta:

—¿Maera pa pipota piyavica cheve? Pe reta co jae upurumbitavi vae reta —jei—.

¹⁹ Peechaca cheve corepoti mburuvicha guasu ocovara peve vae —jei.

Jayave güeru reta chupe penti corepoti. ²⁰ Jayave Jesús upirandu chupe reta:

—¿Quía jova íã pa cua? ¿Quía jee pa cua uyecuatía oï vae? —jei.

²¹—Jocua César imbae co —jei reta.

Jayave Jesús jei chupe reta:

—Pemeé César pe Cesar pegua, jare pemeé Tumpa pe Tumpa pegua.

²² Cua uyandu reta yave, ipiacañi reta jese. Jayave jae reta yugüiraa Jesús güi.

¿Icove yeta pa umanocue vae reta?

(Mr 12.18-27; Lc 20.27-40)

²³ Jare jocua ara etei amocue saduceo reta yugüeru Jesús oï vae pe. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

²⁴—Oporomboe vae, Moisés jei ueya yandevé cuarãï: 'Penti tiqúei vae umano yave, jembirecocue mbaeti imembi chupe yave, cuimbae amiri tiví tumenda jocua cuña ndive.

Jayave cuña inembi yave, cuimbae tumbijee sambia'i tiquei amiri jee pe.' Jucuarai jei Moisés —jei reta chupe—. ²⁵ Ico orepite pe penti cuimbae seis tivi reta güinoi vae. Cua cuimbae umenda, jare umano umimembi mbae reve. Cuimbae amiri jaicue rupigua umenda jembirecocue ndive —jei reta—. ²⁶ Erei jae vi umano umimembi mbae reve. Jae ramiño vi uyeyapo jaicue rupigua ye pe. Opaete siete reve umenda jocua cuña ndive, jare opaete siete reve umano umimembi mbae reve —jei reta—. ²⁷ Taicue rupi cuña umano vi. ²⁸ Jayave umanocue vae reta icove ye yave, ¿quia nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

²⁹ Erei Jesús jei chupe reta:

—Pe reta piyavi co. Echa'ã picuaa'ã Tumpa iñee uyecuatia oĩ vae jare Tumpa imbaepuere —jei—. ³⁰ Umanocue vae reta icove ye yave, cuimbae reta jare cuña reta ndarau umenda. Yugüirecota ángel ara pe ñugüinoi vae reta yugüireco rami —jei—. ³¹ Tamimbeu peve umanocue vae reta regua. Icove yeta co. ¿Pemingueta'ã pa Tumpa iñee pe uyecuatia oĩ vae? ³² Echa'ã uyecuatia oĩ cuarai: 'Che co jae Abraham, Isaac jare Jacob iTumpa' —jei Tumpa. Jucuarai uyecuatia oĩ —jei—. Tumpa mbaeti co umanocue vae reta iTumpa. Jae co tecove güinoi vae reta iTumpa —jei.

³³ Jare yati vae reta cua uyandu yave, ipiacafi Jesús iporomboe re.

Mboroyocui tenondegua vae

(Mr 12.28-34)

³⁴ Erei fariseo reta uicuaa yave saduceo reta ipuere'ã ma co mbae jei Jesús pe, amocue jae reta uyembati Jesús oĩ vae pe. ³⁵ Jayave penti fariseo - jae co penti mboroyocui re oporomboe vae vi - upirandu Jesús pe mbae re. Uipota tõi uyavica chupe. ³⁶ Jei chupe:

—Oporomboe vae, ¿mbae nunga mboroyocui pa co jae tenondegua vae?

³⁷ Jayave Jesús jei chupe:

—Mboroyocui tenondegua vae co cua: 'Eau ndeYa Tumpa opaete ndepia reve, opaete nderecove reve, jare opaete ndepiyemingueta reve' —jei—. ³⁸ Cua co jae mboroyocui tenondegua vae —jei—. ³⁹ Jare jaicue rupigua vae co cua: 'Eau nderapicha nde ndiyerau rami' —jei—. ⁴⁰ Cua mocui mboroyocui ndiyapo yave, ndiyapo ma co opaete Moisés iporoyocui jei vae jare Tumpa iñee aracae umimbeu vae reta jei vae —jei.

¿Quia inemoñaeta reta pegua pa co Cristo?

(Mr 12.35-37; Lc 20.41-44)

⁴¹ Jare fariseo reta Jesús oĩ vae pe uyembati yave, Jesús upirandu chupe reta:

—¿Mbae pa pepia pe piyemingueta Cristo re? ¿Quia inemoñaeta reta pegua pa co jae?

—Jae co David inemoñaeta reta pegua —jei reta chupe.

⁴³ —Jucuarai yave, ¿maera pa David etei jei chupe: 'CheYa'? Echa'ã Espíritu Santo uicuaaca David pe jucuarai jei vaerã —jei chupe reta—. ⁴⁴ Echa'ã David jei cuarai:

'YandeYa jei cheYa pe:

Eguapi cheyipi pe cheacata coti,

nderovaicho reta opa amiamiri regua' —jei yandeYa.

Jucuarai jei David aracae —jei—. ⁴⁵ ¿Quirai pa ipuere ico David inemoñaeta reta peguarã? Echa'ã David etei jei chupe: 'CheYa' —jei Jesús chupe reta.

⁴⁶ Jare mbaeti quia ipuere umimbeu chupe. Jare jocua ara güive mbaeti ye quia uipota upirandu Jesús pe mbae re.

23

Jesús umbijeco mboroyocui re oporomboe vae reta jare fariseo reta

(Mr 12.38-40; Lc 11.37-54; 20.45-47)

¹ Jayave Jesús jei jeta vae pe jare jemimboe reta pe:

² —Mboroyocui re oporomboe vae reta jare fariseo reta umimbeu peve Moisés iporoyocui reta. ³ Jáeramo jecuaeño piyapo jei reta peve piyapo vaerã vae. Erei agüiye piyapo jae reta uyapo rami. Echa'ã jae reta etei uyapo'ã jei peve piyapo vaerã vae —jei—. ⁴ Jae reta jei ñru vae reta pe uyapo vaerã yavai uyapo vaerã vae. Yamijaanga penti tivita. Jae reta jei ñru vae reta pe ovoĩ vaerã penti tivita poi vae. Erei jae reta ombori'ã etei ovoĩ vaerã. Uyaviqui'ã etei reta jivita —jei—. ⁵ Mboroyocui re oporomboe vae reta jare fariseo reta mbae uyapo yave, uipota ñru vae reta uecha vaerã. Echa'ã jae reta oñoño iyee Tumpa iñee jiru tuicha vae jare uyapo jemimonde pucu —jei—. ⁶ Yugüiraa yave tupao pe jare para pe, jecuaeño uipota uguapi tenda tenondegua vae reta pe —jei—. ⁷ Jare uipota ñru vae reta pe uyembisaludaca vaerã calle reta rupi jare jei vaerã chupe reta: 'Oporomboe vae' —jei—. ⁸ Erei agüiye pipota ñru vae reta jei vaerã peve: 'Oporomboe vae.' Echa'ã che co jae pomboe vae, jare opaete pe reta cherivi reta co —jei—. ⁹ Jare agüiye pere: 'Cheru', penti cuimbae

ivi pegua pe. Echa'ã pentiño co jae peRu, jare jae ico ara pe —jei—. ¹⁰Jare agüiye pipota Ìru vae reta jei vaerã peve: 'Cheya.' Echa'ã pentiño co jae peYa. Jae co che. Echa'ã che co jae Cristo, Tumpa ombou vae —jei—. ¹¹Ime yave quía uipotata tenondeguarã ico vae, tuyeyocui opaete Ìru reta pe —jei—. ¹²Echa'ã uyembutuicha vae uñemimichicata co. Jae ramiño vi uñemimichi vae uyembutuichacata co —jei.

¹³Jayave Jesús jei mboroyocui re oporomböe vae reta jare fariseo reta pe:

—Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta piyopia Ìru vae reta agüiye vaerã uique mboroyocui ara pegua pe. Pe reta etei pique'ã. Ìru vae reta uipotata tēi uique, ērei pe reta piyopia reta agüiye vaerã uique —jei—. ¹⁴Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ã pepiro cuña ime umano vae reta güi opaete imbaembae, jare pucu piyerure Tumpa pe pepurumbitavi vaerã. Jáeramo piporara eteta co —jei—. ¹⁵Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ã peo peeca opaete i guasu rupi jare ivi rupi pevãe vaerã penti pepure pemiquirēi peporomböe güirovia vaerã vae. Jare güirovia yave peporomböe, jecuae pemboe mbaembae re. Jocua jeco pegua jae uyeyapo icavi mbae vaerã. Pe reta peota tata guasu pe. Jare jae peporomböe re güirovia ramo, oota vi tata guasu pe —jei—. ¹⁶Pe reta co jae jesa mbae vae uechaca ñugüinoi tape Ìru vae reta pe vae reta rami. Piporarata co. Echa'ã pe reta pere: 'Ime yave quía: Tumpa jo jee re ayapota, jei vae, jocua mbae'ã co. Èrei ime yave quía: Oro Tumpa jo pegua jee re ayapota, jei vae, uyapota co jocua jei uyapota vae' —pere, jei—. ¹⁷Pe reta co jae jesa mbae vae reta rami. Pe reta pearacuaa'ã. Echa'ã jocua oro uñeñoño tee Tumpa peguarã, Tumpa jo pegua co ramoño. Jáeramo Tumpa jo uyembujupica ete jocua oro Tumpa jo pegua güi —jei—. ¹⁸Jae ramiño vi pe reta pere: 'Ime yave quía: Uñemearendaa jee re ayapota, jei vae, jocua mbae'ã co. Èrei ime yave quía: Ofrenda jee re uñemearendaa pe oí vae ayapota, jei vae, uyapota co jei uyapota vae' —pere, jei—. ¹⁹Pe reta co jae jesa mbae vae reta rami. Pe reta pearacuaa'ã. Echa'ã jocua ofrenda uñeñoño tee Tumpa peguarã, uñemearendaa pe oí ramoño. Jáeramo uñemearendaa uyembujupica ete ofrenda uñeme vae güi —jei—. ²⁰Jáeramo ime yave quía: Uñemearendaa jee re ayapota, jei vae, opaete ofrenda uñemearendaa pe oí vae uñemiru uñemearendaa ndive —jei—. ²¹Jae ramiño vi ime yave: Tumpa jo jee re ayapota, jei vae, Tumpa jo pe ico vae uñemiru Tumpa jo ndive —jei—. ²²Jae ramiño vi ime yave quía: Ara jee re ayapota, jei vae, Tumpa uñemiru ara ndive. Echa'ã ara Tumpa iguapia co —jei—. ²³Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ã pemee Tumpa pe diezmo temiti reta penoi vae güi. Èrei cua michi ete. Mboroyocui jei peve piyapo vaerã jeta ete cua güi. Echa'ã jei peve piyapo vaerã jupi vae jare pepuruparareco vaerã jare pepurugüirovia vaerã. Piyapo'ã opaete cua. Icavi co pemee vaerã Tumpa pe jocua nunga diezmo. Èrei piyapota tēi jupi vae jare pepurupararecota tēi jare pepurugüiroviata tēi —jei—. ²⁴Pe reta co jae jesa mbae vae uechaca ñugüinoi tape Ìru vae reta pe vae reta rami. Pe reta peatēi pemocui penti ñeti, ērei pemocui penti camello —jei—. ²⁵Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Pe reta co jae taza jare plato icupe rupiño uyeyoe vae rami. Èrei pepia iquia co. Echa'ã pipota Ìru vae reta imbaembae jare piyapo icavi mbae vae —jei—. ²⁶Pe reta co jae fariseo reta. Pe reta co jae jesa mbae vae reta rami. Piyoe rani pepia, taza jare plato japipe rupi piyoe rami. Jayave icupe rupi vi uyeyoeta —jei—. ²⁷Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta co jae teögüeriru uñemotí cavi vae reta rami. Jocua nunga teögüeriru ipõra echa, ērei japipe pe tinee umanocue vae reta icägüecue reta pe jare iquia —jei—. ²⁸Jae ramiño vi Ìru vae reta ipia pe uyemingueta tēi pe reta co jae jupi vae reta, ērei pepia tinee tavi jare icavi mbae vae pe —jei—.

²⁹Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta piyapo Tumpa iñee aracae umimbeu vae reta iteögüeriru reta, jare pemopõra jupi vae reta iteögüeriru reta —jei—. ³⁰Jare pere: 'Yande yaico yave mona yandetenondegua reta yugüireco yave, yande yamborita'ã tēi jae reta uyuca yave Tumpa iñee aracae umimbeu vae reta' —pere, jei—. ³¹Jucuarã pere ramo, picuaaca quirã pe reta co jae Tumpa iñee aracae umimbeu vae reta uyuca vae reta iñemoñaeta reta pegua —jei—. ³²Agüiyeta tēi ma piyapo petenondegua reta uyapo rami —jei—. ³³Pe reta mboi reta rami co. Añete co, pe reta mboi reta iñemoñaeta reta rami co. Ndarau etei piyerepi Tumpa perãa yave peo vaerã tata guasu pe —jei—. ³⁴Amondota peve chiñee umimbeu vae reta jare iyaracuaa catu vae reta jare cheporoyocui re oporomböe vae reta. Picututa curusu re amocue vae piyuca, jare pinupata chicota pe amocue vae petupao

reta pe jare peaicuemoñata reta penti tenta guasu güi ñru tenta guasu pe —jei—. ³⁵ Jare pe reta penoita teco opaete jupi vae reta imano re. Tenonde voi Abel uyeyucaca - jae co jupi vae - jare taicue rupi Berequías tai Zacarías jee vae uyeyucaca. Echa'ã Zacarías umano maemimba uyeyucacue uñemeearenda jare Tumpa jo ipäu pe —jei—. ³⁶ Añete che jae peve, cua reta jare opaete ñru vae reta imano re pe reta añave pico vae piyembijecota —jei—.

Jesús ipiatiti Jerusalén pegua reta re
(Lc 13.34-35)

³⁷ Jerusalén pegua reta, pe reta piyuca Tumpa ñnee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirëi tõi pumbati, uru umbati imembi reta ipepo igüi pe rami, ñrei pe reta pipota'ã —jei—. ³⁸ Mase, Tumpa usirita ma pegüi. ³⁹ Che jae peve, ndarau ma cherecha pere regua: 'Tuyembiadoraca yandeYa jee re ou vae' —jei—.

24

Tumpa jo uyeitita
(Mr 13.1-2; Lc 21.5-6)

¹ Jayave Jesús oë Tumpa jo güi. Jare jemimboe reta yugüeru uechaca Jesús pe opaete o Tumpa jo pe ñugüinoi vae reta. ² Jare Jesús jei chupe reta:

—¿Pemaë pa pei opaete cua o reta re? Añete che jae peve, ndarau upita penti ave ita ñru ita iárambo. Opaete uyeitita co —jei—.

Mbaesusere reta uyeyapota vae
(Mr 13.3-23; Lc 21.7-24; 17.22-24)

³ Jare Jesús uguapi oï rambueve ivitu guasu Olivos re, jemimboe reta yugüeru jae oï vae pe jare jei chupe, jae retaño jae ndive ñugüinoi yave:

—Emimbeu oreve, ¿quirã i yave pa cua uyeyapota? Jare ndeyu yeta ma yave, ¿quirãita pa nduicuaa? Jare cua ara reta opata ma yave, ¿quirãita pa nduicuaa? —jei reta.

⁴ Jayave Jesús jei chupe reta:

—Piñemoa ngatu agüiye vaerã petavi. ⁵ Echa'ã yugüeruta jeta cheree pe uyembijeeta vae reta. Jae reta jeita: 'Che co jae Cristo.' Jare umbitavita jeta vae reta —jei—. ⁶ Imeta co ñerãro reta coiño pegüi. Imeta vi ñerãro reta mbiri pegüi. Piyandu yave cua reta regua, agüiye pequiye. Cua susere reta uyeyapoñotai co. Ñrei cua susere reta ndei ave co opa vaerã —jei—. ⁷ Pentì ivi pegua reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. Jare imeta caruai reta jare ivicãta jeta que rupi —jei—. ⁸ Ñrei cua susere reta uyembipi ramo co oï —jei—.

⁹ Jayave ñru vae reta pemeeta uiporacata peve vae reta pe, jare piyeyucacata. Jare piñemitarëicata opaete vae pe chereco pegua —jei—. ¹⁰ Jare jeta vae uñatima yeta Tumpa güi jare uñemeeta reta jare uñemitarëita —jei—. ¹¹ Jare jeta upurumbitavi vae reta jeita: 'Che co jae penti Tumpa ñnee umimbeu vae.' Jáeramo jae reta umbitavita jeta vae —jei—. ¹² Jare jeta vae uyapota icavi mbae vae. Jáeramo jeta tenonde yave upuruau vae reta ndarau ma upuruau —jei—. ¹³ Ñrei jötsata oo uvãe iyapi pe vae uyembiasacata co —jei—. ¹⁴ Jare cua ñee icavi vae Tumpa iporoyocua pegua jerãcuata opaete ivi rupi opaete ivi pegua reta uyandu vaerã. Jayave cua ara reta opata co —jei—.

¹⁵ Jare peechata icavi mbae vae opaete urucumegua vae uyemboi oï o uñeño tee Tumpa peguarã vae pe. Tumpa ñnee aracae umimbeu vae Daniel jei uyecuaata co. (Umingueta vae tuicuaa) —jei—. ¹⁶ Jayave Judea pe ñugüinoi vae reta tosi ivitu guasu coti. ¹⁷ Jare o cupe re oï vae agüiye tuique jo pe güiraa vaerã imbaembae —jei—. ¹⁸ Jare ico pe oï vae agüiye tou ye jenta pe güiraa vaerã iyasoya —jei—. ¹⁹ Jare ipurúa vae reta jare umicambu vae reta uiporara eteta jocua ara reta pe —jei—. ²⁰ Jare piyerure Tumpa pe agüiye vaerã pesi roi ma yave ani mbutuu ara pe —jei—. ²¹ Echa'ã jocua ara reta pe ivi pegua reta uiporara eteta. Jucuarã'i uiporara reta ivi uyeyapo güive, jare ndarau ye jucuarã'i uiporara reta —jei—. ²² Jare yandeYa upota'ã yave opa vaerã jocua ara reta, mbaetita tõi quía ipuere ico. Ñrei Tumpa uiparavo vae reta jeco pegua opata jocua ara reta —jei—.

²³ Aramoi jocua ara reta pe quía jeita peve: 'Mase, co oï Cristo', ani jeita: 'Mase, pee oï Cristo.' Jucuarã'i jei yave, agüiye perovia —jei—. ²⁴ Amocue upurumbitavi vae reta jeita: 'Che co jae Cristo', jare ñru upurumbitavi vae reta jeita: 'Che co jae Tumpa ñnee umimbeu vae.' Jare jae reta uyapota miacañi reta, umbitavi vaerã tõi Tumpa uiparavo vae reta —jei—. ²⁵ Mase, amimbeu ma peve cua, ndei uyeyapo mbove —jei—.

²⁶ Jayave ñru vae reta jei yave peve: 'Mase, ime co ñana pe oï', agüiye pecua. Jare ñru vae reta jei yave peve: 'Mase, ime co cua o pe oï', agüiye perovia —jei—. ²⁷ Tamijaanga ama uvera vae. Echa'ã ama uvera vae uyecuaa opaete ara re guarasi oë vae coti güi guarasi

uique vae coti pe. Jae ramiño vi che cuimbaerã ayeyapo vae ayecuaata opaete vae pe ayu ye yave —jei—.

²⁸ Umano vae jetecue oĩ vae pe uyembatita uruvi reta —jei—.

Cuimbaerã uyeyapo vae ou yeta

(Mr 13.24-37; Lc 21.25-36; 17.26-36)

²⁹ Jayave opa uiporara reta jocua ara reta pe yave, guarasi uñemipitumimbita, jare yasi ndarau ma jembipe, jare yasitata reta oata ara güi, jare opaete ara re mbaepuere güinoi vae reta ucåtata —jei—. ³⁰ Jayave mbae uyecuaata ara re. Jocua uicuaacata ivi pegua reta pe che cuimbaerã ayeyapo vae ayu yeta co. Jayave opaete ati Israel pegua reta ipiatitita jare cherechata ayu amapitu reve ara güi. Che cuimbaerã ayeyapo vae anoita mbaepuere tuicha vae, jare ayembiaadoracata opaete vae pe —jei—. ³¹ Jare amondota ángel cheve uyeyocui vae reta trompeta uñee reve, jae reta güeru vaerã aiparavo vae reta opaete ivi rupi güi —jei—.

³² Yandepuere yamijaanga iva. Piyemboe jese —jei—. Joqui yave, picuaa uyaro ma co ama oqui vaerã —jei—. ³³ Jae ramiño vi pe reta peecha yave opaete vae mbaembae uyeyapo ñugüinoi vae, picuaata che coiño ma co aĩ —jei—. ³⁴ Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. ³⁵ Ara jare ivi opata, ãrei chiñee ndarau opa —jei—.

³⁶ Ërei mbaeti quã uicuaa mbae ara pe ani mbae ora pe yepe cua uyeyapota, jaeño cheRu. Ángel ara pe ñugüinoi vae reta uicuaa'ã. Che co jae Tumpa Tai. Ërei che ave aicuaa'ã —jei—. ³⁷ Noé ico rambueve, ivi pegua reta uyapo icavi mbae vae. Jae ramiño vi che cuimbaerã ayeyapo vae ayu ye yave, ivi pegua reta uyapota icavi mbae vae —jei—. ³⁸ Ndei iporu guasu ou mbove, ivi pegua reta ucaruñoi jare ucauñoi yugüireco, jare jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã. Ërei penti ara Noé uique jocua chalana guasu pe —jei—. ³⁹ Jare uyepocouca reta, iporu guasu ou yave. Jáeramo iporu guasu opa uyuca reta. Jucuarãita vi uyeyapo che cuimbaerã ayeyapo vae ayu ye yave —jei—. ⁴⁰ Jocua ara mocui cuimbae imeta co pe ñugüinoi. Penti vae uyereraacata jare ñru vae upitata co pe —jei—. ⁴¹ Jae ramiño vi mocui cuña umbaesota ñugüinoi penti angúa pe. Penti vae uyereraacata jare ñru vae upitata —jei—. ⁴² Jáeramo jecuaeño peãro. Echa'ã picuaa'ã mbae ara pe ayu yeta. Che co jae peYa —jei—. ⁴³ Aipota picuaa vaerã cua: Penti tenta iya uicuaa vae mbae ora pe outa uvãe imonda vae oñomi vaerã imbaembae jenta güi, uñemicuatĩrota tẽi jare ndarau tẽi umaeño imonda vae re güiraa vaerã imbaembae chugüi —jei—. ⁴⁴ Jae ramiño vi pe reta peãro, agüiye vaerã che cuimbaerã ayeyapo vae ayu ye avãe piyandareco'ã pẽi yave —jei—.

Uyeyocui vae uyapo'a ipatrón jei vae

(Lc 12.41-48)

⁴⁵ Penti uyeyocui vae iyaracuaa vae uyapo ipatrón jei chupe uyapo vaerã vae. Jare ipatrón umee chupe ico vaerã ñru jembiocui reta juvicharã, jare umee vaerã chupe reta jembipurã opa ara —jei—. ⁴⁶ Ipatrón ou ye uvãe yave jenta pe, uecha yave jocua jembiocui uyapo oĩ iparaviqui, jocua jembiocui uyeroviata co —jei—. ⁴⁷ Añete che jae peve, ipatrón umeeta chupe uyandareco vaerã opaete imbaembae re —jei—. ⁴⁸ Ërei aramoi uyeyocui vae uyapo icavi mbae vae jare jei iyupe ipia pe: 'Chepatrón ndarau ou ye imbae.' ⁴⁹ Jare umbipi uinupa ñru uyeyocui vae reta, jare ucaru jare ucau usavipo vae reta ndive —jei—. ⁵⁰ Jayave penti ara ipatrón ou yeta uvãe jembiocui uyandareco'ã oĩ yave. Jocua ora pe etei ipatrón uipocouta —jei—. ⁵¹ Jayave ipatrón uiporaracata chupe jare omondota ico vaerã opaete ñru upurumbitavi vae reta ndive. Joco pe yuaota jare jãi umbiquiririuta —jei—.

25

Diez cuñatai cuimbae güireco'ã etei vae reta

¹ Mboroyocua ara pegua diez cuñatai cuimbae güireco'ã etei vae reta rami co. Penti penti cuñatai güiraa ilámpara oẽ oo uñeovãiti vaerã cuimbae umendata vae ndive —jei—. ² Jare pandepo jocua cuñatai reta iyaracuaa, jare ñru pandepo vae reta iyaracuaa mbae vae —jei—. ³ Jocua iyaracuaa mbae vae reta güiraa ilámpara, ãrei güiraa'ã aceite lámpara peguarã —jei—. ⁴ Ërei iyaracuaa vae reta güiraa vi aceite lámpara peguarã aceite jiru pe —jei—. ⁵ Jare ndeño ou uvãe cuimbae umendata vae. Jáeramo opaete cuñatai reta jopei jare oque —jei—.

⁶ Jare piare mbite yave uyendu ñee. 'Mase, outa ma uvãe cuimbae umendata vae. Pecua peovãiti' —jei, jei—. ⁷ Jayave opaete jocua cuñatai reta upũa jare uyapicatu ilámpara —jei—.

⁸ Jare cuñatai iyaracuaa mbae vae reta jei cuñatai iyaracuaa vae reta pe: 'Peme mi oreve michi peaceite. Echa'ã orelámpara ove ma' —jei reta, jei—. ⁹ Ërei cuñatai iyaracuaa vae reta jei: 'Numee yave peve, ndarau ndipo uepiti oreve. Icavi ndipo pe reta peo vaerã aceite

umee vae reta pe pegua vaerã piyupe' —jei reta, jei—. ¹⁰Jare cuñatai iyaracuaa mbae vae reta yugüraa aceite ueca rambueve, ou uvãe cuimbae umendata vae. Jare cuñatai iyaracuaa vae reta uique jae ndive menda uyeyapo oĩ vae pe. Jayave onque uyeyuquenda —jei—.

¹¹Jare taicue rupi yugüeru uvãe jocua ñru cuñatai reta jare jei: 'Oreya, oreya, ipea oreve onque.' ¹²Ërei cuimbae jei chupe reta: 'Añete che jae peve, pucuaa'ã.'

¹³Jáeramo jecuaeño peãro. Echa'ã picuaa'ã mbae ara pe jare mbae ora pe che cuimbaerã ayeyapo vae ayu yeta —jei—.

Talento reta
(Lc 19.11-27)

¹⁴Tamijaanga penti cuimbae ñvi güi ambie ñvi mbiri oĩ vae pe oota vae. Ndei oo mbove, ueni jembiocui reta jare jei chupe reta uyandareco vaerã imbaembae re —jei—. ¹⁵Jayave umee penti jembiocui pe pandepo corepoti talento jee vae. Jare umee ñru jembiocui pe mocui talento. Jare umee ñru jembiocui pe penti talento. Echa'ã umee chupe reta penti penti ipuereta uyapo vae rupi. Jayave cuimbae oo ambie ñvi coti —jei—. ¹⁶Jayave pandepo talento güinoi vae umbipi umimbaraviqui icorepoti, jare jucuarãi umãru jocua pandepo talento ndive pandepo ye —jei—. ¹⁷Jae ramiño vi mocui talento güinoi vae umbipi umimbaraviqui icorepoti, jare jucuarãi umãru jocua mocui talento ndive mocui ye —jei—. ¹⁸Ërei penti talento güinoi vae oo oyoo ñvi jare oñomi ñvigüi pe corepoti ipatrón umee chupe vae —jei—.

¹⁹Jare ima ma yave jocua uyeyocui vae reta ipatrón ou ye uvãe ñvi pe jare upirandu chupe reta mbae ra uyapo icorepoti umee chupe reta vae pe —jei—. ²⁰Jare tenonde yave pandepo talento güinoi vae güeru jocua pandepo talento ñru pandepo talento umãru vae reve, jare jei ipatrón pe: 'Patrón, nde neme cheve pandepo talento. Mase, amãru jae reta ndive pandepo talento ye' —jei, jei—. ²¹Jayave ipatrón jei chupe: 'Icavi ndiyapo. Nde co jae cherembiocui icavi vae. Ndiyeyocui cavi cheve cua mbovi vae re. Jáeramo tamee ndeve jeta mbaembae ndiyandareco jese vaerã. Iyerovia che ndive' —jei, jei—. ²²Jae ramiño vi tenonde yave mocui talento güinoi vae ou jei ipatrón pe: 'Patrón, nde neme cheve mocui talento. Mase, amãru jae reta ndive mocui talento ye' —jei, jei—. ²³Jayave ipatrón jei chupe: 'Icavi ndiyapo. Nde co jae cherembiocui icavi vae. Ndiyeyocui cavi cheve cua mbovi vae re. Jáeramo tamee ndeve jeta mbaembae ndiyandareco jese vaerã. Iyerovia che ndive' —jei, jei—. ²⁴Jayave tenonde yave penti talento güinoi vae ou jei ipatrón pe: 'Patrón, che nducuaa co. Aicuaa nde co jae penti cuimbae jecopochi vae. Nde nepiro mbaembae ñru vae reta güi, jare ndeaviro ñru vae reta oñoti vae' —jei, jei—. ²⁵'Jáeramo aquie ndegüi ramo, aa añomi ndecorepoti ñvigüi pe. Mase, co oĩ nembae' —jei, jei—. ²⁶Jayave ipatrón jei chupe: 'Nde co jae cherembiocui icavi mbae vae. Ndeaquí co. Nde ndicuaa quirãi apiro mbaembae ñru vae reta güi jare quirãi avairo ñru vae reta oñoti vae' —jei, jei—. ²⁷Jáeramo nderaata tẽi checorepoti banco pe. Echa'ã jucuarãi ndiyapo yave, ayu ye yave nemeeta tẽi co cheve corepoti amee ndeve vae jare mbovi ye banco pegua reta umãruta tẽi jae ndive vae' —jei, jei—. ²⁸Jayave ipatrón jei jembiocui reta pe: 'Pepiro chugüi jocua penti talento emee diez talento güinoi vae pe' —jei, jei—. ²⁹'Echa'ã güinoi vae pe uñemãruta. Jeta eteta güinoi. Ërei mbaeti güinoi vae güi mbovi ete güinoi vae uyeequita' —jei, jei—. ³⁰Ërei pemombo cua cherembiocui uyeyocui cavi'ã cheve vae oca pe pitumimbi oĩ vae pe. Joco pe uyaota jare jãi umbiquirãia' —jei, jei—.

Opaete ñvi pegua reta uñeaãcata

³¹Che cuimbaerã ayeyapo vae ayu ye yave ayembiadoraca vaerã, opaete ángel uñeñono tee Tumpa peguarã vae reta yugüeruta che ndive. Jayave aguapeta cheguapia yembiadoraca pegua pe —jei—. ³²Jare uyematita cherovai opaete ñvi pegua reta. Jare ambiaota amocue vae ñru vae reta güi, penti cuimbae umbiyao iovecha reta icapura reta güi rami —jei—. ³³Jare añonocata ovecha reta cheacata coti jare capura reta cheaso coti —jei—. ³⁴Che co jae Mburuvicha Guasu. Jaeta cheacata coti ñugüinoi vae reta pe: 'Peyu pico mboroyocua ñvi uyeyapo güive uñemicuatiro peve vae pe. CheRu pemivendise ma' —jaeta, jei—. ³⁵'Echa'ã chiyembae yave, pemee acarú. Cheúe aico yave, pemee jau i. Yepe tẽi che co jae ambie ñvi pegua, Ërei pemaño vite cheré aico vaerã perenta pe' —jaeta, jei—. ³⁶'Chenani yave, pemee cheve cheremimonderã. Chembaerasi yave, pepou chepi. Peresoriru pe añ yave, peyu pepou chepi' —jaeta, jei—. ³⁷Jayave jupi vae reta jeita cheve: 'OreYa, ¿quirãí yave pa nduecha ndiyembae yave jare numee ndecaru? ¿Quirãí yave pa nduecha ndeúe yave jare numee ndeu í?' —jeita, jei—. ³⁸'¿Quirãí yave pa nduecha penti ambie ñvi peguarã ndico yave, jare numeño nderé ndico vaerã orerenta pe? ¿Quirãí yave pa nduecha nenani jare numee ndeve nderemimonderã?' —jeita, jei—. ³⁹'¿Quirãí yave pa nduecha nembaerasi ani

peresoriruru pe jare ndopou ndepi?' —jeita, jei—. ⁴⁰ Jayave che jaeta chupe reta: 'Añete che jae peve, jucuarāi piyapo cherivi reta pe, yepé tēi uñereriroca. Jare jucuarāi piyapo yave, piyapo co cheve vi' —jaeta, jei—.

⁴¹ Jayave jaeta cheaso coti ñugüinoi vae reta pe: 'Pesiri chegüi pecua tata opa mbae vae pe. Jocua tata uñemicuatiro ma oñ añña guasu jare opaete ángel chupe uyeyocui vae reta pe. Tumpa uiporaracata peve' —jaeta, jei—. ⁴² 'Echa'ā chiyembai yave, pemee'ā acarú. Cheúe yave, pemee'ā i jau' —jaeta, jei—. ⁴³ 'Che co jae ambie ivi pegua jare pemaño'ā cheré aico vaerā perenta pe. Chenani yave, pemee'ā cheve cheremimonderā. Chembraerasi yave jare peresoriruru pe añ yave, pepou'ā chepi' —jaeta, jei—. ⁴⁴ Jayave jae reta vi jeita cheve: 'OreYa, çquirāi yave pa nduecha ndiyembai yave, ani ndeúe yave, ani ambie ivi peguarā ndico yave, ani nenani yave, ani nembraerasi yave, ani peresoriruru pe neñ yave, jare nombori'ā?' —jeita, jei—. ⁴⁵ Jayave che jaeta chupe reta: 'Añete che jae peve, pembori'ā cherivi uñereriroca vae reta. Jare jucuarāi co chembori'ā' —jaeta, jei—. ⁴⁶ Jare cua reta yugüiraata tata guasu pe. Joco pe uiporarata reta jaeño mai pegua. Ërei jupi vae reta güinoita tecove opa mbae vae —jei.

26

Uipota reta uyucaca Jesús

(Mr 14.1-2; Lc 22.1-2; Jn 11.45-53)

¹ Jare opaete cua jei ma yave, Jesús jei jemimboe reta pe:

² —Picuaa mocui araño ma co uata pascua iara uvæ vaerā, jare che cuimbaerā ayeyapo vae añemecata co ayecutuca vaerā —jei.

³ Jare sacerdote reta itenondegua reta jare tenta guasu pegua reta itenondegua reta uyembati sacerdote tenondegua joca pe. Sacerdote tenondegua jee co Caifás. ⁴ Jare uyemboemboe reta quirāi ipuere uipisi viari Jesús uyucaca vaerā. ⁵ Ërei jei reta:

—Agüiye yaipisi pascua ara rupi, agüiye vaerā tenta guasu pegua reta uyapo tecorai.

Cuña upiyere mbae ipiche cavi vae Jesús re

(Mr 14.3-9; Jn 12.1-8)

⁶ Jare Jesús oñ rambueve tenta guasu-rai Betania pe Simón ipire ocuise vae jenta pe, ⁷ uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae jepi vae pe. Jare cuña upiyere mbae ipiche cavi vae Jesús iñāca re, Jesús mesa pe uguapi oñ rambueve. ⁸ Jare Jesús jemimboe reta cua uecha yave, pochi cuña pe. Jei reta:

—¿Maera pa umicañitei? ⁹ Echa'ā umee yave corepoti re, guinoita tēi jeta corepoti umee vaerā iparavete vae reta pe —jei reta.

¹⁰ Ërei Jesús uicuaa jei reta vae, jare jei chupe reta:

—¿Maera pa pemambeco cuña? Icavi vae co uyapo cheve —jei—. ¹¹ Echa'ā yugüirecoñotai co iparavete vae reta pe reta ndive, Ërei che ndarau aicoño pe reta ndive —jei—. ¹² Cua mbae ipiche cavi vae upiyere cheré vae pe chembipiche cavi ma, ndei añeñotica mbove —jei—. ¹³ Añete che jae peve, opaete ivi rupi ñee icavi vae jerācua vae rupi, cua uyapo vae vi jerācuata, ñru vae reta imandúa vaerā jese —jei.

Judas umeeta Jesús

(Mr 14.10-11; Lc 22.3-6)

¹⁴ Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, ¹⁵ jare jei chupe reta:

—¿Mbae pa pemeeta cheve, amee yave Jesús peve?

Jayave jae reta jei umeeta co chupe treinta corepoti. ¹⁶ Jayave jocua güiye Judas ueca quirāi ipuere umee Jesús chupe reta.

Jesús ucaru jemimboe reta ndive

(Mr 14.12-25; Lc 22.7-23; Jn 13.21-30; 1 Cor 11.23-26)

¹⁷ Jare jocua ara judío reta umbipi jou mbiyape ovu mbae vae yave, Jesús jemimboe reta yugüeru jei chupe:

—¿Quiape pa ndipota nduyapicatu vaerā, tembiú pascua pegua ndeu vaerā?

¹⁸ Jayave Jesús jei chupe reta:

—Pecua tenta guasu pe pere cuimbae amimbeu peve vae pe: 'Oporomboe vae jei: Ora uvæ ma. Jauta tembiú pascua pegua nerenta pe cheremimboe reta ndive' —jei, pere chupe, jei.

¹⁹ Jayave jemimboe reta uyapo Jesús jei chupe reta uyapo vaerā vae. Jare uyapo reta tembiú pascua pegua jou reta vaerā.

²⁰ Jare p̄itu ma yave Jesús uguapi ucaru vaerã jocua doce jemimboe reta ndive. ²¹ Jare ucaru ñugüinoi rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe.

²² Jayave jae reta ipiatiti, jare jei Jesús pe penti penti rupi:

—CheYa, ¿che pa co jae?

²³ Jayave Jesús jei chupe reta:

—Mbiyape umãqui oĩ che ndive plato pe vae co jae. ²⁴ Che cuimbaerã ayeyapo vae aañotai amano vaerã, uyecuatía oĩ cheregua rami. Ërei jocua cuimbae chemeeta vae uiporarata co. Icavi t̄ei mona jocua cuimbae mbaeti ico yave —jei.

²⁵ Jayave Judas (Jesús umee vae) jei chupe:

—Oporomboe vae, ¿che pa co jae?

—Ndere ma co —jei Jesús chupe.

²⁶ Jare ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee jemimboe reta pe.

—Peu —jei chupe reta—. Cua co jae cherete —jei.

²⁷ Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe.

—Peu opaete pe reta —jei—. ²⁸ Cua co jae cherugüi. Cherugüi uyepiyereta, Tumpa jei piau ye vae uyeyapo vaerã, jare Tumpa umbiasa vaerã jeta vae pe imbaeyoa reta —jei—.

²⁹ Ërei che jae peve, ndarau ma jau uva ticuecue, cheRu iporoyocua pe uva ticuecue ipiau vae pe reta ndive jau regua —jei.

Pedro uicucuta Jesús

(Mr 14.26-31; Lc 22.31-34; Jn 13.36-38)

³⁰ Jare opa yave ucanta reta Tumpa pe, oẽ reta yugüiraa ivitu guasu Olivos coti. ³¹ Jayave Jesús jei chupe reta:

—Opaete pe reta chereyata cua p̄itu. Echa'ã Tumpa iñee pe uyecuatía oĩ cuarã: 'Ayucata ovecha reta iyandarecoa, jare ovecha reta opata uñemiai.' Jucuarã uyecuatía oĩ —jei—.

³² Ërei aicove ye ayu yave umanocue vae reta ipite güi, aata perenonde Galilea pe —jei.

³³ Jayave Pedro jei chupe pe:

—Yepe t̄ei opaete ñru reta tandereya, Ërei che ndarau ndueya.

³⁴ —Añete che jae ndeve —jei Jesús chupe—, cua p̄itu etei, ndei uru cuimbae uñee mbove, mbapi vese ma checuacuta —jei.

³⁵ Ërei Pedro jei chupe:

—Yepe t̄ei tamano nde ndive, Ërei ndarau nducuacu.

Jare jucuarã vi jei opaete Jesús jemimboe reta.

Jesús uyerure Getsemaní pe

(Mr 14.32-42; Lc 22.39-46)

³⁶ Jayave Jesús oo jae reta jupie uvãe Getsemaní pe. Jare Jesús jei jemimboe reta pe:

—Peguapi cua pe, che aa pea pe ayerure Tumpa pe rambueve.

³⁷ Jayave güiraa Pedro jare jocua mocui Zebedeo tai reta, jare umbipi ipiatiti jare uiporara. ³⁸ Jayave jei jocua mbapi jemimboe reta pe:

—Tuicha chepiatiti, jare amano pota echa. Pepita cua pe, jare agüiye peque —jei.

³⁹ Jayave Jesús usiri catu chugüi reta, jare uyeatica ivi re jare uyerure Tumpa pe.

—CheRu, nde ndipota yave, embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

⁴⁰ Jayave Jesús ou ye jemimboe reta ñugüinoi vae pe, jare uecha oque ñugüinoi. Jayave jei Pedro pe:

—¿Pepuere'ã pa penti ora yepe peque mbae peĩ chembori vaerã? ⁴¹ Agüiye peque. Piyerure Tumpa pe, agüiye vaerã peyoa. Pepia pe peratangātu co, Ërei perete iyaqui co —jei.

⁴² Jayave Jesús usiri ye uyerure Tumpa pe.

—CheRu, nde ndipota yave aiporara vaerã, tuyeyapo cheve nde ndere vae —jei.

⁴³ Jayave ou ye jemimboe reta ñugüinoi vae pe, jare uecha oque ye ñugüinoi. Echa'ã jae reta jopei ete ma.

⁴⁴ Jayave Jesús usiri ye chugüi reta uyerure Tumpa pe. Uyerure ye tenonde yave uyerure rami. ⁴⁵ Jayave ou ye jemimboe reta ñugüinoi vae pe jare jei chupe reta:

—Peque jare peputuño ma. Mase, ora uvãe ma. Che cuimbaerã ayeyapo vae penti vae chemeeta cuimbae jeco pochi vae reta pe —jei—. ⁴⁶ Pepüa. Yaña ma. Mase, chemeeta vae coiño ma ou —jei.

Uipisi reta Jesús

(Mr 14.43-50; Lc 22.47-53; Jn 18.2-11)

⁴⁷ Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquisepucu reve jare iivira reve reve. Sacerdote reta itenondegua reta jare tenta guasu pegua reta itenondegua reta ombou Jesús pe cua reta. ⁴⁸ Jare umeeta vae umimbeu ma ñru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi —jehi.

⁴⁹ Judas ou voi Jesús oĩ vae pe.

—Pĩtu ma, oporomboe vae —jehi chupe.

Jayave uyurupite.

⁵⁰ Jayave Jesús jehi chupe:

—Cheamigo, ¿maera pa ndiyapo jucuarãi?

Jayave ñru reta yugüeru uipisi Jesús. ⁵¹ Jare penti Jesús ndive oĩ vae uipisi iquisepucu jare uequi ñru güi, jare uiporu sacerdote tenondegua jembicui inambi re, jare uyasía inambi chugüi. ⁵² Jayave Jesús jehi chupe:

—Ñono ye quisepucu ñru pe. Echa'ã opaete quisepucu uiporu vae reta uyeyucata quisepucu pe —jehi—. ⁵³ Aipota yave, chepuere ayerure cheRu pe ombou voi vaerã jeta ángel reta cherepi vaerã. ¿Ndicuaa'ã pa cua? —jehi—. ⁵⁴ Ërei jucuarãi yave, ¿quirãita pa uyeyapo Tumpa ñnee pe uyecuatía oĩ vae? Echa'ã jehi jucuarãita co uyeyapo cheve —jehi.

⁵⁵ Jayave Jesús jehi yugüeru vae reta pe:

—¿Maera pa peru quisepucu reta jare ivira reta chepisi vaerã, imonda vae pipisi vae rami? Opa ara aguapi pe reta ndive Tumpa jo pe. Joco pe aporomboe, jare chepisi'ã —jehi—. ⁵⁶ Ërei opaete cua uyeyapo oĩ Tumpa ñnee araca umimbeu vae reta uicuatía vae uyeyapo vaerã —jehi.

Jayave opaete jemimboe reta ueya Jesús, jare opa osi.

Jesús uyemboi jovaicho reta jovai

(Mr 14.53-65; Lc 22.54, 63-71; Jn 18.12-14, 19-24)

⁵⁷ Jayave Jesús uipisi vae reta güiraa sacerdote tenondegua Caifás jenta pe. Jare joco pe uyembati ma mboroyocui re oporomboe vae reta jare tenta guasu pegua reta itenondegua reta. ⁵⁸ Jare Pedro oo vi Jesús jaicue. Ërei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembicui reta ndive, uecha vaerã mbae uyeyapota vae. ⁵⁹ Jare sacerdote reta itenondegua reta jare opaete ñru mburuvicha reta ueca quía uñeapo vaerã Jesús re iyapu reve, uyucaca vaerã. ⁶⁰ Ërei uvãe'ã reta teco jese, yepe tẽi jeta vae iyapu reve uñeapo jese. Taicue rupi mocui vae iyapu reve uñeapo jese. ⁶¹ Jae reta jehi:

—Cua cuimbae jehi: ‘Chepuere ambusururu Tumpa jo jare ayapo ye mbapi ara pe’ —jehi, jehi reta.

⁶² Jayave sacerdote tenondegua upña uyemboi jare upirandu Jesús pe:

—¿Maera pa ñnee nemoë'a? ¿Mbae re pa cua reta uñeapo nderé? —jehi.

⁶³ Ërei Jesús quĩño. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? Che ndoyocui Tumpa jecuaeño ico vae jee re nemimbeu vaerã oreve —jehi.

⁶⁴ Jayave Jesús jehi chupe:

—Nde ndere rami jae co che. Ërei che jae peve, che cuimbaerã ayeyapo vae cherechata co aguapi aĩ Tumpa mbaepuere güinoi vae iyipi pe iyacata coti. Cherechata vi ayu amapĩtu reve ara güi —jehi.

⁶⁵ Jayave sacerdote tenondegua cua uyandu yave, pochi ramo omondo jemimondei, jare jehi:

—Jehi ma icavi mbae vae Tumpa coti. ¿Maera ma pa yaeca yeta ñru vae reta uñeapo vaerã jese? Mase, pe reta piyandu ma icavi mbae vae jehi Tumpa coti —jehi—. ⁶⁶ ¿Mbae pa pere añave? —jehi.

Ñru reta jehi chupe:

—Icavi'ã co. Icavi co yayucaca vaerã —jehi reta.

⁶⁷ Jayave amocue vae undivi Jesús jova re, jare uinupa. Jare ñru vae reta ocua jese, ⁶⁸ jare jehi chupe:

—Nde co jae Cristo, Tumpa ombou vae yave, emimbeu oreve quía ra ocua oĩ nderé.

Pedro uicuacu Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Jare Pedro uguapi oĩ oca pe. Jare penti cuñatai ou jehi chupe:

—Nde vi co jae Jesús Galilea pegua ñru.

⁷⁰ —Che jae ñru'ã co —jehi Pedro opaete vae jovaque—. Aicuaa'ã mbae ndere vae —jehi.

⁷¹ Jayave Pedro oo onque tuicha vae coti. Jare İru cuñatai uecha jare jei joco pe ñugüinoi vae reta pe:

—Cua cuimbae co jae penti Jesús Nazaret pegua İİru.

⁷² Ęrei Pedro jei ye:

—Che jae İİru'ã co. Tumpa jee re aicuaa'ã jocua cuimbae —jei.

⁷³ Jare ndei ima mbove joco pe ñugüinoi vae reta yugüeru jei Pedro pe:

—Añete co, nde co jae penti Jesús İİru. Echa'ã nde ndiyemingueta Jesús İİru reta uyemingueta vae rami —jei reta.

⁷⁴ Jayave Pedro jei Tumpa jee re:

—Tumpa tuiporaraca cheve cua jae vae añetete'ã yave. Aicuaa'ã jocua cuimbae.

Jare jupivoi uru cuimbae uñee. ⁷⁵ Jare Pedro imandúa Jesús jei chupe vae re: “Ndei uru cuimbae uñee mbove, mbapi vese ma checuacuta.” Jayave Pedro oë joco güi, jare tanta ipiatiti reve uyao.

27

Jesús uyemboi Pilato jovai

(Mr 15.1; Lc 23.1-2; Jn 18.28-32)

¹ Jare cõe ma yave, opaete sacerdote reta itenondegua reta jare tenta guasu pegua reta itenondegua reta uyemboemboe Jesús re, uyucaca vaerã. ² Jayave uipocua Jesús jare güiraa mburuvicha guasu Poncio Pilato pe umee.

Judas imano

³ Jayave Judas (Jesús umee vae) ipiatiti uyapo vae re. Echa'ã uicuaa ma quirãi Jesús jovaicho reta umbijeco ma Jesús. Jayave güiraa ye jocua treinta corepoti sacerdote reta itenondegua reta jare tenta guasu pegua reta itenondegua reta ñugüinoi vae pe. ⁴ Jare jei chupe reta:

—Ayapo mbaeyoa. Echa'ã amee peve jocua cuimbae teco güinoi mbae vae piyucaca vaerã —jei.

Jayave jae reta jei Judas pe:

—Jocua mbae'ã co oreve. Nde co nenoı teco.

⁵ Jayave Judas omombo corepoti Tumpa jo pe. Jayave oë Tumpa jo güi oo uyeyuvi.

⁶ Jayave sacerdote reta itenondegua reta omonoo jocua corepoti jare jei:

—Jupi'ã co ñañoño ye vaerã cua corepoti jiru Tumpa jo pe oı vae pe. Echa'ã ñamee Judas pe yandepuere vaerã yayucaca Jesús —jei reta.

⁷ Jayave uyemingueta reta uicuaa vaerã mbae ra uyapota corepoti pe. Jayave ogua ñaeu iyapoa İvi, uñeñotica vaerã joco pe ambie İvi pegua reta. ⁸ Jáeramo umbıjee jocua İvi: İvi tugüı jepicue.

⁹ Jare jucuarãı uyeyapo Tumpa İñee aracae umimbeu vae Jeremías jei vae. Echa'ã jae jei cuarãı: “Jare jae reta omonoo jocua treinta corepoti. Echa'ã Israel pegua reta umbıepı treinta corepoti jocua cuimbae re. Jepı co treinta corepoti. ¹⁰ Jayave ogua pipe ñaeu iyapoa ico, yandeYa jei cheve rami.” Jucuarãı jei.

Pilato uyemingueta Jesús ndive

(Mr 15.2-5; Lc 23.3-5; Jn 18.33-38)

¹¹ Jare Jesús uyemboi mburuvicha guasu jovai. Jayave mburuvicha guasu upirandu chupe:

—¿Nde pa co jae judıo reta İvıchı guasu? —jei.

—Nde ndere rami jae co che —jei Jesús chupe.

¹² Jare sacerdote reta itenondegua reta jare tenta guasu pegua reta itenondegua reta uñeapo Jesús re yave, Jesús jei'ã mbae ave. ¹³ Jayave Pilato jei chupe:

—¿Ndiyandu'ã pa quirãı jeta mbaembae re uñeapo reta nderé?

¹⁴ Ęrei Jesús jei'ã mbae ave chupe. Jáeramo mburuvicha guasu İpiacañı jese.

Pilato jei Jesús umanota co

(Mr 15.6-20; Lc 23.13-25; Jn 18.38–19.16)

¹⁵ Jare pascua ara rupı Pilato oyoracañoı penti pereso tenta guasu pegua reta uipota vae. ¹⁶ Jare peresorıru pe oı pentı cuimbae İerãcua vae. Jee co Barrabás. ¹⁷ Jayave Pilato upirandu yati vae reta pe:

—¿Pıpota pa ayoraca vaerã peve Barrabás ani Jesús, Cristo jee vae?

¹⁸ Echa'ã jae uicuaa judıo reta umee Jesús chupe ñacatãa jese ramo.

¹⁹ Jare Pilato uguapı oı yave uãa vaerã Jesús, İembireco ombou quıa jei vaerã chupe:

—Agüıye İyapo mbae jocua cuimbae jupi vae pe. Echa'ã aıporara ma İiare chepau pe jae jeco pegua.

²⁰ Ērei sacerdote reta itenondegua reta jare tenta guasu pegua reta itenondegua reta omboemboe yati vae reta uyerure vaerã Pilato pe oyoraca vaerã Barrabás jare uyucaca vaerã Jesús. ²¹ Jayave Pilato upirandu chupe reta:

—¿Quía nunga pa cua mocui cuimbae güi pipota ayoraca vaerã peve?

—Barrabás —jei reta chupe.

²² Jayave Pilato upirandu chupe reta:

—Jucuarãi yave, ¿mbae pa pipota ayapo vaerã Jesús, Cristo jee vae pe?

Jayave opaete vae jei:

—Tuyecutuca curusu re.

²³ Ērei Pilato upirandu chupe reta:

—¿Mbae icavi mbae vae pa uyapo?

Ērei jae reta iñeeãta reve jei:

—Tuyecutuca curusu re.

²⁴ Jare Pilato uicuaa yave ipuere'ã mbae uyapo oyoraca vaerã Jesús - echa'ã judío reta umbipi uyapo tecorai - jei güeru vaerã chupe i jare uyepoe yati vae reta jovai. Jayave jei chupe reta:

—Che anoi'ã teco cua cuimbae jupi vae imano re. Pe reta penoi teco —jei.

²⁵ Jayave opaete yati vae reta jei:

—Ore jare oriñemoñaã reta turugüinoi teco imano re.

²⁶ Jayave Pilato oyoraca chupe reta Barrabás. Jare uinupaca ma yave Jesús chicote pe, umee sundaro reta pe, uicutu vaerã curusu re.

²⁷ Jayave mburuvicha guasu isundaro reta güiraa Jesús palacio pe, jare umbati opaete ñru sundaro reta joco pe. ²⁸ Jayave sundaro reta omboi Jesús güi jemimonde jare omondeca chupe temimonde pita vae. ²⁹ Jayave oñope reta yurãti catuui vae jare umbapúa oñoño Jesús iñãca re. Umee reta vi chupe penti tacuarãsi uipisi vaerã ipo iyacata pe. Jayave uyeatica reta jae jovai jare oyoyai.

—¡Viva, judío reta juvicha guasu! —jei reta.

³⁰ Jare undivi reta jese. Jayave uipisi reta tacuarãsi uiporu iñãca re. ³¹ Jare opa oyoyai reta yave, sundaro reta omboi chugüi temimonde pita vae, jare omondeca ye chupe jemimondei. Jayave güiraa reta mburuvicha guasu joca güi, uicutu vaerã curusu re.

Jesús uyecutuca curusu re

(Mr 15.21-32; Lc 23.26-43; Jn 19.17-27)

³² Jare yugüiraa reta rambueve, uecha penti cuimbae Simón jee vae. (Cua Simón tenta guasu Cirene pegua co.) Jayave sundaro reta güiraaca Simón pe Jesús icurusu. ³³ Jare sundaro reta güiraa Jesús Gólgata jee vae pe. (Cua uipota jei: “Ácacuerenda”.) ³⁴ Jayave umee reta Jesús pe vino uyea mbae iro vae ndive vae. Ērei Jesús uicuaa yave mbae jocua, jou'ã.

³⁵ Jayave sundaro reta uicutu curusu re. Jayave uyuguari reta Jesús jemimonde re, uicuaa vaerã mbae nunga penti penti güiraa iyupe vaerã. Jucuarãi uyapo reta uyeyapo vaerã Tumpa iñee aracae umimbeu vae jei vae. Echa'ã jei cuarãi: “Uyuguari reta cheremimonde re, uicuaa vaerã mbae nunga penti penti güiraa iyupe vaerã.” Jucuarãi jei. ³⁶ Jayave sundaro reta uguapi joco pe uyandareco vaerã Jesús re. ³⁷ Jare oñoño reta curusu re Jesús iñãca iárambo uyecuatía mbae umbijeco jesegua vae: “Cua co Jesús, judío reta juvicha guasu.” ³⁸ Jare sundaro reta uicutu vi mocui imonda vae reta, jare oñoño penti Jesús iyacata coti jare ñru iyaso coti.

³⁹ Jare uasa vae reta uñeácambivava reve jei icavi mbae vae Jesús pe.

⁴⁰ —Nde ndere nembusururuta co Tumpa jo jare ndiyapo yeta mbapi ara pe —jei reta chupe—. Iyerepi. Nde co jae Tumpa Tai yave, egüeyi curusu güi —jei reta.

⁴¹ Jae ramiño vi sacerdote reta itenondegua reta jare mboroyocui re oporombocoe vae reta jare tenta guasu pegua reta itenondegua reta oyoyai.

⁴² —Jae uepi ñru vae reta —jei reta—. Ērei ipuere'ã jae uyerepi. Jae co Israel pegua reta juvicha guasu yave, tugüeyi añave curusu güi, yarovia vaerã jese —jei reta—. ⁴³ Güirovia Tumpa re; Tumpa tuepi añave, uipota yave. Echa'ã jae jei: ‘Che co jae Tumpa Tai’ —jei, jei reta.

⁴⁴ Jare imonda vae Jesús ndive uyecutuca vae reta jei icavi mbae vae chupe.

Jesús umano

(Mr 15.33-41; Lc 23.44-49; Jn 19.28-30)

⁴⁵ Jare guarasi ara mbite güive mbapi ora rupi uñemipitumimbi opaete ivi pe. ⁴⁶ Jayave mbapi ora ma caaru yave Jesús iñeeãta reve jei:

—Elí, Elí, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

⁴⁷ Amocue joco pe ñugüinoi vae reta uyandu jare jei tēi:

—Mase, Elías ueni.

⁴⁸ Jare Jupivoi penti vae osi oo umāqui esponja vinagre pe, jare oñono tacuarāsi re, jare omondo Jesús iyuru coti. ⁴⁹ Ērei ĩru reta jei:

—Eāro. Yaecha ou Elías umbigüeyi vaerā.

⁵⁰ Jayave Jesús tanta usapicai, jare umano.

⁵¹ Jayave Tumpa jo umbiyao vae osoro mbite rupi ivate güi ivi coti. Jare ivi ucāta jare itape reta ovo. ⁵² Jare teögüeriru reta uyepa, jare jeta uñeñono tee Tumpa peguarā umanocue vae reta icove ye, ⁵³ jare oē teögüeriru reta güi Jesús icove ye yave ou umanocue vae reta ipite güi. Jae reta yugüiraa Jerusalén pe jare uyecuaa jeta vae pe.

⁵⁴ Jare sundaro reta juvicha Jesús re uyandareco oĩ vae jare jae ndive ñugüinoi vae reta uecha yave quirāi ivi ucāta jare opaete uyeyapo vae, uquiye ete jare jei:

—Añeteñoi yepe, cua cuimbae co jae Tumpa Tai.

⁵⁵ Jare jeta cuña reta umae ñugüinoi mbiri güi. Cua cuña reta yugüeru Jesús ndive Galilea güi uyeyocui vaerā chupe. ⁵⁶ Cua reta ipite pe ñugüinoi María Magdalena, jare Jacobo jare José ichi María jee vae, jare Zebedeo tai reta ichi.

*José oñono Jesús jetecue teögüeriru pe
(Mr 15.42-47; Lc 23.50-56; Jn 19.38-42)*

⁵⁷ Jare guarasi uique ma yave, penti cuimbae icocatu vae tenta guasu Arimatea pegua José jee vae - jae vi co penti Jesús jemimboe - ⁵⁸ oo Pilato pe, jare uyerure chupe Jesús jetecue re. Jayave Pilato oyocui uñeme vaerā chupe Jesús jetecue. ⁵⁹ Jayave José umbigüeyi Jesús jetecue, jare oñoma penti nieso iquia mbae vae pe. ⁶⁰ Jayave oñono penti teögüeriru ipiau vae itape uyeyoo vae pe, (José imbae co jocua teögüeriru) jare umbiyapayera ita tuicha vae teögüeriru jonque re. Jayave José oo ye teögüeriru güi. ⁶¹ Jare María Magdalena jare ĩru cuña María jee vae uguapi ñugüinoi teögüeriru jovai.

Sundaro reta uyandareco teögüeriru re

⁶² Jare jocua ara opaete judío reta uyeyapicatu ñugüinoi piareve peguarā. Jayave piareve pe sacerdote reta itenondegua reta jare fariseo reta yugüiraa Pilato pe, ⁶³ jare jei chupe:

—Oreruvicha, oremandúa ma quirāi jocua cuimbae upurumbitavise vae ndei umano mbove jei mbapi ara rupi icove yeta ou umanocue vae reta ipite güi. ⁶⁴ Iyocui ndesundaro reta uyandareco vaerā teögüeriru re mbapi ara pegua, agüiye vaerā jemimboe reta yugüiraa joco pe pĩtu yave oñomi vaerā jetecue. Echa'ã jucuarāi yave, jeita reta opaete vae pe icove ye ma co ou umanocue vae reta ipite güi. Jare jucuarāi yave, jae reta umbitavita jeta Jesús umbitavi vae reta güi —jei reta.

⁶⁵ Jayave Pilato jei chupe reta:

—Joco pe penoi chesundaro reta. Pecua pambiyandarecoca cavi jese pepuere rupi —jei.

⁶⁶ Jayave jae reta yugüiraa jare uyuquenda cavi teögüeriru jonque. Echa'ã oñono mbae ita tuicha vae re agüiye vaerā quía uipea, jare ueya joco pe sundaro reta uyandareco vaerā teögüeriru re.

28

Jesús icove ye

(Mr 16.1-8; Lc 24.1-12; Jn 20.1-10)

¹ Mbutuu ara uasa ma yave, neimbove asi domingo ara pe María Magdalena jare ĩru cuña María jee vae yugüiraa teögüeriru coti. ² Jare ivi tanta ucāta. Echa'ã penti ángel yandeYa pe uyeyocui vae ugüeyi ara güi jare umbisiri ita tuicha vae teögüeriru jonque güi. Jayave ángel uguapi oĩ ita re. ³ Jare jova uyecuaa ama uvera vae rami. Jare jemimonde ti asi roi ti asi vae rami. ⁴ Jare teögüeriru re uyandareco ñugüinoi vae reta uriri uquiye ramo, jare umano vae echa upita reta.

⁵ Jayave ángel jei cuña reta pe:

—Agüiye pequiye. Echa'ã aicuaa peeca peĩ Jesús curusu re uyecutua vae. ⁶ Mbaeti ma cua pe oĩ. Icové ye ma ou umanocue vae reta ipite güi, jae jei rami. Peyu pemaie jendacue re —jei—. ⁷ Jare pecua voi pere jemimboe reta pe: 'Jae icove ye ma ou umanocue vae reta ipite güi. Jae oota perenonde Galilea pe. Joco pe peechata.' Amimbeu ma co peve —jei chupe reta.

⁸ Jayave cuña reta oē voi teögüeriru güi. Uquiye reta jare uyerovia tuicha reta. Jare osi yugüiraa umimbeu vaerā Jesús jemimboe reta pe.

⁹ Jare Jesús uñeovāiti jae reta ndive jare jei chupe reta:

—Piyerovia catu.

Jayave cuña reta uyeatica ivi pe uicuāva ipi rupi jare umbiadora. ¹⁰ Jayave Jesús jei chupe reta:

—Agüiye pequiye. Pecua pemimbeu cherivi reta pe yugüiraa vaerã Galilea pe. Joco pe cherechata —jei.

Sundaro reta umimbeu vae

¹¹ Jare cuña reta yugüiraa ye rambueve teögüeriru güi, amocue sundaro tenonde yave teögüeriru re uyandareco vae reta yugüiraa vi tenta guasu pe, jare umimbeu sacerdote reta itenondegua reta pe opaete uyeyapo vae re. ¹² Jare sacerdote reta itenondegua reta uyembati tenta guasu pegua reta itenondegua reta ndive. Jare uyemboemboe ma yave, umee jeta corepoti sundaro reta pe. ¹³ Jare jei chupe reta:

—Pere: ‘Jesús jemimboe reta yugüiraa teögüeriru pe pïtu yave, jare oñomi Jesús jetecue ore ndoque noĩ rambueve’ —pere, jei reta—. ¹⁴ Jare mburuvicha guasu cua uicuaa yave, numimbeuta chupe pe reta mbaeti co teco penoi —jei reta.

¹⁵ Jayave sundaro reta uipisi corepoti jare uyapo sacerdote reta itenondegua reta jare tenta guasu pegua reta itenondegua reta jei chupe reta uyapo vaerã vae. Jare jecuaeño opaete judío reta jei jucuarãi co uyeyapo.

Jesús oyocui jocua once jemimboe reta

(Mr 16.14-18; Lc 24.36-49; Jn 20.19-23)

¹⁶ Jayave jocua once Jesús jemimboe reta yugüiraa Galilea pe penti ivitu guasu re Jesús umimbeu chupe reta vae rami. ¹⁷ Jare jemimboe reta uecha yave Jesús, umbiadora. Ërei amocue vae ipuere’ã güirovia jae co Jesús vae. ¹⁸ Jare Jesús ou jei chupe reta:

—Opaete mbaepuere uñemee ma cheve ara pe jare ivi pe. ¹⁹ Jáeramo pecua peporomboe opaete que rupi rupi jare pembibautiza cheRu jee re jare cheree re jare Espiritu Santo jee re —jei—. ²⁰ Jare pemboe reta opaete che poyocui vae re. Jare che aïta pe reta ndive jaeño mai pegua cua ara reta opa regua —jei.

EL SANTO EVANGELIO SEGUN SAN MARCOS

Juan upurumbibautiza vae umimbeu Tumpa iñee

(Mt 3.1-12; Lc 3.1-20; Jn 1.19-28)

¹ Añave aicutatía añ ñee icavi vae Jesucristo regua. Jesucristo co jae Tumpa Tai.

² Isaías co jae penti Tumpa iñee aracae umimbeu vae. Jae uicutatía cuarãi:

“Mase” —jei Tumpa—, “che amondota chiñee güiraa vae nderenonde, uyapicatu vaerã nderaperã.

³ Jae iñeeãta reve jeita ñana pe:

‘Piyapicatu yandeYa japerã.

Pemisimi tape’ ” —jeita, jei Tumpa.

Jucuarãi uicutatía Isaías. ⁴ Jáeramo Juan ou upurumbibautiza ñana pe, jare umimbeu yati ñugüinoi vae reta pe:

—Peeya piyemingueta icavi mbae vae pepia pe oĩ vae, jare che pumbibautizata, Tumpa umbiasa vaerã peve pemaeyoa reta —jei chupe reta. ⁵ Jare jeta ivi Judea pegua reta jare tenta guasu Jerusalén pegua reta yugüiraa Juan oĩ vae pe. Jare Juan umbibautiza reta iãca Jordán jee vae pe, imbaeyoa reta opa umimbeu yave. ⁶ Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembüu co jae tucu jare ei ñana rupigua. ⁷ Jae umimbeu yati vae reta pe:

—Cheraicue rupi outa ipuere ete chegüi vae. Jupi’ã co che chepe ayora vaerã ipipasa ichã.

⁸ Che pumbibautiza i pe, ãrei jae pembibautizata Espiritu Santo pe —jei chupe reta.

Juan umbibautiza Jesús

(Mt 3.13-17; Lc 3.21-22)

⁹ Jare mbovi ara rupi ou Jesús tenta guasu Nazaret ivi Galilea pegua güi. Jare Juan umbibautiza Jesús iãca Jordán pe. ¹⁰ Jare Jesús oẽ ye i güi yave, uecha ara uyepea oĩ, jare uecha vi Espiritu Santo ugüeyi jese picasu rami. ¹¹ Jayave uyendu ñee ara güi jei:

—Nde co jae cheRai nduau ete vae. Chembiyerovia ete —jei.

Satanás umingueta Jesús uyavica vaerã tõi chupe

(Mt 4.1-11; Lc 4.1-13)

¹² Jayave Espiritu Santo omondo Jesús ñana pe. ¹³ Jare upita ñana pe cuarenta ara, jare Satanás umingueta uyavica vaerã tõi chupe. Jare ico Jesús maemimba ñana rupigua reta ñugüinoi vae pe. Jare yugüeru ángel reta ombori vaerã.

Jesús umbipi iparaviqui

(Mt 4.12-17; Lc 4.14-15)

¹⁴ Juan uyemangueta ma peresoriru pe yave, oo Jesús Galilea pe, jare umimbeu ñee icavi vae Tumpa iporoyocua regua. ¹⁵ Jesús jei:

—Ara uvãe ma. Outa uvãe Tumpa iporoyocua. Peeya piyemingueta icavi mbae vae pepia pe oĩ vae, jare perovia Tumpa iñee icavi vae —jei.

Jesús ueni irundi cuimbae pira uipisi vae reta

(Mt 4.18-22; Lc 5.1-11)

¹⁶ Jare uguata rambueve i guasu Galilea jembei rupi, Jesús uecha Simón jare Simón tiví Andrés jee vae. Jae reta omombo ñugüinoi pisa i guasu pe, pira uipisi vaerã. Echa’ã jae reta pira uipisi vae reta co. ¹⁷ Jayave Jesús jei chupe reta:

—Peyu cherupie, jare che chembaepuere pe pemoeta ñru vae reta güirovia vaerã cherẽ —jei.

¹⁸ Jayave ueya reta ipisa, jare yugüiraa jae jupie. ¹⁹ Ndei mbiri oo mbove, Jesús uecha Zebedeo tai reta. Pentí jee Jacobo, jare tiví jee Juan. Uyapicatu ñugüinoi pisa reta chalana pe. ²⁰ Jare Jesús ueni voi. Jayave jae reta ueya tu chalana pe uparaviqui chupe vae reta ndive, jare yugüiraa Jesús jupie.

Cuimbae aña oya jese vae

(Lc 4.31-37)

²¹ Jare yugüiraa uvãe tenta guasu Capernaum pe. Jare mbutuu ara pe Jesús uique judío reta itupao pe, jare joco pe oporombõe. ²² Jare uyapisaca jese vae reta ipiacañi iporombõe re. Echa’ã ombõe reta mbaepuere güinoi vae rami. Jucuarãi’ã oporombõe mboroyocui re oporombõe vae reta. ²³ Jare uique oo tupao pe cuimbae aña oya jese vae. Jae iñeeãta reve jei:

²⁴—¿Maera pa ndeyu oremambeco, Jesús Nazaret pegua? ¿Ndeyu pa oremicañitei vaerã? Che nducuaa. Nde co jae Tumpa Tai —jei.

²⁵ Jayave Jesús uñeengata aña pe.

—¡Nequüi! Esiri chugüi —jei.

²⁶ Jayave aña umbiriri ete jocua cuimbae, jare tanta jãse reve usiri chugüi. ²⁷ Jare opaete uecha vae reta ipiacañi, jare upirandu uyupe:

—¿Mbae pa co cua uyapo vae? ¡Moromboe ipiau vae ndipo! Mbaepuere pe oyocui aña reta usiri vaerã oya jese vae reta güi, jare jae reta uyapo oyocui vae —jei reta.

²⁸ Jayave imambaño jerãcua jesegua opaete Galilea rupi.

Jesús umbigüera Pedro jaicho

(Mt 8.14-15; Lc 4.38-39)

²⁹ Jare Jesús judío reta itupao güi oë ye yave, oo Simón jare Andrés jenta pe Jacobo jare Juan ndive. ³⁰ Simón jaicho jacu oï jupa pe. Jare ñru reta umimbeu Jesús pe jesegua. ³¹ Jayave Jesús oo uipisi ipo pe, jare umupüa. Jare jacu upita voi chugüi. Jayave jocua cuña umee mbae jou reta vaerã.

Jesús umbigüera jeta imbaerasi vae reta

(Mt 8.16-17; Lc 4.40-41)

³² Jare guarasi uique ma yave, tenta guasu pegua reta güeru Jesús pe imbaerasi vae reta jare aña oya jese vae reta. ³³ Jare jeta joco pegua reta uyembati jocua tenta jonque pe.

³⁴ Jayave Jesús umbigüera jeta imbaerasi vae reta ipotave mbaerasi güi, jare umbisiri jeta aña reta oya jese vae reta güi. Jare umaño'ã aña reta re uyemingueta vaerã. Echa'ã jae reta uicuaa quía co jae.

Jesús oo ivi Galilea rupi umimbeu Tumpa ñee

(Lc 4.42-44)

³⁵ Piareve pe Jesús upüa ndei cõe mbove, jare oë oo quüi ngatu vae pe. Joco pe uyerure oï Tumpa pe. ³⁶ Jayave Simón jare jae ndive ñugüinoi vae reta yugüiraa ueca. ³⁷ Jare uvãe chupe yave, jei reta Jesús pe:

—Ndereca ñugüinoi reta —jei reta.

³⁸ Jayave Jesús jei chupe reta:

—Yaa ñru tenta guasu-rai reta coiño ñugüinoi vae pe, joco pe vi amimbeu vaerã Tumpa ñee. Echa'ã ayu cua ayapo vaerã —jei.

³⁹ Jare oo opaete ivi Galilea rupi, jare umimbeu Tumpa ñee judío reta itupaopao rupi, jare umbisiri aña reta oya jese vae reta güi.

Jesús umbigüera cuimbae ipire ocui vae

(Mt 8.1-4; Lc 5.12-16)

⁴⁰ Jayave ou Jesús oï vae pe penti cuimbae ipire ocui vae. Uyeatica Jesús jovai jare uyerure chupe:

—Ndipota yave, ndepuere chembigüera —jei chupe.

⁴¹ Jesús uiparareco umae jese, jare oñono ipo jese.

—Aipota. Ecuera —jei chupe.

⁴² Jare jupivoiño cuimbae ucuera imbaerasi güi. Ocui'ã ma ipire. ⁴³ Jare jupivoiño Jesús oyocui ete, ndei omondo mbove:

⁴⁴ —Agüie emimbeu quía pe. Ecuia iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei.

⁴⁵ Ërei cuimbae oo, jare umbipi umimbeu ñru vae reta pe. Jecuae umimbeu jeta vae pe. Jáeramo Jesús ipuere'ã ma oo tenta guasu reta pe joco pegua reta jovaque. Upita ñana rupi, jare yugüeru jae oï vae pe opaete que rupi rupi güi.

2

Jesús umbigüera cuimbae ipuere mbae omi vae

(Mt 9.1-8; Lc 5.17-26)

¹ Mbovi ara rupi Jesús oo ye Capernaum pe, jare jerãcua jae ime oï jenta pe. ² Jayave jeta vae uyembati joco pe, jare tinee ñugüinoi o pe jare onque rupi. Jare Jesús umimbeu Tumpa ñee chupe reta. ³ Jayave amocue yugüeru vae reta güeru penti cuimbae imbaerasi vae. Cua cuimbae ipuere mbae omi vae. Uyerivoica ou irundi cuimbae reta pe. ⁴ Ërei güeru vae reta ipuere'ã uruique jocua cuimbae Jesús oï vae pe, uyembiape'ã ye ñugüinoi reta ramo. Jáeramo uruyupi o írambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve. ⁵ Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Nembaeyoa reta uyembai ma, cherivi.

⁶ Amocue mboroyocui re oporomboe vae reta uguapi ñugüinoi joco pe, jare ipia pe uyemingueta reta: ⁷ “¿Maera pa jei cuarãi cua cuimbae? Jei icavi mbae vae Tumpa coti. Tumpaño co ipuere umbiasa quia pe imbaeyoa reta.” Jucuarãi ipia pe uyemingueta reta. ⁸ Jare Jesús uicuaa voi jae reta ipiyemingueta, jare jei chupe reta:

—¿Maera pa pepia pe piyemingueta jucuarãi? ⁹ Chepuere jae cua cuimbae ipuere mbae omi vae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epüa evoi nderupa, jare eguata.’ ¿Mbae nunga pa yavai jae vaerã? —jei Jesús chupe reta—. ¹⁰ Ërei aipota picuaa vaerã cua: Che cuimbaerã ayeyapo vae chepuere ambiasa quia pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

¹¹ —Che jae ndeve: Epüa evoi nderupa, jare ecua nerenta pe.

¹² Jayave cuimbae upüa, jare ovoï jupa, jare oë voi oo opaete joco pe ñugüinoi vae reta jovaque. Opareve ipiacañi, jare umbiadora reta Tumpa.

—Yaecha'ãi cua nunga —jei reta.

Jesús ueni Leví

(Mt 9.9-13; Lc 5.27-32)

¹³ Jayave Jesús oo ye i guasu jembei pe. Jare jeta vae reta uyembati jae oï vae pe, jare jae omboe reta. ¹⁴ Jare joco güi oo yave, uecha Alfeo tai Leví jee vae uguapi oï mburuvicha peguarã ocovara ñugüinoi vae pe, jare jei chupe:

—Eyu cherupí.

Jayave Leví upüa, jare oo jae jupíe.

¹⁵ Jare Jesús ucaru oï rambueve Leví jenta pe, jeta mburuvicha peguarã ocovara vae reta jare teco icavi mbae vae uyapo vae reta ucaru vi ñugüinoi Jesús jare jemimboe reta ndive. Echa'ã jecuaeño jeta jae reta yugüiraa Jesús ndive. ¹⁶ Jayave mboroyocui re oporomboe vae reta jare fariseo reta uecha yave Jesús ucaru oï ocovara vae reta jare teco icavi mbae vae uyapo vae reta ndive, jei jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

¹⁷ Jesús cua uyandu yave, jei chupe reta:

—Icove catu vae reta ueca'ã upurupiano vae. Imbaerasi vae retaño ueca. Che ayu aeca vaerã iyoa vae reta. Ayu'ã aeca vaerã jupi vae reta —jei.

Maera Jesús jemimboe reta uyecuacu'ã tembíu güi

(Mt 9.14-17; Lc 5.33-39)

¹⁸ Jare Juan jemimboe reta jare fariseo jemimboe reta uyecuacu ñugüinoi tembíu güi. Jayave amocue vae yugüeru, jare upirandu Jesús pe:

—¿Maera pa Juan jemimboe reta jare fariseo jemimboe reta uyecuacu tembíu güi, ërei nderemimboe reta uyecuacu'ã chugüi?

¹⁹ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembíu güi, umendata vae jae reta ndive oï rambueve. Echa'ã umendata vae jae reta ndive oï rambueve, uyecuacu'ã tembíu güi. ²⁰ Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembíu güi —jei—. ²¹ Icavi'ã yamboya vaerã temimonde indechi vae maemboyaa ipiau vae pe. Echa'ã jucuarãi yayapo yave, maemboyaa ipiau vae umiãta temimonde indechi vae, jare temimonde jeiete osoro —jei—. ²² Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarãi yayapo yave, vino omondoro jiru, jare vino uyepiyere, jare jiru icavi'ã ma. Jáeramo yambiru vino ipiau vae jiru ipiau vae pe —jei chupe reta.

Jesús jemimboe reta uipoo trigo mbutuu ara pe

(Mt 12.1-8; Lc 6.1-5)

²³ Mbutuu ara pe Jesús oo co rupi jemimboe reta ndive. Usa rambueve, jemimboe reta uipoo trigo. ²⁴ Jayave fariseo reta jei Jesús pe:

—Mase, ¿maera pa uyapo reta agüiyeta tēi uyapo mbutuu ara pe vae?

²⁵ Jesús jei chupe reta:

—¿Pemingueta'ã pa David uyapocue vae regua, jae jare jae ndive ñugüinoi vae reta mbaeti ma mbae güinoi yave jare iyembai reta? —jei—. ²⁶ David uique Tumpa jo pe, sacerdote tenondegua Abiatar jee vae ico yave, jare jou mbiyape Tumpa jo pe uñeño tee vae reta. Agüiyeta tēi co quia jou jocua mbiyape, jaefño sacerdote reta. Jare David umee vi jae ndive ñugüinoi vae reta pe —jei chupe reta.

²⁷ Jayave Jesús jei chupe reta:

—Mbutuu ara uyeyapo yanembori vaerã. Yande yayeyapo'ã mbutuu ara peguarã.
 28 Jáeramo che cuimbaerã ayeyapo vae chepuere jae mbae icavi uyeyapo vaerã mbutuu ara pe —jei.

3

Cuimbae ipo jovaicho tipa vae

(Mt 12.9-14; Lc 6.6-11)

¹ Jesús uique ye judío reta itupao pe, jare joco pe oĩ penti cuimbae ipo jovaicho tipa vae.
² Jare joco pe ñugüinoi vae reta umae ngatu Jesús re, uecha vaerã umbigüerata ra quía mbutuu ara pe. Echa'ã jae reta uipota tẽi umbijeco Jesús. ³ Jayave Jesús jei cuimbae ipo jovaicho tipa vae pe:

—Epüa eyu iyemboi cua reta jovai.

⁴ Jare Jesús upirandu joco pe ñugüinoi vae reta pe:

—¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuryuca vaerã mbutuu ara pe? ¿Mbae pa jei mboroyocui cua re? —jei chupe reta.

Èrei jae reta jei'ã mbae ave. ⁵ Pochi reve Jesús umae iyipi rupi ñugüinoi vae reta re, jare tuicha ipiatiti jae reta ipiatanta ramo.

—Eupi ndepo —jei cuimbae pe.

Jayave cuimbae ipo uupi, jare ucuera voi. ⁶ Jayave fariseo reta oẽ judío reta itupao güi, jare uyemboemboe voi herodiano reta ndive Jesús re, quirãita ra uyucaca vaerã.

Jeta uyembati i guasu jembei pe

⁷⁻⁸ Jayave Jesús jare jemimboe reta yugüiraa i guasu pe, jare yugüiraa vi jaicua jeta Galilea güi. Jare yugüeru vi jae oĩ vae pe jeta Judea pegua reta, Jerusalén pegua reta, ivi Idumea pegua reta, Jordán jovaicho pegua reta, jare tenta guasu Tiro jare Sidón iyipi rupigua reta, uyandu yave opaete Jesús uyapo vae regua. ⁹ Jare Jesús oyocui jemimboe reta umicuatĩro chalana jae oĩ vaerã pipe, agüiye vaerã oyopi yati vae reta. ¹⁰ Echa'ã jae umbigüera ma jeta vae, jare opaete ĩru imbaerasi vae reta uñemiañamíaña yugüeru icoti. Echa'ã uipota oya jese, uyaviqui vaerã. ¹¹ Jare aña reta uecha Jesús yave, uyeatica jae jovai jare iñeeãta reve jei:

—Nde co jae Tumpa Tai.

¹² Jare Jesús oyocui ete:

—Agüiye pemimbeu quía co che.

Jesús uiparavo doce cuimbae reta

(Mt 10.1-4; Lc 6.12-16)

¹³ Jayave Jesús oo ivitu guasu re, jare ueni jae uiparavo vae retaño. Jare jae reta yugüeru jae oĩ vae pe. ¹⁴ Jare jocua reta güi uiparavo doce cuimbae reta umĩru vaerã. Jae omondota reta umimbeu vaerã Tumpa iñee. ¹⁵ Umeeta vi chupe reta mbaepuere umbigüera vaerã imbaerasi vae reta jare umbisiri vaerã aña reta oya jese vae reta güi. ¹⁶ Cua co jae uiparavo vae reta jee: Simón (Jesús umbijee Pedro), ¹⁷ jare Zebedeo tai reta Jacobo jare Juan jee vae (Jesús umbijee cua mocui reve Boanerges. Cua jee uipota jei: “Ara jiapu vae rami”), ¹⁸ jare Andrés, Felipe, Bartolomé, Mateo, Tomás, Alfeo tai Jacobo jee vae, Tadeo, Simón (jae co Zelote pe ueni vae), ¹⁹ jare Judas Iscariote (cua cuimbae umee Jesús jovaicho reta pe). Jayave Jesús ou ye jenta pe jae reta ndive.

Jei reta icavi mbae vae Espiritu Santo coti

(Mt 12.22-32; Lc 11.14-23; 12.10)

²⁰ Jare uyembati ye jeta vae. Jáeramo Jesús jare jemimboe reta iquĩ'ã ucaru vaerã. ²¹ Jesús jentarã reta cua uicuaa yave, yugüeru güiraa vaerã tẽi.

—Iyaracuaa'ã ma oĩ —jei reta.

²² Jare mboroyocui re oporomboe vae yugüeru Jerusalén güi vae reta jei:

—Aña guasu Beelzebú jee vae oya ma jese, jare aña guasu imbaepuere pe umbisiri aña reta oya jese vae reta güi —jei reta.

²³ Jayave Jesús ueni reta, jare jei chupe reta umijaanga reve:

—Ndarau Satanás jaei uyembisiri cuimbae güi. ²⁴ Penti tenta guasu pegua reta oyovaicho uyupii yave, opata co jocua tenta guasu. ²⁵ Jae ramiño vi penti tenta pegua reta oyovaicho uyupii yave, opata co jocua tenta. ²⁶ Jare Satanás pochĩ iyupe yave, jare imbaepuere uyembiyao yave, ndarau tẽi ma ico. Opata tẽi co —jei chupe reta—. ²⁷ Ime yave quía uipota uique cuimbae ipirãta vae jenta pe upiro vaerã imbaembae chugüi vae, uipocuata rani cuimbae ipirãta vae. Jayave ramo ipuereta upiro imbaembae chugüi —jei—.

²⁸ Añete che jae peve, opaete ivi pegua reta imbaeyoa reta jare opaete iñee icavi mbae Tumpa coti jei reta vae Tumpa ipuere umbai. ²⁹ Èrei Tumpa ndarau etei umbiasa jei icavi mbae vae Espiritu Santo coti vae pe. Uyembijecota jaeño mai pegua —jei chupe reta.

³⁰ Echa'ã tenonde yave jae reta jei:

—Aña oya ma jese.

Jáeramo Jesús jei jucuarãi chupe reta.

Jesús ichi jare tiví reta

(Mt 12.46-50; Lc 8.19-21)

³¹ Jayave Jesús ichi jare tiví reta yugüeru uvãe Jesús oĩ vae pe, jare oca güi omondo uenica.

³² Jare uguapi ñugüinoi iyipi rupi vae reta jei chupe:

—¡Aipo! Ndesi jare nderivi reta oca pe ñugüinoi, jare ndereca.

³³ —¿Quía nunga pa co jae chesi jare cherivi reta? —jei Jesús chupe reta.

³⁴ Jayave umae iyipi rupi uguapi ñugüinoi vae reta re.

—Cua nunga reta co jae chesi jare cherivi reta —jei—. ³⁵ Echa'ã Tumpa jei vae uyapo vae reta co jae cherivi jare cherindi jare chesi —jei.

4

Jesús umijaanga umaeti vae

(Mt 13.1-9; Lc 8.4-8)

¹ Jesús umbipi ye oporomboe i guasu jembei pe. Jayave jeta yugüeru uyembati jae oĩ vae pe. Jáeramo Jesús uyupi penti chalana i guasu pe oĩ vae pe, jare uguapi pipe. Jare yati vae reta ñugüinoi i guasu jembei pe. ² Jare Jesús omboe reta jeta mbaembae re umijaanga reve. Jei chupe reta:

³ —Piyapisaca cheré. Penti cuimbae oo umaeti vaerã —jei—. ⁴ Umaeti yave, umiai temiti, jare amocue oa tape rupi. Jayave yugüeru güira reta opa jou —jei—. ⁵ Ìru temiti oa mbovño ìvi itape iárambo oĩ vae pe. Cua imambae oẽ, jeta'ã ìvi chupe ramo. ⁶ Èrei guarasi jasi yave, ipiru. Jare japo quipe'ã oĩ ramo, utini —jei—. ⁷ Ìru temiti oa ñanapite pe. Ñana ucuacuaa yave, opa uyuca temiti. Jáeramo temiti ia'ã —jei—. ⁸ Jare ìru temiti oa ìvicavi pe. Cua reta oẽ, jare ucuacuaa, jare ia. Amocue mbovño jãi, jare ìru jeta catu jãi, jare ìru jeta ete jãi —jei chupe reta. ⁹ Jayave Jesús jei chupe reta:

—Uipota uyandu vae tuyapisaca cua ñee re.

Maera Jesús oporomboe umijaanga reve

(Mt 13.10-17; Lc 8.9-10)

¹⁰ Mbovño ma upita jae ndive yave, jocua doce uiparavo vae reta jare ìru upita vae reta upirandu Jesús pe umijaanga reve jei vae re. ¹¹ Jayave Jesús jei chupe reta:

—Amimbeu ma peve Tumpa iporoyocua regua. Cua uyecuaa'ã ìru vae reta pe. Jáeramo amboe ìru vae reta umijaanga reve —jei—. ¹² Cua ayapo agüiye vaerã uicuaa cavi, yepe tẽi uecha, jare agüiye vaerã uicuaa, yepe tẽi uyandu, jare agüiye vaerã uyerova Tumpa coti, imbaeyoa reta uyembai vaerã —jei.

Umaeti vae uyemijaanga jese vae

(Mt 13.18-23; Lc 8.11-15)

¹³ Jayave Jesús jei chupe reta:

—¿Picuaa'ã pa mbae cua amijaanga reve jae peve vae uipota jei vae? Picuaa'ã yave, ¿quirãita pa picuaa mbae opaete amijaanga reve jaeta peve vae uipota jei vae? —jei—

. ¹⁴ Jocuua umaeti vae uyemijaanga Tumpa ñee umimbeu vae re —jei—. ¹⁵ Temiti tape rupi oa vae uyemijaanga amocue Tumpa ñee uyandu vae re. Èrei jupivoiño ou Satanás, jare umiacañi Tumpa ñee güi —jei—. ¹⁶ Jae ramiño vi jocua temiti uñeñoti mbovño ìvi itape iárambo oĩ vae pe vae uyemijaanga ìru vae reta Tumpa ñee uyandu vae re. Jupivoiño uyerovia reta, jare uipota ete cua ñee. ¹⁷ Èrei cua reta jocua temiti japo quipe'ã oĩ vae rami co. Jáeramo imambae icueri reta. Mbaesusere uyeyapo chupe reta ani ìru vae reta uyapo icavi mbae vae chupe reta Tumpa ñee uicuaa ramo. Jare jupivoiño uipota'ã ma uyapisaca reta Tumpa ñee re —jei—. ¹⁸ Jae ramiño vi jocua temiti uñeñoti ñanapite pe vae uyemijaanga ìru vae reta Tumpa ñee uyandu vae re. ¹⁹ Èrei jae reta umbipi uyemipia'ã ìvi pe mbaembae uyeyapo vae re, jare uyembatavi, uipota icocatu ramo. Uipota vi güinoi jeta mbaembae. Jare opaete cua umiacañi reta Tumpa ñee güi. Jáeramo jae reta jocua temiti ia'ã vae rami co —jei—. ²⁰ Èrei jocua temiti uñeñoti ìvicavi pe vae uyemijaanga ìru vae reta Tumpa ñee uyandu vae re. Cua reta güirovia. Amocue vae jocua temiti mbovño jãi vae rami co. Ìru vae reta jocua temiti jeta catu jãi vae rami co. Jare ìru vae reta jocua temiti jeta ete jãi vae rami co —jei.

Uñeñomi vae uyeechacañotai co

(Lc 8.16-18)

²¹ Jayave Jesús jei chupe reta:

—Mechero yariuque yave o pe, ndarau ñaño yapepo uyembovapo oĩ vae igüi pe, ani güirapembí igüi pe. Ñaño co mechero jenda pe —jei—. ²² Ime yave mbae uñeñomi vae, uyechacañotai co. Jae ramiño vi ime yave mbae uyeyasoí vae, uyecuaañotai co —jei—. ²³ Uipota uyandu vae tuyapisaca cua ñee re —jei Jesús.

²⁴ Jare jei chupe reta:

—Pepia pe piyemingueta cavi piyandu vae re. Tumpa umiaangata umee peve pemiaanga pemee ñru vae reta pe rami, jare umiñruta vi peve —jei—. ²⁵ Echa'ã güinoi vae pe uñemñruta, jare mbaeti güinoi vae güi mbovi ete güinoi vae uyeequita —jei.

Jesús umijaanga temiti ucuacuaa vae

²⁶ Jare Jesús jei chupe reta:

—Tumpa iporoyocua penti cuimbae oo umaeti vae rami co —jei—. ²⁷ Cuimbae oque pítu yave, jare upúa cõe yave. Temiti oẽ jare ucuacuaa, jare umaeti vae uicuaa'ã quirãí ra ucuacuaa vae. ²⁸ Echa'ã temiti ucuacuaa yambori mbae reve, tenonde ñi, jayave avatiqúi, joco güi avati —jei—. ²⁹ Jare yagüiye ma yave, iya uaviro. Echa'ã uvãe ma ara uaviro vaerã —jei chupe reta.

Jesús umijaanga mostaza jáicue

(Mt 13.31-32; Lc 13.18-19)

³⁰ Jare Jesús jei:

—¿Mbae ra ipuere uyemijaanga Tumpa iporoyocua re? ¿Mbae ra yamijaangata jese? —jei—. ³¹ Yandepuere yamijaanga jese penti mostaza jáicue —jei—. Uñeñoti yave, cua jáicue michi-rai ete opaete ñru temiti reta jáicue ivi pe oĩ vae güi. ³² Ërei uñeñoti yave, ucuacuaa, jare tuicha ete opaete ñru temiti penti año peguaño ucuacuaa vae reta güi, jare tuicha jáca uyeyapo. Jáeramo güira reta ipuere uyapo jaitirã jese guarasía pe —jei chupe reta.

Maera Jesús umijaanga mbaembae

(Mt 13.34-35)

³³ Jeta cuarãí Jesús unimbeu Tumpa ñee chupe reta umijaanga reve, jae reta ipuere uicuaa rupiño. ³⁴ Jare jecuaeño imiari chupe reta umijaanga reve. Ërei jemimboe reta peño uicuaaca cavi mbae uipota jei vae.

Jesús umiquí i guasu

(Mt 8.23-27; Lc 8.22-25)

³⁵ Jocua ara guarasí uique ma yave, Jesús jei jemimboe reta pe:

—Yaa i guasu jovaicho pe —jei.

³⁶ Jayave jae reta ueya yati vae reta, jare güiraa Jesús jocua chalana oĩ pipe vae pe. Jare ñru vae reta yugüiraa vi ambie chalana reta pipe. ³⁷ Jare ou ivitu tanta uyepeyu, jare i uyembiaparoaroa uique chalana pe, jare umitinee seri ma. ³⁸ Jare Jesús uñemiãcanita chalana iyapi pe, jare oque oĩ. Jayave jae reta omomba jare jei chupe:

—¡Oporombœ vae! ¿Ndepiã'ã pa opata ma ñamano?

³⁹ Jayave Jesús upúa, jare uñeengata ivitu pe.

—¡Epita! ¡Nequí! —jei i guasu pe.

Jare ivitu javoi upita, jare opaete quíi ngatu. ⁴⁰ Jayave Jesús upirandu chupe reta:

—¿Maera pa pequiye? ¿Ndeñiño pa pepurugüirovia? —jei.

⁴¹ Jare uquiye ete reta, jare jei uyupe:

—¿Mbae nunga cuimbae pa cua? Ivitu jare i guasu uyapo jae oyocui vae —jei reta.

5

Gadara pegua aña oya jese vae

(Mt 8.28-34; Lc 8.26-39)

¹ Jayave yugüiraa uvãe i guasu jovaicho pe, gadareno reta ivi pe. ² Jesús ugüeyi chalana güi rupive, ou oovãiti teögüerirurenda güi penti cuimbae aña oya jese vae. ³ Jae ico teögüerirurenda rupi, jare ipuere'ã ma quía uñapiti, yepe tẽi uñapiti cadena pe. ⁴ Jeta vese ma jae reta uipocua tẽi ipo jare ipi cadena pe. Ërei jae opa omoundo cadena reta. Jare ipuere'ã quía jese. ⁵ Jare jecuaeño pítu rupi jare ara rupi oĩ teögüerirurenda rupi jare ivitu guasu rupi, jare jecuae usapicai jare uyembipere ita pe. ⁶ Cua cuimbae uecha yave Jesús mbiri güi, osi ou icoti jare uyeatica jovai. ⁷ Jare ñneeãta reve jei:

—¿Maera pa ndeyu chemambeco, Jesús? Nde co jae Tumpa ara pe oĩ vae Tai. Ayerure ndeve Tumpa jee re agüiye iporaraca cheve —jei.

⁸ Echa'ã Jesús jei aña pe:

—Esiri cua cuimbae güi, aña.

⁹ Jayave Jesús upirandu chupe:

—¿Mbae pa nderee?
 —Cheree co jae jeta vae. Echa'ã jeta vae co ore —jei chupe.
¹⁰ Jare aña reta uyerure Jesús pe agüiye vaerã umbisiri reta jocua ivi güi. ¹¹ Jare joco pe jeta cuchi reta ucaru ñugüinoi coiño ivitu guasu güi. ¹² Jayave aña reta uyerure Jesús pe:
 —Oremondo pea cuchi reta coti. Emaeño oreré ndoya vaerã jese reta —jei reta.
¹³ Jayave Jesús umaeño jese reta. Jare aña reta usiri cuimbae güi, jare oya cuchi reta re. Jayave cuchi reta tanta osi ivia rupi oa i guasu pe, jare joco pe opa ipitupa reta. Cuchi reta uyepapa dos mil rupi.
¹⁴ Jayave cuchi iyandarecoa reta opa osi, jare umimbeu tenta guasu pegua reta pe jare jocoropi ñugüinoi vae reta pe cua uyeyapo vae regua. Jare uyandu vae reta yugüeru, uecha vaerã mbae uyeyapo vae. ¹⁵ Jare yugüeru uvãe yave Jesús oĩ vae pe, uecha cuimbae aña oyase jese vae uguapi oĩ joco pe. Uecha uyemonde ma jare iyaracuaaño ma oĩ. Jae co tenonde yave jeta aña reta oyase jese vae. Jare opaete yugüeru vae reta uquiye. ¹⁶ Jare jocua tenonde yave uecha vae reta umimbeu iru reta pe quirã uyeyapo cuimbae aña oyase jese vae pe jare cuchi reta pe. ¹⁷ Jayave yati vae reta umiñera Jesús oo ye vaerã jae reta iivi güi. ¹⁸ Jare Jesús uyupi ye ma oĩ yave chalana pe, jocua cuimbae aña reta oyase jese vae uyerure chupe:
 —Emaeño cheré aa vaerã nderupíe —jei.
¹⁹ Ërei Jesús umaeño'ã jese.
 —Ecu nerenta pe emimbeu nerentarã reta pe mbae icavi vae ndeYa uyapo ndeve vae, jare quirãi ndeparareco vae —jei chupe.
²⁰ Jayave cuimbae oo, jare umbipi umimbeu ivi Decápolis jee vae rupi mbae icavi vae Jesús uyapo chupe vae. Jare opaete ipiacañi jese.

*Jairo tay: jare cuña Jesús jemimonde uyaviqui vae
 (Mt 9.18-26; Lc 8.40-56)*

²¹ Jesús oo uvãe yave i guasu jovaicho coti chalana pipe, yugüeru jeta vae reta jae oĩ vae pe. Jare Jesús upita i guasu jembei pe. ²² Jayave ou penti cuimbae Jairo jee vae. Jae co júdio reta itupao re uyandareco vae. Uecha yave Jesús, uyeatica jovai. ²³ Jare uyerure chupe:
 —Cherayí umanota ma oĩ —jei—. Yaa iñono ndepo jese embigüera, agüiye vaerã umano —jei chupe.
²⁴ Jayave Jesús oo voi jupíe. Jare jeta yugüiraa Jesús jupíe, jare oyopi reta. ²⁵ Jare jae reta ipite pe oo penti cuña doce año ma uiporara tugüiguasu vae. ²⁶ Jare uiporara ma jeta upurupiano vae reta uipiano tēi reve, jare opaete ma icorepoti umee iyugüi upurupiano vae reta pe. Ërei ucuera'ã. Jeseve jeieteño ma imbaerasi. ²⁷ Jae uyandu Jesús regua yave, oya Jesús re icupe coti jeta vae reta ipite rupi, jare uyaviqui jemimonde.
²⁸ —Yepe tēi jemimondeño tayaviqui, acuerata co —jei.
²⁹ Jare jupivoiño jugüiguasu upita chugüi, jare uyandu jete ucuera ma imbaerasi güi.
³⁰ Jayave Jesús uicuaa umbigüera ma co quia imbaepuere pe. Jáeramo uyerova umae jeta vae re, jare upirandu:
 —¿Quía pa cheremimonde uyaviqui?
³¹ Jayave jemimboe reta jei chupe:
 —Ndeecha co cua jeta vae reta ndeopi ñugüinoi. ¿Maera pa ndepirandu: ‘Quía pa cheremimonde uyaviqui?’ —jei reta chupe.
³² Ërei Jesús umae iyipi rupi, uecha vaerã quía ra jucuarãi uyapo. ³³ Cuña uicuaa uyeyapo ma chupe vae, jare ou icoti. Uquiye güi uriri, jare uyeatica Jesús jovai, jare umimbeu chupe opaete uyeyapo ma vae. ³⁴ Jayave Jesús jei chupe:
 —Ndecuera ma, cherindi, nderovia cheré ramo. Ecu ndepiacatu reve. Ndecuera ma co nembraerasi güi —jei.
³⁵ Jare Jesús uyemingueta oĩ rambueve, yugüeru uvãe amocue vae tupao re uyandareco vae jenta güi. Jare jei reta Jairo pe:
 —Nderayí umano ma. Agüiye ma emambeco oporomboc vae —jei reta chupe.
³⁶ Ërei Jesús cua uyandu yave, jei tupao re uyandareco vae pe:
 —Agüiye ndepiatiti. Epurugüiroviaño —jei.
³⁷ Jare umaeño'ã iru reta re yugüiraa vaerã jae ndive, jaeño Pedro, Jacobo jare Juan. Juan co jae Jacobo tivi. ³⁸ Yugüiraa uvãe yave tupao re uyandareco vae jenta pe, Jesús uecha jeta vae reta icorai jare uyo ñugüinoi reta jãse reve. ³⁹ Jesús uique yave o pe, jei chupe reta:
 —¿Maera pa picorai jare piyao? Cua cuñatai umano'ã co. Oqueño co oĩ —jei.
⁴⁰ Ërei jae reta oyoyai. Jayave Jesús omoë opaete vae oca pe, jare uruique cuñatai oĩ vae pe cuñatai tu jare ichi, jare jemimboe jae ndive yugüiraa vae reta. ⁴¹ Jayave Jesús uipisi cuñatai ipo pe.
 —Talita cumi —jei chupe. (Cua uipota jei: “Cuñatai, che jae ndeve, epüa”.)

⁴² Jayave cuñatai upūa jare umbipi uguata. Cua cuñatai doce año ma güinoi. Jare Jesús ndive ñugüinoi vae reta ipiacañi ete. ⁴³ Jayave Jesús oyocui ete reta agüiye vaerã umimbeu quía pe ave, jare oyocui vi umingaru vaerã cuñatai.

6

Jesús Nazaret pe

(Mt 13.53-58; Lc 4.16-30)

¹ Jesús oo joco güi iivi pe, jare jemimboe reta yugüiraa jupie. ² Jayave mbutuu ara pe Jesús umbipi oporomboe judío reta itupao pe. Jare jeta vae uyapisaca jese, jare ipiacañi reta. Jei reta uyupe:

—¿Quiape ra uyemboe cua cuimbae opaete cua re? ¿Mbae nunga aracuaa ra uñemee chupe? ¿Mbae nunga miacañi ra cua uyapo ipo pe vae? —jeyi reta—. ³ Cua co jae carpintero. Jae co María imembi. Jae co Jacobo, José, Judas jare Simón tiquei. Jare jindi reta yugüireco vi yandepite pe —jeyi reta.

Jáeramo jae reta pochi Jesús pe. ⁴ Jayave Jesús jeyi chupe reta:

—Opaete vae uipiu penti Tumpa iñee umimbeu vae. Jaeño jentaigua reta, jentarã reta jare jenta pegua reta uipiu'ã reta —jeyi.

⁵ Jare joco pe ipuere'ã uyapo jeta miacañi. Jaeño oñono ipo mbovi imbaerasi vae reta re umbigüera vaerã. ⁶ Jare Jesús ipiacañi jese reta, güirovia'ã jese ramo.

Jayave Jesús oo oporomboe ñru tenta guasu-rai jororopi ñugüinoi vae reta rupi.

Jesús omondo jocua doce jemimboe reta

(Mt 10.5-15; Lc 9.1-6)

⁷ Pentí ara Jesús umbati jocua doce jemimboe reta, jare omondo mocui mocui rupi, jare umee chupe reta mbaepuere umbisiri vaerã aña reta oya jese vae reta güi. ⁸ Jare oyocui:

—Peo yave, agüiye mbae peraa, jaeño pepopoca. Agüiye peraa peurupucu, perembuirã jare corepoti —jeyi chupe reta—. ⁹ Pemonde pepipasa, jare agüiye peraa mocui camisa —jeyi.

¹⁰ Jare jeyi vi chupe reta:

—Peo pevãe yave penti tenta pe, joco pe peĩ, jocua tenta guasu güi peo ye regua —jeyi—.

¹¹ Jare ime yave penti tenta guasu pegua reta uipota'ã pepita vaerã joco pe jare uipota'ã uyapisaca peré vae, pecuaño joco güi, jare pemitimo ivicuii pepi güi, uicuaa vaerã jae reta co teco güinoi —jeyi—. Añete che jae peve, Tumpa uña yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jeyi.

¹² Jayave jae reta yugüiraa, jare umimbeu ñru vae reta pe:

—Peeya piyemingueta icavi mbae vae pepia pe oĩ vae.

¹³ Jare jae reta umbisiri jeta aña reta oya jese vae reta güi, jare jeta imbaerasi vae reta re oñono aceite umbigüera vaerã.

Juan imano

(Mt 14.1-12; Lc 9.7-9)

¹⁴ Opaete vae uyandu ma Jesús regua. Mburuvicha guasu Herodes jee vae uyandu vi. Jae jeyi:

—Juan upurumbibautizase vae icove ye ma ou umanocue vae reta ipite güi. Jáeramo uyapo cua miacañi reta —jeyi.

¹⁵ Ñru vae reta jeyi:

—Jae co Elías.

Jare ñru vae reta jeyi:

—Jae co penti Tumpa iñee umimbeu vae Tumpa iñee aracaie umimbeu vae rami.

¹⁶ Ërei Herodes uyandu yave, jeyi:

—Jae co Juan añacasiaca vae. Icové ye ma ou umanocue vae reta ipite güi —jeyi.

¹⁷ Echa'ã ndei Juan umano mbove, Herodes umenda Felipe jembireco Herodías jee vae ndive. Felipe co jae Herodes tivi. Jayave Herodes omondo uipisica Juan, jare oñonoca peresoriru pe, Herodías jeyi ramo. ¹⁸ Echa'ã tenonde yave Juan jeyi Herodes pe: “Icavi'ã nemenda vaerã nderivi jembireco ndive.”

¹⁹ Jáeramo Herodías pochi Juan pe, jare uipota tēi uyucaca, ërei ipuere'ã. ²⁰ Echa'ã Herodes uicuaa Juan co jae cuimbae jupi vae. Jáeramo uipiu, jare umaeño'ã quía re uyapo vaerã icavi mbae vae chupe. Jare uyandu yave Juan jeyi vae, uyemipia'ã tuicha. Ërei jecuaeño uipota uyapisaca jese. ²¹ Ërei uvãe ara Herodías uyapo vaerã icavi mbae vae Juan pe. Jocua ara Herodes uyembiara oa vae regua, jare umbatica ñru mburuvicha reta, sundaro reta juvicha reta, jare icocatu vae reta Galilea pegua, umingaru vaerã. ²² Jare Herodías imembi cuña uique upirae yave, umbiyerovia Herodes jare jae ndive ucaru ñugüinoi vae reta. Jayave Herodes jeyi cuñatai pe:

—Eeca cheve mbae ndipota vae, jare che ameeta ndeve —jei.

²³ Jare jei ye chupe Tumpa jee re:

—Ipotave mbae ndeeca cheve vae ameeta co ndeve, cheivi mbite rupi yepe.

²⁴ Jayave cuñatai oë oo upirandu ichi pe:

—¿Mbae pa aecata chupe?

—Eeca chupe Juan upurumbibautizase vae iñāca —jei ichi chupe.

²⁵ Jayave imambaeño cuñatai uique ye mburuvicha guasu oï vae pe.

—Aipota neme vaeerā cheve añave voi Juan upurumbibautizase vae iñāca penti plato pe —jei chupe.

²⁶ Jayave mburuvicha guasu ipiatiti tuicha. Ērei Tumpa jee re jei chupe ramo, jare ĩru vae reta uyandu ramo, uipota'ā uicuacu iñee. ²⁷ Jáeramo omondo sundaro Juan iñāca güeru vaeerā. ²⁸ Jayave oo sundaro peresoriru pe uñācasia Juan. Jare güeru iñācacue penti plato pe, jare umee cuñatai pe. Jayave jae umee ichi pe. ²⁹ Jare Juan jemimboe reta cua uicuaa yave, yugüeru güiraa jetecue oñoti vaeerā.

Jesús umingaru cinco mil cuimbae reta

(Mt 14.13-21; Lc 9.10-17; Jn 6.1-14)

³⁰ Jesús jemimondo reta uyembati ye yave jae ndive, umimbeu reta chupe opaete uyapo vae jare oporomboe jese vae. ³¹ Jayave Jesús jei chupe reta:

—Pe retaño peyu yaa quĩ ngatu vae pe, peputuu vaeerā michi pegua —jei.

Echa'ā jecuaecuae jeta vae yugüeru opou ipi. Jáeramo Jesús jare jemimboe reta iquĩ'ā ucaru vaeerā. ³² Jayave jae retaño yugüiraa chalana pe quĩ ngatu vae pe. ³³ Ērei jeta vae reta uecha yugüiraa, jare uicuaa quĩ co jae vae. Jare yugüiraa ivi rupiño tenta guasu reta güi Jesús oo vae pe, jare yugüiraa uvāe ndei Jesús oo uvāe mbove, jare uyembati joco pe. ³⁴ Jesús ugüeyi yave chalana güi, uecha jeta vae, jare uparareco reta. Echa'ā jae reta ovecha mbaeti iyandarecoa güinoi vae reta rami co. Jare umbipi omboe reta jeta mbaembae re.

³⁵ Caaru ma yave, Jesús jemimboe reta yugüeru jei chupe:

—Mbaeti quiaive ico cua rupi, jare caaru ma oï. ³⁶ Emondo cua reta ogua vaeerā jemiurā tenta tenta rupi. Echa'ā mbaeti mbae jou reta vaeerā cua pe —jei reta.

³⁷ Ērei Jesús jei chupe reta:

—Pe reta pemee tucaru.

—¿Ndoota pa ndogua doscientos ara mbaraviqui jepi pegua mbiyape, numee jou reta vaeerā? —jei reta chupe.

³⁸ Jesús jei chupe reta:

—¿Mbovi pa mbiyape ime penoi? Pecua peeca —jei.

Jae reta uicuaa ma yave, umimbeu Jesús pe:

—Ime nonoi pandepo mbiyape jare mocui pira —jei reta.

³⁹ Jayave Jesús oyocui opaete vae uyembatimbatí vaeerā uguapi capiichape re. ⁴⁰ Jayave uyembatimbatí reta uguapi cien rupi jare cincuenta rupi. ⁴¹ Jayave Jesús uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisāa mbiyape, jare umee jemimboe reta pe, jae reta umee vaeerā yati yati ñugüinoi vae reta pe. Jesús upisāa vi jocua mocui pira, uñemee vaeerā opaete vae pe. ⁴² Opareve ucaru, jare iyangapii reta. ⁴³ Jayave Jesús jemimboe reta umbati tembíu uñepisāacue jembire vae, jare umitinee doce canasta. ⁴⁴ Jare ucaru vae reta güi cuimbae retaño uyepapa cinco mil.

Jesús uguata i iárambo

(Mt 14.22-27; Jn 6.16-21)

⁴⁵ Jare jupivoiño Jesús oyocui jemimboe reta uyupi vaeerā chalana pe, jare yugüiraa vaeerā jenonde i guasu jovaicho pe tenta guasu Betsaida pe, jae omondo rambueve uyembati vae reta. ⁴⁶ Jare opa omondo yave, Jesús uyupi ivitu guasu re uyerure vaeerā Tumpa pe. ⁴⁷ Pitu ma yave, jemimboe reta yugüiraa chalana pe i guasu mbite rupi, jare Jesús jaeño upita ivi pe. ⁴⁸ Jare Jesús uecha tanta ma uparaviqui reta, uruguata vaeerā chalana. Echa'ā ivitu tanta oovāiti. Jare cōeta ma yave, Jesús uguata oo i iárambo rupi güiraa uepiti. Jare uasata tēi chugüi reta. ⁴⁹ Jae reta uecha yave uguata oo i iárambo rupi, ipia pe uyemingueta tēi uecha mbae iācue, jare usapicai reta. ⁵⁰ Echa'ā opaete jae reta uecha, jare uquiye ete reta. Ērei jupivoiño Jesús ombou iñee chupe reta:

—Piñemiatangātu. Che co. Agüiye pequiye —jei.

⁵¹ Jayave Jesús ou uyupi chalana pe, jare upita ivitu. Jare jae reta ipiacañi. ⁵² Echa'ā jocua miacañi mbiyape regua uyapo yave, Jesús upota tēi jae reta uicuaa cavi vaeerā. Ērei ndeiño uicuaa. Echa'ā jecuaeño ipiatanta.

Jesús umbigüera Genesaret pegua imbaerasi vae reta

(Mt 14.34-36)

⁵³⁻⁵⁴ I guasu uasa reta yave, yugüiraa uvãe ivi Genesaret pe. Jare ugüeyi reta yave chalana güi i guasu jembei pe, jupivoiño joco pegua reta uicuaa jae co Jesús vae. ⁵⁵ Jare yugüiraa opaete jocua ivi rupi, jare umbipi güeru imbaerasi vae reta jupa reve Jesús oĩ vae pe. İru vae reta umimbeu chupe reta quiape oĩ vae. ⁵⁶ Jare Jesús oo tenta guasu-rai reta rupi, jare tenta guasu reta rupi, jare tenta ñana rupi ñugüinoi vae reta pe. Jare oo vae rupi joco pegua reta güeru oñono imbaerasi vae reta tape rupi, jare uyerure Jesús pe umaefño imbaerasi vae reta uyaviqui vaerã jemimonde jembei yepe. Jare opaete uyaviqui vae reta ucuera.

7

Yandepia umingüia vae (Mt 15.1-20)

¹ Fariseo reta jare amocue mboroyocui re oporomboe vae Jerusalén güi yugüeru vae reta uyembati Jesús oĩ vae pe. ² Jae reta uecha amocue Jesús jemimboe reta ucaru ñugüinoi uyepoe mbae reve. Echa'ã jae reta uyapo ve'ã ma itenondegua reta iporomboe. Jáeramo umbijeco reta. ³ Echa'ã fariseo reta jare opaete judío reta uyepoefñoi ndei ucaru mbove, uyapo vaerã itenondegua reta iporomboe. ⁴ Jare yugüeru ye yave umaemee vae reta ñugüinoi vae güi, jecuaefño uyepoe ndei ucaru mbove. Jare uyapoñoi reta jeta İru mbaembae itenondegua reta iporomboe. Echa'ã oyoe vaso reta, yapepo reta, paila reta jare tupa reta. ⁵ Jayave fariseo reta jare mboroyocui re oporomboe vae reta upirandu Jesús pe:

—¿Maera pa nderemimboe reta uyapo'ã yandetenondegua reta iporomboe? ¿Maera pa ucaru reta uyepoe mbae reve? —jei reta.

⁶ Jayave Jesús jei chupe reta:

—Añete yepe Isaias imiari peré. Echa'ã jae uicuatía upurumbitavi vae reta re cuarãi:

‘Cua reta chepiu iyuru peño’ —jei Tumpa—.

‘Èrei ipia pe chepiu'ã etei.

⁷ Chembiadora-raangaiño.

Che jucuarã'ã aporoyocui' —jei Tumpa.

Jucuarãi uicuatía Isaias —jei Jesús—. ⁸ Echa'ã pe reta piyapo'ã Tumpa iporoyocui, èrei piyapo cavi yandetenondegua reta iporomboe. Piyoe yapepo reta jare vaso reta, jare jeta cua nunga piyapo —jei.

⁹ Jare Jesús jei chupe reta:

—Tumpa iporoyocui pemombo co, piyapo vaerã yandetenondegua reta iporoyocui.

¹⁰ Moisés jei cuarãi: ‘İpiu nderu jare ndesi.’ Jare jei vi cuarãi: ‘Jei icavi mbae vae tu ani ichi coti vae uyeyucacata co.’ Jucuarãi jei Moisés —jei chupe reta—. ¹¹ Èrei pe reta pere cuarãi: ‘Penti cuimbae ipuere jei tu ani ichi pe umeeta tõi chupe ombori vaerã vae Corbán co.’ Jucuarãi pere —jei—. (Corbán uipota jei: “Amee ma Tumpa pe”.) ¹² Jayave pe reta pemaefño'ã ma jese ombori vaerã tu jare ichi —jei—. ¹³ Jare jeta cua nunga piyapo. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui. Jare pemboe vi pesambiai reta uyapo vaerã yandetenondegua reta iporoyocui —jei Jesús chupe reta.

¹⁴ Jare Jesús ueni umbati opaete joco pe ñugüinoi vae reta.

—Piyapisaca cua re opaete pe reta, picuaa cavi vaerã —jei chupe reta—. ¹⁵ İpotave mbae peu vae oo perie pe. Jáeramo umingüia'ã pepia. Jocua piyapo vae jare pere vae umingüia pepia —jei—. ¹⁶ Uipota uyandu vae tuyapisaca cua ñee re —jei chupe reta.

¹⁷ Jare Jesús ueya yati vae reta yave, uique jo pe. Jayave jemimboe reta upirandu chupe umijaanga reve jei vae re. ¹⁸ Jayave Jesús jei chupe reta:

—¿Pe retave pa picuaa cavi'ã? Picuaa cavi cua: İpotave mbae peu vae umingüia'ã pepia.

¹⁹ Echa'ã oo'ã pepia pe. Oo perie pe jare pemombo. Jucuarãi uyeyapo opaete tembiu pe —jei chupe reta.

²⁰ Jare Jesús jei:

—Jocua piyapo vae jare pere vae umingüia pepia. ²¹ Echa'ã pepia güi oẽ opaete icavi mbae vae: pepia pe piyemingueta icavi mbae vae, piyuvanga menda re, piyapo aguasa, pepuruyuca, ²² pemonda, pipota İru vae reta imbaembae, piyapo icavi mbae vae, pepurumbitavi, pembiquere, peacatãa, icavi mbae vae pere perapicha coti, piyembicate jare pico iyaracuaa mbae vae reta rami —jei—. ²³ Opaete cua icavi mbae vae oẽ pepia güi. Jare cua reta umingüia pepia —jei chupe reta.

Cuña sirofenicia pegua ipurugüirovia (Mt 15.21-28)

²⁴ Jayave Jesús oo ye joco güi Tiro jare Sidón iyipi rupi. Jare uique yave penti tenta pe, uipota'ã tēi quiaue uicuaa vaerã jae joco pe oĩ vae. Ērei uicuaañoi joco pegua reta. ²⁵ Jare penti cuña aña oya imembi cuña re vae uyandu Jesús regua, jare ou uyeatica jae jovai. ²⁶ Jae co penti sirofenicia griega pe uyemingueta vae. Jae uyerure Jesús pe umbisiri vaerã aña imembi güi. ²⁷ Ērei Jesús jei chupe:

—Tiangapi rani sambiaí reta. Icavi'ã yaequi vaerã tembiú sambiaí reta güi, ñamee vaerã yimba-rai reta pe —jei.

²⁸ —Añete tēi co, carai —jei cuña Jesús pe—. Ērei yimba-rai mesa igüi pe ñugüinoi vae reta jou tembiú usururucue sambiaí reta uiti vae —jei.

²⁹ Jayave Jesús jei chupe:

—Cua ndere vae jeco pegua ndepuere ndeo. Aña usiri ma nemembi güi —jei.

³⁰ Jayave cuña oo uvãe jenta pe yave, uecha imembi jupa pe oĩ. Aña usiri ma chugüi.

Jesús umbigüera cuimbae iupaupa jare iyapisa mbae vae

³¹ Jayave Jesús ou Tiro iyipi rupigua güi, jare uasa Sidón jare Decápolis rupi, jare ou uvãe i guasu Galilea pe oĩ vae pe. ³² Jare amocue vae güeru chupe penti cuimbae iupaupa jare iyapisa mbae vae. Güeru vae reta uyerure Jesús pe oñono vaerã ipo jese. ³³ Jayave Jesús güiraa cuimbae yati vae reta ipite güi. Oñono ipoãca cuimbae iyapisa pe. Jayave undivi, jare uyaviqui cuimbae icü chugüi. ³⁴ Jayave umae ara coti, jare iañeequi, jare jei:

—¡Efatal! (Cua uipota jei: “¡Iyepeal!”)

³⁵ Jayave cuimbae uyandu ma, jare icü omi cavi, jare uyemingueta cavi ma. ³⁶ Jayave Jesús oyocui reta agüiye vaerã umimbeu quía pe. Ērei yepe tēi oyocui ye ye, jeseve jae reta umimbeuñoi ñru vae reta pe. ³⁷ Jae reta ipiacañi ete, jare jei:

—Opaete mbaembae uyapo vae icavi ete co. Umbigüera iyapisa mbae vae reta uyandu vaerã, jare umbigüera vi upa reta uyemingueta vaerã.

8

Cuatro mil ucaru vae reta

(Mt 15.32-39)

¹ Pentí ara jeta uyembati yave, mbaeti ma mbae güinoi reta jou vaerã. Jayave Jesús ueni jemimboe reta.

² —Aiparareco cua yati vae reta —jei—. Echa'ã mbapi ara ma ñugüinoi che ndive, jare mbaeti ma mbae güinoi jou vaerã —jei jemimboe reta pe—. ³ Amondo yave jenta coti ucaru mbae reve, ipituta co reta tape rupi. Echa'ã amocue yugüeru mbiri güi —jei chupe reta.

⁴ —¿Quirãita pa yandepuere ñamee mbiyape chupe reta ma mbaeti quiaue ico vae pe? —jei jemimboe reta Jesús pe.

⁵ Jayave Jesús upirandu chupe reta:

—¿Mbovi pa mbiyape penoi?

—Ime nonoi siete —jei reta chupe.

⁶ Jayave Jesús oyocui yati vae reta uguapi vaerã ivi pe. Jayave uipisi jocua siete mbiyape, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati vae reta pe. Jayave jucarãi uyapo reta. ⁷ Jare güinoi vi mbovi pira michi vae reta. Cua re vi Jesús umee yasurupai Tumpa pe, jare jei jemimboe reta pe cua vi umee vaerã yati vae reta pe. ⁸ Opareve ucaru, jare iyangapii reta. Jayave Jesús jemimboe reta umbati tembiú uñepisãacue jembire vae, jare umitinee siete canasta. ⁹ Jare joco pe ñugüinoi vae reta uyepapa cuatro mil rupi. Jayave Jesús omondo ye yati vae reta. ¹⁰ Jayave jae jare jemimboe reta uyupi chalana pe, jare yugüiraa ivi Dalmanuta jee vae pe.

Fariseo reta uipota uecha miacañi

(Mt 16.1-4; Lc 11.29; 12.54-56)

¹¹ Jayave yugüeru fariseo reta, jare umbipi uyeaca Jesús ndive.

—Echaca oreve miacañi ara güi —jei reta chupe.

Jae reta uipota uicuaa uyapota ra miacañi chupe reta. ¹² Jayave Jesús iañeequi.

—¿Maera pa añave yugüireco vae reta uipota aechaca vaerã chupe reta miacañi? —jei—. Añete che jae peve, ndarau uyeechaca miacañi cua reta pe —jei chupe reta.

¹³ Jayave Jesús ueya reta, jare uyupi ye chalana pe oo i guasu jovaicho pe.

Fariseo reta ilevadura

(Mt 16.5-12)

¹⁴ Jare Jesús jemimboe reta ñacañi güeru vaerã mbiyape. Pentíño mbiyape güinoi chalana pe. ¹⁵ Jare Jesús jei chupe reta:

—Piñemoa ngatu fariseo reta jare Herodes ilevadura güi.

¹⁶ Jayave jemimboe reta jei uyupe:

—Cua jei, yaru'ã mbiyape ramo.

¹⁷ Jesús uicuaa chugüi mbae jei reta vae, jare jei chupe reta:

—¿Maera pa piyemingueta mbiyape peru mbae vae re? ¿Ndeño pa picuaa cavi? ¿Tanta mbate pa co pepia? —jei—. ¹⁸ Peresa jare peapisa penoi. ¿Peecha'ã pa jare piyandu'ã pa? ¿Pemandua'ã pa? —jei—. ¹⁹ Cue yave apisãa pandepo mbiyape, ucaru vaerã cinco mil vae reta. Tembú jembirecue pembati yave, ¿mbovi canasta pa pemitinee? —jei.

—Numitinee doce —jei reta chupe.

²⁰ —Jare siete mbiyape apisãa vi, ucaru vaerã cuatro mil vae reta. Tembú jembirecue pembati yave, ¿mbovi canasta pa pemitinee? —jei Jesús.

—Numitinee siete —jei reta chupe.

²¹ Jayave Jesús jei chupe reta:

—¿Ndeño pa picuaa cavi?

Jesús umbigüera jesa mbae vae Betsaida pe

²² Jare yugüiraa uvãe Betsaida pe. Jayave amocue vae güeru Jesús pe cuimbae jesa mbae vae, jare jae reta uyerure chupe oñono vaerã ipo jese. ²³ Jayave Jesús uipoco güiraa cuimbae jesa mbae vae tenta guasu güi. Jayave undivi cuimbae jesa re, jare oñono ipo jese.

—¿Ndepuere pa mbae ndeecha? —jei chupe.

²⁴ Cuimbae umae.

—Cuimbae reta aecha —jei Jesús pe—. Ërei ivira reta echa cheve. Ërei aecha uguata ñugüinoi —jei.

²⁵ Jayave Jesús oñono ye ipo jesa re, uecha cavi vaerã. Jayave ramo uecha cavi opaete mbaembae. ²⁶ Jayave Jesús oyocui:

—Agüiye ecua cua tenta guasu rupi. Jare agüiye emimbeu quía pe ave jocoropi —jei chupe.

Jayave omondo jenta pe.

Pedro jei Jesús co jae Cristo, Tumpa ombou vae

(Mt 16.13-20; Lc 9.18-21)

²⁷ Coiño tenta guasu Cesarea Filipino güi ñugüinoi amocue tenta guasu-rai reta. Jocoti yugüiraa Jesús jare jemimboe reta. Jare tape rupi Jesús upirandu jemimboe reta pe:

—¿Quía pa co che ñru vae reta pe?

²⁸ Jae reta umimbeu chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae penti Tumpa iñee aracae umimbeu vae —jei reta.

²⁹ Jayave Jesús upirandu chupe reta:

—Jare ¿quía pa co che peve?

Jayave Pedro jei chupe:

—Nde co jae Cristo, Tumpa ombou vae.

³⁰ Jayave Jesús oyocui reta agüiye vaerã umimbeu quía pe.

Jesús umimbeu umanota co

(Mt 16.21-28; Lc 9.22-27)

³¹ Jayave Jesús umimbeu chupe reta:

—Che cuimbaerã ayeyapo vae jetata co aiporara. Jare tenta guasu pegua reta itenondegua reta, sacerdote reta itenondegua reta, jare mboroyocui re oporombocue vae reta chererirota jare cheyucacata. Ërei mbapi ara rupi aicove yeta ayu umanocue vae reta ipite güi —jei chupe reta.

³² Cua umimbeu cavi chupe reta. Jayave Pedro güiraa Jesús ñru reta ipite güi, jare umbipi umbieta chupe. ³³ Ërei Jesús uyerova umae ñru jemimboe reta coti, jare uñeengata Pedro pe.

—Esiri chegüi, Satanás —jei chupe—. Echa'ã nde ndiyemingueta nei ivi pegua reta uyemingueta rami, ndiyemingueta'ã Tumpa uyemingueta rami —jei.

³⁴ Jare Jesús ueni jemimboe reta jare ñru joco pe ñugüinoi vae reta. Jayave jei chupe reta:

—Ime yave quía uipota oo cherupie vae, tiñacañi iyugüi, tovoi icurusu, jare too cherupie —jei—. ³⁵ Uipota uñuvatu jecove vae ndarau ipuere. Ërei jocua umeeta jecove chereco pegua jare Tumpa iñee icavi vae jeco pegua vae uñuvatu co —jei—. ³⁶ ¿Mbae ra umingana quía, umingana yave opaete ivi pegua, Ërei ipuere'ã yave uñuvatu jecove? ³⁷ ¿Mbovi ra umbiepita quía ogua ye vaerã jecove? —jei—. ³⁸ Ivi pegua añave yugüireco vae reta güirovia'ã Tumpa jare uyapo icavi mbae vae. Ime yave quía imara cheré jare chiñee re cua reta ipite pe vae, che cuimbaerã ayeyapo vae chemarata vi jese, ayu ye yave cheRu imbaepuere reve ángel uñeño tee Tumpa peguarã vae reta ndive —jei chupe reta.

9

¹ Jesús jei chupe reta: —Añete che jae peve, ndei amocue cua pe ñugüinoi vae umano mbove, uechata reta Tumpa iporoyocua mbaepuere pegua.

Jesús uyembiambie

(Mt 17.1-13; Lc 9.28-36)

² Seis ara ma uasa yave, Jesús güiraa Pedro, Jacobo jare Juan ñru reta ipite güi penti ivitu guasu ivate vae re, jare joco pe uyembiambie jae reta jovai. ³ Jemimonde umbipi uvera jare ñ asi. Mbaeti penti ave umbaepueta vae ipuere umiti asi jucuarai. ⁴ Jare uyecuaa chupe reta Elías jare Moisés uyemingueta ñugüinoi Jesús ndive. ⁵ Jayave Pedro jei Jesús pe:

—Oporomboc vae, icavi co ñai vaerã cua pe. Nduyapota mbapi guarasia ñanaroqui pegua, penti nembraerã, penti Moisés peguarã jare penti Elías peguarã —jei.

⁶ Echa'ã Jesús jemimboe reta uquiye ete, jare Pedro uicuaa'ã mbae jei vaerã. ⁷ Jayave ou amapitu umiguarasía reta, jare amapitu güi uyendu ñee jei:

—Cua co jae cheRai aau ete vae. Piyapisaca jese —jei.

⁸ Jare aramoño uma e reta yave, uecha'ã ma quía jae reta ndive, jaeño Jesús.

⁹ Jare ivitu guasu güi ugüeyi yugüeru rambueve, Jesús oyocui reta:

—Agüiye pemimbeu quía pe cua peeche vae, ndei che cuimbaerã ayeyapo vae aicove ye ayu umanocue vae reta ipite güi mbove —jei chupe reta.

¹⁰ Jáeramo umimbeu'ã quía pe, ñrei upirandu reta uyupe:

—¿Mbae pa uipota jei cua umimbeu yandevae vae? ¿Quirãita pa icove ye ou umanocue vae reta ipite güi? —jei reta.

¹¹ Jayave jae reta upirandu Jesús pe:

—¿Maera pa jei mboroyocui re oporomboc vae reta Elías rani co outa?

¹² —Añete Elías rani co outa —jei Jesús chupe reta—, jare opaete uyapicatura. Jare ¿mbae ra uyecuatía oí Tumpa ñnee pe che cuimbaerã ayeyapo vae re? Uyecuatía oí che jeteta aiporara jare ñru vae reta chererirota —jei—. ¹³ Ñrei che jae peve, Elías ou ma co, jare amocue vae uyapo chupe jae reta uipota vae, Tumpa ñnee pe uyecuatía oí rami —jei chupe reta.

Jesús umbigüera cunumi aña oya jese vae

(Mt 17.14-21; Lc 9.37-43)

¹⁴ Jare yugüeru uvãe yave ñru jemimboe reta ñugüinoi vae pe, uecha jeta yati ñugüinoi iyipi rupi, jare mboroyocui re oporomboc vae reta uyeaca ñugüinoi jae reta ndive. ¹⁵ Jayave opaete joco pe ñugüinoi vae reta uecha Jesús, jare ipiacañi reta. Jayave osi yugüeru reta icoti, jare umbisaluda reta. ¹⁶ Jayave Jesús upirandu chupe reta:

—¿Mbae re pa piyeaca pei jae reta ndive?

¹⁷ Jayave penti cuimbae yati vae reta ipite pe oí vae jei chupe:

—Oporomboc vae, aru ndeve cherai. Aña oya jese jare umbuupa —jei—. ¹⁸ Jare que rupi oí vae pe aña oya jese yave, joco pe umbiriri, jare cunumi iyuru tiriyai, jái umbiquiriri jare jete opa ññemitanta —jei—. Ayerure tõi ma nderemimboe reta pe umbisiri vaerã aña chugüi, ñrei ipuere'ã reta —jei cuimbae Jesús pe.

¹⁹ Jayave Jesús jei chupe reta:

—Pe reta cua ivi pe pico vae pepurugüirovia'ã. ¿Quirãí regua ra apitata pe reta ndive? ¿Quirãí regua ra arupiata peve? Peru cheve cua pe jocua cunumi —jei.

²⁰ Jayave güeru chupe, jare aña uecha yave Jesús, jupivoiño umbiriri tanta jocua cunumi jare oa ivi re. Uyapayere, jare iyuru tiriyai. ²¹ Jayave Jesús upirandu tu pe:

—Quirãí yave ma pa uyeyapo chupe cua?

—Michi güive uyeyapo chupe —jei tu—. ²² Jare jeta vese ma uiti tata pe jare i pe, uyuca vaerã tõi. Ñrei nde ndepuere yave mbae ndiyapo chupe, oreparareco jare orembori —jei chupe.

²³ Jayave Jesús jei chupe:

—¿Ndepuere pa ndepurugüirovia? Upurugüirovia vae ipuere uyapo opaete mbaembae —jei.

²⁴ Jayave cunumi tu ññeeãta reve jei:

—Ndugüirovia. Apurugüirovia'ã yave, chembori apurugüirovia vaerã —jei.

²⁵ Jare Jesús uecha yave jeta vae uyembati joco pe, ññeengata aña pe.

—Aña upurumbuupa jare upurumbiapisa mbae vae, che ndoyocui ndesiri vaerã cua cunumi güi, jare agüiye etei ma eya ye jese —jei aña pe.

²⁶ Jare aña jāse ma yave, umbiriri tanta cunumi, jare usiri chugüi. Jare cunumi umano echa upita. Jare jeta joco pe ñugüinoi vae reta jei tõi:

—Umano ma.

²⁷ Ērei Jesús uipisi cunumi ipo pe, jare umupūa. Jare cunumi uyemboi. ²⁸ Jare Jesús uique yave penti o pe, jemimboe reta upirandu chupe, jae retaño jae ndive ñugüinoi yave:

—¿Maera pa ore orepuere'á numbisiri'áña?

²⁹ —Ndarau pepuere pembisiri'á cua nunga'áña, jaeño piyerure yave Tumpa pe piyecuacu reve tembú güi —jei Jesús chupe reta.

Jesús umimbeu ye umanota co

(Mt 17.22-23; Lc 9.44-45)

³⁰ Jesús jare jemimboe reta yugüiraa yave joco güi, uasa Galilea rupi. Jare Jesús uipota'á quía uicuaa vaerá. ³¹ Echa'á omboe güinoi jemimboe reta.

—Che cuimbaerá ayeyapo vae penti vae chemeeta ñru vae reta pe. Jae reta cheyucata —jei chupe reta—. Ērei amano ma yave, mbapi ara rupi aicove yeta ayu umanocue vae reta ipite güi —jei.

³² Ērei jae reta uicuaa cavi'á mbae re ra Jesús umingueta vae, jare uipiu reta upirandu vaerá chupe jese.

¿Quía ra tenondegua ñru reta güi vae?

(Mt 18.1-5; Lc 9.46-48)

³³ Jayave yugüiraa uvãe Capernaum pe. Jare jenta pe oñ yave, Jesús upirandu jemimboe reta pe:

—¿Mbae re pa piyemingueta peyu tape rupi?

³⁴ Ērei jae reta iquüño. Echa'á tape rupi jae reta uyemingueta yugüeru quía ra tenondegua ñru reta güi vae. ³⁵ Jayave Jesús uguapi, jare ueni jocua doce jemimboe reta. Jayave jei chupe reta:

—Ime yave quía uipota tenondeguará ico vae, tuñemimichi opaete vae güi, jare tuyeyocui opaete ñru reta pe —jei.

³⁶ Jayave ueni penti sambiai, jare oñono jae reta ipite pe. Jayave uicu'ava sambiai, jare jei chupe reta:

³⁷ —Ime yave quía uyapo icavi vae cua nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei.

Oyovaicho'á yande ndive vae yanembori co

(Mt 10.42; Lc 9.49-50)

³⁸ Jayave Juan jei Jesús pe:

—Oporomboe vae, nduecha penti cuimbae nderee pe umbisiri'áña reta oya jese vae reta güi, jare ndoe chupe agüiye ma uyapo vaerá. Echa'á jae ñañeru'á co —jei.

³⁹ —Agüiye pere chupe jucuará —jei Jesús chupe—. Echa'á cheree pe miacañi uyapo vae ndarau jupivoiño jei icavi mbae vae checoti —jei—. ⁴⁰ Echa'á oyovaicho'á yande ndive vae yanembori co —jei—. ⁴¹ Aramoi quía umeeta peve penti vaso i cheree pe vae. Jucuará uyapo yave cheré perovia ramo, añete che jae peve, ambijecoviata co chupe —jei—.

Mbaeyoa uyapoca vae

(Mt 18.6-9; Lc 17.1-2)

⁴² Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tēi co ñru vae reta uñapiti vaerá iyayu re penti ita tuicha vae umbaesopipe vae, jare omombo vaerá i guasu pe —jei chupe reta—. ⁴³ Ndepo jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae neni vaerá ndepo jovaicho mbae reve, tata guasu opa mbae vae pe mocui ndepo reve ndeo vaerá tēi güi —jei—. ⁴⁴ Echa'á tata guasu pe taso ndarau umano, jare tata ndarau ove —jei—. ⁴⁵ Jae ramiño vi ndepi jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae neni vaerá ndepi jovaicho mbae reve, tata guasu opa mbae vae pe mocui ndepi reve Tumpa nemondo vaerá tēi güi —jei—. ⁴⁶ Tata guasu pe taso ndarau umano, jare tata ndarau ove —jei—. ⁴⁷ Jae ramiño vi nderesá jovaicho uyapoca yave mbaeyoa ndeve, eequi ndiyugüi. Icavi co ndico vaerá Tumpa iporoyocua pe nderesá jovaicho mbae reve, tata guasu pe mocui nderesá reve Tumpa nemondo vaerá tēi güi —jei—. ⁴⁸ Tata guasu pe taso ndarau umano, jare tata ndarau ove —jei ye chupe reta—. ⁴⁹ Echa'á tata uñeñonocata opaete re, yuqui uñeñonoca tembú pe rami. Yuqui uñeñonocata vi opaete maemimba Tumpa pe uyeyuca vae re —jei—. ⁵⁰ Yuqui icavi co yau vaerá. Ērei jembochi'á ma yave, ¿quiráita ra jembochi ye? —jei—. Piyapo yuqui uyapo rami, jare pico cavi pãve —jei chupe reta.

10

Umenda vae uyemombo vae reta

(Mt 19.1-10; Lc 16.18)

¹ Jayave Jesús oo joco güi Judea pe Jordán jovaicho pe. Joco pe jeta uyembati ye jae oĩ vae pe. Jayave Jesús ombœo reta, jecoño mai uyapo rami.

² Jayave fariseo reta yugüeru Jesús oĩ vae pe. Jae reta uipota tēi uyavica chupe. Jáeramo upirandu reta chupe:

—¿Jupi pa cuimbae omombo vaerã jembireco?

³ —¿Mbae pa peocui Moisés? —jei Jesús chupe reta.

⁴ —Moisés umaeño cuimbae re uicuatía vaerã tupapire jembireco omombo vaerã —jei reta chupe.

⁵ —Moisés uicuatía cua mboroyocui pepiatanta ramo —jei Jesús—. ⁶ Ērei Tumpa uyapo ramo yave, uyapo cuimbae jare cuña —jei—. ⁷ Jáeramo cuimbae usirita tu jare ichi güi, jare oota ico vaerã jembireco ndive —jei—. ⁸ Jare mocui vae uyeyapota penti ramiño. Jáeramo mbaeti ma mocui rami. Yugüireco penti ramiño —jei—. ⁹ Jáeramo agüiye quía tumbisiri Tumpa umĩru vae reta —jei chupe reta.

¹⁰ Jare o pe ñugüinoi yave, jemimboe reta upirandu ye Jesús pe cua re. ¹¹ Jayave Jesús jei chupe reta:

—Cuimbae omombo jembireco jare umenda ĩru cuña ndive yave, uyuvanga menda re jembireco omombo vae coti. ¹² Jare cuña usiri ime güi jare umenda ĩru cuimbae ndive yave, uyuvanga vi menda re —jei.

Jesús uyerure Tumpa pe sambiai reta re

(Mt 19.13-15; Lc 18.15-17)

¹³ Jare amocue vae güeru Jesús oĩ vae pe sambiai reta, Jesús oñono vaerã ipo jese reta. Ērei jemimboe reta uñeengata güeru vae reta pe. ¹⁴ Jesús cua uecha yave, pochi jemimboe reta pe, jare jei chupe reta:

—Pemaño sambiai reta re yugüeru vaerã checoti. Agüiye piyopia. Echa'ã cua nunga uyeyocui Tumpa pe iporoyocua pe —jei—. ¹⁵ Añete che jae peve, pipota'ã yave Tumpa pe piyeyocui vaerã penti sambiai uipota rami, ndarau pico Tumpa iporoyocua pe —jei.

¹⁶ Jayave Jesús uicuãva sambiai reta, jare oñono ipo jese reta, jare uyerure Tumpa pe jese reta.

Cuimbae icocatu vae

(Mt 19.16-30; Lc 18.18-30)

¹⁷ Jare Jesús joco güi oo yave, penti cuimbae osi ou icoti. Uyeatica Jesús jovai.

—Oporombœo vae, nde ndepiacavi co —jei Jesús pe—. ¿Mbae pa ayapota anoi vaerã tecove opa mbae vae? —jei.

¹⁸ —¿Maera pa ndere cheve chepiacavi vae co? —jei Jesús chupe—. Mbaeti quía ipiacavi, jaeño co Tumpa —jei—. ¹⁹ Nde ndicuaa co mboroyocui reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu ĩru vae re. Agüiye epurumbitavi. Ipiu nderu jare ndesi' —jei chupe.

²⁰ —Oporombœo vae, ayavi'ã penti ave cua mboroyocui reta chemichi güive —jei cuimbae chupe.

²¹ Jesús umaee jese uau reve.

—Ime mbae uata ndiyapo vaerã —jei chupe—. Ecu emee opaete mbaembae neno vae corepoti re, jare emee ndecorepoti iparavete vae reta pe, jare ndicocatuta ara pe. Jayave evoi ndecurusu, jare eyu cherupíe —jei.

²² Ērei cua uyandu yave, cuimbae oo ipiatiti reve. Echa'ã jeta mbaembae güinoi.

²³ Jayave Jesús umaee iyipi rupi, jare jei jemimboe reta pe:

—Yavai ete co icocatu vae reta uique vaerã Tumpa iporoyocua pe.

²⁴ Jemimboe reta ipiacañi Jesús jei vae re. Ērei Jesús jei ye:

—Cherivi reta, yavai ete co icocatu vae reta uique vaerã Tumpa iporoyocua pe. Echa'ã jei tēi ipia pe: 'Icavita co cheve. Echa'ã jeta mbaembae anoi' —jei, jei Jesús—. ²⁵ Yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

²⁶ Jayave jae reta ipiacañi ete, jare upirandu uyupe:

—Jucuarai yave, ¿quía pa ipuere uyembiasaca?

²⁷ Jesús umaee jese reta jare jei:

—Ivi pegua reta ipuere'ã uyembiasa. Ērei Tumpa ipuere umbiasa reta. Echa'ã Tumpa ipuere uyapo opaete mbaembae —jei chupe reta.

²⁸ Jayave Pedro jei Jesús pe:

—Mase, ore opaete mbaembae ndueya, ndoyu vaerã nderupíe.

²⁹ —Añete che jae peve —jei Jesús—, ime yave quía ueya jenta, ani tiquei reta, ani tivíi reta, ani jindi reta, ani tu, ani ichi, ani jembireco, ani isambiai reta, ani ñivi reta chereco

pegua jare Tumpa iñee icavi vae jeco pegua vae, ³⁰ cien rupi jecoviata co chupe ivi pe ico rambueve. Jecoviata jenta reta, tiquei reta, tivi reta, jindi reta, ichi reta, isambiai reta jare iivi reta —jei—. Ĕrei ĩru vae reta uyapota icavi mbae vae chupe. Ĕrei taicue rupi Tumpa umeeta chupe tecove opa mbae vae —jei—. ³¹ Ĕrei Tumpa umbitaicuenta uyembutuicha vae reta, jare umitenondeta uñemimichi vae reta —jei chupe reta.

Jesús umimbeu ye umanota co
(Mt 20.17-19; Lc 18.31-34)

³² Jesús jare jae ndive ñugüinoi vae reta yugüiraa tape Jerusalén coti oo vae rupi, jare Jesús tenonde oo. Jare jaicue rupi yugüiraa vae reta ipiacañi jare uquiye. Jayave Jesús ueni ye jocua doce jemimboe reta ĩru reta ipite güi, jare umbipi umimbeu chupe reta mbae uyeyapota oĩ chupe vae.

³³ —Mase, yaa co ñaĩ Jerusalén pe —jei chupe reta—. Jare che cuimbaerã ayeyapo vae penti vae chemeeta sacerdote reta itenondegua reta jare mboroyocui re oporombocue vae reta pe. Jae reta jeita amano vaerã, jare chemeeta judío mbae vae reta pe —jei—. ³⁴ Jae reta cheyoyaita, chenupata chicote pe, undivita cheré, jare cheyucata. Ĕrei mbapi ara rupi aicove yeta ayu umanocue vae reta ipite güi —jei chupe reta.

Jacobo jare Juan uyerure vae
(Mt 20.20-28)

³⁵ Cua jaicue rupi Zebedeo tai reta Jacobo jare Juan jee vae yugüeru Jesús coti jare jei chupe:

—Oporombocue vae, nduipota ndiyapo vaerã oreve nduyerureta ndeve jese vae.

³⁶ —¿Mbae pa pipota ayapo vaerã peve? —jei Jesús chupe reta.

³⁷ —Ndiyembutuichaca yave, emaeño oreré nduguapi vaerã ndeyipi pe, penti ndeacata coti jare ĩru ndeaso coti —jei reta chupe.

³⁸ —Picuaa'ã mbae re piyerure vae —jei Jesús—. ¿Pepuereta pa piporara che aiporarata vae rami? ¿Pepuereta pa piymbibautizaca che ayembibautizacata vae rami? —jei.

³⁹ —Orepuereta co —jei reta.

—Añete pe reta piporarata che aiporarata vae rami, jare pe reta piymbibautizacata che ayembibautizacata vae rami —jei Jesús—. ⁴⁰ Ĕrei chepuere'ã jae peve peguapi vaerã cheyipi pe, penti cheacata coti jare ĩru cheaso coti. Echa'ã Tumpa umicuatiro ma joco pe uguapita vae reta peguarã —jei chupe reta.

⁴¹ Jare ĩru diez Jesús jemimboe reta cua uyandu yave, pochi reta Jacobo jare Juan pe. ⁴² Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güinoi vae reta jei ĩru reta pe mbae uyapo vaerã —jei—. ⁴³ Ĕrei pe reta agüiye piyapo jucuarã —jei—. Ime yave penti pepite pe oĩ vae uipota mbaepuere güinoi vae, tuyeyocui ĩru reta pe. ⁴⁴ Jare ime yave penti pepite pe oĩ vae uipota tenondeguarã ico vae, tuyeyocui ĩru reta pe —jei—. ⁴⁵ Echa'ã che cuimbaerã ayeyapo vae ayu ayeyocui vaerã ĩru vae reta pe. Ayu'ã ĩru vae reta uyeyocui cheve vaerã. Ayu amano vaerã, jeta vae aepi vaerã —jei chupe reta.

Bartimeo jesa mbae vae ucuera
(Mt 20.29-34; Lc 18.35-43)

⁴⁶ Jayave yugüiraa uvãe tenta guasu Jericó pe. Jare Jesús oo ye Jericó güi jemimboe reta jare jeta vae reta ndive. Jare Timeo tai Bartimeo jee vae uguapi uyerure oĩ mbae re tape jembei pe. Bartimeo co jae jesa mbae vae. ⁴⁷ Jare uicuaa Jesús Nazaret pegua uasa oo oĩ yave, iñeeãta reve jei:

—Cheparareco, Jesús. Nde co jae David iñemoñaã reta pegua —jei.

⁴⁸ Jeta joco pe ñugüinoi vae reta uñeengata chupe. Uipota tẽi umiquĩ. Ĕrei jae jeiete iñeeãta reve jei:

—David iñemoñaã reta pegua, cheparareco.

⁴⁹ Jayave Jesús uyemboi.

—Peeni —jei.

Jayave ueni reta jesa mbae vae.

—Iñemiatangãtu. Epũa. Nereni ma oĩ —jei reta chupe.

⁵⁰ Jayave jesa mbae vae ueya iyasoya, jare upũa voi oo Jesús coti. ⁵¹ Jesús upĩrandu chupe:

—¿Mbae pa ndipota ayapo vaerã ndeve?

—Tamae, oporombocue vae —jei jesa mbae vae.

⁵² Jayave Jesús jei chupe:

—Ndepuere ndeo. Ndecuera ma, nderovia cheré ramo —jei.

Jupivoiño ipuere umae, jare oo Jesús jaicue tape rupi.

11

*Jesús uique Jerusalén pe**(Mt 21.1-11; Lc 19.28-40; Jn 12.12-19)*

¹ Jare coiño ma Jerusalén güi ñugüinoi yave, yugüiraa uvãe tenta guasu-rai reta Betfagé jare Betania iyipi pe, ivitu guasu Olivos jovai. Jayave Jesús oyocui mocui jemimboe reta:

²—Pecua pea tenta guasu-rai yanderovai oĩ vae pe —jei chupe reta—. Peo pevãe rupive, pevãeta penti mburica tairusu vae uñeñapiti oĩ. Ndei ave etei quia opo jese. Piyora jare peru —jei—. ³ Jare ime yave quia jei peve vae: ‘¿Maera pa cua piyapo?’ pere chupe: ‘YandeYa uipota uiporu, ñerei imambae güeruruca yeta cua pe’ —pere, jei chupe reta.

⁴ Jayave Jesús jemimboe reta yugüiraa, jare uvãe mburica tairusu vae. Uñeñapiti oĩ tape pe penti onque jovai. Jayave jae reta oyora. ⁵ Jare amocue joco pe ñugüinoi vae jei Jesús jemimboe reta pe:

—¿Maera pa piyora peĩ mburica?

⁶ Jesús jemimboe reta jei chupe reta Jesús oyocui reta vae. Jayave joco pe ñugüinoi vae reta umaño güiraa vaerã. ⁷ Jayave güeru mburica tairusu vae Jesús oĩ vae pe. Jayave Jesús jemimboe reta oñono iyasoya mburica icupe re, jare Jesús opo jese. ⁸ Jare jeta vae uipiso iyasoya tape rupi mburica jenonde, jare ñru vae reta uyasia ñanarوقي jare oñono tape rupi. ⁹ Jare Jesús jenonde yugüiraa vae reta jare jaicue rupi yugüiraa vae reta ññeeãta reve jei:

—¡lcavi co! Tuyembadoraca yandeYa jee re ou vae. ¹⁰ Oporoyocuita yandetenondegua David jee vae oporoyocui rami. Tuyembadoraca. Tei reta ‘icavi co’ ara pe —jei reta.

¹¹ Jare Jesús oo uvãe Jerusalén pe, jare uique Tumpa jo pe. Joco pe umae opaete mbaembae re. Jare caaru ma yave, ou ye Betania pe jocua doce jemimboe reta ndive.

*Iva ía mbae vae**(Mt 21.18-19)*

¹² Piareve pe yugüiraa ye Betania güi, jare Jesús iyembai. ¹³ Jare mbiri güi uecha penti íva joqui reve, jare oo umae jese ime ra ía. Ñerei uecha ía'ã, jaeño joqui. Echa'ã ndei uvãe íva ía vaerã. ¹⁴ Jayave Jesús jei íva pe:

—Ndarau etei ma ndeía.

Jare jemimboe reta uyandu.

*Jesús Tumpa jo pe uyapo vae**(Mt 21.12-17; Lc 19.45-48; Jn 2.13-22)*

¹⁵ Jare yugüiraa uvãe Jerusalén pe. Jayave Jesús uique Tumpa jo pe, jare umbipi omoë joco güi umaeme vae reta jare mbae ogua vae reta, jare umbiyapara corepoti uipepica vae reta imesa reta jare picasu reta umee vae reta jenda reta. ¹⁶ Jare umaño'ã quia re jivita reve uguata vaerã Tumpa jo rupi. ¹⁷ Jare jei joco pe ñugüinoi vae reta pe:

—Tumpa ññee pe uyecuatía oĩ cuarãi: ‘Chero uyembijeeta o opaete ivi pegua reta ipuere uyerure Tumpa pe pipe vaerã.’ Jucuarãi uyecuatía oĩ. Ñerei pe reta piyapo ma imonda vae reta ññemia rami —jei chupe reta.

¹⁸ Jayave sacerdote reta itenondegua reta jare mboroyocui re oporombocue vae reta cua uyandu yave, ueca quirãi ipuere uyucaca vaerã Jesús. Echa'ã jae reta uquie chugüi, opaete vae ipiacañi iporombocue re ramo. ¹⁹ Jare pñuipi yave, Jesús ou ye Jerusalén güi.

*Iva yipi ma**(Mt 21.20-22)*

²⁰ Piareve pe neimbove yave uasa yugüiraa ye yave, uecha íva yipi ma iyipi güive. ²¹ Jayave Pedro imandúa jese, jare jei Jesús pe:

—¡Emae, oporombocue vae! Iva pe ndere íata'ã ma vae yipi ma —jei.

²² Jesús jei jemimboe reta pe:

—Perovia Tumpa. ²³ Añete che jae peve, yae yave cua ivitu guasu pe: ‘Ecuia iyemombo i guasu pe’, jare yae'ã yave yandepia pe: ‘Ndarau ndipo uyeyapo’, ñerei yarovia yave yae vae uyeyapota, uyeyapota co yandevã —jei chupe reta—. ²⁴ Jáeramo che jae peve, ime yave mbae pipota vae, piyerure Tumpa pe jese. Jare perovia yave Tumpa uumeeta co peve, penoita co —jei—. ²⁵ Jare piyerure peĩ Tumpa pe yave, pmbiasa ñru icavi mbae vae uyapo pecoti vae pe, peRu ara pe oĩ vae umbiasa vaerã vi peve pmbaeyoa reta. ²⁶ Ñerei pmbiasa'ã yave ñru icavi mbae vae uyapo pecoti vae pe, peRu ara pe oĩ vae ndarau vi umbiasa peve pmbaeyoa reta —jei.

*Jesús imbaepuere**(Mt 21.23-27; Lc 20.1-8)*

²⁷ Jare yugüiraa uvãe ye Jerusalén pe. Jare Jesús uguata rambueve Tumpa jo rupi, yugüeru jae oí vae pe sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta. ²⁸ Jae reta upirandu chupe:

—¿Mbae nunga mbaepuere pa nenoí cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

²⁹ Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã —jei—. ³⁰ ¿Quía pa ombou Juan upurumbibautiza vaerã? ¿Tumpa pa ombou? ani ¿ivi pegua reta pa ombou? Pemimbeu cheve —jei chupe reta.

³¹ Jayave jae reta jei uyupe:

—Yae yave: ‘Tumpa co ombou’, jae jeita yandeve: ‘Jucuarãí yave, ¿maera pa perovia’ã?’

³² Ani ¿yaeta pa: ‘Fvi pegua reta co ombou?’ —jei reta.

Èrei jae reta uquiye tenta guasu pegua reta güi. Echa’ã opaete vae güirovia Juan co jae añetete penti Tumpa ifnee umimbeu vae. ³³ Jáeramo jei reta Jesús pe:

—Nduicuaa’ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta.

12

Co iporúa icavi mbae vae reta

(Mt 21.33-46; Lc 20.9-19)

¹ Jayave Jesús umbipi imiari chupe reta umijaanga reve.

—Ico penti cuimbae icorã uiquése vae, jare oñoti pipe jeta uva —jei—. Jayave oyoo ivi, jare uyapo uva uitami pipe vaerã. Uyapo vi penti chapapa, umae vaerã ivate güi opaete co re. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe —jei—. ² Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tõi uva chupe reta, iya güinoi vaerã imbaerã. ³ Èrei jae reta uipisi uinupa co iya jembiocui, jare omondo ye. Umee’ã etei chupe güiraa vaerã —jei—. ⁴ Jayave co iya ombou ye tõi ñru jembiocui. Èrei co iporúa reta uyapi ita pe umbipere iñaca rupi, jare uyapo reta icavi mbae vae chupe. Jayave omondo ye —jei—. ⁵ Jayave co iya ombou ye tõi ñru jembiocui. Èrei co iporúa reta uyuca vae. Jare jucuarãínoi uyapo reta jeta ñru co iya jembiocui reta pe. Jae reta uinupa amocue vae, jare uyuca ñru vae reta —jei Jesús—. ⁶ Co iya güinoi jaeño penti tai uau ete vae. Tai cue ete ombou cua tai co iporúa reta pe. Co iya jei tõi: ‘Aramoi jae reta uipiuta cheraí’ —jei, jei chupe reta—. ⁷ Èrei co iporúa reta jei uyupe: ‘Cua co jae iyarã vae. Yayuca, jare yande yaicota co iyarã’ —jei reta, jei—. ⁸ Jayave jae reta uipisi co iya tai uyuca omombo co güi —jei—. ⁹ ¿Mbae ra uyapota co iya? —jei—. Outa, opa uyuca vaerã jocua co iporúa reta, jare uiporucata ico ambie vae reta pe —jei Jesús—. ¹⁰ ¿Pemingueta’ã pa cua Tumpa ifnee pe uyecuatía oí vae?

‘Ita tenta iyapoa reta omombo vae uyeyapo ma ita tenondegua vae.

¹¹ YandeYa uyapo cua.

Yaecha ma, jare yandepiacañi jese.’

Jucuarãí uyecuatía oí —jei chupe reta.

¹² Jayave jocua uyapisaca jese vae reta uipota tõi uipisi Jesús. Echa’ã uicuaa catu cua umijaanga reve jei vae uicuaa quirãí jae reta teco güinoi. Èrei uquiye tenta guasu pegua reta güi. Jáeramo ueyaño, jare yugüiraa.

¿Jupi pa yambiepi vaerã César pe?

(Mt 22.15-22; Lc 20.20-26)

¹³ Jayave jae reta ombou amocue fariseo reta jare herodiano reta, uyavica vaerã tõi chupe jae uyemingueta yave. ¹⁴ Jae reta yugüeru uvãe yave, jei Jesús pe:

—Oporomboe vae, nduicuaa nde ndere vae añete co. Nde nmae oyovaque opaete päve re. Nembutuicha’ã penti ave ñru vae güi. Nde ndeporomboe cavi quirãí Tumpa uipota yaico vaerã vae re —jei reta—. César yandecui yambiepi vaerã chupe corepoti pe. ¿Jupi pa yambiepi vaerã chupe? ani ¿jupi’ã pa? ¿Yambiepita pa chupe? ani ¿yambiepita’ã pa chupe? —jei reta Jesús pe.

¹⁵ Èrei Jesús uicuaa jae reta uipota tõi co umbitavi, jare jei chupe reta:

—¿Maera pa pipota piyavica cheve? Peru cheve penti corepoti taecha —jei.

¹⁶ Jae reta güeru chupe. Jayave jae upirandu chupe reta:

—¿Quía jova íã pa cua? ¿Quía jee pa cua uyecuatía oí vae? —jei.

—Cua César imbae co —jei reta.

¹⁷ —Pemeé César pe César pegua, jare pemeé Tumpa pe Tumpa pegua —jei Jesús chupe reta.

Jare jae reta ipiacañi jese.

¿Icove yeta pa umanocue vae reta?
(Mt 22.23-33; Lc 20.27-40)

¹⁸ Jayave yugüeru vi Jesús oĩ vae pe amocue saduceo reta. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

¹⁹ —Oporomboe vae, Moisés uicuatía ueya yandevé cuarã: 'Penti tiqúei vae umano yave, jembirecocue mbaeti imembi chupe yave, cuimbae amiri tivi tumenda jocua cuña ndive. Jayave cuña imembi yave, cuimbae tumbijee sambiai tiqúei amiri jee pe.' Jucuarãi uicuatía Moisés —jei reta chupe—. ²⁰ Ico penti cuimbae seis tivi reta güinoi vae. Cua cuimbae umenda, jare umano umimembi mbae reve —jei reta—. ²¹ Cuimbae amiri jaicue rupigua umenda jembirecocue ndive, ãrei umano vi umimembi mbae reve. Jae ramiño vi uyeyapo jaicue rupigua ye pe. ²² Opaete siete reve umenda jocua cuña ndive, jare opaete siete reve umano umimembi mbae reve. Taicue rupi cuña umano vi —jei reta—. ²³ Jayave umanocue vae reta icove ye yave, ¿quia nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

²⁴ —Pe reta piyavi co —jei Jesús chupe reta—. Echa'ã picuaa'ã Tumpa iñee uyecuatía oĩ vae jare Tumpa imbaepuere —jei—. ²⁵ Echa'ã umanocue vae reta icove ye yave, cuimbae reta jare cuña reta ndarau umenda. Yugüirecota ángel ara pe ñugüinoi vae reta yugüireco rami —jei—. ²⁶ Tamimbeu pepe umanocue vae reta regua. Icove yeta co. ¿Pemingüeta'ã pa Moisés uicuatía vae? —jei—. Uyecuatía oĩ jocua yai regua, jare quirãi Tumpa jei Moisés pe jocua yai jendi vae ipite güi: 'Che co Abraham, Isaac jare Jacob i'Tumpa' —jei, jei chupe reta—. ²⁷ Tumpa mbaeti co umanocue vae reta i'Tumpa. Jae co tecove güinoi vae reta i'Tumpa. Tuicha co piyavi —jei.

Mboroyocui tenondegua vae
(Mt 22.34-40)

²⁸ Ou vi Jesús oĩ vae pe penti mboroyocui re oporomboe vae. Uyandu uyeaca reta, jare uicuaa Jesús umimbeu cavi co chupe reta. Jayave jae upirandu Jesús pe:

—¿Mbae nunga mboroyocui pa co jae tenondegua vae? —jei.

²⁹ Jesús jei chupe:

—Mboroyocui tenondegua vae co cua: 'Israel pegua, iyapisaca. YandeYa Tumpa, jaeño co Tumpa. ³⁰ Eau ndeYa Tumpa opaete ndepia reve, opaete nderecove reve, opaete ndepiyamingüeta reve jare opaete nepirãta reve.' Cua co jae mboroyocui tenondegua vae —jei chupe—. ³¹ Jare jaicue rupigua co cua: 'Eau nderapicha nde ndiyerau rami.' Mbaeti ñru mboroyocui tenondegua cua reta güi vae —jei.

³² Jayave mboroyocui re oporomboe vae jei Jesús pe:

—Añete co, oporomboe vae. Icavi ndere Tumpa pentiño co jare mbaeti ye ñru. ³³ Jare yaau yave Tumpa opaete yandepia reve, opaete yanderecove reve, opaete yandepiyamingüeta reve jare opaete ñanepirãta reve, jare yaau yave yanderapicha yande yayerau rami, jocua icavi opaete maemimba Tumpa peguarã ñamee vae reta güi —jei.

³⁴ Jare Jesús uyandu yave jae jei jupi cavi vae, jei chupe:

—Jeta'ã uata ndiyeyocui vaerã Tumpa pe iporoyocua pe.

Jare mbaeti ma quia uipota upirandu chupe mbae re.

¿Quia iñemoñaeta reta pegua pa co Cristo?
(Mt 22.41-46; Lc 20.41-44)

³⁵ Jare Jesús oporomboe oĩ Tumpa jo pe.

—¿Maera pa jei mboroyocui re oporomboe vae reta Cristo co jae David iñemoñaeta reta pegua? —jei—. ³⁶ Echa'ã David etei jei Espiritu Santo rupi cuarã:

'YandeYa jei cheYa pe:

Eguapi cheyipi pe cheacata coti,

nderovaicho reta opa amiamiri regua.'

Jucuarãi jei David aracae —jei Jesús—. ³⁷ ¿Quirã pa ipuere ico David iñemoñaeta reta peguarã?

Echa'ã David etei jei chupe: 'CheYa' —jei Jesús chupe reta.

Jare jeta vae uyapisaca ñugüinoi Jesús re uyerovia reve.

Jesús umbijeco mboroyocui re oporomboe vae reta
(Mt 23.1-36; Lc 11.37-54; 20.45-47)

³⁸ Jare Jesús oporomboe yave, jei chupe reta:

—Piñemoa ngatu mboroyocui re oporomboe vae reta güi —jei—. Jae reta jecuaeño uipota uguata jemimonde pucu vae reve, jare jecuaeño uipota ñru vae reta pe uyembisaludaca

vaerã calle reta rupi —jei—. ³⁹ Yugüiraa yave tupao pe jare para pe, jecuaeño uipota uguapi tenda tenondegua vae reta pe —jei—. ⁴⁰ Jare upiro reta cuña ime umano vae reta güi opaete imbaembae, jare pucu uyerure Tumpa pe upurumbitavi vaerã —jei—. Jae reta uiporara eteta co —jei chupe reta.

Cuña ime umano vae umee corepoti Tumpa pe
(Lc 21.1-4)

⁴¹ Penti ara Jesús uguapi oĩ corepoti jiru jovai Tumpa jo pe, jare uecha quirã jeta yugüeru vae reta oñono corepoti pipe. Icoatu vae reta oñono jeta corepoti. ⁴² Jare ou vi penti cuña ime umano vae iparavete vae. Jae oñono mocui riare. Jocua jeta'ã co jepi. ⁴³ Jare Jesús ueni jemimboe reta jare jei chupe reta:

—Añete che jae peve, cua cuña ime umano vae iparavete vae uyapo jeta opaete ñru oñono vae reta güi —jei—. ⁴⁴ Echa'ã opaete ñru reta güeru oñono jeta güinoi vae güi. Ërei cua cuña, yepe tẽi iparavete, oñono opaete güinoi vae. Jocua co jembíu jepirã tẽi vae —jei chupe reta.

13

Tumpa jo uyeitita
(Mt 24.1-2; Lc 21.5-6)

¹ Jesús oẽ yave Tumpa jo güi, penti jemimboe jei chupe:

—Mase, oporombõe vae, icavi cua ita reta jare o reta.

² —¿Nemae pa neĩ cua o tuicha vae reta re? —jei Jesús chupe—. Ndarau upita penti ave ita ñru ita iárambo. Opaete uyeitita co —jei.

Mbaesusereta uyeypota vae
(Mt 24.3-28; Lc 21.7-24; 17.22-24)

³ Jare Jesús uguapi oĩ rambueve ivitu guasu Olivos re Tumpa jo jovai, Pedro, Jacobo, Juan jare Andrés upirandu chupe, jae retaño jae ndive ñugüinoi yave:

⁴ —Emimbeu oreve, ¿quirã yave pa cua uyeypota? Jare opaete cua uyeypota ma yave, ¿quirãita pa nducuaa? —jei reta chupe.

⁵ Jayave Jesús jei chupe reta:

—Piñemoa ngatu agüye vaerã petavi. ⁶ Echa'ã yugüereta jeta cheree pe uyembijeeta vae reta. Jae reta jeita: 'Che co jae Cristo.' Jare umbitavita jeta vae reta —jei—. ⁷ Imeta co ñerãro reta coiño pegüi. Imeta vi ñerãro reta mbiri pegüi. Piyandu yave cua reta regua, agüye pequiye. Cua susere reta uyeypota co. Ërei cua susere reta ndei ave co opa vaerã —jei Jesús—. ⁸ Penti ivi pegua reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. Jare ivi tanta ucãtata jeta que rupi. Jare imeta caruai reta jare tecorai reta. Ërei cua susere reta uyembipi ramo co oĩ —jei chupe reta—.

⁹ Piñemoa ngatu. Echa'ã ñru vae reta pereraata mburuvicha reta ñugüinoi vae pe, uñeapo vaerã peré. Jare penupata judío reta itupao reta pe. Jare pereraata mburuvicha guasu reta jovai chereco pegua, chemimbeu vaerã chupe reta —jei—. ¹⁰ Jare Tumpa iñee icavi vae jerãcuata co rani opaete ivi pegua reta pe —jei—. ¹¹ Jare ñru vae reta pereraa yave pemee vaerã mburuvicha reta pe, agüye piyemipiã'ã mbae pereta vae re —jei—. Pemee yave, Tumpa uicuaacata peve mbae pere vaerã. Jocuãño pere. Echa'ã Espiritu Santo pembedita piyemingueta vaerã, pe retaiño'ã co piyemingueta —jei—. ¹² Tiquei umeeta tiví, uyucaca vaerã. Jare tu umeeta isambiai. Jare sambiai reta oyavichota tu jare ichi ndive, jare uyucacata reta. ¹³ Jare piñemitarãicata opaete vae pe chereco pegua. Ërei jõsata oo uvãe iyapi pe vae uyembiasacata co —jei chupe reta—.

¹⁴ Jare peeçhata icavi mbae vae opaete urucumegua vae uyemboi oĩ oita'ã tẽi vae pe. Tumpa iñee aracae umimbeu vae Daniel jei uyecuaata co. (Umingueta vae tuicuaa) —jei—. Jayave Judea pe ñugüinoi vae reta tosi ivitu guasu coti —jei—. ¹⁵ Jare o cupe re oĩ vae ugüeyi yave, agüye tuique jo pe güiraa vaerã imbaembae. ¹⁶ Jare ico pe oĩ vae agüye tou ye jenta pe güiraa vaerã iyasoya —jei—. ¹⁷ Jare ipurúa vae reta jare umicambu vae reta uiporarata jocua ara reta pe —jei Jesús chupe reta—. ¹⁸ Piyerure Tumpa pe cuarã: 'Agüye emaeño tuyeyapo roĩ ma yave.' ¹⁹ Echa'ã jocua ara reta pe ivi pegua reta uiporara eteta. Jucuarã'i'ã uiporara reta Tumpa ivi uyapo güive, jare ndarau ye jucuarãi uiporara reta —jei—. ²⁰ Jare yandeYa uipota'ã yave opa vaerã jocua ara reta, mbaetita tẽi quia ipuere ico. Ërei Tumpa uiparavo vae reta jeco pegua opata jocua ara reta —jei chupe reta—. ²¹ Aramoi jocua ara reta pe quia jeita peve: 'Mase, co oĩ Cristo', ani jeita: 'Mase, pee oĩ Cristo.' Jucuarãi jei yave, agüye perovia —jei—. ²² Amocue upurumbitavi vae reta jeita: 'Che co jae Cristo', jare ñru upurumbitavi vae reta jeita: 'Che co jae penti Tumpa iñee umimbeu vae.' Jare jae reta uyapota miacañi reta, umbitavi vaerã tẽi Tumpa uiparavo vae reta —jei—. ²³ Piñemoa ngatu. Amimbeu ma peve opaete, ndei uyeypota mbove —jei chupe reta—.

Cuimbaerã uyeyapo vae ou yeta
(Mt 24.29-44; Lc 21.25-36)

²⁴ Jayave opa uiporara reta jocua ara reta pe yave, guarasi uñemipitumimbata, jare yasi ndarau ma jembipe. ²⁵ Yasitata reta oata ara güi, jare opaete ara re mbaepuere güinoi vae reta ucåtata —jei—. ²⁶ Jayave ivi pegua reta cherechata ayu amapitu reve. Che cuimbaerã ayeyapo vae anoita mbaepuere tuicha vae, jare ayembiadoracata opaete vae pe —jei—. ²⁷ Jayave amondota ángel reta güeru vaerã aiparavo vae reta opaete ivi rupi güi —jei—.

²⁸ Yandepuere yamijaanga iva. Piyemboe jese —jei—. Joqui yave, picuaa uyaro ma co ama oqui vaerã —jei Jesús—. ²⁹ Jae ramiño vi pe reta peecha yave cua mbaembae uyeyapo ñugüinoi vae, picuaata che coiño ma co aĩ —jei—. ³⁰ Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei chupe reta—. ³¹ Ara jare ivi opata, ñerei chiñee ndarau opa —jei—.

³² Ñerei mbaeti quía uicuaa mbae ara pe ani mbae ora pe yepe cua uyeyapota, jaeño cheRu. Ángel ara pe ñugüinoi vae reta uicuaa'ã. Che co jae Tumpa Tai. Ñerei che ave aicuaa'ã —jei—. ³³ Jecuaeño peãro, jare piyerure Tumpa pe. Echa'ã picuaa'ã quirãi yave ra uyeyapota —jei—. ³⁴ Yamijaanga penti cuimbae oo ambie ivi pe vae. Oota ma jenta güi yave, umee mbaepuere jembiocui reta pe, jare oyocui penti penti uyapo vaerã iparaviqui, jare oyocui vi taraquëra jãroa uãro cavi vaerã —jei—. ³⁵ Picuaa'ã quirãi yave ra tenta iya ou yeta uvãe. Aramoi outa uvãe pitu ave ma yave, ani piare catu yave, ani uru cuimbae uñee yave, ani neimbove yave —jei—. Járamo peãro pei, ³⁶ agüiye vaerã, aramoiño ou uvãe yave, pepocou peque pei —jei—. ³⁷ Jare cua jae peve vae jae vi opaete vae pe: Peãro pei —jei chupe reta.

14

Jovaicho reta uyemingueta uyucaca vaerã Jesús
(Mt 26.1-5; Lc 22.1-2; Jn 11.45-53)

¹ Mocui araño ma uata pascua uyapo reta vaerã. Jocua ara pe judío reta jou mbiyape ovu mbae vae. Jare sacerdote reta itenondegua reta jare mboroyocui re oporomboe vae reta ueca ñugüinoi quirãi ipuere uipisi tavi rupi Jesús, uyucaca vaerã. ² Ñerei jei reta: —Agüiye yaipisi pascua ara rupi, agüiye vaerã tenta guasu pegua reta uyapo tecorai.

Cuña upiyere mbae ipiche cavi vae Jesús re
(Mt 26.6-13; Jn 12.1-8)

³ Jare Jesús ucaru oĩ rambueve Betania pe Simón ipire ocuise vae jenta pe, uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae nardo jee vae pe. Cua nardo jepi ete. Cuña oyoca iru-rai, jare upiyere nardo Jesús iñaca re. ⁴ Jayave amocue joco pe ñugüinoi vae pochi jare jei uyupe:

—¿Maera pa umicañitei? ⁵ Umee yave corepoti re, güinoita tēi trescientos ara mbaraviqui jepi pegua umee vaerã iparavete vae reta pe —jei reta.

Jayave iñera reta jese.

⁶ Ñerei Jesús jei chupe reta:

—Pemaño jese. ¿Maera pa pemambeco? Icavi vae co uyapo cheve —jei—. ⁷ Echa'ã yugüirecoñotai co iparavete vae reta pe reta ndive, jare pipota yave, pepuereta pembali. Ñerei che ndarau aicoño pe reta ndive —jei—. ⁸ Cua cuña uyapo ipuere vae. Chembipiche cavi ma, ndei añeñotica mbove —jei—. ⁹ Añete che jae peve, opaete ivi rupi Tumpa iñee icavi vae jerãcua vae rupi, cua uyapo vae vi jerãcuata, iru vae reta imandúa vaerã jese —jei chupe reta.

Judas umeeta Jesús
(Mt 26.14-16; Lc 22.3-6)

¹⁰ Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, umee vaerã Jesús chupe reta. ¹¹ Cua uicuaa reta yave, uyerovia reta, jare jei Judas pe umeeta co chupe corepoti. Jayave Judas umbipi ueca quirãi ipuere umee vaerã Jesús chupe reta.

Jesús ucaru jemimboe reta ndive
(Mt 26.17-29; Lc 22.7-23; Jn 13.21-30; 1 Cor 11.23-26)

¹² Pascua ara pe judío reta uyuca ovecha. Jocua ara umbipi jou mbiyape ovu mbae vae. Jayave Jesús jemimboe reta jei chupe:

—¿Quiapa pa ndipota nduyapicatu vaerã, tembú pascua pegua ndeu vaerã?

¹³ Jayave Jesús oyocui mocui jemimboe reta:

—Pecua tenta guasu pe —jei chupe reta—. Peovãitita joco pe penti cuimbae i güiraa iru pe vae. Pecua jaicue —jei—. ¹⁴ Jare uique yave tenta pe, pere tenta iya pe: ‘Oporomboe vae

jei: ¿Quiape pa ime oĩ o, joco pe jau vaerã tembiu pascua pegua cheremimboe reta ndive' —jei, pere chupe, jei Jesús—. ¹⁵ Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapicatu yandeve —jei chupe reta.

¹⁶ Jare Jesús jemimboe reta yugüiraa uvãe yave tenta guasu pe, uvãe opaete Jesús jei chupe reta vae rami. Jare uyapo reta tembiu pascua pegua jou reta vaerã.

¹⁷ Jare pĩtu ma yave, Jesús oo joca doce jemimboe reta ndive. ¹⁸ Jare mesa pe uguapi ucaru ñugüinoi rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe. Jae co penti ucaru oĩ che ndive vae —jei.

¹⁹ Jayave jae reta ipiatiti, jare upirandu Jesús pe penti penti rupi:

—¿Che pa co jae?

²⁰ —Pe reta co jae doce cheremimboe reta —jei Jesús chupe reta—. Pentu pepite pe oĩ vae co jae. Mbiyape umãqui oĩ che ndive plato pe vae co jae —jei—. ²¹ Che cuimbaerã ayeyapo vae aañotai amano vaerã, Tumpa iñee pe uyecuatía oĩ cheregua rami. Ërei jocua cuimbae chemeeta vae uiporarata co. Icavi tẽi mona jocua cuimbae mbaeti ico yave —jei.

²² Jare jae reta ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee chupe reta.

—Peu —jei chupe reta—. Cua co jae cherete —jei.

²³ Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe. Jare opareve jou copa güi. ²⁴ Jesús jei chupe reta:

—Cua co jae cherugüi. Cherugüi uyepiyereta, Tumpa jei piau ye vae uyeyapo vaerã, jare jeta vae reta uyembiasaca vaerã —jei Jesús—. ²⁵ Añete che jae peve, ndarau ma jau uva ticuecue, Tumpa iporoyocua pe uva ticuecue ipiau vae jau regua —jei chupe reta.

Pedro uicuacuta Jesús

(Mt 26.30-35; Lc 22.31-34; Jn 13.36-38)

²⁶ Jare opa yave ucanta reta Tumpa pe, oẽ reta yugüiraa ivitu guasu Olivos coti. ²⁷ Jayave Jesús jei chupe reta:

—Opaete pe reta chereyata cua pĩtu. Echa'ã Tumpa iñee pe uyecuatía oĩ cuarã: 'Ayucata ovecha reta iyandarecoa, jare ovecha reta opata uñemiai.' Jucuarãi uyecuatía oĩ —jei chupe reta—. ²⁸ Ërei aicove ye ayu yave umanocue vae reta ipite güi, aata perenonde Galilea pe —jei.

²⁹ Jayave Pedro jei Jesús pe:

—Yepe tẽi opaete ñru reta tandereya, ãrei che ndarau ndueya.

³⁰ —Añete che jae ndeve —jei Jesús chupe—, cua pĩtu etei, ndei mocui vese uru cuimbae uñee mbove, mbapi vese ma checuacuta —jei.

³¹ Ërei Pedro jeiete jei:

—Yepe tẽi tamano nde ndive, ãrei ndarai nducuaçu.

Jare jucuarãi vi jei opaete Jesús jemimboe reta.

Jesús uyerure Getsemaní pe

(Mt 26.36-46; Lc 22.39-46)

³² Jayave yugüiraa uvãe reta Getsemaní pe.

—Peguapi cua pe, che aa ayerure Tumpa pe rambueve —jei Jesús jemimboe reta pe.

³³ Jayave güiraa Pedro, Jacobo jare Juan, jare umbipi ipiatiti jare uiporara.

³⁴ —Tuicha chepiatiti, jare amano pota echa. Pepita cua pe, jare agüiye peque —jei jocua mbapi jemimboe reta pe.

³⁵ Jayave Jesús usiri catu chugüi reta, jare uyeatica ivi re. Uyerure Tumpa pe, Tumpa uipota yave, umbiasa vaerã chugüi jocua uyeyapota chupe vae.

³⁶ —CheRu, cheRu, opaete mbae ndepuere ndiyapo. Embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

³⁷ Jayave Jesús oo jemimboe reta ñugüinoi vae pe, jare uecha oque ñugüinoi. Jayave jei Simón Pedro pe:

—Simón, ¿ndeque pa? ¿Ndepuere'ã pa ndeque mbae neĩ penti ora yepe? —jei chupe.

³⁸ Jei vi jemimboe reta pe:

—Agüiye peque. Piyerure Tumpa pe, agüiye vaerã peyoa. Pepia pe peratangātu co, ãrei perete iyaqui co —jei.

³⁹ Jayave Jesús usiri ye uyerure Tumpa pe tenonde uyerure vae rami. ⁴⁰ Jayave ou ye jemimboe reta ñugüinoi vae pe, jare uecha oque ye ñugüinoi. Echa'ã jae reta jopei ete ma. Jare uicuaa'ã mbae jei vaerã Jesús pe. ⁴¹ Jayave Jesús usiri ye mbapia re, jare ou ye yave, jei chupe reta:

—Peque jare peputuño ma. Jocuño ma. Ora uvãe ma. Che cuimbaerã ayeyapo vae penti vae chemeeta cuimbae jeco pochi vae reta pe —jei—. ⁴² Pepúa. Yaaño ma. Mase, chemeeta vae coiño ma ou —jei chupe reta.

Uipisi reta Jesus

(Mt 26.47-56; Lc 22.47-53; Jn 18.2-11)

⁴³ Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquisepucu reve jare iivira reve reve. Sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta ombou Jesús pe cua reta. ⁴⁴ Jare umeeta vae umimbeu ma ñru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi, jare peraa. Agüiye tosi —jei.

⁴⁵ Judas ou uvãe yave, ou voi Jesús oĩ vae pe.

—Oporomboe vae, oporomboe vae —jei chupe.

Jayave uyurupite. ⁴⁶ Jayave uipisi reta Jesús. ⁴⁷ Jare penti cuimbae joco pe oĩ vae uequi iquisepucu jiru güi, sacerdote tenondegua jembicui re uiporu, jare uyasia inambi chugüi. ⁴⁸ Jayave Jesús jei yugüeru vae reta pe:

—¿Maera pa peru quisepucu reta jare ivira reta chepisi vaerã, imonda vae pipisi vae rami?

⁴⁹ Opa ara aico pe reta ndive Tumpa jo pe. Joco pe aporomboe, jare chepisi'ã. Ërei piyapo cua, Tumpa iñee uyecuatia oĩ vae uyeyapo vaerã —jei.

⁵⁰ Jayave opaete jemimboe reta ueya Jesús, jare opa osi.

Cunumi osi vae

⁵¹ Jare penti cunumi uñepëgua penti asoya pe vae oo Jesús jaicue rupi. Jare amocue joco pe ñugüinoi vae reta uipisi tõi. ⁵² Ërei jae ueya iyasoya, jare nani etei oë osi.

Jesús uyemboi jovaicho reta jovai

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jayave güiraa reta Jesús sacerdote tenondegua jenta pe. Jare joco pe uyembati opaete sacerdote reta itenondegua reta, tenta guasu pegua reta itenondegua reta, jare mboroyocui re oporomboe vae reta. ⁵⁴ Jare Pedro oo vi Jesús jaicue. Ërei mbirriño oo chugüi. Jae uique sacerdote tenondegua joca pe, jare uguapi sacerdote tenondegua jembicui reta ndive uyepee ñugüinoi tataipi pe. ⁵⁵ Jare sacerdote reta itenondegua reta jare opaete ñru mburuvicha reta ueca quia uñeapo vaerã Jesús re, uyucaca vaerã. Ërei uvãe'ã reta teco jese. ⁵⁶ Yepe tõi jeta vae iyapu reve uñeapo jese, Ërei jei reta tõi vae oyovaque'ã. ⁵⁷ Jare amocue upúa uñeapo iyapu reve jese vae jei:

⁵⁸ —Ore nduyandu jei: 'Ambsururuta Tumpa jo cuimbae reta uyapo vae, jare mbapi ara pe che ayapota ñru Tumpa jo cuimbae reta uyapota'ã vae' —jei, jei reta.

⁵⁹ Ërei yepe tõi jucuarãi jei reta, Ërei jei reta tõi vae oyovaque'ã. ⁶⁰ Jayave sacerdote tenondegua upúa uyemboi yati vae reta ipite pe, jare upirandu Jesús pe:

—¿Maera pa ñínee nemoë'ã? ¿Mbae re pa cua reta uñeapo nderé? —jei.

⁶¹ Ërei Jesús quíñio. Jei'ã mbae ave. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? —jei.

⁶² —Jae co che —jei Jesús chupe—. Jare che cuimbaerã ayeyapo vae cherechata co aguapi aĩ Tumpa mbaepuere güinoi vae iyipi pe iyacata coti. Cherechata vi ayu amapitu reve —jei.

⁶³ Jayave sacerdote tenondegua cua uyandu yave, pochi ramo omondoro jemimondei, jare jei:

—¿Maera ma pa yaeca yeta ñru vae reta uñeapo vaerã jese? ⁶⁴ Piyandu ma icavi mbae vae jei Tumpa coti —jei—. ¿Mbae pa pere añave? —jei.

Jayave opaete reve jei reta:

—Icavi'ã co. Icavi co yayucaca vaerã —jei reta.

⁶⁵ Jare amocue vae umbipi undivi jese, jare uesaño ma, jare ocua jese. Jare jei Jesús pe:

—Emimbeu oreve quia ra ocua oĩ nderé.

Jare sacerdote tenondegua jembicui reta ocua vi jese.

Pedro uicuacu Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Jare Pedro oca pe oĩ rambueve, ou penti cuñatai sacerdote tenondegua pe uyeyocui vae. ⁶⁷ Jare uecha yave Pedro uyepee oĩ, omondo umae jese.

—Nde vi co jae Jesús Nazaret pegua ñru —jei chupe.

⁶⁸ Jayave Pedro uicuacu Jesús.

—Aicuaa'ã jocua cuimbae, jare aicuaa'ã mbae ndere vae —jei Pedro chupe.

Jayave Pedro oo onque tuicha vae coti. Jare uru cuimbae uñee. ⁶⁹Jayave cuñatai uecha ye, jare imiari jese joco pe ñugüinoi vae reta pe:

—Cua cuimbae co jae penti Jesús iiru —jei.

⁷⁰Èrei Pedro uicuacu ye. Jare ndei ima mbove joco pe ñugüinoi vae reta jei ye Pedro pe:

—Añete nde co jae penti Jesús iiru. Echa'ã nde vi co jae penti Galilea pegua. Nde ndiyemingueta jae reta uyemingueta vae rami —jei reta chupe.

⁷¹Jayave Pedro jei Tumpa jee re:

—Tumpa tuiporaraca cheve cua jae vae añetete'ã yave. Aicuaa'ã jocua cuimbae piyemingueta pei jese vae.

⁷²Jayave uru cuimbae uñee ma mocui vese. Jare Pedro imandúa Jesús jei chupe vae re: “Ndei mocui vese uru cuimbae uñee mbove, mbapi vese ma checuacuta.” Jare cua re ipia pe uyemingueta yave, umbipi uyao.

15

Jesús uyemboi Pilato jovai

(Mt 27.1-2, 11-14; Lc 23.1-5; Jn 18.28-38)

¹Jayave cõe rupive sacerdote reta itenondegua reta, tenta guasu pegua reta itenondegua reta, mboroyocui re oporomboc vae reta, jare opaete iiru mburuvicha reta uyembaui uyemingueta ñugüinoi reta uyupii. Jayave uipocua Jesús jare güiraa Pilato pe umee.

²Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

³Jayave sacerdote reta itenondegua reta uñeapo Jesús re jeta mbaembae re. ⁴Jayave Pilato upirandu ye Jesús pe:

—¿Maera pa niñee nemoë'ã? Mase, jeta mbaembae re uñeapo reta nderé —jei.

⁵Èrei Jesús jei'ã mbae ave chupe. Jáeramo Pilato ipiacañi jese.

Pilato jei Jesús umanota co

(Mt 27.15-31; Lc 23.13-25; Jn 18.38-19.16)

⁶Jare pascua ara rupi Pilato oyoracañoi penti pereso tenta guasu pegua reta uipota vae. ⁷Jare peresoriru pe ñugüinoi amocue upuruyuca vae reta. Cua reta upuruyuca, mburuvicha reta ndive uñerãro yave. Penti jee co Barrabás. ⁸Jare jeta vae yugüeru uyerure Pilato pe uyapo vaerã chupe reta opa año uyapo rami. ⁹Jayave Pilato jei chupe reta:

—¿Pipota pa ayoraca vaerã peve judío reta juvicha guasu?

¹⁰Echa'ã jae uicuaa sacerdote reta itenondegua reta umee Jesús chupe ñacatãa jese ramo.

¹¹Èrei sacerdote reta itenondegua reta omboemboe yati vae reta:

—Piyerure Pilato pe oyoraca vaerã peve Barrabás. Agüiye toyoraca Jesús —jei reta.

Jayave jucarãi uyerure reta Pilato pe. ¹²Jayave Pilato upirandu chupe reta:

—Barrabás ayoraca yave, ¿mbae pa pipota ayapo vaerã cua cuimbae judío reta juvicha guasu pere chupe vae pe?

¹³Jayave jae reta iñeeãta reve jei:

—Icutuca curusu re.

¹⁴Èrei Pilato upirandu chupe reta:

—¿Mbae icavi mbae vae pa uyapo?

Èrei jae reta jeiete iñeeãta reve jei:

—Icutuca curusu re.

¹⁵Jayave Pilato oyoraca chupe reta Barrabás, uipota umbiyerovia reta ramo. Jare Pilato uinupaca yave Jesús chicote pe, umee sundaro reta pe, uicutu vaerã curusu re.

¹⁶Jayave sundaro reta güiraa Jesús juvicha joca palacio pe, jare ueni opaete iiru sundaro reta. ¹⁷Jayave sundaro reta omondeca Jesús pe temimonde pita vae, jare oñope yurãti catuui vae, jare umbapúa oñono Jesús iñaca re. ¹⁸Jayave umbipi umbiadora-raanga reta.

—¡Viva, judío reta juvicha guasu! —jei reta.

¹⁹Jare uiporu reta iñaca re ivira. Jare undivi reta jese, jare uyeatica reta jae jovai umbiadora-raanga vaerã. ²⁰Jare opa oyoyai reta yave, sundaro reta omboi chugüi temimonde pita vae, jare omondeca ye chupe jae jemimondei. Jayave güiraa reta mburuvicha guasu joca güi, uicutu vaerã curusu re.

Jesús uyecutuca curusu re

(Mt 27.32-44; Lc 23.26-43; Jn 19.17-27)

²¹Penti cuimbae Simón jee vae tenta guasu Cirene pegua, Alejandro jare Rufo tu, ou uvãe tenta guasu coti. Jacoropi uasa oo oï yave, sundaro reta güiraca chupe Jesús icurusu.

²²Jare sundaro reta güiraa Jesús Gólgota jee vae pe. (Cua uipota jei: “Ácacuerenda”.) ²³Jayave

umee reta Jesús pe vino uyea mirra ndive vae. Ērei Jesús jou'ã. ²⁴Jayave sundaro reta uicutu curusu re. Jayave uyuguari reta Jesús jemimonde re, uicuaa vaerã mbae nunga penti penti güiraa iyupe vaerã. ²⁵Jare neimbove yave nueve pe, uicutu reta Jesús curusu re. ²⁶Jare oñono reta curusu re Jesús iñãca iárambo uyecuatía mbae umbijeco jesegua vae: “Judío reta juvicha guasu.” ²⁷Jare sundaro reta uicutu vi curusu re mocui imonda vae reta, jare oñono penti Jesús iyacata coti jare ĩru iyaso coti. ²⁸Jare uyeyapo ma Tumpa iñee uyecuatía oĩ vae: “Īru vae reta jei tēi jae vi co penti icavi mbae vae.” ²⁹Jare uasa vae reta uñeãcambivava reve jei icavi mbae vae Jesús pe.

—Aa! —jei reta—. Nde ndere nembusururuta co Tumpa jo jare ndiyapo yeta mbapi ara pe. ³⁰Iyerepi añave, jare egüeyi curusu güi —jei reta.

³¹Jae ramiño vi sacerdote reta itenondegua reta jare mboroyocui re oporombocue vae reta imiari uyupe yave, oyoyai reta.

—Jae uepi ĩru vae reta —jei reta—. Ērei ipuere'ã jae uyerepi. ³²Jae co Cristo, Tumpa ombou vae yave, jae co Israel pegua reta juvicha guasu yave, tugüeyi añave curusu güi, yaecha vaerã, jare yarovia vaerã —jei reta.

Jare Jesús ndive uyecutu ñugüinoi vae reta vi jei icavi mbae vae chupe.

Jesús umano

(Mt 27.45-56; Lc 23.44-49; Jn 19.28-30)

³³Jare guarasi ara mbite güive mbapi ora rupi uñemipitumimbi opaete ivi pe. ³⁴Jayave mbapi ora ma caaru yave, Jesús iñeeãta reve jei:

—Ēloi, Ēloi, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

³⁵Amocue joco pe ñugüinoi vae uyandu jare jei tēi:

—Mase, Elías ueni.

³⁶Jare penti vae osi oo umãqui esponja vinagre pe, jare oñono ivira re, jare omondo Jesús iyuru coti.

—Peãro —jei—. Yaecha ou Elías umbigüeyi vaerã —jei.

³⁷Jayave Jesús tanta usapícaí, jare umano. ³⁸Jayave Tumpa jo umbiyao vae osoro mbite rupi ivate güi ivi coti. ³⁹Jare sundaro reta juvicha Jesús jovai uyemboi oĩ vae uecha yave quirãí usapícaí jare umano, jei:

—Añeteñoi yepe, cua cuimbae co jae Tumpa Tai.

⁴⁰Jare amocue cuña reta umae ñugüinoi mbiri güi. Cua reta ipite pe ñugüinoi María Magdalena, Salomé jare María. Cua María imembi reta co jae Jacobo tairusu vae jare José.

⁴¹Jesús Galilea pe icose yave, cua cuña reta yugüiraa jae ndive uyeyocui vaerã chupe. Jare jeta ĩru cuña yugüeru jae ndive Jerusalén pe vae reta joco pe ñugüinoi vi.

José oñono Jesús jetcue teögüeriru pe

(Mt 27.57-61; Lc 23.50-56; Jn 19.38-42)

⁴²Jocua ara opaete judío reta uyeyapícatu ñugüinoi piareve peguarã. Echa'ã piareve pe co mbutuu ara. Jáeramo guarasi uique ma yave, ⁴³pentí cuimbae tenta guasu Arimatea pegua José jee vae uñemiatangātu oo Pilato pe, jare uyerure chupe Jesús jetcue re. José co jae penti mburuvicha. Opaete tenta guasu pegua reta uipiu cua José. Jae uãro ico Tumpa iporoyocua. ⁴⁴Jare Pilato ipiacañi Jesús umano ma vae re. Jayave ueni sundaro reta juvicha, jare upirandu chupe quirãí yave ra umano Jesús. ⁴⁵Jare sundaro reta juvicha umimbeu chupe. Jayave Pilato jei José pe:

—Ndepuere nderaa Jesús jetcue.

⁴⁶Jayave José ogua nieso. Jare umbigüeyi ma yave Jesús jetcue, oñoma nieso pe. Jayave oñono penti teögüeriru itape uyeyoo vae pe, jare umbiyapayere ita tuicha vae teögüeriru jonque re. ⁴⁷Jare María Magdalena jare José ichi María jee vae uecha quiape oñono Jesús jetcue.

16

Jesús icove ye

(Mt 28.1-10; Lc 24.1-12; Jn 20.1-10)

¹Mbutuu ara uasa ma yave, María Magdalena, Jacobo ichi María jee vae jare Salomé ogua mbae ipiche cavi vae, jare yugüiraa uipichi vaerã Jesús jetcue re. ²Jare neimbove asi domingo ara pe cua cuña reta yugüiraa teögüeriru coti. ³Jare jei reta uyupe:

—¿Quía ra umbisírta yandevé ita tuicha vae teögüeriru jonque güi?

⁴Ērei umae reta yave, uecha ita uyembisiri ma teögüeriru jonque güi. Jocua ita tuicha co. ⁵Jare uique reta yave teögüeriru pe, uecha penti cunumi uguapi oĩ iyacata coti. Jemimonde pucu jare tí. Jare ipiacañi reta jese. ⁶Ērei cunumi jei chupe reta:

—Agüiye pepiacañi. Peeca co peĩ Jesús Nazaret pegua uyecutuca curusu re vae. Jae icove ye ma ou umanocue vae reta ipite güi. Mbaeti ma cua pe oĩ. Mase, pemae jendacue re — jei—. ⁷ Pecua pere jemimboe reta pe jare Pedro pe: ‘Jae oota perenonde Galilea pe. Joco pe peechata, jae jei peve vae rami’ —pere chupe reta, jei.

⁸ Jayave cuña reta oẽ teõgüeriru güi, jare tanta osi yugüiraa. Uquiye ramo umbipi uriri. Jare jei’ã mbae ave quia pe.

María Magdalena uecha Jesús
(Jn 20.11-18)

⁹ Jesús icove ye ou umanocue vae reta ipite güi neimbove asi domingo ara pe. Jayave uyechaca tenonde ete María Magdalena pe. Tenonde yave Jesús umbisiri siete aña reta cua cuña güi. ¹⁰ María oo umimbeu Jesús ndive yugüirecose vae reta pe. Jae reta ipiatiti ramo uyao ñugüinoi. ¹¹ María jei chupe reta:

—Jesús icove ye ma oĩ. Aecha ma —jei chupe reta.

Èrei uyandu yave, güirovia’ã reta.

Mocui jemimboe reta uecha Jesús
(Lc 24.13-35)

¹² Cua jaicue rupi Jesús uyechaca mocui jemimboe reta pe, jae reta yugüiraa rambueve tape rupi tenta mbae vae coti. Ambie vae echa Jesús chupe reta. ¹³ Jae reta yugüeru ye tenta guasu pe umimbeu ñru reta pe. Èrei jeseve güirovia’ã reta.

Jesús oyocui jocua once jemimboe reta
(Mt 28.16-20; Lc 24.36-49; Jn 20.19-23)

¹⁴ Cua jaicue rupi Jesús uyechaca jocua once jemimboe reta pe etei, jae reta ucaru ñugüinoi rambueve, jare uñeengata chupe reta, upurugüirovia’ã jare ipiatanta ramo. Echa’ã ñru vae reta uecha Jesús, icove ye yave ou umanocue vae reta ipite güi, jare umimbeu tẽi jemimboe reta pe. Èrei jae reta güirovia’ã. ¹⁵ Jayave Jesús jei chupe reta:

—Pecua opaete ivi rupi. Pemimbeu Tumpa ñnee icavi vae opaete ivi pegua reta pe — jei—. ¹⁶ Jocua güiroviata jare uyembibautizacata vae uyembiasacata. Èrei jocua güirovia’ã vae ucañiteita co —jei—. ¹⁷ Jare ñru vae reta uechata güirovia vae reta uyapo ñugüinoi cua nunga miacañi reta. Cheree re jae reta umbisirita aña reta oya jese vae reta güi. Uyeminguetata ambie ñee pe. ¹⁸ Uipisita mboi reta. Jou yave imbayachi vae, ndarau mbae uyeypao chupe reta. Oñonota ipo imbaerasi vae reta re umbigüera vaerã —jei chupe reta.

Jesús oo ara pe
(Lc 24.50-53)

¹⁹ Jayave yandeYa opa uyemingueta yave jae reta ndive, oo ara pe, jare uguapi Tumpa iyipi pe iyacata coti. ²⁰ Jare jemimboe reta yugüiraa umimbeu Tumpa ñnee opaete que rupi. Jare yandeYa ombori, jare uicuaaca ñru vae reta pe jemimboe reta jei vae añete vae miacañi reta uyapo vae rupi. Jaeño ma.

EL SANTO EVANGELIO SEGUN SAN LUCAS

Lucas uicuatía Teófilo pe

¹ Jeta vae umimbeu ma uicuatía reve opaete yandepite pe uyeyapo vae regua. ² Jocua uyeyapo vae iyipi güive uecha vae reta jucuarái umimbeu yandeve. Echa'á jae reta umimbeu Tumpa iñee ñru vae reta pe. ³ Jáeramo icavi echa cheve che vi aicuatía vaerá ndeve, mburuvicha Teófilo, amimbeu vaerá ndeve quirái opaete uyeyapo. Echa'á che aicuaa cavi opaete iyipi güive uyeyapo vae. ⁴ Aicuatía añ ndeve cua, ndicuaa vaerá añete co jocua ndiyemboe jese vae.

Juan oata vae regua

⁵ Herodes ico yave ivi Judea pegua reta juvicha guasurá, ico vi penti sacerdote Zacarías jee vae. Jae co sacerdote penti ati Abías jee vae pegua. Zacarías jembireco co jae Aarón iñemoñaá reta pegua jare jee co Elisabet. ⁶ Zacarías jare jembireco uyapo jupi vae jare jucuarái umbiyerovia Tumpa. Echa'á jecuaeño uyapo yandeYa iporoyocui reta. Mbaeti quía ipuere umbijeco reta mbae re. ⁷ Ërei mbaeti co Zacarías isambiai. Echa'á Elisabet imembi mbae vae co. Jare Zacarías jare Elisabet ucuacuaa ete ma.

⁸ Penti ara penti ati Abías jee vae pegua sacerdote reta uparaviqui ñugüinoi Tumpa jo pe. Jáeramo Zacarías uyapo oñ iparaviqui joco pe. ⁹ Jare jocua ara Zacarías iparaviqui co uique vaerá yandeYa jo japipe pe etei uapi vaerá mbae ipiche cavi vae. Echa'á jecuaeño uyapo jucuarái sacerdote reta. ¹⁰ Jare jeta Israel pegua reta yati ma uyerure ñugüinoi Tumpa jo oca pe. Zacarías mbae ipiche cavi vae uapi oñ rambueve. ¹¹ Jare uyecuaa Zacarías pe penti ángel yandeYa pe uyeyocui vae. Ángel uyemboi oñ mbae ipiche cavi vae imesa iyacata coti. ¹² Jare Zacarías uecha yave ángel, ipiacañi jare uquiye vi. ¹³ Ërei ángel jei chupe:

—Agüiye equiye, Zacarías. Tumpa uyandu ma ndiyeruel, jare nembireco Elisabet imembita ndeve cuimbae. Jare nembijeeta Juan —jei—. ¹⁴ Jare nde ndiyeroviata co tuicha. Jare jeta vi uyeroviata jae oa vae regua —jei ángel Zacarías pe—. ¹⁵ Echa'á yandeYa umbutuichacata co. Jae ndarau etei ucau. Jare tineeta Espiritu Santo pe ichi güi oa güive —jei chupe—. ¹⁶ Jare umbiyerovata yandeYa Tumpa coti jeta Israel pegua reta —jei—. ¹⁷ Jae oota yandeYa jenonde uauca vaerá tu reta pe isambiai reta jare Tumpa jei vae uyapo'á vae reta uyeyapo vaerá iyaracuaa vae retará jare jupi vae retará. Jucuarái uyapota, Israel pegua reta uáro vaerá yandeYa. Jae icota Elías icose vae rami jare güinoita mbaepuere Elías güinoise vae rami —jei ángel Zacarías pe.

¹⁸ Jayave Zacarías jei ángel pe:

—¿Quiráita pa aicuaa añetete ra cua nde ndere cheve vae? Echa'á che acuacuaa ete ma jare chembireco ucuacuaa ete ma vi —jei.

¹⁹ Jayave ángel jei ye Zacarías pe:

—Che co jae Gabriel. Che ayeyocui Tumpa pe. Tumpa chembou chemiari vaerá ndeve jare amimbeu vaerá ndeve cua ñee icavi vae —jei chupe—. ²⁰ Mase, niñeeta'á ndepita cua amimbeu ndeve vae uyeyapo regua. Echa'á nderovia'á che jae ndeve vae. Ërei che jae ndeve vae uyeyapota co ara ou uyeyapo vaerá yave —jei.

²¹ Jare Israel pegua reta uáro ñugüinoi Zacarías oñ vaerá Tumpa jo güi, jare ipiacañi reta quirái Zacarías upita ima Tumpa jo japipe pe. ²² Jare Zacarías oñ yave, ipuere'á omoë iñee chupe reta. Jáeramo jae reta uicuaa Zacarías uecha mbae Tumpa jo pe oñ rambueve. Echa'á jae umupúa ipo chupe reta. Ërei ipuere'á etei mbae jei chupe reta.

²³ Jare opa ma yave Zacarías iparaviqui Tumpa jo pe, oo ye jenta pe. ²⁴ Jare mbovi ara rupi Zacarías jembireco Elisabet ipurúa. Jayave Elisabet uñemi pandepo yasi jenta pe. Echa'á jae jei:

²⁵ —Cuarái yandeYa uyapo cheve. Ima ma chemara ñru vae reta güi chemembi'á etei ramo. Ërei añave yandeYa chembori agüiye vaerá chemara chugüi reta —jei.

Jesús oata vae regua

²⁶ Jare Elisabet seis yasi ma ipurúa yave, Tumpa ombou ángel Gabriel tenta guasu Nazaret ivi Galilea pegua pe ²⁷ María ipi. María co jae penti cuñatai güireco'á etei cuimbae vae. Ërei jae jei ma umenda vaerá José ndive. José co jae penti David iñemoñaá reta pegua. ²⁸ Jare ángel uique María oñ vae pe jare jei chupe:

—Iyerovia. YandeYa ipiacavi ndeve. YandeYa oñ nde ndive. YandeYa nemivendise ete ñru cuña reta güi —jei.

²⁹ María cua uyandu yave, ipiacañi. Echa'ã uicuaa'ã mbae ra uipota jei ángel jei chupe vae. ³⁰ Jayave ángel jei chupe:

—Agüiye equiye, María. Echa'ã Tumpa ipiacavi ndeve —jei—. ³¹ Mase, ndepuruata co jare nemembita. Jare nembijeeta nemembi Jesús —jei María pe—. ³² Jae güinoita mbaepuere tuicha vae, jare jeeta co Tumpa Tai. Jare yandeYa Tumpa uyapota Israel pegua reta juvicha guasurã itenondegua David rami —jei—. ³³ Jare jae icota Jacob ñemoñaeta reta juvicha guasurã jaeño mai pegua. Jare jae iporoyocua ndarau opa —jei ángel chupe.

³⁴ Jayave María jei ángel pe:

—¿Quirãita pa uyeyapo cua? Echa'ã ndei areco cuimbae —jei.

³⁵ Jayave ángel jei María pe:

—Espíritu Santo outa ndeve. Tumpa imbaepuere rupi cua uyeyapota ndeve. Jáeramo nemembi oata iyoa mbae reve jare jeeta co Tumpa Tai —jei—. ³⁶ Mase, nerentarã Elisabet ipurúa vi, yepe tẽi ucuaacua ete ma. Seis yasi ma ipurúa oĩ, yepe tẽi ñru vae reta umbjeee 'Imembi mbae vae' —jei—. ³⁷ Echa'ã Tumpa ipuere uyapo opaete —jei chupe.

³⁸ Jayave María jei ángel pe:

—Mase, che co jae yandeYa pe ayeyocui vae. Tome tuyeyapo cheve nde ndere cheve vae rami —jei.

Jayave ángel oo ye María oĩ vae güi.

María opou Elisabet pe

³⁹ Jayave mbovi ara rupi María oẽ oo voi jenta güi penti tenta guasu ivitu reta re Judea pegua pe. ⁴⁰ Jare oo uvãe Zacarías jenta pe, jare umbisaluda Elisabet. ⁴¹ Jare Elisabet uyandu yave María jei chupe vae, Elisabet imembi omi rai jie pe. Jare Elisabet tinee Espíritu Santo pe. ⁴² Jayave Elisabet ñeẽãta reve jei:

—Tumpa nemivendise ete ñru cuña reta güi. Jare umivendiseta nemembi —jei—. ⁴³ Jare yepe tẽi nde co jae cheYa ichirã, ñrei nde ndeyu ndepou chepi. Chepiacañi cua re —jei—. ⁴⁴ Mase, nde nembiipi cheminguetã rupive, chemembi omi rai cherie pe uyerovia ramo —jei Elisabet María pe—. ⁴⁵ Nde nderovia yandeYa uyapota co jae jei ndeve uyapota vae. Jáeramo jae nemivendise ma —jei.

⁴⁶ Jayave María jei:

“Ambiadora yandeYa.

⁴⁷ Ayerovia Tumpa re.

Jae co chembiasã vae.

⁴⁸ Yepe tẽi che cheparavete, ñrei jae cheparareco.

Mase, añave güiye opaete vae jeita Tumpa chemivendise co.

⁴⁹ Echa'ã Tumpa imbaepuere tuicha co.

Jae uyapo icavi vae cheve imbaepuere pe.

Jae co iyoa mbae vae jee vae.

⁵⁰ Jare Tumpa uiparareco opaete uipiu Tumpa vae reta.

⁵¹ Uicuaaca quirã imbaepuere tuicha co.

Opa umiaí uyembicate vae reta.

⁵² Jae uequi imbaepuere mburuvicha reta güi,

jare umbutuichaca ñemimichi vae reta.

⁵³ Umingapã iyembai vae reta tembiu icavi vae pe.

Ñrei umee'ã co mbae icocatu vae reta pe.

⁵⁴ Ombori Israel pegua uyeyocui chupe vae reta.

Echa'ã imandúa quirã jei uipararecota co.

⁵⁵ Echa'ã jucuarã jei yandetenondegua reta pe - jae reta co Abraham jare ñemoñaeta reta.

Echa'ã jei chupe reta uipararecota co jaeño mai pegua” —jei María.

⁵⁶ Jare María upita Elisabet ipi mbapi yasi pegua. Jayave ramo oo ye jenta pe.

Juan oa vae regua

⁵⁷ Jare ara ou uvãe yave Elisabet imembi vaerã, oa imembi cuimbae. ⁵⁸ Jare jerãcua Elisabet jentaigua reta jare jentarã reta pe quirã yandeYa uiparareco Elisabet. Jare jae reta uyerovia Elisabet ndive.

⁵⁹ Jare sambiaí ocho ara ma güinoi yave, jentarã reta yugüeru umicircuncidaca vaerã. Jare jae reta uipota oñoño jese tu jee Zacarías. ⁶⁰ Ñrei sambiaí ichi jei chupe reta:

—Jucuarã'ã co. Yambijeeta co Juan.

⁶¹ Ñrei jae reta jei chupe:

—Mbaeti etei co nerentarã jocua tee güinoi vae.

⁶² Jayave jae reta ñãca omomi Zacarías pe upirandu vaerã chupe mbae nunga tee ra uipota oñoño tai re. ⁶³ Jayave Zacarías uechaca chupe reta jae uipota mbae uicuatã jese

vae. Jayave uicuatía cuarái: “Jee co Juan.” Jare opaete joco pe ñugüinoi vae reta ipiacañi. ⁶⁴ Jayave jupivoi Zacarías ipuere omoë ye iñee. Jare imiari chupe reta umbiadora reve Tumpa. ⁶⁵ Jare opaete Zacarías jentaigua reta ipiacañi cua re. Jare opaete cua uyeyapo vae jerâcua opaete ivitu Judea pegua reta rupi. ⁶⁶ Jare opaete uyandu vae reta ipia pe uyemingueta cua uyeyapo vae re jare jei reta iyupe:
—¿Mbae nunga sambiaí ra co aipo cua? Echa'ã yandeYa imbaepuere oí jae ndive.

Zacarías umimbeu Tumpa iñee

⁶⁷ Jayave Zacarías - jae co Juan tu - tinee Espíritu Santo pe jare umimbeu Tumpa iñee. Echa'ã jae jei:

⁶⁸ “Tuyembiaadoraca yandeYa Tumpa.

Yande co jae Israel pegua reta.

Echa'ã Tumpa ipiacavi yandevera ramo, yanderepi ma.

⁶⁹ Jae ombou yandevera jembicui David iñemoñaá reta pegua yanembiasa vaerã imbaepuere tuicha vae pe.

⁷⁰ Jucuarãí Tumpa jei iyipi güive Tumpa iñee umimbeu vae reta rupi.

Jae reta uñeñoño tee Tumpa peguarã.

⁷¹ Tumpa yanembiasata yanderoaicho reta güi.

Jae yanembiasata opaete ñanemitarãí vae reta güi. ⁷²⁻⁷³ Tumpa uiparareco Abraham jare írú yandetenondegua reta.

Echa'ã Tumpa etei uyemingueta Abraham ndive,

jare añave imandúa ma jocua jei uyapota vae re.

⁷⁴ Jáeramo umeeta yandevera yayeyocui vaerã chupe yaquíye mbae reve.

Echa'ã jae yanderepita yanderoaicho reta güi” —jei Zacarías—.

⁷⁵ “Tumpa ñaneñoño teeta iyupegarã jare yayapota jupi vae,

jare jae icota yande ndive cua ivi pe yaico rambueve.

⁷⁶ Jare írú vae reta uyemingueta nderé yave, jeita:

‘Jae co penti Tumpa iñee umimbeu vae.’

Echa'ã nde, cherai, ndeota yandeYa jenonde ndiyapicatu vaerã japerã.

⁷⁷ Nemimbeuta yandeYa imbae reta pe quirãí Tumpa umbiasata chupe reta imbaeyoa reta jare jucuarãí uyembiasacata.

⁷⁸ Cuarãí Tumpa uyapota, yandeparareco ramo.

Jare ipuruparareco jeco pegua ombouta yanembiasa vaerã, opa ara rupi ombou guarasi yanembori vaerã rami.

⁷⁹ Jae yanemborita guarasi jembipe yanembori rami.

Echa'ã guarasi umee yandevera tembipe agüiye vaerã yaico pítumimbi pe.

Jae yanemborita agüiye vaerã yaquíye mano güi.

Jae yanemborita yaico vaerã yandepiacatu reve” —jei Zacarías.

⁸⁰ Jare sambiaí ucuacuaa, jare uñemiatangãtu Tumpa coti. Jare ico ñana rupi uyecuaa Israel pegua reta pe regua.

2

Jesús oa vae regua

(Mt 1.18-25)

¹ Juan ichi güi oa yave, romano reta juvicha guasu Augusto César jee vae oyocui opaete vae uyepapaca vaerã. ² Jaeramo opaete vae uyepapaca Cirenio ico ivi Siria pegua reta juvicha guasurã yave. ³ Jare opaete vae yugüiraa itenondegua jenta guasu pe uyepapaca vaerã.

⁴ Jare José vi oo Nazaret Galilea pegua güi tenta guasu Belén Judea pegua pe. Echa'ã jae co David iñemoñaá reta pegua, jare David jenta guasu co jae Belén. ⁵ Jáeramo José oo Belén pe uyepapaca vaerã, jare güiraa jembireco María. Jare María ipurúa ma. ⁶ Jare Belén pe ñugüinoi rambueve, ara ou uvãe María imembi oa vaerã. ⁷ Jare María imembiripi cuimbae oa. Jayave María oñoma penti ñomaa pe jare umbiyapacua penti maemimba icaruariru pe. Echa'ã mbaeti co José jare María jendarã tenta pe.

Ángel reta jare ovecha iyandarecoa reta

⁸ Jare jocua pítu amocue ovecha iyandarecoa reta uyandareco ñugüinoi iovecha reta re ñana rupi coíño tenta guasu Belén güi. ⁹ Jare uyecuaa chupe reta penti ángel yandeYa pe uyeyocui vae, jare jembipe jae reta ñugüinoi vae pe. Echa'ã yandeYa imbaepuere uyecuaa chupe reta. Jare jae reta uquíye ete. ¹⁰ Jayave ángel jei chupe reta:

—Agüiye pequíye. Mase, amimbeuta peve ñee icavi vae tuicha rupi piyerovia vaerã. Cua ñee opaete vae peguarã co —jei—. ¹¹ Echa'ã cua pítu oa upurumbiasa vae David jenta

guasu pe. Jae co yandeYa Cristo, Tumpa ombou vae —jei ángel chupe reta—. ¹²Jare cuarãi picuaata: Pevãeta sambiaï uñeñoma oï penti ñomaa pe jare uyapacua oï penti maemimba icaruariru pe —jei.

¹³Jare jupivoi uyecuaa jocua ángel ndive jeta ete ángel reta. Opaete vae umbiadora Tumpa. Echa'ã jei reta:

¹⁴“Tuyembiadoraca Tumpa ara pe oï vae, jare ivi pegua reta Tumpa ipiacavi chupe reta vae tipiacatu” —jei.

¹⁵Jare ángel reta yugüiraa ye yave chugüi reta ara pe, ovecha iyandarecoa reta jei uyupe: —Yaa Belén pe yaecha vaerã cua uyeyapo vae. Echa'ã yandeYa uicuaaca yandeve —jei reta.

¹⁶Jayave javoi pegua yugüiraa joco pe, jare uvãe María jare José jare sambiaï. Jocua sambiaï uyapacua oï maemimba icaruariru pe. ¹⁷Jare uecha ma yave, yugüiraa ye umimbeu ñru vae reta pe ángel jei chupe reta jocua sambiaï re vae. ¹⁸Jare opaete uyandu vae reta ipiacañi ovecha iyandarecoa reta umimbeu chupe reta vae re. ¹⁹Èrei María imandúa opaete cua re jare ipia pe uyemingueta cavi jese. ²⁰Jare ovecha iyandarecoa reta yugüiraa ye Belén güi. Umbiadora reta Tumpa jare umee yasurupai chupe opaete uyandu jare uecha vae re. Echa'ã jae reta uecha ma sambiaï ángel jei chupe reta rami.

Güiraa reta Jesús Tumpa jo pe

²¹Jare sambiaï ocho ara ma güinoi yave, tu jare ichi umicircuncidaca jare umbijee Jesús. Echa'ã ángel umimbeu María pe jucuarãi umbijee vaerã ndei María ipurúa mbove.

²²Jare ara ou uvãe María oo vaerã yandeYa jo pe uyeyoeca vaerã yandeYa coti. Echa'ã jucuarãi uyecuatía oï Moisés iporoyocui pe cuña imembi vae uyapo vaerã. Jayave tu jare ichi güiraa Jesús tenta guasu Jerusalén pe yandeYa jo pe oñonoca tee vaerã Tumpa peguarã.

²³Echa'ã yandeYa iporoyocui pe uyecuatía oï cuarãi: “Cuña imembiripi cuimbae oa yave, sambiaï uñeñoño teeta yandeYa peguarã.” Jucuarãi uyecuatía oï. ²⁴Jáeramo Jesús tu jare ichi uyucaca umee vaerã yandeYa pe mocui güira tórtola jee vae ani mocui picasu tairusu vae. Echa'ã jucuarãi jei uyapo vaerã mboroyocui yandeYa umee chupe reta vae pe.

²⁵Jare jocua ara penti cuimbae Jerusalén pegua Simeón jee vae oï Tumpa jo pe. Simeón jecuaeño uyapo jupi vae jare umbiadora Tumpa. Jae uãro oï omborita Israel pegua reta vae ou vaerã. Jare jae tinee Espiritu Santo pe. ²⁶Jare Espiritu Santo uicuaaca ma Simeón pe quirãi ndarau umano ndei uecha Cristo yandeYa ombouta vae mbove. ²⁷Jare jocua ara Espiritu Santo uicuaaca ma Simeón pe oo vaerã uique Tumpa jo pe. Jare Jesús tu jare ichi güiraa Jesús uruique Tumpa jo pe uyapo vaerã mboroyocui jei vae rupi. ²⁸Jayave Simeón ovoï Jesús jare umbiadora Tumpa. Jae jei:

²⁹“CheYa, jecuaeño ayeyocui ndeve. Añave ndepuere nemaño cheré amano vaerã chepiacatu reve.

Echa'ã cuarãi nde ndere cheve uyeyapota co.

³⁰Aecha ma upurumbiasa vae nde nembou vae.

³¹Nde ndiparavo opaete vae peguarã.

³²Jae co penti tembipe rami.

Ime tembipe yave, yaecha cavi mbaembae.

Jae ramiño vi jae ndecuaaca cavita judío mbae vae reta pe.

Jare Israel pegua reta uyepiucata jae jeco pegua.

Echa'ã Israel pegua reta nembae reta co” —jei Simeón.

³³Jare José jare Jesús ichi ipiacañi Simeón jei Jesús re vae re. ³⁴Jare Simeón jei Tumpa tumivendise José jare María. Jayave jei María pe:

—Mase, Tumpa uiparavo ma cua nemembi. Jae uicuaacata Israel pegua reta pe quía co jae. Èrei jeta Israel pegua reta güirãrota jare jeta vae güiroviata jese —jei—. ³⁵Echa'ã uyecuaata opaete vae ipia pe oï vae. Jare nde etei ndepiatiti eteta jese —jei Simeón María pe.

³⁶Jare ico vi penti cuña Ana jee vae. Jae co Fanuel tayi. Jocua Fanuel co jae penti ati Aser jee vae pegua. Ana co jae Tumpa ñfee umimbeu vae. Ucuacuaa ete ma. Jaeño siete año ico ime ndive. ³⁷Echa'ã jayave ime umano chugüi. Ana güinoi ma ochenta y cuatro año. Jecuaeño ico Tumpa jo pe jare uyeyocui Tumpa pe. Echa'ã uyecuaacu tembiu güi jare uyerure Tumpa pe ara rupi jare pïtu rupi. ³⁸Jae ou uvãe José jare María jare Jesús ñugüinoi vae pe. Jayave jae vi umee yasurupai yandeYa pe, jare imiari Jesús re opaete Jerusalén pegua uãro ñugüinoi Cristo ou uepi vaerã vae reta pe.

Yugüiraa ye Nazaret pe

³⁹Jare José jare María uyapo yandeYa jo pe opaete yandeYa iporoyocui jei uyapo vaerã vae. Jayave yugüiraa ye Galilea pe jae jenta guasu Nazaret pe. ⁴⁰Jare sambiaï ucuacuaa jare jatangãtu. Iyaracuaa catu vi. Jare Tumpa ipiacavi oï jae ndive.

Jesús Tumpa jo pe

⁴¹ Jare opa año Jesús tu jare ichi yugüiraa Jerusalén pe pascua ara pe. ⁴² Jare Jesús doce año ma güinoi yave, oo jae reta rupi pascua peguarã, jae reta jecoño mai uyapo vae rami. ⁴³ Jare uasa ma yave pascua, Jesús tu jare ichi oẽ Jerusalén güi yugüeru ye vaerã jenta pe. Ërei Jesús upita Jerusalén pe tu jare ichi uicuaa mbae reve. ⁴⁴ Echa'ã jae reta jei tẽi Jesús ou co oĩ uguataĩru reta rupi. Ërei caaru ma yave, ueca reta tẽi jentarã reta jare ĩru uicuaa vae reta ñugüinoi vae rupi. ⁴⁵ Ërei uvãe'ã chupe. Jayave Jesús tu jare ichi yugüiraa ye Jerusalén pe ueca vaerã. ⁴⁶ Jare mbapi ara ma uasa yave, uvãe reta chupe Tumpa jo pe. Jesús uguapĩ oĩ mboroyocui re oporombœ vae reta ipite pe. Uyapisaca oĩ jese reta jare upirandu chupe reta mbaembœ re. ⁴⁷ Jare opaete vae ipiacañi. Echa'ã Jesús uicuaa cavi opaete iporombœ jare ipuere umimbeu cavi chupe reta jae reta upirandu chupe mbae re yave. ⁴⁸ Jare Jesús tu jare ichi uecha yave, jae reta vi ipiacañi. Jayave ichi jei Jesús pe:

—Chemembi, ¿maera pa ndiyapo cuarãĩ oreve? Mase, nderu jare che ndueca tẽi opaete que rupi orepiatiti reve —jei.

⁴⁹ Jayave Jesús jei chupe reta:

—¿Maera pa chereca opaete que rupi? Icavi co apita vaerã cua pe ayapo vaerã cheRu iparaviqui. ¿Picuaa'ã pa cua? —jei chupe reta.

⁵⁰ Ërei jae reta uicuaa'ã mbae uipota jei jocua Jesús jei chupe reta vae. ⁵¹ Jayave Jesús ou ye Nazaret pe jae reta rupi, jare jecuaeño uyapo jae reta jei vae. Jare Jesús ichi imandũa opaete uyeyapo vae re. ⁵² Jare Jesús jecuaeño ucuacuaa oo oĩ. Jare iyaracuaa catu. Jecuaeño umbiyerovia Tumpa jare ĩru vae reta vi.

3*Juan upurumbibautiza vae umimbeu Tumpa iñee*

(Mt 3.1-12; Mr 1.1-8; Jn 1.19-28)

¹⁻² Jare Tiberio César quince año ma

romano reta juvicha guasurã ico yave, Tumpa ombou iñee Juan pe. Juan co jae Zacarías tai, jare ico ñana pe. Jocua ara reta pe Poncio Pilato ico Judea pegua reta juvicha guasurã, jare Herodes ico Galilea pegua reta juvicha guasurã, jare Herodes tivĩ Felipe jee vae ico ivi Iturea pegua reta jare ivi Traconite pegua reta juvicha guasurã, jare Lisaniã ico ivi Abilinia pegua reta juvicha guasurã. Jare Anãs jare Caifãs yugüireco Israel pegua reta isacerdote tenondegua retarã. ³ Jayave Juan uguata ico opaete iãca Jordán iyipĩ rupi. Jare umimbeu opaete vae pe ueya vaerã iyemingueta icavi mbae vae ipia pe oĩ vae jare uyembibautizaca vaerã, Tumpa umbiasa vaerã chupe reta imbaeyoa reta. ⁴ Isaías co jae penti Tumpa iñee araca umimbeu vae. Jae uicuatia cuarãĩ:

“Jae iñeeãta reve jeita ñana rupi:

‘Piyapicatu yandeYa japerã.

Pemisimi tape’ —jeita—.

⁵ ‘Opaete jugua reta uñemitineeta ivi pe.

Jare opaete ivitu reta uyeyapota ñuu rami.

Jare tape ipãri vae reta uñemisimicata.

Jare tape quipe quipe vae reta ipecavita.

⁶ Jare opaete vae uicuaata quirãĩ Tumpa ipuere upurumbiasa.’ ”

Jucuarãĩ uicuatia Isaías.

⁷ Jare jeta vae yugüeru Juan oĩ vae pe uyembibautizaca vaerã. Jayave Juan jei chupe reta:

—Pe reta co jae mboi reta rami. ¿Quía pa umimbeu peve piyero vaerã Tumpa coti agüiye vaerã Tumpa uiporaraca peve? —jei—. ⁸ Piyapo icavi vae, jucuarãĩ picuaaca vaerã añetete peeya co piyemingueta icavi mbae vae pepia pe oĩ vae. Agüiye pere piyupe pepia pe: ‘Yandetenondegua co jae Abraham.’ Echa'ã che jae peve cua: Tumpa ipuere uyapo cua ita reta güi Abraham iñemoñaã retarã —jei Juan chupe reta—. ⁹ Yamijaanga penti temiti. Temiti ía icavi'ã yave, iya uyasia japo reve jare uapĩ. Jae ramiño vi piyapo'ã yave icavi vae, Tumpa uiporaracata peve —jei.

¹⁰ Jayave joco pe ñugüinoi vae reta upirandu Juan pe:

—¿Mbae pa nduyapota?

¹¹ Jayave Juan jei chupe reta:

—Ime yave quía mocui temimonde güinoi vae, tumee penti mbaeti temimonde güinoi vae pe. Jare ime yave quía jeta tembiu güinoi vae, tumee mbaeti tembiu güinoi vae pe —jei.

¹² Yugüeru vi Juan oĩ vae pe mburuvicha peguarã ocovara vae reta uyembibautizaca vaerã. Jae reta upirandu Juan pe:

—Oporombœ vae, ¿mbae pa nduyapota?

¹³ Jayave Juan jei chupe reta:

—Agüiye ma pemiãsa pecovara mburuvicha reta peocui vae güi.

¹⁴ Sundaro reta vi upirandu Juan pe:

—¿Mbae pa nduyapota?

Jayave Juan jei chupe reta:

—Agüiye pemumburu ñru vae reta jare agüiye peapu ñru vae reta re. Jare agüiye jecuaeño pipota jeta peruvicha reta umbiepi peve vae güi.

¹⁵ Opaete vae uãro ñugüinoi Cristo ou vaerã, jare ipia pe uyemingueta quirãï aramoi Juan co jae Cristo. ¹⁶ Jáeramo Juan jei chupe reta:

—Che pumbibautiza i pe. Ërei outa ipuere ete chegüi vae. Jupiã co che ayora vaerã ipipasa ichã. Jae pumbibautizata Espiritu Santo pe jare tata pe —jei—. ¹⁷ Jae co trigo uipoo vae rami. Echa'ã trigo uipoo vae umbiveve trigo uequi vaerã iti. Jayave uñuvatu trigo jiru pe. Ërei uapi iti tata pe. Tata Cristo uiporuta vae opa mbae vae co —jei.

¹⁸ Jare Juan jeta jei chupe reta umimbeu vaerã chupe reta ñee icavi vae. ¹⁹ Jare mburuvicha guasu Herodes umenda tiví Felipe jembireco Herodías jee vae ndive jare uyapo jeta mbae icavi mbae vae. Jare Juan ñeengueta Herodes pe opaete icavi mbae vae uyapo vae re. ²⁰ Jayave Herodes uyapo ye icavi mbae vae. Echa'ã oñonoca Juan peresoriru pe.

Juan umbibautiza Jesús

(Mt 3.13-17; Mr 1.9-11)

²¹ Ërei ndei Juan uñeñonoca peresoriru pe mbove, penti ara Jesús ou Juan oï vae pe. Jare Juan ñru vae reta umbibautiza yave, umbibautiza vi Jesús. Jare Jesús uyerure Tumpa pe rambueve, ara uyepea. ²² Jare uyecuaa Espiritu Santo ugüeyi Jesús re picasu rami. Jayave uyendu ñee ara güi jei:

—Nde co jae cheRaï nduau ete vae. Chembiyerovia ete —jei.

Jesús itenondegua reta

(Mt 1.1-17)

²³ Jare Jesús güinoi ma treinta año rupi. Ñru vae reta ipia pe uyemingueta tēi jae co José tai ete. José co jae Elí tai. ²⁴ Elí co jae Matat tai. Matat co jae Leví tai. Leví co jae Melqui tai. Melqui co jae Jana tai. Jana co jae José tai. ²⁵ José co jae Matatías tai. Matatías co jae Amós tai. Amós co jae Nahum tai. Nahum co jae Esli tai. Esli co jae Nagai tai. ²⁶ Nagai co jae Maat tai. Maat co jae Matatías tai. Matatías co jae Semei tai. Semei co jae José tai. José co jae Judá tai. ²⁷ Judá co jae Joana tai. Joana co jae Resa tai. Resa co jae Zorobabel tai. Zorobabel co jae Salatiel tai. Salatiel co jae Neri tai. ²⁸ Neri co jae Melqui tai. Melqui co jae Adi tai. Adi co jae Cosam tai. Cosam co jae Elmodam tai. Elmodam co jae Er tai. ²⁹ Er co jae Josué tai. Josué co jae Eliezer tai. Eliezer co jae Jorim tai. Jorim co jae Matat tai. ³⁰ Matat co jae Leví tai. Leví co jae Simeón tai. Simeón co jae Judá tai. Judá co jae José tai. José co jae Jonán tai. Jonán co jae Eliaquim tai. ³¹ Eliaquim co jae Melea tai. Melea co jae Mainán tai. Mainán co jae Matata tai. Matata co jae Natán tai. ³² Natán co jae David tai. David co jae Isai tai. Isai co jae Obed tai. Obed co jae Booz tai. Booz co jae Salmón tai. Salmón co jae Naasón tai. ³³ Naasón co jae Aminadab tai. Aminadab co jae Aram tai. Aram co jae Esrom tai. Esrom co jae Fares tai. Fares co jae Judá tai. ³⁴ Judá co jae Jacob tai. Jacob co jae Isaac tai. Isaac co jae Abraham tai. Abraham co jae Taré tai. Taré co jae Nacor tai. ³⁵ Nacor co jae Serug tai. Serug co jae Ragau tai. Ragau co jae Peleg tai. Peleg co jae Heber tai. Heber co jae Sala tai. ³⁶ Sala co jae Cainán tai. Cainán co jae Arfaxad tai. Arfaxad co jae Sem tai. Sem co jae Noé tai. Noé co jae Lamec tai. ³⁷ Lamec co jae Matusalén tai. Matusalén co jae Enoc tai. Enoc co jae Jared tai. Jared co jae Mahalaleel tai. Mahalaleel co jae Cainán tai. ³⁸ Cainán co jae Enós tai. Enós co jae Set tai. Set co jae Adán tai. Adán co jae Tumpa tai.

4

Aña guasu umingueta Jesús uyavica vaerã tēi chupe

(Mt 4.1-11; Mr 1.12-13)

¹ Jare Jesús ou ye Jordán güi. Jae tinee Espiritu Santo pe. Jayave Espiritu Santo güiraa Jesús ñana pe. ² Jare Jesús upita ñana pe cuarenta ara, jare aña guasu umingueta uyavica vaerã tēi chupe. Jare jocua ara reta pe Jesús jou'ã mbae ave. Jáeramo jocua ara reta opa ma yave, iyembai. ³ Jayave aña guasu jei Jesús pe:

—Nde co jae Tumpa Tai yave, ere cua ita pe uyeyapo vaerã mbiyaperã.

⁴ Ërei Jesús jei chupe:

—Tumpa ñee pe uyecuatía oï cuarãï: 'Icavi co ivi pegua reta jou vaerã mbiyape güinoi vaerã tecove. Ërei icavi ete co uyapisaca vaerã Tumpa ñee re jare uyapo vaerã jei vae güinoi vaerã tecove opa mbae vae.' Jucuarãï uyecuatía oï —jei.

⁵ Jayave aña guasu güiraa Jesús penti ivitu guasu ivate vae re jare uechaca chupe penti jeia pe opaete mburuvicha guasu reta iporoyocua ivi pe ñugüinoi vae reta. ⁶ Jayave aña guasu jei Jesús pe:

—Tamee ndeve mbaepuere ndiyeyapo vaerã opaete cua juvicha guasurã, opaete vae nemiadora vaerã. Echa'ã cua mbaepuere ñemee co cheve jare chepuere amee aipota amee chupe vae pe —jei—. ⁷ Nde ndiyeyata yave chembiadora vaerã, tamee ndeve nembraerã —jei.

⁸ Jayave Jesús jei chupe:

—Esiri chegüi, Satanás. Echa'ã Tumpa ñnee pe uyecuatía oĩ cuarãi: 'Che co jae ndeYa Tumpa. Chembiadora. Jaeño cheve iyeyocui.' Jucuarãi uyecuatía oĩ —jei.

⁹ Jayave aña guasu güiraa Jesús Jerusalén pe jare umbuyupi Tumpa jo iyapite re. Jayave jei chupe:

—Nde co jae Tumpa Tai yave, ea cua güi. ¹⁰ Echa'ã Tumpa ñnee pe uyecuatía oĩ cuarãi: 'Tumpa oyocuita ángel reta uyandareco vaerã nderé.

¹¹ Ipo pe ndepisi ndeocota reta, agüiye vaerã ndepi uyererocua ita re.' Jucuarãi uyecuatía oĩ —jei aña guasu chupe.

¹² Jayave Jesús jei chupe:

—Tumpa ñnee pe uyecuatía oĩ cuarãi: 'Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.' Jucuarãi uyecuatía oĩ —jei.

¹³ Jare aña guasu opa ma umingueta yave uyavica vaerã tẽi chupe, usiri chugüi michi pegua.

Jesús umbipi iparaviqui

(Mt 4.12-17; Mr 1.14-15)

¹⁴ Jayave Jesús ou ye Galilea pe. Jare güinoi mbaepuere Espiritu Santo umee chupe vae. Jare jerãcua jese opaete jocua ivi rupi. ¹⁵ Jare jae oporombocue judío reta itupao reta pe jare opaete vae umbiadora.

Jesús Nazaret pe

(Mt 13.53-58; Mr 6.1-6)

¹⁶ Jayave ou ye Nazaret pe - joco pe jae ucuacuaa. Jayave mbutuu ara pe uique judío reta itupao pe uyapoñoi rami, jare uyemboi Tumpa ñnee umingueta vaerã. ¹⁷ Jare ñemee Jesús pe penti libro. Jocua libro pe oĩ Tumpa ñnee aracae umimbeu vae Isaías uicuatía vae. Jayave Jesús uipea libro jare uvãe umingueta vaerã. Jayave umingueta cuarãi:

¹⁸ "YandeYa iEspiritu ime che ndive oĩ.

Jae cheparavo amimbeu vaerã ñee icavi vae iparavete vae reta pe.

Jae chembou ambipiacatu vaerã ipiatiti vae reta.

Chembou vi amimbeu vaerã pereso reta pe ipuere ma ueyeyora,

jare amimbeu vaerã jesa mbae vae reta pe umae vaerã.

Chembou vi ayora vaerã uiporara vae reta uiporaraca chupe vae reta imbaepuere güi.

¹⁹ Chembou vi amimbeu vaerã yandeYa ipiacavita opaete vae pe."

Jucuarãi umingueta. ²⁰ Jayave Jesús uyuquenda ye libro jare umee ye libro iyandarecoa pe. Jayave uguapi ye. Jare opaete tupao pe ñugüinoi vae reta umae ngatu Jesús re. ²¹ Jayave Jesús jei chupe reta:

—Cua ara cua uyecuatía oĩ vae uyeyapo ma perovaque.

²² Jare opaete joco pe ñugüinoi vae reta uyemingueta cavi jese. Echa'ã ipiacañi ñnee icavi ete vae re. Jae reta jei:

—¿Jae'ã yera cua José tai?

²³ Jayave Jesús jei chupe reta:

—Pereta co cheve jocua yamijaanga reve yae vae: 'Nde co jae penti upurupiano vae. Jáeramo ñnepiano. Echa'ã jerãcua oreve quirãi mbaembae ndiyapo Capernaum pe. Jáeramo iyapo vi cua pe ndeivi pe' —pereta, jei—. ²⁴ Añete che jae peve, ime yave quía Tumpa ñnee umimbeu jentaigua reta pe vae, jare reta güirovia'ã —jei—. ²⁵ Añete che jae peve, jeta cuña ime umano vae reta yugüireco Israel pe Elías ico rambueve. Mbapi año jare seis yasi oqui'ã jare caruai opaete que rupi —jei—. ²⁶ Ërei Tumpa omondo'ã Elías penti cuña ime umano vae Israel pegua pe. Jaeño omondo penti cuña ime umano vae tenta guasu Sarepta Sidón pegua vae pe —jei Jesús chupe reta—. ²⁷ Jae ramiño vi jeta ipire ocui vae reta yugüireco Israel pe Tumpa ñnee aracae umimbeu vae Eliseo ico rambueve. Ërei Tumpa omondo'ã Eliseo umbigüera vaerã penti ipire ocui vae Israel pegua. Jaeño omondo umbigüera vaerã Naamán, jare Naamán co jae Siria pegua —jei.

²⁸ Cua uyandu reta yave, opaete tupao pe ñugüinoi vae reta pochí ete Jesús pe. ²⁹ Jayave jae reta upúa jare güiraa Jesús tenta guasu güi ivitu iyapite re omombo vaerã tẽi ivi coti joco

güi. Jocuá tenta guasu oĩ ivitú guasu re. ³⁰ Ërei Jesús uasa jae reta ipite rupi jare oo chugüi reta.

Cuimbae aña oya jese vae
(Mr 1.21-28)

³¹ Jayave Jesús oo tenta guasu Capernaum Galilea pegua pe. Joco pe Jesús oporomboe opaete mbutuu ara pe. ³² Jare uyapisaca jese vae reta ipiacañi iporomboe re. Echa'ã omboe reta mbaepuere güinoi vae rami. ³³ Jare uique oo tupao pe cuimbae aña oya jese vae. Jae iñeeãta reve jei:

³⁴ —¿Maera pa ndeyu oremambeco, Jesús Nazaret pegua? ¿Ndeyu pa oremicañitei vaerã? Che nducuaa. Nde co jae Tumpa Tai —jei.

³⁵ Jayave Jesús uñeengata chupe.
—¡Nequĩ! ¡Esiri chugüi! —jei.

Jayave opaete vae jovaque aña uiti ivi re cuimbae jare usiri chugüi. Ueya caviño. ³⁶ Jare opaete uecha vae reta ipiacañi, jare upirandu uyupe:

—¿Mbae nunga ñee pa cua? Echa'ã mbaepuere pe oyocui aña reta usiri vaerã oya jese vae reta güi, jare jae reta uyapo oyocui vae —jei reta.

³⁷ Jare jerãcua jesegua opaete jocua ivi rupi.

Jesús umbigüera Simón jaicho
(Mt 8.14-15; Mr 1.29-31)

³⁸ Jare Jesús tupao güi oẽ ye yave, uique Simón jenta pe. Jare Simón jaicho tanta jacu oĩ. Ìru joco pe ñugüinoi vae reta uyerure Jesús pe umbigüera vaerã. ³⁹ Jayave Jesús oo cuña oĩ vae pe, jare jei jacu upita vaerã chugüi. Jayave jacu upita chugüi. Jayave jupivoiño cuña upüa jare umee mbae jou reta vaerã.

Jesús umbigüera imbaerasi vae reta
(Mt 8.16-17; Mr 1.32-34)

⁴⁰ Jare guarasi uique ma yave, opaete jentarã imbaerasi vae güinoi vae reta güeru imbaerasi vae reta Jesús oĩ vae pe. Jare Jesús oñono ipo penti penti re jare umbigüera reta.

⁴¹ Jare aña reta usiri oya jese vae reta güi. Usapicai reta jare jei:

—Nde co jae Tumpa Tai.

Ërei Jesús uñeengata chupe reta. Umaeño'ã aña reta re uyemingueta vaerã. Echa'ã jae reta uicuaa jae co Cristo, Tumpa ombou vae.

Jesús oo Galilea rupi umimbeu Tumpa iñee
(Mr 1.35-39)

⁴² Piareve pe Jesús oẽ tenta guasu güi oo quĩ ngatu vae pe. Jayave tenta guasu pegua reta yugüiraa ueca. Jare yugüiraa uvãe yave jae oĩ vae pe, uyerure tẽi chupe agüiye vaerã oo chugüi reta. ⁴³ Ërei Jesús jei chupe reta:

—Icavi co aa vaerã Ìru tenta guasu-rai reta pe amimbeu vaerã joco pe vi ñee icavi vae Tumpa iporoyocuaia regua. Echa'ã cuarã Tumpa chembou —jei.

⁴⁴ Jare oo opaete ivi Galilea rupi, jare umimbeu Tumpa iñee judío reta itupaopao rupi.

5

Uipisi reta jeta ete pira
(Mt 4.18-22; Mr 1.16-20)

¹ Jare penti ara Jesús uyemboi rambueve i guasu Genesaret jee vae jembei pe, jeta vae yugüeru jae oĩ vae pe uyapisaca vaerã Tumpa iñee re. ² Jare Jesús uecha mocui chalana i jembei pe. Iya reta pira uipisi vae reta co. Cua iya reta ueya joco pe, pisa reta oyoe rambueve. ³ Jayave Jesús uyupi penti chalana pe, jare uyerure Simón pe uruigue vaerã chalana i pe. Echa'ã Simón imbae co jocua chalana. Jayave Jesús uguapi chalana pe jare joco güi omboe joco pe ñugüinoi vae reta.

⁴ Jare opa ma uyemingueta yave, Jesús jei Simón pe:

—Ecuá i tipí vae pe pemombo pepisa reta pipisi vaerã pira.

⁵ Jayave Simón jei Jesús pe:

—CheYa, orecõe ma nduparaviqui tẽi. Nduipisi'ã mbae ave. Ërei tamombo pisa reta nde ndere cheve ramo —jei.

⁶ Jare jucuarãi uyapo reta ma yave, jeta ete pira reta uique pisa pe. Jare pisa uyembipi osoro. ⁷ Jayave uyepueru reta Ìru Ìru chalana pe ñugüinoi vae reta pe yugüeru vaerã ombori. Jayave jae reta yugüeru jare umitinee reta mocui reve chalana. Jare mocui reve poi ete jare usacambu pota echa. ⁸ Jare Simón Pedro cua uecha yave, uyeatica Jesús jovai jare jei chupe:

—Esiri chegüi, cheYa. Echa'ã che co jae penti cuimbae iyoa vae —jei.

⁹ Echa'ã Pedro jare opaete jae ndive ñugüinoi vae reta ipiacañi jeta ete pira uipisi vae re. ¹⁰ Jae ramiño vi Simón iiru reta Jacobo jare Juan jee vae ipiacañi jese. Jacobo jare Juan Zebedeo tai reta co. Jayave Jesús jei Simón pe:

—Agüiye equiye. Che nduyapota iiru vae reta nderu vaerã cheve cua ara güive —jei.

¹¹ Jayave jae reta güeru ichalana reta i jembei pe. Jayave ueya reta opaete, yugüiraa vaerã Jesús jupie.

Jesús umbigüera cuimbae ipire ocui vae

(Mt 8.1-4; Mr 1.40-45)

¹² Jare Jesús oo uvãe yave penti tenta guasu pe, joco pe oĩ penti cuimbae ipire ocui vae. Cuimbae uecha Jesús yave, uyeatica jae jovai jare uyerure chupe.

—CheYa —jei—, ndipota yave, ndepuere chembigüera.

¹³ Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui'ã ma ipire. ¹⁴ Jayave Jesús oyocui:

—Agüiye emimbeu quía pe. Ecuá iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei.

¹⁵ Ërei jeta vae uyandu Jesús uyapo vae regua. Jayave jeta vae uyembati jae oĩ vae pe uyapisaca vaerã jese jare jae umbigüera vaerã imbaerasi vae reta. ¹⁶ Ërei Jesús oo chugüi reta ñuu coti uyerure vaerã Tumpa pe.

Jesús umbigüera cuimbae ipuere mbae omi vae

(Mt 9.1-8; Mr 2.1-12)

¹⁷ Jare penti ara Jesús oporombocue oĩ, jare amocue fariseo reta jare mboroyocui re oporombocue vae reta uguapi ñugüinoi jocoropi. Jae reta yugüeru Jerusalén jare opaete tenta guasu Galilea jare Judea pegua reta güi. Jare Jesús güinoi Tumpa imbaepuere umbigüera vaerã imbaerasi vae reta. ¹⁸ Jayave amocue yugüeru vae reta güeru penti cuimbae imbaerasi vae jupa reve. Cua cuimbae ipuere mbae omi vae. Güeru vae reta uipota tēi uruique imbaerasi vae o pe, oñono vaerã Jesús jovai. ¹⁹ Ërei ipuere'ã uruique Jesús oĩ vae pe, uyembiape'ã ye ñugüinoi reta ramo. Jáeramo uruyupi o iárambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve opaete vae ipite pe Jesús jovai. ²⁰ Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Nembaeyoa reta uyembai ma, cherivi.

²¹ Jayave mboroyocui re oporombocue vae reta jare fariseo reta ipia pe uyemingueta: “¿Quía pa co jae cuarãi jei vaerã? Jei icavi mbae vae Tumpa coti. Tumpaño co ipuere umbiasa quía pe imbaeyoa reta.” ²² Ërei Jesús uicuaa jae reta ipiyemingueta, jare jei chupe reta:

—¿Maera pa pepia pe piyemingueta jucuarãi? ²³ Chepuere jae cua cuimbae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epña eguata.’ ¿Mbae nunga pa yavai jae vaerã? —jei Jesús chupe reta—. ²⁴ Ërei aipota picuaa vaerã cua: Che cuimbaerã ayeyapo vae chepuere ambiasa quía pe imbaeyoa reta cua ivi pe ai rambueve —jei.

Jayave jei cuimbae ipuere mbae omi vae pe:

—Che jae ndeve: Epña evoi nderupa, jare ecua nerenta pe —jei.

²⁵ Jayave jupivoi cuimbae upña, jare ovoi jupa, jare oẽ oo jenta coti opaete joco pe ñugüinoi vae reta jovaque. Jare oo rambueve, umbiadora Tumpa. ²⁶ Jae ramiño vi opaete joco pe ñugüinoi vae reta umbiadora Tumpa. Echa'ã opareve ipiacañi jare uquiye. Jei reta:

—Cua añave yaecha vae ñanemipiacañi.

Jesús ueni Leví

(Mt 9.9-13; Mr 2.13-17)

²⁷ Jayave Jesús oẽ jare uecha mburuvicha peguarã ocovara vae Leví jee vae uguapi oĩ mburuvicha peguarã ocovara ñugüinoi vae pe, jare jei chupe:

—Eyu cherupie.

²⁸ Jayave Leví upña, jare oo jae jupie. Ueya opaete imbaembae joco pe.

²⁹ Jare Leví uyapo pareá guasu jae jenta pe Jesús peguarã. Jare joco pe jeta mburuvicha peguarã ocovara vae reta jare iiru vae reta ucaru vi ñugüinoi Jesús jare iiru reta ndive. ³⁰ Ërei mboroyocui re oporombocue vae reta jare fariseo reta ifeenguru Jesús jemimboe reta pe. Jei reta:

—¿Maera pa pecaru mburuvicha peguarã ocovara vae reta jare teco icavi mbae vae uyapo vae reta ndive?

³¹ Jayave Jesús jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. ³² Che ayu aeca vaerã iyoa vae reta ueya vaerã iyemingueta icavi mbae vae ipia pe oĩ vae. Ayu'ã aeca vaerã jupi vae reta —jei.

Maera Jesús jemimboe reta uyecuacu'ã tembiu güi
(Mt 9.14-17; Mr 2.18-22)

³³ Jare amocue vae yugüeru Jesús oĩ vae pe jare jei chupe:
—Juan jemimboe reta jeta vese uyecuacu tembiu güi uyerure reve Tumpa pe. Jae ramiño vi uyapo jucuarã fariseo reta jemimboe reta. Ërei nderemimboe reta ucaruñoi —jei reta.

³⁴ Jayave Jesús jei chupe reta:
—Umendata vae pe ñugüinoi vae reta ndarau etei uyecuacu tembiu güi, umendata vae jae reta ndive oĩ rambueve —jei—. ³⁵ Ërei outa uvãe ara umendata vae uyereraaca vaerã chugüi reta. Jayave ramo uyecuacu tembiu güi —jei.

³⁶ Jayave imiari chupe reta umijaanga reve.
—Icavi'ã yamboya vaerã temimonde indechi vae maemboyaa ipiau vae pe. Echa'ã jucuarã yayapo yave, maemboyaa ipiau vae umiãta temimonde indechi vae, jare temimonde jeiete osoro —jei—. ³⁷ Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarã yayapo yave, vino ipiau vae omondoro jiru, jare vino uyepiyere, jare jiru icavi'ã ma —jei—. ³⁸ Jáeramo yambiru vino ipiau vae jiru ipiau vae pe —jei—. ³⁹ Jare ime yave quía vino indechi vae jou vae, uipota'ã jupivoi jou vino ipiau vae. Echa'ã jae jei vino indechi vae icavi ete vino ipiau vae güi —jei.

6

Jesús jemimboe reta uipoo trigo mbutuu ara pe
(Mt 12.1-8; Mr 2.23-28)

¹ Mbutuu ara pe Jesús oo co rupi jemimboe reta ndive. Jare jemimboe reta uipoo trigo. Jayave uipoquiti uequi vaerã ipire, trigo jou vaerã. ² Jare amocue fariseo reta jei chupe reta:

—¿Maera pa piyapo piyapota'ã tẽi mbutuu ara pe vae?
³ Jayave Jesús jei fariseo reta pe:
—¿Pemingueta'ã pa David uyapocue vae regua, jae jare jae ndive ñugüinoi vae reta iyembai yave? —jei—. ⁴ David uique Tumpa jo pe jare jou mbiyape Tumpa jo pe uñeño tee vae reta, jare umee vi jae ndive ñugüinoi vae reta pe. Agüiyeta tẽi co quía jou jocua mbiyape, jaeño sacerdote reta —jei.

⁵ Jayave Jesús jei chupe reta:
—Che cuimbaerã ayeyapo vae chepuere jae mbae icavi uyeyapo vaerã mbutuu ara pe.

Cuimbae ipo jovaicho tipa vae
(Mt 12.9-14; Mr 3.1-6)

⁶ Jare ñru mbutuu ara pe Jesús uique judío reta itupao pe jare oporombocue. Jare joco pe oĩ penti cuimbae ipo iyacata tipa vae. ⁷ Jare mboroyocui re oporombocue vae reta jare fariseo reta umae ngatu Jesús re, uecha vaerã umbigüerata ra quía mbutuu ara pe. Echa'ã uipota tẽi umbijeco vaerã. ⁸ Ërei Jesús uicuaa jae reta ipiyemingueta, jare jei cuimbae ipo jovaicho tipa vae pe:

—Epüa eyu iyemboi cua reta jovai.
Jayave cuimbae upüa uyemboi joco pe ñugüinoi vae reta ipite pe. ⁹ Jayave Jesús jei chupe reta:

—Tapirandu peve cua: ¿Mbae pa jei mboroyocui? ¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerã mbutuu ara pe? —jei.

¹⁰ Jayave umae opaete iyipi rupi ñugüinoi vae reta re, jare jei cuimbae pe:
—Eupi ndepo.

Jayave cuimbae ipo uupi, jare ucuera voi.
¹¹ Jayave mboroyocui re oporombocue vae reta jare fariseo reta pochi ete Jesús pe jare uyemboemboe mbae ra uyapota Jesús pe.

Jesús uiparavo doce jemimondo retarã
(Mt 10.1-4; Mr 3.13-19)

¹² Jayave penti pütu Jesús oo ivitu guasu re uyerure vaerã Tumpa pe, jare icõe joco pe uyerure Tumpa pe. ¹³ Jare cõe ma yave, ueni jemimboe reta. Jayave uiparavo doce umbijee temimondo reta vae: ¹⁴ Simón (Jesús umbijee Pedro), jare Simón tiví Andrés jee vae, jare Jacobo jare Juan, jare Felipe, Bartolomé, ¹⁵ Mateo, Tomás, Alfeo tai Jacobo jee vae, Simón (jae co Zelote pe ueni vae), ¹⁶ Jacobo tiví Judas jee vae, jare Judas Iscariote (cua cuimbae umee Jesús jovaicho reta pe).

Jesús omboe jeta vae
(Mt 4.23-25)

¹⁷ Jayave Jesús ugüeyi ye ivitu guasu güi ñuu pe jae reta ndive. Jare joco pe ñugüinoi jeta Jesús jemimboe reta jare jeta Judea pegua reta jare Jerusalén pegua reta jare tenta guasu Tiro jare Sidón iyipi rupigua reta. Tiro jare Sidón coiño co ñugüinoi i guasu güi. Opaete vae yugüeru uyapisaca vaerã Jesús re, jare Jesús umbigüera vaerã imbaerasi vae reta. ¹⁸ Jesús umbigüera vi aña oya jese vae reta. ¹⁹ Jare opaete vae uipota uyaviqui Jesús. Echa'ã jae güinoi mbaepuere umbigüera vaerã opaete imbaerasi vae reta.

Uyerovia vae reta
(Mt 5.1-12)

²⁰ Jayave Jesús umae jemimboe reta re jare jei:
—Tuyerovia iparavete vae reta. Echa'ã Tumpa umeeta chupe reta yugüireco vaerã iporoyocua pe —jei—. ²¹ Tuyerovia añave iyembai vae reta. Echa'ã Tumpa jeta umeeta chupe reta. Tuyerovia añave uyao vae reta. Echa'ã upucata reta —jei—. ²² Ìru vae reta pemitarëita jare ndarau uipota yugüireco peñurã. Jae reta jeita icavi mbae vae peve jare uyeminguetata peãgüe pe. Cuarãi uyapota reta peve, pe reta perovia cheré ramo. Che co jae cuimbaerã uyeyapo vae. Ërei piyerovia —jei Jesús—. ²³ Jocua ara ou uvãe yave, piyerovia. Echa'ã Tumpa güinoi ara pe mbae icavi ete vae pembaerã. Echa'ã jucuarãi uyapota reta peve vae itenondegua reta uyapo cua nunga icavi mbae vae Tumpa ñnee aracae umimbeu vae reta pe —jei—. ²⁴ Ërei icocatu vae reta uiporarata co. Echa'ã jae reta uyerovia ma jeta corepoti güinoi vae re —jei Jesús chupe reta—. ²⁵ Jare jeta güinoi vae reta uiporarata co. Echa'ã iyembaita reta. Añave upuca reta. Ërei ipiatitita reta jare uyaota reta —jei—. ²⁶ Jare opaete vae jei icavi vae jese vae reta uiporarata co. Echa'ã jucuarãño vi uyapo itenondegua reta upurumbitavi vae reta pe. Jocua upurumbitavi vae reta jei iyapu reve: 'Che co jae Tumpa ñnee umimbeu vae' —jei Jesús—.

Peau perovaicho reta
(Mt 5.38-48; 7.12)

²⁷ Ërei che jae pe reta piyapisaca cheré vae pe cua: Peau perovaicho reta, jare piyapo icavi vae pemitarëi vae reta pe —jei—. ²⁸ Ìru vae reta uyepipeyu peré yave jare icavi mbae vae jei peve yave, piyerure Tumpa pe jae umivendise reta vaerã —jei—. ²⁹ Ime yave quia ocua nderovaique re vae, erova ipuere vaerã ocua ye jovaicho re. Jare ime yave quia ndeasoya upiño ndegüi vae, emañe jese upiño vaerã ndegüi ndecamisa vi —jei—. ³⁰ Ime yave quia uyerure ndeve mbae re vae, emee chupe. Jare ime yave quia nembraembae upiño ndegüi vae, agüiye inemiacatëi chupe —jei—. ³¹ Piyapo Ìru vae reta pe pipota Ìru vae reta uyapo vaerã peve vae rami —jei chupe reta—.

³² Echa'ã peau yave perau vae retaño, jocua mbaeti co mbae icavi vae. Echa'ã iyoa vae reta uyapo vi jucuarãi —jei—. ³³ Jare piyapo yave icavi vae icavi vae uyapo peve vae reta peño, jocua mbaeti co mbae icavi vae. Echa'ã iyoa vae reta uyapo vi jucuarãi —jei—. ³⁴ Jare piporuca yave mbae Ìru vae pe jae umee ye peve vaerãño, jocua mbaeti co mbae icavi vae. Echa'ã iyoa vae reta uiporuca mbaembae Ìru vae pe jocua Ìru vae umbijecovia ye chupe vaerã —jei—. ³⁵ Ërei peau perovaicho reta, jare piyapo icavi vae chupe reta. Piporuca mbae Ìru vae pe jare agüiye peãro umbijecovia ye peve vaerã. Jucuarãi piyapo yave, Tumpa umeeta peve mbae icavi ete vae jare peapota tai retarã. Echa'ã Tumpa ipiacavi umee'ã yasurupai chupe vae reta pe jare icavi mbae vae uyapo vae reta pe —jei—. ³⁶ Piparareco Ìru vae reta, peRu uiparareco rami —jei—.

Ñnera Ìru vae re
(Mt 7.1-5)

³⁷ Agüiye piñera Ìru vae re, agüiye vaerã Ìru vae ñnera peré. Agüiye pembijeco Ìru vae mbae re, agüiye vaerã Ìru vae pembijeco mbae re. Pembiasa Ìru vae pe, Ìru vae umbiasa vaerã peve —jei—. ³⁸ Pemee mbaembae Ìru vae reta pe, jare Ìru vae reta umeeta mbaembae peve. Jae reta umeeta peve jeta ete Ìru vae reta pe pemee vae güi. Echa'ã icavi vae piyapo yave Ìru vae reta pe, Ìru vae reta uyapota icavi vae peve. Ërei icavi mbae vae piyapo yave Ìru vae reta pe, Ìru vae reta uyapota icavi mbae vae peve —jei—.

³⁹ Jayave Jesús jei chupe reta umijaanga reve:

—Penti jesa mbae vae ipuere'ã etei uechaca tape Ìru jesa mbae vae pe. Jucuarãi uyapo yave, mocui reve uasavita ivicua pe —jei—. ⁴⁰ Pentí uyemboe oi vae uicuaa ete'ã oporomboe vae uicuaa vae rami. Ërei opaete re uyemboe yave, uicuaata oporomboe vae uicuaa rami —jei—.

⁴¹ Agüiye emae iti michi vae neñru jesa pe oĩ vae re, ime yave nenoĩ iti tuicha vae nderesa pe —jei—. ⁴² Ndarau ndepuere ndere neñru pe: ‘Cherivi, taequi nderesa güi jocua iti michi vae.’ Echa’ã nde nenoĩ iti tuicha vae nderesa pe. Nde co jae upurumbitavi vae. Eequi rani iti tuicha vae nderesa güi. Jayave netae cavita ndepuere vaerã ndeequi iti michi vae neñru jesa güi —jei—.

Ía icavi vae jare ía icavi mbae vae

(Mt 7.17-20; 12.33-35)

⁴³ Penti temiti icavi vae umee’ã ía icavi mbae vae. Jae ramiño vi penti temiti icavi mbae vae umee’ã ía icavi vae —jei—. ⁴⁴ Echa’ã yaicuaa penti temiti icavi co, ía icavi yave. Yaequi’ã íva penti yai jãti vae güi. Jae ramiño vi yaequi’ã uva penti yai jãti vae güi —jei—. ⁴⁵ Quía nunga jecocavi vae güinoĩ icavi vae ipia pe. Jáeramo jei icavi vae. Jae ramiño vi quía nunga jecopochi vae güinoĩ icavi mbae vae ipia pe. Jáeramo jei icavi mbae vae. Echa’ã penti penti uyemingueta ipia pe güinoĩ vae rupi —jei—.

Tenta iguapica

(Mt 7.24-27)

⁴⁶ ¿Maera pa pere cheve: ‘OreYa, oreYa’? Echa’ã piyapo’ã che jae peve piyapo vaerã vae —jei—. ⁴⁷ Ime yave quía ou cheve uyapisaca vaerã cheré vae, jae uyapo yave che jae chupe uyapo vaerã vae, tamijaanga peve mbae rami co jae —jei—. ⁴⁸ Jae co penti cuimbae jentarã uyapo vae rami. Oyoo quipe oñono vaerã tenta iguapicarã itape re. Jare tenta uyeyapo ma yave, tuicha oqui jare jeta ete i usiri tenta iyipi rupi. Èrei tenta omi’ã etei. Echa’ã iyapoa oñono itape re —jei—. ⁴⁹ Èrei ime yave quía uyapisaca cheré vae, uyapo’ã yave che jae chupe uyapo vaerã vae, jae co ñru cuimbae jentarã uyapo vae rami. Èrei jae oyoo’ã oñono vaerã tenta iguapicarã itape re. Oñono jentarã ivi iaramboño. Jayave tuicha oqui jare jeta ete i usiri tenta iyipi rupi jare opa umbiyapara. Opa uyembai jocua tenta —jei—.

7

Jesús umbigüera sundaro reta juvicha jembiocui

(Mt 8.5-13)

¹ Jare opa ma imiari yave uyapisaca jese vae reta pe, Jesús oo Capernaum pe. ² Jare jocua tenta guasu pe ico penti sundaro reta juvicha jembiocui. Cua cuimbae imbaerasi. Umano pota echa. Jare sundaro reta juvicha uau cua jembiocui. ³ Jare sundaro reta juvicha uyandu Jesús regua. Jáeramo omondo Jesús oĩ vae pe amocue judío reta itenondegua reta, jae reta uyerure vaerã Jesús pe oo vaerã umbigüera sundaro reta juvicha jembiocui. ⁴ Jare yugüeru uvãe yave Jesús oĩ vae pe, uyerure chupe cua re. Jei reta chupe:

—Cua mburuvicha ipiacavi co. Jáeramo icavi co nde ndiyapo vaerã cua chupe. ⁵ Echa’ã jae yanderau jare uyapo yandevé penti tupao —jei reta. ⁶⁻⁷ Jayave Jesús oo jae reta jupíe. Jare yugüiraa ma uvãe yave coiño mburuvicha jenta güi, mburuvicha ombou amocue ñru reta uñeovãiti vaerã Jesús ndive. Jae reta jei chupe:

—Mburuvicha jei: ‘Agüiye iyemambeco, cheYa, ndeyu vaerã cherenta pe. Echa’ã mbae’ã co che. Jáeramo aa’ã noovãiti. Ndepuere ndere joco güiño cherembicui ucuera vaerã, jare ucuerata co’ —jei, jei reta chupe—. ⁸ Echa’ã ime mburuvicha mbaepuere güinoĩ cheré vae reta. Jae ramiño vi che anoi mbaepuere sundaro reta re. Che jae penti sundaro pe: Ecu, jare jae oo. Jae ramiño vi che jae ñru sundaro pe: Eyu, jare jae ou. Jae ramiño vi che jae cherembicui pe: Iyapo cua, jare jae uyapo’ —jei, jei reta.

⁹ Jare Jesús cua uyandu yave, ipiacañi sundaro reta juvicha re. Jayave uyerova jare jei jeta vae yugüiraa jaicue vae pe:

—Che jae peve, avãe’ã cua nunga mburugüirovia tuicha vae Israel pegua reta ipite pe.

¹⁰ Jayave sundaro reta juvicha ombou vae reta yugüiraa ye sundaro reta juvicha jenta pe, jare uecha ucuera ma co uyeyocui vae imbaerasi cua vae.

Jesús umbijecove ye cuña ime umano vae imembi cuimbae

¹¹ Jayave piareve pe Jesús oo tenta guasu Naín pe. Jare jeta jemimboe reta jare ñru vae reta yugüiraa jae jupíe. ¹² Jare oo ma uvãe yave coiño tenta guasu jonque güi, umano vae güeru vae reta yugüeru tenta guasu güi. Umano vae penti cuimbae co jare ichi penti cuña ime umano vae co. Umano vae jocua cuña imembi jae vaño co. Jare jeta tenta guasu pegua reta yugüeru jocua cuña jupíe. ¹³ Jare yandeYa uecha yave cuña, uiparareco jare jei chupe:

—Agüiye iyao.

¹⁴ Jayave Jesús oo uyaviqui umano vae jiru. Jare ovoi güeru vae reta uyemboi. Jayave Jesús jei tairusu vae pe:

—Che jae ndeve: Epüa.

¹⁵ Jayave umano vae uguapi jare umbipi uyemingueta. Jayave Jesús umee ye ichi pe.
¹⁶ Jayave opaete vae uquiye. Umbiadora reta Tumpa. Jei reta:
 —Penti Tumpa iñee umimbeu vae ipuere ete vae ou ma yandepite pe. Tumpa ombou yandeve yanderau ramo. Echa'ã yande co jae imbae reta —jei reta.

¹⁷ Jare Jesús uyapo vae jerãcua opaete Judea rupi jare opaete Judea iyipi rupigua rupi.

*Juan ombou jemimboe reta Jesús oĩ vae pe
 (Mt 11.2-19)*

¹⁸ Jare Juan jemimboe reta umimbeu Juan pe opaete cua regua. ¹⁹ Jayave Juan ueni mocui jemimboe reta jare ombou yandeYa oĩ vae pe jei vaerã chupe:

—¿Nde pa co jae Cristo outa vae? ani ¿nuãrota pa Ìru vae ou vaerã?

²⁰ Jayave jocua cuimbae reta yugüeru uvãe Jesús oĩ vae pe jare jei chupe:

—Juan upurumbibautizase vae orembou ndeve. Jae jei: ‘¿Nde pa co jae Cristo outa vae? ani ¿nuãrota pa Ìru vae ou vaerã?’ —jei, jei reta.

²¹ Jayave jocua ora pe etei Jesús umbigüera jeta imbaerasi vae reta jare umbisiri añã reta oya jese vae reta güi. Jae ramiño vi umbigüera jeta jesa mbae vae reta, jae reta umae vaerã.
²² Jayave Jesús jei Juan ombou chupe vae reta pe:

—Pecua ye pemimbeu Juan pe peecha jare piyandu vae. Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umano vae reta icove ye ma. Iparavete vae reta uyapisaca ñee icavi vae re —jei—. ²³ Jare Tumpa umivendiseta jecuae güirovia cherẽ vae reta —jei chupe reta.

²⁴ Jare yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quã re pa co peo ñana pe pemae? Jae ipirãta mbae vae'ã co tacuarãsi omi ivitu uipeyu yave vae rami —jei—. ²⁵ ¿Quã re pa co peo pemae? Jae omonde'ã temimonde ipõra vae. Mase, temimonde ipõra vae omonde vae reta yugüireco mburuvicha guasu reta jenta pe jare icavi ete yugüireco —jei—. ²⁶ ¿Peo ra pemae vaerã penti Tumpa iñee umimbeu vae re? Añete che jae peve, Tumpa umee chupe uyapo vaerã jeta ete Ìru Tumpa iñee umimbeu vae reta uyapo vae güi —jei—. ²⁷ Tumpa iñee pe uyecuatia oĩ jese cuarã: ‘Mase’ —jei Tumpa—, ‘che amondota chieñee güiraata vae nderenonde, uyapicatu vaerã nderaperã.’

Jucuarãi uyecuatia oĩ —jei chupe reta —. ²⁸ Che jae peve, Tumpa umee Juan upurumbibautizase vae pe uyapo vaerã jeta ete Ìru Tumpa iñee umimbeu vae reta uyapo vae güi. Èrei taicuegua vae Tumpa iporoyocua pegua uyembutuichaca eteta Juan güi —jei—. ²⁹ Jare mburuvicha peguarã ocovara vae reta jare opaete uyapisaca Juan re vae reta uicuaaca Tumpa jupi co. Echa'ã Juan umbibautiza reta —jei—. ³⁰ Èrei fariseo reta jare mboroyocui re oporomboe vae reta uyapo'ã Tumpa jei uyapo vaerã vae. Echa'ã uyembibautizaca'ã Juan pe —jei.

³¹ Jayave Jesús jei chupe reta:

—Tamimbeu peve mbae ndive amboyovaque añave yugüireco vae reta. Tamimbeu peve mbae rami co jae reta —jei—. ³² Jae reta co sambiaia plaza pe uguapi ñugüinoi vae reta rami. Jae reta jei uyupe cuarã: ‘Nduyemimbi ma peve, èrei pe reta pepirae'ã. Orepiaiti perovaque, èrei pe reta piyao'ã.’ Jucuarãi jei —jei—. ³³ Echa'ã Juan upurumbibautizase vae ou, jare jae uyecuacu tembiu jare vino güi. Jáeramo pe reta pere añã oya co Juan re —jei—. ³⁴ Che cuimbaerã ayeyapo vae ayu, jare che ayecuacu'ã tembiu jare vino güi. Jáeramo pe reta pere: ‘Mase, jae jou jeta tembiu jare vino. Jae co mburuvicha peguarã ocovara vae reta jare teco icavi mbae vae uyapo vae reta lamigo’ —pere, jei—. ³⁵ Èrei opaete iyaracuaa vae reta uicuaaca aracuaa icavi co —jei.

Jesús Simón jenta pe

³⁶ Jare penti fariseo uparea Jesús pe oo vaerã ucaru jae ndive. Jayave Jesús oo fariseo jenta pe jare uguapi ucaru vaerã. ³⁷ Jare penti cuña aguasa rupi ico vae jocua tenta guasu pegua uicuaa Jesús ucaru co oĩ fariseo jenta pe, jare güeru mbae ipiche cavi vae jiru ita alabastro jee vae pegua pe. ³⁸ Jayave cuña uyemboi Jesús icupe coti jare uyao. Jare umbipi umãqui Jesús ipi jesai pe. Jayave cuña umitini Jesús ipi ñã pe jare uyurupite vi ipi. Jayave uipichi mbae ipiche cavi vae ipi re. ³⁹ Jare fariseo Jesús pe uparea vae cua uecha yave, jei iyupe ipia pe: ‘Cua cuimbae penti Tumpa iñee umimbeu vae yave, uicuaata tẽi quã co cua cuña jare mbae nunga cuña co jae. Echa'ã iyoa vae co’ —jei.

⁴⁰ Jayave Jesús jei fariseo pe:

—Simón, aipota mbae jae ndeve.

—Ere cheve, oporomboe vae —jei Jesús pe.

⁴¹ Jayave Jesús jei chupe:

—Mocui cuimbae ipía ĩru cuimbae pe. Penti cuimbae ipía chupe quinientos ara mbaraviqui jepi pegua, jare ĩru cuimbae ipía chupe cincuenta ara mbaraviqui jepi pegua —jei—. ⁴² Ĕrei mocui reve mbaeti güireco corepoti ipía umbiepi vaerã. Jayave upurumbipía vae opa umicañi mocui reve pe ipía —jei—. Emimbeu cheve, upurumbipía vae cua uyapo ramo, cua mocui vae güi ¿quía nunga pa uau eteta upurumbipía vae? —jei.

⁴³ Jayave Simón jei Jesús pe:

—Che chepia pe ayemingueta jocua cuimbae jeta ipía opa umicañi chupe vae.

Jayave Jesús jei chupe:

—Jaecavi ndere.

⁴⁴ Jayave Jesús uyerova cuña coti jare jei Simón pe:

—Mase, emae cua cuña re. Che aique nerenta pe yave, neme'eã cheve i ayoe vaerã chepi. Ĕrei jae umãqui ma chepi jesai pe jare umitini ía pe —jei—. ⁴⁵ Nde cheyurupite'ã. Ĕrei cua cuña aique güive uyurupite chepi —jei—. ⁴⁶ Nde niñono'ã aceite cheãca re. Ĕrei cua cuña uipichi mbae ipiche cavi vae chepi re —jei—. ⁴⁷ Jáeramo che jae ndeve, yepe tēi jeta cua cuña imbaeyoa reta, Ĕrei ambiasa chupe. Echa'ã jae cherau ete. Ĕrei ime yave quía michiño ĩru vae umbiasa chupe vae, jae michiño vi uau jocua ĩru vae —jei.

⁴⁸ Jayave Jesús jei cuña pe:

—Ambiasa ma ndeve nembraeyoa reta.

⁴⁹ Jayave Jesús ndive ucaru ñugüinoi vae reta jei iyupe ipia pe: “¿Quía ra co cua? ¿Quirãita ra ipuere umbiasa quía pe imbaeyoa reta?”

⁵⁰ Ĕrei Jesús jei cuña pe:

—Ndiyembiasaca ma nderovia cheré ramo. Ecuia ndepiacatu reve —jei.

8

Cuña ombori Jesús vae reta

¹ Jare cua jaicue rupi Jesús oo opaete tenta guasu reta jare tenta guasu-rai reta rupi, jare umimbeu ñee icavi vae Tumpa iporoyocua regua. Jare jocua doce vae yugüiraa jae jupie. ²⁻³ Jare jeta cuña reta yugüiraa vi jae jupie jare ombori Jesús jare jemimboe reta. Mbaembae uata Jesús jare jemimboe reta pe yave, jocua cuña reta ogua chupe reta. Tenonde yave amocue jocua cuña reta imbaerasi jare aña reta oya amocue vae re. Ĕrei Jesús umbigüera. Penti cuña jee co María Magdalena. Jesús umbisiri siete aña reta chugüi. ĩru jee co Juana. Jae co Chuza jembireco. Chuza co jae mburuvicha guasu Herodes jembioqui. ĩru jee co Susana.

Jesús umijaanga umaeti vae

(Mt 13.1-9; Mr 4.1-9)

⁴ Jare jeta vae yugüeru opaete tenta guasu reta güi uyembati Jesús oĩ vae pe. Jayave Jesús jei chupe reta umijaanga reve:

⁵ —Penti cuimbae oo umaeti vaerã. Umaeti yave, umiai temiti, jare amocue oa tape rupi. Jayave ĩru vae reta upĩro temiti re jare güira reta jou vi —jei—. ⁶ ĩru temiti oa mbovĩño ivi itape iárambo oĩ vae pe. Ĕrei oē rupive, ipiru, jocua ivi ñãqui ngatu'ã ramo —jei—. ⁷ ĩru temiti oa ñanapite pe. Ñana ucuacuaa yave, opa uyuca temiti —jei—. ⁸ ĩru temiti oa ivicavi pe. Cua oē jare ucuacuaa jare jeta ete ía —jei.

Jare cua jei ma chupe reta yave, iñeeãta reve jei:

—Uipota uyandu vae tuyapisaca cua ñee re.

Maera Jesús oporomboe umijaanga reve

(Mt 13.10-17; Mr 4.10-12)

⁹ Jayave Jesús jemimboe reta upirandu Jesús pe:

—¿Mbae pa uipota jei cua nemijaanga reve ndere vae?

¹⁰ Jayave Jesús jei chupe reta:

—Amimbeu ma peve Tumpa iporoyocua regua. Cua uyecuaa'ã ĩru vae reta pe. Jáeramo amboe ĩru vae reta amijaanga reve. Cua ayapo agüiye vaerã uicuaa cavi, yepe tēi uecha, jare agüiye vaerã uicuaa, yepe tēi uyandu —jei—.

Umaeti vae uyemijaanga jese vae

(Mt 13.18-23; Mr 4.13-20)

¹¹ Cua amijaanga reve che jae peve vae uipota jei cua: Temiti uyemijaanga Tumpa iñee re —jei—. ¹² Jocua temiti tape rupi oa vae uyemijaanga amocue Tumpa iñee uyandu vae re. Jayave ou aña guasu chupe reta jare umicañi Tumpa iñee güi, agüiye vaerã güirovia Tumpa uyembiasaca vaerã —jei—. ¹³ Jae ramiño vi jocua temiti uñeñoti mbovĩño ivi itape iárambo oĩ vae pe vae uyemijaanga ĩru vae reta Tumpa iñee uyandu vae re. Jae reta uyandu rupive, güirovia uyerovia reve. Ĕrei cua reta jocua temiti japo quipe'ã vae rami

co. Echa'ã michi peguaño güirovia ñee. Ërei mbaesusere uyeyapo chupe yave, uipota'ã ma uyapisaca reta Tumpa iñee re —jei—. ¹⁴ Jae ramiño vi jocua temiti uñeñoti ñanapite pe vae uyemijaanga ñru vae reta Tumpa iñee uyandu vae re. Ërei umbipi uyempia'ã ivi pe mbaembae uyeyapo vae re jare corepoti uipota güinoi vaerã vae re jare yerovia ivi pegua re. Jáeramo jae reta jocua temiti ia'ã vae rami co —jei—. ¹⁵ Ërei jocua temiti uñeñoti ivicavi pe vae uyemijaanga ñru vae reta Tumpa iñee uyandu vae re. Cua reta uyapisaca cavi Tumpa iñee re ipiacavi reve, jare uyapo Tumpa iñee jei uyapo vaerã vae. Jáeramo jae reta jocua temiti ía cavi vae rami co. Jae reta uyapo icavi vae ipiaguasu reve —jei Jesús—.

Uñeñomi vae uyeechacañotai co
(Mr 4.21-25)

¹⁶ Mechero yamiendi yave, ndarau ñañono yapepo uyembovapo oí vae igüi pe, ani güirapembi igüi pe. Ñañono co mechero jenda pe, o pe uique vae reta güinoi vaerã tembae —jei—. ¹⁷ Ime yave mbae uñeñomi vae, uyeechacañotai co. Jae ramiño vi ime yave mbae uyeyasoi vae, uyecuaañotai co —jei—. ¹⁸ Pepia pe piyemingueta cavi piyandu vae re. Echa'ã güinoi vae pe uñemifruta, jare mbaeti güinoi vae güi mbovi ete güinoi echa vae uyeequita —jei.

Jesús ichi jare tivi reta
(Mt 12.46-50; Mr 3.31-35)

¹⁹ Jayave Jesús ichi jare tivi reta yugüeru uvãe Jesús oí vae pe. Ërei ipuere'ã oya Jesús re jeta joco pe ñugüinoi vae reta jeco pegua. ²⁰ Jayave amocue vae jei Jesús pe:
—Ndesi jare nderivi reta oca pe ñugüinoi. Ndereca ñugüinoi —jei reta chupe.

²¹ Jayave Jesús jei chupe reta:
—Cua reta uyapisaca Tumpa iñee re jare uyapo jei vae. Cua nunga reta co jae chesi jare cherivi reta —jei.

Jesús umiquüi i guasu
(Mt 8.23-27; Mr 4.35-41)

²² Jare penti ara Jesús uyupi chalana pe jemimboe reta ndive. Jayave Jesús jei chupe reta:
—Yaa i guasu jovaicho pe.

Jayave umbipi uasa i guasu. ²³ Ërei uasa ñugüinoi rambueve, Jesús oque oí. Jare ou ivitu tanta uyepeyu, jare i uyembiaparoaroa uique chalana pe, jare umitinee seri ma. Jae reta ipia pe uyemingueta umanota co. ²⁴ Jayave omomba reta Jesús, jare jei chupe:

—¡Oporomboe vae, oporomboe vae! Ñamanota ma.

Jayave Jesús upüa, jare uñeengata ivitu jare i guasu pe. Jare jupivoiño upita ivitu, jare opaete quüi ngatu. ²⁵ Jayave Jesús jei chupe reta:

—¿Maera pa pepurugüirovia'ã?

Jare jae reta uquiye jare ipiacañi, jare jei uyupe:

—¿Mbae nunga cuimbae pa cua? Echa'ã jae oyocui ivitu jare i guasu, jare jae reta uyapo oyocui vae —jei reta.

Cuimbae Gadara pegua aña reta oya jese vae
(Mt 8.28-34; Mr 5.1-20)

²⁶ Jayave yugüiraa Galilea güi uvãe i guasu jovaicho pe, gadareno reta iivi pe. ²⁷ Jesús ugüeyi ma chalana güi yave, ou oovãiti penti cuimbae jocua tenta guasu pegua. Ima ma aña reta oya jese. Nani ico. Ico'ã etei tenta rupi. Teõgüerirurenda rupiño ma ico. ²⁸ Cua cuimbae uecha Jesús yave, uapicai jare uyeatica Jesús jovai. Jayave iñeeãta reve jei:

—¿Maera pa ndeyu chemambeco, Jesús? Nde co jae Tumpa ara pe oí vae Tai. Ayerure ndeve agüiye iporaraca cheve —jei.

²⁹ Echa'ã Jesús oyocui ma aña usiri vaerã cuimbae güi. Ima ma uyembiiya jese. Jare ñru vae reta uipocua tēi ipo jare ipi cadena pe. Ërei jae opa omondoo cadena reta. Jare jecuaeño oo ñana coti aña omondo ramo. ³⁰ Jare Jesús upirandu chupe:

—¿Mbae pa nderee?

—Cheree co jae jeta vae —jei.

Echa'ã jeta aña reta oya jese. ³¹ Jayave aña reta uyerure Jesús pe agüiye vaerã oyocui reta yugüiraa vaerã umanocue vae reta ipi. ³² Jare joco pe jeta cuchí reta ucaru ñugüinoi ivitu guasu re. Jayave aña reta uyerure Jesús pe umaeño vaerã jese reta oya vaerã cuchí reta re. Jayave Jesús umaeño jese reta. ³³ Jayave aña reta usiri cuimbae güi, jare oya cuchí reta re. Jayave cuchí reta tanta osi ivia rupi oa i guasu pe, jare joco pe opa ipitupa reta.

³⁴ Jare cuchí iyandarecoa reta cua uecha yave, osi yugüiraa tenta guasu pe umimbeu joco pegua reta jare icoti'ã rupigua reta pe cua uyeyapo vae regua. ³⁵ Jayave uyandu vae reta yugüeru, uecha vaerã mbae uyeyapo vae. Jare yugüeru uvãe yave Jesús oí vae pe,

uecha cuimbae aña reta oyase jese vae uguapi oĩ Jesús jovai. Uecha uyemonde ma jare iyaracuaaño ma oĩ. Jare opaete yugüeru vae reta uquiye. ³⁶Jare jocua tenonde yave uecha vae reta umimbeu ñru reta pe quirai uyeyapo cuimbae aña reta oyase jese vae pe jae ucuera vaerã. ³⁷Jayave opaete gadareno reta umiñera Jesús oo ye vaerã jae reta iivi güi. Echa'ã uquiye ete reta. Jayave Jesús uyupi ye chalana pe yugüiraa ye vaerã chugüi reta. ³⁸Jare cuimbae aña reta oyase jese vae uyerure Jesús pe umaño vaerã jese oo vaerã jae jupie. Ërei Jesús umaño'ã jese. Jei chupe:

³⁹—Ecu nerenta pe emimbeu ñru vae reta pe mbae icavi vae Tumpa uyapo ndeve vae.

Jayave cuimbae oo, jare umimbeu ñru vae reta pe opaete tenta guasu rupi mbae icavi vae Jesús uyapo chupe vae.

Jairo tayi jare cuña Jesús jemimonde uyaviqui vae
(Mt 9.18-26; Mr 5.21-43)

⁴⁰Jare Jesús oo uvãe yave i guasu jovaicho pe, joco pe ñugüinoi vae reta umae jese uyerovia reve. Echa'ã uãro ñugüinoi. ⁴¹Jayave ou penti cuimbae Jairo jee vae. Jae co judío reta itupao re uyandareco vae. Jae uyeatica Jesús jovai, jare uyerure chupe oo vaerã jae jenta pe. ⁴²Echa'ã jae güinoi pentiño tayi doce año rupi güinoi vae. Umano pota echa ma. Jayave Jesús oo jae jupie. Jare jeta yugüiraa Jesús jupie, jare oyopi reta. ⁴³Jare jae reta ipite pe oo penti cuña doce año ma uiporara tugüiguasu vae. Cuña opaete ma icorepoti umee iyugüi upurupiano vae reta pe. Ërei penti ave ipuere'ã umbigüera. ⁴⁴Jayave cuña oya Jesús re icupe coti, jare uyaviqui jemimonde jembe. Jare jupivoi jugüiguasu upita chugüi.

⁴⁵Jayave Jesús jei:

—¿Quía pa cheremimonde uyaviqui?

Opaete vae jei uyaviqui'ã co jemimonde. Jare Pedro jei Jesús pe:

—Oporomboe vae, jeta ete ñugüinoi cua pe jare ndeopi reta co. ¿Maera pa ndere: 'Quía pa cheremimonde uyaviqui?' —jei.

⁴⁶Ërei Jesús jei:

—Quía nunga vae uyaviqui co cheremimonde. Echa'ã aicuaa ambigüera ma co chembaepuere pe quía —jei.

⁴⁷Jayave cuña uicuaa ipuere'ã ma uñemi Jesús güi. Jayave ou icoti uriri reve jare uyeatica Jesús jovai. Jayave umimbeu chupe opaete vae jovaque maera uyaviqui jemimonde jare quirai jupivoi ucuera. ⁴⁸Jayave Jesús jei chupe:

—Ndecuera ma, cherindi, nderovia cheré ramo. Ecu ndepiacatu reve —jei.

⁴⁹Jare Jesús uyemingueta oĩ rambueve, penti vae oo uvãe tupao re uyandareco vae jenta güi.

—Umano ma nderayi —jei—. Agüiye ma emambeco oporomboe vae —jei.

⁵⁰Ërei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño. Ucuerata co —jei.

⁵¹Jare oo uvãe yave tenta pe, Jesús umaño'ã ñru reta re uique vaerã jae ndive, jaeño Pedro, Jacobo jare Juan, jare cuñatai tu jare ichi. ⁵²Jare opaete joco pe ñugüinoi vae reta uyao jare jase ñugüinoi. Jayave Jesús jei chupe reta:

—Agüiye piyao. Umano'ã co. Oqueño co oĩ —jei.

⁵³Ërei jae reta oyoyai. Echa'ã uicuaa reta umano co. ⁵⁴Jayave Jesús uipisi cuñatai ipo pe.

—¡Cuñatai, epña! —jei.

⁵⁵Jayave cuñatai icove ye, jare jupivoi upña. Jayave Jesús oyocui umingarua vaerã cuñatai.

⁵⁶Jare cuñatai tu jare ichi ipiacañi. Ërei Jesús oyocui reta agüiye vaerã umimbeu quía pe ave mbae uyeyapo vae.

9

Jesús omondo jocua doce jemimboe reta
(Mt 10.5-15; Mr 6.7-13)

¹Penti ara Jesús opa umbati jocua doce jemimboe reta, jare umee chupe reta mbaepuere umbisiri vaerã aña reta oya jese vae reta güi jare umbigüera vaerã imbaerasi vae reta. ²Jayave omondo reta umimbeu vaerã Tumpa iporoyocua jare umbigüera vaerã imbaerasi vae reta. ³Jare jei chupe reta:

—Agüiye mbae peraa. Agüiye peraa pepopoca. Agüiye peraa peurupucu, perembiurã jare corepoti. Jare agüiye peraa mocui camisa —jei—. ⁴Peo pevãe yave penti tenta pe, joco pe pei jocua tenta guasu güi peo ye regua —jei—. ⁵Jare ime yave penti tenta guasu pegua reta uipota'ã pepita vaerã joco pe vae, peo joco güi yave, pemitimo ivicuii pepi güi, uicuaa vaerã jae reta co teco güinoi —jei.

⁶ Jayave jae reta yugüiraa tenta guasu-rai reta rupi. Umimbeu reta Ìru vae reta pe ñee icavi vae jare opaete uguata vae rupi umbigüera imbaerasi vae reta.

Juan imano

(Mt 14.1-12; Mr 6.14-29)

⁷ Jare mburuvicha guasu Herodes uyandu opaete Jesús uyapo vae regua. Jayave ipiacañi. Echa'ã amocue vae jei:

—Juan icove ye ma ou umanocue vae reta ipite güi.

⁸ Jare Ìru vae reta jei:

—Jae co Elías ou ye vae.

Jare Ìru vae reta jei:

—Jae co penti Tumpa ñee aracae umimbeu vae icove ye ma ou umanocue vae reta ipite güi vae. ⁹ Èrei Herodes jei:

—Añacasiaca co Juan. Èrei ¿quía ra co cua? Echa'ã ayandu ma jeta jesegua —jei.

Jáeramo Herodes uipota uecha Jesús.

Jesús umingaru cinco mil cuimbae reta

(Mt 14.13-21; Mr 6.30-44; Jn 6.1-14)

¹⁰ Jare Jesús jemimondo reta yugüeru ye Jesús oï vae pe, jare umimbeu Jesús pe opaete uyapo vae regua. Jayave Jesús güiraa reta quíi ngatu vae pe coiño tenta guasu Betsaida güi.

¹¹ Èrei jeta vae uicuaa yave, yugüiraa jaicue. Jare Jesús umbiresive cavi jare imiari chupe reta Tumpa iporoyocua re jare umbigüera imbaerasi vae reta.

¹² Caaru ma yave, jocua doce vae yugüeru Jesús oï vae pe jare jei chupe:

—Emondo cua jeta vae tenta tenta rupi, joco pe ucaru vaerã jare oque vaerã. Echa'ã mbaeti tenta cua rupi —jei reta.

¹³ Èrei Jesús jei chupe reta:

—Pe reta pemee tucaru.

—Jaeño ime nonoi pandepo mbiyape jare mocui pira —jei reta—. ¿Ndoota pa ndogua opaete cua reta jembiurã?

¹⁴ Echa'ã cuimbae retaño uyepapa cinco mil rupi.

Jayave Jesús jei jemimboe reta pe:

—Tuyembatimbatí cincuenta rupi tuguapi.

¹⁵ Jayave jucuarã uyapo reta. Jei reta opaete joco pe ñugüinoi vae reta pe uguapi vaerã.

¹⁶ Jayave Jesús uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisã mbiyape jare pira, jare umee jemimboe reta pe, jae reta umee vaerã opaete joco pe uguapi ñugüinoi vae reta pe. ¹⁷ Opareve ucaru, jare iyangapii reta. Jayave Jesús jemimboe reta umbati tembliu uñepisãacue jembire vae, jare umitinee doce canasta.

Pedro jei Jesús co jae Cristo, Tumpa ombou vae

(Mt 16.13-20; Mr 8.27-30)

¹⁸ Pentí ara Jesús oo jeta vae ipite güi uyerure vaerã Tumpa pe. Jare jemimboe reta joco pe ñugüinoi jae ndive. Jayave Jesús upirandu chupe reta:

—¿Quía pa co che Ìru vae reta pe? —jei.

¹⁹ Jae reta jei chupe:

—Amocue vae jei nde co jae Juan upurumbibautizase vae, jare Ìru vae reta jei nde co jae Elías, jare Ìru vae reta jei nde co jae pentí Tumpa ñee aracae umimbeu vae icove ye ma ou umanocue vae reta ipite güi vae —jei reta.

²⁰ Jayave Jesús upirandu chupe reta:

—Jare ¿quía pa co che peve? —jei.

Jayave Pedro jei chupe:

—Nde co jae Cristo, Tumpa ombou vae —jei.

Jesús umimbeu umanota co

(Mt 16.20-28; Mr 8.30-9.1)

²¹ Jayave Jesús oyocui ete reta agüiye vaerã umimbeu quía pe. ²² Jayave Jesús jei chupe reta:

—Che cuimbaerã ayeyapo vae aiporara eteta. Jare judío reta itenondegua reta jare sacerdote reta itenondegua reta jare mboroyocui re oporombocue vae reta ndarau uipota aico vaerã juvicha guasurã, jare cheyucacata. Èrei mbapii ara rupi aicove yeta ayu umanocue vae reta ipite güi —jei.

²³ Jayave Jesús jei opaete vae pe:

—Ime yave quía uipota oo cherupíe vae, tiñacañi iyugüi, tovoí icurusu opa ara, jare too cherupíe —jei—. ²⁴ Uipota uñuvatu jecove vae ndarau ipuere. Ërei jocua umeeta jecove chereco pegua vae uñuvatuta co —jei—. ²⁵ ¿Mbae ra uminganata quía, umingana yave opaete ivi pegua, Ërei ipuere'ã yave uñuvatu jecove? —jei—. ²⁶ Ime yave quía imara cheré jare chiñee re vae, che cuimbaerã ayeyapo vae chemarata vi jese, ayu ye yave ayembutuichaca vaerã chembaepuere reve, cheRu imbaepuere reve, jare ángel uñeño tee Tumpa peguarã vae reta imbaepuere reve —jei—. ²⁷ Ërei añete che jae peve, ndei amocue cua pe ñugüinoi vae umano mbove, uechata reta Tumpa iporoyocua —jei Jesús.

Jesús uyembiambie

(Mt 17.1-8; Mr 9.2-8)

²⁸ Jare ocho ara rupi cua jei rendave pe, Jesús güiraa Pedro, Juan jare Jacobo ñru vae reta ipite güi, jare uyupi penti ivitu guasu re uyerure vaerã Tumpa pe. ²⁹ Jare Jesús uyerure Tumpa pe rambueve, jova uyembiambie jare jemimonde tí asi jare uvera. ³⁰ Jare mocui cuimbae uyemingueta ñugüinoi Jesús ndive. Jae reta co Moisés jare Elías. ³¹ Mocui reve uyecuaa tembipe ipõra ete vae re jare uyemingueta reta Jesús imano re, quirãí umanota co Jerusalén pe. ³² Ërei Pedro jare jae ndive ñugüinoi vae jopei jare oque. Ërei usareco ye, jare uecha Jesús ipõra ete, jare uecha vi jocua mocui cuimbae Jesús ndive ñugüinoi vae reta. ³³ Jare Moisés jare Elías yugüiraa yeta ma yave, Pedro jei Jesús pe:

—Oporomboe vae, icavi co ñai vaerã cua pe. Turuyapo mbapí guarasía ñanaroqui pegua, penti nembraerã, penti Moisés peguarã jare penti Elías peguarã —jei.

Echa'ã Pedro uicuaa'ã mbae jei vae.

³⁴ Jare Pedro cua jei rambueve, ou amapítu umiguarasía reta. Jare jae reta uquiye amapítu umiguarasía yave. ³⁵ Jayave uyendu ñee amapítu güi jei:

—Cua co jae cheRai aau ete vae. Piyapisaca jese —jei.

³⁶ Jare ñee opa ma yave, jae reta uecha'ã quía joco pe, jaeño Jesús. Jare jocua ara reta pe jae reta umimbeu'ã quía pe ave mbaembae uecha vae.

Jesús umbigüera cunumi aña oya jese vae

(Mt 17.14-21; Mr 9.14-29)

³⁷ Jare piareve pe ivitu guasu güi ugüeyi reta yave, jeta vae yugüeru uñeovãiti jae reta ndive. ³⁸ Jayave penti cuimbae yati vae reta ipite pe oí vae jei Jesús pe:

—Oporomboe vae, ayerure ndeve nemale vaerã cherai re. Jae co cherai jae vaeño.

³⁹ Aramolño penti aña oya jese jare umbisapicai. Jayave umbiriri ete jare cunumi iyuru tiriyai. Jayave uyembipere. Jecuaeño uyapo jucuarãí chupe —jei—. ⁴⁰ Ayerure tēi ma nderemimboe reta pe umbisiri vaerã aña chugüi, Ërei ipuere'ã reta —jei.

⁴¹ Jayave Jesús jei joco pe ñugüinoi vae reta pe:

—Yavai ete pe reta cua ivi pe pico vae pepurugüirovia vaerã. ¿Quirãí regua ra apitata pe reta ndive? ¿Quirãí regua ra arupiata peve? —jei.

Jayave jei cunumi tu pe:

—Eru nderai cua pe.

⁴² Jare cunumi ou rambueve, aña uipiaca jare umbiriri ete. Jayave Jesús uñeengata aña pe. Jayave umbigüera cunumi jave umee ye tu pe. ⁴³ Jare opaete joco pe ñugüinoi vae reta ipiacañi Tumpa imbaepuere tuicha vae re. Ërei ipiacañi rambueve opaete Jesús uyapo vae re, Jesús jei jemimboe reta pe:

Jesús umimbeu ye umanota co

(Mt 17.22-23; Mr 9.30-32)

⁴⁴ —Piyapisaca cavi cua jae peve vae re. Echa'ã che cuimbaerã ayeyapo vae penti vae chemeeta cherovaicho reta pe —jei.

⁴⁵ Ërei jae reta uicuaa cavi'ã mbae Jesús jei chupe reta vae. Yavai chupe reta uicuaa vaerã, jare uipiú reta upirandu vaerã chupe jese.

Tenondegua vae

(Mt 18.1-5; Mr 9.33-37)

⁴⁶ Jayave jae reta umbipi uyemingueta quía ra tenondegua ñru reta güi vae. ⁴⁷ Jare Jesús uicuaa chugüi reta ipiyemingueta. Jayave ueni penti sambiaí jare oñono iyipi pe. ⁴⁸ Jayave jei jemimboe reta pe:

—Ime yave quía uyapo icavi vae cua nunga sambiaí pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe. Echa'ã pepite pe oí vae uñemimichi vae icota tenondeguarã —jei.

Oyovaicho'ã yande ndive vae yanembori co

(Mr 9.38-40)

⁴⁹ Jayave Juan jei Jesús pe:

—Oporomboe vae, nduecha penti cuimbae nderee pe umbisiri añã reta oya jese vae reta güi, jare ndoe chupe agüiye ma uyapo vaerã. Echa'ã jae ñãneñru'ã co —jei.

⁵⁰ —Agüiye pere chupe jucuarãi —jei Jesús chupe—. Echa'ã oyovaicho'ã yande ndive vae yanembori co —jei.

Jesús ññeengata Jacobo jare Juan pe

⁵¹ Jare outa ma uvãe Jesús oo ye vaerã ara pe. Jáeramo iquirëi ete oo Jerusalén pe. ⁵² Jayave omondo amocue jemimboe reta jenonde. Jae reta yugüiraa penti tenta guasu-rai ivi Samaria pegua pe uyapicatu vaerã Jesús peguarã. ⁵³ Ërei joco pegua reta uipota'ã Jesús upita vaerã joco pe. Echa'ã uicuaa reta jae oo Jerusalén coti. ⁵⁴ Jare Jesús jemimboe reta Jacobo jare Juan cua uicuaa yave, jei reta Jesús pe:

—OreYa, ¿ndipota pa ore ndoyocui tata ou vaerã ara güi opa vaerã uapi cua tenta guasu-rai pegua reta Elías uyapo rami?

⁵⁵ Ërei Jesús uyerova icoti jare ññeengata chupe reta. Jei chupe reta:

—Agüiye pere jucuarãi. ⁵⁶ Echa'ã che cuimbaerã ayeyapo vae ayu apurumbiasa vaerã. Ayu'ã apurumicañitei vaerã —jei.

Jayave yugüiraa ñru tenta guasu-rai coti.

Uipota oo Jesús jupíe vae

(Mt 8.19-22)

⁵⁷ Jare tape rupi uguata reta rambueve, penti cuimbae jei Jesús pe:

—Taa nderupíe opaete que rupi ndeo vae rupi.

⁵⁸ Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerã ayeyapo vae mbaeti cherenta —jei.

⁵⁹ Jare Jesús jei ñru cuimbae pe:

—Eyu cherupíe.

Ërei cuimbae jei:

—Emaeño rani cheré aa vaerã aico cheru re umano regua.

⁶⁰ Jayave Jesús jei chupe:

—Tecove opa mbae vae güinoi mbae vae reta toñoti umano vae reta. Ërei nde ecua emimbeu Tumpa iporoyocua —jei.

⁶¹ Jayave ñru cuimbae jei Jesús pe:

—Taa nderupíe, cheYa. Ërei emaeño rani cheré aa vaerã cherenta pe amimbeu vaerã chupe reta jáema co aa —jei.

⁶² Ërei Jesús jei chupe:

—Tamiñaanga umbiara vae. Umbiara vae umae yave jaicue coti, ndarau simi oo. Jae ramiño vi che amimbaraviqui yave quía, uyapo cavi'ã yave iparaviqui, ndarau icavi ico vaerã Tumpa iporoyocua pe —jei.

10

Jesús omondo setenta vae reta

¹ Cua jaicue rupi yandeYa uiparavo ñru setenta cuimbae reta jare omondo jenonde mocui mocui rupi opaete tenta guasu reta jae oota joco pe vae pe. ² Jare jei chupe reta:

—Jeta ete co yaaviro vaerã. Ërei mbovi ete co umbaeviro vae reta. Jáeramo pe reta piyure yandeYa pe omondo vaerã uparaviqui vae reta umbaeviro reta vaerã —jei—.

³ Pecua. Mase, pomondo icavi mbae vae uyapo vae reta ipite rupi. Pe reta ovecha-rai reta rami co. Jae reta yaguapita reta rami co —jei Jesús chupe reta—. ⁴ Agüiye peraa corepoti, jare urupucu, jare pepipasa. Jare agüiye pemiaríño quía perovãiti yave tape rupi —jei—.

⁵ Jare pique yave penti tenta pe, pere rani: 'Tipiacatu cua tenta pegua reta' —pere, jei—.

⁶ Jare ime yave quía jocua tenta pe mbiacatu uipota vae, jae ipiacatuta co. Uipota'ã yave, ndarau ipiacatu —jei—. ⁷ Jare pepita jocua tenta pe etei. Peu ipotave umee peu vaerã vae. Echa'ã icavi co ñru vae reta umbiepi vaerã uparaviqui vae pe. Agüiye coti cotiño pepita —jei—.

⁸ Jare penti tenta guasu pe peo pevãe yave, joco pegua reta pembiresive cavi yave, peu ipotave umee peu vaerã vae —jei chupe reta—.

⁹ Pembigüera imbaerasi vae joco pe ñugüinoi vae reta. Jare pere chupe reta: 'Tumpa iporoyocua coiño ma peve' —pere, jei—.

¹⁰ Ërei peo yave penti tenta guasu pe, joco pegua reta uipota'ã yave pepita vaerã joco pe, peguata calle rupi jare pere joco pegua reta pe: ¹¹ 'Numitimo orepi güi ivicui, cua tenta guasu pegua reta picuaa vaerã pe reta co teco penoi. Ërei turumimbeu peve cua: Tumpa

iporoyocua coifno ma peve' —pere, jei—. ¹² Ērei che jae peve, Tumpa uña yave ivi pegua reta, jocua tenta guasu pegua reta tanta uiporarata Sodoma pegua reta güi —jei—.

Tenta guasu pegua uiporarata vae reta
(Mt 11.20-24)

¹³ Corazín pegua reta uiporarata co. Betsaida pegua reta uiporarata co. Echa'á jeta miacañi reta ayapo ipite pe chembaepuere pe. Jucuarái mona ayapo yave Tiro jare Sidón pe, joco pegua reta ueyata tēi araca ma iyemingueta icavi mbae vae ipia pe oĩ vae. Omondeta tēi temimonde jaimbe vae jare oñonota tēi tanimbu iñāca re uicuaaca vaerā ipiatiti co —jei—. ¹⁴ Ērei Tumpa upuruāa yave, Corazín jare Betsaida pegua reta tanta uiporarata Tiro jare Sidón pegua reta güi —jei—. ¹⁵ Jare Capernaum pegua reta ipia pe uyemingueta tēi icavi co yugüireco vaerā Tumpa ndive. Ērei Tumpa omondota reta yugüireco vaerā cañitei pe —jei—. ¹⁶ Uyapisaca peré vae uyapisaca co cheré. Ērei pereríro vae chereríro co. Jare chereríro vae güiríro chembou vae —jei—.

Setenta vae reta yugüeru ye

¹⁷ Jare jocua setenta vae reta yugüeru ye yave Jesús oĩ vae pe, uyerovia jare jei Jesús pe: —OreYa, nderee re nonoi mbaepuere aña reta re.

¹⁸ Jayave Jesús jei chupe reta:

—Che aecha Satanás oa ara güi ama uvera vae rami. ¹⁹ Mase, amee ma peve mbaepuere pepuere vaerā pepíro mboi re jare chumicarape re, jare penoi vaerā mbaepuere tovaicho re, yepe tēi jae güinoi vi mbaepuere. Ipuereta'á mbae uyapo peve —jei—. ²⁰ Ērei agüiye piyerovia mbaepuere aña reta re penoi vae re. Ērei piyerovia peree uyecuatía ma oĩ ara pe vae re —jei—.

Jesús uyerovia
(Mt 11.25-27; 13.16-17)

²¹ Jocua ora pe etei Jesús uyerovia jare jei:

—Amee yasurupai ndeve, cheRu, quirái nde nemaño'á cua ivi pegua iyaracuaa vae reta re uicuaa vaerā cua mbaembae, ěrei ndicuaaca sambiaí rami vae reta pe. Icavi co, cheRu. Echa'á icavi co ndeve ndiyapo vaerā jucuarái. Nde co jae ara pegua reta jare ivi pegua reta iYa —jei—.

²² Jayave jei vi:

—CheRu umee ma cheve opaete. Mbaeti quía uicuaa cavi cheregua, jaeño cheRu. Jae ramiño vi mbaeti quía uicuaa cavi cheRu regua, jaeño che jare che aicuaaca chupe vae reta —jei—.

²³ Jayave uyerova umaie jemimboe reta re jare jei chupe retaño:

—Tumpa pemivendise ma. Echa'á umaño peré peecha vaerā jeta mbaembae —jei—.

²⁴ Che jae peve, jeta Tumpa iñee araca umimbeu vae reta jare mburuvicha guasu reta uipota tēi uecha pe reta peecha ma vae, ěrei uecha'á. Jae ramiño vi jae reta uipota tēi uyandu pe reta piyandu ma vae, ěrei uyandu'á —jei—.

Samaria pegua ipiacavi vae

²⁵ Pentí ara pentí mboroyocui re oporombocue vae uyemboi Jesús jovai jare jei chupe:

—Oporombocue vae, ¿mbae pa ayapota anoi vaerā tecove opa mbae vae?

Uipota tēi uyavica Jesús pe.

²⁶ Jayave Jesús jei chupe:

—¿Mbae pa uyecuatía oĩ mboroyocui pe? ¿Mbae pa nemingueta joco pe? —jei—.

²⁷ Jayave jei Jesús pe:

—Uyecuatía oĩ cuarái: 'Eau ndeYa Tumpa opaete ndepia reve, jare opaete nderecove reve, jare opaete nepirāta reve jare opaete ndepiyemingueta reve. Jae ramiño vi eau nderapicha nde ndiyerau rami.' Jucuarái uyecuatía oĩ —jei—.

²⁸ Jayave Jesús jei chupe:

—Icavi co ndere. Cuarái iyapo jare nenoita tecove opa mbae vae —jei—.

²⁹ Mboroyocui re oporombocue vae uipota uicuaaca jupi co jae. Jáeramo upirandu Jesús pe:

—¿Quía pa co jae cherapicha?

³⁰ Jayave Jesús jei chupe:

—Penti cuimbae oo Jerusalén güi tenta guasu Jericó coti. Jare aramoiño imonda vae reta uipisi. Jae reta omboi jemimonde chugüi jare umbipere. Uyuca rai rai ueya reta tape rupi —jei—. ³¹ Jare aramoiño ou penti sacerdote jocua tape rupi. Jare uecha yave cuimbae ipere vae, uipota'á etei oya jese. Mbiri rupiño uasa chugüi —jei—. ³² Jae ramiño vi ou penti levita jocua tape rupi. Jare uecha yave cuimbae ipere vae, uipota'á etei oya jese. Mbiri rupiño vi uasa chugüi —jei—. ³³ Ērei penti Samaria pegua ou jocua tape rupi, jare ou uvāe

cuimbae ipere vae oĩ vae pe. Jare Samaria pegua uecha yave, uiparareco —jei—. ³⁴ Jayave oya jese jare uequi moa uipiano vaerã chugüi ipere vae jare umbiyasoi ipere. Jayave uupi imburica re jare güiraa penti tenta pe, jare joco pe uyandareco jese —jei—. ³⁵ Jare piareve pe Samaria pegua oota ma joco güi yave, uequi corepoti mocui ara mbaraviqui jepi pegua jare umee tenta iya pe. Jei chupe: 'Yandareco mi jese. Jare jeta ete cua güi ndiyemingasta yave, ambiepita ndeve ayu ye yave' —jei, jei—.

³⁶ Añave tapirandu ndeve: ¿Quía nunga pa co jae jocua imonda vae reta uipisi vae japicha añetete vae? Echa'ã mbapi cuimbae uasa jocatoropi —jei.

³⁷ Jare mboroyocui re oporomboe vae jei Jesús pe:

—Jocua uiparareco vae.

Jayave Jesús jei chupe:

—Ecuia iyapo jae uyapo vae rami.

Jesús opou Marta jare María ipi

³⁸ Jesús jare jemimboe reta jecuae yugüiraa Jerusalén coti. Jayave yugüiraa uvãe penti tenta guasu-rai pe. Joco pe penti cuña Marta jee vae umbiresive cavi jenta pe Jesús. ³⁹ Jare Marta ipiqui co jee María. Jare María uguapi yandeYa iyipi pe uyapisaca vaerã jese. ⁴⁰ Ërei Marta uyemipia'ã tembiurã uyapo oĩ vae re. Jayave ou Jesús oĩ vae pe jare jei chupe:

—CheYa, chepiquii chembori'ã. Jáeramo cheño ayapo añ tembiurã. ¿Icavi ra ndeve uyapo vaerã cuarã? Iyocui chembori vaerã —jei.

⁴¹ Jayave yandeYa jei chupe:

—Marta, Marta, ndiyemipia'ã jeta mbaembae re. ⁴² Ërei yaipotã jeta mbaembae. Cua María uiparavo icavi vae ndegüi. Ndarau quía ipuere uequi chugüi —jei.

11

Jesús oporomboe yerure re

(Mt 6.9-15; 7.7-11)

¹ Jare penti ara Jesús uyerure oĩ Tumpa pe. Jare opa ma yave, penti jemimboe jei chupe: —CheYa, oremboe nduyerure vaerã Tumpa pe Juan vi omboe jemimboe reta rami.

² Jayave Jesús jei chupe reta:

—Piyerure Tumpa pe yave, pere cuarã:

'OreRu ara pe neĩ vae, tuyembiaadoraca nderee.

Tou ndeporoyocua.

Tuyeyapo nde ndere vae cua ivi pe ara pe uyeyapo oĩ rami.

³ Emee oreve opa ara orerembiurã.

⁴ Embiasa oreve orembaeyoa reta, ore numbiasa ipotave iyoa orecoti vae pe rami.

Jare agüiye emañe año guasu re uyapoca vaerã oreve mbaeyoa.

Oreperi año guasu güi' —pere, jei.

⁵ Jayave jei vi chupe reta:

—Yamijaanga penti cuimbae jare iamigo. Cuimbae oo yave iamigo jenta pe piare mbite rupi uyerure vaerã chupe mbae re, aramoi jeita chupe: 'Cheamigo, iporuca cheve mbapi mbiyape. ⁶ Echa'ã penti cheamigo ou uvãe chepi, jare mbaeti mbae anoi amee jou vaerã.'

Aramoi jucuarãita jei —jei—. ⁷ Jare aramoi iamigo ombouta chupe ñnee japipe güi: 'Agüiye chemambeco. Echa'ã uyeyuquenda ma oĩ cheronque, jare che jare opaete chesambiai reta nduyapacua ma noĩ ndoque vaerã. Chepuere'ã ma apüa amee vaerã ndeve.' Aramoi jucuarãita jei —jei—. ⁸ Che jae peve, yepe tẽi uipota'ã upüa, jocua cuimbae co jae iamigo ramo, ãrei jocua cuimbae jecuañe ueni oĩ yave, upüata co umee vaerã chupe opaete uipota vae —jei—.

⁹ Jare che jae peve, piyerure Tumpa pe mbae re, jare Tumpa umeeta peve. Peeca, jare pevãeta. Pembopu onque, jare uyepeata peve —jei—. ¹⁰ Echa'ã uyerure yave quía Tumpa pe mbae re, Tumpa umeeta chupe. Jare ueca yave quía mbae, uvãeta. Jare ombopu yave quía onque, uyepeata chupe —jei—.

¹¹ Nde nenoi yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe. Jae ramiño vi nderai uyerure yave ndeve pira re, ndarau nemee chupe penti mboi pira ipepica pe —jei—.

¹² Jae ramiño vi nderai uyerure yave ndeve ururupia re, ndarau nemee chupe penti chumicarape ururupia ipepica pe —jei—. ¹³ Yepe tẽi pe reta jecuañe piyapo icavi mbae vae, ãrei pemee co mbaembae icavi vae pesambiai reta pe. Jáeramo peRu ara pe oĩ vae iquirẽi ete umee Espiritu Santo uyerure chupe jese vae reta pe —jei.

Jei reta icavi mbae vae Espiritu Santo coti

(Mt 12.22-30; Mr 3.20-27)

¹⁴ Pentu ara Jesús umbisiri año penti cuimbae iupa vae güi. Jare año usiri ma chugüi yave, cuimbae uyemingueta. Jare jeta vae joco pe ñugüinoi vae ipiacañi. ¹⁵ Ërei amocue vae jei:

—Aña guasu Beelzebú imbaepuere pe umbisiri aña reta oya jese vae reta güi.

¹⁶ Jare İru vae reta uipota uicuaa mbae ra Jesús ipuere uyapo. Jáeramo jei reta Jesús pe uyeyapo vaerã mbae ara re jae reta uicuaa vaerã quía co jae. ¹⁷ Ęrei Jesús uicuaa ipiyemingueta, jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—. ¹⁸ Jae ramiño vi Satanás pochi iyupe yave, opata co iporoyocua. Echa'ã pe reta pere che ambisiri aña reta oya jese vae reta güi aña guasu Beelzebú imbaepuere pe —jei Jesús chupe reta—. ¹⁹ Ęrei che ambisiri yave aña reta oya jese vae reta güi Beelzebú imbaepuere pe, ¿quía imbaepuere pe ra umbisiri aña reta oya jese vae reta güi perentarã reta? Pepuere pepirandu chupe reta jese —jei—. ²⁰ Ęrei che ambisiri aña reta oya jese vae reta güi Tumpa imbaepuere pe. Jáeramo pepuere picuaa ou ma co uvãe peve Tumpa iporoyocua —jei—.

²¹ Pentu cuimbae ipirãta vae mboca güinoi vae uyandareco yave jenta re, ipuere'ã quía upiro chugüi imbaembae —jei—. ²² Ęrei ou yave İru cuimbae ipirãta ete chugüi vae uñerãro vaerã jae ndive, umiamirita co jare upirota chugüi imboca güirovia catu tẽi uyerepi vaerã pipe vae. Jae ramiño vi upirota chugüi imbaembae umbiyao vaerã umee İru reta pe —jei—.

²³ İme yave quía uipotã'ã ico cheİrurã vae, oyovaicho co che ndive. Jae ramiño vi ime yave quía chembori'ã vae, uyapo co icavi mbae vae checoti —jei chupe reta—.

*Aña usiri jare ou ye vae
(Mt 12.43-45)*

²⁴ Pentu aña usiri ma yave oya jese vae güi, uguata ñana rupi ueca quiupe ico vaerã. Ęrei ipuere'ã yave uvãe quiape ico vaerã, jei iyupe: 'Taa ye jocua chero ayu chugüi vae pe' —jei, jei—. ²⁵ Echa'ã yandepuere yamijaanga penti o jocua cuimbae aña usiri ma chugüi vae re. Aña ou ye uvãe yave jocua o pe, uecha o iya utupei ma jare opa oñono cavi —jei—. ²⁶ Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerã. Tenonde yave, penti aña oya jese yave, jocua cuimbae uiporara. Ęrei taicue rupi ocho ma aña reta oya jese. Jáeramo tanta uiporara —jei.

Tumpa umivendiseta vae reta

²⁷ Jare Jesús cua mbaembae re imiari yave, penti cuña joco pe ñugüinoi vae reta ipite pe oİ vae iñeeãta reve jei:

—Tumpa tumivendise ndesi. Echa'ã nde ndea co chugüi jare jae nemicambu —jei.

²⁸ Ęrei Jesús jei:

—Añete co. Ęrei Tumpa umivendiseta opaete uyapisaca iñee re vae reta, uyapo yave jae jei vae —jei.

*Uipota reta uecha miacañi
(Mt 12.38-42; Mr 8.12)*

²⁹ Jare jeta vae yugüeru Jesús oİ vae pe. Jayave Jesús jei chupe reta:

—Añave yugüireco vae reta icavi mbae vae uyapo vae reta co. Jae reta uipota ayapo vaerã mbae aicuaaca vaerã chupe reta quía co che. Ęrei jaeño uyeyapota mbae Jonás pe uyeyapo vae rami, jae reta uicuaa vaerã quía co che —jei—. ³⁰ Echa'ã Jonás pe uyeyapo vae uicuaaca Nínive pegua reta pe Jonás jei chupe reta vae añete vae co. Jae ramiño vi uyeyapota cheve vae uicuaacata añave yugüireco vae reta pe quía co che. Che co jae cuimbaerã uyeyapo vae —jei—. ³¹ Tumpa upuruãa yave, jocua cuña mburuvicha guasu ico sur coti vae upũata umbijeco vaerã añave yugüireco vae reta. Echa'ã jae ou mbiri ete güi uyapisaca vaerã Salomón iyaracuaa catu vae re. Ęrei che hearacuaa catu ete Salomón güi —jei—. ³² Tumpa upuruãa yave, Nínive pegua reta upũata umbijeco vaerã añave yugüireco vae reta. Echa'ã jae reta ueya iyemingueta icavi mbae vae ipia pe oİ vae, Jonás umimbeu chupe reta yave Tumpa iñee. Ęrei chembaepuere tuicha ete co Jonás imbaepuere güi —jei—.

*Mechero yamiendi yave
(Mt 5.14-16; 6.22-23)*

³³ Mechero yamiendi yave, ndarau ñañomi. Ndarau ñañono yapepo uyembovapo oİ vae igüi pe. Ñañono co mechero jenda pe, o pe uique vae reta güinoi vaerã tembipe —jei—. ³⁴ Tembipe uique yanderete pe yanderesa rupi. Icavi vae reta nderesa, nderete tineeta tembipe pe. Ęrei icavi'ã yave nderesa, nderete tineeta pĩtumimbi pe —jei—. ³⁵ Jáeramo iñemoa ngatu agüye vaerã nderete tinee pĩtumimbi pe. Echa'ã tineeta tẽi tembipe pe —jei—. ³⁶ Nderete tinee yave tembipe pe, ndarau ico joco pe pĩtumimbi. Opaete tineeta tembipe pe, penti tembipe tuicha vae nembiesape vae rami —jei.

Jesús umbijeco fariseo reta jare boroyocui re oporombœ vae reta

(Mt 23.1-36; Mr 12.28-40; Lc 20.45-47)

³⁷ Jare jucuarãi imiari ma yave Jesús, penti fariseo uparea chupe ucaru vaerã jae ndive. Jayave Jesús oo fariseo jenta pe jare uguapã ucaru vaerã. ³⁸ Jare fariseo cua uecha yave, ipiacañi jese. Echa'ã Jesús uyepoe'ã ndei ucaru mbove. ³⁹ Jayave yandeYa jei:

—Pe reta co jae fariseo reta. Pe reta co jae taza jare plato icupe rupiño uyeyoe vae rami. Ërei pepia iquia co. Echa'ã pipota ñru vae reta imbaembae jare piyapo icavi mbae vae —jei—. ⁴⁰ Pe reta co jae iyaracuaa mbae vae reta. Echa'ã Tumpa uyapo opaete yandepuere yaecha vae. Ërei uyapo vi opaete yandepuere mbae yaecha vae —jei—. ⁴¹ Pemee pequirẽi reve mbaembae iparavete vae reta pe. Cua piyapo yave, picuaacata ñru vae reta pe iquia mbae co pepia —jei—.

⁴² Pe reta co jae fariseo reta. Piporarata co. Echa'ã pemee Tumpa pe diezmo temiti reta penoi vae güi. Ërei piyapo'ã jupi piyapo vaerã vae, jare peau'ã Tumpa. Icavi co pemee vaerã Tumpa pe jocua nunga diezmo. Ërei piyapota tẽi jupi co piyapo vaerã vae, jare peauta tẽi Tumpa —jei—. ⁴³ Pe reta co jae fariseo reta. Piporarata co. Echa'ã pipota peguapã tenda tenondegua vae reta pe tupao pe, jare pipota ñru vae reta pe piyembisaludaca vaerã calle reta rupi —jei—. ⁴⁴ Pe reta co jae mboroyocui re oporombœ vae reta jare fariseo reta. Piporarata co. Echa'ã pepurumbitaviñoi. Pe reta co jae teõgüeriru reta quia uecha'ã vae rami. Yepe tẽi ñru vae reta upiõro jese reta, uicuaa'ã joco pe ñügüinoi vae —jei—.

⁴⁵ Jayave penti mboroyocui re oporombœ vae jei Jesús pe:

—Cua añave ndere vae rupi ndere vi icavi mbae vae oreve.

⁴⁶ Jayave Jesús jei:

—Pe reta co jae mboroyocui re oporombœ vae reta. Pe reta vi piporarata co. Echa'ã pe reta pere ñru vae reta pe uyapo vaerã yavai uyapo vaerã vae. Yamijaanga penti tivita. Pe reta pere ñru vae reta pe ovoi vaerã penti tivita poi ete vae. Ërei pe reta pembori'ã etei ovoi vaerã. Pe reta piyaviqui'ã etei tivita —jei—. ⁴⁷ Piporarata co. Echa'ã pe reta piyapo Tumpa ñnee aracae umimbeu vae reta iteõgüeriru reta. Jare petenondegua reta uyuca reta —jei—. ⁴⁸ Jucuarãi picuaaca petenondegua reta uyapo vae icaviño co peve. Echa'ã jae reta uyuca reta, jare pe reta piyapo iteõgüeriru reta —jei chupe reta—. ⁴⁹ Jucuarãño vi Tumpa iyaracuaa catu vae jei: 'Amondota peve chiñee umimbeu vae reta jare cheremimondo reta, jare pe reta piyucata amocue vae jare piyapota icavi mbae vae ñru reta pe' —jei, jei—. ⁵⁰ Jare pe reta añave pico vae penoita teco opaete Tumpa ñnee umimbeu vae reta ivi uyeyapo güive uyeyucaca vae imano re —jei—. ⁵¹ Tenonde voi Abel uyeyucaca, jare taicue rupi Zacarías uyeyucaca. Echa'ã Zacarías umano maemimba uyeyucacue uñemeearendã jare Tumpa jo ipãu pe. Añete che jae peve, cua reta jare opaete ñru vae reta imano re pe reta añave pico vae piyembijecota —jei—.

⁵² Pe reta co jae mboroyocui re oporombœ vae reta. Piporarata co. Echa'ã pemboe'ã ñru vae reta uicuaa vaerã Tumpa. Pe reta etei picuaa'ã Tumpa. ñru vae reta uipota tẽi uicuaa Tumpa, Ërei pe reta piyopia agüiye vaerã uicuaa —jei—.

⁵³ Jare jucuarãi jei ma yave chupe reta, mboroyocui re oporombœ vae reta jare fariseo reta pochi ete chupe, jare umbipã upirandu chupe jeta mbaembae re. ⁵⁴ Jecuaeño jae reta uyapisaca cavi jese. Echa'ã uipota tẽi uyandu jei mbae ipuere umbijeco jese vae.

12

Piñemoa ngatu fariseo reta güi

¹ Jare jeta ete uyembati Jesús õi vae pe, jare uñemiañamianã. Jayave Jesús jei jemimboe reta pe rani:

—Piñemoa ngatu fariseo reta güi. Echa'ã jae reta upurumbitavi vae reta co. Jare tavi ipuere uñemiai levadura rami —jei—. ² Ime yave mbae uyeyasoï vae, uyeechacañotai co. Jae ramiño vi ime yave mbae uñeñomi vae, uyecuaañotai co —jei—. ³ Jáeramo pñtumimbi pe pere vae uyenduta tembipe pe, jare perenta japipe pe pere viari vae jerãcuata opaete vae uyandu vaerã —jei—.

Pequiye Tumpa güi

(Mt 10.26-31)

⁴ Jare che jae peve, cherivi reta, agüiye pequiye upuruyuca vae reta güi. Echa'ã upuruyuca yave, mbaeti ye mbae icavi mbae vae ipuere uyapo peve —jei—. ⁵ Ërei tamimbeu peve quia güi pequiye vaerã. Icavi co pequiye vaerã Tumpa güi. Echa'ã jae güinoi mbaepuere upuruyuca vaerã jare oporomondo vaerã cañitei pe. Añete che jae peve, pequiye chugüi —jei—.

⁶ Picuaa co quirāi umaemee vae reta umee pandepo güira-rai mbovi ete corepoti re. Ērei Tumpa ñacañi'ā penti yepe güira-rai güi —jei—. ⁷ Tumpa uicuaa mbovi pea penoi peāca re vae. Jáeramo agüiye pequiye. Echa'ā Tumpa perau ete jeta güira-rai reta güi —jei—.

Īru vae reta jovaque uyecuaaca vae
(Mt 10.32-33; 12.32; 10.19-20)

⁸ Jae ramiño vi che jae peve cua: Ime yave quía Īru vae reta jovaque jei yave: 'Che co jae Jesús jemimboe', che cuimbaerā ayeyapo vae jaeta ángel Tumpa pe uyeyocui vae reta jovaque: 'Cua co jae cheremimboe' —jaeta, jei Jesús—. ⁹ Ērei ime yave quía Īru vae reta jovaque checuacu vae, che vi aicuacuta ángel Tumpa pe uyeyocui vae reta jovaque —jei—.

¹⁰ Jare ime yave quía jei icavi mbae vae che cuimbaerā ayeyapo vae coti vae, Tumpa umbiasata chupe. Ērei ime yave quía jei icavi mbae vae Espiritu Santo coti vae, Tumpa ndarau etei umbiasa chupe —jei Jesús chupe reta—.

¹¹ Jare Īru vae reta pereraa yave pemee vaerā tupao reta pe jare mburuvicha reta pe jare Īru vae reta mbaepuere güinoi vae pe, agüiye piyemipia'ā mbae pereta chupe reta vae re —jei—. ¹² Echa'ā Espiritu Santo uicuaacata peve jocua ora pe etei mbae pere vaerā —jei.

Cuimbae icocatu vae iyaracuaa mbae vae

¹³ Jayave penti cuimbae jeta vae ipite pe oī vae jei Jesús pe:

—Oporomboe vae, ere cheriquei pe umbiyao vaerā cheve oreru ueya vae.

¹⁴ Jayave Jesús jei chupe:

—Cuimbae, che chepuere'ā co ayapicatu jocua nunga. Ndarau umbiyao peve nderu ueya vae —jei.

¹⁵ Jayave Jesús jei opaete vae pe:

—Piñemoa ngatu agüiye vaerā pipota Īru vae reta imbaembae. Echa'ā ndarau yaico cavi jeta mbaembae ñanoi vae ramoño —jei.

¹⁶ Jayave jei chupe reta umijaanga reve:

—Penti cuimbae icocatu vae iavati yagüiye cavi. ¹⁷ Jare cuimbae jei iyupe ipia pe: '¿Mbae ra ayapota? Mbaeti ma cheavati jendarā' —jei, jei—. ¹⁸ Jayave jei iyupe ipia pe: 'Aicuaa ma. Ambaita cheavatio reta jare ambutuicha eteta cheavatio reta, jare joco pe añuvatuta opaete cheavati jare opaete uyeaviro vae' —jei, jei—. ¹⁹ Jayave che jaeta cherecove pe cuarāi: 'Cherecove, jeta ete ma mbaeviro niñuvatu. Uepitita jeta año pegua. Eputuu, ecaru, ecau jare iyerovia.' Cuarāi jaeta —jei, jei—. ²⁰ Ērei Tumpa jei jocua cuimbae pe: 'Nde co jae iyaracuaa mbae vae. Echa'ā cua pītu aequita nderecove ndegüi. Jare jayave ¿quía ra güinoita opaete jocua mbaembae niñuvatu ndiyupeguarā vae?' —jei, jei.

²¹ Jayave Jesús jei chupe reta:

—Ime yave quía jeta mbaembae uñuvatu iyupeguarā vae, Ērei icocatu'ā yave Tumpa coti, uyeyapota chupe jocua cuimbae icocatu vae pe uyeyapo rami —jei.

Agüiye piyemipia'ā mbaembae re

(Mt 6.25-34)

²² Jayave Jesús jei jemimboe reta pe:

—Jáeramo che jae peve, agüiye piyemipia'ā perembiurā vae re. Jae ramiño vi agüiye piyemipia'ā peremimonderā vae re —jei—. ²³ Ndarau pepuere pico cavi jecuaeño piyemipia'ā yave perembiurā vae re, jare peremimonderā vae re —jei—. ²⁴ Pemae güira reta re. Echa'ā jae reta umaeti'ā jare umbaeviro'ā vi. Mbaeti vi güinoi avatio uñuvatu vaerā iavati. Ērei Tumpa umingarua reta. Jare Tumpa perau ete güira reta güi —jei—.

²⁵ Aramai piyemipia'ā pipota tēi pepucu ramo. Ērei ndarau etei pepuere piyembicuaacuaa pepucu ete vaerā —jei Jesús chupe reta—. ²⁶ Mbaeti etei mbae pepuere piyapo cua re. Ērei cua yavat'ā co Tumpa pe. Jáeramo agüiye piyemipia'ā Īru mbaembae re —jei—. ²⁷ Pemae mbaepoti reta re, quirāi ucuacuaa reta. Uparaviqui'ā reta. Umaepova'ā reta vi. Ērei che jae peve, mbaepoti reta ipōra ete Salomón jemimonde ipōra vae güi. ²⁸ Tumpa omopōra ñana, yepe tēi penti ara ñana oī co pe jare piareve pe ocai. Jáeramo Tumpa umeeta co peve peremimonderā. Michi ete co pepurugüirovia —jei—. ²⁹ Agüiye piyemipia'ā perembiurā vae re, jare agüiye piyemipia'ā Īru mbaembae re —jei—. ³⁰ Echa'ā opaete ivi pegua reta uyemipia'ā cua mbaembae re. Ērei peRu uicuaa icavi co penoi vaerā cua mbaembae —jei—. ³¹ Ērei icavi co pipota ete vaerā Tumpa iporoyocua, jare Tumpa umeeta peve opaete cua mbaembae —jei—.

Mbaembae ara pegua

(Mt 6.19-21)

³² Agüiye pequiye, yepe tēi pe reta mbovi ete co. Echa'ā Tumpa umeeta co pe reta pico vaerā iporoyocua pe —jei—. ³³ Pemee corepoti re pembaembae, jare pemee corepoti uata

chupe vae reta pe. Cuarāi piyapo yave, penoita mbaembae ara pegua. Jae co peurupucu ara pe penoita vae rami. Jocua nunga urupucu ndarau etei indechi jare jocua mbaembae icavi vae peurupucu ara pegua pe penoi vae ndarau ucañi. Echa'ā imonda vae ndarau oya jese jare cupii ndarau urucumegua —jei—. ³⁴ Echa'ā piñuvatu yave mbaembae icavi vae piyupeguarā ivi pe, jecuaeño pepia pe piyeminguetata ivi pegua re. Ērei piñuvatu yave mbaembae icavi vae piyupeguarā ara pe, jecuaeño pepia pe piyeminguetata ara pegua re —jei—.

Uyeyocui vae jecuaeño uāro vae

³⁵⁻³⁶ Yamijaanga peré uyeyocui vae reta. Uyeyocui vae reta ipatrón oo umenda vaerā yave, uyeyocui vae reta uāro ñugüinoi ipatrón ou ye regua. Uāro reta jare jecuaeño jendi imechero reta. Jare ipatrón ou ye uvāe yave ombopu onque, jupivoi jembiocui reta uipea onque ipatrón ipuere vaerā uique jenta pe —jei—. ³⁷ Uyeyocui vae reta jecuaeño uāro ñugüinoi yave ipatrón ou ye uvāe yave, uyeroviata reta. Añete che jae peve, ipatrón uyembicuata toalla pe, jare jeita jembiocui reta pe uguapi vaerā mesa pe, jare ipatrón etei umingaruta jembiocui reta —jei Jesús—. ³⁸ Aramoi ipatrón ou yeta uvāe pītu ma yave ani piare mbite rupi. Ērei jae uecha yave jembiocui reta uāro ñugüinoi, jae reta uyeroviata co —jei—. ³⁹ Aipota picuaa vaerā cua: Pentí tenta iya uicuaa yave mbae ora pe outa uvāe imonda vae oñomi vaerā imbaembae, uñemicuatirota tēi jare ndarau tēi umaeño imonda vae re güiraa vaerā imbaembae chugüi —jei—. ⁴⁰ Jae ramiño vi pe reta peāro, agüiye vaerā che cuimbaerā ayeyapo vae ayu ye avāe piyandareco'ā pei yave —jei chupe reta.

*Uyeyocui vae uyapo'ā ipatrón jei vae
(Mt 24.45-51)*

⁴¹ Jayave Pedro jei Jesús pe:
—CheYa, cua ndere ma nemijaanga reve. ¿Oreve peguarāño pa co cua? ani ¿opaete vae peguarā pa? —jei.

⁴² Jayave yandēYa jei:
—Pentí uyeyocui vae iyaracuaa vae uyapo ipatrón jei chupe uyapo vaerā vae. Jare ipatrón umee chupe ico vaerā ñru jembiocui reta juvicharā, jare umee vaerā chupe reta jembiorā opa ara —jei—. ⁴³ Ipatrón ou ye uvāe yave jenta pe, uecha yave jocua jembiocui uyapo oī iporaviqui, jocua jembiocui uyeroviata co —jei chupe reta—. ⁴⁴ Añete che jae peve, ipatrón umeeta chupe uyandareco vaerā opaete imbaembae re —jei Jesús—. ⁴⁵ Ērei aramoi uyeyocui vae jei iyupe ipia pe: 'Chepatrón ndarau ou ye imambae.' Jare umbipi uinupa ñru uyeyocui vae reta - cuimbae reta jare cuñatai reta - jare ucaru jare ucau jare usavipo —jei—. ⁴⁶ Jayave pentí ara ipatrón ou yeta uvāe jembiocui uyandareco'ā oī yave. Jocua ora pe etei ipatrón uipocouta. Jayave ipatrón uiporaraca eteta chupe jare omondota ico vaerā ipatrón iporoyocui uyapo mbae vae reta ndive —jei—. ⁴⁷ Ipatrón uiporaraca eteta. Echa'ā uyeyocui vae uicuaa tēi ipatrón iporoyocui, Ērei uyapo'ā —jei chupe reta—. ⁴⁸ Ērei ime yave uyeyocui vae uicuaa'ā ipatrón iporoyocui vae, yepe tēi uiporarata co uyapo'ā ipatrón iporoyocui ramo, Ērei ipatrón ndarau uiporaraca ete chupe. Echa'ā ipatrón uicuaa yave jembiocui pe iporoyocui, icavi co jembiocui uyapo vaerā uicuaa vae rupi —jei—.

*Ayu uyembiyao vaerā uyugüi ivi pegua reta
(Mt 10.34-36)*

⁴⁹ Che ayu cua ivi pe tata ambiyepota vaerā, jare chequirēi ete opa cheparaviqui ayapo —jei—. ⁵⁰ Che aiporara eteta co jare yavai eteta cheve opa uyeyapo regua —jei—. ⁵¹ ¿Pepia pe piyemingueta pa che ayu amee vaerā mbiacatu ivi pegua reta pe? Che jae peve, jucuarāi'ā co. Che ayu uyembiyao vaerā uyugüi ivi pegua reta —jei chupe reta—. ⁵² Echa'ā añave güiye yugüireco yave pandepo pentí tenta pe, uyembiyaota co uyugüi reta. Mbapi oyovaichota mocui ndive, jare mocui oyovaichota mbapi ndive —jei—. ⁵³ Tu oyovaichota tai ndive, jare tai oyovaichota tu ndive. Ichi oyovaichota imembi cuña ndive, jare imembi cuña oyovaichota ichi ndive. Imesi oyovaichota imembi-tati ndive, jare imembi-tati oyovaichota imesi ndive —jei.

*Picuaa'ā etei mbae añave uyeyapo oī vae
(Mt 16.1-4; Mr 8.11-13)*

⁵⁴ Jare Jesús jei yati vae reta pe:
—Peecha yave amapītu uyeyapo oī guarasi uique vae coti, jupivoi pere: 'Oquita co.' Jare jucuarāi uyeyapo —jei—. ⁵⁵ Jae ramiño vi tanta ivitu yave, pere: 'Aracuta co.' Jare jucuarāi uyeyapo —jei—. ⁵⁶ Pe reta co jae upurumbitavi vae reta. Echa'ā ara jare ivi re pemae yave, picuaa mbae uyeyapota vae. Ērei picuaa'ā etei mbae añave uyeyapo oī vae —jei chupe reta —.

Iyeyapicatu nderovaicho ndive
(Mt 5.25-26)

⁵⁷ ¿Maera pa peatēi picuaa mbae jupi piyapo vaerã vae? —jei—. ⁵⁸ Ndeo yave uipota uñeapo nderé mbae re vae ndive mburuvicha pe, tape rupi peo rambueve iyeyapicatu jae ndive, agüiye vaerã jae uñeapo nderé mburuvicha pe. Echa'ã mburuvicha nemondota peresoriruru iyandarecoa pe, jare peresoriruru iyandarecoa neñonota peresoriruru pe —jei—. ⁵⁹ Che jae ndeve, ndarau etei neñ peresoriruru güi ndei opaete ndepia nembiepi mbove —jei.

13

Peeya piyemingueta icavi mbae vae pepia pe oĩ vae

¹ Jare amocue joco pe ñugüinoi vae reta umimbeu Jesús pe quirãi Pilato uyucaca amocue Galilea pegua reta, jae reta maemimba uyeyucacue reta umee Tumpa pe ñugüinoi rambueve. ² Jayave Jesús jei chupe reta:

—Aramoi pe reta pepia pe piyemingueta jucuarãi uyeyapo jocua Galilea pegua reta pe, jae reta iyoa ete opaete ñru Galilea pegua reta güi ramo. ³ Che jae peve, jucuarãi'ã co. Jare peeya'ã yave piyemingueta icavi mbae vae pepia pe oĩ vae, pe reta pecañiteita vi —jei—. ⁴ Jare jocua torre Siloé pe oĩse vae usururu jocua dieciocho vae re jare uyuca reta. Aramoi pe reta pepia pe piyemingueta jocua dieciocho vae iyoa ete opaete ñru Jerusalén pegua reta güi —jei—. ⁵ Che jae peve, jucuarãi'ã co. Jare peeya'ã yave piyemingueta icavi mbae vae pepia pe oĩ vae, pe reta pecañiteita vi —jei.

Iva ia mbae vae

⁶ Jayave Jesús jei chupe reta umijaanga reve:
—Penti cuimbae güinoi ico pe penti iva. Oo tēi ueca iva ía. Uvãe'ã chupe —jei—. ⁷ Jayave jei ico pe uparaviqui chupe vae pe: 'Mase, mbapi año ma ayu tēi aeca cua iva ía jare avãe'ã chupe. Iyasia. Ñañotita tēi ñru temiti jendacue pe' —jei, jei—.

⁸ Jayave co pe uparaviqui vae jei co iya pe: 'Patrón, emaeño tupita ye penti año pegua. Tayoo rani iyipi rupi jare tañono vacarepoti iyipi rupi' —jei, jei—. ⁹ 'Jayave ía yave, icavita co. Ërei ía'ã yave, ndepuereta ndiyasiaca' —jei, jei.

Jesús umbigüera cuña mbutuu ara pe

¹⁰ Jare Jesús oporombocue oĩ penti judío reta itupao pe mbutuu ara pe. ¹¹ Jare uecha joco pe penti cuña dieciocho año ma imbaerasi vae. Jecuaeño ipe ete. Ipuere'ã etei uyemboi cavi. ¹² Jare Jesús uecha ma yave, jei chupe:

—Eyu checoti, cuña. Ndecuera ma co nembraerasi güi —jei.

¹³ Jayave Jesús oñono ipo cuña iñãca re. Jare jupivoi cuña ipuere uyemboi cavi jare umbipi umbiadora Tumpa.

¹⁴ Jayave tupao re uyandareco vae pochí cua re. Echa'ã Jesús umbigüera cuña mbutuu ara pe. Jáeramo tupao re uyandareco vae jei joco pe ñugüinoi vae reta pe:

—Icavi co yaparaviqui vaerã seis ara. Peyu jocua seis ara pecuera vaerã. Agüiye peyu pecuera vaerã mbutuu ara pe —jei.

¹⁵ Ërei yandeYa jei chupe:

—Pe reta co jae upurumbitavi vae reta. Pe reta piyora pegüeyey jare pemburica jenda güi mbutuu ara pe peraa vaerã pembüu —jei—. ¹⁶ Mase, cua cuña Abraham iñemoñaeta reta pegua co. Ërei Satanás dieciocho año ma umimbaerasi. ¿Icavi'ã pa che umbigüera vaerã cua mbaerasi güi mbutuu ara pe? —jei.

¹⁷ Jare cua Jesús jei ma yave, opaete Jesús jovaicho reta imara. Echa'ã opaete joco pe ñugüinoi vae reta uyerovia opaete icavi ete vae Jesús uyapo vae re.

Mostaza jáicue

(Mt 13.31-32; Mr 4.30-32)

¹⁸ Jayave Jesús jei:

—¿Mbae ra ipuere uyemijaanga Tumpa iporoyocua re? ¿Mbae ra amijaangata jese? ¹⁹ Yandepuere yamijaanga jese penti mostaza jáicue —jei—. Uñeñoti yave, ucuacuaa jare uyeyapo ivira tuicha vae. Jare güira reta yugüeru uyapo jaitirã jese —jei.

Levadura

(Mt 13.33)

²⁰ Jayave jei chupe reta:

—¿Mbae ra amijaangata Tumpa iporoyocua re? ²¹ Yandepuere yamijaanga jese levadura —jei—. Cuña umbiyea levadura jeta catu harina ndive, levadura uñemai vaerã opaete masa rupi —jei.

*Onque ipi-rai vae
(Mt 7.13-14, 21-23)*

²² Jare Jesús uguata opaete tenta guasu reta jare tenta guasu-rai reta rupi, jare oporomboe joco pe. Jare jecuaeño oo Jerusalén coti. ²³ Jayave penti vae upirandu Jesús pe:
—CheYa, ¿ime pa mbovi catu uyembiasacata vae?

Jayave Jesús jei joco pe ñugüinoi vae reta pe:

²⁴—Piñemimiráta piñue vaerá onque ipi-rai vae rupi. Echa'á che jae peve, jeta vae uipota tēita uique, ērei ndarau ipuere —jei—. ²⁵ Echa'á tenta iya uyequenda ma yave onque, pe reta pepitata oca pe. Jayave pemboputa tēi onque jare pereta tēi: 'OreYa, ipea onque oreve.' Ērei jae jeita peve: 'Che pucuaa'á'—jeita, jei—. ²⁶ Jayave pereta: 'Nducaru nderovaque, jare nde ndeporomboe orecale reta rupi'—pereta, jei—. ²⁷ Ērei jae jeita peve: 'Che jae peve, che pucuaa'á. Pe reta co jae icavi mbae vae uyapo vae reta. Pesiri chegüi'—jeita peve, jei—. ²⁸ Jayave piyaota jare perái pembiquiririuta. Echa'á peechata Abraham jare Isaac jare Jacob jare opaete Tumpa iñee aracae umimbeu vae reta Tumpa iporoyocua pe ñugüinoi. Ērei pe reta oca pe pēita —jei—. ²⁹ Yugüeruta reta opaete que rupi rupi güi, jare uguapita reta Tumpa iporoyocua pe —jei—. ³⁰ Ērei pemandúa cua re: Amocue añave uñemimichi vae uyembitenondecata co, jare amocue añave uyembutuicha vae uyembitaicuecata co —jei.

*Jesús ipiatiti Jerusalén pegua reta re
(Mt 23.37-39)*

³¹ Jocua ara yugüeru Jesús oñ vae pe amocue fariseo reta. Jae reta jei Jesús pe:

—Ecuca cua güi. Echa'á Herodes uipota ndeyucaca.

³² Jayave Jesús jei chupe reta:

—Herodes co jae penti aguara rami. Pecua ipi jare pemimbeu chupe quirái jecuae ambisirita añá reta oya jese vae reta güi jare ambigüerata imbaerasi vae reta añave jare curiye. Jare cōramo opata co cheparaviqui —jei—. ³³ Añete co, icavi co jecuaeño aa Jerusalén coti añave jare curiye jare cōramo. Echa'á Jerusalén peño judío reta uyuca Tumpa iñee umimbeu vae reta —jei—.

³⁴ Jerusalén pegua reta, pe reta piyuca Tumpa iñee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirēi tēi pumbati, uru umbati imembí reta ipepo igüi pe rami, ērei pe reta pipota'á —jei—. ³⁵ Mase, Tumpa usirita ma pegüi. Che jae peve, ndarau ma cherecha pere regua: 'Tuyembiaadoraca yandeYa jee re ou vae'—jei.

14

Cuimbae opaete jete iruru vae

¹ Jare penti mbutuu ara pe Jesús oo uique penti fariseo reta itenondegua jenta pe ucaru vaerá jae ndive. Jare fariseo reta umaē ñugüinoi Jesús re. ² Jare Jesús uecha joco pe penti cuimbae opaete jete iruru vae. ³ Jayave Jesús upirandu mboroyocui re oporomboe vae reta jare fariseo reta pe:

—¿Jei pa mboroyocui yandepuere yambigüera vaerá quía mbutuu ara pe?

⁴ Ērei jae reta quíiño. Jayave Jesús oñono ipo cuimbae imbaerasi vae re jare umbigüera. Jayave jei chupe oo vaerá. ⁵ Jayave Jesús jei joco pe ñugüinoi vae reta pe:

—Pemburica ani pegüeye uasavi yave penti ivicua pe mbutuu ara pe, jupivoi peo penoñ joco güi —jei.

⁶ Jare joco pe ñugüinoi vae reta ipuere'á mbae jei Jesús pe cua regua.

Agüiye eguapi tenda tenondegua vae pe

⁷ Jayave Jesús uecha quirái opaete tenta iya uparea chupe vae reta uiparavo tenda icavi vae. Jayave jei chupe reta umijaanga reve:

⁸—Penti cuimbae uparea ndeve yave menda vae pe, agüiye eguapi tenda tenondegua vae pe. Echa'á aramoí tenta iya uparea vi ñru uipiu ete ndegüi vae pe —jei—. ⁹ Jayave tenta iya güeruta jocua ñru vae ndeguapi vae pe jare jeita ndeve: 'Emee cua cuimbae pe nerenda.' Jayave nde nemarata co ndeo ndeguapi tenda taicuegua vae pe —jei—.

¹⁰ Ērei tenta iya uparea ndeve yave, ecua eguapi tenda taicuegua vae pe. Echa'á ou yave tenta iya, aramoí jeita ndeve: 'Cheamigo, ecua eguapi penti tenda tenondegua vae pe.' Jucuarái ndiyepiucata opaete yugüeru ucaru vaerá vae reta jovaque —jei—. ¹¹ Echa'á ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei.

¹² Jayave Jesús jei tenta iya pe:

—Ndipota yave ndepurumĩngaru, agũyie eparea neamigo reta jare nerentarã reta jare nerentaigua icocatu vae reta pe. Echa'ã chupe reta ndeparea yave, jae reta upareata ndeve nde ndeparea chupe reta ramo —jei—. ¹³ Ērei ndipota yave ndepurumĩngaru, eparea iparavete vae reta jare ipo chutu vae reta jare icõcho vae reta jare jesa mbae vae reta pe —jei—. ¹⁴ Jucuarãi ndiyapo yave, Tumpa nemivendiseta. Echa'ã jae reta ndarau ipuere nemĩngaru. Ērei Tumpa umbijecoviata ndeve jupi vae reta icove ye yave yugũeru umanocue vae reta ipite gũĩ —jei.

Cuimbae jeta vae pe uparea ucaru vaerã vae
(Mt 22.1-10)

¹⁵ Jare penti jae ndive uguapi oĩ mesa pe vae cua uyandu yave, jei Jesús pe:

—Tumpa iporoyocua pe ucaruta vae uyemivendiseta co.

¹⁶ Jayave Jesús jei chupe:

—Penti cuimbae uyapoca jeta tembũu jare uparea jeta vae pe ucaru vaerã. ¹⁷ Tembũu oyi ma yave, omondo jembiocui jei vaerã uparea chupe vae reta pe: 'Peyu. Echa'ã opaete uñeño ma mesa pe' —jei, jei—. ¹⁸ Ērei penti penti jei uyeyocui vae pe ipuere'ã oo ucaru vaerã. Penti vae jei chupe: 'Água ma checorã jare icavi co aa vaerã amae jese. Jáeramo chepuere'ã aa. Ere ndepatrón pe chembiasa vaerã' —jei, jei—. ¹⁹ Jare ĩru vae jei chupe: 'Água ma diez gũeye. Aata amboporova reta. Jáeramo chepuere'ã aa. Ere ndepatrón pe chembiasa vaerã' —jei, jei—. ²⁰ Jare ĩru vae jei chupe: 'Ámenda ramo ete. Jáeramo chepuere'ã aa' —jei, jei—. ²¹ Jayave uyeyocui vae ou ye ipatrón pe jare umĩbeu chupe opaete cua regua. Jayave ipatrón pochi reve jei jembiocui pe: 'Ecuá voi opaete calle rupi jare eru cua pe iparavete vae reta jare ipo chutu vae reta jare icõcho vae reta jare jesa mbae vae reta' —jei, jei—. ²² Uyapo ma yave jucuarãi, uyeyocui vae jei ipatrón pe: 'Patrón, ayapo ma ndeporoyocui, jare imeño ĩru vae reta jendarã' —jei, jei—. ²³ Jayave ipatrón jei jembiocui pe: 'Ecuá ye opaete tape rupi jare ere nevãe chupe vae reta pe yugũeru vaerã, tinee vaerã cherenta' —jei, jei—. ²⁴ 'Echa'ã che jae peve, mbaeti penti ave jocua tenonde voi aparea chupe vae ucaruta cherenta pe' —jei, jei.

Yavai co oĩ oo vaerã Cristo jupíe
(Mt 10.37-38)

²⁵ Jare jeta vae uyembati Jesús oĩ vae pe. Jayave Jesús umaie jese reta jare jei chupe reta:

²⁶ —Ime yave quía uipota oo cherupíe vae, cherau ete'ã yave tu jare ichi jare jembireco jare isambiaĩ reta jare jentarã reta gũĩ, jare uyerau ete yave chegũĩ, ndarau ipuere ico cheremimboerã —jei—. ²⁷ Jare ime yave quía ovoĩ'ã icurusu oo vaerã cherupíe vae, ndarau ipuere ico cheremimboerã —jei—. ²⁸ Penti cuimbae iquirĩe yave uyapo torre, uguapita rani uipapa vaerã mbovi ra jepita, uicuaa vaerã icorepoti uepitita ra opa uyapo vaerã —jei chupe reta—. ²⁹ Echa'ã uyapo'ã yave jucuarãi, aramoi oñonota torre iguapicarã, ěrei ndarau uepiti icorepoti opa uyapo vaerã. Jáeramo opaete uecha vae reta oyoyaita jocua cuimbae —jei—. ³⁰ Echa'ã jeita reta: 'Jocua cuimbae umbipi tẽi uyapo torre, ěrei ipuere'ã opa uyapo' —jeita, jei—. ³¹ Jae ramiño vi penti mburuvicha guasu iquirĩe yave oo uñerãro ĩru mburuvicha guasu ndive, uguapita rani ipia pe uyemingueta cavi vaerã jese, uicuaa vaerã jocua diez mil isundaro reta ipuereta ra umiamiri jocua veinte mil sundaro reta jovaicho gũinoi vae —jei—. ³² Echa'ã ipia pe uyemingueta yave isundaro reta ndarau umiamiri jovaicho isundaro reta, mbiri jovaicho gũĩ oĩ rambueve, omondota amocue vae reta uyerure vaerã chupe agũyie vaerã uñerãro jae ndive —jei—. ³³ Jae ramiño vi ime yave quía pepite pe opaete imbaembae ueya'ã vae, ndarau ipuere ico cheremimboerã —jei chupe reta—.

Yuqui jembochi mbae vae
(Mt 5.13; Mr 9.50)

³⁴ Yuqui icavi co yau vaerã. Ērei jembochi'ã ma yave, ¿quirãita ra jembochi ye? —jei—.

³⁵ Icavi'ã ma mbaerã. Icavi'ã yepe ivi peguarã. Yamomboño. Uipota uyandu vae tuyapisaca cua re —jei.

15

Ovecha ucañi vae
(Mt 18.10-14)

¹ Jayave uyembati Jesús oĩ vae pe jeta mburuvicha peguarã ocovara vae reta jare teco icavi mbae vae uyapo vae reta. ² Jayave fariseo reta jare mboroyocui re oporomboe vae reta iñeenguru jese. Jae reta jei:

—Cua cuimbae uñemĩru teco icavi mbae vae uyapo vae reta ndive, jare ucaru jae reta ndive.

³ Jayave Jesús jei chupe reta umijaanga reve:

4—Penti cuimbae güinoi yave cien ovecha, umicañi yave penti, ueya ñru noventa y nueve ñana pe jare oo ueca ucañi vae uvâe chupe regua —jei—. 5 Jare uvâe ma chupe yave, ovoi güeru ye iyatîi re uyerovia reve —jei—. 6 Jare ou ye uvâe yave jenta pe, umbati opaete iamigo reta jare jentaigua reta, jare jei chupe reta: ‘Piyerovia che ndive. Avâe ye ma cheovecha ucañi vae’ —jei, jei—. 7 Che jae peve, jae ramiño vi ara pegua reta uyerovia eteta iyoa vae ueya yave iyemingueta icavi mbae vae ipia pe oï vae. Jucuarâta’â uyerovia noventa y nueve ‘jupi co che’ jei vae reta re. Echa’â jae reta jei tēi: ‘Mbaeti anoi yemingueta icavi mbae vae chepia pe’ —jei reta, jei—.

Corepoti ucañi vae

8 Jae ramiño vi penti cuña güinoi yave diez corepoti, umicañi yave penti, umiendi mechero jare utupei opaete tenta rupi. Ueca cavi uvâe chupe regua —jei—. 9 Jare uvâe ma chupe yave, umbati opaete iamiga reta jare jentaigua reta, jare jei chupe reta: ‘Piyerovia che ndive. Avâe ye ma corepoti amicañi vae’ —jei, jei—. 10 Che jae peve, jae ramiño vi ángel Tumpa pe uyeyocui vae reta uyerovia ete iyoa vae ueya yave iyemingueta icavi mbae vae ipia pe oï vae —jei.

Tai ucañi vae

11 Jayave Jesús jei chupe reta: —Penti cuimbae güinoi mocui tai. 12 Jare tai taicuegua vae jei tu pe: ‘Cheru, emee cheve añave voi mbaembae nde nemanu ma yave anoita vae’ —jei, jei—. Jayave tu umbiyao imbaembae umee tai reta pe —jei—. 13 Jayave mbovi ara rupi tai taicuegua vae umbati umee opaete imbaembae jare oo mbiri ambie ivi pe. Joco pe uyapo jeta parea jare jucuarâi opa umingasta iyugüi opaete icorepoti —jei—. 14 Jare opa icorepoti umingasta yave, ou caruai tuicha vae jocua ivi pe, jare cuimbae mbaeti ma mbae güinoi jou vaerâ —jei—. 15 Jayave oo uyerure penti patrón pe umee vaerâ chupe mbaraviqui. Jayave jocua patrón omondo jenta pe umingaru vaerâ cuchi reta —jei—. 16 Jare cuimbae uipota tēi uyemingapii ivope cuchi reta jou vae pipe. Jare mbaeti quía umee chupe jou vaerâ —jei—. 17 Jare cuimbae uicuaa ma quirâi uyapo iyaracuaa mbae vae uyapo vae rami. Jayave jei iyupe ipia pe: ‘Cheru umimbaraviqui vae reta jeta güinoi jou vaerâ. Èrei che amanota ma aï yembaï pipe’ —jei, jei—. 18 Taa ye cua güi cheru pe jare tae chupe: ‘Cheru, cheyoha ma Tumpa jare jare ndecoti vi. 19 Jupi’â ma aico vaerâ nderairâ. Emee cheve mbaraviqui ñru nemimbaraviqui vae reta pe neme rami’ —jaeta, jei, jei—. 20 Jayave uñatima ye tu jenta coti.

Èrei mbiri catu oï rambueve, tu uecha jare uiparareco. Jayave tu osi oovâiti tai, jare uicuaa jare uyurupite —jei—. 21 Jayave tai jei tu pe: ‘Cheru, cheyoha ma Tumpa coti jare ndecoti vi. Jupi’â ma aico vaerâ nderairâ’ —jei, jei—. 22 Èrei tu jei jembiocui reta pe: ‘Peru voi temimonde icavi vae pemondeca chupe. Jae ramiño vi piñono moâcaregua ipoâca re jare mbiapasa ipi re’ —jei, jei—. 23 Jare peru cua pe vaca tairusu vae aminguirâ vae piyuca. Yacaru jare yayerovia’ —jei, jei—. 24 ‘Echa’â tenonde yave cua cherai penti umanocue vae rami co cheve, èrei añave icove ye ma cheve. Tenonde yave ucañi chegüi, èrei añave avâe ye ma chupe’ —jei, jei—. Jare umbipi reta uyembiyerovia —jei—.

25 Jare tai tenondegua vae uparaviqui oï co pe. Jare ou ye oï yave coiño ma tenta güi, uyandu uyemimbi ñugüinoi tenta pe —jei—. 26 Jayave ueni penti tu jembiocui jare upirandu chupe mbae ra co jocua uyandu vae —jei—. 27 Jayave uyeyocui vae jei chupe: ‘Nderivi ou ye ma, jare nderu uyucaca vaca tairusu vae uminguirâ vae, tai ou ye icavi uvâe ramo’ —jei, jei—. 28 Jayave tai tenondegua vae pochi jare uique’â tenta pe. Jayave tu oē tenta güi jare jei tai pe uique vaerâ —jei—. 29 Jayave tai tenondegua vae jei tu pe: ‘Mase, jeta año ma ayeyocui ndeve. Jecuaeño ayapo ndeporoyocui. Èrei neme’â etei cheve capura-rai yepe, aparea vaerâ cheamigo reta pe nducaru vaerâ’ —jei, jei—. 30 Jare cua nderai ico cuña aguasa rupi ico vae reta ndive jare jucuarâi umingasta opaete nde neme chupe vae. Èrei jae ou ye uvâe rupive, ndiyucaca chupe vaca tairusu vae neminguirâ vae’ —jei, jei—. 31 Jayave tu jei tai tenondegua vae pe: ‘Cherai, jecuaeño nde ndico che ndive, jare opaete chembae nembae co’ —jei, jei—. 32 ‘Icavi co yayerovia vaerâ. Echa’â tenonde yave cua nderivi penti umanocue vae rami co cheve, èrei añave icove ye ma cheve. Tenonde yave ucañi chegüi, èrei añave avâe ye ma chupe’ —jei, jei.

16

Uyeyocui vae ipatrón imbaembae opa umingasta vae

1 Jare Jesús jei jemimboe reta pe: —Ico penti patrón icocatu vae jare ime güireco jembiocui. Jerâcua patrón pe quirâi jembiocui opa umingasta imbaembae —jei—. 2 Jayave jocua patrón ueni jembiocui jare jei chupe: ‘¿Mbae pa co cua nererâcua cheve vae?

Emimbeu cheve mbae ndiyapo opaete chembaembae ndive vae. Echa'ã nomoëta co' — jei, jei—. ³ Jayave uyeyocui vae jei iyupe ipia pe: '¿Mbae ra ayapota? Echa'ã chepatrón chemoëta. Chepuere'ã ayoo ivi corepoti amingana vaerã. Chepuere'ã vi ayerure ñru vae reta pe mbaembae re. Echa'ã chemarata co' — jei, jei—. ⁴ 'Aicuaa ma mbae ayapota vae. Cuarã ayapo yave, chepatrón chemoë ma yave, ñru vae reta uyandarecota cheré' — jei, jei—. ⁵ Jayave omondo umimbeu vaerã opaete ipatrón pe mbae re ipia vae reta yugüeru vaerã ipi. Jayave upirandu tenonde ou vae pe: '¿Mbovi pa ndepía chepatrón pe?' — jei, jei—. ⁶ 'Cien lata aceite' — jei, jei—. Jayave uyeyocui vae jei chupe: 'Co oï ndetupapire. Eguapi voi jare icuatía cincuenta lata' — jei, jei—. ⁷ Jayave upirandu ñru vae pe: '¿Mbovi pa ndepía chepatrón pe?' — jei, jei—. 'Cien arroba trigo' — jei, jei—. Jayave uyeyocui vae jei chupe: 'Co oï ndetupapire. Icuatía ochenta arroba' — jei, jei—. ⁸ Jare patrón icocatu vae jei jembiocui jupi mbae vae uyapo vae pe: 'Icavi ete ndiyapo ndiyupe. Ndearacuaa co' — jei, jei—. Echa'ã cuaa ivi pegua reta iyaracuaa ete corepoti re Tumpa pe uyeyocui vae reta güi — jei—.

⁹ Che pumbiaracuaa piporu vaerã pecorepoti pembori vaerã ñru vae reta. Jayave jae reta uyeyapota peamigo retarã. Echa'ã pemano yave, opata peeya pecorepoti. Ërei ara pe peamigo reta pembiresiveta jare joco pe picota jaeño mai pegua — jei Jesús chupe reta—. ¹⁰ Ime yave quía yandepuere yarovia catu mbae michi vae re vae, yandepuere vi yarovia catu mbae tuicha vae re. Jae ramiño vi ime yave quía upurumbitavi mbae michi vae re vae, upurumbitavi vi mbae tuicha vae re — jei—. ¹¹ Jáeramo Tumpa ipuere'ã yave pererovia catu corepoti re, ndarau vi pererovia catu mbaembae icavi vae ara pegua re — jei—. ¹² Jare ime yave quía yandepuere'ã yarovia catu ñru vae icorepoti re vae, ndarau ñamee chupe corepoti güinoi vaerã iyupeguarã — jei—.

¹³ Penti uyeyocui vae uipota yave uyeyocui mocui patrón pe, umitarëita penti patrón jare uauta ñru vae, ani uparaviqui cavita penti patrón pe jare güirirota ñru vae. Pepuere'ã piyeyocui Tumpa pe corepoti peau reve — jei.

¹⁴ Jare fariseo reta cua uyand yave, oyoyai Jesús. Echa'ã jae reta uipota ete corepoti. ¹⁵ Jayave Jesús jei chupe reta:

—Pe reta piyembujupi ñru vae reta jovaque. Ërei Tumpa uicuaa pepia pe oï vae. Jare yepe tēi ñru vae reta pepiu, Ërei Tumpa uicuaa piyapo vae icavi mbae co — jei—.

Mboroyocui jare Tumpa iporoyocua

¹⁶ Ndei Juan ou mbove, Tumpa umimbeu yandave yayapo vaerã mboroyocui jare Tumpa ñnee arcae umimbeu vae reta jei vae. Ërei Juan umbipi umimbeu ñee icavi vae Tumpa iporoyocua regua, jare opaete vae uipota uique Tumpa iporoyocua pe — jei—. ¹⁷ Ara jare ivi opata. Ërei yandepuere'ã etei yambai mboroyocui — jei—.

Omombo jembireco vae

(Mt 19.1-10; Mr 10.1-12)

¹⁸ Ime yave quía omombo jembireco vae, güireco yave ñru vae jembirecorã, uyuvanga menda re. Jare ime yave quía uyemombo ma vae güireco vae, jae vi uyuvanga menda re — jei—.

Cuimbae icocatu vae jare Lázaro

¹⁹ Ico penti cuimbae icocatu vae. Jecuaeño uyemonde icavi ete jare opa ara rupi uyapoca tembü icavi vae — jei—. ²⁰ Jare ico vi ñru cuimbae Lázaro jee vae. Jae co iparavete vae. Lázaro ituyu yepai ico. Opa ara rupi uguapi cuimbae icocatu vae jonque jovai — jei—. ²¹ Lázaro uipota jou tembü usururucue cuimbae icocatu vae imesa güi oa vae. Jare yimba reta yugüeru uere Lázaro ituyu — jei—. ²² Jare penti ara jocua cuimbae iparavete vae umano, jare ángel reta güiraa ara pe Abraham oï vae pe. Jae ramiño vi cuimbae icocatu vae umano jare uñeñotica — jei—. ²³ Jare cañitei pe cuimbae icocatuse vae uiporara ete oï. Jayave jovaiva jare uecha Abraham mbiri oï chugüi. Uecha vi Lázaro Abraham ndive — jei—. ²⁴ Jayave ñneeãta reve jei: 'Cheru Abraham, cheparareco. Embou Lázaro oñono vaerã ipoãca i pe umãqui vaerã checũ. Echa'ã aiporara ete ai cua tata pe' — jei, jei—. ²⁵ Ërei Abraham jei chupe: 'Cheraí, nemandúa quirãí nde ndico ivi pe yave, nde noise mbaembae icavi vae. Jae ramiño vi Lázaro ico ivi pe yave, mbaembae icavi mbae vae uyeyapo chupe. Ërei añave jae ipiacatu oï jare nde ndiporara neí' — jei, jei—. ²⁶ 'Jae ramiño vi ime oï mbae ñanepãu pe yandepuere'ã yaasa vae. Jáeramo nduipota yave ndoo pepi, ndarau orepuere. Jae ramiño vi pipota yave peyu orepi, ndarau pepuere' — jei, jei—. ²⁷ Jayave cuimbae icocatuse vae jei Abraham pe: 'Cua jeco pegua ayerure ndeve, cheru, nemondo vaerã Lázaro cheru jenta pe' — jei, jei—. ²⁸ 'Echa'ã che ime anoi pandepo cherivi reta. Emondo umimbeu vaerã chupe reta, agüiye vaerã jae reta vi yugüeru cua jasi catu noí vae pe' — jei, jei—. ²⁹ Jayave Abraham jei chupe: 'Ime güinoi Moisés iporoyocui jare Tumpa ñnee arcae umimbeu vae reta uicuatía vae. Tumingueta reta jocua' — jei, jei—. ³⁰ Jayave

cuimbae icocatuse vae jei Abraham pe: ‘Ndarau umíngueta reta, cheru Abraham. Ērei uyecuaa yave chupe reta umanocue vae, ueyata reta iyemíngueta icavi mbae vae ipia pe oí vae’ —jei, jei—. ³¹ Jayave Abraham jei chupe: ‘Uipota’á yave uyapisaca Moisés iporoyocui jare Tumpa íñee aracaе umimbeu vae reta uicuatía vae re, ndarau uyapo Tumpa jei uyapo vaerá vae yepe tēi quía icove ye oo chupe reta umanocue vae reta ipite güi’ —jei, jei.

17

Mbaeyoa uyapoca vae

(Mt 18.6-7, 21-22; Mr 9.42)

¹ Jayave Jesús jei jemimboe reta pe: —Jecuaeño yugüirecota upurumbiavai vae reta. Ērei upurumbiavai vae reta uiporarata co —jei—. ² Icavita tēi co íru vae reta uñapíti vaerá iyayu re penti ita tuicha vae umbaesо pipe vae, jare omombo vaerá i guasu pe, agüiye vaerá uyapoca tēi mbaeyoa penti cheré güirovia vae pe —jei—. ³ Piñemoa ngatu. Nderivi uyapo yave icavi mbae vae ndeve, embiaracuaa. Jare jae ipiatiti yave jeco re, embiаса chupe —jei—. ⁴ Jare uyapo yave icavi mbae vae ndeve siete vese penti ara pe, jare jei yave ndeve siete vese jocua ara pe: ‘Ndarau ma ayavi ndecoti’, embiаса chupe —jei.

Mburugüirovia re

⁵ Jayave yandeYa jemimondo reta jei chupe: —Emimbeu oreve quirái orepurugüirovia ipuere uñemíru.

⁶ Jayave yandeYa jei chupe reta:

—Aramoi pepurugüirovia michi ete penti mostaza jáicue michi-rai vae rami. Ērei jocua nunga mburugüirovia penoi yave, pepuereta pere cua ivira sicómoro jee vae pe: ‘Ecuа cua güi epita i guasu pe’, jare ivira uyapota pere vae —jei—.

Uyeyocui vae uyapo vae

⁷ Aramoi penti uyeyocui vae oo co pe umbiara vaerá ani umíngaru vaerá maemimba reta. Iparaviqui opa ma uyapo yave, ou ye ipatrón jenta pe. Ērei ipatrón jei’á etei chupe: ‘Eyu eguapi cua mesa pe ecaru.’ Jucuarái’á jei chupe —jei—. ⁸ Echa’á ipatrón jei chupe: ‘Ecuа rani emboyi mbae jau vaerá. Jayave javoi pegua eru cheve cherembiurá. Jare che opa ma acaru yave, ndepuereta ndecaru’ —jei, jei—. ⁹ Jare ipatrón umee’á etei yasurupai jembiocui pe jembiocui uyapo jei vae ramo —jei—. ¹⁰ Jare ramiño vi pe reta piyapo ma yave opaete Tumpa jei peve piyapo vaerá vae, pere piyupe: ‘Ayapo’á mbae ayembutuichaca vaerá cheYa pe. Echa’á jaeño ayapo jupi ayapo vaerá vae.’ Jucuarái pere —jei.

Diez cuimbae ipire ocui vae reta

¹¹ Jare Jesús ooñoi Jerusalén coti. Jayave oo uváe Samaria jare Galilea ipáu pe. ¹² Jare oo penti tenta guasu-rai pe uváe, jare joco pe yugüeru Jesús coti diez cuimbae ipire ocui vae reta. Ērei jae reta upita mbiri catu Jesús güi. ¹³ Jayave jae reta íñeeáta reve jei Jesús pe:

—Jesús, oporomboe vae, orepurareco.

¹⁴ Jare Jesús uecha reta yave, jei chupe reta:

—Pecua sacerdote reta pe, jae reta umaе vaerá peré —jei.

Jare yugüiraa rambueve, aramoiño ocui’á ma ipire. ¹⁵ Jare penti cuimbae ou ye íru cuimbae reta ipite güi jare íñeeáta reve jei:

—Tumpa tuyembiadoraca.

Echa’á uicuaa ucuera ma co imbaerasi güi. ¹⁶ Jayave uyeatica Jesús jovai jare umee yasurupai chupe. Jae co Samaria pegua. ¹⁷ Jayave Jesús jei:

—Ambigüera diez cuimbae reta. Ērei nueve yugüeru’á ye —jei—. ¹⁸ Cua pentiño ou ye umbiadora vaerá Tumpa. Jare cua judío’á co —jei.

¹⁹ Jayave jei cuimbae pe:

—Epüa iyemboi jare ecua nerenta pe. Ndecuera ma, nderovia cheré ramo —jei.

Tumpa iporoyocua outa co

(Mt 24.23-28, 36-41)

²⁰ Jare fariseo reta upirandu Jesús pe quirái yave ra uyecuaata Tumpa iporoyocua. Jayave Jesús jei chupe reta:

—Tumpa iporoyocua ndarau uyecuaa pe reta pesareco jese vae rupi —jei—. ²¹ Jare ramiño vi ndarau quía jei: ‘Mase, co oí’, ani: ‘Mase, pee oí.’ Echa’á Tumpa iporoyocua ime ma pepite pe oí —jei.

²² Jayave Jesús jei jemimboe reta pe:

—Outa ara reta pipota vaerá tēi cherecha - che cuimbaerá ayeyapo vae - penti ara yepe, ěrei ndarau cherecha —jei—. ²³ Jayave íru vae reta jeita peve: ‘Mase, co oí’, ani: ‘Mase, pee oí.’ Ērei agüiye pecua jae reta ndive —jei—. ²⁴ Tamijaanga ama uvera vae. Ama uvera

vae uyecuaa opaete ara re. Jae ramiño vi che cuimbaerã ayeyapo vae ayecuaata opaete vae pe ayu ye yave —jei—. ²⁵ Ërei aiporara eteta rani jare añave yugüireco vae reta ndarau uipota aico vaerã juvicha guasurã —jei—. ²⁶ Picuaa co quirãivi pegua reta uyapo icavi mbae vae Noé ico rambueve. Jae ramiño vi uyapota reta icavi mbae vae che cuimbaerã ayeyapo vae ayu ye yave —jei—. ²⁷ Echa'ã Noé ico rambueve, ivi pegua reta ucauñoi jare ucauñoi yugüireco, jecuaeño cuimbae reta umenda jare ndive cañatai reta ndive jare tu reta umee tayi reta cuimbae reta pe umenda jae ndive vaerã. Ërei penti ara Noé uique jocua chalana guasu pe. Jayave ou iporu guasu jare opa uyuca reta —jei—. ²⁸ Jae ramiño vi Lot ico rambueve, Sodoma pegua reta ucauñoi jare ucauñoi jare jecuaeño ogua mbaembae jare umee mbaembae, jare jecuaeño umaeti jare uyapo jenta retarã —jei—. ²⁹ Ërei jocua ara Lot oë Sodoma güi yave, Tumpa ombou tata jare azufre jare opa uyuca Sodoma pegua reta —jei—. ³⁰ Jucuarãta vi uyeyapo che cuimbaerã ayeyapo vae ayecuaa yave —jei—.

³¹ Jocua ara ime yave penti cuimbae o cupe re oí vae, o cupe güi ugüeyi yave, agüiye tuique jo pe güiraa vaerã imbaembae. Jae ramiño vi ime yave penti cuimbae co pe oí vae, agüiye tou ye jenta pe —jei Jesús chupe reta—. ³² Pemandúa Lot jembireco pe uyeyapo vae re —jei—. ³³ Uipota uñuvatu jecove vae ndarau ipuere uñuvatu. Ërei jocua umeeta jecove vae uñuvatu co —jei—. ³⁴ Che jae peve, jocua pítu mocui vae uyapacuata ñugüinoi jupa pe. Tumpa güiraacata penti vae jare ñru vae upitata jupa pe —jei—. ³⁵ Jae ramiño vi mocui cuña umbaesota ñugüinoi. Tumpa güiraacata penti cuña jare ñru cuña upitata —jei—. ³⁶ Jae ramiño vi mocui cuimbae ñugüinoita co pe. Tumpa güiraacata penti cuimbae jare ñru cuimbae upitata co pe —jei—.

³⁷ Jayave Jesús jemimboe reta upirandu chupe:

—OreYa, ¿quiape pa uyeyapota cua?

Jayave Jesús jei chupe reta:

—Umano vae jetcue oí vae pe uyembatita uruvi reta.

18

Cuña ime umano vae jare mburuvicha upuruãa vae

¹ Jare penti ara Jesús imiari ye jemimboe reta pe umijaanga reve. Uipota uicuaaca chupe reta quirãivi icavi co jecuaeño uyerure vaerã Tumpa pe jare agüiye vaerã icueri chugüi.

² Jáeramo jei chupe reta:

—Ico penti tenta guasu pe penti mburuvicha upuruãa vae. Uquiye'ã Tumpa güi jare güirãro ñru vae reta —jei—. ³ Jae ramiño vi ico jocua tenta guasu pe penti cuña ime umano vae. Penti ara cuña ime umano vae oo mburuvicha upuruãa vae pe jare jei chupe: 'Cherepi cherovaicho güi' —jei, jei—. ⁴ Mburuvicha upuruãa vae uyapo'ã mbae uepi vaerã cuña. Ërei mbovi ara rupi jei iyupe ipia pe: 'Yepe tēi aquiye'ã Tumpa güi jare arãro ñru vae reta, ⁵ Ërei cua cuña ime umano vae chemambeco ramo, aepita co. Echa'ã aepi'ã yave, jecuaeño outa chepi jare ndarau umaeño aputuu' —jei, jei—.

⁶ Jayave yandeYa jei:

—Jucuarã co jei jocua mburuvicha upuruãa vae jupi mbae vae uyapo vae. ⁷ Ërei Tumpa jupi co. Jáeramo uepita co uiparavo vae ara rupi jare pítu rupi uyerure chupe vae reta, yepe tēi aramoí ndarau uepi voi —jei—. ⁸ Che jae peve, imbae Tumpa uepita reta. Ërei che cuimbaerã ayeyapo vae ayu ye yave ivi pe, ¿imeta ra ñugüinoi upurugüirovia vae reta? —jei—.

Fariseo jare mburuvicha peguarã ocovara vae

⁹ Jare Jesús oí vae pe ñugüinoi amocue uyembujupi ipiyemingueta pe vae. Jae reta güirãro ñru vae reta. Jare Jesús jei chupe reta umijaanga reve:

¹⁰ —Mocui cuimbae yugüiraa Tumpa jo pe uyerure vaerã Tumpa pe. Penti co fariseo jare ñru vae mburuvicha peguarã ocovara vae co —jei—. ¹¹ Fariseo uyemboi jare uyerure iyupe ipia pe cuarã: 'Tumpa, amee yasurupai ndeve. Echa'ã che aico'ã ñru cuimbae reta yugüireco rami. Che apurumbitavi'ã apiro vaerã quía güi imbaembae. Ayapo'ã jupi mbae vae. Ayuvanga'ã menda re. Ayapo'ã vi jocua mburuvicha peguarã ocovara vae uyapo rami' —jei, jei—. ¹² 'Che ayecuacu tembiu güi mocui vese semana pe, jare amee ndeve diezmo opaete anoi vae güi' —jei, jei—. ¹³ Jare mburuvicha peguarã ocovara vae uyemboi oí mbiri catu fariseo güi, jare uipota'ã jovaiva. Jaeño ocua iyee ipitia re jare jei: 'Tumpa, cheparareco. Echa'ã che cheyoa vae co' —jei, jei—. ¹⁴ Che jae peve, Tumpa umbiasa mburuvicha peguarã ocovara vae pe imbaeyoa reta, jare jae oo ye jenta pe. Ërei umbiasa'ã fariseo pe imbaeyoa reta. Echa'ã ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei—.

Jesús uyerure Tumpa pe sambiai reta re

(Mt 19.13-15; Mr 10.13-16)

¹⁵ Jare amocue vae güeru Jesús oĩ vae pe sambiai reta, Jesús oñono vaerã ipo jese reta. Ërei Jesús jemimboe reta uecha reta yave, uñeengata güeru vae reta pe. ¹⁶ Ërei Jesús ueni sambiai reta jare jei:

—Pemaño sambiai reta re yugüeru vaerã checoti. Agüiye piyopia. Echa'ã cua nunga uyeyocui Tumpa pe iporoyocua pe —jei—. ¹⁷ Añete che jae peve, pipota'ã yave Tumpa pe piyeyocui vaerã penti sambiai uipota rami, ndarau pico Tumpa iporoyocua pe —jei.

Mburuvicha icocatu vae

(Mt 19.16-30; Mr 10.17-31)

¹⁸ Jare penti mburuvicha jei Jesús pe:

—Oporomboe vae, nde ndepiacavi co. ¿Mbae pa ayapota anoi vaerã tecove opa mbae vae? —jei.

¹⁹ Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaeño co Tumpa —jei—. ²⁰ Nde ndicuaa co mboroyocui reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu ñru vae re. Ipiu nderu jare ndesi' —jei Jesús chupe.

²¹ —Ayavi'ã penti ave cua mboroyocui reta chemichi güive —jei.

²² Jare Jesús cua uyandu yave, jei chupe:

—Ime mbae uata ndiyapo vaerã. Emee opaete mbaembae nenoĩ vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

²³ Ërei mburuvicha cua uyandu yave, tuicha ipiatiti. Echa'ã icocatu ete co.

²⁴ Jare Jesús uecha yave mburuvicha ipiatiti upita, jei:

—Yavai ete co icocatu vae reta uique vaerã Tumpa iporoyocua pe. ²⁵ Yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

²⁶ Jayave cua uyandu vae reta jei:

—Jucuarãĩ yave, ¿quía pa ipuere uyembiasaca?

²⁷ Jayave Jesús jei chupe reta:

—Ivi pegua reta ipuere'ã uyembiasa. Ërei Tumpa ipuere umbiasa reta —jei.

²⁸ Jayave Pedro jei Jesús pe:

—Mase, ore opaete mbaembae ndueya, ndoyu vaerã nderupíe.

²⁹ —Añete che jae peve —jei Jesús—, ime yave quía ueya jenta, ani tu, ani ichi, ani tiquei reta, ani tivi reta, ani jembireco, ani isambiai reta Tumpa iporoyocua jeco pegua vae, ³⁰ jeta ete jecoviata co chupe ivi pe ico rambueve, jare taicue rupi Tumpa umeeta chupe tecove opa mbae vae —jei.

Jesús umimbeu ye umanota co

(Mt 20.17-19; Mr 10.32-34)

³¹ Jayave Jesús ueni jocua doce jemimboe reta, jare jei chupe reta:

—Mase, yaa co ñaĩ Jerusalén pe, jare opaete Tumpa ñnee araca umimbeu vae reta uicuatiacue cuimbaerã uyeyapo vae regua uyeyapota co cheve —jei—. ³² Echa'ã ñru vae reta chemeeta judío mbae vae reta pe. Jare jae reta cheyoyaita, uyapota icavi mbae vae cheve, jare undivita cheré —jei—. ³³ Jayave chenupata chicote pe jare cheyucata. Ërei mbapi ara rupi aicove yeta ayu umanocue vae reta ipite güi —jei.

³⁴ Ërei Jesús jemimboe reta uicuaa'ã mbae ra uipota jei cua Jesús jei chupe reta vae. Yavai ete chupe reta uicuaa vaerã mbae jei vae.

Cuimbae jesa mbae vae

(Mt 20.29-34; Mr 10.46-52)

³⁵ Jare Jesús coiño ma ou Jericó güi yave, penti cuimbae jesa mbae vae uguapi uyerure oĩ mbae re tape jembei pe. ³⁶ Jae uyandu jeta vae uasa ñugüinoĩ jocoropi, jare upirandu mbae ra uyeyapo oĩ. ³⁷ Jayave uasa vae reta umimbeu chupe Jesús Nazaret pegua uasa oĩ. ³⁸ Jayave jesa mbae vae ñneeãta reve jei:

—Cheparareco, Jesús. Nde co jae David ñnemoñaeta reta pegua —jei.

³⁹ Jeta joco pe ñugüinoĩ vae reta uñeengata chupe. Uipota tēi umiquĩ. Ërei jesa mbae vae jeieta ñneeãta reve jei:

—Nde co jae David ñnemoñaeta reta pegua. Cheparareco —jei.

⁴⁰ Jayave Jesús uyemboi, jare jei joco pe ñugüinoĩ vae reta pe güeru vaerã jesa mbae vae. Jare jesa mbae vae ou yave Jesús oĩ vae pe, Jesús upirandu chupe:

⁴¹ —¿Mbae pa ndipota ayapo vaerã ndeve?

—Tamae, cheYa —jei.

⁴² Jayave Jesús jei chupe:

—Emae. Ndecuera ma, nderovia cheré ramo —jei.

⁴³ Jare Jupivoi ipuere umae, jare oo Jesús jaicue umbiadora reve Tumpa. Jare opaete joco pe ñugüinoi vae reta vi cua uecha yave, umbiadora Tumpa.

19

Jesús jare Zaqueo

¹ Jare Jesús uique Jericó pe jare oo ye joco güi. ² Jare ico joco pe penti cuimbae Zaqueo jee vae. Jae co mburuvicha peguarã ocovara vae reta itenondegua jare jae co icocatu vae.

³ Jare Zaqueo uipota tēi uecha Jesús. Ērei ipuere'ã uecha. Echa'ã jeta vae ñugüinoi Jesús uasa vae rupi, jare Zaqueo ipucu'ã co. ⁴ Jáeramo Zaqueo osi oo penti ivira sicómoro jee vae tape jembei pe oĩ vae pe, jare uyupi jese uecha vaerã Jesús. Echa'ã Jesús uasata oĩ jocoropi.

⁵ Jare Jesús oo uvãe yave ivira oĩ vae pe, jovaiva umae jare uecha Zaqueo. Jayave jei chupe: —Egüeyi, Zaqueo. Echa'ã añave aipota apou ndepi —jei.

⁶ Jayave Zaqueo ugüeyi voi, jare güiraa Jesús jenta pe uyerovia reve. ⁷ Jare opaete İru vae reta cua uecha yave, iñeenguru reve jei reta:

—Jae oo opou penti cuimbae iyoa vae pe.

⁸ Ērei Zaqueo uyemboi yandeYa jovai jare jei chupe:

—Mase, cheYa, ametae chembaembae mbite rupi iparavete vae reta pe. Jare ime yave quía güi apıro mbae chugüi vae, irundi ye ambijecoviata chupe —jei.

⁹ Jayave Jesús jei chupe:

—Cua ara yembiasa ou cua tenta pegua reta pe. Echa'ã nde vi co jae Abraham iñemofñaa reta pegua —jei—. ¹⁰ Echa'ã che cuimbaerã ayeyapo vae ayu aeca vaerã jare ambiasa vaerã ucañi Tumpa güi vae reta —jei.

Diez corepoti jare uyeyocui vae reta (Mt 25.14-30)

¹¹ Jare Jesús ndive ñugüinoi vae reta cua uyandu ma yave, Jesús imiari ye chupe reta umijaanga reve. Echa'ã oo ma uvãe coñño Jerusalén güi, jare jae ndive ñugüinoi vae reta ipia pe uyemingueta tēi imambae ete co uyecuata Tumpa iporoyocua. ¹² Jáeramo Jesús jei chupe reta:

—Penti mburuvicha oota iivi güi ambie ivi mbiri oĩ vae pe uyeyapo vaerã iivi pegua reta juvicha guasurã. Jare taicue rupi ou yeta —jei—. ¹³ Jare ndei oo mbove, ueni diez jembiocui reta jare umee penti penti pe corepoti jepi ete vae, jare jei chupe reta: 'Piporu cua corepoti ayu ye regua' —jei, jei—. ¹⁴ Ērei mburuvicha jentaigua reta umitarēi mburuvicha, jare mburuvicha oo ma yave ambie ivi pe, jae reta omondo jei vaerã: 'Nduipotã jocua cuimbae ico vaerã oreruvicha guasurã' —jei reta, jei—.

¹⁵ Ērei mburuvicha uyeyapo jentaigua reta juvicha guasurã. Jayave ou ye uvãe iivi pe jare ueni jembiocui corepoti umee chupe vae reta uyembati vaerã, jae uicuaa vaerã mbovi ra penti penti umingana —jei—. ¹⁶ Penti jembiocui jei chupe: 'Patrón, amimbaraviqui corepoti nemeche vae, jare añave anoi diez corepoti' —jei, jei—. ¹⁷ Jayave ipatrón jei jocua jembiocui pe: 'Icavi ndiyapo. Nde co jae cherembiocui icavi vae. Cua amee ndeve vae mboviño. Ērei nemimbaraviqui cavi. Jáeramo diez toroñoño diez tenta guasu pegua reta juvicharã' —jei, jei—.

¹⁸ Jayave İru jembiocui jei chupe: 'Patrón, amimbaraviqui corepoti nemeche vae, jare añave anoi pandepo corepoti' —jei, jei—. ¹⁹ Jayave ipatrón jei jocua jembiocui pe: 'Icavi ndiyapo. Che toroñoño pandepo tenta guasu pegua reta juvicharã' —jei, jei—.

²⁰ Jayave İru jembiocui jei chupe: 'Mase, patrón, co oĩ corepoti nemeche vae. Ayapicua añuvatu ndeve' —jei, jei—. ²¹ 'Echa'ã aquıye ndegüi ndepiapochi ramo. Nde nepıro mbaembae İru vae reta güi jare ndeavıro İru vae reta oñoti vae' —jei, jei—.

²² Jayave ipatrón jei jocua jembiocui pe: 'Nde ndere vae rupi etei che nuãata co. Nde co jae cherembiocui icavi mbae vae. Ndicuaa chepiapochi co jare quirãı apıro mbaembae İru vae reta güi jare quirãı aavıro İru vae reta oñoti vae' —jei, jei—. ²³ '¿Maera pa nderaa'ã checorepoti banco pe? Echa'ã jucuarãı ndiyapo yave, ayu ye yave nemeeta tēi co cheve corepoti amee ndeve vae jare mbovi ye banco pegua reta umãıruta tēi jae ndive vae' —jei, jei—.

²⁴ Jayave ipatrón jei İru jembiocui joco pe ñugüinoi vae reta pe: 'Pepıro chugüi jocua corepoti jare pemee jocua diez corepoti güinoi vae pe' —jei, jei—. ²⁵ Ērei jae reta jei ipatrón pe: 'Patrón, jae güinoi ma diez corepoti.' ²⁶ 'Añete co' —jei ipatrón chupe reta, jei—. 'Ērei che jae peve, güinoi vae pe uñemãıruta, jare mbaeti güinoi vae güi mbovi ete güinoi vae uyeequita' —jei, jei—. ²⁷ 'Ērei peru cua pe jocua cherovaicho reta. Jae reta uipotã'ã che aico vaerã juvicha guasurã. Piyuca cherovaıque' —jei, jei.

*Jesús oo Jerusalén pe**(Mt 21.1-11; Mr 11.1-11; Jn 12.12-19)*

²⁸ Jare Jesús cua jei ma chupe reta yave, uguata ye ñru vae reta jenonde oo Jerusalén coti.
²⁹ Jare yugüiraa uvãe coiño tenta guasu-rai reta Betfagé jare Betania güi. Joco pe oĩ ivitu guasu Olivos. Jayave Jesús oyocui mocui jemimboe reta.

³⁰ —Pecua pea tenta guasu-rai yanderovai oĩ vae pe —jei chupe reta—. Peo pevãe rupive, pevãeta penti mburica tairusu vae uñeñapĩti oĩ. Ndei ave etei quía opo jese. Piyora jare peru —jei—. ³¹ Jare ime yave quía jei peve vae: ‘¿Maera pa piyora?’ pere chupe cuarãi: ‘YandeYa uipota uiporu’ —pere, jei.

³² Jayave Jesús omondo vae reta yugüiraa, jare uvãe mburica tairusu vae Jesús umimbeu chupe reta rami. ³³ Jare oyora ñugüinoi yave, mburica iya reta upirandu chupe reta:

—¿Maera pa piyora pei mburica?

³⁴ —YandeYa uipota uiporu —jei reta.

³⁵ Jayave güeru reta mburica tairusu vae Jesús oĩ vae pe. Jayave Jesús jemimboe reta oñono iyasoya mburica icupe re, jare Jesús opo jese. ³⁶ Jare Jesús oo rambueve Jerusalén coti, joco pe ñugüinoi vae reta uipiso iyasoya tape rupi mburica jenonde.

³⁷ Jare umbipi reta ugüeyi ivitu guasu Olivos güi. Coiño ma yugüeru Jerusalén güi. Jayave opaete Jesús jemimboe reta umbipi uyerovia. Umbiadora reta Tumpa iñeeãta reve opaete miacañi uecha Jesús uyapo vae reta re. ³⁸ Jare jei reta:

—Tuyembiaadoraca yandeRuvicha Guasurã yandeYa jee re ou vae. Mbiacatu toĩ ara pe. Ara pegua reta tumbiadora Tumpa —jei reta.

³⁹ Jare amocue fariseo reta jeta vae ipite pe ñugüinoi vae jei Jesús pe:

—Oporomboe vae, iñeengata nderemimboe reta pe.

⁴⁰ Ërei Jesús jei chupe reta:

—Che jae peve, cua reta quĩi yave, jupivoiño ita reta uyeminguetata iñeeãta reve —jei.

⁴¹ Jare Jesús coiño ma Jerusalén güi ou uvãe yave, umaẽ Jerusalén re jare umbipi uyao.
⁴² Jare jei:

—Ndicuaa’ã quirãi ra ndepuere neni mbiacatu. Cua ara reta pe ndicuaata tẽi co. Ërei añave ndarau ndicuaa —jei—. ⁴³ Outa ma uvãe nderovaicho reta nequẽse vaerã jare ndarau umaẽño ndepite pe yugüireco vae reta re oẽ vaerã ndegüi —jei—. ⁴⁴ Jare jae reta opata nembusururu jare uyucata opaete ndepite pe yugüireco vae reta. Ndarau ueya reta penti ita ñru ita ñarambo, ndicuaa’ã Tumpa umeeta tẽi mbiacatu ndeve ramo —jei.

*Jesús Tumpa jo pe uyapo vae**(Mt 21.12-17; Mr 11.15-19; Jn 2.13-22)*

⁴⁵ Jayave Jesús uique Tumpa jo pe, jare umbipi omoẽ joco güi umaeme vae reta jare mbae ogua vae reta. ⁴⁶ Jare jei chupe reta:

—Tumpa iñee pe uyecuatía oĩ cuarãi: ‘Chero co jae piyerure cheve pipe vae.’ Jucuarãi uyecuatía oĩ. Ërei pe reta piyapo ma imonda vae reta iñemia rami —jei.

⁴⁷ Jayave Jesús oporomboe Tumpa jo pe opa ara rupi. Ërei sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta ueca quirãi ipuere uyucaca vaerã Jesús. ⁴⁸ Ërei uicuaa’ã reta quirãita ra uyucaca. Echa’ã opaete tenta guasu pegua reta uipota ete uyapisaca Jesús re.

20*Jesús imbaepuere**(Mt 21.23-27; Mr 11.27-33)*

¹ Jare penti ara Jesús oporomboe oĩ Tumpa jo pe, jare umimbeu joco pe ñugüinoi vae reta pe ñee icavi vae. Jayave yugüeru vi joco pe sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta. ² Jayave jae reta jei Jesús pe:

—Emimbeu oreve, ¿mbae nunga mbaepuere pa neni cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

³ Jayave Jesús jei chupe reta:

—Che vi tapirandu peve mbae re. Yaecha pepuere pemimbeu cheve —jei—. ⁴ ¿Quía pa ombou Juan upurumbibautiza vaerã? ¿Tumpa pa ombou? ani ¿ivi pegua reta pa ombou? —jei.

⁵ Jayave jae reta jei uyupe:

—Yae yave: ‘Tumpa co ombou’, jae jeita yandev: ‘Jucuarãi yave, ¿maera pa perovia’ã?’

⁶ Ërei yae yave: ‘¿vi pegua reta co ombou’, opaete tenta guasu pegua reta yandeapita ita pe yandeyuca. Echa’ã jae reta güirovia Juan co jae penti Tumpa iñee umimbeu vae —jei reta.

⁷Jáeramo jei reta Jesús pe:
—Nduicuaa'ã quía ra ombou Juan.

⁸Jayave Jesús jei chupe reta:
—Che vi ndarau amimbeu peve mbae nunga mbaepuere anoi cua mbaembae ayapo vaerã —jei.

Co iporúa icavi mbae vae reta
(Mt 21.33-44; Mr 12.1-11)

⁹Jayave Jesús umbipi imiari joco pe ñugüinoi vae reta pe umijaanga reve.
—Penti cuimbae oñoti jeta uva ico pe. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe upita vaerã ima pegua —jei—. ¹⁰Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tõi uva chupe reta, iya güinoi vaerã imbaerã. Ërei co iporúa reta uinupa co iya jembiocui, jare omondo ye. Umee'ã etei chupe güiraa vaerã —jei—. ¹¹Jayave co iya ombou ye tõi ñru jembiocui. Ërei co iporúa reta uinupa jare uyapo icavi mbae vae chupe, jare omondo ye. Umee'ã etei chupe güiraa vaerã —jei—. ¹²Jayave co iya ombou ye tõi ñru jembiocui. Ërei co iporúa reta umbipere, jare omondo ye —jei—. ¹³Jayave co iya jei iyupe: '¿Mbae ra ayapota? Amondota cheraí aau ete vae. Aramoi jae reta uipiuta cheraí' —jei, jei—. ¹⁴Ërei co iporúa reta uecha yave co iya tai, jei reta uyupe: 'Cua co jae iyarã vae. Yaa yayuca, jare yande yaicota co iyarã' —jei reta, jei—. ¹⁵Jayave jae reta omombo co güi, jare uyuca.

Jáeramo ¿mbae ra uyapota co iya jocua co iporúa reta pe? —jei—. ¹⁶Outa, opa uyuca vaerã jocua co iporúa reta, jare uiporucata ico ambie vae reta pe —jei.

Jayave cua uyandu vae reta jei:
—Tumpa mona jei agüiye uyeyapo.

¹⁷Jayave Jesús umaie jese reta jare jei:
—¿Mbae ra uipota jei cua Tumpa ñnee pe uyecuatía oí vae?
'Ita tenta iyapoa reta omombo vae uyeyapo ma ita tenondegua vae.'

¹⁸Ime yave quía jocua ita re ueyepiaca vae, uñemopëta co. Jare ime yave quía jocua ita oa jese vae, opata umbiperasoraso —jei.

¹⁹Jayave jupivoi sacerdote reta itenondegua reta jare mboroyocui re oporombocoe vae reta uipota tõi uipisi Jesús. Echa'ã uicuaa cua Jesús umijaanga reve jei vae uicuaaca quirái jae reta teco güinoi. Ërei uquiye tenta guasu pegua reta güi.

¿Jupi pa yambiepi vaerã César pe?
(Mt 22.15-22; Mr 12.13-17)

²⁰Jare jecuaeño jae reta umaie Jesús re. Jare omondo vi ñru vae reta uipiãro vaerã Jesús. Cua reta uipota tõi umbitavi Jesús, Jesús ipia pe uyemingüeta vaerã tõi jae reta jupi co. Ërei jae reta uipota tõi umbijeco mbae jei vae re, uñeapo vaerã jese mburuvicha pe. ²¹Jayave jae reta jei Jesús pe:

—Oporombocoe vae, nduicuaa nde ndere vae jare ndeporombocoe jese vae añete co. Nde nembutuicha'ã penti ave ñru vae güi. Nde ndeporombocoe cavi quirái Tumpa uipota yaico vaerã vae re —jei reta—. ²²César yandeocui yambiepi vaerã chupe corepoti pe. ¿Jupi pa yambiepi vaerã chupe? aní ¿jupi'ã pa? —jei reta.

²³Ërei Jesús uicuaa jae reta uipota tõi co umbitavi, jare jei chupe reta:
—¿Maera pa pipota piyavica cheve? ²⁴Peru cheve penti corepoti taecha —jei—. ¿Quía jova íã pa cua? ¿Quía jee pa cua uyecuatía oí vae? —jei.

—Cua César imbae co —jei reta.

²⁵Jayave Jesús jei chupe reta:
—Pemeie César pe César pegua, jare pemeie Tumpa pe Tumpa pegua —jei.

²⁶Jare jae reta ipuere'ã umbijeco Jesús mbae jei vae re tenta guasu pegua reta jovaque. Ipiacañi cua jei vae re, jare jei'ã ye mbae ave chupe.

¿Icove yeta pa amanocue vae reta?
(Mt 22.23-33; Mr 12.18-27)

²⁷Jayave yugüeru Jesús oí vae pe amocue saduceo reta. Opaete saduceo reta jei amanocue vae reta icove ye'ã co. Saduceo yugüeru vae reta jei Jesús pe:

²⁸—Oporombocoe vae, Moisés uicuatía ueya yandeve cuarái: 'Penti tiquei vae umano yave, jembirecocue mbaeti imembi chupe yave, cuimbae amiri tivi tumenda jocua cuña ndive. Jayave cuña imembi yave, cuimbae tumbijee sambiaí tiquei amiri jee pe.' Jucuarái uicuatía Moisés —jei reta—. ²⁹Ico penti cuimbae seis tivi reta güinoi vae. Cua cuimbae umenda, jare umano umimembi mbae reve. ³⁰Cuimbae amiri jaicue rupigua umenda jembirecocue ndive, Ërei umano vi umimembi mbae reve. ³¹Jayave jaicue rupigua ye umenda cuña ndive,

jare umano vi umimembi mbae reve. Opaete siete reve umenda jocua cuña ndive, jare opaete siete reve umano umimembi mbae reve —jei reta—. ³² Taicue rupi cuña umano vi. ³³ Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

³⁴ Jayave Jesús jei chupe reta:

—Cua ivi pe yugüireco rambueveño cuimbae reta umenda cuña reta ndive jare cuña reta umenda cuimbae reta ndive. ³⁵ Ërei icavita co Tumpa pe umbijecove ye vaerã amocue vae güeru umanocue vae reta ipite güi. Jae reta yugüireco yeta co, ërei cuimbae reta ndarau umenda cuña reta ndive jare cuña reta ndarau umenda cuimbae reta ndive icove reta ye yave —jei—. ³⁶ Jae ramiño vi ndarau umano ye. Echa'ã yugüirecota ángel reta yugüireco rami. Yugüirecota Tumpa tai retarã. Echa'ã Tumpa umbijecove yeta güeru umanocue vae reta ipite güi —jei—. ³⁷ Tamimbeu peve umanocue vae reta regua. Icove yeta co. Moisés uicuaaca cua uicuatia yave jocua yai jendi vae regua. Echa'ã Moisés umimbeu quirã yandeYa Tumpa jei: 'Che co jae Abraham, Isaac jare Jacob iTumpa.' Cua umimbeu Moisés —jei—. ³⁸ Echa'ã Tumpa mbaeti co umanocue vae reta iTumpa. Jae co tecove güinoi vae reta iTumpa. Yepe tẽi ñamano, yanderecove imeño oĩ —jei.

³⁹ Jayave amocue mboroyocui re oporomboe vae reta jei Jesús pe:

—Oporomboe vae, icavi ndere.

⁴⁰ Jare jocua güive uquiye reta upirandu vaerã chupe mbae re.

¿Quía iñemoñaeta reta pegua pa co Cristo?

(Mt 22.41-46; Mr 12.35-37)

⁴¹ Jayave Jesús upirandu joco pe ñugüinoi vae reta pe:

—¿Maera pa jei mboroyocui re oporomboe vae reta Cristo co jae David iñemonaa reta pegua? ⁴² Echa'ã David etei jei Salmo reta pe cuarã:

'YandeYa Tumpa jei cheYa pe:

Eguapi cheyipi pe cheacata coti,

⁴³ nderovaicho reta opa amiamiri regua' —jei Tumpa.

Jucuarã jei David —jei—. ⁴⁴ ¿Maera pa jei reta Cristo co jae David iñemoñaeta reta pegua? Echa'ã David etei jei chupe: 'CheYa' —jei.

Jesús umbijeco mboroyocui re oporomboe vae reta

(Mt 23.1-36; Mr 12.38-40; Lc 11.37-54)

⁴⁵ Jayave Jesús jei jemimboe reta pe opaete joco pe ñugüinoi vae reta jovaque:

⁴⁶ —Piñemoa ngatu mboroyocui re oporomboe vae reta güi. Jae reta jecuaño uipota uguata jemimonde pucu vae reve, jare uipota ñru vae reta pe uyembisaludaca vaerã calle reta rupi. Jare yugüiraa yave tupao pe jare para pe, jecuaño uipota uguapi tenda tenondegua vae reta pe —jei—. ⁴⁷ Jae reta upiro cuña ime umano vae reta güi opaete imbaembae, jare pucu uyerure Tumpa pe upurumbitavi vaerã. Jae reta uiporara eteta co —jei.

21

Cuña ime umano vae umee corepoti Tumpa pe

(Mr 12.41-44)

¹ Jare Jesús Tumpa jo pe oĩ yave, uecha icocatu vae reta oñono icorepoti corepoti jiru pe.

² Jare uecha vi penti cuña ime umano vae iparavete vae oñono mocui riare corepoti jiru pe.

³ Jayave Jesús jei:

—Añete che jae peve, cua cuña ime umano vae iparavete vae uyapo jeta ete opaete ñru oñono vae reta güi. ⁴ Echa'ã opaete ñru reta güeru oñono mbovi jeta güinoi vae güi. Ërei cua cuña, yepe tẽi iparavete, oñono opaete güinoi vae. Jocua co jembíu jepirã tẽi vae —jei chupe reta.

Tumpa jo uyeitita

(Mt 24.1-2; Mr 13.1-2)

⁵ Jare amocue vae uyemingueta ñugüinoi Tumpa jo re. Jei reta icavi ete co ita reta jare mbaembae tenta guasu pegua reta güeru omopõra vaerã vae. Jayave Jesús jei:

⁶ —Outa co uvãe ara cua o reta añave peecha vae uyeiti vaerã. Ndarau upita penti ave ita ñru ita iárambo —jei.

Mbaesusere reta uyeyapota vae

(Mt 24.3-28; Mr 13.3-23)

⁷ Jayave Jesús jemimboe reta upirandu chupe:

—Oporombœ vae, ¿quirāi yave pa cua uyeyapota? Jare opaete cua uyeyapota ma yave, ¿quirāita pa nduicuaa? —jei reta.

⁸Jayave Jesús jei chupe reta:

—Piñemoa ngatu agüiye vaerā petavi. Echa'ā yugüeruta jeta cheree pe uyembijeeta vae reta. Jae reta jeita: 'Che co jae Cristo. Outa co uvāe jocua ara reta' —jeita, jei—. ⁹Ērei agüiye piñemiñru jae reta ndive —jei—. ⁹Imeta co ñerāro reta jare tecorai reta. Ērei piyandu yave cua reta regua, agüiye pequiye. Cua susere reta uyeyapoñotai co. Ērei cua susere reta ndei ave co opa vaerā —jei—.

¹⁰Penti ivi pegua reta uñerārota ambie ivi pegua reta ndive, jare mburuvicha reta uñerārota ñru mburuvicha reta ndive. ¹¹Jare ivi tanta ucātata jeta que rupi. Jare imeta caruai reta jare mbaerasi reta jeta vae uyucata vae. Jare mbaembæ ara re uyecuaata vae upuruminguiveta co —jei—. ¹²Ērei ndei cua uyeyapo mbove, ñru vae reta pepisita jare uyapota icavi mbae vae peve. Jae reta pereraata itupao reta pe jare peñonota peresoriruru pe, jare pereraata mburuvicha guasu reta jovai chereco pegua —jei—. ¹³Ērei jucuarāi uyapo reta peve yave, pepuereta pemimbeu cheregua —jei—. ¹⁴Agüiye piyemipia'ā cua re jare agüiye pepia pe piyemingueta mbae ra pereta vae —jei—. ¹⁵Echa'ā che aicuaacata peve mbae pere vaerā, jare che pumbiaracuaata agüiye vaerā perovaicho reta uicuaa mbae ra ipuere jei peve —jei—. ¹⁶Jare peru jare pesi, jare periquei reta jare perivi reta, jare perentarā reta jare peamigo reta pemeeta perovaicho reta pe, jare amocue pe reta piyeyucacata co —jei—. ¹⁷Jare piñemitarēicata opaete vae pe chereco pegua. ¹⁸Ērei ndarau penti ave pea ucañi —jei—. ¹⁹Jare perōsa peo pevāe iyapi pe yave, piyembiasacata co —jei—.

²⁰Jare peecha jeta sundaro reta Jerusalén oñova yave, picuaata ou ma co uvāe Jerusalén uyembai vaerā —jei—. ²¹Jayave Judea pe ñugüinoi vae reta tosi ivitu guasu coti. Jare Jerusalén pe ñugüinoi vae reta toē tosi joco güi. Jare jocua coiño Jerusalén güi ñugüinoi vae reta agüiye tuyugüiraa Jerusalén pe —jei—. ²²Echa'ā jocua ara reta pe ivi pegua reta uiporara eteta, jare opaete Tumpa iñee pe uyecuatia oñ vae uyeyapota co —jei chupe reta—. ²³Jare ipurúa vae reta jare unimambu vae reta uiporara eteta jocua ara reta pe. Echa'ā cua ivi pegua reta uiporara eteta. Echa'ā Tumpa uiporaracata co chupe reta —jei—. ²⁴Jare jeta cua ivi pegua reta uyeyucacata quisepecu pe. Jare jovaicho reta güiraata jeta cua ivi pegua reta ambie ivi reta pe. Jare judío mbae vae reta yugüirecota Jerusalén pe judío mbae vae reta iara reta opa regua —jei Jesús chupe reta—.

Cuimbaerā uyeyapo vae ou yeta

(Mt 24.29-44; Mr 13.24-37)

²⁵Jayave ivi pegua reta uechata mbae uyecuaa oñ guarasi jare yasi jare yasitata reta re. Jare opaete ivi pegua reta uiporarata jare ndarau uicuaa mbae uyapo vaerā. Jare i guasu reta jiapu eteta —jei—. ²⁶Jare ivi pegua reta uquiye eteta. Uquiye eteta mbae ivi pe uyeyapo oñ vae güi. Jare ara re mbaepuere güinoi vae reta ucātata —jei—. ²⁷Jayave ivi pegua reta cherechata ayu amapitu reve. Che cuimbaerā ayeyapo vae anoita mbaepuere tuicha vae, jare ayembadoracata opaete vae pe —jei—. ²⁸Jare opaete cua mbaembæ umbipi uyeyapo yave, piñemiatangātu. Echa'ā imambæ Tumpa perepita —jei chupe reta.

²⁹Jayave Jesús jei chupe reta umijaanga reve:

—Tamijaanga iva jare opaete ivira reta. ³⁰Uyembipi joqui yave, picuaa uyaro ma co ama oqui vaerā —jei—. ³¹Jae ramiño vi pe reta peecha yave cua mbaembæ uyeyapo ñugüinoi vae, picuaata coiño ma co ou Tumpa iporoyocua —jei Jesús chupe reta—.

³²Añete che jae peve, cua ivi pe añave yugüireco vae reta ndarau opa umano ndei opaete cua mbaembæ uyeyapo mbove —jei—. ³³Ara jare ivi opata, ěrei chiñee ndarau opa —jei—.

³⁴Piñemoa ngatu, agüiye vaerā pecau jare pesavipo, jare agüiye vaerā piyemipia'ā mbaembæ ivi pegua re. Echa'ā jucuarāi piyapo yave, outa uvāe jocua ara peño mbae peñ reve —jei chupe reta—. ³⁵Echa'ā jocua ara uipocouta opaete ivi pegua reta ñuai oporombœ rami —jei—. ³⁶Jáeramo piñemoa ngatu, jare jecuaeño piyerure Tumpa pe icavi vaerā chupe perepi vaerā opaete cua uyeyapota vae güi jare piyemboi vaerā cherovai. Che co jae cuimbaerā uyeyapo vae —jei.

³⁷Jare opa ara rupi Jesús oporombœ oñ Tumpa jo pe. Ērei caaru ma yave oo joco güi upita ivitu guasu Olivos re. ³⁸Jare opaete tenta guasu pegua reta yugüeru neimbove asi Tumpa jo pe uyapisaca vaerā Jesús re.

22

Uipota reta uyucaca Jesús

(Mt 26.1-5, 14-16; Mr 14.1-2, 10-11; Jn 11.45-53)

¹ Jare pascua uyaro ma oĩ. Jocua ara pe judío reta jou mbiyape ovu mbae vae. ² Jayave sacerdote reta itenondegua reta jare mboroyocui re oporomboe vae reta ueca ñugüinoi quirái ipuere uyucaca Jesús. Ërei uquiye tenta guasu pegua reta güi.

³ Jayave Satanás etei oya Judas Iscariote re - Judas co jae jocua doce vae güi penti. ⁴ Jayave Judas oo sacerdote reta itenondegua reta jare Tumpa jo re uyandareco vae reta ñugüinoi vae pe uyemingueta vaerã jae reta ndive quirái ra ipuere umee Jesús chupe reta. ⁵ Jayave jae reta uyerovia, jare jei Judas pe umeeta co chupe corepoti. ⁶ Jayave Judas jei chupe reta umeeta co Jesús chupe reta. Jayave umbipi ueca quirái ipuere umee Jesús chupe reta tenta guasu pegua reta mbaeti Jesús ndive ñugüinoi yave.

Jesús ucaru jemimboe reta ndive

(Mt 26.17-29; Mr 14.12-25; Jn 13.21-30; 1 Cor 11.23-26)

⁷ Jare ou uvãe pascua. Jocua ara judío reta jecuaño uyucu ovecha jare umbipi jou mbiyape ovu mbae vae. ⁸ Jayave Jesús jei Pedro jare Juan pe:

—Pecua piyapícatu yau vaerã tembíu pascua pegua.

⁹ Jayave jei reta chupe:

—¿Quiape pa ndipota nduyapícatu vaerã?

¹⁰ —Mase, peo pevãe yave tenta guasu pe, peovãitita penti cuimbae i güiraa iru pe vae — jei—. Pecua jaicue. Jae uiqueta penti tenta pe. Pique ví pe reta —jei—. ¹¹ Jayave pere tenta iya pe: ‘Oporomboe vae jei: ¿Quiape pa ime oĩ o, joco pe jau vaerã tembíu pascua pegua cheremimboe reta ndive’ —jei, pere chupe, jei Jesús—. ¹² Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapícatu yandeve —jei.

¹³ Jayave Pedro jare Juan yugüiraa jare uvãe Jesús jei chupe reta rami. Jare uyapo reta tembiu pascua pegua Jesús jare jemimboe reta jou vaerã. ¹⁴ Jare ora ou ma uvãe yave, Jesús uguapi mesa pe jocua doce jemimondo reta ndive. ¹⁵ Jayave jei chupe reta:

—Chequiréi ete jau cua tembíu pascua pegua pe reta ndive, ndei amano mbove. ¹⁶ Che jae peve, ndarau ye jau, opaete cua uyemijaanga jese vae Tumpa iporoyocua pe uyeyapo regua —jei.

¹⁷ Jayave Jesús uipísi copa, jare umee yasurupai Tumpa pe. Jayave jei:

—Opaete pe reta peu cua vino. ¹⁸ Che jae peve, ndarau ye jau vino, Tumpa iporoyocua ou regua —jei.

¹⁹ Jayave Jesús uipísi mbiyape, jare umee yasurupai Tumpa pe. Jayave upisãa mbiyape jare umee chupe reta.

—Cua co jae cherete —jei—. Añemeeta amano vaerã peré. Peu cua cheré pemandúa vaerã —jei.

²⁰ Jae ramiño vi uipísi copa, opa ma ucaru reta yave, jare jei:

—Cua vino co jae Tumpa jei piau ye vae cherugüi pe ayapota vae. Cherugüi uyepiyereta peré —jei—.

²¹ Ërei yandepite pe uguapi oĩ cherovaicho reta pe chemeeta vae —jei—. ²² Añete co, che cuimbaerã ayeyapo vae amanota. Cua Tumpa jei vae co. Ërei jocua cuimbae chemeeta vae uiporarata co —jei.

²³ Jayave jemimboe reta umbipi upirandu uyupe quía ra uyapota chupe jucuarái.

¿Quía pa icota tenondeguarã vae?

²⁴ Jare Jesús jemimboe reta umbipi uyemingueta uyupe quía ra icota tenondeguarã vae. ²⁵ Jayave Jesús jei chupe reta:

—Ivi pegua reta juvicha guasa reta oyocui reta. Jare jae reta uipota ñru vae reta jei icavi vae jesegua —jei—. ²⁶ Ërei pepite pe icavi'ã jucuarái piyapo vaerã. Ime yave quía pepite pe uipota ico vaerã tenondeguarã vae, tuyeyapo penti tairusu vae ñru vae reta pe uyeyocui vae rami —jei—. ²⁷ Mesa pe uguapi ucaru vaerã vae co tenondegua tembíu güeru vae güi. Ërei che aico pepite pe ayeyocui peve vaerã —jei—.

²⁸ Pe reta jecuaño pepita che ndive opaete cua aiporara rambueve —jei—. ²⁹ Jare che puparavo ma pico vaerã Tumpa iporoyocua pe, cheRu cheparavo rami —jei chupe reta—. ³⁰ Jáeramo pecaruta chemesa pe cheporoyocua pe. Jae ramiño vi penoita mbaepuere peãa vaerã jocua doce ati Israel pegua reta —jei—.

Pedro uicuacuta Jesús

(Mt 26.31-35; Mr 14.27-31; Jn 13.36-38)

³¹ Simón, Simón, mase, Satanás uipota tēi güinoi mbaepuere peré, trigo yambiveve vae rami —jei—. ³² Ërei che ayerure Tumpa pe nderé jecuaño nenoj vaerã mburugüirovia. Jare ndiyerova ye yave Tumpa coti, embori nderivi reta ipirãta vaerã ipurugüirovia re —jei.

³³ Jayave Pedro jei Jesús pe:

—CheYa, apitata co nde ndive, peresoriru pe neñono reta yave. Ndarau ndueya, yepe tēi aramoi ĩru vae reta cheyuca —jei.

³⁴ —Che jae ndeve, Pedro —jei Jesús—, ndei uru cuimbae uñee mbove, mbapı vese ma checuacuta —jei.

Añave peraa mbaembae

³⁵ Jayave Jesús jei jemimboe reta pe:

—Che pomondo yave chiñee peraa vaerā, amimbeu peve agüıye vaerā peraa corepoti, jare peurupucu, jare pepipasa. ¿Uata pa mbae peve? —jei.

—Uata'ā —jei reta.

³⁶ Jayave jei chupe reta:

—Ērei añave tamimbeu peve cua: Corepoti penoi yave, peraa. Jae ramiño vi peurupucu penoi yave, peraa. Jare mbaeti yave penoi quisepecu, pemee peremimonde pegua vaerā quisepecu —jei—. ³⁷ Echa'ā che jae peve, uyeyapota co cheve Tumpa iñee pe uyecuatıa oı vae. Echa'ā uyecuatıa oı cuarāi: 'Īru vae reta jei tēi jae vi co penti icavi mbae vae.' Jucuarāi uyecuatıa oı. Jare opaete cheré uyecuatıa oı vae uyeyapota co cheve —jei.

³⁸ Jayave jae reta jei chupe:

—Mase, oreYa, ime nonoi mocui quisepecu.

—Icaviño ma co —jei chupe reta.

Jesús uyerure Getsemani pe

(Mt 26.36-46; Mr 14.32-42)

³⁹ Jayave Jesús oē o güi oo vaerā ivıtu guasu Olivos pe jae jecoño mai rami. Jare jemimboe reta vi yugüıraa jae ndive. ⁴⁰ Jare oo uvāe yave upita vae pe, Jesús jei jemimboe reta pe:

—Piyerure Tumpa pe agüıye vaerā peyoa.

⁴¹ Jayave Jesús usıri catu chugüi reta, jare uyeatica uyerure Tumpa pe.

⁴² —CheRu —jei—, nde ndipota yave, embiasa chegüi cua aiporara vae. Ērei tuyeyapo cheve nde ndere vae. Agüıye tuyeyapo che jae vae —jei.

⁴³ Jayave uyecuaa Jesús pe penti ángel ara güi ou vae umimırāta vaerā. ⁴⁴ Jesús uiporara ete oı, jare jeiete uyerure Tumpa pe. Jeta ipireıpo oı. Tugüi rami utıquı ivı pe.

⁴⁵ Jare Tumpa pe uyerure ma yave, upıa ye jare ou ye jemimboe reta ñugüınoi vae pe. Uecha oque ñugüınoi ipıatıti güi. ⁴⁶ Jayave Jesús jei chupe reta:

—¿Maera pa peque peı? Pepıa piyerure Tumpa pe, agüıye vaerā peyoa —jei.

Uıpsi reta Jesús

(Mt 26.47-56; Mr 14.43-50; Jn 18.2-11)

⁴⁷ Jare uyemingueta oı rambueve, uyecuaa jeta vae. Jare Judas - jae co jocua doce vae güi penti - ou jocua jeta vae jenonde. Jayave ou uvāe Jesús oı vae pe, jare uyurupite. ⁴⁸ Jayave Jesús jei chupe:

—Judas, ¿penti yurupite rupi pa chemee cua reta pe?

⁴⁹ Jare Jesús jemimboe reta uyemboı ñugüınoi Jesús iyıpi pe. Jare uicuaa mbae uyeyapota vae ramo, jei Jesús pe:

—OreYa, ¿ndııporuta pa quisepecu jese reta? ⁵⁰ Jayave penti Jesús jemimboe uıporu iquisepecu sacerdote tenondegua jembıocui inambi re, jare uyasia inambi chugüi.

⁵¹ Jayave Jesús jei:

—Pemaño cheré ayapo vaerā cua.

Jayave uyavıquı cuimbae inambi jendacue, jare cuimbae ucuera.

⁵² Yugüeru vi joco pe sacerdote reta itenondegua reta jare Tumpa jo re uyandareco vae reta jare tenta guasu pegua reta itenondegua reta. Jare Jesús jei chupe reta:

—¿Maera pa peru quisepecu reta jare ivıra reta chepısi vaerā, imonda vae pipısi vae rami?

⁵³ Opa ara aıco pe reta ndive Tumpa jo pe, ěrei chepısi'ā. Ērei ora uvāe ma chepısi vaerā. Cuarāi piyapo peı Satanás imbaepuere pe —jei.

Pedro uıcuacu Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jayave uıpsi reta Jesús jare güıraa sacerdote tenondegua jeta pe. Jare Pedro oo jae reta jaıcue, ěrei mbırıño oo chugüi. ⁵⁵ Jayave joco pe ñugüınoi vae reta uyapo tata sacerdote tenondegua joca pe jare uguapı joco pe. Jare Pedro vi uguapı joco pe jae reta ipıte pe. ⁵⁶ Ērei penti cuñataı uecha Pedro uguapı oı tataıpi pe. Umae ngatu jese. Jayave jei:

—Cua cuimbae vi icose jocua ĩru cuimbae ndive.

⁵⁷ Jayave Pedro uıcuacu Jesús.

—Aıcuaa'ā jocua cuimbae —jei Pedro cuñataı pe.

⁵⁸ Ndei ima mbove penti cuimbae vi uecha Pedro jare jei chupe:

—Nde co jae ñru vi.

—Che'ã co —jei Pedro cuimbae pe.

⁵⁹ Jare penti ora rupi ma uasa yave, ñru cuimbae jeiete jei:

—Añete co, cua cuimbae icose jocua ñru cuimbae ndive. Echa'ã Galilea pegua co —jei.

⁶⁰ —Aicuaa'ã mbae ndere vae —jei Pedro cuimbae pe.

Jare uyemingueta rupive, uru cuimbae uñee. ⁶¹ Jayave yandeYa uyerova jare umae Pedro re. Jayave Pedro imandúa yandeYa jei chupe vae re: 'Ndei uru cuimbae uñee mbove, mbapi vese ma checuacuta.' ⁶² Jayave Pedro oẽ joco güi, jare tanta ipiatiti reve uyao.

Uyapo reta icavi mbae vae Jesús pe

(Mt 26.67-68; Mr 14.65)

⁶³ Jare cuimbae uyandareco ñugüinoi Jesús re vae reta oyoyai jare uinupa. ⁶⁴ Jayave jae reta uesañoa Jesús jare ocua jova re. Jayave jei reta chupe:

—Emimbeu oreve quía ra ocua nderé.

⁶⁵ Jare jeta icavi mbae vae jei reta chupe.

Jesús mburuvicha reta jovai

(Mt 26.59-66; Mr 14.55-64; Jn 18.19-24)

⁶⁶ Jare cõe ma yave, tenta guasu pegua reta itenondegua reta jare sacerdote reta itenondegua reta jare mboroyocui re oporombõe vae reta uyembati. Jayave güeruruca reta Jesús. Jayave jei reta chupe:

⁶⁷ —¿Nde pa co jae Cristo, Tumpa ombou vae? Emimbeu oreve.

—Che amimbeu yave peve, ndarau chererovia —jei Jesús—. ⁶⁸ Jare che apirandu yave peve mbae re, ndarau pemimbeu cheve, jare ndarau cheyora —jei—. ⁶⁹ Èrei che cuimbaerã ayeypa vae aguapita curi Tumpa mbaepuere güinoi vae iyipi pe iyacata coti —jei.

⁷⁰ Jayave opaete jae reta upirandu chupe:

—¿Nde pa co jae Tumpa Tai?

—Pe reta pere rami jae co che —jei Jesús chupe reta.

⁷¹ Jayave jae reta jei:

—¿Maera pa yaeca ye ñru vae reta uñeapo vaerã jese? Echa'ã yande etei yayandu mbae jei vae —jei reta.

23

Jesús Pilato jovai

(Mt 27.1-2, 11-14; Mr 15.1-5; Jn 18.28-38)

¹ Jayave opaete jae reta upña jare güiraa Jesús Pilato pe. ² Jare umbipi reta uñeapo Jesús re. Jei reta:

—Cua cuimbae umimbeu tenta guasu pegua reta pe uyapo vaerã icavi mbae vae. Echa'ã jei chupe reta agüye vaerã umbiepi corepoti César peguarã. Jare jei jae co mburuvicha guasu Cristo jee vae —jei reta.

³ Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

⁴ Jayave Pilato jei sacerdote reta itenondegua reta jare tenta guasu pegua reta pe:

—Avãe'ã teco cua cuimbae re. ⁵ Jayave jae reta jeiete jei:

—Omboepochi tenta guasu pegua reta. Oporombõe opaete Judea rupi. Umbipi Galilea pe jare añave ou uvãe cua pe oporombõe oĩ —jei reta.

Jesús Herodes jovai

⁶ Pilato uyandu yave jei reta vae, upirandu penti Galilea pegua ra jocua cuimbae. ⁷ Jayave umimbeu reta Pilato pe Galilea pegua co Jesús. Jayave Pilato güiraaca Jesús Herodes pe. Echa'ã Herodes co jae Galilea pegua reta juvicha guasu. Jare jocua ara reta pe Herodes opou oĩ Jerusalén pe. ⁸ Jare Herodes uecha Jesús yave, uyerovia ete, ima ma uipota uecha ramo. Echa'ã uyandu ma jeta Jesús regua, jare uipota uecha Jesús uyapo penti miacañi. ⁹ Jayave Herodes upirandu Jesús pe jeta mbaembae re, èrei Jesús jei'ã mbae ave chupe. ¹⁰ Jare sacerdote reta itenondegua reta jare mboroyocui re oporombõe vae reta uyemboi Herodes jovai jare iñeeãta reve uñeapo Jesús re. ¹¹ Jare Herodes jare isundaro reta güirõ jare oyoyai Jesús. Jayave omondeca chupe temimonde ipõra vae. Jayave Herodes güiraaca ye Pilato pe. ¹² Jare jocua ara etei Pilato jare Herodes uyeypacatu ye. Echa'ã tenonde yave uñemitarëi.

Pilato jei Jesús umanota co

(Mt 27.15-26; Mr 15.6-15; Jn 18.39-19.6)

¹³ Jayave Pilato umbatica sacerdote reta itenondegua reta jare tenta guasu pegua reta itenondegua reta ndive. ¹⁴ Jare jei chupe reta:

—Pe reta peru cua cuimbae cheve jare pere cheve omboepochi co tenta guasu pegua reta. Mase, che apirandu chupe jocua re perovaque, jare avãe'ã etei teco jocua pe reta piñeapo cheve jese vae re —jei—. ¹⁵ Jae ramiño vi Herodes uvãe'ã teco cua cuimbae re. Echa'ã che pomondo Herodes pe. Mase, mbaeti mbae teco uyapo umano vaerã —jei Pilato chupe reta—. ¹⁶ Jáeramo ainupacañota jare ayoraca yeta —jei.

¹⁷ Echa'ã opa año tenta guasu pegua reta uyerure chupe oyoraca vaerã penti pereso pascua ara rupi, jare Pilato oyoracañoi penti pereso. ¹⁸ Jayave opaete vae iñeeãta reve jei:

—Iyucaca cua cuimbae. Iyoraca oreve Barrabás —jei reta.

¹⁹ (Tenonde yave Barrabás upuruyuca Jerusalén pe, mburuvicha reta ndive uñerãro yave. Jáeramo umiingue peresoriru pe.)

²⁰ Ērei Pilato uipota tēi oyoraca Jesús. Jáeramo jei ye chupe reta. ²¹ Ērei iñeeãta reve jei reta:

—Icutuca curusu re. Icutuca curusu re.

²² Jayave Pilato upirandu ye chupe reta:

—¿Mbae pa uyapo? Avãe'ã mbae icavi mbae vae jese umano vaerã. Jáeramo ainupacañota jare ayoraca yeta —jei.

²³ Ērei jeiete iñeeãta reve jei reta uicutuca vaerã Jesús curusu re. Jare sacerdote reta itenondegua reta jare ĩru joco pe ñugüinoi vae reta iñee umiquirēi Pilato. ²⁴ Jayave Pilato jei uyeyapo vaerã Jesús pe jae reta uipota vae. ²⁵ Jayave oyoraca chupe reta tenonde yave mburuvicha reta ndive uñerãro yave upuruyuca ramo peresoriru pe umiingue vae, jae reta uipota rami. Ērei umee Jesús chupe reta uyeyapo vaerã chupe jae reta uipota vae.

Jesús uyecutuca curusu re

(Mt 27.32-44; Mr 15.21-32; Jn 19.17-27)

²⁶ Jayave güiraa reta Jesús joco güi. Jare penti cuimbae Simón jee vae tenta guasu Cirene pegua, ou uvãe tenta guasu coti. Jacoropi uasa oĩ yave, sundaro reta uipisi Simón jare güiraaca chupe Jesús icurusu. Jayave Simón güiraa curusu Jesús jaicue. ²⁷ Jare yugüiraa vi Jesús jaicue jeta vae. Jare jae reta ipite pe yugüiraa cuña reta. Jae reta uapĩro yugüiraa Jesús. ²⁸ Ērei Jesús uyerova umae jese reta jare jei chupe reta:

—Jerusalén pegua cuña reta, agüiye piyao cheré. Piyao piyee jare pemembĩ reta re —jei—. ²⁹ Mase, outa uvãe ara reta jei reta vaerã: 'Uyerovia co imembĩ mbae vae. Uyerovia co umicambu mbae etei vae' —jeita, jei—. ³⁰ Jayave umbipita tēi jei ivitu guasu pe: 'Piyapara oreárambo. Oreaso?' —jeita, jei—. ³¹ Uyapo reta icavi mbae vae cheve yave, ¿mbae ra uyapota peve? —jei.

³² Jare sundaro reta güiraa vi Jesús ndive mocui cuimbae icavi mbae vae uyapo vae uyuca vaerã. ³³ Jare yugüiraa uvãe Ácacüerenda jee vae pe. Jayave joco pe sundaro reta uicutu curusu re Jesús jare cuimbae reta icavi mbae vae uyapo vae. Oñono reta penti Jesús iyacata coti jare ĩru iyaso coti. ³⁴ Jayave Jesús jei:

—CheRu, embiasa chupe reta. Uicuaa'ã mbae uyapo ñugüinoi vae —jei.

Jayave sundaro reta uyuguari Jesús jemimonde re, uicuaa vaerã mbae nunga penti penti güiraa iyupe vaerã. ³⁵ Jare tenta guasu pegua reta uyemboi ñugüinoi jacoropi umae Jesús re. Jare tenta guasu pegua reta itenondegua joco pe ñugüinoi vae reta oyoyai Jesús. Jei reta:

—Jae uepi ĩru vae reta. Añave tuyerepi, jae co Cristo yave, jae co Tumpa uiparavo vae yave —jei reta.

³⁶ Jare sundaro reta vi oyoyai Jesús. Oya reta jese jare umee vinagre chupe. ³⁷ Jare jei reta:

—Nde co jae judío reta juvicha guasu yave, iyerepi.

³⁸ Jare oñono reta curusu re Jesús iñãca iárambo uyecuatía jeseagua vae: "Cua co jae judío reta juvicha guasu." Uyecuatía oĩ griego iñee pe jare latín pe jare hebreo iñee pe.

³⁹ Jare penti cuimbae icavi mbae vae uyapo vae uyecutuca vae uñeengata Jesús pe.

—Nde co jae Cristo, Tumpa ombou vae yave, iyerepi jare orerepi vi —jei.

⁴⁰ Ērei ĩru cuimbae uñeengata chupe.

—¿Ndequie'ã pa Tumpa güi? Echa'ã nde vi nemano neĩ cua ĩru vae rami —jei—. ⁴¹ Jare jupi co yande ñamano vaerã. Echa'ã yande ñamanota ñaĩ icavi mbae vae yayapo vae jeco pegua. Ērei cua cuimbae uyapo'ã mbae icavi mbae vae —jei.

⁴² Jayave jei Jesús pe:

—Jesús, nemandúa cheré ndeporoyocua pe neĩ yave.

⁴³ Jayave Jesús jei chupe:

—Añete che jae ndeve, cua ara neĩta che ndive ara pe —jei.

*Jesús umano**(Mt 27.45-56; Mr 15.33-41; Jn 19.18-30)*

⁴⁴ Jare guarasi ara mbite güive mbapi ora rupi uñemipiñtumimbi opaete ivi pe. ⁴⁵ Guarasi jembipe'ã etei. Jayave Tumpa jo umbiyao vae osoro mbite rupi. ⁴⁶ Jayave Jesús tanta usapicai. Jayave jei:

—CheRu, amee ndeve cherecove.

Jare cua jei ma yave, umano.

⁴⁷ Jare cien sundaro vae juvicha joco pe oĩ vae uecha mbae uyeyapo vae. Jayave umbiadora Tumpa jare jei:

—Añetete co, cua cuimbae co jae jupi vae.

⁴⁸ Jare opaete joco pe yati vae reta vi uecha mbae uyeyapo vae jare ocua iyee ipitia re. Jayave opaete vae yugüiraa ye jenta jenta pe. ⁴⁹ Jare opaete Jesús uicuaa vae reta jare cuña Jesús ndive Galilea güi yugüeru vae reta uyemboi ñugüinoi mbiri curusu güi. Umae ñugüinoi mbae uyeyapo vae re.

*José oñono Jesús jetecue teögüeriru pe**(Mt 27.57-61; Mr 15.42-47; Jn 19.38-42)*

⁵⁰ Jare joco pe oĩ vi penti cuimbae José jee vae. Jae co penti mburuvicha. Ipiacavi jare jupi. ⁵¹ (Jae uipota'ã tēi ĩru mburuvicha reta uyapo vaerã icavi mbae vae Jesús pe.) Jae co tenta guasu Arimatea pegua. (Arimatea Judea pegua co.) José vi uãro ico Tumpa iporoyocua. ⁵² Cua cuimbae oo Pilato pe, jare uyerure chupe Jesús jetecue re. ⁵³ Jayave umbigüeyi Jesús jetecue, jare oñoma nieso pe. Jayave oñono penti teögüeriru itape uyeyoo vae pe, ndei quía uñeñono pipe vae pe. ⁵⁴ Jocua ara opaete judío reta uyeyapicatu ñugüinoi piareve peguarã. Echa'ã piareve pe co mbutuu ara.

⁵⁵ Jare cuña Jesús ndive Galilea güi yugüeru vae reta, yugüiraa José jaicue jare uecha teögüeriru jare quirãi José oñono pipe Jesús jetecue vae. ⁵⁶ Jayave yugüiraa ye jenta jenta pe jare uyapicatu mbaembae ipiche cavi vae. Jayave uputuu reta mbutuu ara pe. Echa'ã jucuarãi uyecuatia oĩ mboroyocui pe.

24*Jesús icove ye**(Mt 28.1-10; Mr 16.1-8; Jn 20.1-10)*

¹ Jare neimbove asi domingo ara pe cuña reta yugüiraa ye teögüeriru coti. Güiraa reta mbaembae ipiche cavi vae uyapicatu ma vae. ² Jare uecha ita tuicha vae uyembisiri ma teögüeriru jonque güi. ³ Jayave uique reta teögüeriru pe, ñrei uvãe'ã yandeYa Jesús jetecue joco pe. ⁴ Ipiacañi ete reta cua re, ñrei aramoño uyecuaa uyemboi ñugüinoi iyipi pe mocui cuimbae. Jocua mocui cuimbae jemimonde uvera oĩ. ⁵ Ñeramo cuña reta uquiye jare ipe cuimbae reta jovaĩ. Jayave cuimbae reta jei chupe reta:

—¿Maera pa peeca peĩ icove ye vae umanocue vae reta ipite pe? ⁶ Mbaeti ma cua pe oĩ. Jae icove ye ou umanocue vae reta ipite güi. Pemandúa jae icose pe ndive Galilea pe yave jei peve vae re —jei reta—. ⁷ Echa'ã jae jei peve: 'Chemeeta cuimbae icavi mbae vae uyapo vae reta pe. Jae reta checututa curusu re. Ñrei che cuimbaerã ayeyapo vae aicove yeta ayu umanocue vae reta ipite güi mbapi ara rupi' —jei, jei reta.

⁸ Jayave jae reta imandúa Jesús jei chupe reta vae re. ⁹ Jayave yugüeru ye teögüeriru güi jare umimbeu opaete uyeyapo vae jocua once vae jare opaete ĩru vae reta pe. ¹⁰ Jocua cuña reta co jae María Magdalena, jare Juana, jare Jacobo ichi María jee vae, jare ĩru cuña jae reta jupie yugüiraa vae reta. Cua reta umimbeu Jesús jemimondo reta pe mbae uyeyapo vae. ¹¹ Ñrei iyapu echa reta Jesús jemimondo reta pe. Güirovia'ã reta. ¹² Jayave Pedro osi oo teögüeriru coti. Jare joco pe oo uvãe yave, ipe umae vaerã teögüeriru japipe pe, jare uecha nieso reta joco pe oĩ. Jayave ou ye joco güi. Ipiacañi uyeyapo vae re.

*Jesús jare mocui jemimboe reta**(Mr 16.12-13)*

¹³ Jare jocua ara etei mocui Jesús jemimboe reta yugüiraa tape rupi Jerusalén güi tenta guasu-rai Emaús coti. Emaús oĩ mocui legua Jerusalén güi. ¹⁴ Jare tape rupi yugüiraa rambueve, imiari uyupe opaete uyeyapo vae re. ¹⁵ Jare aramoño uyemingueta ñugüinoi rambueve, Jesús uyecuaa chupe reta jare oo jae reta jupie. ¹⁶ Ñrei jae reta uicuaa'ã Jesús. Echa'ã Jesús ndei uipota uyecuaaca chupe reta. ¹⁷ Jayave Jesús upirandu chupe reta:

—¿Mbae re pa pemiari piyupe peguata rambueve? ¿Maera pa pepiatiti? —jei.

¹⁸ Jare penti Cleofas jee vae upirandu Jesús pe:

—¿Ndico'ã pa Jerusalén pe? ¿Ndicuaa'ã pa cua ara reta pe opaete uyeyapo vae? —jei.

¹⁹ —¿Mbae pa? —jei chupe reta.

—Jesús Nazaret pegua pe uyeyapo vae —jei reta chupe—. Jae co penti Tumpa iñee umimbeu vae. Uyapo jeta mbae icavi vae mbaepuere reve, jare icavi oporomboc. Uyeyocui cavi Tumpa pe jare opaete tenta guasu pegua reta umbiadora —jei reta Jesús pe—. ²⁰ Ërei sacerdote reta itenondegua reta jare oretenondegua reta umee mburuvicha guasu pe, jae uyucaca vaerã. Jare uicutuca reta curusu re —jei reta—. ²¹ Ërei ore ndugüirovia tõi jae uepita Israel pegua reta. Jare cua ara mbapí ara ma opaete cua uyeyapo vae güi —jei reta—. ²² Ërei amocue cuña ore ndive uyeyocuisse Jesús pe vae reta iyei neimbove yugüiraa teögüeriru pe, jare yugüeru ye yave, oremipiacañi ete. ²³ Echa'ã jae reta uvã'e'ã Jesús jetecue, jare yugüeru ye yave, jei oreve quirãi uecha ángel reta joco pe jare quirãi ángel reta jei Jesús icove ye ma oĩ —jei reta—. ²⁴ Jayave amocue ore ndive ñugüinoi vae yugüiraa vi teögüeriru pe, jare yugüeru ye yave, umimbeu oreve mbaeti joco pe oĩ Jesús jetecue cuña reta jei oreve rami —jei reta.

²⁵ Jayave Jesús jei chupe reta:

—Pe reta co jae iyaracuaa mbae vae reta rami. Yavai co oĩ peve perovia vaerã opaete Tumpa iñee aracae umimbeu vae reta uicutiacue vae —jei—. ²⁶ Picuaata tõi ma jae reta uicutatía co quirãi Cristo, Tumpa ombou vae, uiporarañotai rani co jare quirãi jocua jaicue rupi uyembiaadoracata co —jei.

²⁷ Jayave Jesús umimbeu chupe reta jeta Moisés jare Tumpa iñee aracae umimbeu vae reta uicutiacue vae güi, jare umimbeu cavi chupe reta quirãi opaete jocua uyecuatía oĩ vae imiari Cristo re.

²⁸ Jare yugüiraa ma uvãe coiño Emaús güi. Echa'ã jocua mocui vae upitata joco pe. Jare Jesús uasata tõi oo cuti. ²⁹ Ërei jae reta jei chupe:

—Epita ore ndive. Echa'ã caaru ma. Pítuta co ndeve —jei reta.

Jayave Jesús upita jae reta jenta pe. ³⁰ Jayave uguapi rambueve mesa pe ucaru vaerã, Jesús uipisi mbiyape jare umee yasurupai Tumpa pe. Jayave upisãa umee chupe reta. ³¹ Jayave ramo uicuaa reta Jesús. Echa'ã Jesús umaño ma jese reta uicuaa vaerã. Jayave jupivoiño Jesús ucañi chugüi reta. ³² Jayave jei reta uyupe:

—Añete co, jae yanembiyerovia ete, tape rupi imiari yandeve rambueve. Echa'ã uicuaaca yandeve Tumpa iñee uyecuatía oĩ vae —jei reta. ³³ Jayave jocua ora pe etei jae reta upña mesa güi jare yugüiraa ye Jerusalén pe. Joco pe uvãe jocua once vae yati ñru vae reta ndive.

³⁴ —Añete co, yandéYa icove ye ma ou umanocue vae reta ipite güi —jei yati vae reta—. Echa'ã uyecuaa co Simón pe.

³⁵ Jayave jocua mocui vae vi umimbeu yati vae reta pe mbae tape rupi uyeyapo vae jare quirãi Jesús uyecuaaca chupe reta mbiyape upisãa yave.

Jesús uyecuaa jemimboe reta pe

(Mt 28.16-20; Mr 16.14-18; Jn 20.19-23)

³⁶ Jare uyemingueta ñugüinoi rambueve, Jesús etei uyecuaa uyemboi oĩ ipite pe, jare jei chupe reta:

—Mbiacatu toĩ pe ndive.

³⁷ Ërei jae reta uquiye ete. Ipia pe uyemingueta tõi jocua co Jesús iácue. ³⁸ Ërei Jesús jei chupe reta:

—¿Maera pa pequiye? ¿Maera pa pepia pe piyemingueta jucuarãi? —jei—. ³⁹ Pema chepo jare chepi re. Che co jae. Pepuere cheaviqui picuaa vaerã jae co che. Echa'ã penti vae iácue güinoi'ã soo jare maecãgüe. Ërei pepuere peeche che ime co anoi soo jare maecãgüe —jei.

⁴⁰ Jare cua jei ma yave, uechaca chupe reta ipo jare ipi. ⁴¹ Jae reta ipiacañi, jare uyerovia ete ramo ndei ipuere güirovia ete. Jayave Jesús upirandu chupe reta:

—¿Ime pa penoi cua pe mbae jau vaerã?

⁴² Jayave umee reta chupe pira oyicue iperaso jare mbovi ei. ⁴³ Jare Jesús uipisi jou jae reta jovaque. ⁴⁴ Jayave jei chupe reta:

—¿Pemandua'ã pa pe reta ndive aico rambueve che jae peve vae re? Echa'ã Moisés iporoyocui jare Tumpa iñee aracae umimbeu vae reta uicutiacue vae jare Salmo reta chemimbeu. Jare amimbeu peve quirãi opaete cua chemimbeu vae uyeyapota co —jei.

⁴⁵ Jayave umee chupe reta uicuaa cavi vaerã Tumpa iñee uyecuatía oĩ vae. ⁴⁶ Jayave jei chupe reta:

—Cuarãi uyecuatía oĩ quirãi Cristo, Tumpa ombou vae, uiporarañotai co jare icove yeta co ou umanocue vae reta ipite güi mbapí ara rupi, ⁴⁷ jare quirãi jerãcuata ñru vae reta pe Cristo jee re ueya vaerã iyemingueta icavi mbae vae ipia pe oĩ vae Tumpa umbiasa vaerã chupe reta imbaeyoa reta. Jerãcuata rani Jerusalén pe. Jayave joco güi jerãcuata opaete ivi pegua reta pe —jei—. ⁴⁸ Jare pe reta pemimbeuta opaete cua regua —jei—. ⁴⁹ Mase, ambouta peve

cheRu jei umeeta co peve vae. Ërei pepita tenta guasu Jerusalén pe mbaepuere güinoi vae ara güi ou peve regua —jei.

Jesús oo ara pe

(Mr 16.19-20)

⁵⁰ Jayave Jesús güiraa reta Betania pe. Jayave uupi ipo ara coti jare umivendise reta. ⁵¹ Jare umivendise oĩ rambueve, oo chugüi reta ara coti. ⁵² Jayave jae reta umbiadora. Jayave yugüiraa ye Jerusalén pe uyerovia reve. ⁵³ Jare jecuaeño yugüiraa Tumpa jo pe umbiadora reve Tumpa. Amén.

EL SANTO EVANGELIO SEGUN SAN JUAN

Ñee uyeyapo cuimbaerã

¹ Ndei mbae uyeyapo mbove, ico Ñee. Jare Ñee ico Tumpa ndive. Jae co Tumpa etei. ² Ñee ico Tumpa ndive ndei mbae uyeyapo mbove. ³ Jae uyapo opaete. Opaete uyeyapo vae jae etei uyapo. ⁴ Jae umee tecove opaete pe, jare cua tecove rupi jae uyecuaa ivi pegua reta pe mbaembae uyecuaa tembipe rupi rami. ⁵ Jae co tembipe rami. Tembipe jecuaeño jembipe pítumimbi pe, jare pítumimbi ipuere'ã etei ombove. ⁶⁻⁷ Ico penti cuimbae Juan jee vae. Tumpa ombou cua cuimbae umimbeu vaerã tembipe regua, ñru vae reta upurugüirovia vaerã uyandu yave. ⁸ Jae jae'ã co jocua tembipe. Jaeño ou umimbeu vaerã jocua tembipe re.

⁹ Tembipe etei ou ma cua ivi pe. Jae uyecuaa opaete vae pe. ¹⁰ Jae ico cua ivi pe, jare jae uyapo cua ivi. Èrei ivi pegua reta uicuaa'ã. ¹¹ Ou ivi pe, èrei ivi pegua reta umbiresive'ã. ¹² Èrei amocue vae umbiresive. Güirovia jese. Jáeramo jae umee cua reta pe Tumpa tai retarã jare tayi retarã yugüireco vaerã. ¹³ Tumpa etei umee cua reta pe tecove. Cua tecove ou'ã co ichi rupi. Güinoi'ã cua tecove tu jei vae rupi.

¹⁴ Jocua Ñee uyeyapo cuimbaerã. Ou cua ivi pe ico vaerã yande ndive. Jare ore nduecha yembutuicha ara pegua co jae. Jaeño Tumpa Tai jae vaeño cua yembutuicha güinoi vae. Jae ipiacavi ete jare opaete jei vae añete co. ¹⁵ Echa'ã Juan umimbeu ñru vae reta pe:

—Cua co jae chemiari jese vae —jei chupe reta—. Che jae ma peve: 'Cheraicue rupi outa vae ipuere ete chegüi. Echa'ã jae ico ndei aico mbove' —jei.

¹⁶ Jocua Ñee ipiacavi ete. Jáeramo jecuaeño uyapo icavi vae yandeve. ¹⁷ Tumpa umimbeu mboroyocui Moisés rupi. Èrei Jesucristo rupi Tumpa umimbeu ipiacavi co jare yanemboe añete vae re. ¹⁸ Mbaeti etei quía uecha Tumpa. Èrei Tumpa Tai jae vaeño uicuaaca yandeve. Tumpa uau Tai.

*Juan upurumbibautiza vae umimbeu vae
(Mt 3.1-12; Mr 1.1-8; Lc 3.1-20)*

¹⁹ Penti ara yugüiraa uvãe Juan oï vae pe sacerdote reta jare levita reta. Judío reta Jerusalén pegua omondo cua reta chupe. Jae reta jei Juan pe:

—¿Quía pa co nde?

²⁰ Juan umimbeu cavi. Iyapu'ã chupe reta.

—Che jae'ã co Cristo jee vae —jei chupe reta.

²¹ Jayave upirandu reta ye chupe:

—Nde jae'ã yave, ¿nde pa co jae Elías jee vae?

Juan jei:

—Che'ã co jae.

Jei reta chupe:

—¿Nde pa co jocua Tumpa ñnee umimbeu vae?

—Che'ã co jae —jei Juan chupe reta.

²² Jayave upirandu reta ye chupe:

—¿Quía pa co nde? Echa'ã nduipota numimbeu orembou vae reta pe. ¿Mbae pa ndere ndiyupe? —jei reta Juan pe.

²³ Jayave Juan jei:

—Che co jae penti ñee umimbeu vae. Chiñeeãta ñana pe: 'Piyapicatu yandeYa japerã.' Jucuarãi che jae —jei Juan—. Echa'ã jucuarãi jei Isaías araca Tumpa ñnee umimbeu vae —jei. ²⁴ Cua Juan oï vae pe yugüiraa vae reta fariseo reta co. ²⁵ Upirandu reta Juan pe:

—Nde jae'ã yave Cristo ani Elías ani jocua Tumpa ñnee umimbeu vae, ¿maera pa ndepurumbibautiza? ²⁶⁻²⁷ —Che apurumbibautiza i pe —jei Juan—. Èrei picuaa'ã, ime pepite pe jocua cheraicue rupi outa vae. Jupi'ã co che amboi vaerã ipipasa —jei chupe reta.

²⁸ Opaete cua uyeyapo Betábara pe iãca Jordán jee vae jovaicho pe. Echa'ã joco pe upurumbibautiza Juan.

Tumpa ombou vae

²⁹ Piareve pe Juan uecha Jesús ou icoti jare jei:

—Mase, pee oï Tumpa ombou vae. Jae co ovecha rami. Ou güiraa vaerã opaete ivi pegua reta imbaeyoa —jei—. ³⁰ Cua co jae chemiari jese vae. Che jae ma peve: 'Cheraicue rupi outa vae ipuere ete chegüi. Echa'ã jae ico ndei aico mbove.' Cua co jae —jei Juan—. ³¹ Che

aicuaa'ã. Ērei ayu apurumbibautiza i pe jae uyecuaa vaerã Israel pegua reta pe —jei chupe reta.

³² Juan umimbeu vi chupe reta:

—Aecha Espiritu Santo ugüeyi ara güi picasu rami jare ou upita jese —jei—. ³³ Che aicuaa'ã. Ērei chembou apurumbibautiza vaerã i pe vae jei cheve: 'Ndeechata Espiritu Santo ugüeyi ou upita penti cuimbae re. Jocua cuimbae upurumbibautizata Espiritu Santo pe' —jei, jei Juan—. ³⁴ Jocua aecha ma jare amimbeu peve cua co jae Tumpa Tai —jei.

Jesús jemimboe tenondegua vae reta

³⁵ Piareve pe Juan uyemboi ye oĩ joco pe mocui jemimboe ndive. ³⁶ Jayave ou Jesús uasa jocatoropi. Juan umae ngatu jese.

—Mase, pee oĩ Tumpa ombou vae. Jae co ovecha rami —jei.

³⁷ Jocua mocui jemimboe uyandu jare yugüiraa Jesús jaicue. ³⁸ Jesús uyerova yave, uecha yugüeru icoti.

—¿Mbae pa peeca? —jei chupe reta.

—¿Quíape pa ndico, Rabí? —jei reta. (Rabí uipota jei: “Oporomboe vae”).

³⁹ —Peyu peecha —jei Jesús.

Jayave yugüiraa Jesús ico vae pe uecha, jare upita jocua ara jae ndive. Echa'ã caaru catu ma. ⁴⁰ Mocui cuimbae co jocua Jesús jaicue yugüiraa vae. Echa'ã yugüiraa jaicue uyandu yave Juan jei chupe reta vae. Penti cuimbae jee co Andrés. Jae co Simón Pedro tivi. ⁴¹ Andrés oo rani uvãe tiqüei Simón pe jare jei chupe:

—Nuvãe ma Mesías. (Cua uipota jei hebreo iñee pe: “Cristo, Tumpa ombou vae”).

⁴² Jayave Andrés güeru Simón Jesús oĩ vae pe. Jesús umae ngatu Simón re jare jei:

—Nde co jae Simón. Nde co jae Jonás tai. Turumbijee Cefas. (Cua uipota jei: “Pedro”).

Jesús ueni Felipe jare Natanael

⁴³⁻⁴⁴ Piareve pe Jesús uipota oo Galilea pe. Jare uvãe Felipe Betsaida pegua. Andrés jare Pedro Betsaida pegua vi. Jesús jei Felipe pe:

—Eyu cherupíe.

⁴⁵ Jayave Felipe oo uvãe Natanael pe jare jei chupe:

—Nuvãe ma Moisés mboroyocui pe imiari jese vae. Aracae Tumpa iñee umimbeu vae reta vi imiari jese —jei—. Jae co Jesús Nazaret pegua. Jae co José tai —jei chupe.

⁴⁶ —¿Ime pa mbae icavi vae Nazaret pegua? —jei Natanael.

—Yaa eecha —jei Felipe.

⁴⁷ Jesús uecha Natanael ou icoti jare jei:

—Mase, co ou penti Israel pegua añetete vae. Jecuaeño uyapo añete vae rupi —jei.

⁴⁸ Natanael upirandu Jesús pe:

—¿Quirã pa checuaa?

Jesús jei chupe:

—Ndei Felipe nereni mbove, che nduecha iva igüi pe.

⁴⁹ —Nde co jae Tumpa Tai, Oporomboe vae —jei Natanael—. Nde co jae Israel pegua reta juvicha guasu —jei.

⁵⁰ Jesús jei chupe:

—Amimbeu ndeve che nduecha iva igüi pe. ¿Cua jeco pegua ra ndepurugüirovia ma? —jei—. Ndeechata mbaembae ndepurugüirovia ete vaerã —jei—. ⁵¹ Añete che jae ndeve, ndeochata ara uyepea oĩ, jare ndeochata vi ángel Tumpa pe uyeyocui vae reta uyupi ñugüinoi jare ugüeyi ñugüinoi che aĩ vae pe. Che co jae cuimbaerã uyeyapo vae —jei Jesús.

2

Penti menda Caná pegua

¹ Mbapi ara rupi penti cuimbae umenda cuñatai ndive Caná Galilea pegua pe, jare Jesús ichi joco pe oĩ. ² Jare uparea reta vi Jesús jare jemimboe reta pe. ³ Vino opa ma yave, Jesús ichi jei Jesús pe:

—Opa ma vino.

⁴ —Cuña, ¿maera pa ndere cheve cua? —jei Jesús—. Ndei uvãe cheparaviqui ayapo vaerã —jei.

⁵ Jayave Jesús ichi jei joco pe uyeyocui vae reta pe:

—Piyapo umimbeuta peve vae.

⁶ Joco pe ñugüinoi seis iru guasu ita pegua. Judío reta uiporu jocua nunga iru guasu mbaembae oyoe vaerã Tumpa coti jecoño mai uyapo rami. Penti penti iru guasu ipuere tinee pandepo iru i pe. ⁷ Jesús jei tembocui reta pe:

—Pemitinee cavi iru guasu reta i pe.

Jayave jae reta umitinee cavi. ⁸ Jesús jei chupe reta:

—Añave piñoë peraa peruvicha pe.

Jayave jucuarāi uyapo reta. ⁹ Uyeyocui vae reta juvicha jou jocua i vinorā uyeyapo vae. Jae uicuaa'ā quía güi ra ou jocua jou vae, ñerei jembiocui reta uicuaa catu quía güi co oñoë. Jayave mburuvicha ueni cuimbae umenda vae.

¹⁰ —Opaete ñru vae reta umee vino icavi vae mboupa reta pe. Jayave jeta vino jou yave ramo umee chupe reta vino icavi nunga mbae vae —jei chupe—. Ñerei nde añave ramo nemee vino icavi ete vae —jei.

¹¹ Jesús cua uyapo Caná Galilea pegua pe. Cuarāi Jesús umbipi uicuaaca jemimboe reta pe jae imbaepuere tuicha ete co. Jare cua uyapo vae jeco pegua jemimboe reta güirovia jese.

¹² Cua jaicue rupi Jesús oo Capernaúm pe. Yugüiraa vi jae jupíe ichi jare tivi reta jare jemimboe reta. Jare upíta reta joco pe mbovi ara.

Jesús Tumpa jo pe uyapo vae

(Mt 21.12-13; Mr 11.15-18; Lc 19.45-46)

¹³ Jare coiño ma ou judío reta pascua iara. Jayave Jesús oo Jerusalén pe. ¹⁴ Jare Tumpa jo pe uecha umaemee vae reta. Umee ñügüinoi güeye reta jare ovecha reta jare picasu reta. Uecha vi corepoti uipepica vae reta uguapi ñügüinoi joco pe. ¹⁵ Jayave Jesús uyapo chicote jare omoë umaemee vae reta jare ovecha reta jare güeye reta Tumpa jo güi. Jayave upiyere corepoti uipepica vae reta icorepoti jare umbiyapara imesa reta. ¹⁶ Jare jei picasu umee vae reta pe:

—Peraa cua güi cua reta. Agüiye pemee mbaembae cheRu jo pe —jei.

¹⁷ Jayave jemimboe reta imandúa quirāi ime Tumpa ñnee pe uyecuatía oí cuarāi: “Aipota ete Tumpa jo uyepiua vaerā. Cheragüiro jese. Jáeramo cua jeco pegua ñru vae reta uyapota icavi mbae vae cheve.” Jucuarāi uyecuatía oí.

¹⁸ Jayave judío reta upirandu Jesús pe:

—¿Mbae nunga miacañi pa ndeacacata oreve nduicuaa vaerā ime ra neni mbaepuere cua mbaraviqui ndiyapo vae ndiyapo vaerā?

¹⁹ Jesús jei chupe reta:

—Pembusururu yave cua Tumpa jo, che amupüa yeta co mbapi ara pe.

²⁰ —Uparaviqui reta cuarenta y seis año uyapo vaerā cua Tumpa jo —jei judío reta—. ¿Nemupüa yeta ra nde mbapi ara pe? —jei.

²¹ Ñerei Jesús uyemingueta chupe reta jete re. Echa'ā jete co jae Tumpa jo. ²² Jáeramo Jesús icove ye yave ou umanocue vae reta ipite güi, jemimboe reta imandúa cua jei vae re. Jayave güirovia aracaé Tumpa ñnee pe uyecuatía oí vae jare jocua Jesús jei chupe reta vae.

Jesús uicuaa opaete vae

²³ Jesús upíta Jerusalén pe pascua iara pe. Joco pe oí rambueve, jeta vae güirovia jese uecha yave jocua miacañi reta uyapo vae. ²⁴ Ñerei Jesús güirovia'ā añetete cua reta ipurugüirovia. Echa'ā uicuaa cavi opaete ivi pegua reta. ²⁵ Jae ueca'ā quía umimbeu vaerā chupe ivi pegua reta regua. Echa'ā jae uicuaa cavi ivi pegua reta ipia pe oí vae.

3

Jesús jare Nicodemo

¹ Ico penti fariseo Nicodemo jee vae. Jae co judío reta juvicha. ² Cua cuimbae ou Jesús oí vae pe pítu yave jare jei chupe:

—Oporomboe vae, nduicuaa co Tumpa nembou ndeporomboe vaerā. Echa'ā mbaeti quía ipuere uyapo jocua nunga miacañi ndiyapo vae Tumpa oí'ā yave jae ndive —jei.

³ —Añete che jae ndeve —jei Jesús Nicodemo pe—, ime yave quía uipota ico Tumpa iporoyocua pe vae, güinoita rani co tecove ipiau vae —jei.

⁴ —¿Quirāita pa co yandepuere tecove ipiau vae ñanoi yanendechi ma yave? —jei Nicodemo—. Yandepuere'ā etei yaique ye yandesí jie pe yaa ye vaerā —jei.

⁵ Jesús jei chupe:

—Añete che jae ndeve, ime yave quía uipota ico Tumpa iporoyocua pe vae, güinoita rani co tecove ipiau vae i jare Espíritu Santo rupi —jei—. ⁶ Yaa yave yandesí güi, ñanoi tecove ivi peguarāño. Ñerei Espíritu Santo umee yandeve tecove Espíritu pegua —jei—. ⁷ Amimbeu ma ndeve quirāi penoita rani co tecove ipiau vae. Agüiye nepiacañi cua re —jei chupe—. ⁸ Ivitu uyepuyu ipotave rupi güi jare ndiyandu jiapu. Ñerei ndicuaa'ā queti güi ra ou jare queti ra oo. Jucuarāi co oí Espíritu Santo umee tecove chupe vae —jei Jesús.

⁹ Nicodemo upirandu Jesús pe:

—¿Quirāita pa co uyeyapo cua?

¹⁰ Jesús upirandu Nicodemo pe:

—¿Ndicuaa'á pa cua? Echa'á nde co jae Israel pegua reta omboe vae —jei—. ¹¹ Añete che jae ndeve, nduyemingueta nduicuaa vae re jare numimbeu nduecha vae. Ërei perovia'á numimbeu peve vae —jei—. ¹² Amimbeu ma peve mbaembae uyeyapo ivi pe vae, ërei chererovia'á. ¿Quiráita pa pepuere chererovia mbaembae uyeyapo ara pe vae amimbeu peve yave? —jei Jesús Nicodemo pe—. ¹³⁻¹⁴ Mbaeti quía ye uyupi oo ara pe, jaeño che ara güi agüeyi ayu vae. Che co jae cuimbaerá uyeyapo vae ara pe oí vae —jei chupe—. Moisés aracae uupi jocua mboi ivira re, ñana pe ico yave. Jucuará vi ñru vae reta chereupita co, ¹⁵ ipotave güirovia cheré vae güinoi vaerá tecove opa mbae vae. Ndarau oo cañitei pe —jei.

Tumpa uau ete ivi pegua reta

¹⁶ Echa'á Tumpa uau ete ivi pegua reta. Jáeramo umee Tai jae vaño, ipotave güirovia jese vae güinoi vaerá tecove opa mbae vae. Ndarau oo cañitei pe. ¹⁷ Tumpa ombou Tai ivi pe, ivi pegua reta uyembiasaca vaerá jae jeco pegua. Tai ou'á uáa vaerá ivi pegua reta.

¹⁸ Güirovia Tumpa Tai re vae reta ndarau ma uñeáca. Ërei ñru vae reta uñeáca ma co. Echa'á Tumpa Tai jae vaño umimbeu ma quía co jae. Ërei jae reta güirovia'á. ¹⁹ Tembipe ou ma ivi pe, ërei ivi pegua reta uipotata ete ico pítumimbi pe. Uipotata'á ico tembipe pe. Echa'á uyapo reta icavi mbae vae. Jáeramo uñeáca reta ma co. ²⁰ Ipotave icavi mbae vae uyapo vae umitaréi tembipe. Ou'á tembipe oí vae pe agüiye vaerá ñru vae reta uicuaa mbae uyapo vae. ²¹ Ërei añete pegua rupi ico vae ou tembipe oí vae pe, ñru vae reta uicuaa vaerá mbaraviqui uyapo vae uyapo co Tumpa jei vae rupi.

Umendata vae iamigo

²² Cua jaicue rupi Jesús jare jemimboe reta yugüiraa ivi Judea jee vae pe. Joco pe upita Jesús jae reta ndive jare upurumbibautizaca oí. ²³ Juan vi upurumbibautiza oí Enón pe. Enón coiño oí Salim güi. Echa'á joco pe jeta i oí. Jare amocue vae yugüeru jare Juan umbibautiza reta. ²⁴ Echa'á Juan ndei uyereraaca peresorizu pe.

²⁵ Jayave Juan jemimboe reta uyeaca ñugüinoi judío reta ndive quirá ipuere uyeyo cavi Tumpa peguará vae re. ²⁶ Jayave yugüeru Juan oí vae pe jare jei chupe:

—Oporomboe vae, nde nemimbeu ma oreve Jordán jovaicho pe nde ndive icose vae regua. Mase, jae upurumbibautiza oí, jare opaete vae yugüiraa ñugüinoi jae oí vae pe —jei reta Juan pe.

²⁷ Jayave Juan jei chupe reta:

—Tumpa umee yandave vaño yandepuere ñanoi. ²⁸ Che jae ma peve: ‘Che jae'á co Cristo. Jaeño Tumpa che rani chembou chugüi.’ Pe reta etei picuaa cuarái co che jae peve —jei chupe reta—. ²⁹ Jae co penti cuimbae umendata vae rami. Che co umendata vae iamigo rami. Echa'á umendata vae iamigo upita umendata vae ndive jare uyapisaca jese jare uyerovia ñee uyandu yave. Jucuaráño vi co che ayerovia ete —jei—. ³⁰ Echa'á jeta vae yugüiraata jae oí vae pe, ërei mbovíño ma co yugüeruta che aí vae pe —jei Juan chupe reta.

Ara güi ou vae

³¹ Ara güi ou vae ipuere opaete ñru vae reta güi. Ivi pegua reta ivi peguaño co jare uyemingueta mbaembae ivi pe oí vae re. Ara güi ou vae ipuere opaete ñru vae reta güi. ³² Jae umimbeu uecha jare uyandu vae, ërei mbaeti quía güirovia jae umimbeu vae. ³³ Jae umimbeu vae güirovia vae uicuaaca ñru vae reta pe güirovia co Tumpa ñee añete co. ³⁴ Echa'á jocua Tumpa ombou vae umimbeu Tumpa ñee, jare Tumpa umee chupe Espíritu Santo opaete imbaepuere reve. ³⁵ Tu uau Tai jare oñono opaete mbaembae ipo pe. ³⁶ Tumpa Tai re güirovia vae güinoi ma tecove opa mbae vae. Tumpa Tai re güirovia mbae vae ndarau güinoi tecove. Tumpa uiporacata chupe.

4

Jesús jare cuña Samaria pegua

¹ YandeYa Jesús uyandu jeráca ma co fariseo reta pe cuarái: “Jesús uyapo oí jare umbibautiza oí jeta jemimboe retará Juan güi.” Jucuará jeráca. ² Ërei Jesús etei upurumbibautiza'á. Jemimboe retaño upurumbibautiza ñugüinoi. ³ Jayave cua uicuaa yave, Jesús oé Judea güi oo ye Galilea pe. ⁴ Jare oo Samaria rupi. Echa'á tape uasa jcoropi. ⁵ Jayave oo uváe tenta guasu Sicar jee vae pe. Jocua tenta guasu Samaria pegua co, jare coiño oí ivi Jacob aracae umee tai José pe vae güi. ⁶ Jocua ivi pe oí penti icua. Jocua icua jee Jacob icua. Jayave Jesús uguapí icua iyipi pe. Echa'á mbiri ma uguata, jare icandi. Jare doce pota rupi ma. ⁷ Jayave ou uváe penti cuña Samaria pegua i güinoé vaerá. Jare Jesús jei chupe:

—Emee tau i.

⁸ Echa'ã Jesús jemimboe reta yugüiraa tenta guasu pe jembiurã ogua vaerã. ⁹ Jayave cuña Samaria pegua jei Jesús pe:

—Nde co jae penti judío jare che co jae penti Samaria pegua. ¿Maera pa nde ndere cheve: 'Emee tau i?' —jei.

(Echa'ã judío reta uyemingueta'ã Samaria pegua reta ndive.) ¹⁰ Jayave Jesús jei cuña pe: —Che jae ma ndeve: 'Emee tau i.' Ndicuaa yave Tumpa uipota umee ndeve vae jare ndicuaa yave quía co che, ndiyerureta tēi co cheve jare che ameeta tēi co ndeve i tecove güinoi vae —jei Jesús.

¹¹ —Carai —jei cuña Jesús pe—, nde mbaeti mbae neno i nenoē pipe vaerã, jare cua i quipe oī. ¿Quía güi pa nderuta jocua i tecove güinoi vae? —jei—. ¹² ¿Tuicha ete pa nembaeppure yandetenondegua Jacob imbaepuere güi? Echa'ã Jacob umee yandevae cua i. Jae etei jare tai reta jare jimba reta jou cua güi —jei cuña.

¹³ Jesús jei chupe:

—Ipotave cua i jou vae iúe yeta co. ¹⁴ Ërei ipotave i che ameeta jou vae ndarau ye iúe —jei—. Echa'ã jocua i che ameeta chupe vae uyeyapota ipia pe penti icua i oē vae rami. Jecuaño umeeata chupe tecove opa mbae vae —jei.

¹⁵ —Carai —jei cuña—, emee cheve cua i, agüiye ye vaerã cheúe jare agüiye ye vaerã ayu cua pe i anoē vaerã —jei.

¹⁶ Jayave Jesús jei chupe:

—Ecuá eeni neme peyu cua pe.

¹⁷ —Mbaeti cheme —jei cuña.

—Añete co ndere: 'Mbaeti cheme' —jei Jesús cuña pe—. ¹⁸ Echa'ã neno i ma pandepo neme, jare jocua cuimbae añave neno i vae jae'ã co neme. Añete co ndere —jei.

¹⁹ —Carai —jei cuña—, añave aicuaa nde co jae penti Tumpa inee umimbeu vae —jei—. ²⁰ Yandetenondegua reta umbiadora Tumpa cua ivitu guasu re. Ërei pe reta pere Jerusalén pe oī Tumpa jo, jare joco peño İru vae reta vi umbiadorata tēi Tumpa —jei cuña.

²¹ —Chererovia, cuña —jei Jesús—. Outa ma ara agüiye vaerã pemiadora cheRu cua ivitu guasu reño ani Jerusalén peño —jei—. ²² Pe reta pemaambadora yave, picuaa cavi'ã mbae pemiadora vae. Ore numaambadora yave, nducuaa cavi co mbae numbiadora vae. Echa'ã İru vae reta uyembiasacata judío reta rupi —jei—. ²³ Ërei outa ma ara - ou ma co - añetete Tumpa umbiadora vae umbiadora vaerã Espíritu Santo rupi. Umbiadorata añete vae rupi —jei—. Echa'ã cheRu ueca cua nunga jae reta umbiadora vaerã —jei—. ²⁴ Tumpa co jae Espíritu. Umbiadora vae reta tumbiadora Espíritu Santo rupi jare añete vae rupi —jei Jesús.

²⁵ Jayave cuña jei Jesús pe:

—Aicuaa Tumpa ombou vae outa co - jae co Cristo jee vae - jare jae oo yave, umimbeuta yandevae opaete mbaembae regua —jei.

²⁶ —Jae co che ayemingueta aī nde ndive vae —jei Jesús.

²⁷ Cua jei oī yave, Jesús jemimboe reta yugüeru uvãe. İpicañi Jesús uyemingueta oī cuña ndive vae re. Ërei penti ave jei'ã chupe: “¿Mbae pa ndipota?” ani “¿Maera pa ndiyemingueta jae ndive?” ²⁸ Jayave cuña ueya iiru joco pe jare oo uvãe tenta guasu pe. Jei cuimbae tenta guasu pegua reta pe:

²⁹ —Pecua peecha cuimbae opaete ayapocue umimbeu cheve vae. ¿Jae'ã ra co Cristo, Tumpa ombou vae? —jei.

³⁰ Jayave cuimbae reta oē tenta guasu güi yugüeru Jesús coti.

³¹ Cuña oo ma yave, Jesús jemimboe reta jei chupe:

—Oporomboe vae, ecaru.

³² —İme anoi cherembiurã pe reta picuaa mbae vae —jei Jesús chupe reta.

³³ Jayave jemimboe reta jei uyupe:

—¿Güeru ma ra quía mbae jou vaerã?

³⁴ —Che ayapo chembou vae uipota ayapo vaerã vae, jare opaete iparaviqui ayapo —jei Jesús—. Cua co jae cherembiurã rami —jei—. ³⁵ Pe reta pere: 'İrundi yasi rupi oīta ma co mbaeviro.' Ërei che jae peve: Mase, pema co reta re. Joco pe oī vae yagüiye ma co. Uvãe ma mbaeviro —jei Jesús—. ³⁶ Jare tecove opa mbae vae uñemee chupe vae uyeaviro vae rami co. Jare temiti iya umbiepi umbaeviro vae pe, umaeti vae jare umbaeviro vae uyerovia pãve vaerã —jei—. ³⁷ Jucuarã añete co cua: 'Penti vae umaeti jare İru vae umbaeviro' —jei—. ³⁸ Che pomondo peaviro vaerã peparaviqui'ã jese vae. İru vae reta uparaviqui jese, jare pe reta peaviro jae reta iparaviqui vae —jei Jesús chupe reta.

³⁹ Jare jeta jocua tenta guasu pegua reta - Samaria pegua reta co - güirovia Jesús re cuña umimbeu chupe reta vae jeco pegua. Echa'ã cuña jei ma chupe reta: “Opaete ayapocue

umimbeu cheve.”⁴⁰ Jayave Samaria pegua reta yugüeru uvãe yave Jesús oĩ vae pe, jei chupe:

—Ecuá orerenta pe epita ore ndive.

Jayave Jesús oo upita joco pe mocui ara.⁴¹ Jare jeta ñru vae reta upurugüirovia Jesús etei jei chupe reta vae jeco pegua.⁴² Jayave jei reta cuña pe:

—Tenonde yave ndupurugüirovia nde ndere oreve vae jeco pegua. Ërei añave ndupurugüirovia ore etei nduyandu ramo, jare añave nduicuaa cua co jae ivi pegua reta umbiasa vae Cristo jee vae —jei reta.

Jesús umbigüera mburuvicha tai

⁴³ Mocui ara rupi Jesús oo joco güi Galilea coti.⁴⁴ Echa'ã Jesús etei jei penti Tumpa ñnee umimbeu vae jentaigua reta uipi'ũ.⁴⁵ Jayave Jesús oo uvãe yave Galilea pe, joco pegua reta umbiresive cavi. Echa'ã uecha reta ma opaete Jesús uyapo Jerusalén pe pascua pe vae. Echa'ã jae reta yugüiraa vi joco pe.⁴⁶ Jayave Jesús oo uvãe Caná Galilea pegua pe. Joco pe tenonde yave uyapo i vinorã. Jare ico Capernaum pe penti mburuvicha. Cua cuimbae tai imbaerasi oĩ.⁴⁷ Jare uicuaa yave Jesús ou ma co Judea güi uvãe Galilea pe, ou uvãe Jesús oĩ vae pe jare uyerure chupe tai re.

—Ecuá cherenta pe embigüera cherai —jei—. Echa'ã umanota ma oĩ.

⁴⁸ —Aechaca'ã peve yave miacañi reta, ndarau perovia cheré —jei Jesús chupe.

⁴⁹ —Carai —jei mburuvicha—, ecua cherenta pe agüiye vaerã cherai umano.

⁵⁰ —Ecuá yeño —jei Jesús chupe—. Nderai icove catu ye ma oĩ —jei.

Jayave mburuvicha güirovia Jesús jei chupe vae jare oo ye jenta coti.⁵¹ Jare oo rambueve jenta coti, jembicuii reta yugüeru oovãiti jare jei chupe:

—Icove catu ye ma oĩ nderai.

⁵² Jayave mburuvicha upirandu chupe reta:

—¿Mbae ora pe pa umbipi ucuera?

—Caarumo una rupi jacu upita chugüi —jei reta chupe.

⁵³ Jare cunumi tu uicuaa jocua ora pe etei co Jesús jei chupe: “Nderai icove catu ye ma oĩ.” Jayave upurugüirovia jae jare opaete jenta pegua reta.

⁵⁴ Cua miacañi uyapo Jesús uicuaa vaerã quía co jae, ou yave Judea güi Galilea pe. Mocui ma co cua miacañi.

5

Cuimbae ipuere mbae uguata vae

¹ Cua jaicue rupi judío reta uyapo ñugüinoi fiesta, jare Jesús oo Jerusalén pe. ² Jare ime Jerusalén pe ovecha reta ñemeeja jonque iyipi pe penti estanque tipi vae hebreo ñnee pe Betesda jee vae. Ime cua i iyipi rupi pandepo o-rai. ³ O-rai japipe pe uyapacua ñugüinoi jeta imbaerasi vae reta. Joco pe ñugüinoi jesa mbae vae reta, ipuere mbae uguata vae reta, jare ipuere mbae omi vae reta. Opaete cua reta uãro ñugüinoi i omi vaerã. ⁴ Echa'ã amo amo pe ugüeyi penti ángel omomi vaerã i. Jare i omi ma yave, jocua imbaerasi vae tenonde voi uique i pe vae ucuera ipotave imbaerasi güi. ⁵ Jare imbaerasi vae reta ipite pe oĩ penti cuimbae treinta y ocho año ma ipuere mbae uguata vae. ⁶ Jesús uecha cuimbae uyapacua oĩ joco pe, jare uicuaa ima ete ma imbaerasi. Jayave upirandu chupe:

—¿Ndepota pa ndecuera?

⁷ —Carai —jei cuimbae—, mbaeti quía cheñoño vaerã i pe i omi yave. Che aa rambueve, ñru vae uique i pe tenonde chegüi —jei.

⁸ Jayave Jesús jei chupe:

—Epüa evoi nderupa jare eguata.

⁹ Jayave cuimbae ucuera voi, jare ovoĩ jupa uguata. Jare jocua ara mbutuu ara co.¹⁰ Jayave judío reta jei cuimbae ucuera ma vae pe:

—Cua ara mbutuu ara co. Jupí'ã ndevoi vaerã nderupa mbutuu ara pe —jei reta.

¹¹ Cuimbae jei chupe reta:

—Cuimbae chembigüera vae jei cheve: ‘Evoi nderupa jare eguata’ —jei cheve, jei.

¹² Jayave upirandu reta chupe:

—¿Quía pa jae ‘Evoi nderupa jare eguata’ jei ndeve vae?

¹³ Ërei ucuera vae - tenonde yave ipuere mbae uguata vae - uicuaa'ã. Echa'ã jeta vae joco pe ñugüinoi jare Jesús oo ma joco güi. ¹⁴ Ndei ima mbove Jesús oovãiti cuimbae Tumpa jo pe.

—Ndecuera ma co. Jáeramo agüiye ye iyapo icavi mbae vae. Echa'ã ndiyapo ye yave, mbae icavi mbae ete vae uyeyapota ndeve —jei.

¹⁵ Jayave cuimbae oo umimbeu judío reta pe Jesús co jae umbigüera ma vae. ¹⁶ Jare Jesús uyapo ma amocue cua nunga miacañi mbutuu ara pe. Cua jeco pegua judío reta uipota uyapo icavi mbae vae chupe. Uipota vi uyuca. ¹⁷ Ërei Jesús jei chupe reta:

—CheRu jecuaeño uparaviqui, jare che vi aparaviqui.

¹⁸ Cua jeco pegua judío reta uipota uyuca Jesús. Echa'ã Jesús uyapo mbutuu ara pe jare reta jei jupi'ã uyeyapo vaerã vae, jare Jesús uyemingueta yave, jei: “Tumpa etei co cheRu”, jare cua uipota jei jae co Tumpa etei.

Tumpa Tai imbaepuere

¹⁹ Jayave Jesús jei chupe reta:

—Añete che jae peve, che co jae Tumpa Tai. Cheiño chepuere'ã mbae ayapo. Ayapo jocua aecha cheRu uyapo oï vaeño. CheRu uyapo oï vae che ayapo vi —jei—. ²⁰ Echa'ã cheRu cherau jare uicuaaca ma cheve opaete iparaviqui. Jare uicuaacata vi cheve mbaraviqui tuicha ete cua reta güi vae, pepiacañi ete vaerã jese —jei Jesús chupe reta—. ²¹ CheRu umee tecove umanocue vae reta pe. Jae ramiño vi che amee tecove amocue vae reta pe. Amee aipota vae pe —jei—. ²² CheRu ndarau uãa ivi pegua reta. Echa'ã umaeñota cheré aãa vaerã —jei—. ²³ Jucuarãi opaete vae chepiuta uipiu cheRu rami. Chepiu'ã vae uipiu'ã vi cheRu. Echa'ã jae co chembou —jei—.

²⁴ Añete che jae peve, chiñee piyandu yave jare chembou vae perovia yave, penoi ma tecove opa mbae vae. Ndarau ma piñeãaca. Peasa ma co mano güi tecove opa mbae vae pe. ²⁵ Añete che jae peve, outa ma ara - jáema ou - umanocue vae reta uyandu vaerã chiñee - che co jae Tumpa Tai - jare uyandu vae reta icove yeta co —jei Jesús chupe reta—. ²⁶ Echa'ã cheRu ipuere umee tecove. Jae ramiño vi umaeño cheré amee vaerã tecove —jei—. ²⁷ Jare cheRu umee cheve mbaepuere aãa vaerã ivi pegua reta che ayeyapo cuimbaerã ramo —jei—. ²⁸ Agüiye pepiacañi cua re. Echa'ã outa ma ara opaete umanocue uñeñoti oï vae reta uyandu vaerã chiñee —jei—. ²⁹ Icavi vae uyapo vae reta icove yeta ou tecove opa mbae vae güinoi vaerã, jare icavi mbae vae uyapo vae reta icove yeta ou uñeãaca vaerã —jei Jesús chupe reta—.

Cristo regua umimbeu vae reta

³⁰ Cheiño chepuere'ã mbae ayapo. Che apuruãa cheRu umimbeu cheve vae rupi. Jáeramo apuruãa jupi vae rupi. Echa'ã ayapo'ã jae vae rupiño. Ayapo chembou vae jei vae rupi —jei—. ³¹ Cheiño chemiari peve chiyee yave, pe reta peroviata'ã jocua jae vae. ³² Ime ñru chemimbeu vae, jare aicuaa jae jei peve cheré vae añete co —jei—. ³³ Echa'ã pe reta pemondo cuimbae reta Juan re uyapisaca vaerã, jare jae jei cheré vae añete co —jei—. ³⁴ Che aeca'ã quia chemimbeu vaerã, ñrei cua che jae peve piyembiasaca vaerã —jei Jesús—. ³⁵ Juan co jae penti mechero rami. Echa'ã mechero jendi jare umee yandevé tembipe. Ìma ngatu rupi icavi echa peve piyeroivia vaerã tembipe Juan umee peve vae re —jei—. ³⁶ Cua mbaraviqui ayapo vae reta chemimbeu ete Juan chemimbeu vae güi. CheRu uipota opa ayapo vaerã cua mbaraviqui reta, jare cua ayapo vae rupi aicuaaca ñru vae reta pe cheRu co chembou vae —jei—. ³⁷ CheRu chembou jare jae etei chemimbeu. Piyandu'ãi cheRu ñnee jare peecha'ãi —jei—. ³⁸ Piyapo'ã cheRu jei peve piyapo vaerã vae. Echa'ã jae chembou, ñrei chereroivia'ã —jei—. ³⁹ Jecuaeño pemingueta Tumpa ñnee pe uyecuatía oï vae. Echa'ã pepia pe piyemingueta joco pe pevãe quirãi pepuere penoi tecove opa mbae vae. Jare Tumpa ñnee pe uyecuatía oï vae che co chemimbeu —jei Jesús chupe reta—. ⁴⁰ Ërei pipota'ã perovia cheré tecove opa mbae vae amee vaerã peve —jei—.

⁴¹ Che ayeco'ã yembutuicha ivi pegua reta umee vae re. ⁴² Echa'ã aicuaa pe reta peau'ã Tumpa pepia pe —jei—. ⁴³ Che ayu cheRu chembou ramo, ñrei pe reta chembiresive'ã. Ñru vae ou yave jei vae rupi, pembiresiveta co —jei—. ⁴⁴ Pepuere'ã etei pepurugüirovia. Echa'ã jecuaeño peeca ñru vae reta yembutuicha vaerã, ñrei peeca'ã yembutuicha Tumpa uipota tõi penoi vaerã vae. Tumpa co jae pentiño —jei Jesús—. ⁴⁵ Agüiye pepia pe piyemingueta che ayu pumbijeco vaerã cheRu jovai. Echa'ã Moisés uicuatía vae co pumbijeco, yepe tõi pe reta pere: ‘Ore nduyapo Moisés uicuatía vae rupi. Jáeramo icavita oreve.’ Jucuarãi pere tõi —jei—. ⁴⁶ Echa'ã Moisés uicuatía vae perovia yave, chereroiviata tõi co. Echa'ã Moisés uicuatía vae che co chemimbeu —jei—. ⁴⁷ Ërei perovia'ã Moisés uicuatía vae ramo, ndarau vi perovia chiñee —jei Jesús chupe reta.

6

Jesús umíngaru cinco mil cuimbae reta

(Mt 14.13-21; Mr 6.30-44; Lc 9.10-17)

¹ Cua jaicue rupi Jesús oo uvãe i guasu Galilea jovaicho pe. Jocua i guasu jee vi Tiberias. ² Jare tenonde yave Jesús umbigüera amocue imbaerasi vae reta, jare jeta vae uecha ma

miacañi Jesús uyapo vae reta. Jáeramo añave cua reta yugüiraa Jesús jaicue. ³ Jayave Jesús oo uyupi ivitu guasu re jare uguapi joco pe jemimboe reta ndive. ⁴ Jare coiño ma ou judío reta ifiesta pascua jee vae. ⁵ Jare Jesús umae yave, uecha jeta vae yugüeru icoti. Jayave upirandu Felipe pe:

—¿Quiape pa yandepuereta yagua mbiyape cua reta jou vaerã —jei.

⁶ Jare cua Jesús jei uicuaa vaerã mbae ra jeita Felipe. Echa'ã Jesús uicuaa ma mbae uyapota vae. ⁷ Felipe jei chupe:

—Doscientos ara mbaraviqui jepi pegua mbiyape ndarau uepiti cua reta jou vaerã, penti penti mboviño jou yave.

⁸ Penti Jesús jemimboe Andrés jee vae - jae co Simón Pedro tivi - jei Jesús pe:

⁹ —Ime cua pe oĩ penti cunumi pandepo mbiyape jare mocui pira güinoi vae. Ërei jocua mbovi co cua jeta vae reta jou vaerã —jei.

¹⁰ —Pemimbeu chupe reta uguapi vaerã —jei Jesús.

Jare jeta capiache oĩ joco pe. Jayave uguapi reta. Jare cuimbae reta cinco mil rupi ñugüinoi. ¹¹ Jayave Jesús uipisi jocua mbiyape jare umee yasurupai Tumpa pe. Jayave umee mbiyape jemimboe reta pe, jare jemimboe reta umee uguapi vae reta pe. Jae ramiño vi umee pira chupe reta. Jare opaete vae jou jare iyangapii. ¹² Jayave iyangapii reta ma yave, Jesús jei jemimboe reta pe:

—Pembati tembíu uñepisãacue jembire vae, agüiye vaerã mbae uyemombo —jei.

¹³ Echa'ã jocua pandepo mbiyape güi jembire mbiyape uñepisãacue jare uyeeya joco pe, opa ma ucaru reta yave. Jayave Jesús jemimboe reta umbati jare umitinee doce canasta. ¹⁴ Jare joco pe ñugüinoi vae reta uecha ma yave cua miacañi Jesús uyapo vae, jei reta:

—Cua cuimbae jocua Tumpa iñee umimbeu vae etei co. Echa'ã Tumpa iñee pe uyecuatía oĩ outa co ivi pe —jei reta.

¹⁵ Jare Jesús uicuaa yugüeruta uipisi uyapo vaerã juvicha guasurã, yepe tẽi jae uipotã'ã. Jayave oo chugüi reta ivitu guasu re. Jaeño oo.

Jesús uguata i iárambo
(Mt 14.22-27; Mr 6.45-52)

¹⁶ Jare pítu ave ma yave, Jesús jemimboe reta ugüeyi yugüiraa i guasu pe. ¹⁷ Joco pe uyupi chalana pe jare umbipi uasa i guasu rupi Capernaum coti. Pítumimbi ma oĩ, jare Jesús ndei ou ye jae reta ñugüinoi vae pe. ¹⁸ Jayave tanta uyepeyu ivitu jare i uyemiaparoaroa. ¹⁹ Uruguata reta ma yave chalana penti legua rupi ndipo, uecha Jesús uguata ou i iárambo jare ou coiño ma chalana güi. Jayave uquiye reta. ²⁰ Ërei Jesús jei chupe reta:

—Che co. Agüiye pequiye —jei.

²¹ Jayave uyerovia reve jae reta umbuyupi Jesús chalana pe, jare jupivoiño chalana oo uvãe ivi pe uipota yugüiraa uvãe vae pe.

Ueca reta Jesús

²² Piareve pe jeta vae reta jecuaeño upita i guasu jovaicho pe. Uecha pentiño chalana joco pe oĩ ndei Jesús jemimboe reta yugüiraa pipe mbove. Jare uicuaa Jesús oo'ã chalana pe jemimboe reta ndive. ²³ Ërei ñru chalana reta tenta guasu Tiberias güi yugüeru vae upita coiño tenonde yave ucaru reta vae güi. Echa'ã joco pe jae reta jou mbiyape yandeYa umee yave yasurupai Tumpa pe. ²⁴ Uicuaa reta ma Jesús jare jemimboe reta mbaeti joco pe ñugüinoi. Jayave uyupi reta jocua chalana reta pe jare yugüiraa Capernaum coti, Jesús ueca vaerã.

Mbiyape tecove umeeta vae

²⁵ † guasu uasa reta ma yave, uvãe Jesús jare jei reta chupe:

—Oporomboe vae, ¿quirã i yave pa ndeyu cua pe?

²⁶ Jayave Jesús jei chupe reta:

—Añete che jae peve, pe reta chereca jocua mbiyape pemiangapii ramoño, chereca'ã jocua miacañi pe aipota aicuaaca peve ramo —jei—. ²⁷ Agüiye peparaviqui perembiurã imata'ã ico peve vae reño. Ërei peparaviqui perembiurã ameeta peve vae re. Che ayeyapo cuimbaerã vae ameeta peve perembiurã opata'ã vae. Echa'ã penoita tecove opa mbae vae. Echa'ã cheRu Tumpa uicuaaca ma peve chepuere ayapo jucuarã i —jei Jesús chupe reta.

²⁸ Jayave upirandu reta Jesús pe:

—¿Mbae pa nduyapota? ¿Quirã i pa orepuere nduyapo mbaraviqui Tumpa uipotã nduyapo vaerã vae? —jei reta.

²⁹ Jayave Jesús jei:

—Perovia cheré. Cua co mbaraviqui Tumpa uipotã piyapo vaerã vae. Echa'ã jae chembou —jei.

³⁰ Jayave jei reta chupe:

—¿Mbae nunga miacañi pa ndiyapota, nduecha vaerã jare ndugüirovia vaerã nderé? ¿Mbae nunga mbaraviqui pa ndiyapota nde? —jei reta—. ³¹ Yandetenondegua reta jou maná ñana pe. Echa'ã Tumpa ñnee pe uyecuatía oĩ: 'Umee chupe reta jembiurã ara güi jou reta vaerã' —jei reta chupe.

³² —Añete che jae peve —jei Jesús—, Moisés umee'ã co jembiurã ara güi ou vae. Añave cheRu umeeta peve perembiurã añetete vae ara güi ou vae —jei—. ³³ Echa'ã tembiú Tumpa añave umeeta vae jocua co jae ara güi ou vae. Jae umeeta tecove ivi pegua reta pe —jei.

³⁴ —Carai —jei reta—, jecuaeño emee oreve cua nunga orerembiurã.

³⁵ —Che co jae jocua tembiú tecove umeeta vae —jei Jesús—. Ipotave cheré güirovia vae ndarau iyembaí, jare ipotave cheré güirovia vae ndarau iúe —jei—. ³⁶ Ërei che jae ma peve cuarãi: Perovia'ã, yepe tẽi cherecha ma. ³⁷ Opaete cheRu umee cheve vae reta güiroviata co cheré —jei—, jare ipotave cheré güirovia vae ndarau amombo. ³⁸ Echa'ã agüeyi ayu ara güi ayapo vaerã chembou vae jei vae. Ayu'ã che jae vaeño ayapo vaerã —jei Jesús—. ³⁹ Ndarau amicañi penti ave opaete cheRu umee ma cheve vae reta güi. Echa'ã ambijecove yeta aru umanocue vae reta ipite güi ara taicuegua vae pe. Cua uipota chembou vae —jei—. ⁴⁰ Ipotave cherecha vae güinoita tecove opa mbae vae cheré güirovia yave, jare che ambijecove yeta aru umanocue vae reta ipite güi ara taicuegua vae pe. Cua uipota cheRu —jei Jesús.

⁴¹ Jayave judío reta ñneenguru Jesús re. Echa'ã Jesús jei ma: "Che co jae tembiú ara güi ou vae." ⁴² Jare judío reta jei:

—Cua co jae Jesús. Jae co José tai. Yaicuaa catu co tu jare ichi. ¿Quirã pa ipuere jei: 'Agüeyi ayu ara güi'? —jei reta.

⁴³ Jayave Jesús jei chupe reta:

—Agüeyi piñeenguru checoti. ⁴⁴ CheRu chembou —jei—. CheRu güiroviaca cheré vaeño ipuere güirovia cheré. Jare che ambijecove yeta aru umanocue vae reta ipite güi ara taicuegua vae pe —jei chupe reta—. ⁴⁵ Tumpa ñnee araca umimbeu vae uicuatía cuarãi: 'Jare Tumpa omboeta opaete vae.' Jucuarãi uicuatía —jei—. Ipotave uyapisaca Tumpa re jare uyemboe Tumpa jei chupe vae re vae outa checoti —jei—.

⁴⁶ Mbaeti quía uecha cheRu, jaño che ayu Tumpa güi vae. Che aecha ma co cheRu —jei Jesús—. ⁴⁷ Añete che jae peve, cheré güirovia vae güinoi tecove opa mbae vae. ⁴⁸ Che co jae jocua tembiú tecove umee vae —jei—. ⁴⁹ Petenondegua reta jou jocua maná ñana pe jare umano reta. ⁵⁰ Che co jae tembiú ara güi ou vae. Cua tembiú jou vae ndarau umano —jei—. ⁵¹ Che co jae tembiú tecove umee vae. Che agüeyi ayu ara güi. Ipotave cua tembiú jou vae güinoita tecove opa mbae vae —jei Jesús chupe reta—. Jare jocua tembiú ameeta vae chereche co. Ameeta chereche ivi pegua reta güinoi vaerã tecove —jei.

⁵² Jayave judío reta uyeaca uyupii.

—¿Quirãita ra ipuere cua cuimbae umee yandeve jete yau vaerã? —jei reta.

⁵³ —Añete che jae peve —jei Jesús chupe reta—, peú'ã yave chereche jare cherugüi, ndarau tecove opa mbae vae penoi. Che co jae cuimbaerã uyeyapo vae —jei—. ⁵⁴ Chereche jare cherugüi jou vae güinoi tecove opa mbae vae, jare ambijecove yeta aru umanocue vae reta ipite güi ara taicuegua vae pe —jei—. ⁵⁵ Echa'ã chereche jare cherugüi tembiú añetete vae co —jei Jesús—. ⁵⁶ Chereche jare cherugüi jou vae ico che ndive jare che aico jae ndive —jei—. ⁵⁷ CheRu güinoi tecove opa mbae vae jare jae chembou, jare che anoi tecove opa mbae vae cheRu güi. Jae ramiño vi jocua chereche jou vae güinoita tecove opa mbae vae chegüi —jei chupe reta—. ⁵⁸ Che co jae tembiú ara güi ou vae. Cua tembiú jae'ã co jocua tembiú petenondegua reta jou vae rami. Echa'ã jae reta umano. Ërei ipotave cua tembiú jou vae güinoita tecove opa mbae vae —jei.

⁵⁹ Jucuarãi jei Jesús judío reta itupao pe, Capernaum pe oporomboe oĩ yave.

Ñee reta tecove opa mbae vae pegua

⁶⁰ Cua uyandu reta yave, jeta Jesús jemimboe reta jei uyupe:

—Icavi'ã co cua jei vae. Agüeyi yayapisaca cua nunga ñee re —jei reta.

⁶¹ Jesús uicuaa jemimboe reta ñneenguru co icoti. Jayave jei chupe reta:

—¿Maera pa piñeenguru checoti cua re? ⁶² ¿Mbae pa piyapota cherecha yave ayupi aa tenonde aico vae pe? Che co jae cuimbaerã uyeyapo vae —jei—. ⁶³ Jaño Espíritu Santo ipuere umee tecove opa mbae vae. Yanderete ipuere'ã umee yandeve cua nunga tecove. Cua amimbeu ma peve vae ivi pegua'ã co. Jae co tecove opa mbae vae pegua —jei Jesús—. ⁶⁴ Ërei amocue pe reta perovia'ã cheré —jei.

Echa'ã Jesús uicuaa iyipi güive quía reta güirovia'ã jese jare quía umeeta jovaicho reta pe.

⁶⁵ Jayave jei chupe reta:

—Jáeramo amimbeu ma peve quirã cheRu güiroviaca cheré vaeño ipuere güirovia cheré —jei.

⁶⁶ Cua jaicue rupi jeta jemimboe reta uñatima ye Jesús güi, jare uguataã ma jae ndive.
⁶⁷ Jayave Jesús upirandu jocua doce vae reta pe:

—¿Peota pa chegüi pe reta vi?

⁶⁸ —¿Quía re pa ndoota, oreYá? —jei Simón Pedro chupe—. Nde co nemimbeu oreve tecove opa mbae vae regua. ⁶⁹ Jare ndugüirovia ma nderé jare nduicuaa ma nde co jae Tumpa oñono tee iyupegarã vae —jei.

⁷⁰ Jayave Jesús jei:

—Che puparavo. Pe co jae doce vae reta. Ërei ime penti pepite pe oĩ vae uyeyocui añã guasu pe —jei.

⁷¹ Cuarãi uyemingueta Judas re. Judas co jae Simón Iscariote tai. Echa'ã Jesús uiparavo doce jare jae reta güi penti co jae Judas. Judas umeeta Jesús jovaicho reta pe.

7

Jesús tivi reta güirovia'ã jese

¹ Cua jaicue rupi Jesús oo tenta guasu Galilea pegua reta pe. Oo'ã Judea pe. Echa'ã judío reta upota uyuca. ² Jare outa ma uvãe judío reta ifiesta Tabernáculos jee vae iara reta.

³ Jayave Jesús tivi reta jei chupe:

—Ecuá cua güi Judea pe, nderemimboe reta uecha vaerã mbaraviqui ndiyapo vae.

⁴ Echa'ã ime yave quía uipota ñru vae reta uicuaa cavi vaerã jesegua vae, uyapo viari'ã iparaviqui. Ndiyapo co cua mbaraviqui. Jáeramo iyapo opaete vae jovaque —jei reta chupe.

⁵ Echa'ã tivi reta vi güirovia'ã jese. ⁶ Jayave Jesús jei chupe reta:

—Ndei uvãe jucuarãi ayapo vaerã, Ërei pe reta pepuere peo pequirëi vae rupi —jei—. ⁷ Ivi pegua reta ipuere'ã pemitarëi, Ërei ivi pegua reta chemitarëi. Echa'ã che amimbeu chupe reta icavi mbae vae co jae uyapo reta vae —jei Jesús—. ⁸ Pe reta pecua fiesta pe. Che ndei rani aa cua fiesta pe. Echa'ã ndei uvãe che aa joco pe vaerã —jei.

⁹ Jucuarãi jei chupe reta Jesús, jare upita Galilea pe.

Fiesta Tabernáculos jee vae

¹⁰ Cua jaicue rupi tivi reta yugüiraa ma yave fiesta pe, Jesús oo vi. Oo'ã jeta vae jupíe agüiye vaerã uecha reta. ¹¹ Jare judío reta ueca ñugüinoi Jesús fiesta pe.

—¿Quíape pa ime oĩ? —jei reta.

¹² Jare joco pe ñugüinoi vae reta uyeaca uyupii Jesús re. Amocue vae jei:

—Cuimbae jecocavi vae co jae.

Ñru vae reta jei:

—Jecocavi'ã co. Upurumbitavi vae co.

¹³ Ërei opaete vae uquiye judío reta güi. Jáeramo uyemingueta viariño reta.

¹⁴ Fiesta mbite ma yave, Jesús oo Tumpa jo pe umbipi oporomboc. ¹⁵ Jare judío reta ipiacañi.

—¿Quirãi ra cua cuimbae jeta uicuaa mbaembae re uyemboe mbae reve? —jei reta.

¹⁶ Jayave Jesús jei chupe reta:

—Cheporomboc chembaeño'ã co. Jae co chembou vae iporomboc —jei—. ¹⁷ Ipotave Tumpa jei vae uipota uyapo vae uicuaata cheporomboc Tumpa iporomboc co. Uicuaata chĩneeño'ã co —jei—. ¹⁸ Ipotave vae jae ñnee reño oporomboc yave, jae uipota ñru vae reta pe uyembutuichaca vaerãño. Ërei quía ueca umbutuicha vaerã ombou vae, jae oporomboc añete vae re. Iyapu'ã co —jei Jesús—.

¹⁹ Moisés umee peve mboroyocui. Ërei mbaeti penti ave pe reta piyapo mboroyocui pe uyecuatía oĩ vae rupi —jei—. ¿Maera pa pipota cheyuca? —jei chupe reta.

²⁰ Jayave judío reta jei:

—Añã oya ma nderé. ¿Quía pa uipota ndeyuca? —jei reta.

²¹ —Ayapo ma penti mbaraviqui —jei Jesús—, jare opaete pe reta pepiacañi jese. ²² Moisés umimbeu peve piñemicircuncidaca vaerã. Ërei uyembipi'ã Moisés umimbeu yave. Echa'ã Moisés itenondegua reta uyapo jucuarãi. Jare pe reta pepurumicircuncidaca mbutuu ara pe —jei—. ²³ Che ambigüera ma penti cuimbae mbutuu ara pe. Opaete jete ucuera cavi ma. ¿Maera pa pepochi cheve cua jeco pegua? Echa'ã pe reta pepurumicircuncidaca mbutuu ara pe mboroyocui Moisés umimbeu peve vae pipota'ã piyavi ramo —jei Jesús—. ²⁴ Agüiye pepuruãa peeche vae rupiño. Pepuruãa cavi jupi vae rupi —jei.

¿Jae pa co Cristo?

²⁵ Jáeramo amocue Jerusalén pegua reta jei:

—¿Jae'ã ra cua judío reta uipota uyuca vae? ²⁶ Mase, co oĩ cua pe, jare uyemingueta oĩ opaete vae pe. Ërei mbaeti quía mbae jei chupe. Aramoi yanderuvicha reta uicuaa ma jae

co Cristo, Tumpa ombou vae —jei reta—. ²⁷ Ērei yaicuaa queti güi ou cua cuimbae. Echa'ã Cristo uyecuaa yave, ndarau quía uicuaa queti güi ou —jei reta.

²⁸ Jáeramo Jesús oporombœe oĩ rambueve Tumpa jo pe, iñeeãta reve jei:

—Pe reta checuaa co, jare picuaa co queti güi ayu vae. Ērei ayu'ã che aipota ayu rupiño. Echa'ã chembou vae imiari añete vae re, jare pe reta picuaa'ã chembou vae —jei—. ²⁹ Ērei che aicuaa. Echa'ã ayu jae oĩ vae güi. Jae chembou —jei.

³⁰ Jáeramo judío reta uipota tēi uipisi. Ērei uipisi'ã quía. Echa'ã ndei uvãe uyepisi vaerã. ³¹ Jare jeta joco pe ñugüinoi vae güirovia jese. Echa'ã jei reta:

—Cristo ou yave, ¿uyapota ra jeta ete miacañi cua cuimbae uyapo vae güi?

Fariseo reta ombou jembiocui reta uipisi vaerã Jesús

³² Jare fariseo reta uyandu jeta vae iñeenguru ñugüinoi Jesús re. Jayave sacerdote reta itenondegua reta jare fariseo reta ombou jembiocui reta uipisi vaerã Jesús. ³³ Jayave Jesús jei:

—Aĩta pe reta ndive michi peguaño. Jayave aata chembou vae pe. ³⁴ Cherecata co, ěrei ndarau chevãe. Ndarau peo che aĩta vae pe —jei.

³⁵ Jayave judío reta jei uyupe:

—¿Queti ra oota cua cuimbae agüiye vaerã ñavãe chupe? Oota ndipo judío reta judío mbae vae reta ipite rupi uñemiai vae pe. Omboeta ndipo judío mbae vae reta. ³⁶ ¿Mbae ra uipota jei, jei yave cuarã: 'Cherecata co, ěrei ndarau chevãe. Ndarau peo che aĩta vae pe?' —jei reta.

I tecove umee vae

³⁷ Jocua ara fiesta opata ma yave icavi ete opaete ĩru fiesta iara güi. Jayave Jesús uyemboi jare iñeeãta reve jei:

—Ime yave quía iúe vae, tou checoti i tou —jei—. ³⁸ Cheré güirovia vae güi usirita jeta i tecove umee vae. Jucuarãi Tumpa iñee pe uyecuatía oĩ —jei.

³⁹ Jucuarãi uyemingueta Jesús Espiritu Santo re. Uipota jei umeeta Espiritu Santo güirovia jese vae reta pe. Echa'ã ndei umee Espiritu Santo. Echa'ã Jesús ndei oo ye ara pe.

Yati vae reta uyeaca uyupii

⁴⁰ Cua uyandu yave, amocue joco pe ñugüinoi vae jei:

—Cua cuimbae jocua Tumpa iñee umimbeu vae etei co.

⁴¹ ĩru vae reta jei:

—Cua cuimbae Cristo, Tumpa ombou vae co.

Ērei amocue vae jei:

—¿Galilea pegua ra Cristo? ⁴² Echa'ã Tumpa iñee pe uyecuatía oĩ Cristo co jae David iñemoñaã reta pegua jare Belén pegua co. Echa'ã David joco pegua vi co —jei reta.

⁴³ Jesús jei chupe reta vae jeco pegua, joco pe ñugüinoi vae reta uyeaca uyupii. ⁴⁴ Jare amocue vae uipota tēi uipisi Jesús, ěrei uipisi'ã quía.

Mbaeti etei quía uyemingueta jucuarãi

⁴⁵ Jayave uyeyocui vae sacerdote reta itenondegua reta jare fariseo reta ombou vae reta yugüiraa ye jucuarãiño chupe reta. Jayave sacerdote reta itenondegua reta jare fariseo reta jei jembiocui reta pe:

—¿Maera pa peru'ã?

⁴⁶ Jembiocui reta jei:

—Echa'ã mbaeti etei quía uyemingueta jocua cuimbae uyemingueta rami.

⁴⁷ Jayave fariseo reta jei:

—¿Piyembitavica ma pa pe reta vi? ⁴⁸ Güirovia ma ra jese mburuvicha reta jare fariseo reta? Güirovia'ã penti ave —jei reta—. ⁴⁹ Ērei cua jeta vae uicuaa'ã mboroyocui pe uyecuatía oĩ vae. Tumpa uiporaracata co chupe reta —jei reta.

⁵⁰ Jayave penti jae reta ipite pe oĩ vae jei ĩru reta pe - jae co Nicodemo jee vae - tenonde yave jae oo opou Jesús pe pítu yave:

⁵¹ —Mboroyocui pe uyecuatía oĩ vae rupi yandepuere'ã ñaña ipotave vae ndei yayapisaca jese mbove. Echa'ã yayapisaca jese yave, yaicuaa mbae uyapo vae —jei.

⁵² ĩru reta jei chupe:

—¿Nde vi ra Galilea pegua? Ndeeca yave, ndicuaata mbaeti co penti ave Tumpa iñee umimbeu vae Galilea pegua —jei reta.

Cuña menda re uyuvanga vae

⁵³ Jayave opaete vae yugüiraa ye jenta jenta pe.

8

¹ Ērei Jesús oo ivitu guasu Olivos jee vae pe.

² Piareve pe neimbove asi Jesús oo ye Tumpa jo pe. Jayave jeta vae yugüeru jae oĩ vae pe, jare jae uguapi omboe reta oĩ. ³ Jayave mboroyocui re oporomböe vae reta jare fariseo reta güeru penti cuña. Uipocou reta cuña menda re uyuvanga oĩ yave. Jayave oñono reta joco pe ñugüinoi vae reta ipite pe.

⁴ —Oporomböe vae —jei reta Jesús pe—, cua cuña nduipocou menda re uyuvanga oĩ yave. ⁵ Mboroyocui pe Moisés yandeocui yauca vaerã cua nunga cuña reta ita pe. ¿Mbae pa ndere nde cua re? —jei reta.

⁶ Cua jei reta uicuaa vaerã mbae ra jeita Jesús. Echa'ã uipota umbijeco. Jayave Jesús ipe jare uicuatía mbae ivi re ipoãca pe. ⁷ Jecuaecuae upirandu reta chupe cua re. Jayave Jesús uyemboi jare jei chupe reta:

—Mbaeti mbaeyoa güinoi pepite pe vae rani tuyapi ita pe.

⁸ Jayave ipe ye jare uicuatía ye mbae ivi re ipoãca pe. ⁹ Ērei cua uyandu reta yave, ipia umbijeco jeco re jare yugüiraa joco güi penti penti rupi. Tenonde yugüiraa indechi vae reta. Jayave opaete vae yugüiraa. Jaeño Jesús upita joco pe cuña jae jovai uyemboi oĩ vae ndive. ¹⁰ Jayave Jesús uyemboi ye umae jese, jare jei:

—¿Jama pa jocua cuimbae reta, cuña? ¿Mbaeti ma pa quía nembijeco?

¹¹ —Mbaeti quía, carai —jei cuña chupe.

Jayave Jesús jei:

—Che numbijeco'ã vi. Ecu, agüiye ye iyapo jocua mbaeyoa —jei.

Jesús co penti tembipe rami

¹² Cua jaicue rupi Jesús jei yati vae reta pe:

—Che co jae penti tembipe rami. Ayu co ivi pegua reta uecha cavi vaerã. Ico che ndive vae ndarau uguata pítumimbi pe. Echa'ã güinoita tecove ipuere vaerã uecha cavi —jei.

¹³ Jayave fariseo reta jei Jesús pe:

—Nemimbeu oreve vae ndarau ndugüirovia. Echa'ã nde nemiarí ndiye —jei reta.

¹⁴ —Amimbeu ma peve vae pepuere perovia, yepe tēi chemiari peve chiye —jei Jesús—. Echa'ã che aicuaa co queti güi ayu jare queti aa vae. Ērei pe reta picuaa'ã queti güi ayu jare queti aa vae. ¹⁵ Pe reta pepuruãa opaete ivi pegua reta upuruãa rami. Che aãa'ã quía —jei—. ¹⁶ Ērei apuruãa yave, apuruãa añete vae rupi. Echa'ã cheRu chembou. Jare che jare cheRu nupuruãa - cheiño'ã co —jei—. ¹⁷ Peperoyocui pe uyecuatía oĩ cuarã: 'Mocui jei vae oyovaque yave, peroviata co.' Jucuarãi uyecuatía oĩ —jei—. ¹⁸ Chemiari peve chiye jare cheRu chemimbeu peve - jae co chembou —jei.

¹⁹ Jayave judío reta jei:

—¿Quiape pa oĩ ndeRu?

—Pe reta checuua'ã jare picuaa'ã cheRu —jei Jesús chupe reta—. Checuaa yave mona, cheRu picuaata tēi co vi —jei.

²⁰ Cua jei Jesús Tumpa jo pe corepoti Tumpa pegua jiru reta ñugüinoi vae pe. Echa'ã joco pe oporomböe. Ērei uipisi'ã quía. Echa'ã ndei uvãe uyepisi vaerã.

Pe reta ndarau pepuere peo che aata vae pe

²¹ Jare Jesús jei ye chupe reta:

—Aata ma cua güi. Pe reta cherecata co, ěrei pemanota pembaeyoa uyembai mbae reve. Pe reta ndarau pepuere peo che aata vae pe —jei.

²² —¿Uyeyucata ra? —jei judío reta—. Echa'ã jei ma: 'Pe reta ndarau pepuere peo che aata vae pe.'

²³ Jayave Jesús jei:

—Pe reta ivi pegua co, ěrei che ara pegua co. Pe reta ivi pegua co, ěrei che ivi pegua'ã co. ²⁴ Amimbeu ma peve pemanota pembaeyoa uyembai mbae reve. Echa'ã pemanota co pembaeyoa uyembai mbae reve, perovia'ã yave che co jae vae —jei.

²⁵ Jayave jei reta Jesús pe:

—¿Quía pa co nde?

—Jocua tenonde güive amimbeu ma peve vae —jei Jesús—. ²⁶ Jeta mbaembae re chepuere chemiari peré jare jeta mbae re chepuere puãa. Ērei chembou vae imiari añete vae re, jare amimbeu ivi pegua reta pe chembou vae umimbeu cheve vae —jei.

²⁷ Jae reta uicuaa'ã Jesús imiari chupe reta Tu ara pe oĩ vae regua. ²⁸ Jayave Jesús jei: —Pe reta chereupi ma curusu re yave - che ayeyapo cuimbaerã vae - picuaata che co jae. Ayapo'ã mbae che aipota ayapo rupiño. CheRu umimbeu cheve vae rupiño chemiari —jei—. ²⁹ Jare chembou vae ico che ndive. Chereya'ã cheiño aico vaerã. Echa'ã jecuaeño ayapo jae uipota vae rupi —jei.

³⁰ Jare Jesús imiari yave, jeta vae güirovia jese.

Añete vae peyorata co

³¹ Jayave Jesús jei jocua judío güirovia jese vae reta pe:

—Jecuaeño piyapo yave che jae peve piyapo vaerã vae, picota co cheremimboe retarã añetete vae. ³² Jare picuaata añete vae, jare añete vae peyorata co —jei.

³³ Judío reta jei chupe:

—Abraham iñemoñaã reta co ore. Mbaeti etei nduyeyocui quía pe. ¿Maera pa ndere nduyeyorata co? —jei reta.

³⁴ —Añete che jae peve —jei Jesús—, iyoa vae uyeyocui oĩ mbaeyoa pe. ³⁵ Uyeyocui vae ipuere'ã ico ete tenta pe. Ërei tenta iya tai jecuaeño ico tenta pe —jei—. ³⁶ Che co jae Tumpa Tai. Che poyora yave mbaeyoa güi, añetete piyeyora ma co —jei—. ³⁷ Che aicuaa Abraham iñemoñaã reta co pe reta. Ërei pipota cheyuca, pipota'ã piyapo che jae peve piyapo vaerã vae ramo —jei—. ³⁸ Chemiari peve cheRu ndive aico yave aecha vae re, jare pe reta piyapo peru umimbeu peve piyapo vaerã vae rupi —jei Jesús.

Aña guasu co jae peru

³⁹ —Abraham co jae oreru —jei reta.

—Pe reta Abraham tai reta añetete vae yave mona —jei Jesús—, piyapota tēi co Abraham uyapo vae rami. ⁴⁰ Ërei añave pipota cheyuca, yepe tēi amimbeu ma peve añete vae. Jae co Tumpa umimbeu cheve vae. Cuarã'ã uyapo Abraham —jei—. ⁴¹ Pe reta piyapo peĩ peru iparaviqui —jei Jesús chupe reta.

—Oremiñemoña'ã co aguasa pe oreru reta —jei reta—. Tumpaño co jae oreRu.

⁴² Jayave Jesús jei chupe reta:

—Tumpa co jae peRu yave mona, pe reta cherauta tēi co. Echa'ã che ayu Tumpa güi. Che Tumpa pegua co. Che aipota ramoño'ã co ayu. Jae co chembou —jei—. ⁴³ ¿Maera pa picuaa'ã amimbeu peve vae? Pipota'ã piyapisaca chiñee re. Jáeramo picuaa'ã —jei Jesús—. ⁴⁴ Aña guasu co jae peru, jare pe reta pipota piyapo peru uipota vae rupi. Peru jecuaeño upuruyuca ico, jare uyapo'ã etei añete vae rupi. Echa'ã añetete vae pegua'ã co. Jae co aña guasu. Jáeramo jecuaeño iyapu. Echa'ã jae co iyapu vae jare omboe ivi pegua reta iyapu vaerã —jei—. ⁴⁵ Ërei pe reta chererovia'ã, añete vae amimbeu peve ramo —jei—. ⁴⁶ Mbaeti penti yepe pepuere pere cheve: 'Ndeyoa co.' Echa'ã che amimbeu peve añete vae. ¿Maera pa chererovia'ã? —jei—. ⁴⁷ Tumpa tai reta uyapisaca Tumpa iñee re. Pe reta Tumpa tai reta'ã co. Jáeramo piyapisaca'ã jese —jei.

Cristo icoño mai

⁴⁸ Jayave judío reta jei:

—Ndoe ma nde co jae penti Samaria pegua, jare aña oya ma nderé. Añete co cua ndoe vae —jei reta.

⁴⁹ —Oya'ã co cheré aña —jei Jesús—. Che aipiu aĩ cheRu, Ërei pe reta chererũro. ⁵⁰ Ërei aipota'ã ivi pegua reta chembutuicha vaerã. Ime co quía uipota chembutuichaca vae. Jae upuruãata co —jei Jesús—. ⁵¹ Añete che jae peve, uyapo che jae chupe uyapo vaerã vae ndarau umano —jei.

⁵² Jayave judío reta jei Jesús pe:

—Añave nduicuaa ma aña oya co nderé. Abraham jare Tumpa iñee aracae umimbeu vae reta umano. Ërei nde ndere: 'Uyapo che jae chupe uyapo vaerã vae ndarau umano.' ⁵³ ¿Tuicha ete pa nembraepuere yandetenondegua Abraham imbaepuere güi? Echa'ã Abraham umano. Jae ramiño vi Tumpa iñee aracae umimbeu vae reta umano. ¿Quía pa co nde? ¿Mbae pa ndere ndiyee? —jei reta Jesús pe.

⁵⁴ —Ayembutuicha'ã co —jei Jesús—. Echa'ã jucuarãi ayapo yave, jocua nunga yembutuicha mbae'ã co. Ërei cheRu chembutuichaca, jare pe reta pere Tumpa co jae peRu —jei—. ⁵⁵ Ërei pe reta picuaa'ã Tumpa. Che aicuaa co. Che jae yave: 'Aicuaa'ã', cheaputa tēi co pe reta peapu rami. Ërei aicuaa co, jare ayapo jei cheve ayapo vaerã vae —jei—. ⁵⁶ Petenondegua Abraham uyerovia cherechata ramo. Cherecha co jare uyerovia —jei.

⁵⁷ Jayave judío reta jei chupe:

—Nde ndei nenoĩ cincuenta año. ¿Quirãĩ pa ndepuere ndere ndeecha co Abraham? —jei reta.

⁵⁸ —Añete che jae peve —jei Jesús—, ndei Abraham ico mbove, che imeño mai aico —jei.

⁵⁹ Jayave judío reta omonoo ita reta uyapi vaerã tēi Jesús. Ërei Jesús uasa jae reta ipite rupi oē Tumpa jo güi, jare jae reta uecha'ã ma.

9

Jesús umbigüera jesa mbae vae

¹ Jare Jesús uasa oo yave, uecha penti cuimbae jesa mbae vae. Cua cuimbae jucuarãi ico ichi güi oa güive. ² Jayave Jesús jemimboe reta upirandu Jesús pe:

—Oporomboe vae, ¿quía pa iyoa, ichi güi oa yave jesa mbae vaerã? ¿Iyoa pa jae etei? ¿Iyoa pa tu jare ichi? —jei reta.

³ —Jae imbaeyoa jeco pegua'ã co jare tu jare ichi imbaeyoa jeco pegua'ã co cuarãi oĩ —jei Jesús—. Cuarãi oĩ Tumpa imbaepuere uyecuaa vaerã ucuera yave —jei—. ⁴ Icavi co ayapo vaerã ara rupi chembou vae iparaviqui. Echa'ã ara rupi ñanoi tembipe. Ërei outa pïtu, jare pïtu yave mbaeti quía ipuere uparaviqui —jei—. ⁵ Cua ivi pe aico rambueve, che co jae penti tembipe rami. Ayu co ivi pegua reta uecha cavi vaerã —jei.

⁶ Cua jei ma yave, undivi ivi re jare jocua güi uyapo tuñuu. Jayave oñono tuñuu cuimbae jesa re. ⁷ Jayave jei chupe:

—Ecu a iyoe nderesa i Siloé pe.

(Cua Siloé uipota jei: “Uyemondo”). Jayave cuimbae oo oyoe jesa jare ou ye yave, umae ma. ⁸ Jayave cuimbae jenta iyipi rupigua reta jare ñru vae reta tenonde uecha uyerure oĩ corepoti re vae jei:

—¿Jae'ã ra cua uguapi uyerure corepoti re vae?

⁹ Amocue vae jei:

—Jae co.

Ñru vae reta jei:

—Jae'ã co. Ërei jae echa ete vae co.

Ërei cuimbae jei:

—Che co jae.

¹⁰ Jayave jei reta chupe:

—¿Quirã pa añave ndepuere nema?

¹¹ —Jocua cuimbae Jesús jee vae uyapo tuñuu oñono cheresa re —jei cuimbae chupe reta—. Jayave jei cheve: ‘Ecu a iyoe nderesa’ —jei cheve, jei—. Jáeramo aa ayoe cheresa, jare amae ma —jei.

¹² —¿Quiape pa ime oĩ? —jei reta.

—Aicuaa'ã —jei cuimbae chupe reta.

Fariseo reta upirandu cuimbae ucuera vae pe

¹³ Jayave jae reta güiraa fariseo ñugüinoi vae pe cuimbae tenonde yave jesa mbae ico vae. ¹⁴ Jare jocua ara mbutuu ara co. Echa'ã jocua ara Jesús uyapo tuñuu umimae vaerã cuimbae. ¹⁵ Jayave fariseo reta vi upirandu cuimbae pe quirãi ra ipuere umae.

—Oñono tuñuu cheresa re —jei cuimbae—. Jayave ayoe cheresa, jare amae voi —jei.

¹⁶ Amocue fariseo reta jei:

—Tumpa pegua'ã co cua cuimbae. Echa'ã uyapo mbutuu ara pe mboroyocui pe jei agüiye yayapo vaerã vae.

Ërei ñru fariseo reta jei:

—¿Quirã ra ipuere cuimbae iyoa vae uyapo cua nunga miacañi?

Jare uyeaca reta uyupii. ¹⁷ Jayave jei reta ye cuimbae tenonde yave jesa mbae ico vae pe:

—¿Mbae pa ndere nde jocua nemimae vae re?

—Jae co penti Tumpa iñee umimbeu vae —jei chupe reta.

¹⁸ Judío reta güirovia'ã cua cuimbae tenonde yave jesa mbae ico vae co. Güirovia'ã vi jaeramo co umae. Jáeramo uenica cuimbae umae ma vae tu jare ichi. ¹⁹ Jayave upirandu reta tu jare ichi pe:

—¿Jae pa co cua nderai jesa mbae co oa pere chupe vae? ¿Quirã pa añave umae?

²⁰ —Aicuaa jae co chera jesa mbae oa ichi güi vae —jei chupe reta—. ²¹ Ërei nduicuaa'ã quirã ra añave umae. Nduicuaa'ã vi quía ra umimae. Pepirandu chupe. Echa'ã ucuacuaa ma co jae. Jae etei ipuere umimbeu peve —jei.

²² Jucuarãi jei cuimbae tu jare ichi, uquiye judío reta güi ramo. Echa'ã judío reta jei ma uyupe: “Jocua Jesús co jae Cristo jei vae tuyemombo yandetupao güi.” ²³ Jáeramo tu jare ichi jei: “Ucuacuaa ma co jae. Pepirandu chupe.”

²⁴ Jayave judío reta ueni ye cuimbae tenonde yave jesa mbae ico vae.

—Emimbeu cavi oreve Tumpa jovaque —jei reta chupe—. Echa'ã nduicuaa cua cuimbae iyoa vae co.

²⁵ —Aicuaa'ã iyoa vae ra jae —jei cuimbae—. Ërei cua co aicuaa: Tenonde yave cheresa mbae aico vae co, añave amae.

²⁶ Jayave upirandu reta ye chupe:

—¿Mbae pa uyapo ndeve? ¿Quirãĩ pa nemimae?

²⁷—Amimbeu ma peve —jei cuimbae—, ãrei pipota'ã piyapisaca cheré. ¿Maera pa pipota piyandu ye? ¿Pipota pa pe reta vi piyeyapo jemimboe retarã? —jei.

²⁸Jayave judío reta uñeengata cuimbae pe.

—Nde co jae jemimboe —jei reta—. Ore co jae Moisés jemimboe reta. ²⁹Ore nduicuaa Tumpa umingueta co Moisés. Ërei nduicuaa'ã quía pegua ra co cuimbae —jei reta.

³⁰—Cua co penti miacañĩ —jei cuimbae—. Pe reta picuaa'ã quía pegua ra. Ërei jae chemimae. ³¹Yaicuaa Tumpa uyapisaca'ã iyoa vae reta re. Ërei ime yave quía umbiadora Tumpa jare uyapo Tumpa jei vae, Tumpa uyapisaca jese —jei—. ³²Ivi uyeyapo güive mbaeti etei quía ipuere umimae jesa mbae oa ichĩ güi vae —jei—. ³³Tumpa pegua'ã yave co cuimbae, ipuereta'ã tẽi mbae uyapo —jei.

³⁴Jayave judío reta jei chupe:

—Nde ndea ndesi güi ndeyoa reve. Mbaeti mbae re ndepuere oremboe —jei reta.

Jayave omombo reta cuimbae.

Tumpa coti jesa mbae vae reta

³⁵Jare Jesús uicuaa yave judío reta omombo ma cuimbae, oo ueca. Jare oovãiti yave, jei chupe:

—¿Nderovia pa cuimbaerã uyeyapo vae re?

³⁶—¿Quía pa co jae, carai? —jei Jesús pe—. Emimbeu cheve, arovia vaerã jese.

³⁷—Ndeecha ma —jei Jesús chupe—. Che ayemingueta añ nde ndive vae co jae.

³⁸—CheYa, arovia ma —jei cuimbae.

Jayave cuimbae uyeatica Jesús jovai jare umbiadora. ³⁹Jayave Jesús jei:

—Ayu ivi pe ambiyao vaerã uyugüi ivi pegua reta. Ayu ipuere mbae umae vae reta umae vaerã, jare ipuere umae vae reta agüiye vaerã umae —jei.

⁴⁰Amocue fariseo reta joco pe ñugüinoi vae uyandu cua, jare upirandu chupe:

—¿Ore vi pa co jae umae mbae vae reta?

⁴¹—Pema'e'ã yave, mbaetita tẽi teco penoi —jei Jesús—. Ërei pere ma: 'Numae.' Jáeramo teco imeño penoi —jei.

10

Jesús umijaanga ovecha-rocai

¹—Añete che jae peve —jei Jesús—, imonda vae uique'ã onque rupi ovecha-rocai pe. Uique icoti'ã rupi. Echa'ã uipota oñomi güiraa ambie vae iovecha reta —jei—. ²Ërei ovecha iyandarecoa uique onque rupi —jei—. ³Jare ovecha iyandarecoa uipota uique yave, onque jãroa uipea chupe. Jare ovecha reta uyandu iyandarecoa ñee. Echa'ã iyandarecoa ueni ovecha reta jee rupi jare güiraa ovecha-rocai güi —jei—. ⁴Jare güiraa yave opaete imbae reta ovecha-rocai güi, jae oo tenonde jare ovecha reta yugüiraa jaicue. Echa'ã uicuaa ñee —jei—. ⁵Ndarau yugüiraa cuimbae uicuaa mbae vae jaicue. Osita chugüi. Echa'ã uicuaa'ã ñee —jei.

⁶Cua ñee umijaanga vae pe Jesús omboe reta tẽi, ãrei jae reta uicuaa'ã mbae re ra umijaanga cua jei chupe reta vae.

Jesús co jae ovecha reta iyandarecoa icavi vae rami

⁷Jayave Jesús jei:

—Añete che jae peve, che co jae ovecha-rocai jonque rami. ⁸Amocue vae yugüeru ndei ayu mbove. Ërei ovecha reta uyapo'ã jocua reta jei vae. Echa'ã jocua reta imonda vae reta co. Jae reta uipota güiraa ambie vae iovecha reta —jei—. ⁹Che co jae onque rami. Che rupi ovecha-rocai pe uique vae uyembiasacata co. Uiqueta jare oeta jare uvãeta mbae jou vaerã —jei Jesús—. ¹⁰Imonda vae ou güiraa vaerã ambie vae iovecha reta. Ou uyuca vaerã ovecha reta. Che ayu ivi pegua reta güinoi vaerã tecove opa mbae vae, jare jocua tecove güinoi yave tuicha uyeroviata —jei—. ¹¹Che co jae ovecha reta iyandarecoa icavi vae rami. Echa'ã ovecha reta iyandarecoa icavi vae umano ovecha reta uepi vaerã —jei—. ¹²Jepi re ovecha reta re uyandareco vae uecha yave yaguapita ou, ueya ovecha reta jare osi. Echa'ã jae'a co ovecha reta iyandarecoa añetete vae, jare ovecha reta imbae'ã. Jayave yaguapita ou uipisi amocue ovecha reta, jare ñru ovecha reta opa uñemai. ¹³Jocua cuimbae osi jepi reño uyandareco ovecha reta re ramo. Echa'ã ipiatiti'ã ovecha reta uiporara yave —jei—.

¹⁴Che co jae ovecha reta iyandarecoa icavi vae rami. Aicuaa cheovecha reta jare cheovecha reta checuaa —jei Jesús—. ¹⁵Jucuarãĩ cheRu checuaa jare che aicuaa cheRu. Jare che amanota ovecha reta aepi vaerã —jei—. ¹⁶Jare ime anoi ñru ovecha reta. Jae reta cua pegua'ã co. Jae reta aruta vi. Jae reta uyapisacata chiñee re. Jayave imeta penti ati jare penti ovecha reta iyandarecoa —jei—.

¹⁷ CheRu cherau amanota ramo. Amanota co, cherecove anoi ye vaerã —jei—. ¹⁸ Mbaeti quía ipuere uequi chegüi cherecove. Amanota aipota ramo. Chepuere amee cherecove amano vaerã, jare chepuere anoi ye. Cuarãi cheocui cheRu —jei.

¹⁹ Jesús cua jei ramo, judío reta uyeaca ye uyupii. ²⁰ Jeta jae reta jei:

—Aña oya ma jese. Uicuaa'ã ma mbae jei. ¿Maera pa piyapisaca jese?

²¹ Ìru vae reta jei:

—Mbaeti quía aña oya jese vae ipuere uyemingueta jucuarãi. Ipuere'ã etei aña umimae jesa mbae vae reta —jei reta.

Judío reta güirõ Jesús

²² Roi ma Jerusalén pe, jare judío reta uyapo ñugüinoi fiesta imandúa vaerã Tumpa jo uyepiu ye yave. ²³ Jare Jesús uguata Tumpa jo pe oca Salomón jee vae rupi. ²⁴ Jayave judío reta uyembati Jesús iyipi rupi jare jei:

—¿Quirãi yave pa nemimbeu cavita oreve, agüiye vaerã orembopa? Nde co jae Cristo yave, emimbeu cavi oreve —jei reta.

²⁵ —Amimbeu ma peve —jei Jesús—, ñerei perovia'ã chiñee. CheRu chembou cua mbaraviqui ayapo vaerã, jare cua mbaraviqui uicuaaca quía co che —jei—. ²⁶ Amimbeu ma peve pe reta cheovecha'ã co. Jáeramo perovia'ã cheré. ²⁷ Cheovecha reta uyapisaca chiñee re. Aicuaa cheovecha reta, jare jae reta yugüiraa cheraicue rupi —jei—. ²⁸ Jare amee chupe reta tecove opa mbae vae, jare ndarau etei oo cañitei pe. Mbaeti quía ipuere upiro chegüi —jei—. ²⁹ CheRu umee ma cheve cua reta, jare cheRu imbaepuere tuicha ete opaete vae imbaepuere güi. Jare mbaeti quía ipuere upiro cheRu güi —jei—. ³⁰ Che jare cheRu pentiño co —jei.

³¹ Jayave judío reta omonoo ye ita reta uyapi vaerã tõi Jesús. ³² Jayave Jesús jei chupe reta: —Aechaca ma peve jeta mbaraviqui icavi vae. Cua ayapo cheRu imbaepuere rupi. ¿Mbae nunga mbaraviqui jeco pegua pa pipota cheapi ita pe? —jei.

³³ —Penti mbaraviqui icavi vae jeco pegua'ã —jei judío reta chupe—. Nde ndere icavi mbae vae Tumpa coti. Jocua jeco pegua nduyapita ita pe. Echa'ã nde co jae penti cuimbaeño, ñerei ndere ndiyupe nde co jae Tumpa vae —jei reta.

³⁴ Jayave Jesús jei chupe reta:

—Mboroyocui penoi vae pe uyecuatía oñ quirãi Tumpa jei cuarãi: 'Pe reta co jae tumpa reta.' Jucuarãi jei. ³⁵ Echa'ã Tumpa iñee ou chupe reta vae pe, jae etei umbijee tumpa reta. Jare Tumpa iñee pe uyecuatía oñ vae jecuaeño co añete. ³⁶ Jáeramo ¿maera pa pere cheve: 'Nde ndere icavi mbae vae Tumpa coti', che jae vae jeco pegua? Echa'ã che jae: 'Che co jae Tumpa Tai.' Echa'ã Tumpa cheñoño tee cua mbaraviqui ayapo vaerã, jare jae chembou cua ivi pe —jei—. ³⁷ Ayapo'ã yave mona cheRu iparaviqui, agüiyeta tõi chererovia. ³⁸ Ñerei ayapo co cheRu iparaviqui. Jáeramo yepe tõi chererovia'ã, perovia mbaraviqui ayapo vae cheRu pegua co, picuaa vaerã cheRu ico che ndive jare che aico cheRu ndive —jei.

³⁹ Jayave judío reta uipota ye tõi uipisi Jesús, ñerei jae oo chugüi reta.

⁴⁰ Jare Jesús oo ye i Jordán jovaicho pe tenonde yave Juan upurumbibautiza oñ vae pe, jare joco pe upita. ⁴¹ Jare jeta vae reta yugüeru jae oñ vae pe jare jei:

—Juan uyapo'ã penti ave miacañi. Ñerei opaete Juan jei cua cuimbae re vae añete co —jei reta.

⁴² Jare jeta vae güirovia Jesús re joco pe.

11

Lázaro imano

¹ Penti cuimbae Lázaro jee vae imbaerasi oñ. Jae jare María jare Marta - jae co María tique - Betania pegua reta co. ² Jocua María upiyere mbae ipiche cavi vae yandeYa re jare umitini ipi ía pipe. Jocua Lázaro imbaerasi oñ vae María iquivi co. ³ Jare Lázaro jindi reta omondo umimbeu vaerã Jesús pe:

—OreYa, imbaerasi oñ cua ndeau vae.

⁴ Jesús cua uicuaa yave, jei:

—Cua imbaerasi ou chupe Ìru vae reta umbiadora vaerã Tumpa. Ou'ã jae umano vaerã. Echa'ã che co jae Tumpa Tai, jare Ìru vae reta chembiadorata cua mbaerasi jeco pegua —jei.

⁵ Jesús uau Marta jare ipiqui jare Lázaro. ⁶ Ñerei uicuaa ma yave Lázaro imbaerasi oñ, upitaño mocui ara joco pe. ⁷ Cua jaicue rupi jei jemimboe reta pe:

—Yaa ye ma Judea pe.

⁸ —Oporomboe vae —jei reta—, ndei co ima judío reta uipota tõi ndeapi ita pe joco pe. Jáeramo ¿maera pa ndeo yeta?

⁹—Ime doce ora güinoi ara —jei Jesús—. Ara rupi uguata vae ndarau ipi güirocua. Echa'ã güinoi tembipe ca ivi pegua —jei—. ¹⁰ Ërei pïtu yave uguata vae ipi güirocua. Echa'ã güinoi'ã tembipe.

¹¹ Jucuarãi jei Jesús. Jayave jei:

—Ñaneamigo Lázaro oque ma oï. Ërei che aata amomba —jei.

¹² Jemimboe reta jei:

—OreYa, oque oï yave, ucuera yeta co.

¹³ Ërei Jesús jucuarãi jei yave, uipota jei umano ma. Jae reta ipia pe uyemingueta tēi uipota jei uputuũño oque oï. ¹⁴ Jayave Jesús umimbeu cavi chupe reta:

—Lázaro umano ma. ¹⁵ Jare ayerovia joco pe aï'ã vae re. Cua icavita co peve. Echa'ã peroviata co. Yaa ma icoti —jei.

¹⁶ Jayave Tomás - jae co Choguaquiri pe uyembijee vae - jei ñru Jesús jemimboe reta pe:

—Yaa vi yande, ñamano vaerã jae ndive.

Jesús co jae tecove umee vae

¹⁷ Jare Jesús ou uvãe yave, amocue vae umimbeu chupe irundi ara ma co Lázaro oï teõgüeriru pe. ¹⁸ Betania coiño oï Jerusalén güi. Uepiti penti legua seri rupi. ¹⁹ Jare jeta judío reta yugüeru ma Marta jare María ipi umbipiacatu vaerã iquivi amiri re. ²⁰ Jare Marta uicuaa yave Jesús ou co uvãe, oo oovãiti. Ërei María upita tenta pe. ²¹ Jayave Marta jei Jesús pe:

—CheYa, nde mona cua pe nei yave, umanota'ã tēi chequivi. ²² Jare añave aicuaa ipotave mbae ndiyerure Tumpa pe jese vae Tumpa umeeta co ndeve —jei.

²³ —Ndequivi icove yeta co ou umanocue vae reta ipite güi —jei Jesús chupe.

²⁴ —Aicuaa icove yeta co ou umanocue vae reta ipite güi ara taicuegua vae pe —jei Marta—. Echa'ã jocua arã ñru vae reta vi icove yeta yugüeru umanocue vae reta ipite güi —jei.

²⁵ —Che co amee tecove umanocue vae reta pe jare aru ye ñru umanocue vae reta ipite güi —jei Jesús—. Cheré güirovia vae, yepe tēi umano oï, icove yeta co. ²⁶ Jare opaete icove oï vae cheré güirovia vae ndarau etei umano. ¿Nderovia pa cua? —jei.

²⁷ —Arovia, cheYa —jei Marta—. Añave arovia nde co jae Cristo. Nde co jae Tumpa Tai. Echa'ã Tumpa iñee pe uyecuatía oï outa co Tumpa Tai ivi pe —jei.

Jesús uyao

²⁸ Marta cua jei ma yave, oo ueni María - jae co Marta ipiqui. Jayave güiraa ñru vae reta ipite güi jare jei chupe:

—Oporombocue vae cua pe oï jare uipota ndeo vaerã jae oï vae pe.

²⁹ María cua uyandu yave, imambae upüa oo Jesús oï vae pe. ³⁰ Marta oovãiti vae peño upita Jesús. Echa'ã ndei uique tenta guasu-rai pe. ³¹ Tenta pe judío uyemingueta ñugüinoi María ndive umbipiacatu vaerã vae reta uecha María imambae upüa oo tenta güi. Jayave yugüiraa María jaicue. Echa'ã ipia pe uyemingueta tēi jae oo teõgüeriru oï vae pe uyao vaerã joco pe.

³² Jayave María oo uvãe Jesús oï vae pe. Uecha rupive oo uyeatica jae jovai jare jei:

—CheYa, nde mona cua pe nei yave, umanota'ã tēi chequivi.

³³ Jesús uecha yave María jare judío María ndive yugüeru vae reta uyao ñugüinoi, iañeequi jare tuicha ipiatiti. ³⁴ Jayave upirandu:

—¿Quíape pa piñono?

—Eyu echa, carai —jei reta chupe.

³⁵ Jayave Jesús uyao. ³⁶ Jare judío reta jei:

—Mase, uau ete co.

³⁷ Ërei amocue vae jei:

—¿Ipuere'ã ra uyapo mbae cua cuimbae agüiye vaerã umano tēi Lázaro? Echa'ã umimae cuimbae jesa mbae vae.

Lázaro icove ye

³⁸ Jesús iañeequi ye. Jayave oo teõgüeriru oï vae pe. Jocua teõgüeriru penti itape uyeyoo vae co jare ita tuicha vae oï teõgüeriru jonque re. ³⁹ Jayave Jesús jei:

—Pembisiri ita joco güi.

Marta - jae co cuimbae amiri jindi - jei chupe:

—CheYa, ine ma co. Echa'ã irundi ara ma oï umano güiye —jei.

⁴⁰ Jesús jei chupe:

—Amimbeu ma ndeve nderovia yave ndeechata mbae ayapota ñru vae reta umbiadora vaerã Tumpa.

⁴¹ Jayave umbisiri reta ita teõgüeriru jonque güi. Jayave Jesús umae ara coti jare jei:

—CheRu, amee yasurupai ndeve nde ndiyandu cheve vae re. ⁴² Aicuaa jecuaeño ndiyandu cheve, ěrei jae cuarāi cua cheyipī rupi ñugüinoi vae reta jeco pegua, jae reta güirovia vaerā nde co chembou vae —jei.

⁴³ Jayave iñeeāta.

—Lázaro, eē joco güi —jei.

⁴⁴ Jare cuimbae amirī oē. Ipo jare ipi uyeyocua tarapo pe, jare jova uñenoma nieso pe. Jayave Jesús jei:

—Piyora iyocuaa. Pemaño tuguata —jei.

Uyemboemboe reta uyucaca vaerā Jesús

(Mt 26.1-5; Mr 14.1-2; Lc 22.1-2)

⁴⁵ Jare jeta judío yugüeru opou María ipi vae reta uecha Jesús uyapo vae jare güirovia jese. ⁴⁶ ěrei amocue vae yugüiraa fariseo reta pe umimbeu Jesús uyapo vae. ⁴⁷ Jayave sacerdote reta itenondegua reta jare fariseo reta umbati opaete mburuvicha reta.

—¿Mbae pa yayapota? —jei reta—. Cua cuimbae jecuaeño uyapo jeta miacañi reta.

⁴⁸ Ñamaeño yave cuarāi uyapo vaerā, opaete vae reta güiroviata jese. Jayave romano reta yugüeruta umbusururu Tumpa jo jare uyucata opaete ñanerentaigua reta —jei reta.

⁴⁹ ěrei penti ipite pe oī vae - Caifás jee vae - jae co sacerdote tenondegua jocua año - jei:

—Picuaa'ā etei mbae. ⁵⁰ Pepia pe piyemingueta cavi'ā. Echa'ā icavita co yandevē penti cuimbae umano vaerā opaete vae reta ipepica pe. Echa'ā jucuarāi'ā yave, aramoī opaete vae reta umanota —jei.

⁵¹ Jare cua umimbeu chupe reta ndei uyeyapo mbove. Umimbeu'ā jaeiño. Echa'ā jae sacerdote tenondegua co jocua año. Umimbeu Jesús umanota opaete judío reta ipepica pe. ⁵² Umanota umbati vaerā opaete Tumpa tai uñemiai vae reta - umanota'ā judío reta reño. ⁵³ Jáeramo jocua ara güive uyemboemboe quirāi uyucaca vaerā Jesús.

⁵⁴ Jáeramo Jesús upita'ā ma Judea pe, agüiye vaerā judío reta uecha. Oo joco güi penti tenta guasu Ēfraín jee vae pe. Jocua tenta guasu coiño oī ñana güi. Jare joco pe Jesús upita jemimboe reta ndive.

⁵⁵ Jare coiño ma ou judío reta ifiesta pascua jee vae, jare jeta judío reta yugüiraa Jerusalén pe joco güi ndei pascua iara ou uvāe mbove. Echa'ā uipota uyeyoe Tumpa coti fiesta peguarā. ⁵⁶ Jayave ueca ñugüinoi Jesús, jare Tumpa jo pe ñugüinoi rambueve jei uyupe:

—¿Mbae pa pepia pe piyemingueta? ¿Ndarau ra ou cua fiesta pe? —jei reta.

⁵⁷ Echa'ā sacerdote reta itenondegua reta jare fariseo reta oyocui ma opaete vae cuarāi: “Ime yave quía uicuaa quiupe Jesús ime oī vae, tumimbeu oreve orepuere nduipisi vaerā.”

12

María upiyere mbae ipiche cavi vae Jesús ipi re

(Mt 26.6-13; Mr 14.3-9)

¹ Seis araño ma uata pascua uvāe vaerā. Jayave Jesús oo ye Betania pe. Echa'ā joco pe ico Lázaro tenonde yave umano vae Jesús umbijecove ye güeru umanocue vae reta ipite güi vae. ² Pītu ma yave Lázaro jenta pegua reta uyapo Jesús jou vaerā. Marta güeru tembiu, jare Lázaro uguapī ucaru mesa pe Jesús ndive. ³ Jayave María güeru penti libra mbae ipiche cavi vae nardo jee vae jepi ete vae jare upiyere Jesús ipi re. Jayave umitini ipi ía pīpe. Jare opaete o ipiche cavi. ⁴ Jayave penti Jesús jemimboe Judas Iscariote jee vae - jae co Simón tai - jae co umeeta Jesús jovaicho reta pe vae - jei:

⁵ —¿Maera pa umee'ā cua mbae ipiche cavi vae trescientos ara mbaraviqui jepi pegua pe? Echa'ā ipuereta tēi co umee corepoti iparavete vae reta pe —jei.

⁶ ěrei jae ipiatitī'ā iparavete vae reta re. Echa'ā jucuarāi jei imonda ramo. Echa'ā jae güinoi corepoti ĩru vae reta umee chupe reta vae ĩru, jare jecuaeño uequi viari chugüi corepoti iyupeguarā. ⁷ Jayave Jesús jei:

—Emaeño jese. Penti ara añeñoticata co. Jocua ara peguarā uñuvatu cua mbae ipiche cavi vae —jei—. ⁸ Iparavete vae reta yugüirecoñotai co pe reta ndive. ěrei che ndarau aicoño pe reta ndive —jei.

Uyemingueta reta uyucaca vaerā Lázaro

⁹ Jare jeta judío reta uicuaa Jesús joco pe oī. Jáeramo yugüeru. Jare yugüeru'ā Jesús joco pe oī ramoño. ěrei yugüeru vi umae vaerā Lázaro re. Echa'ā Jesús umbijecove ye Lázaro güeru umanocue vae reta ipite güi. ¹⁰ Jayave sacerdote reta itenondegua reta uyemingueta vi quirāi uyucaca vaerā Lázaro. ¹¹ Echa'ā Lázaro jeco pegua jeta judío reta yugüiraa chugüi reta. Echa'ā güirovia ma Jesús re.

Jesús uique Jerusalén pe
(Mt 21.1-11; Mr 11.1-11; Lc 19.28-40)

¹² Piareve pe jeta ete pascua pe yugüeru ma vae uicuaa Jesús outa ma co Jerusalén pe.
¹³ Jayave uequi reta carandai joqui yugüiraa oovãiti vaerã Jesús.

—¡Icavi co! —jei reta—. Tuyembidoraca yandeYa jee re ou vae. Tuyembidoraca Israel pegua reta juvicha guasu —jei reta.

¹⁴ Jare Jesús uvãe penti mburica tairusu vae, jare opo jese. Echa'ã Tumpa iñee pe uyecuatía oĩ cuarãi:

¹⁵ Agüiye pequiye, Jerusalén pegua reta.

Mase, co ou ma peruvicha guasu.

Opo ou mburica tairusu vae re. Jucuarãi uyecuatía oĩ.

¹⁶ Jocua ara Jesús jemimboe reta uicuaa cavi'ã cua regua. Ërei Jesús oo ye ma ara pe yave, imandúa reta cua re. Echa'ã jucuarãi Tumpa iñee pe uyecuatía oĩ jese, jare jucuarãi uyeyapo chupe.

¹⁷ Jare amocue joco pe ñugüinoi vae jei:

—Ore noĩ Jesús ndive, jae umbjecove ye yave Lázaro güeru umanocue vae reta ipite güi jare oyocui oẽ vaerã teõgüeriru güi —jei reta.

¹⁸ Jáeramo jeta vae yugüiraa oovãiti Jesús. Echa'ã uicuaa ma uyapo cua miacañi. ¹⁹ Jayave fariseo reta jei uyupe:

—Mase, mbaeti mbae yandepuere yayapo. Echa'ã opaete que rupi rupigua reta yugüiraa umae vaerã jese.

Griego reta ueca Jesús

²⁰ Jare amocue griego reta yugüeru ma pascua pe ñru vae reta ndive umbiadora vaerã Tumpa. ²¹ Jae reta yugüeru Felipe Betsaida pegua pe - jocua Betsaida Galilea pegua co - jare jei chupe:

—Carai, nduipota nduecha Jesús.

²² Jayave Felipe oo umimbeu Andrés pe. Jayave mocui reve yugüiraa umimbeu Jesús pe.

²³ Jayave Jesús jei:

—Ara uvãe ma che ayeyapo cuimbaerã vae ayembidoraca vaerã. ²⁴ Añete che jae peve, penti trigo jáicue uñeñoti'ã yave, jaefo upita. Ërei uñeñoti yave, jeta uñemoña —jei—. ²⁵ Uyerau vae ndarau uyembiasaca. Ërei uyerau'ã cua ivi pe vae uyembiasacata co. Güinoita tecove opa mbae vae —jei—. ²⁶ Uyeyocui cheve vae too cherupíe. Cherembiocui oíta che aíta vae pe. Jare cheRu umbutuichacata uyeyocui cheve vae —jei Jesús—.

Jesús umimbeu umanota co

²⁷ Tuicha chepiatiti aĩ. Ërei chepuere'ã jae: 'CheRu, cherepi cua ora pe uyeyapota cheve vae güi.' Echa'ã uvãe ma cua ora cua uyeyapo cheve vaerã —jei—. ²⁸ CheRu, iyapo cheve ivi pegua reta nembidora vaerã —jei—.

Jayave ñee uyendu ara güi:

—Ayapo ma mbaembae nde rupi ivi pegua reta chembiadora vaerã, jare cuarãi ayapo yeta co.

²⁹ Jeta joco pe ñugüinoi vae reta uyandu ñee jare jei ara co jiapu. ñru reta jei:

—Penti ángel ombou iñee chupe.

³⁰ Jayave Jesús jei:

—Cua ñee uyendu pereco pegua - chereco pegua'ã co. ³¹ Uñeãa ma ivi pegua reta, jare jae reta juvicha uyemombota co —jei—. ³² Jare ñru vae reta chereupi curusu re yave ivi güi, arurucata opaete ivi pegua reta checoti —jei—.

³³ Cua jei Jesús uicuaaca vaerã chupe reta quirãita co umano. ³⁴ Jayave jae reta jei Jesús pe:

—Mboroyocui pe uyecuatía oĩ vae umimbeu oreve Cristo imeñoi ico. ¿Mbae pa uipota jei jocua nde ndere vae? Echa'ã nde ndere ñru vae reta uupita ivi güi cuimbaerã uyeyapo vae. ¿Quía pa co jae cuimbaerã uyeyapo vae? —jei reta.

³⁵ —Tembipe imeño ico pe reta ndive —jei Jesús—. Ërei ndarau ima upita pe reta ndive. Peguata tembipe ico pe reta ndive rambueve, agüiye vaerã pítu peve. Echa'ã pítumimbi pe uguata vae uicuaa'ã queti oo —jei—. ³⁶ Tembipe pe reta ndive ico rambueve, perovia tembipe re, pe reta peĩ vaerã tembipe rami —jei chupe reta.

Cua jei ma yave, Jesús oo chugüi reta, jare ipuere'ã ma uvãe chupe.

Judío reta güirovia'ã

³⁷ Ërei yepe tẽi Jesús uyapo jeta miacañi reta jae reta jovaque uicuaaca vaerã tẽi chupe reta quía co jae, Ërei jae reta güirovia'ã jese, ³⁸ uyeyapo vaerã Isaías uicuatía vae - Isaías co jae Tumpa iñee aracae umimbeu vae. Echa'ã Isaías uicuatía cuarãi:

“CheYa, ¿quía pa güirovia numimbeu vae?

¿Quía nunga vae pe pa ndicuaaca nembraepuere?”

Jucuarái uicuatía Isaías araca. ³⁹ Jáeramo jae reta ipuere'a güirovia. Echa'ã Isaías uicuatía vi cuarái:

⁴⁰ “Tumpa uyapo reta jesa mbae vae reta rami jare umípiatanta,

agüiye vaerã uecha cavi reta,

jare agüiye vaerã uicuaa cavi reta,

jare agüiye vaerã uyerova icoti.

Echa'ã uyerova yave Tumpa coti, Tumpa umbaita tēi imbaeyoa reta.”

Jucuarái uicuatía Isaías. ⁴¹ Isaías cua jei, uecha yave yembutuicha ara pegua. Jáeramo imiari jucuarái jese.

⁴² Ērei amocue mburuvicha reta güirovia Jesús re. Ērei uipota'ã jei jae co Cristo fariseo reta jeco pegua. Echa'ã jucuarái jei yave, fariseo reta omombota tēi co judío reta itupao güi.

⁴³ Echa'ã jae reta uipota ete japicha reta pe uyembutuichaca vaerã Tumpa umbutuichaca vaerã tēi güi.

Jesús iñee reta uãata ivi pegua reta

⁴⁴ Jayave Jesús iñeeãta reve jei:

—Cheré güirovia vae chereño'ã güirovia. Güirovia chembou vae re —jei—. ⁴⁵ Cherecha vae uecha vi chembou vae —jei—.

⁴⁶ Ayu ivi pe amee vaerã tembipe ivi pegua reta pe, agüiye vaerã cheré güirovia vae upita pítumimbi pe —jei—.

⁴⁷ Chiñee re uyapisaca vae uyapo'a yave che jae vae rupi, che aãa'ã. Echa'ã che ayu ambiasa vaerã ivi pegua reta.

Ayu'ã aãa vaerã —jei Jesús—. ⁴⁸ Jocua güirovia'ã cheré jare uyapo'ã che jae chupe uyapo vaerã vae uñeãata co. Echa'ã ara taicuegua vae pe cua che jae vae uãata —jei chupe reta—.

⁴⁹ Echa'ã cheporomboe chembaeño'ã co. Cheru chembou, jare jae cheocui mbae jae vaerã, jare quirái chemiari vaerã —jei—.

⁵⁰ Jare aicuaa cheRu cheocui vae tecove opa mbae vae pegua co. Jáeramo che jae peve cheRu jei cheve vae —jei.

13

Jesús oyoe jemimboe reta ipi

¹ Uyaró ma pascua iara. Jare Jesús uicuaa ara uvãe ma ueya vaerã cua ivi oo ye vaerã Tu pe. Imeño uau imbae cua ivi pe ñugüinoi vae reta, jare añave uicuaacata quirái uau ete.

²⁻⁴ Judas Iscariote -jae co Simón tai- ipia pe uyemingueta ma umee vaerã Jesús jovaicho reta pe. Echa'ã jucuarái uipota aña guasu Judas ipia pe uyemingueta vaerã. Jare Jesús uicuaa cavi ma Tu oñono opaete mbaembae ipo pe.

Uicuaa vi ou co Tumpa güi jare oo yeta co Tumpa pe. Jare pítu yave Jesús jare jemimboe reta ucaru ñugüinoi yave, Jesús upña mesa güi, omboi iyasoya iaramboga, jare oñoma icúa penti toalla pe.

⁵ Jayave oñono i penti ia pe jare umbipi oyoe jemimboe reta ipi, jare oyoe ma yave, umitini toalla icúa re oñ vae pipe.

⁶ Jare oo uvãe yave Simón Pedro oñ vae pe, Pedro jei chupe:

—CheYa, ¿nequirēi pa ndiyoe chepi?

⁷ —Cua ayapo añ vae ndicuaa cavi'ã añave —jei Jesús—, Ērei ndicuaa cavita co taicue rupi.

⁸ —Ndarau etei ndiyoe chepi —jei Pedro.

—Jucuarái yave, nde cheiru'ã co —jei Jesús chupe.

⁹ Jayave Simón Pedro jei:

—CheYa, iyoe chepo jare cheãca vi - agüiye iyoe chepiño.

¹⁰ —Uyau ma vae uyau yeta'ã ma —jei Jesús—. Ipiño ma oyoeta. Echa'ã opaete jete iquía mbae ma. Jare pe reta pequiá mbae ma. Ērei opaete'ã co pe reta —jei.

¹¹ Echa'ã Jesús uicuaa quía umeeta jovaicho reta pe. Jáeramo jei: “Ērei opaete'ã co pe reta.”

¹² Jayave opa yave ipi reta oyoe, jayomonde ye Jesús jare oo uguapi jenda pe. Jayave upirandu chupe reta:

—¿Picuaa cavi pa ayapo ma peve vae? ¹³ Pe reta pere cheve: ‘Oporomboe vae’, jare pere vi: ‘OreYa.’ Añete co cua pere vae. Echa'ã aporomboe jare che co jae peYa —jei chupe reta —.

¹⁴ Ērei yepē tēi che pomboe jare che co jae peYa, Ērei ayoe ma pepi reta. Jáeramo icavi co pe reta piyoe vaerã pepi piyugüi —jei—.

¹⁵ Echa'ã che cua ayapo aicuaaca vaerã peve, pe reta vi piyapo vaerã che ayapo peve vae rami —jei—.

¹⁶ Añete che jae peve, penti uyeyocui vae imbaepuere tuicha'ã ete ipatrón imbaepuere rami. Jare ramiño vi penti temimondo imbaepuere tuicha'ã ete omondo vae imbaepuere rami —jei—.

¹⁷ Cua picuaa cavi. Piyapo yave, Tumpa uyapota icavi vae peve —jei Jesús chupe reta—.

¹⁸ Opaete pe reta re'ã ayemingueta añ. Che aicuaa quía aiparavo vae reta. Ērei Tumpa iñee pe uyecuatía oñ vae uyeyapota co. Echa'ã uyecuatía oñ cuarái: ‘Jocua ucaru che ndive vae chemeeta.’ Jucuarái uyecuatía oñ —jei—.

¹⁹ Cua animbeu peve añave ndei uyeyapo mbove,

cua uyeyapo yave perovia vaerã quía co che —jei. ²⁰ Añete che jae peve, cheremimondo pe uyapo icavi vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei.

Jesús umimbeu Judas umeeta

(Mt 26.20-25; Mr 14.17-21; Lc 22.21-23)

²¹ Cua jei ma yave, Jesús tuicha ipiatiti jare jei:

—Añete che jae peve, penti pepite pe oĩ vae chemeeta cherovaicho reta pe.

²² Jayave Jesús jemimboe reta umaee iyee reta. Uicuaa'ã quía re ra uyemingueta. ²³ Penti jemimboe - jae co Jesús uau vae - ucaru oĩ Jesús iyipi pe. ²⁴ Jayave Simón Pedro omomí iñãca jocua ñru temimboe uecha vaerã, jare jae upirandu vaerã Jesús pe quía regua ra uyemingueta. ²⁵ Jayave jocua temimboe Jesús iyipi pe ucaru oĩ vae upirandu Jesús pe:

—¿Quía pa co jae, cheYa?

²⁶ —Ameeta chupe mbiyape —jei Jesús—, tembiu pe amãqui ma yave. Jocua co jae —jei.

Jayave tembiu pe umãqui ma yave, uequi umee Judas Iscariote pe - jae co Simón tai.

²⁷ Jayave Judas jou ma yave, Satanás oya jese. Jayave Jesús jei Judas pe:

—Iyapo voi jocua ndiyapota vae.

²⁸ Èrei mbaeti quía mesa pe oĩ vae uicuaa maera Jesús jei jucuarã Judas pe. ²⁹ Amocue vae ipia pe uyemingueta tẽi Jesús jei chupe vae uipota jei: “Ecuá egua yaipota fiesta peguarã vae”, ani: “Ecuá emee mbae iparavete vae reta pe.” Echa'ã Judas güinoi corepoti jiru. ³⁰ Jayave opa yave jou mbiyape, Judas oẽ oo. Jare pítu ma co.

Mboroyocui ipiau vae

³¹ Jayave oẽ ma yave Judas, Jesús jei:

—Che ayeyapo cuimbaerã. Añave ivi pegua reta chembiadorata. Jare umbiadorata vi Tumpa chereco pegua —jei—. ³² Ivi pegua reta umbiadorata Tumpa chereco pegua. Jáeramo Tumpa etei chembiadoracata ivi pegua reta pe. Añave voi chembiadoracata —jei—. ³³ Cherivi reta, michi peguaño ma apitata pe reta ndive. Jayave chereca tẽita, èrei pe reta ndarau pepuere peo che aata vae pe. Echa'ã cuarã amimbeu judío reta pe, jare añave amimbeu vi peve —jei—. ³⁴ Amee peve penti mboroyocui ipiau vae. Piyerau. Piyerau che puau rami —jei Jesús chupe reta—. ³⁵ Piyerau yave, opaete ivi pegua reta uicuaata pe reta cheremimboe reta co —jei.

Jesús umimbeu Pedro uicucacuta co

(Mt 26.30-35; Mr 14.26-31; Lc 22.31-34)

³⁶ Simón Pedro jei Jesús pe:

—CheYa, ¿queti pa ndeota?

—Ndarau añave ndepuere ndeo che aata vae pe —jei Jesús—. Èrei taicue rupi ndeota co —jei.

³⁷ Pedro jei:

—CheYa, ¿maera pa chepuere'ã aa nde ndive añave? Che tamano ndepépica pe —jei.

³⁸ —Nde ndere nemanota chepépica pe —jei Jesús—. Añete che jae ndeve, ndei uru cuimbae uñee mbove, mbapi vese ma checucacuta —jei—.

14

Jesús co jae tape Tumpa pe oo vae

¹ Agüiye pepiatiti. Perovia Tumpa re. Perovia vi cheré —jei—. ² CheRu jenta pe ime jeta o. Jucuarã'ã yave, amimbeuta tẽi co peve. Aata ayapicatu perendarã —jei Jesús chupe reta—. ³ Jare aa ma yave ayapicatu perendarã, ayu yeta puraa vaerã, pe reta vi pico vaerã che aicota vae pe —jei—. ⁴ Jare pe reta picuaa tape que rupi aata —jei.

⁵ Jayave Tomás jei:

—OreYa, ore nducuaa'ã queti ndeota vae. ¿Quirãita ra nducuaa tape?

⁶ —Che co jae tape —jei Jesús—. Che co jae añetete uyemingueta vae. Che co jae tecove opa mbae vae umee vae. Mbaeti quía ipuere uñemãru cheRu ndive jaeño che rupi —jei—. ⁷ Checuaa cavi yave mona, picuaata tẽi co cheRu vi. Èrei añave güive picuaa co. Echa'ã peecha ma —jei.

⁸ Felipe jei chupe:

—OreYa, eechaca oreve ndeRu. Jocuãño nduipota.

⁹ —Ima ma aico pe reta ndive, Felipe —jei Jesús—. ¿Nde pa co checuaa cavi? Cherecha vae uecha ma co cheRu. ¿Maera pa ndere: ‘Eechaca oreve ndeRu?’ —jei—. ¹⁰ ¿Perovia'ã pa che aico cheRu ndive jare cheRu ico che ndive vae? Ñee amimbeu peve vae chembaeño'ã co. Echa'ã cheRu ico che ndive, jare jae uyapo mbaraviqui reta —jei Jesús—. ¹¹ Perovia cua che jae peve vae: Che aico cheRu ndive, jare cheRu ico che ndive. Cua perovia'ã yave,

chererovia mbaraviquí ayapo vae reta jeco pegua —jei—. ¹² Añete che jae peve, cheré güirovia vae uyapota mbaraviquí reta che ayapo ma vae reta rami. Jare iparaviquí reta tuicha eteta cheparaviquí reta güi, che aata cheRu pe ramo —jei—. ¹³ Pepuereta piyerure ipotave mbae re cheree re, jare che ayapota peve, cheRu uyembadoraca vaerã che ayapota vae rupi —jei—. ¹⁴ Piyerure yave ipotave mbae re cheree re, ayapota co peve —jei Jesús chupe reta—.

Espíritu Santo outa

¹⁵ Cherau yave, piyapo cheporoyocui reta —jei—. ¹⁶ Jare che ayerureta cheRu pe jae ombou vaerã peve ñru vae. Jae jecuaño icota pe reta ndive pembipiácatu vaerã. Jae co Espíritu Santo —jei—. ¹⁷ Jae imiarita añete vae re. Upurugüirovia mbae vae reta ndarau ipuere umbiresive Espíritu Santo. Echa'ã upurugüirovia mbae vae reta uecha'ã jare uicuaa'ã. Ërei pe reta picuaa. Echa'ã jae ico pe reta ndive jare icota pepia pe —jei—. ¹⁸ Che aa ma yave, ndarau pueya jentarã mbae vae reta rami. Echa'ã che ayu yeta co —jei—. ¹⁹ Michi peguaño ma ivi pegua reta cherechata. Ndarau ma cherecha ye. Ërei pe reta cherecha yeta. Che jecuaño aico ramo, pe reta picota vi —jei chupe reta—. ²⁰ Jocua ara picuaata co che aico cheRu ndive, jare pe reta pico che ndive vae, jare che aico pepia pe —jei—. ²¹ Ime yave quía uyapisa cheporoyocui reta re uyapo vaerã vae, jae co cherau. Jare cheRu uauta cherau vae, jare che aauta, jare aicuaacata chupe quía co che —jei.

²² Jayave Judas - jae'ã co Judas Iscariote - jei chupe:

—OreYa, ¿quirãita pa ndicuaaca oreve quía co nde, ndicuaaca'ã yave upurugüirovia mbae vae reta pe?

²³ —Cherau vae uyapota che jae chupe uyapo vaerã vae —jei Jesús—. Jare cheRu uauta. Jare ndoyuta nducio vaerã jae ndive —jei—. ²⁴ Cherau'ã vae uyapo'ã che jae chupe uyapo vaerã vae. Jare chiñee piyandu vae chembaeño'ã co. Echa'ã cua ñee cheRu ñee co. Jae co chembou —jei—. ²⁵ Cua mbaembae re chemiari ma peve, aico pe ndive rambueve. ²⁶ Ërei jocua pembipiácatuta vae pemboeta opaete mbae re. CheRu ombouta peve cheree re. Jae co Espíritu Santo. Jae pemimanduata opaete che jae peve vae re —jei—. ²⁷ Mbiácatu aeya pe ndive. Mbiácatu che anoi vae amee peve. Ivi pegua reta ipuere'ã umee peve che amee peve vae nunga mbiácatu. Agüiye pepiatiti. Agüiye pequiyee —jei—. ²⁸ Piyandu ma quirãí che jae: 'Aata ma jare ayu yeta peve.' Cherau yave mona, piyeroviata tõi. Echa'ã aata cheRu pe, jare cheRu imbaepuere tuicha ete chembaepuere güi —jei—. ²⁹ Amimbeu ma peve ndei uyeyapo mbove, perovia vaerã uyeyapo yave —jei—. ³⁰ Ndarau ma ima chemiari peve. Echa'ã ivi pegua reta juvicha imambae outa uvãe cheve. Ërei ndarau ipuere cheré —jei—. ³¹ Ërei ayapota cheRu iporoyocui, ivi pegua reta uicuaa vaerã che aau cheRu. Pepüa, yaa ma cua güi —jei chupe reta—.

15

Jesús co jae uva iyipi añetete vae rami

¹ Che co jae uva iyipi añetete vae rami, jare cheRu co jae uva iyipi iyandarecoa rami —jei—. ² Opaete jãca ía mbae vae reta cheRu uyasiata. Jare opaete jãca ía vae reta jae uitiota, jeta ía vaerã —jei—. ³ Pe reta piyeyoeca ma ñee amimbeu peve vae pe —jei—. ⁴ Pico cheré perovia reve, jare che aicota pepia pe. Penti jãca uyeasia yave uva iyipi güi, ndarau ipuere ía. Echa'ã jãca jaeño ipuere'ã ía. Jae ramiño vi pe reta pico'ã yave cheré perovia reve, ndarau pepuere piyapo icavi vae Tumpa peguarã —jei—. ⁵ Che co jae uva iyipi rami, jare pe reta co jae jãca reta rami. Jocua ico cheré güirovia reve vae uyapota jeta icavi vae Tumpa peguarã. Echa'ã che aico ipia pe. Ërei che aico'ã yave pepia pe, pepuereta'ã mbae piyapo Tumpa peguarã —jei—. ⁶ Jocua ico'ã cheré güirovia reve vae uyemombota penti jãca uyeasia vae uyemombo yipi vaerã vae rami. Jare jãca yipi vae reta uyembatica jare uyemondoca tata pe ocai vaerã —jei—. ⁷ Pico yave cheré perovia reve, jare piyapo yave che jae peve piyapo vaerã vae, pepuereta piyerure pipota vae re jare penoita co —jei—. ⁸ Piyapo yave jeta icavi vae cheRu peguarã, ivi pegua reta umbiadorata cheRu. Jare cuarãí picuaacata pe reta co cheremimboe reta —jei—. ⁹ CheRu cherau. Jae ramiño vi che puau. Jecuaño piyeyocui cheve, che puau ramo —jei—. ¹⁰ Piyapo yave cheporoyocui reta, che jecuaño puauta. Echa'ã cuarãí che ayapo cheRu iporoyocui reta, jare jecuaño jae cherau —jei Jesús chupe reta—. ¹¹ Cuarãí chemiari ma peve piyerovia vaerã che ayerovia rami. Cuarãí ayapo tuicha ete piyerovia vaerã —jei—. ¹² Cua co jae cheporoyocui: Piyerau che puau rami. ¹³ Ime yave quía iquirëi umano uepi vaerã iamigo reta vae, ipuruau tuicha ete co ñru mburuau güi —jei—. ¹⁴ Pe reta co jae cheamigo reta, piyapo yave che jae peve piyapo vaerã vae —jei—. ¹⁵ Che jae'ã ma peve pe reta co cherembiocui reta. Echa'ã uyeyocui vae uicuaa'ã mbae ra uyapo ipatrón. Ërei che jae ma peve pe reta co jae cheamigo reta. Echa'ã opaete cheRu

umimbeu cheve vae aicuaaca ma co peve —jei chupe reta—. ¹⁶ Pe reta cheparavo'ã. Che co puparavo. Jare amee ma peve mbaepuere peo vaerã piyapo icavi vae Tumpa peguarã, jare jecuae jucuarã piyapo vaerã. Cua ayapo cheRu umee vaerã peve ipotave piyerureta chupe jese cheree re vae —jei—. ¹⁷ Cua co poyocui: Piyerau —jei—.

Upurugüirovia mbae vae reta umitarëi Jesús jare imbae reta

¹⁸ Piñemitarëica upurugüirovia mbae vae reta pe yave, pemandúa quirã jae reta che rami co chemitarëi —jei—. ¹⁹ Pico yave mona upurugüirovia mbae vae reta yugüireco rami, upurugüirovia mbae vae reta perauta tēi. Ērei che puparavo ma upurugüirovia mbae vae reta ipite güi. Jáeramo pico'ã ma upurugüirovia mbae vae reta yugüireco rami. Jáeramo piñemitarëica upurugüirovia mbae vae reta pe —jei—. ²⁰ Pemandúa cua che jae peve vae re: 'Penti uyeyocui vae imbaepuere tuicha'ã ete ipatrón imbaepuere rami.' Echa'ã upurugüirovia mbae vae reta uyapo yave icavi mbae vae cheve, uyapota vi icavi mbae vae peve. Uyapo reta yave che jae chupe uyapo vaerã vae, uyapota vi pe reta pere chupe uyapo vaerã vae —jei—. ²¹ Ērei upurugüirovia mbae vae reta uyapota peve opaete cua mbaembae cheré perovia ramo. Echa'ã jae reta uicuaa'ã chembou vae —jei—.

²² Ayu'ã yave mona chemiari vaerã chupe reta, ndarau tēi teco güinoi. Ērei añave opaete vae ipuere uicuaa jae reta co teco güinoi —jei—. ²³ Chemitarëi vae umitarëi vi cheRu —jei—. ²⁴ Ayapo'ã yave mona ipite pe mbaraviqui mbaeti quía ye uyapo vae reta, ndarau tēi teco güinoi. Ērei jae reta cherecha ma - jae co cheRu uecha rami - jare oremitarëi —jei—. ²⁵ Cua uyapo reta uyeyapo vaerã mboroyocui pe uyecuatía oí vae. Echa'ã uyecuatía oí cuarã: 'Jae reta chemitarëi mbaeti mbae icavi mbae vae ayapo chupe reta reve.' Jucuarã uyecuatía oí —jei—. ²⁶ Ērei ambouta peve cheRu ico vae güi pembipiacatuta vae - jae co Espiritu Santo añete vae re imiarita vae. Jae ou yave, chemimbeuta co —jei—. ²⁷ Jare pe reta vi chemimbeuta. Echa'ã tenonde güive pico che ndive —jei—.

16

¹ Opaete cua che jae ma peve agüiye vaerã piyero va Tumpa güi —jei—. ² Piyemombocata co judío reta itupao reta güi. Añete co, outa ma ara piyeyucaca vaerã. Jare jocua reta peyucata vae ipia pe uyemingueta tēita uyeyocui co oí Tumpa pe —jei—. ³ Jae reta uicuaa'ã cheRu jare checuaa'ã vi. Jáeramo jucuarã uyapota —jei chupe reta—. ⁴ Ērei cua che jae ma peve, pemandúa vaerã cuarã amimbeu peve vae re jucuarã uyapo reta yave —jei—.

Espiritu Santo uyapo vae

Amimbeu'ã peve cua tenonde güive. Echa'ã che aico pe ndive. ⁵ Ērei aata chembou vae pe. Jare penti ave añave pepirandu'ã cheve: '¿Queti pa ndeota?' —jei—. ⁶ Ērei cua che jae peve vae jeco pegua pepiatiti. ⁷ Ērei amimbeu peve añete vae. Icavita co peve che aa vaerã. Echa'ã che aa'ã yave, ndarau ou peve pembipiacatuta vae. Ērei aa yave, ambouta peve. ⁸⁻¹¹ Jare jae ou yave, uicuaacata ivi pegua reta pe jae reta uyapo co mbaeyoa. Echa'ã güirovia'ã cheré. Uicuaacata jupi vae. Echa'ã aata cheRu oí vae pe jare pe reta ndarau ye ma cherecha. Uicuaacata Tumpa uãata ivi pegua reta. Echa'ã uãa ma ivi pegua reta juvicha —jei—.

¹² Ime jeta aipota tēi jae peve vae, ěrei ndeño pepuere picuaa cavi —jei—. ¹³ Ērei Espiritu Santo añete vae re imiarita vae ou ma yave, umimbeuta peve añete vae. Echa'ã ñee umimbeuta peve vae ndarau imbaeño. Imiarita Tumpa umimbeu chupe vae re, jare umimbeuta peve uyeyapota vae —jei—. ¹⁴ Jae chembiadoracata co. Echa'ã jae pemboeta che pomboe rami —jei Jesús chupe reta—. ¹⁵ Opaete cheRu imbae chembae vi co. Jáeramo che jae cuarã: 'Jae pemboeta che pomboe rami' —jei—.

Ipiatiti vae uyeroviata co

¹⁶ Michi peguaña ma pe reta cherechata. Ērei imambae cherecha yeta. Echa'ã aata cheRu pe —jei chupe reta.

¹⁷ Amocue jemimboe reta jei uyupe:

—¿Mbae pa uipotata jei cua jei yandevae vae? Echa'ã jei: 'Michi peguaña ma pe reta cherechata. Ērei imambae cherecha yeta.' Jare jei vi: 'Echa'ã aata cheRu pe.' ¹⁸ ¿Mbae pa uipotata jei: 'Michi peguaña ma?' Yaicuaa'ã mbae ra uipotata jei —jei reta.

¹⁹ Jesús uicuaa jae reta uipotata tēi upirandu chupe cua re. Jáeramo jei chupe reta:

—Che jae peve cuarã: 'Michi peguaña ma pe reta cherechata. Ērei imambae cherecha yeta.' Jare pepirandu peí piyupe mbae ra uipotata jei cua che jae peve vae —jei—. ²⁰ Añete che jae peve, piyaota jare pepiatitita, ěrei upurugüirovia mbae vae reta uyeroviata. Pepiatitita co, ěrei jaicue rupi piyeroviata co —jei—. ²¹ Penti cuña imembi oata ma oí yave, cuña ipiatiti jasi chupe ramo. Ērei imembi oa ma yave, imandua'ã ma jasi chupe vae re. Echa'ã uyerovia

imembi oa ma ramo —jei—. ²² Jae ramiño vi pe reta pepiatiti añave, ñerei puecha yeta, jare piyeroviata, jare ndarau quía ipuere pembipiatiti ye —jei—.

²³ Jocua ara ndarau pepirandu cheve mbae re. Añete che jae peve, ipotave piyerureta cheRu pe jese vae cheRu umeeta peve cheree re —jei—. ²⁴ Ndeño peeca mbae cheree re. Piyerure Tumpa pe mbaembae re, jare cheRu umeeta co peve tuicha ete piyerovia vaerã —jei—.

Che chepuere ete ivi pegua reta güi

²⁵ Cua amimbeu ma peve amijaanga reve. Ñerei outa ma ara reta amimbeu cavi vaerã peve cheRu regua. Ndarau ye ma amimbeu peve amijaanga reve —jei—. ²⁶ Jocua ara reta pe piyerureta mbaembae re cheree re. Jare che jae'ã peve ayerureta cheRu pe jae uyapo vaerã piyerure jese vae —jei—. ²⁷ Echa'ã cheRu etei perau, pe reta cherau jare perovia che ayu cheRu güi ramo —jei—. ²⁸ Ayu co cheRu güi cua ivi pe. Aa yeta ma cua ivi güi cheRu pe —jei chupe reta.

²⁹ Jesús jemimboe reta jei chupe:

—Añave nemimbeu cavi ma oreve nemijaanga mbae reve. ³⁰ Añave nduicuaa nde nducuaa co opaete vae, jare ndeeca'ã quía umimbeu vaerã ndeve mbae re. Cua jeco pegua ndugüirovia nde ndeyu co Tumpa güi —jei reta.

³¹ Jesús jei chupe reta:

—Pe reta pere perovia ma. ³² Ñerei outa ma ara - ou ma co - pe reta piñemai vaerã. Chereyata jare penti penti peota perenta pe. Cheño apitata. Ñerei ndarau cheño aico. Echa'ã cheRu ico che ndive —jei—. ³³ Cua che jae ma peve pepiatacu vaerã cheré perovia ramo. Cua ivi pe pico rambueve, piporarata co. Ñerei agüiye pepiatiti. Echa'ã che chepuere ete ivi pegua reta güi —jei.

17

Jesús uyerure Tumpa pe jemimboe reta re

¹ Cua jei ma yave, Jesús umae ara coti jare jei:

—CheRu, ara uvãe ma. Che co jae ndeRai. Chembiaadoraca, chepuere vaerã numbiadoraca vi —jei—. ² Echa'ã nde cheapo ma opaete vae iYarã, amee vaerã tecove opa mbae vae opaete nde neme cheve vae reta pe —jei—. ³ Ime yave quía yandecuaa vae, jae güinoi tecove opa mbae vae. Nde co jae pentiño Tumpa añetete vae. Che co jae Jesucristo. Nde chembou —jei—.

⁴ Che numbiadoraca cua ivi pe. Echa'ã opa ma ayapo mbaraviqui nde neme cheve ayapo vaerã vae —jei—. ⁵ Ndei ivi uyeyapo mbove aico nde ndive yave ayembiaadoraca co. Jae ramiño vi añave chembiaadoraca ye nderovai —jei—. ⁶ Nde neme ma cheve cua cuimbaceta upurugüirovia mbae vae reta ipite güi. Che amimbeu ma nderegua cua reta pe. Jae reta nembac co jare nde neme ma cheve. Jae reta uyapo nde ndere chupe reta uyapo vaerã vae —jei—. ⁷ Jae reta uicuaa opaete nde neme cheve vae ou co ndegüi. ⁸ Echa'ã che amee ma chupe reta ñee nde neme cheve vae, jare jae reta güirovia niñee. Uicuaa cavi che ayu co ndegüi. Güirovia ma nde co chembou —jei—.

⁹ Ayerure ndeve jese reta. Ayerure'ã upurugüirovia mbae vae reta re. Ayerure ndeve nde neme cheve vae reta re. Echa'ã jae reta nembac co —jei—. ¹⁰ Opaete chembae nembac co, jare nembac chembae co. Jare che ayembiaadoraca ma jae reta jeco pegua —jei—. ¹¹ Jare ndarau ma aico cua ivi pe. Ñerei jae reta upitañota cua ivi pe. Che aata ma ndepi. CheRu, nde co jae jupi vae. Cua reta neme ma cheve. Embori nembraepuere pe, agüiye vaerã uyerova ndegüi, jare yugüireco vaerã penti ramiño. Echa'ã jucuarã yande yaico penti ramiño —jei—. ¹² Che aico jae reta ndive rambueve, che ambori nembraepuere pe cua neme cheve vae reta, agüiye vaerã uyerova ndegüi. Pentiño oota cañitei pe, niñee pe uyecuatia oĩ vae uyeyapo vaerã. Ñerei ambori ñru reta, agüiye vaerã yugüiraa cañitei pe —jei—.

¹³ Ñerei aata ma ndepi. Cuarã chemiari chupe reta ivi pe aico rambueve, jae reta uyerovia ete vaerã che ayerovia rami —jei—. ¹⁴ Amee ma chupe reta niñee, jare uñemitarëica upurugüirovia mbae vae reta pe. Che aico'ã upurugüirovia mbae vae reta yugüireco rami. Jae ramiño vi jae reta yugüireco'ã upurugüirovia mbae vae reta yugüireco rami —jei—. ¹⁵ Ayerure'ã ndeve nde nderaa vaerã cua ivi güi. Ayerure ndeve nembori vaerã, agüiye vaerã icavi mbae vae iya umiamiri —jei—. ¹⁶ Che aico'ã upurugüirovia mbae vae reta yugüireco rami. Jae ramiño vi jae reta yugüireco'ã upurugüirovia mbae vae reta yugüireco rami. ¹⁷ Ñono tee reta ndiyupegarã añete vae rupi. Niñee co jae añete vae —jei Jesús—. ¹⁸ Nde chembou ivi pe. Jae ramiño vi che amondo cua reta opaete ivi rupi —jei—. ¹⁹ Cua reta jeco pegua añeño tee ma ndeve peguarã, jae reta vi uñeño tee vaerã ndeve peguarã añete vae rupi —jei—.

²⁰ Jare ayerure ndeve cheré güiroviata vae re. Echa'ã güiroviata cua reta iñee rupi. Cua reta reño'ã ayerure ndeve —jei—. ²¹ Ayerure ndeve opaete jae reta yugüireco vaerã penti ramiño. Nde ndico che ndive, cheRu, jare che aico nde ndive. Jae ramiño vi ayerure ndeve cua reta yugüireco vaerã yanderé güirovia reve, ivi pegua reta güirovia vaerã nde co chembou vae —jei—. ²² Nde ndepiacavi ndeechaca cheve vae, che vi aechaca chupe reta, jae reta yugüireco vaerã penti ramiño. Echa'ã jucuarã yande yaico penti ramiño —jei Jesús—. ²³ Nde ndicota che ndive jare che aicota ipia pe, añetete yugüireco vaerã penti ramiño, ivi pegua reta uicuaa vaerã nde co chembou jare nde ndeau co cua reta nde cherau rami —jei—.

²⁴ CheRu, aipota cua nemeche cheve vae reta vi yugüireco vaerã che aicota vae pe, uecha vaerã ndepiacavi cheve vae. Echa'ã ndei ivi uyeyapo mbove nde cherauño mai —jei—.

²⁵ CheRu, nde co jae jupi vae. Upurugüirovia mbae vae reta ndecuaa'ã. Èrei che co nducuaa, jare cua reta uicuaa nde co chembou vae —jei—. ²⁶ Che numimbeu ma chupe reta jare numimbeu yeta, jae reta tuau ñru vae reta nde cherau rami, jare che aico vaerã ipia pe —jei.

18

Uipisi reta Jesús

(Mt 26.47-56; Mr 14.43-50; Lc 22.47-53)

¹ Jesús cua jei ma yave, uasa jemimboe reta ndive iãca Cedrón jee vae jovaicho pe oo uvãe temiti reta ñugüinoi vae pe. Joco pe uique Jesús jare jemimboe reta. ² Jare Judas - jae co umee jovaicho reta pe vae - uicuaa jocua temiti reta jenda. Echa'ã joco pe uyembatiñoi yepi Jesús jemimboe reta ndive. ³ Jayave Judas oo sacerdote reta itenondegua reta jare fariseo reta ñugüinoi vae pe, jare jae reta omondo amocue sundaro reta jare jembiocui reta temiti reta ñugüinoi vae coti Judas jupíe. Güiraa reta mechero jare ivira jare quisepucu reta. ⁴ Jayave Jesús oo jae reta ñugüinoi vae coti jare jei:

—¿Quía pa peeca?

Echa'ã jae uicuaa ma mbae uyeyapota chupe vae.

⁵ —Jesús Nazaret pegua —jei reta.

—Che co jae —jei Jesús.

Jare Judas - jae co umee jovaicho reta pe vae - uyemboi oĩ joco pe jae reta ndive. ⁶ Jesús jei yave chupe reta: “Che co jae”, jae reta opa usiri jaicue coti jare oa reta ivi re. ⁷ Jayave Jesús upirandu ye chupe reta:

—¿Quía pa peeca?

Jei reta ye:

—Jesús Nazaret pegua.

⁸ —Amimbeu ma peve che co jae —jei Jesús—. Pe reta che chereca. Jáeramo pemaño cua che ndive ñugüinoi vae reta re yugüiraa ye vaerã —jei.

⁹ Cua jei uyeyapo vaerã tenonde yave jei vae: “Amicañi'ã penti ave nde nemeche cheve vae reta güi.” Jucuarã jei ma. ¹⁰ Jare Simón Pedro güinoi penti quisepucu. Jayave uequi jiru güi jare uiporu sacerdote tenondegua jembiocui inambi iyacata cotigua re, jare uyasia inambi chugüi. (Jocua uyeyocui vae jee co Malco.) ¹¹ Jayave Jesús jei Pedro pe:

—Ífono ye ndequisepucu jiru pe. Aiporarañotai co. Echa'ã cheRu uipota aiporara vaerã —jei.

Jesús Anás jovai

(Mt 26.57-58; Mr 14.53-54; Lc 22.54)

¹² Jayave sundaro reta juvicha ndive jare judío reta itenondegua reta jembiocui reta uipisi Jesús uñapíti. ¹³ Jayave güiraa Jesús Anás pe rani - jae co Caifás jembireco tu - Caifás co jae sacerdote tenondegua jocua año. ¹⁴ Tenonde yave cua Caifás umimbeu judío reta pe icavita co chupe reta penti cuimbae umano vaerã opaete vae reta ipepica pe.

Pedro Anás joca pe

(Mt 26.69-70; Mr 14.66-68; Lc 22.55-57)

¹⁵ Jare Simón Pedro jare ñru temimboe yugüiraa Jesús jaicue. Jare cua ñru temimboe uique sacerdote tenondegua joca pe Jesús uique yave. Echa'ã sacerdote tenondegua uicuaa cua temimboe. ¹⁶ Èrei Pedro uique'ã japípe pe. Upita uyemboi oĩ onque tuicha vae iyipi pe. Jayave ñru temimboe sacerdote tenondegua uicuaa vae oẽ umingueta cuñatai onque uãro vae pe jare uruique Pedro. ¹⁷ Jayave cuñatai onque uãro vae jei Pedro pe:

—¿Jae'ã pa co nde penti jocua cuimbae jemimboe?

—Jae'ã co che —jei Pedro.

¹⁸ Jare sacerdote tenondegua jembiocui reta jare judío reta itenondegua reta jembiocui reta uyapo ma tata jare uyemboi reta tata iyipi rupi uyepee vaerã. Echa'ã roi co. Pedro vi upita joco pe uyemboi oĩ jae reta ndive uyepee vaerã.

Anás upirandu Jesús pe

(Mt 26.59-66; Mr 14.55-64; Lc 22.66-71)

¹⁹ Jayave sacerdote tenondegua upirandu Jesús pe jemimboe reta re jare iporomboc re.
²⁰ Jayave Jesús jei chupe:

—Che ayemingueta co opaete vae jovaque. Jecuaeño aporomboc judío reta itupao reta pe jare Tumpa jo pe. Echa'ã joco pe jecuaeño uyembati judío reta. Ayemingueta viari'ã etei —jei—. ²¹ ¿Maera pa ndepirandu cheve? Epirandu uyapisaca cheré vae reta pe che jae chupe reta vae re. Jae reta uicuaa che jae vae —jei.

²² Cua jei ma yave Jesús, penti judío reta itenondegua reta jembiocui joco pe oĩ vae ocua Jesús jova re.

—¿Maera pa jucuarã ndiyemingueta sacerdote tenondegua pe? —jei.

²³ —Icavi'ã ayemingueta yave, emimbeu mbae ra icavi'ã —jei Jesús—. Ērei icavi ayemingueta. ¿Maera pa ndecua cheré? —jei.

²⁴ Jayave Anás omondo Jesús iyocuaa reve Caifás pe - jae vi co sacerdote tenondegua.

Pedro uicuacu Jesús

(Mt 26.71-75; Mr 14.69-72; Lc 22.58-62)

²⁵ Jare Simón Pedro uyemboi uyepee oĩ. Īru vae reta jei chupe:

—¿Jae'ã pa co nde penti jemimboe?

Pedro uicuacu. Jei:

—Jae'ã co che.

²⁶ Penti sacerdote tenondegua jembiocui - jae co jocua cuimbae Pedro uyasia inambi chugüi vae jentarã - jei Pedro pe:

—Che nduecha co temiti reta ñugüinoi vae pe jae ndive.

²⁷ Pedro jei ye:

—Jae'ã co che.

Jare cua jei ma yave, uru cuimbae uñee.

Jesús Pilato jovai

(Mt 27.1-2, 11-14; Mr 15.1-5; Lc 23.1-5)

²⁸ Jayave güiraa reta Jesús Caifás jenta güi palacio pe. Neimbove asi. Jae reta uique'ã palacio jappi pe. Echa'ã uique yave joco pe jocua ara, iporomboc umimbeu chupe reta uyemingueta tēi co, jare ndarau tēi ipuere jou tembiu pascua pegua. ²⁹ Jayave Pilato oē chupe reta.

—¿Mbae re pa pembijeco cua cuimbae? —jei chupe reta.

³⁰ —Cua cuimbae jecocavi yave mona, ndarau tēi numee ndeve —jei reta.

³¹ —Pe reta etei peraa peãa vaerã peporoyocui rupi —jei Pilato.

—Romano reta umaeño'ã oreré nduyuca vaerã quía —jei reta.

³² Jucuarã jei reta, uyeyapo vaerã Jesús jei ma uyeyapota chupe vae. Echa'ã Jesús umimbeu ma quirãita co umano. ³³ Jayave Pilato uique ye palacio pe jare ueni Jesús.

—¿Nde pa co jae judío reta juvicha guasu? —jei.

³⁴ —¿Ndeño pa ndiyemingueta jucuarã, ani Īru vae reta pa umimbeu ndeve cheregua? —jei Jesús.

³⁵ —Che penti judío'ã co —jei Pilato—. Nerentaigua reta jare sacerdote reta itenondegua reta neme cheve. ¿Mbae pa ndiyapo? —jei.

³⁶ —Che co jae penti mburuvicha guasu —jei Jesús—, ěrei che jae'ã co mburuvicha guasu ivi pegua reta rami. Che jocua reta rami yave mona, cherembiocui reta uñerãrota tēi co, agüiyee vaerã añemee judío reta pe. Ērei che jae'ã co mburuvicha guasu ivi pegua reta rami —jei Jesús.

³⁷ Jayave Pilato jei chupe:

—¿Nde pa co jae penti mburuvicha guasu?

—Nde ndere rami che co jae penti mburuvicha guasu —jei Jesús—. Cuarã ayeyapo cuimbaerã. Cuarã ayu ivi pe. Ayu amimbeu vaerã añete vae. Opaete añete vae güirovia vae reta uyapisaca chiñee re —jei.

³⁸ Jayave Pilato upirandu chupe:

—¿Mbae pa jocua añete vae?

Pilato jei Jesús umanota co

(Mt 27.15-31; Mr 15.6-20; Lc 23.13-25)

Jare cua jei ma yave, Pilato oē ye judío reta jovai jare jei chupe reta:

—Avãe'ã etei teco jese. ³⁹ Ërei pe reta jecuaeño pipota ayora vaerã peve penti pereso pascua pe. ¿Pipota pa ayora vaerã peve cua judío reta juvicha guasu? —jei chupe reta.

⁴⁰ Jae reta iñeeãta reve jei:

—Agüiye iyora jocua cuimbae. Iyora oreve Barrabás —jei reta.

Jocua Barrabás co jae imonda vae.

19

¹ Jayave Pilato güiraa Jesús uinupaca chicote pe. ² Jare sundaro reta oñope yurãti catuui vae jare umbapúa oñoño Jesús iñãca re. Jare omondeca reta Jesús pe temimonde pãta vae.

³ Jayave jei reta chupe:

—¡Viva, judío reta juvicha guasu!

Jayave ocua reta jese ipo pe.

⁴ Jayave Pilato oë ye, jare jei judío reta pe:

—Mase, aruta peve picuaa vaerã avãe'ã co teco jese.

⁵ Jayave Jesús oë. Güinoi jocua yurãti catuui vae iñãca re jare omonde temimonde pãta vae. Jayave Pilato jei chupe reta:

—Mase, co oï cua cuimbae.

⁶ Sacerdote reta itenondegua reta jare jembiocui reta uecha yave Jesús, iñeeãta reve jei:

—¡Icutuca curusu re, icutuca curusu re!

Jayave Pilato jei chupe reta:

—Pe reta etei peraa picutuca curusu re. Echa'ã che avãe'a etei teco jese —jei.

⁷ Judío reta jei Pilato pe:

—Ore nonoi penti mboroyocui, jare jocua mboroyocui rupi umanota co. Echa'ã jei jae co Tumpa Tai —jei reta.

⁸ Cua uyandu yave, Pilato uquiye ete. ⁹ Jayave uique ye palacio pe jare upirandu Jesús pe:

—¿Quía pegua pa nde?

Ërei Jesús jei'ã mbae ave chupe. ¹⁰ Jayave Pilato jei chupe:

—¿Maera pa niñee nemoë'ã cheve? Che anoi mbaepuere nducutuca vaerã curusu re. Anoi vi mbaepuere ndoyora vaerã. ¿Ndicuaa'ã pa cua? —jei.

¹¹ —Tumpa umaeño'a nderé yave, ndarau tēi ndepuere cheré —jei Jesús—. Jáeramo chemee ndeve vae iyoa ete ma co.

¹² Cua uyandu ma yave, Pilato uipota tēi oyora Jesús. Ërei judío reta iñeeãta reve jei:

—Cua cuimbae ndiyora yave, nde ndiyeyocui'ã ma co César pe. Echa'ã ipotave jei jae co mburuvicha guasu vae oyovaicho ma César ndive —jei reta.

¹³ Pilato cua uyandu yave, güinoë Jesús jare uguapi Empedrado jee vae pe. (Cua co jee Gabata hebreo iñee pe.) Echa'ã joco pe jecuaeño uña teco güinoi vae reta. ¹⁴ Jare jocua ara judío reta uyeyapicatu ñügüinoi pascua peguarã, jare ara mbite seri ma. Jayave Pilato jei judío reta pe:

—Co oï peruvicha guasu.

¹⁵ Jayave jae reta iñeeãta reve jei:

—¡Eraaca cua güi, eraaca cua güi, icutuca curusu re!

Pilato upirandu chupe reta:

—¿Aicutucata pa peruvicha guasu?

Jayave sacerdote reta itenondegua reta jei:

—Jaeño César oreruvicha guasu.

¹⁶ Jayave Pilato umee Jesús chupe reta uicutuca vaerã curusu re. Jayave jae reta uipisi Jesús güiraa.

Jesús uyecutuca curusu re jare umano

(Mt 27.32-44; Mr 15.21-32; Lc 23.26-43)

¹⁷ Jayave Jesús oë jare ovoi güiraa icurusu. Jayave sundaro reta güiraa Jesús Ñcacuerenda jee vae pe. (Cua co jee Gólgota hebreo iñee pe.) ¹⁸ Joco pe uicutu reta Jesús curusu re. Uicutu reta vi ñru mocui cuimbae reta jare oñoño penti Jesús iyacata coti jare ñru iyaso coti. Jesús oï mbite pe. ¹⁹ Jare Pilato uicutatía curusu re oñoñoca vaerã. Cuarãi uyecuatía oï: “Jesús Nazaret pegua, judío reta juvicha guasu.” ²⁰ Jare jeta judío reta umingueta cua uyecuatía oï vae. Echa'ã Jesús uyecutuca vae coiño oï tenta guasu güi. Jare uyecuatía oï hebreo iñee pe jare griego iñee pe jare latin pe. ²¹ Jayave judío reta isacerdote reta itenondegua reta jei Pilato pe:

—Agüiyeta tēi co ndicutatía: ‘Judío reta juvicha guasu.’ Ndicuatia tēi co: ‘Cua cuimbae jei: Che co jae judío reta juvicha guasu’ —jei reta.

²² —Cua aicutatía vae aicutatía ma co —jei Pilato.

²³ Jare sundaro reta uicutu ma yave Jesús, irundi reve uyembiiya Jesús jemimonde re umbiyao ma yave. Ērei jemimonde pucu vae uyembiviví'ã. Uyeyapo penti güiño. Cua vi sundaro reta uequi chugüi. ²⁴ Jayave sundaro reta jei uyupe:

—Agüiye yamondoro. Yayuguari jese, yaicuaa vaerã quã güiraata vae —jei reta.

Cuarãi uyeyapo Tumpa iñee pe uyecuatía oĩ vae. Echa'ã uyecuatía oĩ cuarãi: “Uyuguari reta cheremimonde re, uicuaa vaerã mbae nunga penti penti güiraa iyupe vaerã.” Jucuarãi uyecuatía oĩ, jare jucuarãi uyapo sundaro reta.

²⁵ Jare uyemboi ñugüinoi Jesús icurusu iyipi pe Jesús ichi, jare ichi ipiquii, jare María - jae co Cleofas jembireco - jare María Magdalena. ²⁶ Jesús uecha ichi jare jemimboe jae uau vae uyemboi ñugüinoi coiño chugüi. Jare jei ichi pe:

—Chesi, joco oĩ nemembirã.

²⁷ Cua jaicue rupi jei jemimboe pe:

—Joco oĩ ndesirã.

Jáeramo jocua ora güive jocua jemimboe güiraa jenta pe Jesús ichi.

Jesús umano

(Mt 27.45-56; Mr 15.33-41; Lc 23.44-49)

²⁸ Cua jaicue rupi Jesús jei:

—Cheúe.

Cuarãi uyeyapo ma Tumpa iñee pe uyecuatía oĩ vae. Echa'ã Jesús uicuaa opaete iparaviqui opa ma. ²⁹ Jare joco pe oĩ vinagre penti yapepo pe. Jayave umãqui reta esponja vinagre pe. Jayave oñono reta ivira re jare omondo Jesús iyuru pe. ³⁰ Jare Jesús jou ma yave vinagre, jei:

—Opa ma ayapo Tumpa jei vae.

Jayave iñãcatindi jare umano.

Jesús iyique uyecutu

³¹ Jare jocua ara judío reta uyeyapicatu ñugüinoi pascua peguarã. Jáeramo uyerure reta Pilato pe omopëca vaerã curusu re ñugüinoi vae reta itimaca jare güiraaca vaerã joco güi. Echa'ã uipota'ã jetecue reta upita vaerã curusu reta re jocua mbutuu ara pe. Echa'ã jocua mbutuu ara uyepiu reta. ³² Jáeramo sundaro reta yugüiraa omopë penti cuimbae Jesús ndive curusu re uyecutu oĩ vae itimaca. Jayave omopë ñru cuimbae itimaca. ³³ Ērei yugüiraa yave Jesús pe, uecha umano ma. Jáeramo omopë'ã itimaca. ³⁴ Ērei penti sundaro uicutu Jesús iyique pe, jare oë voi tugüi jare i. ³⁵ Jare uecha vae umimbeu cua, pe reta vi perovia vaerã. Jare cua umimbeu vae añete co. Echa'ã jae uicuaa cavi umimbeu vae añete co. ³⁶ Echa'ã opaete cua uyeyapo Tumpa iñee pe uyecuatía oĩ vae uyeyapo vaerã. Echa'ã uyecuatía oĩ cuarãi: “Ndarau icãgüe ave opë.” ³⁷ Jare: “Umaeta reta jocua uicutu vae re.” Jucuarãi uyecuatía oĩ.

Oñoti reta Jesús jetecue

(Mt 27.57-61; Mr 15.42-47; Lc 23.50-56)

³⁸ Cua jaicue rupi José Arimatea pegua uyerure Pilato pe güiraa vaerã Jesús jetecue. Cua José co jae penti Jesús jemimboe, ěrei uyecuaaca'ã. Echa'ã uquiye judío reta güi. Jayave Pilato jei chupe ipuere güiraa Jesús jetecue. ³⁹ Nicodemo ou vi - jae co tenonde yave oo pítu yave Jesús pe vae. Jae güeru mirra jare áloes uyeacue vae. Uepiti treinta kilo rupi. ⁴⁰ Jayave umbigüeyi reta Jesús jetecue, jare oñoma mbae ipiche cavi vae reta reve nieso pe. Echa'ã jucuarãiño mai uyapo judío reta, jetecue oñoti yave. ⁴¹ Jare Jesús uyecutu vae pe oĩ penti temiti reta ñugüinoi vae, jare jocua ipite pe oĩ penti teögüeriru ipiau vae - ndei quã uñeñono pipe vae pe. ⁴² Jocua ara judío reta uyeyapicatu ñugüinoi pascua peguarã. Jáeramo oñono reta Jesús jetecue jocua teögüeriru pe. Echa'ã coiño oĩ.

20

Jesús icove ye

(Mt 28.1-10; Mr 16.1-8; Lc 24.1-12)

¹ Jare ndei cõe cavi mbove domingo ara pe María Magdalena ou teögüeriru pe, jare uecha ita uyembisiri ma teögüeriru güi. ² Jayave osi oo Simón Pedro jare ñru temimboe Jesús uau vae ñugüinoi vae pe, jare jei chupe reta:

—Güiraa reta ma yandeYa teögüeriru güi, jare nduicuaa'ã quiupe ra oñono reta.

³ Jayave Pedro jare ñru temimboe oë pãve jare yugüiraa teögüeriru coti. ⁴ Mocui reve osi pãve yugüiraa, ěrei ñru temimboe iñacua ete Pedro güi, jare oo uvãe teögüeriru pe Pedro jenonde. ⁵ Jayave ipe umae vaerã japipe coti, jare uecha nieso reta joco pe oĩ, ěrei uique'ã. ⁶ Jayave Simón Pedro oo uvãe jaicue rupi, jare uique teögüeriru pe. Jare uecha nieso reta joco pe oĩ. ⁷ Uecha vi nieso Jesús iñaca re tenonde yave uñeñono vae uñeñomañoma oĩ tee

ĩru nieso reta güi. ⁸ Jayave jocua ĩru temimboe vi - jae Pedro jenonde oo uvãe vae - uique teõgũeriru pe, jare uecha yave, upurugũirovia. ⁹ Echa'ã ndei uicuaa cavi reta Tumpa ĩnee pe uyecuatía oĩ vae quirãĩ Jesús icove yeta ou umanocue vae reta ipite güi. ¹⁰ Jayave temimboe reta yugũiraa ye jenta pe.

Jesús uyecuaa María Magdalena pe
(Mr 16.9-11)

¹¹ Ĕrei María uyemboi oĩ teõgũeriru iyipi pe. Uyao oĩ. Jare uyao oĩ rambueve, ipe umae vaerã teõgũeriru japipe coti. ¹² Jare uecha mocui ángel reta uguapĩ ñugũinoi Jesús jetecue uñeñono vae pe. Jemimonde tĩ asi co. Penti uguapĩ oĩ Jesús ĩñãca jendacue coti jare ĩru uguapĩ oĩ Jesús ipita jendacue coti. ¹³ Ángel reta jei María pe:

—¿Maera pa ndiyao?

—Gũiraa reta ma cheYa, jare aicuaa'ã quiape ra oñono reta —jei María.

¹⁴ Cua jei ma yave, María uyerova jare uecha Jesús uyemboi oĩ joco pe. Ĕrei uicuaa'ã jae co Jesús vae. ¹⁵ Jayave Jesús jei chupe:

—Cuña, ¿maera pa ndiyao? ¿Quía pa ndeeca?

María ipia pe uyemingueta tẽi jae co temiti reta iyandarecoa. Jáeramo jei chupe:

—Carai, nde nderaa yave, emimbeu cheve quiape ñiñono, jare che araata.

¹⁶ —¡María! —jei Jesús chupe.

María uyerova ye icoti jare jei chupe:

—Raboni. (Cua uipota jei: “Oporomboe vae”.)

¹⁷ Jayave Jesús jei chupe:

—Agũiyee chepisi. Echa'ã ndei ayupi cheRu pe. Ĕrei ecua emimbeu cherivi reta pe che jae cuarãĩ: ‘Aata ma cheRu pe - jae co peRu vi. Jae co cheTumpa - jae co peTumpa vi’ —jei.

¹⁸ Jayave María Magdalena oo umimbeu Jesús jemimboe reta pe.

—Aecha ma yandeYa —jei.

Jayave umimbeu chupe reta Jesús jei chupe vae.

Jesús uyecuaa jemimboe reta pe
(Mt 28.16-20; Mr 16.14-18; Lc 24.36-49)

¹⁹ Jare jocua pĩtu - domingo ara pe - Jesús jemimboe reta uyembati jare uyuquenda jonque reta. Echa'ã jae reta uquiye judío reta güi. Jayave ou Jesús uyemboi ipite pe jare jei chupe reta:

—Pepiacatu.

²⁰ Cua jei ma yave, Jesús uechaca chupe reta ipo jare iyique. Jayave Jesús jemimboe reta uyerovia. Echa'ã uecha ma iYa. ²¹ Jayave Jesús jei ye chupe reta:

—Pepiacatu. CheRu chembou. Jae ramiño vi che pomondo —jei.

²² Jare cua jei ma yave, iputúe omoẽ icoti reta jare jei:

—Amee ma peve Espĩritu Santo. ²³ Pembiasa yave ipotave vae pe imbaeyoa, imbaeyoa uyembaita co. Jare pembiasa'ã yave ipotave vae pe imbaeyoa, imbaeyoa ndarau uyembai —jei.

Tomás gũirovia'ã Jesús regua

²⁴ Jare jocua doce jemimboe reta güi penti Tomás jee vae - jae co Choguaquiri pe uyembijee vae - oĩ'ã joco pe ĩru reta ndive Jesús ou yave. ²⁵ Jare ĩru Jesús jemimboe reta jei Tomás pe:

—Nduecha ma yandeYa.

Ĕrei Tomás jei:

—Aecha'ã yave uyecuturendacue ipo re jare añoño'ã yave chepoãca uyecuturendacue pe jare añoño'ã yave chepo iyique pe, ndarau arovia.

²⁶ Ocho ara uasa ma yave, temimboe reta ñugũinoi ye jocua o pe. Tomás joco pe oĩ vi. Yepe tẽi onque reta uyeyuquenda ñugũinoi, Ĕrei Jesús ou uyemboi ipite pe jare jei:

—Pepiacatu.

²⁷ Jayave jei Tomás pe:

—Emae chepo re. ĩñoño cua pe nepoãca. Eupi ndepo ĩñoño cheyique pe. Agũiyee ma ico ndepurugũirovia mbae reve. Mburugũirovia reve ma ico —jei.

²⁸ —Nde co jae cheYa jare cheTumpa —jei Tomás.

²⁹ Jayave Jesús jei:

—Ndepurugũirovia ma cherecha ramo. Tuicha uyeroviata jocua cherecha mbae reve upurugũiroviata vae reta —jei.

Maera uyecuatía oĩ cua ñee reta

³⁰ Jare Jesús uyapo jemimboe reta jovaque jeta ĩru miacañi reta uicuaaca vaerã quía co jae, yepe tẽi uyecuatia'ã oĩ cua pe. ³¹ Ĕrei aicuatía cua pe uyecuatía oĩ vae, perovia vaerã Jesús co jae Cristo - jae co Tumpa Tai - jare penoi vaerã tecove opa mbae vae cua perovia yave.

21

Jesús uyecuaa siete jemimboe reta pe

¹ Cua jaicue rupi Jesús uyecuaa ye jemimboe reta pe i Tiberias jee vae iyipi pe. Uyecuaa chupe reta cuarã: ² Simón Pedro jare Tomás - jae co Choguaquiri pe uyembijee vae - jare Natanael Caná pegua - jocua Caná Galilea pegua co - jare Zebedeo tai reta jare mocui ĩru temimboe reta uyembati. ³ Jayave Simón Pedro jei ĩru reta pe:

—Aata pira aipisi vaerã.

—Ore ndoota vi nde ndive —jei reta.

Jayave yugũraa uyupi chalana pe. Ĕrei jocua pĩtu uipisi'ã mbae ave. ⁴ Jare cõeta ma yave Jesús uyemboi oĩ i jembei pe. Ĕrei temimboe reta uicuaa'ã jae co Jesús. ⁵ Jayave Jesús jei chupe reta:

—Cherivi reta, ¿pipisi ma pa mbae?

—Nduipisi'ã mbae ave —jei reta chupe.

⁶—Pemombo pepisa chalana iyacata coti jare pipisita pira reta —jei Jesús.

Jayave jucuarãi uyapo reta, jare ipuere'ã ma umiãta pisa i güi jeta ete pira omboa ramo.

⁷ Jayave jocua temimboe Jesús uau vae jei Pedro pe:

—Jae co yandeYa.

Simón Pedro uyandu yave jocua cuimbae co jae iYa, uyemonde jare ugũeyi voi i pe. Echa'ã omboi jemimonde uparaviqui cavi vaerã. ⁸ Jare ĩru reta yugũeru chalana pe. Jae reta umiãta pisa pira reve. Echa'ã coiñoi ñugũinoi i jembei güi - cien metro rupi. ⁹ Jayave yugũeru oẽ i güi yave, uecha tata tatãpi reve joco pe. Uecha vi pira tatãpi iárambo jare mbiyape vi. ¹⁰ Jayave Jesús jei chupe reta:

—Peru mbovi pira pipisi vae.

¹¹ Jayave Simón Pedro uyupi ye chalana pe jare umiãta pisa i güi. Pisa tinee pira tuichacue vae pe - güinoi ciento cincuenta y tres. Ĕrei yepe tẽi jeta ete, Ĕrei omondoro'ã pisa. ¹² Jayave Jesús jei chupe reta:

—Peyu rani pecaru.

Jare penti ave jemimboe iquirẽi'ã upirandu chupe: “¿Quía pa co nde?” Echa'ã uicuaa jae co iYa. ¹³ Jayave Jesús oo uipisi mbiyape umee chupe reta. Jae ramiño vi umee chupe reta pira. ¹⁴ Jare mbapi vese ma cua re Jesús uyecuaa jemimboe reta pe icove ye güive ou umanocue vae reta ipite güi.

Emĩngaru cheovecha reta

¹⁵ Ucaru reta ma yave, Jesús jei Simón Pedro pe:

—Simón, Jonás tai, ¿cherau ete pa cua reta güi?

—Nduau, cheYa —jei Pedro—. Ndicuaa che nduau co.

—Emĩngaru cheovecha-rai reta —jei Jesús chupe.

¹⁶ Jesús jei ye chupe:

—Simón, Jonás tai, ¿cherau pa?

—Nduau, cheYa —jei ye Pedro—. Ndicuaa che nduau co.

—Iyandareco cheovecha reta re —jei Jesús.

¹⁷ Jesús jei ye chupe mbapi vecea re:

—Simón, Jonás tai, ¿cherau pa?

Pedro ipiatiti. Echa'ã mbapi vese ma Jesús jei chupe: “¿Cherau pa?” Jayave jei ye:

—CheYa, nde ndicuaa opaete. Nde ndicuaa che nduau co.

—Emĩngaru cheovecha reta —jei Jesús chupe—. ¹⁸ Añete che jae ndeve, nde ndetairusu yave, ndiyemonde jare ndequata ndipota ndeo vae rupi. Ĕrei nendechi ma yave, ndeupita ndeyiva jare ĩru vae omondacata ndeve jare ndereraata ndipota'ã ndeo vae pe —jei.

¹⁹ Cua jei Jesús umimbeu vaerã quirãita co umano Pedro. Jare Pedro umano yave, Tumpa uyembiaadoracata imano rupi. Jayave Jesús jei Pedro pe:

—Eyu che ndive.

Temimboe Jesús uau vae

²⁰ Pedro uyerova yave, uecha jocua temimboe Jesús uau vae ou jaicue. Jocua temimboe co jae tenonde yave ucaru ñugũinoi yave ucaru oĩ Jesús iyipi pe jare: “¿Quía pa nemeeta, CheYa?” jei chupe vae. ²¹ Jare Pedro uecha yave jocua temimboe, upirandu Jesús pe:

—¿Mbae pa uyeyapota chupe, cheYa?

²² Jesús jei chupe:

—Che aipota yave jae ico vaerã che ayu ye regua, jocua mbae'ã co ndeve. Nde eyu che ndive —jei.

²³ Jare opaete upurugüirovia vae reta uicuaa cua Jesús jei vae, jare ipia pe uyemingueta tẽi cua uipota jei jocua jemimboe ndarau umano. Ërei Jesús jei'ã ndarau umano. Jaeño jei: “Che aipota yave jae ico vaerã che ayu ye regua, jocua mbae'ã co ndeve.”

²⁴ Che co jae jocua Jesús jemimboe, jare che amimbeu añete co cua pe uyecuatía oĩ vae. Echa'ã che aicutía cua. Jare opaete nduicuaa cua amimbeu vae añete co.

²⁵ Jare ime ye jeta mbaembae Jesús uyapo vae. Opaete cua mbaembae regua uyecuatía oĩ yave penti penti rupi, uatata opaete tupapire jendarã cua ivi pe. Amén.

LOS HECHOS DE LOS APÓSTOLES

Espíritu Santo outa

¹ Teófilo, tenonde aicutatía ndeve vae pe amimbeu ndeve opaete Jesús uyapo vae jare jocua oporomboe jese vae. ² Ndei oo ye ara pe mbove, umee mboroyocui reta Espíritu Santo rupi jemimondo uiparavo vae reta pe. ³ Jesús imano rendave pe, uyecuaa chupe reta. Jae reta uicuaa catu jae icove ye co jeta mbaembae uyapo jovaque vae jeco pegua. Jesús uyecuaa chupe reta cuarenta ara, jare umingueta reta Tumpa iporoyocua re.

⁴ Jae reta uyembati yave, Jesús oyocui agüiye vaerã yugüiraa tenta guasu Jerusalén güi. Oyocui uãro vaerã yandeRu umeeta chupe reta vae. Jesús jei chupe reta:

—Jocua re chemiari ma peve. ⁵ Juan upurumbibautiza i pe, ãrei pe reta piyembibautizacata Espíritu Santo pe mbovi ara rupi —jei.

Jesús oo ye ara pe

⁶ Jayave yati vae reta upirandu Jesús pe: —OreYa, ¿nemañota pa Israel pegua reta re uyeyapo vaerã mbaruvicha retarã cua ara reta rupi?

⁷ —Ndarau picuaa jocua ara regua —jei Jesús—. Jaeño cheRu jeita jocua re —jei—. ⁸ Ërei pe reta penoita Espíritu Santo imbaepuere, ou yave peve, jare pe reta chemimbeuta Jerusalén pe, opaete Judea rupi, Samaria rupi jare opaete ivi rupi —jei chupe reta.

⁹ Jare Jesús opa imiari chupe reta yave, oo ivate, jae reta umae jese rambueve. Jayave amapitu umbiyasoi Jesús, jare uecha'ã ma reta. ¹⁰ Jare umae ngatu ñugüinoi rambueve ara coti, Jesús oo rambueve, mocui cuimbae uyecuaa jae reta iyipi pe. Cua cuimbae reta jemimonde tĩ asi. ¹¹ Cua reta jei chupe reta:

—Cuimbae Galilea pegua reta, ¿maera pa piyemboi pemaie peĩ ara coti? Jesús oo ma pegüi ara pe. Ërei jae etei ou yeta jucuarãi ete, peecha oo rami —jei reta.

Uiparavo reta ñru vae Judas ipépica pe

¹² Jayave temimondo reta yugüeru ye Jerusalén pe ivitu guasu Olivos jee vae güi. Jocua ivitu guasu coiño oĩ Jerusalén güi. Judío reta iporoyocui umañeo uguata vaerã joco pe Jerusalén güi mbutuu ara pe. ¹³ Yugüeru uvãe yave, uique reta penti tenta pe, jare uyupi o ivate vae pe. Joco pe yugüireco Pedro, Jacobo, Juan, Andrés, Felipe, Tomás, Bartolomé, Mateo, Alfeo tai Jacobo jee vae, Simón Zelote jare Jacobo tiví Judas jee vae. ¹⁴ Opaete cua reta, jare Jesús ichi María jare ñru cuña reta, jare Jesús tiví reta jecuae uyurure penti ramiño.

¹⁵ Upurugüirovia vae joco pe ñugüinoi vae reta ciento veinte rupi. Jare penti ara Pedro uyemboi ipite pe jare jei:

¹⁶ —Cherivi reta, jupi co uyeyapo vaerã David aracae uicutatía Judas re vae. Espíritu Santo etei cua umimbeu yandeve David rupi. Judas güiraa cuimbae reta Jesús oĩ vae pe uipisica vaerã —jei—. ¹⁷ Jae icose yande ndive, jare uyeparavo co uyapo vaerã cua mbaraviqui —jei—. ¹⁸ Jae uipisi corepoti icavi mbae vae uyapo vae re. Jayave corepoti pe ogua penti ivi. Joco pe oo ivate güi, jare jie osoro, jare opaete ichuri uyecuavo —jei Pedro—. ¹⁹ Cua jerãcua opaete Jerusalén pegua reta pe. Jáeramo jocua ivi jee Acéldama jae reta iñee pe —jei—. (Acéldama uipota jei: “Ivi tugüi jepicue”.) ²⁰ Echa'ã uyecuatía oĩ Tumpa iñee pe Salmo reta pe cuarã:

‘Tuyeyapo ivi ipo mbae ico vae,
jare agüiye quía tuico pípe.’

Jare:

‘Ñru vae tuyapo chugüi iparaviqui.’

Jucuarãi uyecuatía oĩ —jei chupe reta—. ²¹⁻²² Ime cua pe ñugüinoi cua cuimbae reta. Jae reta yugüireco yande ndive, yandeYa Jesús ico yande ndive rambueve. Echa'ã yugüireco yande ndive Juan umbibautiza Jesús güiye Jesús yandepite güi oo regua —jei Pedro—. Jáeramo icavi co cua cuimbae reta güi penti yaiparavo vaerã. Jae umimbeuta ñru vae reta pe yande ndive Jesús icove ye co ou umanocue vae reta ipite güi —jei chupe reta. ²³ Jayave uiparavo reta mocui cuimbae. Pentí jee co José Barsabás - jae co uyembijee Justo pe vae. Ñru cuimbae jee co Matías. ²⁴ Jayave uyerure reta Tumpa pe cuarã:

—OreYa, nde ndicuaa opaete vae ipia. Eechaca oreve quía nunga ra ndiparavo ma cua mocui cuimbae güi, ²⁵ jae ombori vaerã cua mbaraviqui pe, jare ico vaerã nderemimondorã. Judas opia cua mbaraviqui güi, icavi mbae vae uyapo ramo, jare oo ma jendarã jae uiparavo vae pe —jei reta Tumpa pe.

²⁶ Jayave uyuguari reta jee re, uicuaa vaerã quía nunga ra Tumpa uiparavo ma. Jare uiparavo Matías, jare jae uyeyapo Jesús jemimondorã ñru once reta ndive.

2

Espíritu Santo ou

¹ Pentecostés ara pe opaete upurugüirovia vae reta penti ramiño uyembati. ² Jare aramoño ou ara güi jiapu vae penti ivitu tanta uyepeyu vae rami. Tanta jiapu uguapi ñugüinoi vae pe. ³ Jayave uyecuaa chupe reta tataendi rami. Cua uyecuaa penti penti iyapite re. ⁴ Jayave opaete joco pe ñugüinoi vae reta tinee Espiritu Santo pe, jare umbipi uyemingueta reta ambie vae ñee Espiritu Santo umee chupe reta uyemingueta vaerã vae pe.

⁵ Jare jocua ara reta pe yugüireco Jerusalén pe jeta judío ambiembie ivi güi yugüeru vae reta. Cua reta umbiadora Tumpa. ⁶ Jare cua jiapu vae uyendu yave, uyembati jeta vae, jare opaete vae ipiacañi. Echa'ã upurugüirovia vae reta uyemingueta ñugüinoi, jare penti penti yati vae reta uyandu ñeei pe jei vae. ⁷ Ipiacañi reve jei reta:

—¡Mase, Galilea pegua reta co opaete cua uyemingueta vae reta! ⁸ ¿Quirã ra yayandu uyemingueta ñaniñee ñanemichi güive yayemingueta pipe vae pe? —jei reta—. ⁹ Yande co jae Parto pegua, Medo, Elam, Mesopotamia, Judea, Capadocia, Ponto, Asia, ¹⁰⁻¹¹ Frigia, Panfilia jare Egipto pegua, jare Africa pegua Cirene iyipi pe yaico vae, jare romano reta cua pe yaico vae, Creta jare Arabia pegua. Yande co jae judío reta jare judiorã yayeyapo vae reta. Opaete yayandu ñaniñee pe uyemingueta ñugüinoi miacañi Tumpa uyapo vae re —jei reta.

¹² Jare opaete yati vae reta ipiacañi jare jei uyupe:

—¿Mbae ra co cua?

¹³ Ñru vae reta oyoyai.

—Usavipo ñugüinoi —jei reta.

Pedro umimbeu yati vae reta pe

¹⁴ Jayave Pedro uyemboi jocua ñru once Jesús jemimondo reta ndive, jare jei yati vae reta pe ñeeãta reve:

—Cuimbae Judea pegua reta, jare opaete pico Jerusalén pe vae. Cua regua pipota picuaa yave, piyapisaca chiñee re —jei—. ¹⁵ Pe reta pepia pe piyemingueta tẽi cua reta usavipo ñugüinoi. Ërei jucuarã'ã co. Echa'ã neimboveño co —jei—. ¹⁶ Tumpa ñee aracae umimbeu vae Joel imiari cua re. Jae jei cuarãi:

¹⁷ 'Jare ara taicuegua reta pe' —jei Tumpa— 'ameeta cheEspiritu opaete vae pe.

Jare perai reta jare perayi reta umimbeuta chiñee.

Jare cunumi reta jare indechi vae reta upauta.

¹⁸ Jare jocua ara reta pe ameeta cheEspiritu cuimbae reta jare cuña reta uyeyocui cheve vae pe,

jare umimbeuta reta chiñee.

¹⁹ Jare tambou miacañi reta ara re jare ivi pe.

Imeta tugüi, tata jare tatãti.

²⁰ Guarasi uñemipitumimbita, jare yasi uyeyapota tugüi rami,

ndei peYa ivãe ara ou mbove.

Jocua ara opaete vae ipiacañita co.

²¹ Jare opaete uyerureta peYa pe ombori vaerã vae reta uyembiasacata co' —jei.

Jucuarãi jei Joel —jei Pedro chupe reta.

²² Pedro jei vi chupe reta:

—Cuimbae Israel pegua reta, piyapisaca cua re. Tumpa uyapoca pepite pe miacañi reta Jesús Nazaret pegua pe. Jucuarãi Tumpa uechaca peve Jesús añete vae co. Cua picuaa catu co pe reta —jei—. ²³ Cua Jesús uñemee umano vaerã, Tumpa jei vae uyeyapo vaerã. Tumpa uicuaa opaete ndei uyeyapo mbove. Ërei pe reta pipisi picutuca curusu re cuimbae jeco pochi vae reta pe piyucaca —jei—. ²⁴ Ërei Tumpa oyora mano yandepisi pipe vae güi, jare umbijecove ye güeru umanocue vae reta ipite güi. Echa'ã mano ipuere'ã etei oyopia Jesús —jei Pedro—. ²⁵ Echa'ã David jei Jesús re cuarãi:

'Aecha cheYa jecuaeño cherovai.

Cheacata pe oi ramo, ndarau aquiye.

²⁶ Jáeramo ayerovia chepia pe,

jare chemiari ayecou reve.

Aicota co aãro reve.

²⁷ Echa'ã ndeeyata'ã cherecove umanocue vae reta ñugüinoi vae pe.

Che co jae jupí vae.

Nemaefnota'ã cheretecue re icumegua vaerã.

²⁸ Ndicuaaca cheve quirāi aico vaerā ayerovia reve, jare ayerovia eteta vi nde ndive aī yave.
Jucuarāi jei David —jei chupe reta—.

²⁹ Cherivi reta, chepuere chemiari peve yandetenondegua David re. Jae umano jare uñeñotica, jare iñeñotica renda imeño oī yande ndive —jei Pedro—. ³⁰ Ērei Tumpa jei jee re David pe umbiguapita co David iguapia pe David iñemoñaa reta güi penti oporoyocui vaerā. Jocua co jae Cristo, Tumpa ombou vae. Opaete cua David uicuaa. Echa'ā David Tumpa iñee aracaе umimbeu vae ico ramo, ³¹ uicuaa ndei uyeyapo mbove, jare imiari Cristo icove yeta ou umanocue vae reta ipite güi vae re. Echa'ā jei Cristo re uyeeyata'ā co jecove umanocue vae reta ñugüinoi vae pe, jare icumeguata'ā co jetecue —jei—. ³² Tumpa umbijecove ye cua Jesús güeru umanocue vae reta ipite güi, jare ore opareve cua numimbeu ĩru vae reta pe —jei—. ³³ Tumpa güiraa ma ara pe imbaepuere pe, jare umee chupe jocua jei umeeta chupe Espiritu Santo vae. Jáeramo Jesús etei ombou cua peecha jare piyandu vae —jei Pedro chupe reta—. ³⁴ Echa'ā David uyupi'ā ara pe. Ērei jae etei jei cuarāi:

YandeYa jei cheYa pe:

Eguapi cheyipipe pe cheacata coti,

³⁵ nderovaicho reta opa amiamiri regua' —jei.

Jucuarāi jei David —jei Pedro chupe reta—.

³⁶ Pe reta co jae Israel pegua reta. Jáeramo picuaa catu cua. Pe reta picutuca Jesús, ěrei Tumpa uyapo ma yandeYarā - jae co Cristo —jei Pedro.

³⁷ Cua uyandu reta yave, tuicha rupi ipiatiti reta, jare upirandu Pedro jare ĩru Jesús jemimondo reta pe:

—Oreriquei reta, ¿mbae pa nduyapota?

³⁸ Jayave Pedro jei chupe reta:

—Peeya piyemingueta icavi mbae vae pepia pe oī vae, jare piyembibautizaca Jesucristo jee re, Tumpa umbiasa vaerā peve pemaeyoa reta. Jare jae umeeta peve Espiritu Santo —jei—. ³⁹ Echa'ā cua Tumpa jei umeeta vae co jae pemaerā, perai reta peguarā, opaete mbiri ñugüinoi vae reta peguarā jare opaete yandeYa Tumpa uenita vae reta peguarā —jei.

⁴⁰ Jare Pedro umbiaracuaa jeta ye ye. Jei chupe reta:

—Añave yugüireco vae reta icavi mbae vae uyapo. Piyembiasaca pe reta cua reta güi —jei.

⁴¹ Jayave Pedro jei vae güirovia vae reta uyembibautizaca, jare jocua ara tres mil rupi uñemiñru upurugüirovia vae reta ndive. ⁴² Jare jecuae upurugüirovia vae reta uyembie Jesús jemimondo reta iporombie re, jare opaete penti ramiño ñugüinoi. Jecuae uyembati, umbiyao tembü uyupe, jare uyerure Tumpa pe.

Upurugüirovia vae reta uyapo vae

⁴³ Jare opaete tenta guasu pegua reta ipiacañi, jare Jesús jemimondo reta uyapo jeta miacañi reta. ⁴⁴ Jare opaete upurugüirovia vae reta uyembati, jare opaete imbaembae reta penti ramiño co. ⁴⁵ Jare umee imbaembae reta, jare umbiyao jepicue mbaeti mbae güinoi vae reta pe. ⁴⁶ Jare opa ara yugüiraa päve uyembati Tumpa jo pe. Jare tenta tenta rupi umbiyao tembü uyupe jare ucaru päve reta uyerovia jare ipiacatu reve. ⁴⁷ Jae reta umbiadora Tumpa, jare opaete tenta guasu pegua reta umaе cavi jese reta. Jare opa ara yandeYa umĩru jae reta ndive uyembiasaca vae reta.

3

Uguata mbae vae ucuera

¹ Pedro jare Juan yugüiraa päve Tumpa jo pe, Tumpa pe uyerure vaerā, mbapi ora ma caaru yave. ² Jare ĩru vae reta güeru opa ara rupi penti cuimbae ipuere mbae uguata vae oñono Tumpa jo jonque pe. Cua onque jee co ipōra vae. Cuimbae ichi güi oa güive ipuere'ā etei uguata. Jocua onque pe cuimbae uyerure corepoti re Tumpa jo pe uique vae reta pe. ³ Cuimbae uecha Pedro jare Juan ndei uique Tumpa jo pe mbove, jare uyerure corepoti re chupe reta. ⁴ Jayave Pedro jare Juan umaе ngatu jese, jare Pedro jei:

—Emaе oreré.

⁵ Jayave cuimbae umaе ngatu jese reta, umeeta echa mbae chupe ramo. ⁶ Ērei Pedro jei: —Mbaeti anoi corepoti jare oro. Ērei anoi vae tamee ndeve. Jesucristo Nazaret pegua jee re epña jare uguata —jei chupe.

⁷ Jayave Pedro uipisi cuimbae ipo iyacata pe umupña. Jare jupivoiño ipirāta cuimbae ipi jare ipiñña. ⁸ Jare cuimbae uyemboi voi. Jayave uguata jare uique jae reta ndive Tumpa jo pe. Uguata jare upiririquiriqui oo, jare umbiadora Tumpa. ⁹ Jare opaete tenta guasu pegua reta uecha uguata jare umbiadora Tumpa. ¹⁰ Uicuaa reta jae co uguapise Tumpa jo

jonque ipõra vae pe uyerure corepoti re vae. Jare ipiacañi reta. Uquiye reta vi cua uyeyapo cuimbae pe vae re.

Pedro umimbeu yati vae reta pe oca Salomón jee vae pe

¹¹ Cuimbae ucuera ma vae uyepisi Pedro jare Juan re. Jare opaete tenta guasu pegua reta osi uyembati ipiacañi reve jae reta ñugüinoi vae pe oca Salomón jee vae pe. ¹² Jayave Pedro uecha yave, jei tenta guasu pegua reta pe:

—Cuimbae Israel pegua reta, ¿maera pa pepiacañi cua re? ¿Maera pa pemae ngatu oreré? ¿Pepia pe piyemingueta pa oreiño nduyapo uguata vaerã cua cuimbae orembaepuere rupi ani jupi vae nduyapo ramo? Jucuarã'ã co —jei—. ¹³ Abraham, Isaac, Jacob jare yandetenondegua reta iTumpa umbiadoraca ma Jesús - jae co Tumpa Tai. Cua Jesús pe reta pemee, jare periro Pilato jovai. Echa'ã Pilato jei tẽi oyoraca vaerã —jei—. ¹⁴ Èrei pe reta periro cua Jesús - jae co iyoa mbae vae jare jupi vae - jare piyerure Pilato pe oyoraca vaerã peve penti upuryuca vae —jei Pedro—. ¹⁵ Jare piyucaca jocua tecove umee yandevae vae. Jae co Tumpa umbijecove ye gëru umanocue vae reta ipite güi. Jocua co ore numimbeu nduico —jei—. ¹⁶ Mburugüirovia Jesús jee re vae jeco pegua, jae jee umbigüera cua cuimbae pe reta peecha jare picuaa vae. Añete co, jocua mburugüirovia Jesús umee vae umbigüera cavi ete cua cuimbae opaete pe reta perovaque —jei chupe reta—.

¹⁷ Añave, cherivi reta, acuaa peruvicha reta jare pe reta vi piyapo cua icavi mbae vae, picuaa'ã ramo —jei—. ¹⁸ Èrei jucuarãi uyapo Tumpa, opaete iñee aracae umimbeu vae reta jei rami. Echa'ã jei reta Cristo uiporarañotai co —jei—. ¹⁹ Jayave peeya piyemingueta icavi mbae vae pepia pe oĩ vae jare piyero va Tumpa coti, pembaeyoa reta uyembai vaerã, jare ou vaerã yandeYa güi ara mbiacatu pegua reta, ²⁰ jare Tumpa ombou ye vaerã Jesucristo tenonde yave jerãcua peve vae —jei—. ²¹ Jae upitata ara pe opaete mbaembae uyeyapicatu cavi regua. Jocua mbaembae re Tumpa imiari oñono tee iñee umimbeu vaerã vae reta rupi aracae güive —jei Pedro chupe reta—. ²² Echa'ã Moisés jei yandetenondegua reta pe: 'YandeYa Tumpa ombouta peve iñee umimbeuta vae perivi reta ipite güi, chembou rami. Piyapisacata jese opaete jeita peve vae re. ²³ Jare ime yave quía uyapisacata'ã jocua Tumpa iñee umimbeuta vae re vae, Tumpa omombota co ñru vae reta ipite güi' —jei, jei Pedro—.

²⁴ Jare jucuarãi vi jei opaete Tumpa iñee aracae umimbeu vae reta Samuel güive. Opaete penti rami umierãcua cua ara reta —jei—. ²⁵ Pe reta co jae Tumpa iñee aracae umimbeu vae reta iñemoñaeta, jare petenondegua reta pe Tumpa jei vae uyeyapota peve. Echa'ã Tumpa jei Abraham pe: 'Niñemoñaeta rupi ayapota co icavi vae opaete ivi pegua reta pe' —jei, jei Pedro—. ²⁶ Tumpa umbijecove ye Tai güeru umanocue vae reta ipite güi, jare ombou ma peve tenonde ete, uyapo vaerã icavi vae peve, penti penti piyero va vaerã Tumpa coti pereco icavi mbae vae güi —jei Pedro chupe reta.

4

Pedro jare Juan mburuvicha reta jovai

¹ Pedro jare Juan imiari ñugüinoi rambueve tenta guasu pegua reta pe, yugüeru sacerdote reta, Tumpa jo iyandarecoa reta juvicha jare saduceo reta. ² Jae reta pochi Jesús jemimondo reta pe. Echa'ã Jesús jemimondo reta omboe tenta guasu pegua reta, jare umimbeu chupe reta Jesús icove ye co ou umanocue vae reta ipite güi. ³ Jayave jae reta uipisi Pedro jare Juan, jare oñono peresoriru pe piareve regua. Echa'ã cauru ma co. ⁴ Èrei jeta ete Tumpa iñee uyandu vae reta güirovia. Cuimbae reta güirovia vae cinco mil rupi.

⁵ Piareve pe uyembati Jerusalén pe mburuvicha reta, tenta guasu pegua reta itenondegua reta, mboroyocui re oporombocue vae reta, ⁶ Anás - jae co sacerdote tenondegua - Caifás, Juan, Alejandro jare opaete sacerdote tenondegua jentarã reta. ⁷ Jayave güeruruca Pedro jare Juan jae reta ipite pe, jare upirandu chupe reta:

—¿Mbae nunga mbaepuere pe pa piyapo cua? Jare ¿quía jee re pa piyapo?

⁸ Jayave Pedro tinee Espiritu Santo pe, jare jei chupe reta:

—Mburuvicha tenta guasu pegua reta jare tenondegua Israel pegua reta, ⁹ añave pepirandu peĩ oreve cua icavi vae uyeyapo vae re. Pipota picuaa quirã ra cua cuimbae ucuera ma imbaerasi güi —jei Pedro—. ¹⁰ Picuaa catu opaete pe reta, jare tuicuaa opaete Israel pegua reta, Jesucristo Nazaret pegua jee re ucuera ma cua cuimbae perovaque oĩ vae. Pe reta picutuca curusu re cua Jesucristo, èrei Tumpa umbijecove ye güeru umanocue vae reta ipite güi —jei—. ¹¹ Cua Jesús pe reta periro, tenta ita pegua iyapoa reta penti ita güiriro rami. Èrei jae uyeyapo ma ita uñeño tenonde tentarã vae rami —jei—. ¹² Jare mbaeti ye quía re yandepuere yayembiasaca. Echa'ã uñeme'e'ã ivi pegua reta pe ñru tee, jese uyembiasaca vaerã —jei chupe reta.

¹³ Jayave yati vae reta uecha quirāi Pedro jare Juan uquiye mbae reve imiari, yepe tēi mocui reve jeta'ā uyemboe. Jáeramo ipiacāni reta jese. Jare uicuaa Jesús ndive yugüirecose vae. ¹⁴ Ērei uecha reta yave cuimbae ucuera vae uyemboi oī jae reta ndive, ipuere'ā jei mbae Jesús jemimondo reta coti. ¹⁵ Jayave oyocui Pedro jare Juan oē rani vaerā ipite güi. Jayave uyemingueta reta.

¹⁶ —¿Mbae ra yayapota cua cuimbae reta pe? Echa'ā opaete Jerusalén pegua reta uicuaa penti miacañi tuicha vae uyapo reta co, jare yande yandepuere'ā yaicuacu —jei reta—. ¹⁷ Jayave yayocui cua reta agüiye vaerā añave güiye imiari quía pe cua cuimbae jee re, agüiye vaerā ĩru vae reta uicuaa —jei reta.

¹⁸ Jayave ueni Pedro jare Juan, jare oyocui:

—Agüiye ye pemiari ani peporomboe Jesús jee re.

¹⁹ Ērei Pedro jare Juan jei chupe reta:

—¿Mbae ra Tumpa uipota nduyapo vaerā? Nduyapo yave peporoyocui, ndarau nduyapo Tumpa iporoyocui. ¿Mbae nunga mboroyocui ra nduyapota? Pe reta pemimbeu oreve. ²⁰ Echa'ā ore numimbeuñotai co nduecha jare nduyandu vae —jei reta.

²¹ Jayave yati vae reta uminguiye tēi omondo Pedro jare Juan. Uinupaca'ā, tenta guasu pegua reta güi uquiye ramo. Echa'ā opaete tenta guasu pegua reta umbiadora Tumpa jocua uyeyapo vae jeco pegua. ²² Echa'ā cuimbae miacañi pe ucuera vae cuarenta año uasa ma güinoi.

Upurugüirovia vae reta uyerure Tumpa pe umiatangātu vaerā

²³ Jare Pedro jare Juan omoē ma yave, yugüiraa ĩru reta pe, jare umimbeu chupe reta opaete sacerdotē reta itenondegua reta jare tenta guasu pegua reta itenondegua reta jei chupe reta vae. ²⁴ Jae reta cua uyandu yave, uyerure Tumpa pe:

—OreYa Tumpa, nde co jae ara, ivi, i guasu jare opaete mbaembae ñugüinoi pipe vae iyapoa —jei reta—. ²⁵ Nde ndere nderembicui David jee vae rupi cuarāi:

¿Maera pa pochi judío mbae vae reta?

¿Maera pa ivi pegua reta ipia pe uyemingueta uyapo vaerā icavi mbae vae?

²⁶ Mburuvicha guasu ivi pegua reta

jare ivi pegua reta itenondegua reta uyembati penti rami

yandeYa jare Cristo jovaicho retarā.

Jucuarāi nde ndere David rupi —jei reta—.

²⁷ Añete co, Herodes, Poncio Pilato, judío mbae vae reta jare Israel pegua reta uyembati cua tenta guasu pe Jesús jovaicho retarā. Jesús co jae ndeRai. Jae co jupi vae nde ndiparavo vae —jei reta—. ²⁸ Uyembati reta uyapo vaerā nde ndiyapoca vae. Aracae güiye nde ndipota uyapo reta vaerā —jei reta Tumpa pe—. ²⁹ Añave, oreYa, ndicuaa oreminguiye tēi vae reta jei vae. Jáeramo orembori numimbeu vaerā niñee nduquiye mbae reve. Echa'ā ore co nderembicui. ³⁰ Jare eechaca nempaepuere ndepurumbigüera vaerā, jare iyapo vi miacañi reta Jesús jee re. Jae co ndeRai jupi vae —jei reta.

³¹ Jare opa uyerure yave, yati ñugüinoi vae pe ivicāta vae echa. Jare opaete jae reta tinee Espiritu Santo pe, jare imiari Tumpa iñee re uquiye mbae reve.

Upurugüirovia vae reta uyembori

³² Jare opaete upurugüirovia vae reta penti ramiño ñugüinoi. Mbaeti penti ave jei imbaembae re: “Jocua co chembae.” Echa'ā opaete imbaembae reta penti ramiño. ³³ Jare mbaepuere tuicha vae reve Jesús jemimondo reta umimbeu yandeYa Jesús icove ye co ou umanocue vae reta ipite güi. Jare opaete jae reta ipiacavi ete. ³⁴ Mbaeti penti ave mbae uata chupe vae jae reta ipite pe. Echa'ā opaete ivi reta jare tenta reta güinoi vae reta umee, jare güeru jepicue, ³⁵ jare oñono Jesús jemimondo reta jovai. Jayave umbiyao reta uata chupe vae reta pe. ³⁶⁻³⁷ Jare penti levita ivi Chipre pegua José jee vae güinoi vi penti ivi. Jesús jemimondo reta umbijee cua cuimbae Bernabé. (Cua tee uipota jei: “Upurumbipiacatu vae.”) Jae umee ivi jare güeru jepicue oñono Jesús jemimondo reta jovai.

5

Ananías jare Safira

¹ Ērei ĩru cuimbae Ananías jee vae jembireco Safira jee vae ndive umee penti ivi. ² Jayave Ananías uñuvatu iyupe mbovi ivi jepicue güi jembireco uicuaa reve, jare güeru mboviño oñono Jesús jemimondo reta jovai. ³ Jayave Pedro jei chupe:

—Ananías, ¿maera pa nemaño Satanás re umitinee vaerā ndepia icavi mbae vae pe? Niñuvatu ndiyupe mbovi ndeivi jepicue güi. Ndapu ma co Espiritu Santo pe —jei—. ⁴ Ndei neme ndeivi mbove, nembae co. Jare neme ma yave, jepicue vi nembae co. ¿Maera pa

ndepia pe ndiyemingueta icavi mbae vae ndiyapo vaerã? Ndapu'ã co cuimbae reta peño. Ndapu Tumpa pe etei —jei Pedro Ananías pe.

⁵ Cua uyandu yave, Ananías oa ivi re, jare umano. Jare opaete cua regua uicuaa vae reta uquiye ete. ⁶ Jayave upúa cuimbae tairusu vae reta, jare oñoma umanocue, jare güiraa oñoti.

⁷ Mbapi ora ma uasa yave, uique jembireco. Jae uicuaa'ã mbae uyeypa vae. ⁸ Jayave Pedro upirandu chupe:

—Emimbeu cheve, ¿pemeé pa peivi cuarãi pe?

Cuña jei chupe:

—Añete, jucuarãi pe co —jei.

⁹ —¿Maera pa pe reta piyemboemboe pemiavai vaerã yandeYa iEspíritu? —jei Pedro chupe—. Co onque pe ma yugüeru neme iñotia reta. Jae reta ndereraata vi —jei.

¹⁰ Jare jupivoiño Safira oa Pedro jovai, jare umano. Uique ma yave cuimbae tairusu vae reta, uecha umano ma. Jayave güiraa oñoti imecúe iyipi pe. ¹¹ Jare upurugüirovia vae reta jare opaete cua mbaembae regua uicuaa vae reta uquiye ete.

Jeta miacañi reta

¹² Jare uyeypa jeta miacañi reta tenta guasu pegua reta ipite pe Jesús jemimondo reta rupi. Jare opaete upurugüirovia vae reta uyembati oca Salomón jee vae pe. ¹³ Jare opaete ñru vae reta uquiye uyembati vaerã jae reta ndive. Ërei tenta guasu pegua reta uipiu. ¹⁴ Jare jecuaeño jeta ñru cuimbae reta jare cuña reta güirovia yandeYa re. ¹⁵ Jare tenta guasu pegua reta güiraa imbaerasi vae reta oñono calle reta rupi jupa reve. Cua uyapo reta Pedro iguarasía yepe oñ vaerã amocue vae re, jae uasa oo oñ yave. ¹⁶ Jare jeta vae yugüeru Jerusalén pe ñru tenta guasu coiño Jerusalén güi ñugüinoi vae reta güi, jare güeru imbaerasi vae reta jare aña oya jese vae reta. Jare opareve ucuera.

Mburuvicha reta uyapo icavi mbae vae Pedro jare Juan pe

¹⁷ Jayave sacerdote tenondegua jare opaete saduceo jae ndive ñugüinoi vae reta ñacatãa Jesús jemimondo reta re. ¹⁸ Jáeramo uipisi reta, jare oñono peresoriru tenta guasu pegua pe.

¹⁹ Ërei pítu yave penti ángel yandeYa pe uyeyocui vae uipea peresoriru jonque reta. Jayave güiraa Pedro jare Juan oca pe, jare jei chupe reta:

²⁰ —Pecua piyemboi Tumpa jo pe pemimbeu tenta guasu pegua reta pe cua tecove ipiau vae regua.

²¹ Cua uyandu yave, Pedro jare Juan uique Tumpa jo pe neimbove asi jare oporombocue.

Cua uyeypa rambueve, sacerdote tenondegua jare jae ndive ñugüinoi vae reta ueni opaete mburuvicha reta jare tenondegua Israel pegua reta. Jayave jae reta omondo sacerdote tenondegua jembiocui reta peresoriru pe, jae reta güeru vaerã tēi Jesús jemimondo reta. ²² Ërei uyeyocui vae reta yugüiraa uvãe yave, uvãe'ã Jesús jemimondo reta peresoriru pe. Jayave yugüeru ye yave, jei reta yati vae reta pe:

²³ —Nduecha peresoriru jonque reta uyeyuquenda cavi oñ, jare jároa reta uyemboi ñugüinoi onque reta rupi. Ërei nduipea yave, nuvãe'ã quía japipe pe —jei reta.

²⁴ Cua uyandu yave, sacerdote tenondegua, Tumpa jo iyandarecoa reta juvicha jare sacerdote reta itenondegua reta ipiacañi. Jare uicuaa'ã mbae ra uyeypota. ²⁵ Jayave ou penti vae, jare jei chupe reta:

—Cuimbae piñono peresoriru pe vae reta ime Tumpa jo pe ñugüinoi, jare omboe ñugüinoi tenta guasu pegua reta —jei.

²⁶ Jayave Tumpa jo iyandarecoa reta juvicha oo sacerdote tenondegua jembiocui reta ndive, jare güeru cavi Jesús jemimondo reta uinupa mbae reve. Echa'ã uquiye reta tenta guasu pegua reta güi. Ipia pe uyemingueta aramoi uyapita reta ita pe. ²⁷ Jare güeru yave, oñono mburuvicha reta jovai. Jayave sacerdote tenondegua jei Jesús jemimondo reta pe:

²⁸ —Poyocui tēi ma agüiye ye vaerã peporombocue jocua cuimbae jee re. Echa'ã pemimbeu ma opaete Jerusalén pegua reta pe cua morombocue. Jare pipota pemboya jocua cuimbae imano oreré —jei reta.

²⁹ Jayave Pedro jare ñru Jesús jemimondo reta jei chupe reta:

—Icavi ete co nduyapo vaerã Tumpa iporoyocui, cuimbae reta iporoyocui güi.

³⁰ Yandetenondegua reta iTumpa umbijecove ye Jesús güeru umanocue vae reta ipite güi. Pe reta picutuca curusu re cua Jesús piyucaca —jei—. ³¹ Imbaepuere pe Tumpa uyapo ma cua Jesús tenondegua vae jare upurumbiasa vae, Israel pegua reta ueya vaerã iyemingueta icavi mbae vae ipia pe oñ vae, jare Tumpa umbiasa vaerã chupe reta imbaeyota. ³² Jare ore numimbeu ñru vae reta pe cua, jare Espíritu Santo vi umimbeu. Echa'ã Tumpa umee Espíritu Santo jei vae uyapo vae reta pe —jei reta.

³³ Cua uyandu yave, yati vae reta pochi chupe reta, jare uipota tēi uyuca. ³⁴ Ërei upúa penti fariseo Gamaliel jee vae yati vae reta ipite pe. Jae co penti mboroyocui re oporombocue

vae, jare opaete tenta guasu pegua reta uipiu. Jae oyocui omondo reta rani vaerã michi pegua Jesús jemimondo reta oca pe. ³⁵ Jayave jae jei yati vae reta pe:

—Cuimbae Israel pegua reta, pepia pe piyemingueta cavi mbae piyapota cua cuimbae reta pe vae re. ³⁶ Echa'ã caramboe yave uyecuaa Teudas jee vae, jare uyereroviaca İru vae reta pe. Jare jeta cuimbae reta, aramoı cuatrocientos, uyembati jae ndive. Ęrei jae uyeyucaca, jare opaete jae ndive ñugüinoi vae reta opa uñemiai, jare ipuere'ã ma mbae uyapo. ³⁷ Jaicue rupi, mburuvicha reta upurupapa ñugüinoi yave, uyecuaa Galilea pegua Judas jee vae. Jae umbati jeta tenta guasu pegua reta. Ęrei jae vi umano, jare opaete jae ndive ñugüinoi vae reta opa uñemiai —jei Gamaliel chupe reta—. ³⁸ Jáeramo añave che jae peve cua: Agüiye ma piyapo mbae cua cuimbae reta pe, jare pemaño ma jese reta. Echa'ã imbaepuere peño yave jucuarãi imiari reta jare cua mbaembae uyapo reta, ndarau mbae uyapo reta —jei—. ³⁹ Ęrei cua Tumpa güi ou yave, ndarau pepuere pembai. Echa'ã aramoı piyovaichota Tumpa ndive —jei chupe reta.

⁴⁰ Jare cua Gamaliel jei vae icavi chupe reta. Jayave ueni reta Jesús jemimondo reta, jare uinupa. Jayave oyocui reta agüiye vaerã ma imiari ye Jesús jee re, jare omondo. ⁴¹ Jayave Jesús jemimondo reta oë yati vae reta ñugüinoi vae güi. Uyerovia reta, Jesús umaño uiporara reta ramo. Echa'ã uñereriroca reta, Jesús re güirovia ramo. ⁴² Jare opa ara jecuae oporomboe reta Tumpa jo pe jare tenta reta rupi. Umimbeu İru vae reta pe Jesucristo regua.

6

Siete cuimbae reta uyeparavoca

¹ Jocua ara reta pe İru vae reta upurugüirovia jare uñemiİru ñugüinoi upurugüirovia vae reta ndive yave, griego pe uyemingueta vae reta iñeenguru hebreo pe uyemingueta vae reta coti. Echa'ã uyandareco'ã reta ime umano vae reta griego iñee pe uyemingueta vae re, opa ara rupi mbae uñemee yave. ² Jayave jocua doce Jesús jemimondo reta umbati upurugüirovia vae reta, jare jei chupe reta:

—Icavi ore ndoo numimbeu vaerã Tumpa iñee, cua reta numingarua vaerãve. ³ Jáeramo piparavo pepite güi, orerivi reta, siete cuimbae jerãcua cavi jese vae reta, tinee Espıritu Santo pe jare iyarcuaa catu vae reta. Jae reta uyapota yandave cua mbaravıqui —jei reta—. ⁴ Ęrei ore jecuae nduyereeta Tumpa pe jare numimbeuta Tumpa iñee —jei reta.

⁵ Cua jei vae icavi opareve pe, jare uiparavo reta Esteban - jae co penti cuimbae upurugüirovia cavi jare tinee Espıritu Santo pe vae - Felipe, Prócoro, Nicanor, Timón, Parmenas jare Nicolás - jae co tenta guasu Antioquia pegua judior'ã uyeyapo vae. ⁶ Jayave güeru reta cua uiparavo vae reta Jesús jemimondo reta jovai. Jayave Jesús jemimondo reta uyerure Tumpa pe, jare oñoño ipo jese reta.

⁷ Jare Tumpa iñee jecuae uñemiai. Jeta vae upurugüirovia Jerusalén pe jare uñemiİru upurugüirovia vae reta ndive, jare jeta sacerdote reta vi upurugüirovia.

Uipisi reta Esteban

⁸ Jare Esteban ipiacavi ete, jare mbaepuere reve uyapo miacañi tuicha vae reta tenta guasu pegua reta ipite pe. ⁹ Jare yugüeru amocue cuimbae judıo reta itupao pegua reta uyeaca Esteban ndive. Jocua judıo reta itupao jee Esclavos Libertados. Cua tupao pegua reta yugüeru tenta guasu reta Cirene jare Alejandrıa, jare İvi reta Cilicia jare Asia güi. ¹⁰ Ęrei jae reta ipuere'ã umiamiri Esteban. Echa'ã Esteban imiari iyarcuaa catu reve Espıritu Santo rupi. ¹¹ Jayave jae reta omboemboe İru cuimbae reta iyapu vaerã Esteban re.

—Nduyandu jei ñee icavi mbae vae Moisés jare Tumpa coti —jei reta.

¹² Jucuarãi jae reta umbiarásica tenta guasu pegua reta, tenta guasu pegua reta itenondegua reta, jare mboroyocui re oporomboe vae reta. Jayave cua reta yugüeru uipisi Esteban, jare güiraa mburuvicha reta uyembati vae pe. ¹³ Joco pe jae reta güeru iyapu reve uñeapo jese vae reta. Cua reta jei:

—Cua cuimbae jecuañoi jei ñee icavi mbae vae Tumpa jo re jare mboroyocui re.

¹⁴ Echa'ã nduyandu jei jocua Jesús Nazaret pegua umbaita cua Tumpa jo, jare ueyacata yandave moromboe Moisés umee yandave vae reta —jei reta.

¹⁵ Jayave opaete joco pe uguapi ñugüinoi vae reta umae ngatu Esteban re, jare jova penti ángel jova echa chupe reta.

7

Esteban imiari

¹ Jayave sacerdote tenondegua upırandu Esteban pe:

—¿Añete pa jucuarãi?

² Jayave Esteban jei joco pe ñugüinoi vae reta pe:

—Cheriquei reta, tenta guasu pegua reta itenondegua reta, piyapisaca cheré. Tumpa yemiadora pegua uyecuaa yandetenondegua Abraham pe, Mesopotamia pe ico yave, ndei oo ico Harán pe mbove —jei—. ³Jare jei chupe: ‘Ecuá ndeivi güi jare eeya nerentarã reta, jare ecua jocua ivi aechacata ndeve vae pe’ —jei, jei—. ⁴Jayave Abraham oo Caldeo reta ivi güi, jare ico Harán pe. Jare tu umano yave, Tumpa ombou joco güi cua ivi añave pico pipe vae pe —jei—. ⁵Èrei Tumpa umee’ã Abraham pe iivirã cua pe, umee’ã ipi jendarã yepe. Èrei jei umeeta co chupe jare iñemoñaá reta pe iivirã, yepe tẽi Abraham ndei tai —jei chupe reta—. ⁶Jare Tumpa umimbeu chupe: ‘Niñemoñaá reta yugüirecota Ìru vae reta ivi pe, jare jocua ivi pegua reta uyapota jembicui retarã, jare uyapota icavi mbae vae chupe reta cuatrocientos año pegua. ⁷Èrei che aiporaracata jocua ivi pegua uyapota jembicui retarã vae reta pe, jare taicue rupi niñemoñaá reta oẽta joco güi, jare uyecuita cheve cua ivi pe’ —jei, jei Esteban—. ⁸Jare Tumpa jei Abraham pe jae jare opaete iñemoñaá cuimbae reta uñemicircuncidaca vaerã, imandúa reta vaerã Tumpa jei vae uyapota co. Jáeramo Abraham tai Isaac oa ma yave, Abraham umicircuncida, Isaac ocho ara ma güinoi yave. Jae ramiño vi Isaac umicircuncida tai Jacob, jare Jacob umicircuncida jocua doce tai yandetenondegua reta —jei—.

⁹Jocua yandetenondegua reta umitarẽi José, jare umee corepoti re, José Egipto pe uyeyocui vaerã. Èrei Tumpa ico José ndive, ¹⁰jare uepi opaete susere reta güi. Jare mburuvicha guasu Egipto pegua Faraón uicuaa Tumpa umee José pe ipiacavi jare iyaracuaa catu vaerã. Jáeramo Faraón uyapo mburuvicharã, jare José oyocui opaete Egipto pegua reta jare Faraón jentarã reta —jei—.

¹¹Èrei caruai ou opaete Egipto jare Canaán pe, jare opaete vae uiporara. Jare jocua yandetenondegua reta uvãe’ã mbae ave jou vaerã —jei—. ¹²Èrei Jacob uicuaa ime tembiu Egipto pe yave, omondo jocua yandetenondegua reta joco pe. Jaeramo etei jae reta yugüiraa Egipto pe. ¹³Jare Jacob omondo reta ye yave, José uyecuaaca tiqei reta pe, jare Faraón uicuaa José jentarã reta —jei—. ¹⁴Jayave José ombou umimbeu tu pe yugüiraa vaerã ipi jae jare opaete jentarã reta. Opaete rupi ñugüinoi setenta y cinco —jei—. ¹⁵Jáeramo Jacob oo Egipto pe. Jare joco pe jae jare jocua yandetenondegua reta umano. ¹⁶Taicue rupi iñemoñaá reta güeru jetecue reta Siquem pe, jare joco pe oñoti reta teögüerenda Abraham oguacue pe. Echa’ã Abraham umbiepi Hamor tai reta pe corepoti pe, Siquem pe oĩ yave —jei Esteban—.

¹⁷Èrei coĩño ma ou yave Tumpa uyapo vaerã Abraham pe jei vae, yandetenondegua reta jeta uñemoña Egipto pe. ¹⁸Jayave Ìru cuimbae uyeyapo Egipto pegua reta juvicha guasarã. Èrei uicuaa’ã José —jei—. ¹⁹Cua mburuvicha guasu iyaracuaa catu uyapo vaerã icavi mbae vae yandetenondegua reta pe. Jei chupe reta uicuaaca vaerã tai reta oa yave, uyucaca vaerã chugüi —jei—. ²⁰Jocua ara reta pe oa Moisés. Tumpa uau Moisés. Jare mbapi yasi Moisés ico tu jenta pe. ²¹Jare uyecuaa yave, Faraón tayi uepi, jare umbicuaa imembĩ rami —jei—. ²²Jare Moisés uyemboc opaete aracuaa Egipto pegua re, jare uyemingueta cavi jare jatangãtu —jei Esteban chupe reta—.

²³Jare Moisés cuarenta año güinoi yave, uipota uecha quirãi ra yugüireco Israel pegua reta - jae reta co jae jentaigua reta. ²⁴Jare uecha penti Egipto pegua icavi mbae vae uyapo oĩ penti Israel pegua pe. Jayave uinupa uyua Egipto pegua, jare jucuarãi uepi uiporara vae —jei—. ²⁵Moisés ipia pe uyemingueta tẽi jentaigua reta uicuaata co Tumpa uepita jae rupi, èrei uicuaa’ã reta —jei Esteban—. ²⁶Piareve pe uecha mocui jentaigua reta uñerãro ñugüinoi, jare uipota tẽi uyapicatu cavi reta. Jáeramo jei chupe reta: ‘Cuimbae reta, pe reta penti tentaigua vae co. ¿Maera pa icavi mbae vae piyapo piyupe?’ —jei, jei Esteban—. ²⁷Èrei jocua cuimbae icavi mbae vae uyapo Ìru pe vae umiaña Moisés, jare jei chupe: ‘¿Quía pa neñoño oreruvicharã, orerãa vaerã?’ ²⁸¿Ndipota pa cheyuca Egipto pegua caarumo ndiyuca rami?’ —jei, jei Esteban—. ²⁹Cua uyandu yave, Moisés osi, jare ico ivi ambie Madián jee vae pe. Joco pe uñemoña mocui tai —jei—.

³⁰Cuarenta año ma uasa yave, ñana pe coĩño ivitu guasu Sinaí jee vae güi oĩ yave, penti ángel uyecuaa Moisés pe penti yai jendi oĩ vae pe —jei—. ³¹Moisés uecha yave, ipiacañi. Èrei oya jese yave, umae vaerã jese coi güi, uyandu yandeYa iñee jei: ³²‘Che co jae ndetenondegua reta - jae co Abraham, Isaac jare Jacob - i’Tumpa’ —jei, jei—. Jayave Moisés uriri uquiyi ramo, jare uipiũ umae vaerã jese. ³³Jayave yandeYa jei chupe: ‘Emboi ndepipasa. Echa’ã ndiyemboi co nei Tumpa jupi vae jovai. ³⁴Che añetete aecha quirãi uiporara reta aiparavo vae reta Egipto pe, jare ayandu iyao. Jáeramo agüeyi aepi vaerã. Añave eyu toromondo Egipto pe’ —jei, jei Esteban—.

³⁵Cua Moisés co jae Israel pegua reta güiriro vae. Echa’ã jae reta jei chupe: ‘¿Quía pa neñoño oreruvicharã, orerãa vaerã?’ —jei reta, jei—. Tumpa omondoca cua Moisés ángel

yai jendi vae pe uyecuaa chupe vae pe. Omondoca ico vaerã jae reta juvicharã jare uepi reta vaerã. ³⁶ Moisés güinoẽ reta güeru, jare uyapo miacañi reta Egipto pe, I Guasu Pita jee vae pe, jare cuarenta año ñana rupi yugüireco rambueve —jei—. ³⁷ Moisés jei Israel pegua reta pe: 'YandeYa Tumpa ombouta peve ñnee umimbeuta vae perivi reta ipite güi, chembou rami. Piyapisacata jese' —jei, jei Esteban—. ³⁸ Ángel umingueta Moisés ivitu guasu Sinaí pe, ñana pe uyembati yave Moisés jare yandetenondegua reta. Tumpa umee Moisés pe ñnee tecove pegua, jae umimbeu vaerã yandeve —jei—.

³⁹ Ërei yandetenondegua reta uipota'ã uyapo Moisés jei vae, jare güiriro reta. Jae reta ipia pe uyemingueta tõi yugüiraa ye vaerã Egipto pe. ⁴⁰ Jare jei reta Aarón pe: 'Iyapo ñanetumpa retarã yugüiraa vaerã yanderenonde. Echa'ã yaicuaa'ã mbae ra uyeyapo cua Moisés Egipto güi yanderena vae pe' —jei reta, jei—. ⁴¹ Jayave uyapo reta penti vaca tairusu vae-raanga, jare uyuca reta maemimba umee vaerã jocua itumpa-raanga pe. Uyerovia reta jocua ipo pe uyapo vae re. ⁴² Jáeramo Tumpa uyerova chugüi reta, jare umaño umbiadora reta vaerã opaete ara regua reta. Echa'ã Tumpa ñnee aracae umimbeu vae reta itupapire pe uyecuatía oĩ cuarãi:

'¿Cheve ra pemee maemimba piyuca vae cuarenta año ñana pe pico rambueve, Israel pegua reta?

⁴³ Jucuarãi'ã co. Pevoi peraa tumpa-raanga Moloc jee vae ico pipe vae, jare petumpa-raanga Renfán jee vae iyasitata-raanga.

Jae reta jaanga piyapo pemiadora vaerã.

Jáeramo che pomondota Babilonia cuti.'

Jucuarãi uyecuatía oĩ —jei Esteban chupe reta—.

⁴⁴ Yandetenondegua reta güirecose o Tumpa uyemingueta chupe reta pipe vae ñana pe. Echa'ã Tumpa oyocui Moisés jocua tupao uyapo vaerã jae uechaca chupe rami etei.

⁴⁵ Jocua tupao uñemee yandetenondegua reta pe, jare jae reta Josué ndive güeru, cua ivi judío mbae vae reta güi upiro yave. Echa'ã Tumpa omombo reta yandetenondegua reta güi.

Jare David ico mburuvicha guasarã yave, imeño cua pe oĩ jocua tupao —jei—. ⁴⁶ Tumpa umae cavi David re, jare David uyerure Tumpa pe umaño vaerã uyapo Tumpa jo. Echa'ã itenondegua Jacob umbiadora co Tumpa.

⁴⁷ Ërei Salomón uyapo Tumpa jo, ⁴⁸ yepe teĩ Tumpa ara pe ico vae ico'ã yambiatorarenda yande yayapo vae reta pe. Echa'ã Tumpa ñnee aracae umimbeu vae jei cuarãi:

⁴⁹ 'Ara co jae cheguapirenda,

jare ivi co jae chepi jenda' —jei Tumpa—.

'¿Mbae nunga o ra piyapota cheve?

¿Quiape ra aputuuta?

⁵⁰ Chepo pe co ayapo opaete cua mbaembae' —jei.

Jucuarãi jei Tumpa ñnee aracae umimbeu vae —jei Esteban chupe reta—.

⁵¹ Pe reta pepiatanta. Pipota'ã piyeyocui Tumpa pe, jare pipota'ã ave piyapisaca jese.

Jecuae piyovaicho Espíritu Santo ndive. Petenondegua reta uyapo rami, jucuarãi vi piyapo pe reta —jei—. ⁵² Petenondegua reta uyapo icavi mbae vae opaete Tumpa ñnee aracae umimbeu vae reta pe. Amocue Tumpa ñnee aracae umimbeu vae reta jei jocua jupi vae outa co. Petenondegua reta uyuca reta. Jare añave pe reta vi pemee piyucaca jocua jupi vae —jei—.

⁵³ Echa'ã Tumpa umeeca peve iporoyocui ángel reta pe, ñrei piyapo'ã —jei Esteban.

Esteban imano

⁵⁴ Jare yati vae reta cua uyandu ma yave, pochi, jare umbiquiririu jái Esteban jei vae jeco pegua. ⁵⁵ Ërei Esteban tinee Espíritu Santo pe, jare umae ngatu ara coti, jare uecha Tumpa iyambiatorarenda jare Jesús Tumpa iyacata coti. ⁵⁶ Jayave Esteban jei:

—iMase! Aecha ara uyepea oĩ, jare aecha vi cuimbaerã uyeyapo vae uyemboi oĩ Tumpa iyacata coti.

⁵⁷ Jayave jae reta usapicai tanta, jare iyapisa oyopia. Jayave penti rami uepeña reta Esteban uipisi. ⁵⁸ Jare güiraa ma yave tenta guasu güi ñana coti, uyapi reta ita pe. Jare jocua iyapu reve uñeapo jese vae reta omboi iyasoya, jare ofono penti cuimbae tairusu Saulo jee vae jovai. ⁵⁹ Jare uyapi reta rambueve, Esteban uyerure:

—CheYa Jesús, eraa cherecove.

⁶⁰ Jayave uyeatica, jare ñneeãta reve jei:

—CheYa, agüiye tuiporara reta cua mbaeyoa jeco pegua.

Jare cua jei yave, umano.

¹ Jare Esteban imano icavi Saulo pe. Jare jocua ara upurugüirovia vae Jerusalén pe ñugüinoi vae reta jovaicho reta umbipi uiporaraca chupe reta. Jare Jesús jemimondo retaño upita Jerusalén pe. Opaete ñru upurugüirovia vae reta uñemiai ivi reta Judea jare Samaria rupi. ² Jare amocue cuimbae umbiadora Tumpa vae reta oñoti Esteban, jare ipiatiti reta jese. ³ Ërei Saulo uiporaraca upurugüirovia vae reta pe. Echa'ã oo tenta tenta rupi, jare umbitiriri güiraa cuimbae reta jare cuña reta oñono peresoriru pe.

Felipe umimbeu ñee icavi vae Samaria pe

⁴ Jayave jocua upurugüirovia vae uñemiai vae reta umimbeu ñee icavi vae yugüiraa vae rupi. ⁵ Felipe oo tenta guasu Samaria pe, jare umimbeu tenta guasu pegua reta pe Cristo regua. ⁶ Jare tenta guasu pegua reta uyandu yave, penti rami uyapisaca cavi Felipe umimbeu chupe reta vae re. Uecha vi miacañi uyapo vae reta. ⁷ Echa'ã aña reta usiri usapicai reve oya jese vae reta güi. Jare jeta ipuere mbae omi vae reta jare jeta uguata mbae vae reta ucuera. ⁸ Jare jocua tenta guasu pegua reta uyerovia.

⁹ Jare joco pe ico penti cuimbae Simón jee vae. Cua cuimbae ipaye vae co, jare umipiacañi umbitavi Samaria pegua reta mbaembae uyapo vae pe. Jáeramo uyereroviaca catu. ¹⁰ Jare opaete sambiai reta jare ucuacuaa vae reta uyapisaca cavi jese, jare jei reta:

—Cua cuimbae güinoi Tumpa imbaepuere tuicha vae.

¹¹ Jáeramo opaete vae uyapisaca cavi jese. Echa'ã jae ipaye vae ramo, ima ma uyapo mbaembae umipiacañi reta vaerã. ¹² Ërei Felipe umimbeu tenta guasu pegua reta pe ñee icavi vae. Imiari chupe reta Tumpa iporoyocua re jare Jesucristo re. Jayave cuimbae reta jare cuña reta güirovia jare uyembibautizaca. ¹³ Jare Simón vi güirovia, jare uyembibautizaca güive upita Felipe ndive. Jare uecha yave miacañi tuicha vae uyeyapo vae reta, ipiacañi.

¹⁴ Jare Jesús jemimondo Jerusalén pe ñugüinoi vae reta uicuaa yave quirãi Samaria pegua reta güirovia ma Tumpa iñee, omondo reta Pedro jare Juan. ¹⁵ Jare jae reta yugüiraa uvãe yave Samaria pe, uyerure upurugüirovia vae reta re, Espiritu Santo ou vaerã chupe reta. ¹⁶ Echa'ã ndeño ou Espiritu Santo chupe reta. Jaeño uyembibautizaca Jesús jee re. ¹⁷ Jayave Pedro jare Juan oñono ipo jese reta, jare Espiritu Santo ou chupe reta.

¹⁸ Jare Simón uecha Espiritu Santo ou, Jesús jemimondo reta ipo oñono jese reta yave. Jayave uipota tõi umee corepoti chupe reta ¹⁹ jare jei:

—Cheve vi pemee cua mbaepuere, ou vaerã ipotave vae pe Espiritu Santo, che añono chepo jese yave.

²⁰ Ërei Pedro jei chupe:

—Nde necañiteita co ndecorepoti reve. Echa'ã ndepia pe ndiyemingueta tõi ndepuere ndegua corepoti pe mbae Tumpa umee vae —jei—. ²¹ Nde ndepuere'ã nenoï cua nunga mbaepuere. Echa'ã ndepia jupí'ã Tumpa coti. ²² Eeya cua icavi mbae vae, jare iyerure Tumpa pe. Aramoi umbiasata ndeve cua ndepia pe ndiyemingueta vae re. ²³ Echa'ã aicuaa nde ñiñemiro, jare mbaeyoa jeco pegua ndepuere'ã ndiyapo icavi vae —jei.

²⁴ Jayave Simón jei chupe reta:

—Piyerure cheré yandeYa pe, agüiye vaerã cua pere cheve vae uyeyapo cheve.

²⁵ Jayave Pedro jare Juan umimbeu yave Tumpa iñee ñru vae reta pe, yugüiraa ye Jerusalén pe. Jare yugüiraa rambueve, umimbeu ñee icavi vae jeta ñru Samaria pegua tenta guasu-rai reta rupi.

Felipe jare Etiopía pegua

²⁶ Jayave penti ángel yandeYa pe uyeyocui vae jei Felipe pe:

—Epüa ecua sur coti tape Jerusalén güi oo Gaza coti vae rupi.

Cua tape uasa ñana rupi. ²⁷ Jayave Felipe upüa oo. Jare penti eunuco ivi Etiopía pegua oo ye jenta coti Jerusalén güi. Echa'ã ou Jerusalén pe umbiadora vaerã Tumpa. Cua eunuco co jae penti mburuvicha. Jae uyandareco ico Candace icorepoti jare ñru imbaembae icavi vae re. Candace co jae Etiopía pegua reta juvicha guasu. ²⁸ Jare eunuco oo ye yave jenta coti, uguapi icarro pe umingueta oo Isaías uicuatiacue vae. Isaías co jae penti Tumpa iñee aracae umimbeu vae. ²⁹ Jare Espiritu Santo jei Felipe pe:

—Ecua iñemiru pea carro pe oo oï vae ndive.

³⁰ Jayave Felipe osi oo carro coti, jare uyandu cuimbae umingueta Tumpa iñee Isaías uicuatiacue vae. Jayave upirandu chupe:

—¿Ndicuaa pa nemingueta nei vae?

³¹ Jare eunuco jei Felipe pe:

—¿Quirãita pa aicuaa, mbaeti yave quía umimbeu cheve?

Jare umiñera Felipe uyupi vaerã icarro pe uguapi jae ndive.

³² Jare Tumpa iñee umingueta vae pe uyecuatía oï cuarã:

“Penti ovecha rami uyereraaca umano vaerã.

Jare jae quíño, penti ovecha-rai jocua uñapi vae jovai oĩ vae quíño oĩ rami.

³³ Uñereri roca yave, uña vae reta uyapo'ã jupi vae chupe.

¿Quía ra ipuere umierãcua jentaigua reta regua?

Echa'ã jecove ucañi ivi güi.”

Jucuarãi uyecuatía oĩ.

³⁴ Jare eunuco jei Felipe pe:

—Aipotã nemimbeu vaerã cheve quía re ra jei cua Tumpa ñee umimbeu vae. ¿Jei pa iyee ani ñru vae re? —jei.

³⁵ Jayave Felipe umbipi cua Tumpa ñee uyecuatía oĩ vae güi umimbeu chupe ñee icavi vae Jesús regua. ³⁶ Jare tape rupi yugüiraa rambueve, yugüiraa uvãe i jenda pe, jare eunuco jei: —Co oĩ i. ¿Ime pa mbae ayapo vaerã ndei ayembibautizaca mbove?

³⁷ —Ndepurugüirovia yave opaete ndepia pe, ndepuere ndiyembibautizaca —jei Felipe chupe.

—Arovã Jesucristo co jae Tumpa Tai —jei eunuco Felipe pe.

³⁸ Jayave eunuco umbiyemboica carro, jare mocui reve ugüeyi i pe. Jayave Felipe umbibautiza eunuco. ³⁹ Jare oẽ reta i güi yave, yandeYa iEspíritu güiraa joco güi Felipe. Jare eunuco uecha'ã ye ma. Jayave uyerovia reve oo ye jenta coti. ⁴⁰ Jare Felipe uyecuaa tenta guasu Azoto pe. Jare joco güi oo tenta guasu Cesarea pe. Jare oo rambueve, umimbeu ñee icavi vae opaete tenta guasu reta rupi.

9

Saulo güirovia Jesús re

(Hch 22.6-16; 26.12-18)

¹ Jare Saulo umumburu uyuca vaerã yandeYa re güirovia vae reta, jare oo sacerdote tenondegua pe. ² Jare uyerure sacerdote tenondegua pe umee vaerã chupe tupapire, ipuere vaerã oo judío reta itupao tenta guasu Damasco pegua reta pe, jare uvãe yave joco pe cuimbae reta jare cuña reta Jesús re güirovia vae, ipuere vaerã uipisi güeru Jerusalén pe. ³ Jare coiño ma Damasco güi oo yave, aramoiño jembipe Saulo re penti tembipe tuicha vae ara güi. ⁴ Jayave Saulo oa ivi re, jare uyandu ñee jei chupe:

—Saulo, Saulo, ¿maera pa ndiyapo icavi mbae vae cheve?

⁵ Jayave Saulo upirandu:

—¿Quía pa co nde, cheYa?

Jayave ñee jei chupe:

—Che co jae Jesús. Nde ndiyapo icavi mbae vae cheve. Nde co jae penti güeye ivira jacuarovi vae re upatara vae rami. Jáeramo ndiporara neĩ.

⁶ Saulo uriri uquiye ramo.

—CheYa, ¿mbae pa ndipotã ayapo vaerã? —jei.

—Epña ecua tenta guasu pe, jare amimbeucata ndeve mbae ndiyapota vae —jei yandeYa Saulo pe.

⁷ Jare cuimbae Saulo jupíe yugüiraa vae reta uyemboi quíño ñugüinoi ipiacañi güi. Echa'ã uyandu ñee, ñerei uecha'ã quiave. ⁸ Jayave Saulo upña ivi güi, jare umae tẽi, ñerei ipuere'ã uecha quía. Jare jae jupíe yugüiraa vae reta uipoco, jare güiraa Damasco pe. ⁹ Jare Saulo joco pe oĩ mbapi ara umae mbae reve, jare ucaru'ã jare i jou'ã.

¹⁰ Jare ico Damasco pe penti upurugüirovia vae Ananías jee vae. YandeYa jei chupe ique pe:

—Ananías.

Jare jae jei:

—CheYa, co añ.

¹¹ Jayave yandeYa jei chupe:

—Epña ecua calle Simi jee vae pe, jare eeca Judas jenta pe penti Tarso pegua. Jae jee co Saulo. Echa'ã jae uyerure oĩ —jei—. ¹² Jare jae uecha ma ique pe penti cuimbae Ananías jee vae uique jare oñono ipo jese, umae ye vaerã —jei Tumpa chupe.

¹³ Ñerei Ananías jei:

—CheYa, jeta vae umimbeu cheve cua cuimbae regua, quirãi jeta icavi mbae vae uyapo Jerusalén pe nderé güirovia vae reta pe. ¹⁴ Jare cua pe jae ime güinoi mbaepuere sacerdote jeta itenondegua reta güi, uipisi vaerã opaete nderé güirovia vae reta —jei.

¹⁵ —Ecuãño —jei yandeYa chupe—. Echa'ã che aiparavo ma cherembiporurã, oo vaerã umimbeu cheregua judío mbae vae reta pe, mburuvicha reta pe jare Israel pegua reta pe. ¹⁶ Echa'ã che aicuaacata chupe quirãi uiporara eteta chereco pegua —jei.

¹⁷ Jayave Ananías oo uique tenta pe. Jare oñono ipo Saulo re jare jei chupe:

—Cherivi Saulo, yandeYa Jesús uyecuaa ndeve, ndeyu tape rupi rambueve. Jae chemboun nemaee ye vaerã, jare netinee vaerã Espíritu Santo pe —jei.

¹⁸ Jare jupivoiño mbae uyeequi Saulo jesa güi yanderesapĩra uyeequi rami, jare Saulo umaee cavi. Jayave upũa uyembibautizaca. ¹⁹ Jayave ucaru jare ipirãta ye ma. Jare upĩta mbovi ara upurugüirovia vae Damasco pe yugüireco vae reta ndive.

Saulo uñemiñee Damasco pe

²⁰ Jayave Saulo umbipi umimbeu Jesús regua judío reta itupao reta pe. Jei chupe reta Jesús co jae Tumpa Tai. ²¹ Jare opaete uyandu vae reta ipiacañi, jare jei:

—¿Jae'ã ra cua Jerusalén pe cua Jesús re güirovia vae reta uiporaraca vae? Jare ou vi cua pe uipisi vaerã cua nunga reta güiraa sacerdote reta itenondegua reta pe —jei reta.

²² Ërei Saulo uñemiatangãtu, jare umiamiri judío Damasco pegua reta. Echa'ã uicuaaca chupe reta Jesús co jae Cristo.

Judío reta uipota tẽi uipisi Saulo

²³ Jare ima ma uasa yave, judío reta uyemboemboe uyuca vaerã Saulo. ²⁴ Ërei cua jerãcua Saulo pe. Jae reta uãro tenta guasu jonque pe ara rupi jare pĩtu rupi, uyuca vaerã tẽi. ²⁵ Ërei upurugüirovia vae reta güiraa Saulo pĩtu yave umbiasa tenta guasu iquesemba ita pegua vae iãrambo rupi umbigüeyi canasta guasu pe.

Saulo Jerusalén pe

²⁶ Jare Saulo oo uvãe yave Jerusalén pe, uipota tẽi uñemĩru upurugüirovia vae reta ndive. Ërei opaete jae reta uyepiu chugüi. Echa'ã güirovia'ã reta jae Jesús re güirovia ma co.

²⁷ Ërei Bernabé güiraa Saulo Jesús jemimondo reta pe, jare umimbeu chupe reta quirãi Saulo uecha yandeYa tape rupi, jare quirãi yandeYa umingueta vae. Jei vi chupe reta quirãi Saulo umimbeu uquiye mbae reve Damasco pe Jesús regua. ²⁸ Jayave Saulo uñemĩru upurugüirovia vae reta ndive Jerusalén pe. Jecuaeño oẽ Jerusalén güi jare uique ye. ²⁹ Jare umimbeu uquiye mbae reve yandeYa regua. Jare uyeaca vi griego pe uyemingueta vae reta ndive. Jáeramo jae reta uipota uyuca. ³⁰ Jare upurugüirovia vae reta cua uicuaa yave, güiraa reta Saulo Cesarea pe, jare joco güi omondo tenta guasu Tarso coti.

³¹ Jayave umambeco'ã ma quãa upurugüirovia vae reta, jare jae reta uñemimĩrãta opaete Judea rupi, Galilea rupi jare Samaria rupi. Jare yugüireco reta uipiu cavi reve yandeYa, jare Espíritu Santo umbipiacatu. Jare jecuaeño ĩru vae reta uñemĩru jae reta ndive.

Eneas ucuera

³² Jare Pedro oo opou yave opaete upurugüirovia vae reta ñugüinoi vae rupi, oo uvãe tenta guasu Lida pegua reta pe. ³³ Joco pe uvãe penti cuimbae Eneas jee vae ocho año ma ico jupa pe vae. Echa'ã ipuere mbae omi vae. ³⁴ Jare Pedro jei chupe:

—Eneas, Jesucristo nembigüera ma. Epũa ipiso nderupa —jei.

Jare jupivoiño jae upũa. ³⁵ Jare opaete Lida pegua reta jare tenta tenta ñuu Sarón pegua reta uecha cua cuimbae, jare uyerova reta yandeYa coti.

Dorcas umano jare icove ye

³⁶ Jare ico tenta guasu Jope pe penti cuña upurugüirovia vae Tabita jee vae. (Cua tee uipota jei ambie ñee pe: Dorcas.) Cua cuña uyapo jeta icavi vae, jare umeei jeta mbae iparavete vae reta pe. ³⁷ Jayave imbaerasi, jare umano. Jare ĩru vae reta opa umbiyau yave, oñono penti o ivate vae pe. ³⁸ Jare Lida coiño oĩ Jope güi. Jare upurugüirovia vae Jope pegua reta uicuaa ma yave Pedro oĩ Lida pe, omondo icoti mocui cuimbae reta jei vaerã chupe:

—Ecu Jope pe imambae.

³⁹ Jayave Pedro upũa ou jae reta jupíe. Jare ou uvãe yave, ĩru vae reta güiraa o ivate vae pe. Joco pe opaete ime umano vae reta yati uyao ñugüinoi, jare uechaca Pedro pe temimonde Dorcas jae reta ndive ico yave uyapocue vae reta. ⁴⁰ Jayave Pedro omoẽ opaete joco pe ñugüinoi vae reta. Jayave uyeatica jare uyerure Tumpa pe. Jayave uyerova umaee teõgüe re jare jei:

—Tabita, epũa.

Jayave cuña umaee, jare uecha Pedro yave, upũa uguapi. ⁴¹ Jayave Pedro uipisi ipo pe, jare umupũa. Jayave ueni upurugüirovia vae reta jare ime umano vae reta, jare uechaca chupe reta icove ye ma co. ⁴² Jare cua jerãcua opaete Jope pegua reta pe. Jare jeta vae güirovia yandeYa re. ⁴³ Jare Pedro upita ima Jope pe. Ico penti guacapi umipĩta vae Simón jee vae jenta pe.

¹ Ico Cesarea pe penti cuimbae Cornelio jee vae. Jae co sundaro reta juvicha penti ati Italiana jee vae pegua. ² Jae jare opaete jenta pegua reta umbiadora Tumpa, jare jae umeei jeta mbae iparavete vae reta pe, jare jecuaeñoi uyerure Tumpa pe. ³ Cua cuimbae uecha cavi ique pe penti ángel Tumpa pe uyeyocui vae uique jae oí vae pe mbapi ora ma caaru yave. Ángel jei chupe:

—Cornelio.

⁴ Cornelio uquiye reve umae ngatu ángel re jare upirandu:

—¿Mbae pa, cheYa?

Jare ángel jei chupe:

—Tumpa imandúa ndiyerure reta jare mbae nemei vae reta re. ⁵ Añave emondo cuimbae reta Jope pe, güeru vaerá penti cuimbae Simón jee vae. Jae uyembijee Pedro pe —jei—. ⁶ Jae ico penti guacapi umipita vae Simón ipi. Simón jenta oí i guasu jembei pe —jei.

⁷ Ángel uyemingueta jae ndive vae oo ma yave, Cornelio ueni mocui jembicui reta jare penti sundaro umbiadora Tumpa vae. Cua sundaro vi uyeyocui Cornelio pe. ⁸ Jare opa umimbe cavi chupe reta yave, omondo Jope coti.

⁹ Piareve pe guarasi ara mbíteta ma yave, jae reta yugüiraa tape rupi coiño ma Jope güi rambueve, Pedro uyupi tenta iárambo, uyerure vaerá Tumpa pe. ¹⁰ Jare iyembai, jare uipota ucaru. Èrei ñru vae reta omboyi ñugüinoi rambueve jembiurá, Pedro oque. ¹¹ Jare ique pe uecha ara uyepea jare penti nieso tuicha vae rami vae ugüeyi ou icoti. Cua uyembigüeyi uyepisi reve irundi jembei reta pe. ¹² Cua nieso japipe pe ñugüinoi ipotave maemimba uguata vae reta jare opoñi vae reta, jare ipotave güira reta. ¹³ Jare ou Pedro pe penti ñee:

—Pedro, epúa iyuca jeu.

¹⁴ Èrei Pedro jei:

—Ndarau, cheYa. Jau'á etei co mboroyocui jei agüiye vaerá jau vae. Icavi'á co —jei.

¹⁵ Jayave ñee jei chupe:

—Tumpa umee ndeu vaerá vae, agüiye eriro.

¹⁶ Cua mbapi vese ma uyeyapo yave, nieso rami vae uyerera ye ara pe. ¹⁷ Jare Pedro ipiacañi reve ipia pe uyemingueta oí rambueve mbae re ra uyemijaanga cua ique pe uecha vae, cuimbae Cornelio ombou vae reta upirandu yugüeru Simón jenta re, jare yugüeru ma uváe onque pe. ¹⁸ Jare jae reta ueni upirandu joco pe ra ico Simón uyembijee Pedro pe vae. ¹⁹ Jare Pedro ipia pe uyemingueta oí rambueve jocua ique pe uecha vae re, Espiritu Santo jei chupe:

—Mase, mbapi cuimbae reta ndereca. ²⁰ Epúa egüeyi ecua jae reta jupíe neatéi mbae reve. Echa'á che co ambou —jei.

²¹ Jayave Pedro ugüeyi cuimbae Cornelio ombou vae reta ñugüinoi vae pe, jare jei chupe reta:

—Che co jae pe reta peecca vae. ¿Maera pa peyu chereca?

²² Jayave cuimbae reta jei Pedro pe:

—Ime penti cuimbae Cornelio jee vae. Jae co cuimbae jupi vae. Umbiadora co Tumpa. Jae co sundaro reta juvicha opaete judío reta uyemingueta cavi jese vae. Penti ángel Tumpa pe uyeyocui vae jei chupe ndereruca vaerá jenta pe, jae uyapisaca vaerá nemimbeuta chupe vae re —jei reta.

²³ Jayave Pedro uruique cuimbae reta, jare umimbíta joco pe. Jayave piareve pe Pedro upúa oo jae reta jupíe. Jare amocue upurugüirovia vae Jope pegua reta yugüiraa jae jupíe.

²⁴ Jare piareve pe yugüiraa uváe Cesarea pe. Jare Cornelio umbati ma jentará reta jare ñru reta, jare uáro oí Pedro. ²⁵ Jare Pedro uiqueta ma yave tenta pe, Cornelio oo oováiti jare uyeatica Pedro jovai umbiadora vaerá. ²⁶ Èrei Pedro jei chupe:

—Epúa. Che cuimbaeño vi co.

Jare umupúa. ²⁷ Jare uyemingueta jae ndive rambueve, Pedro uique tenta pe, jare uecha jeta vae yati ñugüinoi joco pe. ²⁸ Jayave Pedro jei chupe reta:

—Pe reta picuaa cavi co quirái penti judío ipuere'á uñemíru penti judío mbae vae ndive, jare quirái ipuere'á opou ipi. Èrei Tumpa uechaca cheve quirái icavi'á aeni vaerá penti vae yepé iquia vae, yepé tēi uyapo'á mboroyocui. ²⁹ Jáeramo pe reta cherenica yave, ayu cheatéi mbae reve. Añave tapirandu peve, ¿maera pa cherenica? —jei Pedro.

³⁰ Jayave Cornelio jei chupe:

—Irundi ara ma uasa cuarái yave ayerure aí ayecuacu reve tembiu güi cua cherenica pe. Jare aramoiño mbapi ora ma caaru yave aecha penti cuimbae uyemboi oí cherovai. Jemimonde jembipe —jei—. ³¹ Jae jei cheve: Cornelio, ndiyerure uyendu ma, jare Tumpa imandúa ma mbae nemei vae reta re. ³² Emondo quía Jope pe, jare eruruca Simón uyembijee Pedro pe vae. Jae ico penti guacapi umipita vae Simón ipi. Simón jenta oí i guasu jembei pe. Ou yave, jae nemingueta —jei cheve, jei—. ³³ Jáeramo jupivoiño amondo

ndecoti, jare yasurupai ndeyu vae re. Añave ore co noĩ opaete cua pe Tumpa jovaque, nduyandu vaerã opaete Tumpa ndeocui vae re —jei.

³⁴Jayave Pedro jei chupe reta:

—Añetete aicuaa ma quirãi Tumpa uau'ã penti vaeño ñru vae güi. ³⁵Echa'ã jocua umbiadora jare jupi vae uyapo vae ipotave ivi pegua icavi co Tumpa pe —jei—. ³⁶Tumpa ombou ñee icavi vae Israel pegua reta pe. Jae umimbeu chupe reta ime mbiacatu Jesucristo re. Jesucristo co jae opaete vae iYa —jei Pedro—. ³⁷⁻³⁸Juan umimbeu uyapisaca jese vae reta pe uyembibautizaca vaerã. Cua jaicue rupi Jesús Nazaret pegua jerãcua Galilea pe jare opaete Judea rupi. Jerãcua quirãi Tumpa umee chupe Espiritu Santo jare mbaepuere, jare quirãi jae oo opaete que rupi uyapo icavi vae, jare quirãi umbigüera opaete añã guasu uiporaraca chupe vae reta. Echa'ã Tumpa ico jae ndive. Opaete cua pe reta picuaa co —jei—. ³⁹Jare ore numimbeu ñru vae reta pe opaete Jesús uyapo Judea rupi jare Jerusalén pe vae. Jayave judío reta uicutuca curusu re uyucua —jei Pedro chupe reta—. ⁴⁰Èrei Tumpa umbijecove ye güeru umanocue vae reta ipite güi mbapi ara umano rendave pe, jare umbiyecuaa. ⁴¹Umbiyecuaa'ã opaete vae pe, jaño oreve. Echa'ã tenonde ma Tumpa oreparavo numimbeu vaerã ñru vae reta pe. Ore nducaru jare i ndou jae ndive, icove ye yave ou umanocue vae reta ipite güi —jei—. ⁴²Jare jae oreocui numimbeu vaerã ñru vae reta pe quirãi Tumpa uiparavo uãa vaerã icove vae reta jare umanocue vae reta —jei Pedro—. ⁴³Cua regua co umimbeu opaete Tumpa ñnee araca umimbeu vae reta. Echa'ã jae reta jei Tumpa umbiasata opaete jese güirovia vae reta pe imbaeyoa reta jae jeco pegua —jei.

Espiritu Santo ou judío mbae vae reta pe

⁴⁴Jare Pedro imiari oĩ rambueve, Espiritu Santo ou opaete cua ñee uyandu vae reta pe. ⁴⁵Jare judío upurugüirovia vae Pedro jupie yugüeru vae reta ipiacañi quirãi judío mbae vae reta pe vi uñemee Espiritu Santo vae re. ⁴⁶Echa'ã jae reta uyandu yemingueteta reta ambie vae ñnee pe. Jare uyandu vi umbiadora Tumpa. ⁴⁷Jayave Pedro jei:

—¿Quã pa umbiavaita agüiye vaerã uyembibautizaca cua reta? Echa'ã Espiritu Santo ou ma chupe reta, yandave ou rami —jei.

⁴⁸Jayave Pedro oyocui uyembibautizaca vaerã yandeYa Jesús jee re. Jayave joco pegua reta umiñera Pedro upita vaerã jae reta ndive mbovi ara pegua.

11

Pedro umimbeu upurugüirovia vae Jerusalén pegua reta pe

¹Jayave Jesús jemimondo reta jare ñru upurugüirovia vae Judea rupi ñugüinoi vae reta uicuaa quirãi judío mbae vae reta vi güirovia Tumpa ñnee. ²Jayave Pedro oo ye uvãe yave Jerusalén pe, judío upurugüirovia vae reta uñeengata chupe. ³Jae reta jei:

—¿Maera pa ndique judío mbae vae reta jenta pe? ¿Maera pa ndecaru jae reta ndive? —jei reta.

⁴Jayave Pedro iyipi güive umbipi umimbeu cavi chupe reta opaete uyeyapo vae. Jae jei chupe reta:

⁵—Che ayerure aĩ yave tenta guasu Jope pe, cheque pe aecha penti nieso tuicha vae rami vae ugüeyi ou checoti. Cua uyembigüeyi ara güi uyepisi reve irundi jembei reta pe ou uvãe cheve —jei—. ⁶Amae ngatu jese yave, aecha maemimba uguata vae reta, amocue pochi vae jare amocue pochi mbae vae, jare maemimba opoñi vae reta, jare güira reta. ⁷Jare ayandu vi penti ñee jei cheve: 'Pedro, epüa iyuca jeu' —jei, jei Pedro—. ⁸Èrei che jae: 'Ndarau, cheYa. Jau'ã etei co mboroyocui jei agüiye vaerã jau vae. Icavi'ã co' —jæ chupe, jei—. ⁹Èrei ñee ou ara güi vae jei cheve: 'Tumpa umee ndeu vaerã vae, agüiye erãro' —jei cheve, jei—. ¹⁰Jare cua mbapi vese ma uyeyapo yave, opaete uyereraa ye ara pe. ¹¹Jare jupivoiño yugüeru uvãe che aico vae pe mbapi cuimbae Cesarea güi Cornelio ombou vae reta —jei Pedro—. ¹²Jare Espiritu Santo jei cheve aa vaerã jae reta jupie cheatëi mbae reve. Jare cua seis upurugüirovia vae reta vi yugüiraa cherupie, jare nduique jocua cuimbae jenta pe —jei. ¹³Jare joca cuimbae umimbeu oreve quirãi uecha penti ángel uyemboi oĩ jae jo pe, jare quirãi ángel jei chupe: 'Emondo cuimbae reta Jope pe eruruca penti cuimbae Simón jee vae. Jae uyembijee Pedro pe' —jei chupe, jei—. ¹⁴Jae umimbeuta ndeve ñee, nde jare opaete nerenta pegua reta piyembiasaca vaerã —jei chupe, jei—. ¹⁵Jayave che ambipi amingueta reta yave, Espiritu Santo ou chupe reta, yandave tenonde yave ou rami. ¹⁶Jayave chemandúa yandeYa jei yandave vae re. Echa'ã jei: 'Juan upurumbibautiza i pe. Èrei pe reta piyembibautizacata Espiritu Santo pe' —jei yandeYa, jei—. ¹⁷Tumpa umee chupe reta Espiritu Santo yande yarovia yandeYa Jesucristo re vae pe umee vae. Jáeramo che chepuere'ã etei ambiavai Tumpa uyapo vae —jei.

¹⁸ Jayave cua Pedro jei chupe reta vae uyandu yave, jae reta ipuere'ã ma mbae jei. Umbiadoraño Tumpa, jare jei reta:

—Tumpa umaño vi judío mbae vae reta re ueya vaerã iyemingueta icavi mbae vae ipia pe oĩ vae, güinoi vaerã tecove opa mbae vae.

Upurugüirovia vae reta Antioquía pe

¹⁹ Jare Esteban uyuca yave, jovaicho reta uiporara upurugüirovia vae reta pe. Jare upurugüirovia vae reta opa uñemai, jare yugüiraa uvãe ivi Fenicia, Chipre jare Antioquía pe. Jare jae reta umimbeu judío reta peño Tumpa iñee. ²⁰ Ërei jae reta ipite pe ñugüinoi amocue cuimbae Chipre jare Cirene pegua. Cua reta yugüiraa uvãe yave Antioquía pe, umingueta judío mbae vae reta pe vi, jare umimbeu chupe reta ñee icavi vae yandeYa Jesús regua. ²¹ Jare yandeYa ombori, jare jeta vae güirovia jare uyerova yandeYa coti.

²² Jare cua jerãcua upurugüirovia vae Jerusalén pe ñugüinoi vae reta pe. Jayave jae reta omondo Bernabé Antioquía pe. ²³ Jare jae oo uvãe yave, uecha jocua uyeyapo Tumpa ipiacavi jeco pegua vae, jare uyerovia. Jayave jei chupe reta jecuaño uguata cavi vaerã yandeYa ndive ipirãta reve ipia pe. ²⁴ Echa'ã Bernabé co jae cuimbae ipiacavi vae. Jae upurugüirovia cavi, jare tinee Espiritu Santo pe. Jare jeta vae güirovia yandeYa re jare uñemiru upurugüirovia vae reta ndive.

²⁵ Cua jaicue rupi Bernabé oo Tarso pe, ueca vaerã Saulo. Jare uvãe chupe yave, güeru Antioquía pe. ²⁶ Jare joco pe uñemiru reta penti año upurugüirovia vae reta ndive, jare omboe jeta vae. Jare Antioquía pe jaeramo etei ñru vae reta umbipi jei upurugüirovia vae reta re:

—Cua reta co jae cristiano reta.

²⁷ Jare jocua ara reta pe amocue Tumpa iñee umimbeu vae reta yugüeru Jerusalén güi Antioquía pe. ²⁸ Penti jee co Agabo. Jae upãa uyemboi, jare jei Espiritu Santo rupi imeta co caruai tuicha vae opaete ivi rupi. Cua uyeyapo Claudio mburuvicha guasurã ico yave. ²⁹ Jayave penti penti upurugüirovia vae reta iquirẽi omondo ime güinoi vae güi, ombori vaerã upurugüirovia vae Judea rupi ñugüinoi vae reta. ³⁰ Jare jucuarãi uyapo reta. Jare jae reta omondo upurugüirovia vae reta itenondegua reta pe Bernabé jare Saulo ndive.

12

Herodes uyucaca Jacobo, jare oñonoca Pedro peresoriru pe

¹ Jocua ara reta pe mburuvicha guasu Herodes uipisica amocue upurugüirovia vae reta, uyapo vaerã icavi mbae vae chupe reta. ² Jare uyucaca quise pe Jacobo - jae co Juan tiquei. ³ Jare Herodes uicuaa yave cua uyapo vae icavi judío reta pe, uipisica Pedro vi. Jocua ara reta pe judío reta jou ñugüinoi mbiyape ovu mbae vae. ⁴ Jare uipisica ma yave, oñonoca peresoriru pe. Umee irundi ati sundaro reta pe uyandareco jese vaerã. Penti penti ati güinoi irundi sundaro. Herodes uipota tẽi güinoẽca Pedro tenta guasu pegua reta jovai pascua uasa ma yave. ⁵ Jayave sundaro reta uyandareco Pedro re peresoriru pe. Ërei upurugüirovia vae reta icueri mbae reve uyerure Tumpa pe jese.

Pedro oẽ peresoriru güi

⁶ Piareve pe ma Herodes güinoẽcata tẽi yave, jocua pĩtu etei Pedro oque oĩ mocui sundaro ipãu pe, jare uñeapĩti oĩ mocui cadena pe. Jare sundaro reta peresoriru jonque uãro ñugüinoi. ⁷ Jare aramoiño penti ángel yandeYa pe uyeyocui vae uyecuaa, jare penti tembipe uesape peresoriru pe. Jayave ángel uñatai Pedro iyique pe umbisareco vaerã, jare jei chupe:

—Epãa voi.

Jare cadena reta uyera ipapi güi. ⁸ Jayave ángel jei chupe:

—Iyemonde jare emonde vi ndepipasa.

Jare Pedro jucuarãi uyapo. Jayave ángel jei chupe:

—Iñeñoma ndeasoya pe, jare eyu cheraicue. ⁹ Jayave Pedro oẽ oo ángel jaicue rupi. Jae uicuaa'ã añete ra ángel uyapo vae. Ipia pe uyemingueta tẽi opaete cua uecha oĩ ique pe vae. ¹⁰ Uasa ma yave mocui sundaro peresoriru uãro vae, yugüiraa uvãe onque fierro calle coti oo vae pe. Cua onque jaei uyepea chupe reta. Jare oẽ reta ma yave, uguata reta penti calle rupi. Jayave aramoiño ángel oo Pedro güi ueya. ¹¹ Jayave ramo Pedro uicuaa cua uyeyapo vae añete co, jare jei iyupe:

—Añave aicuaa cheYa co ombou ángel jare cherepica Herodes güi jare opaete judío reta uipota uyapo cheve vae güi.

¹² Cua re ipia pe uyemingueta rambueve, oo uvãe María jenta pe. María co jae Juan Marcos ichi. Joco pe jeta vae yati uyerure ñugüinoi Tumpa pe. ¹³ Pedro ombopu onque, jare oẽ tenta güi penti cuñatai Rode jee vae uyapisaca vaerã. ¹⁴ Cua cuñatai uicuaa Pedro

iñee, ěrei uyerovia güi uipea'ã onque. Osi uique tenta pe, jare umimbeu ĩru reta pe Pedro co oĩ onque pe. ¹⁵ ěrei jae reta jei chupe:

—Nembiquere co.

ěrei jae jeiete jei añete co. Jayave jae reta jei:

—Ángel uyandarecose jese vae co.

¹⁶ ěrei Pedro jecuae ombopu onque. Jare jae reta uipea yave, uecha jae co, jare ipiacañi.

¹⁷ ěrei Pedro umupũa ipo umiquĩi reta vaerã, jare umimbeu chupe reta quirãi yandeYa güinoẽ peresoriru güi. Jare jei chupe reta:

—Picuaaca cua Jacobo jare ĩru upurugũirovia vae reta pe.

Jayave oẽ oo joco güi icoti'ã.

¹⁸ Jare cõe rupive sundaro reta uyemipia'ã ete. Echa'ã uicuaa'ã mbae ra uyeyapo Pedro pe. ¹⁹ Jare Herodes uecaca tẽi yave, Pedro uñevãe'ã. Jayave Herodes upirandu sundaro reta pe jese. Jayave oyocui sundaro reta uyeyucaca vaerã. Jayave Herodes oo Judea güi Cesarea pe, jare upita joco pe.

Herodes umano

²⁰ Jare Herodes pochi ico Tiro pegua reta jare Sidón pegua reta coti. Jayave jae reta penti rami yugũeru ipi, jare uñemiĩru reta penti mburuvicha guasu jembiocui tenondegua vae Blasto jee vae ndive. Jare reta jei chupe agũiye vaerã mburuvicha guasu pochi chupe reta. Echa'ã jae reta güeru jembuurã mburuvicha guasu Herodes iivi güi. ²¹ Jare Herodes uiparavo penti ara imiari vaerã chupe reta. Jayave jocua ara Herodes uyemonde cavi, jare uguapi mburuvicha upuruãa vae pe, jare imiari chupe reta. ²² Jare jae reta iñeeata reve jei:

—Tumpa iñee co, cuimbae iñee'ã co.

²³ Jare jupivoiño penti ángel yandeYa pe uyeyocui vae umimbaerasi Herodes taso pe. Echa'ã Herodes umbiadora'ã Tumpa. Jáeramo umano.

²⁴ ěrei Tumpa iñee uñemiai, jare jeta vae upurugũirovia.

²⁵ Jare Bernabé jare Saulo yugũeru ye Jerusalén güi, iparaviqui joco pe uyapo ma yave. Jare güeru jae reta jupie Juan Marcos.

13

Bernabé jare Saulo yugũiraa umimbeu ñee icavi vae

¹ Jare yugũireco upurugũirovia vae Antioquía pe ñugũinoi vae reta ipite pe amocue Tumpa iñee umimbeu vae reta jare Tumpa iñee re oporombocoe vae reta. Jare reta co Bernabé, Simón Níger, Lucio Cirene pegua, mburuvicha guasu Herodes jentarã Manaén jee vae jare Saulo. ² Cua reta uyeyocui yandeYa pe jare uyecuacu tembiu güi rambueve, Espiritu Santo jei chupe reta:

—Pomondo Bernabé jare Saulo uyapo vaerã mbaraviqui che aiparavo ma chupeguarã vae.

³ Jare uyecuacu reta tembiu güi, jare uyerure reta Tumpa pe. Jayave ĩru reta oñono ipo jese reta jare omondo.

Umimbeu reta ñee icavi vae Chipre pegua reta pe

⁴ Jayave Saulo jare Bernabé uyemondoca Espiritu Santo pe, jare yugũiraa tenta guasu Seleucia pe, jare joco güi uasa i guasu rupi iivi Chipre pe. ⁵ Jare yugũiraa uvãe yave tenta guasu Salamina pe, umimbeu reta Tumpa iñee judío reta itupao reta pe. Jare Juan oo jae reta ndive ombori vaerã. ⁶ Jare opaete Chipre umbapi yave, yugũiraa uvãe tenta guasu Pafos pe, jare joco pe uñevãe penti judío Barjesús jee vae ndive. Jae co penti ipaye vae, jare jei jae co penti Tumpa iñee umimbeu vae. Cua jei upurumbitavi vaerã. ⁷ Cua cuimbae oĩ mburuvicha Sergio Paulo jee vae ndive. Cua mburuvicha iyaracuaa catu co. Jare ueni Bernabé jare Saulo, jare uipota uyapisaca Tumpa iñee re. ⁸ ěrei Elimas (cua tee uipota jei: “Ipaye vae”) umbiavai, agũiye vaerã tẽi mburuvicha upurugũirovia. ⁹ ěrei Saulo (uyembijee vi Pablo pe vae) tinee Espiritu Santo pe, jare umaengatu Elimas re ¹⁰ jare jei chupe:

—Nde co jae aña guasu tai upurumbitavi vae. Nde ndiyapo icavi mbae vae, jare ndipota'ã ĩru vae reta uyapo vaerã jupi vae. Jecuaeño ndeporoyopia yandeYa jape icavi vae güi. ¹¹ Mbae, añave yandeYa tombou ipo nderé, nderesa mbae ndico vaerã. Ndarau ndeecha guarasi mbovi ara pegua —jei.

Jare jupivoiño Elimas ipuere'ã mbae uecha, pĩtumimbi oĩ yave rami, jare coti coti uyerova ueca tẽi quía uipoco güiraa vaerã. ¹² Jayave mburuvicha cua uyeyapo vae uecha yave, güirovia Tumpa iñee. Echa'ã ipiacañi yandeYa iporombocoe re.

Pablo jare Bernabé Antioquía Pisidia pegua pe

¹³ Jayave Pablo jare jae ndive ñugüinoi vae reta yugüiraa Pafos güi, jare uasa i guasu rupi tenta guasu Perge ivi Panfilia pegua pe. Ërei Juan ueya reta oo ye Jerusalén coti. ¹⁴ Jayave jae reta yugüiraa Perge güi tenta guasu Antioquia Pisidia pegua coti. Jare joco pe yugüiraa uväe yave, uique reta judío reta itupao pe mbutuu ara pe, jare uguapi reta. ¹⁵ Jare ñru vae reta opa umingueta yave mboroyocui güi jare Tumpa ñee aracae umimbeu vae reta uicuatiaque güi, tupao pegua reta itenondegua reta omondo jei chupe reta:

—Orerivi reta, ime yave ñee penoi orembiaracuaa vaerä, pepuere piyemingueta.

¹⁶ Jayave Pablo upä, jare umupä ipo umiquiñi reta vaerä. Jayave jei chupe reta:

—Cuimbae Israel pegua reta jare opaete pe reta Tumpa re pipiu vae, piyapisaca cheré.

¹⁷ Israel pegua reta i Tumpa uiparavo yandetenondegua reta, jare umbutuichaca Egipto pe yugüireco rambueve. Ërei Egipto jae reta iivi'ä co. Jare Tumpa imbaepuere tuicha vae pe güinoë joco güi —jei—. ¹⁸ Jare cuarenta año urupia chupe reta ñana rupi. ¹⁹ Jare opa umbai yave Canaán güi siete ivi ambiembie vae pegua reta, umee cua reta iivicue Israel pegua reta pe iivirä —jei—. ²⁰ Cua jaicue rupi cuatrocientos cincuenta año rupi Tumpa umee chupe reta mburuvicha reta uäa vaerä Samuel oñ regua. Samuel co jae Tumpa ñee aracae umimbeu vae —jei—. ²¹ Jayave jae reta uyerure mburuvicha guasu re. Jayave Tumpa umee chupe reta Cis tai Saül jee vae cuarenta año pegua. Jae co penti cuimbae Benjamín ññemoña pegua. ²² Jare Tumpa cua cuimbae omombo yave, umee chupe reta David juvicha guasurä. Jare Tumpa jei David re: 'Che aicuaa Isai tai David. Jae co penti cuimbae chembiyerovia vae. Jae uyapota opaete che aipota vae' —jei, jei Pablo—. ²³ Cua David ññemoña reta güi Tumpa umee Jesús. Jae co Israel pegua reta umbiasa vae. Jucuaräi Tumpa uyapo ma aracae jei vae —jei—. ²⁴ Ndei Jesús ou mbove, Juan umimbeu opaete Israel pegua reta pe ueya vaerä iyemingueta icavi mbae vae ipia pe oñ vae, jare uyembibautizaca vaerä. ²⁵ Jare Juan opata ma umimbeu chupe reta yave, jei: 'Pe reta pepia pe piyemingueta tēi che co jae. Ërei jucuaräi'ä. Co ou cheraicue ñru vae. Jupi'ä co che amboi vaerä ipipasa' —jei, jei—.

²⁶ Cheriquei reta, pe reta co jae Abraham ññemoña reta jare ñru vae reta pe reta Tumpa re pipiu vae co. Tumpa ombou peve cua ñee piyembiasaca vaerä. ²⁷ Echa'ä Jerusalén pegua reta jare juvicha reta uicuaa'ä quia ra co jae Jesús. Uicuaa'ä vi Tumpa ñee aracae umimbeu vae reta uicuatiaque opa mbutuu ara pe jae reta umingueta tēi vae. Jáeramo jae reta jei Jesús uyeyucaca vaerä, jare jucuaräi uyeyapo uyecuatia oñ jese vae —jei Pablo—. ²⁸ Jare yepe tēi uväe'ä teco Jesús re uyucaca reta vaerä, Ërei uyerure Pilato pe uyucaca vaerä. ²⁹ Jare jae reta opa ma uyapo chupe yave opaete jese uyecuatia oñ vae, umbigüeyica reta curusu güi, jare oñonoca teögüeriru pe —jei—. ³⁰ Ërei Tumpa umbijecove ye güeru manocue vae reta ipite güi. ³¹ Jare jeta ara uyecuaa jae jupie yugüiraa Galilea güi Jerusalén pe vae reta pe. Jae reta añave umimbeu ñru vae reta pe —jei Pablo chupe reta—. ³²⁻³³ Jare ore vi numimbeu peve ñee icavi vae, quiräi Tumpa jei yandetenondegua reta pe vae Tumpa etei uyapo ma yandevé. Echa'ä umbijecove ye Jesús güeru manocue vae reta ipite güi. Uyecuatia oñ Salmo mocui pe cuaräi: 'Nde co jae cheRaí. Cua ara che co jae ndeRu.' Jucuaräi uyecuatia oñ. ³⁴ Tumpa umbijecove ye güeru manocue vae reta ipite güi, agüiye vaerä etei jetecue icumegua. Jare cua re jei: 'Tamee ndeve bendición reta David pe jae ameaeta chupe vae' —jei Tumpa, jei—. ³⁵ Jáeramo jei ñru Salmo pe: 'Che co jae jupi vae. Nemañota'ä cheretecue re icumegua vaerä' —jei, jei—. ³⁶ Echa'ä David opa uyeyocui yave opaete jentaigua reta pe Tumpa uipota vae rupi, umano, jare uñeñotica itenondegua reta ñugüinoi vae pe, jare jetecue icumegua —jei—. ³⁷ Ërei jocua Tumpa umbijecove ye güeru manocue vae reta ipite güi vae jetecue icumegua'ä etei —jei—. ³⁸ Jáeramo, cheriquei reta, picuaa cavi cua ore numimbeu ñru vae reta pe vae. Tumpa umbiasata peve pemaeyoa reta cua Jesús rupi. ³⁹ Jare opaete güirovia jese vae reta uyembujipica ma. Echa'ä yandepuere'ä yayembujipica Moisés iporoyocui re —jei—. ⁴⁰ Jáeramo piñemoa ngatu, agüiye vaerä uyeyapo peve Tumpa ñee aracae umimbeu vae reta jei vae. Echa'ä jei reta cuaräi:

⁴¹ 'Mase, upurugüirō vae reta, pepiacañi jare pecañitei' —jei Tumpa—.

'Echa'ä che ayapota penti mbaraviqui pico rambueve.

Pe reta ndarau perovia, yepe tēi quia umimbeuta peve' —jei.

Jucuaräi jei reta —jei.

⁴² Jare oē reta yave judío reta itupao güi, judío mbae vae reta umiñera umimbeu vaerä chupe reta cua ñee mbutuu ara outa vae pe. ⁴³ Jare tupao pe yati vae reta opa yugüiraa yave, jeta judío reta jare judiorä uyeyapo vae umbiadora Tumpa vae reta yugüiraa Pablo jare Bernabé ndive. Cua mocui reve imiari chupe reta, jare oyocui jecuaeño uyeco reta vaerä Tumpa ipiacavi re.

⁴⁴ Jare mbutuu ara ou vae pe opaete seri tenta guasu pegua reta uyembati, uyapisaca vaerä Tumpa ñee re. ⁴⁵ Ërei judío reta uecha yave jeta vae yati, uñemiagüiro, jare jei añete'ä

co Pablo jei vae, jare jei icavi mbae vae Pablo coti. ⁴⁶ Jayave Pablo jare Bernabé imiari uquiye mbae reve chupe reta. Jei reta:

—Añete icavi co ore numimbeu vaerã peve rani Tumpa iñee. Ërei perĩro ma. Pipotaã ma. Jucuarãi picuaaca oreve penoitaã co tecove opa mbae vae. Jáeramo añave numimbeuta judío mbae vae reta pe. ⁴⁷ Echaã yandeYa oreocui cuarãi:

‘Pomondo judío mbae vae reta pe, peraa vaerã tembipe chupe reta, jare pemimbeu vaerã opaete ivi pegua reta pe Tumpa umbiasata co.’
Jocuarãi oreocui —jei reta.

⁴⁸ Jare judío mbae vae reta uyandu yave cua ñee, tuicha uyerovia reta, jare umbutuicha Tumpa iñee. Jare güirovia opaete jocua Tumpa uiparavo tecove opa mbae vae güinoi vaerã vae reta. ⁴⁹ Jare Tumpa iñee uñemai opaete jocua ivi rupi. ⁵⁰ Ërei judío reta omboemboe cuña tenta guasu pegua reta itenondegua uipiu Tumpa vae reta jare cuimbae tenta guasu pegua reta itenondegua reta, jare umbipi uiporaraca Pablo jare Bernabé pe, jare omombo reta ivi güi. ⁵¹ Jayave Pablo jare Bernabé umitimo ivicui ipi güi, uechaca vaerã tenta guasu pegua reta co teco güinoi, jare yugüiraa tenta guasu Iconio coti. ⁵² Ërei upurugüirovia vae reta uyerovia ete, jare tinee Espiritu Santo pe.

14

Pablo jare Bernabé Iconio pe

¹ Jare Iconio pe Pablo jare Bernabé uique pãve judío reta itupao pe, jare imiari reta joco pe ñugüinoi vae reta pe. Jáeramo jeta judío reta jare judío mbae vae reta upurugüirovia. ² Ërei judío upurugüirovia mbae vae reta omboemboe judío mbae vae reta, jare umitarẽica chupe reta upurugüirovia vae reta. ³ Jáeramo Pablo jare Bernabé upita joco pe ima pegua, jare imiari ñru vae reta pe uquiye mbae reve yandeYa re. Jare yandeYa uechaca añete co iñee mbiacavi regua miacañi Pablo jare Bernabé uyapo vae reta rupi. ⁴ Ërei tenta guasu pegua reta uyembiyao uyugüi. Amocue uñemiñru judío reta ndive, jare amocue uñemiñru Jesús jemimondo reta ndive. ⁵ Jare judío reta jare judío mbae vae reta juvicha reta ndive uipota upurupeña Jesús jemimondo reta re, uyapo vaerã tẽi icavi mbae vae chupe reta jare uyapi vaerã tẽi ita pe. ⁶ Ërei Pablo jare Bernabé cua uicuaa yave, osi yugüiraa tenta guasu reta Listra jare Derbe pe jare cua mocui tenta guasu iyipi rupi. Cua tenta guasu reta co ivi Licaonia pegua. ⁷ Jare joco pe vi jae reta umimbeu ñee icavi vae.

Listra pegua reta uyapi Pablo ita pe

⁸ Jare Listra pe uguapi oĩ penti cuimbae ipuere mbae uguata vae. Ichi jie güi oa güive ipuereã etei uguata. ⁹ Cua cuimbae uyandu Pablo imiari oĩ. Jare Pablo umae ngatu jese, jare uecha güinoi mburugüirovia ucuera vaerã. ¹⁰ Jayave Pablo iñeeãta reve jei chupe:

—Epüa iyemboi.

Jare jae upüa voi uyemboi jare umbipi uguata. ¹¹ Jayave yati vae reta uecha yave Pablo uyapo vae, jei reta Licaonia pegua reta iñee pe iñeeãta reve:

—Tumpa cuimbae reta rami vae reta ugüeyi yandeve.

¹² Jare jae reta umbijee Bernabé Júpiter, jare umbijee Pablo Mercurio. Echaã Pablo icatu imiari vaerã. ¹³ Jare jocua tumpa-raanga Júpiter jee vae itupao oĩ tenta guasu jovai. Jare Júpiter isacerdote güeru güeye reta jare mbaepoti reta tenta guasu jonque pe, jare jae jare yati vae reta uipota tẽi uyuca güeye reta umbiadora vaerã Pablo jare Bernabé. ¹⁴ Ërei Jesús jemimondo reta cua uicuaa yave, omondoro reta jemimondei, jare osi yati vae reta ipite pe, jare iñeeãta reve jei chupe reta:

¹⁵ —Cuimbae reta, ¿maera pa piyapo cua? Ore perapicha retaño co. Jare numimbeu peve piyero vaerã cua icavi mbae vae piyapo vae güi Tumpa icove vae coti. Echaã jae uyapo ara, ivi, i guasu jare opaete mbaembae ime ñugüinoi pipe vae reta —jei reta—. ¹⁶ Tumpa umaño aracae pegua reta re uyapo vaerã jae reta uipota vae. ¹⁷ Ërei jae jecuaño uyecuaa chupe reta mbaembae icavi vae jae uyapo vae rupi. Echaã jae ombou yandeve ama jare umbicuacuaa cavi temiti reta yanderembiurã ime vaerã. Jare jucuarãi uyapo, yayerovia vaerã —jei reta.

¹⁸ Cua jei reta yave, añapea umbiavai tenta guasu pegua reta agüiye vaerã uyuca güeye reta umbiadora vaerã.

¹⁹ Jayave amocue judío reta yugüeru Antioquía jare Iconio güi. Jare reta omboemboe tenta guasu pegua reta uyapi vaerã Pablo ita pe. Jare uyapi ma yave, umbitiriri güiraa tenta guasu güi ñana coti. Umano echa chupe reta. ²⁰ Ërei upurugüirovia vae reta yugüeru uyembati yave Pablo iyipi rupi, Pablo upüa oo ye tenta guasu pe. Jayave piareve pe oo Bernabé ndive Derbe coti.

²¹ Jare umimbeu reta ñee icavi vae Derbe pe, jare jeta Derbe pegua reta güirovia Jesús re. Jayave Pablo jare Bernabé yugüeru ye Listra, Iconio jare Antioquia pe. ²² Jare cua tenta guasu reta pe jae reta umiatangātu upurugüirovia vae reta, jare umbiaracuaa jecuaeño güinoi vaerã mburugüirovia Tumpa coti. Jare jei vi chupe reta:

—Jetañotai co yaiporara yaique vaerã Tumpa iporoyocua pe.

²³ Jare upurugüirovia vae reta uyembatimbatí vae pe Pablo jare Bernabé uiparavo upurugüirovia vae reta itenondegua retarã. Jare uyerure reta uyecuacu reve tembíu güi. Uyerure yandeYa pe jae uyandareco vaerã cua itenondegua reta re. Echa'ã güirovia reta ma yandeYa re.

Yugüiraa ye Antioquia Siria pegua pe

²⁴ Jayave Pablo jare Bernabé uasa Písidia rupi, jare yugüiraa uvãe Panfilia pe. ²⁵ Jayave umimbeu ma yave Tumpa ñee Perge pe, yugüiraa tenta guasu Atalia pe. ²⁶ Jare joco güi uasa i guasu rupi Antioquia coti. Echa'ã upurugüirovia vae reta Antioquia pegua tenonde yave uyerure Tumpa pe ipiacavi oí vaerã jae reta ndive cua mbaraviqui opa ma uyapo vae re. ²⁷ Jare yugüiraa uvãe yave, Pablo jare Bernabé uyembatí upurugüirovia vae reta ndive, jare umimbeu chupe reta opaete Tumpa uyapo chupe reta vae, jare quirãí Tumpa umaeño judío mbae vae reta re upurugüirovia vaerã. ²⁸ Jare upita reta joco pe ima pegua upurugüirovia vae reta ndive.

15

Jerusalén pe uyeyapo vae

¹ Jare yugüeru Judea güi amocue cuimbae reta, jare jei upurugüirovia vae reta pe:

—Piñemicircuncidaca'ã yave Moisés iporoyocuí pe jei rami, ndarau pepuere piyembiasaca.

² Jare Pablo jare Bernabé jeta uyeaca jae reta ndive cua re. Jayave upurugüirovia vae reta uiparavo Pablo jare Bernabé jare İru vae reta jae reta ipite güi, yugüiraa vaerã Jerusalén pe uyemingueta cua re Jesús jemimondo reta jare upurugüirovia vae reta itenondegua reta ndive.

³ Jayave İru upurugüirovia vae reta omondo ma yave, jae reta uasa Fenicia jare Samaria rupi jare umimbeu joco pegua reta quirãí judío mbae vae reta uyerova Tumpa coti. Jare umbiyerovia ete upurugüirovia vae reta.

⁴ Jare yugüiraa uvãe yave Jerusalén pe, Jesús jemimondo reta jare opaete upurugüirovia vae reta itenondegua reta ndive umbiresive cavi reta. Jare Pablo jare Bernabé umimbeu chupe reta opaete Tumpa uyapo chupe reta vae. ⁵ Èrei amocue fariseo pegua upurugüirovia vae reta upãa jare jei:

—Icavi co ñamicircuncidaca vaerã, jare yayocuí uyapo vaerã Moisés iporoyocuí.

⁶ Jayave Jesús jemimondo reta jare upurugüirovia vae reta itenondegua reta uyembatí, uyemingueta vaerã cua re. ⁷ Jare uyeaca ma uyupii yave, Pedro upãa jare jei chupe reta:

—Cheriví reta, picuaa catu co quirãí caramboe yave Tumpa cheparavo amimbeu vaerã judío mbae vae reta pe ñee icavi vae, jae reta güirovia vaerã. ⁸ Tumpa uicuaa opaete vae ipia pe oí vae, jare jae uechaca jae reta güirovia co. Echa'ã umee chupe reta Espiritu Santo, yandeve umee rami —jei Pedro—. ⁹ Jare Tumpa mbiyuavi'ã etei yandegüi. Echa'ã oyoë mã ipia, jae reta güirovia yave —jei—. ¹⁰ Jayave çmaera pa pipota pembiavai Tumpa? Echa'ã mboroyocuí penti tivita rami. Pe reta pipota pembivita jocua upurugüirovia vae reta. Èrei yandetenondegua reta jare yande vi yandepuere'ã yavoí —jei—. ¹¹ Yande yarovia yayembiasaca ma co yandeYa Jesús ipiacavi re, jae reta rami —jei.

¹² Jayave opaete yati vae reta iquĩño, jare uyapisaca Bernabé jare Pablo jei vae re. Jare reta umimbeu chupe reta opaete miacañi reta Tumpa uyapo jae reta rupi judío mbae vae reta ipite pe vae. ¹³ Jare jae reta opa imiari yave, Jacobo jei:

—Cheriví reta, yuapisaca cheré. ¹⁴ Simón umimbeu ma yandeve quirãí Tumpa jaeramo etei uparaviqui judío mbae vae reta ipite pe, uiparavo vaerã chugüi reta amocue jae jee umbiadora vaerã —jei—. ¹⁵ Cua re co jei vi Tumpa ñee aracae umimbeu vae reta. Uyecuatiã oí cuarãí:

¹⁶ Cua jaicue rupi ayu yeta,

jare ayapo yeta David jenta opa usururu vae' —jei yandeYa—.

'Amupãa yeta usururucue, jare ambipiauta,

¹⁷ opaete İru ivi pegua reta chereca vaerã,

jare opaete judío mbae vae reta.

Che co jae reta iYa.

¹⁸ Che aicuaaca cua aracae güive' —jei yandeYa.

Jucuarāi uyecuatía oĩ —jei chupe reta—. ¹⁹ Jáeramo che jae agüiye yamambeco joca judío mbae vae uyerova Tumpa coti vae reta. ²⁰ Ērei yaicuatía chupe reta agüiye vaerā jou soo tumpa-raanga pe uñemee vae, jare maemimba uyeyuvi vae isoo, jare soo jugüi reve, jare agüiye vaerā uyapo aguasa —jei Jacobo—. ²¹ Echa'ã aracae güive yugüireco tenta guasu guasu pe Moisés iporoyocui umimbeu vae reta. Opa mbutuu ara jae reta umingueta Moisés iporoyocui itupao reta pe —jei.

²² Jayave Jesús jemimondo reta jare opaete upurugüirovia vae reta itenondegua reta ndive jei icavi co uyeparavo vaerā amocue cuimbae reta jae reta ipite güi, omondo vaerā Antioquía pe Pablo jare Bernabé ndive. Jayave uiparavo Judas Barsabás jare Silas. Jae reta co upurugüirovia vae reta itenondegua reta. ²³ Jare jae reta güiraa tupapire. Cua tupapire pe jei cuarāi: “Ore co jae Jesús jemimondo reta jare opaete upurugüirovia vae reta itenondegua reta ndive. Nomondo numbisaluda opaete judío mbae vae upurugüirovia vae Antioquía, Siria jare Cilicia pegua reta. ²⁴ Jeräcua oreve quirāi amocue orepite güi yugüiraa pemambeco. Jucuarāi uyapo reta, yepe tēi ore ndoyocui'ã. Jáeramo pe reta picuaa'ã mbae piyapo vaerā. Echa'ã jei reta piñemicircuncidaca vaerā jare piyapo vaerā mboroyocui pe uyecuatía oĩ vae. ²⁵ Nduyemingueta ma cua re, jare ore opaete ndoe icavi co uyeparavo vaerā amocue orepite güi, nomondo vaerā pecoti Bernabé jare Pablo ndive. Nduau co Bernabé jare Pablo. ²⁶ Jae reta iquirēi umee jecove yandeYa Jesucristo pe uyeyocui vaerā. ²⁷ Jáeramo nomondo pepi Judas jare Silas. Jae reta iñee pe etei umimbeuta vi peve cua. ²⁸ Ore ndarau pumbiavai. Cua mboviño numimbeuta peve. Cua icavi Espiritu Santo pe jare oreve vi. ²⁹ Agüiye peu soo tumpa-raanga pe uñemee vae, jare maemimba uyeyuvi vae isoo, jare soo jugüi reve. Jare agüiye piyapo aguasa. Cua ore ndoe peve vae piyapo yave, icavita pico. Tumpa ndiveño.” Jucuarāi uyecuatía oĩ tupapire pe.

³⁰ Jayave uyemondoca vae reta yugüiraa uvãe Antioquía pe. Jare umbati yave upurugüirovia vae reta, umee chupe reta tupapire. ³¹ Jare opa umingueta yave, opareve uyerovia cua ñee umbipiacatu vae re. ³² Jare Judas jare Silas Tumpa iñee umimbeu vae reta co, jare jeta uyemingueta upurugüirovia vae reta pe, umbipiacatu jare umimirāta vaerā. ³³ Jare ima ma joco pe ñugüinoi yave, upurugüirovia vae reta omondo cavi ye ombou vae reta coti. ³⁴ Ērei icavi echa Silas pe upita vaerā joco pe. ³⁵ Jare Pablo jare Bernabé upita Antioquía pe oporomoe Tumpa iñee re, jare umimbeu ñee icavi vae jeta İru vae reta ndive.

Pablo ueya Bernabé, jare oo ye umimbeu ñee icavi vae

³⁶ Mbovi ara rupi Pablo jei Bernabé pe:

—Yaa ye yapou upurugüirovia vae reta pe opaete tenta guasu yamimbeu ma yandeYa iñee vae reta rupi, yaecha vaerā quirāi ra ñugüinoi.

³⁷ Jare Bernabé uipota tēi güiraa jae reta jupie Juan Marcos. ³⁸ Ērei Pablo jei icavi'ã güiraa vaerā jae reta jupie. Echa'ã Juan Marcos ou ye Panfilia güi chugüi reta, jare oo'ã jae reta jupie Tumpa iparaviqui uyapo vaerā. ³⁹ Jare uyeaca reta uyupii cua re. Jáeramo uyembiyao reta uyugüi. Marcos oo Bernabé jupie, jare jae reta uasa i guasu rupi Chipre pe. ⁴⁰ Ērei Pablo uiparavo Silas iguatañrurã, jare upurugüirovia vae reta uyerure yandeYa pe ipiacavi oĩ vaerā jae reta ndive. Jayave jae reta yugüiraa. ⁴¹ Jare uasa reta ivi Siria jare Cilicia rupi umiatangātu reve upurugüirovia vae reta uyembatimbatu vae rupi.

16

Timoteo oo Pablo jare Silas jupie

¹ Jayave yugüiraa uvãe Derbe pe, jare joco güi yugüiraa Lистра pe. Jare joco pe ico penti upurugüirovia vae Timoteo jee vae. Ichi co jae penti judía upurugüirovia vae, jare tu co jae penti griego. ² Upurugüirovia vae Lистра jare Iconio pe ñugüinoi vae reta uyemingueta cavi Timoteo re. ³ Pablo uipota güiraa Timoteo jae reta jupie. Jáeramo umicircuncidaca, jocoropi judío ñugüinoi vae reta jeco pegua. Echa'ã opaete vae uicuaa jae tu griego co. ⁴ Jare yugüiraa rambueve tenta guasu reta rupi, umimbeu upurugüirovia vae reta pe Jesús jemimondo reta jare upurugüirovia vae reta itenondegua Jerusalén pe ñugüinoi vae reta uicuatía chupe reta vae, jae reta uyapo vaerā. ⁵ Jayave upurugüirovia vae reta uyembatimbatu vae rupi uñemiatangātu Tumpa coti, jare opa ara rupi İru vae reta güirovia Jesús re jare uñemirru jae reta ndive.

Cuimbae Macedonia pegua

⁶ Jare Pablo jare jae ndive ñugüinoi vae reta uasa ivi Frigia jare Galacia rupi. Jare Espiritu Santo oyopia reta, agüiye vaerā umimbeu Tumpa iñee Asia pe. ⁷ Jare ivi Misia pe yugüiraa uvãe yave, uipota tēi yugüiraa ivi Bitinia pe. Ērei Espiritu Santo umaño'ã yugüiraa vaerā. ⁸ Jayave uasa reta coiño Misia güi, jare yugüiraa uvãe tenta guasu Troas pe. ⁹ Jare pitu yave

Pablo uecha ique pe penti cuimbae ivi Macedonia pegua uyemboi oĩ joco pe. Jare cuimbae uyerure Pablo pe:

—Ecuá Macedonia pe orembori.

¹⁰ Jare cua uecha ma yave, jupivoiño nduipota ndoo Macedonia coti. Echa'ã nduicuaa ma Tumpa orereni numimbeu vaerã Macedonia pegua reta pe ñee icavi vae.

Peresoriru pe Filipos pe

¹¹ Jayave ndoo nduasa simi i guasu rupi Troas güi ivi Samotracia pe. Jayave piareve pe ndoo nuvãe tenta guasu Neápolis pe. ¹² Jayave joco güi ndoo tenta guasu Filipos pe. Cua co tenta guasu tenondegua ivi Macedonia pegua, jare cua pe yugüeru yugüereco vaerã Roma pegua reta. Cua tenta guasu pe ndupita mbovi ara. ¹³ Jare mbutuu ara pe ndoo tenta guasu jonque rupi iãca jembei pe. Joco pe oĩ penti yerurerenda. Jare joco pe nduguapi ma yave, oremiari cuña joco pe yati vae reta pe. ¹⁴ Jare penti cuña Lidia jee vae tenta guasu Tiatira pegua uyapisaca oĩ. Cua cuña umbiadora Tumpa. Jae co temimonde pĩta vae umee vae. Jare yandeYa uparaviqui ipia pe, jae uyapisaca cavi vaerã Pablo jei vae re. ¹⁵ Jare jae jare jarentã reta uyembibautizaca ma yave, jae jei oreve:

—Perovia yave che arovia cavi yandeYa re, peyu pepita cherenta pe.

Jare oremiñera ndupita vaerã joco pe.

¹⁶ Jare ndoo yave yerurearenda pe, orerovãiti penti cuñatai aña oya jese vae. Cua cuñatai iya reta umingana jeta corepoti jese. Echa'ã cuñatai umimbeu ñru vae reta pe aña imbaepuere reta mbae uyeyapota vae. ¹⁷ Cua cuñatai oo oreraicue, jare iñeeãta reve jei:

—Cua cuimbae reta Tumpa ivate pegua jembiocui reta co. Jae reta umimbeu yandeve quirãi yandepuere yayembiasaca —jei.

¹⁸ Jare jeta ara jucuarãi uyapo cuñatai. Jayave cua umambeco Pablo, jare jae uyerova jei aña pe:

—Jesucristo jee re ndoyocui: ¡Esiri chugüi!

Jare jupivoiño aña usiri chugüi.

¹⁹ Jare cuñatai iya reta uicuaa yave uminganata'ã ma co jese, uipisi reta Pablo jare Silas, jare güiraa reta plaza pe mburuvicha reta pe. ²⁰ Jare mburuvicha reta pe güiraa ma yave, jei reta:

—Cua cuimbae reta judío reta co, jare umambeco ete ñanerenta guasu pegua reta. ²¹ Jupi'ã yambiresive vaerã ani yayapo vaerã cua moromboe umimbeu yandeve vae. Echa'ã yande Roma pegua reta co —jei reta mburuvicha reta pe.

²² Jayave yati vae reta penti rami uepeña reta. Jare mburuvicha reta omondo Pablo jare Silas jemimonde reta, jare uinupaca ivira pe. ²³ Jare jeta ma uinupaca reta yave, umiingueca reta peresoriru pe. Jare oyocui reta peresoriru iyandarecoa uãro cavi vaerã, agüiye vaerã osi. ²⁴ Cua uyandu yave, peresoriru iyandarecoa umiingueca reta peresoriru japipe coti ete oĩ vae pe, jare oñono ipi iviracua pe.

²⁵ Ërei piare mbite ma yave Pablo jare Silas uyerure Tumpa pe, jare ucanta ñugüinoi umbiadora Tumpa. Jare ñru pereso reta uyapisaca ñugüinoi jese reta. ²⁶ Jare aramoioño tanta ucãta ivi, jare uñemicãta peresoriru iguapica. Jare jupivoiño uyepea opaete onque reta, jare uyera opaete cadena pereso reta uñeapiti pipe vae reta. ²⁷ Jayave peresoriru iyandarecoa usareco, jare uecha uyepea ñugüinoi peresoriru jonque reta. Jayave uequi iquisepucu jiru güi, uyeyuca vaerã. Echa'ã jae jei tẽi pereso reta opa ma co osi. ²⁸ Ërei Pablo iñeeãta reve jei:

—Agüiye iyeyuca. Echa'ã opareveño noĩ cua pe —jei.

²⁹ Jayave peresoriru iyandarecoa ueni quia güeru vaerã chupe tembipe. Jayave osi peresoriru japipe pe, jare uyeatica Pablo jare Silas jovai. Uriri oĩ uquiye ramo. ³⁰ Jayave güinoẽ reta oca pe jare jei chupe reta:

—Carai reta, ¿mbae pa ayapota ayembiasaca vaerã?

³¹ Jayave jae reta jei chupe:

—Erovia yandeYa Jesucristo re, jare ndiyembiasacata co, jare nerenta pegua reta vi.

³² Jayave jae reta umimbeu Tumpa iñee chupe jare opaete jenta pegua reta pe. ³³ Jare jocua ora vto peresoriru iyandarecoa güiraa Pablo jare Silas oyoe ipere. Jayave jae jare opaete jenta pegua reta uyembibautizaca. ³⁴ Jayave peresoriru iyandarecoa güiraa jenta pe umingarü Pablo jare Silas. Jare jae jare opaete jenta pegua reta uyerovia ete. Echa'ã güirovia reta ma Tumpa re.

³⁵ Jare cõe ma yave, mburuvicha reta ombou amocue sundaro reta jei vaerã:

—Iyora jocua cuimbae reta.

³⁶ Jare peresoriru iyandarecoa umimbeu cua ñee Pablo pe. Jei chupe:

—Mburuvicha reta ombou cheocui poyora vaerã. Jáeramo añave pepuere peẽ jare peo cavi.

³⁷ Ërei Pablo jei sundaro reta pe:

—Mburuvicha reta orenupaca opaete vae jovaque orereco mbae reve, jare orempiñgüeca peresoriru pe, yepe tēi ore co jae romano reta. Jare añave uipota oreyoraca viari. Ndarau uyapo jucuarāi. Tuyugüeru jae reta etei oreyora vaerā —jei.

³⁸ Jayave sundaro reta yugüiraa umimbeu cua ñee mburuvicha reta pe. Jayave mburuvicha reta uquiye, uicuaa yave jae reta romano reta co. ³⁹ Jayave yugüeru peresoriru pe ueca vaerā ñee cavi Pablo jare Silas pe. Jayave güinoē oca pe, jare umiñera yugüiraa vaerā tenta guasu güi. ⁴⁰ Jayave Pablo jare Silas yugüiraa peresoriru güi Lidia jenta pe. Jare uecha upurugüirovia vae reta, jare umbiaracuaa. Jayave yugüiraa joco güi.

17

Tecorai Tesalónica pe

¹ Pablo jare Silas uasa yave tenta guasu Anfípolis jare Apolonia rupi, yugüiraa uvāe tenta guasu Tesalónica pe. Joco pe oī penti judío reta itupao. ² Jare Pablo oo tupao pe. Echa'ā jucuarāi uyapo opaete tenta guasu reta rupi. Jare mbapi mbutuu ara uyeaca judío reta ndive. ³ Uechaca chupe reta Tumpa iñee uyecuatía oī vae, jare uicuaaca quirāi Cristo uiporarañotai co jare icove yeñotai co ou umanocue vae reta ipite güi. Jare jei chupe reta:

—Cua Jesús che amimbeu peve vae co jae Cristo.

⁴ Jayave amocue güirovia Pablo jei vae, jare jae reta, jare jeta griego umbiadora Tumpa vae reta, jare jeta cuña tenta guasu pegua reta itenondegua reta uñemiñru Pablo jare Silas ndive. ⁵ Erei judío güirovia mbae vae reta ñacatāa Pablo jare Silas re, jare güeru amocue cuimbae iyaqui vae reta. Jeco pochi co cua cuimbae reta. Jayave umbati jeta ñru vae reta, jare uyapo tecorai. Jayave upurupañera reta Jasón jenta re ueca tēi Pablo jare Silas. Uipota tēi güiraa tenta guasu pegua reta jovai. ⁶ Erei uvāe'ā chupe reta. Jayave uipisi güiraa Jasón jare amocue upurugüirovia vae reta mburuvicha tenta guasu pegua reta pe, jare iñeeāta reve jei reta:

—Jocua cuimbae umambeco opaete ivi pegua reta vae reta yugüeru vi cua pe. ⁷ Jare Jasón güinoi jenta pe. Jare opaete jae reta oyovaicho César iporoyocui ndive. Echa'ā jei reta ime ñru mburuvicha guasu Jesús jee vae —jei reta.

⁸ Jayave tenta guasu pegua reta jare juvicha reta cua uyandu yave, uyemipi'ā. ⁹ Jare Jasón jare ñru vae reta umbiepi chupe reta yave, jae reta umañeo yugüiraa ye vaerā.

Pablo jare Silas Berea pe

¹⁰ Jare jupivoiño upurugüirovia vae reta omondo Pablo jare Silas pítu yave tenta guasu Berea jee vae coti. Jare jae reta yugüiraa uvāe yave joco pe, yugüiraa judío reta itupao pe. ¹¹ Jare joco pegua judío reta iyaracuaa catu Tesalónica pegua reta güi. Iquirāi uyapisaca Tumpa iñee re, jare opa ara umiñgueta cavi Tumpa iñee uyecuatía oī vae, uicuaa vaerā añete ra Pablo jei vae. ¹² Jare jeta joco pegua reta güirovia. Jare güirovia vi jeta griega reta itenondegua reta, jare jeta griego reta. ¹³ Erei judío Tesalónica pegua reta uicuaa yave Pablo umimbeu Berea pegua reta pe vi Tumpa iñee, yugüiraa joco pe omboemboe umambeco vaerā joco pegua reta. ¹⁴ Jayave upurugüirovia vae reta omondo Pablo i guasu coti. Erei Silas jare Timoteo upita Berea pe. ¹⁵ Jare Pablo jupie yugüiraa vae reta güiraa tenta guasu Atenas pe. Jayave Pablo oyocui jae reta umimbeu vaerā Silas jare Timoteo pe yugüeru vaerā icoti immbae, ipuere yave. Jayave jae reta yugüeru ye Berea coti.

Pablo Atenas pe

¹⁶ Jare Pablo uāro oī rambueve Atenas pe, uecha yave jeta tumpa-raanga reta ñugüinoi tenta guasu rupi, uyemipi'ā. ¹⁷ Jayave uyeaca judío reta itupao pe judío reta jare ñru umbiadora Tumpa vae reta ndive. Jare uyeaca vi opa ara plaza pe joco pe ñugüinoi vae reta ndive. ¹⁸ Jare amocue iyaracuaa vae reta uyeaca Pablo ndive. Jae reta co Epicúreo jare Estoico jee vae reta. Amocue jei:

—¿Mbae ra uipota jei cua iyeminguetase vae?

Jare ñru vae reta jei:

—Aramoi jae umimbeu ñru tumpa yaicuaa mbae vae reta regua.

Echa'ā Pablo umimbeu chupe reta ñee icavi vae Jesús regua, jare quirāi jae icove ye ou umanocue vae reta ipite güi. ¹⁹ Jare jae reta güiraa Pablo ivitu Areópago jee vae pe. Jare jei reta chupe:

—Emimbeu oreve mbae nunga moromboe ipiau vae ra cua nemiari jese vae. ²⁰ Echa'ā cua nemimbeu ma oreve vae jaeramo nduyandu. Jáeramo nduipota nduicuaa mbae ra uipota jei cua —jei reta.

²¹ Echa'ā opaete Atenas pegua reta jare queti güi yugüeru yugüireco joco pe vae reta jañeo ma yugüireco imiari vaerā jare uyapisaca mbae ipiau vae re.

²² Jayave Pablo uyemboi Areópago pe jeta vae reta ipite pe, jare jei chupe reta:

—Cuimbae Atenas pegua reta, aecha ma pe reta pemiadora co tumpa reta. ²³ Echa'ã aguata rambueve tenta guasu rupi, amae jocua pemiadora vae reta re, jare aecha penti yemiadorarenda, jare jese uyecuatía oĩ cuarã: 'Tumpa yaicuaa mbae vae'. Jucuarã uyecuatía oĩ. Jáeramo tamimbeu peve pe reta picuaa'ã reve pemiadora vae —jei—.

²⁴ Tumpa uyapo ivi jare opaete oĩ pipe vae. Jae co ara jare ivi iYa. Jae ico'ã yemiadorarenda vae rupi yande yayapo vae reta pe. ²⁵ Tumpa ueca'ã etei ivi pegua reta umee vaerã mbae chupe. Echa'ã jae etei co umee yandevete tecove, jare ñaneputú, jare opaete mbaembae —jei chupe reta—.

²⁶ Jare Tumpa uyapo penti cuimbae, jare opaete ivi pegua reta ñemoñaeta reta co. Jucuarã Tumpa uyapo, jae reta yugüireco vaerã opaete ivi iárambo. Tumpa etei co umee quirã yave ivi pegua reta yugüireco vaerã, jare umbiyaoyao ivi chupe reta yugüireco tee tee vaerã —jei Pablo—. ²⁷ Opaete cua Tumpa uyapo, ivi pegua reta ueca vaerã Tumpa, jare aramoi uvãe vaerã iyupe. Echa'ã añetete jae mbiri'ã oĩ penti penti güi. ²⁸ Jese yaicove jare ñami, yaico vaerã. Jare jucuarã ivi amocue pepite pe oĩ vae jei uicuatía vae pe: 'Echa'ã jese yaico' —jei, jei—. ²⁹ Jare Tumpa umee yandevete tecove ramo, icavi'ã vae vaerã Tumpa co jae oro pegua, ani corepoti pegua, ani ita pegua. Echa'ã cuimbae reta uyapo cua nunga iyaracuaa rupiño. ³⁰ Aracae ivi pegua reta uicuaa'ã ramo, Tumpa umaño jese reta. Èrei añave jae oyocui opaete ivi pegua reta ueya vaerã iyemingueta icavi mbae vae ipia pe oĩ vae —jei chupe reta—. ³¹ Echa'ã Tumpa uiparavo ma penti ara uãaca vaerã jupi rupi ivi pegua reta jocua cuimbae jae uiparavo vae pe. Jare cua uicuaaca opaete ivi pegua reta pe. Echa'ã Tumpa umbijecove ye jocua uiparavo vae güeru umanocue vae reta ipite güi —jei.

³² Jare uyandu reta yave icove ye ou umanocue vae reta ipite güi vae regua, amocue vae oyoyai. Èrei ñru vae reta jei Pablo pe:

—Nduyapisaca yeta nderé ñru ara pe cua re.

³³ Jayave Pablo oo chugüi reta. ³⁴ Èrei amocue vae güirovia Tumpa ñnee, jare uñemiñru Pablo ndive. Cua reta ipite pe ñugüinoi penti Areópago pegua Dionisio jee vae, penti cuña Dámaris jee vae, jare ñru vae reta.

18

Pablo Corinto pe

¹ Cua jaicue rupi Pablo oo Atenas güi tenta guasu Corinto pe. ² Jare uñevãe joco pe penti judío Aquila jee vae ndive. Jae co Ponto pegua. Cua judío ou ramo uvãe Italia güi jembireco Priscila jee vae ndive. Echa'ã mburuvicha guasu Claudio jee vae oyocui opaete judío reta yugüiraa vaerã Roma güi. Jayave Pablo opou ipi. ³ Jare Pablo icatu uyapo Aquila iparaviqui. Jáeramo Pablo upita jae reta ndive, jare uparaviqui pãve reta. Jae reta co o reta guacapi pegua iyapoa. ⁴ Jare opa mbutuu ara Pablo uyeaca judío reta itupao pe. Cua uyapo, judío reta jare judío mbae vae reta güirovia vaerã.

⁵ Jare Silas jare Timoteo yugüeru uvãe yave Macedonia güi, Pablo uñemiatangātu umimbeu vaerã Tumpa ñnee. Umimbeu judío reta pe Jesús co jae Cristo, Tumpa ombou vae. ⁶ Èrei judío reta oyovaicho jae ndive, jare jei reta icavi mbae vae icoti. Jáeramo Pablo umitimo jemimonde, jare jei chupe reta:

—Pecañiteita co, jare pe retaño penoita teco. Che anoi'ã ma teco. Añave güive aata amimbeu judío mbae vae reta pe —jei.

⁷ Jayave oo joco güi cuimbae Justo jee vae jenta pe. Cua cuimbae umbiadora Tumpa, jare jae jenta oĩ judío reta itupao iyipi pe. ⁸ Jare judío reta itupao pegua reta itenondegua Crispo jee vae jare opaete jenta pegua reta güirovia yandeYa re. Jare jeta Corinto pegua reta uyandu Pablo umimbeu vae yave, güirovia jare uyembibautizaca. ⁹ Jare yandeYa jei Pablo pe pïtu yave ique pe:

—Agüiye equiye. Nemiari jare agüiye nequüi. ¹⁰ Echa'ã che añ nde ndive, jare ndarau quía ipuere nderé, uyapo vaerã icavi mbae vae ndeve. Echa'ã ime jeta cheré güirovia vae reta cua tenta guasu pe —jei.

¹¹ Jare Pablo upita joco pe penti año jare seis yasi, jare umimbeu Tumpa ñnee tenta guasu pegua reta pe.

¹² Èrei Galión jee vae ico mburuvicha ivi Acaya pe yave, judío reta oyovaicho penti rami Pablo ndive, jare güiraa mburuvicha upuruãa vae pe ¹³ jare jei reta:

—Cua cuimbae omboe yave tenta guasu pegua reta umbiadora vaerã Tumpa, omboe'ã mboroyocui pe uyecuatía oĩ vae rupi.

¹⁴ Jare Pablo omoëta ma yave ñnee, Galión jei judío reta pe:

—Judío reta, cua cuimbae uyapo yave icavi mbae vae pecoti, ani jeco pochí yave, icavita tēi ayapisaca vaerã peré. ¹⁵ Èrei pipota yave aãa vaerã ñee reta re, tee reta re jare

peporoyocui re, ndarau ayapisaca peré. Pe reta etei pepuere peãa. Echa'ã che aipota'ã aãa cua nunga re —jei chupe reta.

¹⁶ Jayave Galión omondo reta upuruãa vae güi. ¹⁷ Jayave griego reta uipisi judío reta itupao pegua itenondegua Sóstenes jee vae, jare ocua jese mburuvicha upuruãa vae jovai. Ërei Galión uyemambeco'ã etei jese.

¹⁸ Jare cua rendave pe Pablo upita ye jeta ara joco pe. Jayave oo upurugüirovia vae reta güi, jare uasa i guasu rupi Siria coti Priscila jare Aquila jupie. Jare tenta guasu Cencrea pe Pablo uipëpica iñãca. Echa'ã tenonde yave jei Tumpa pe uyapota mbae chupe ndei uipëpica iñãca mbove. ¹⁹ Jare yugüiraa uvãe yave tenta guasu Efeso pe, Pablo ueya Priscila jare Aquila. Jayave uique judío reta itupao pe, jare uyeaca judío reta ndive. ²⁰ Jare judío reta umiñera yave upita vaerã joco pe, uipota'ã. ²¹ Jare oota ma yave chugüi reta, jei:

—Aata co Jerusalén pe, ayapo vaerã pascua uyaro ma oï vae. Ërei Tumpa uipota yave, tayu ye pepi curi —jei.

Jayave oo i guasu rupi Efeso güi.

Pablo oo ye Antioquia güi umimbeu ñee icavi vae

²² Jare oo uvãe yave Cesarea pe, oo umbisaluda vaerã upurugüirovia vae reta Jerusalén pe. Jayave oo joco güi Antioquia pe. ²³ Jare mbovi ara joco pe oï yave, oo umbapi opaete tenta tenta Galacia jare Frigia rupi umiatangätu vaerã opaete upurugüirovia vae reta.

Apolos uñemiñee Efeso pe

²⁴ Jare ou Efeso pe penti judío Alejandría pegua Apolos jee vae. Cua cuimbae ipuere imiari cavi, jare uicuaa cavi Tumpa iñee uyecuatía oï vae. ²⁵ Cua cuimbae uyemboe ma yandeYa iporomboe re. Jatangätu, jare imiari jare oporomboe jaecavi yandeYa re. Ërei uicuaa moromboe Juan upurumbibautizase jese vaenö. ²⁶ Jae umbipi imiari uquiye mbae reve judío reta itupao pe. Ërei Priscila jare Aquila uyandu yave jei vae, güiraa jenta pe, jare omboe cavi quirã i yaico vaerã Tumpa coti vae re. ²⁷ Jare Apolos uipota oo yave Acaya pe, upurugüirovia vae reta umiatangätu jese, jare uicuatía reta penti tupapire upurugüirovia vae reta pe, umbiresive cavi reta vaerã Apolos. Jare jae oo uvãe yave joco pe, ombori jocua Tumpa ipiacavi jeco pegua upurugüirovia vae reta. ²⁸ Jae imiari mbaepuere reve, jare umiamiri judío reta tenta guasu pegua reta jovaque. Echa'ã uechaca chupe reta Tumpa iñee uyecuatía oï vae pe Jesús co jae Cristo.

19

Pablo Efeso pe

¹ Apolos Corinto pe oï rambueve, Pablo ou uvãe Efeso pe, opa yave umbapi opaete tenta guasu-rai-rai guarasi oë vae coti ñugüinoi vae reta rupi. Jare Efeso pe uñevãe amocue upurugüirovia vae reta ndive. ² Jare Pablo upirandu chupe reta:

—¿Ou pa Espiritu Santo peve pepurugüirovia yave?

Jae reta jei chupe:

—Nduicuaa'ã etei Espiritu Santo ou vae regua.

³ Jayave Pablo upirandu chupe reta:

—¿Mbae nunga moromboe re pa piyembibautizaca?

Jare jae reta jei chupe:

—Juan iporomboe re nduyembibautizaca.

⁴ Jayave Pablo jei chupe reta:

—Juan umbibautiza jocua reta ueya iyemingueta icavi mbae vae ipia pe oï vae. Jare jei chupe reta güirovia vaerã outa jaicue rupi vae re. Cua uipota jei Jesús re. Jesús co jae Cristo —jei—. ⁵ Jare cua uyandu yave, uyembibautizaca yandeYa Jesús jee re —jei chupe reta.

⁶ Jayave Pablo oñono ipo jese reta, jare ou chupe reta Espiritu Santo, jare jae reta uyemingueta ambie vae iñee pe, jare umimbeu reta Tumpa iñee. ⁷ Jare cua cuimbae reta uepiti doce rupi.

⁸ Jayave Pablo oo judío reta itupao pe, jare imiari uquiye mbae reve. Jare mbapi yasi uyeaca judío reta ndive Tumpa iporoyocua re. ⁹ Ërei amocue ipiatanta jare uipota'ã güirovia, jare jei reta ñee icavi mbae vae tenta guasu pegua reta jovaque upurugüirovia vae reta ipurugüirovia coti. Jayave Pablo oo chugüi reta, jare güiraa jae ndive upurugüirovia vae reta, jare uyeaca opa ara rupi Tiranno jo tuicha vae pe. ¹⁰ Jare jucuarãi uyapo mocui año. Jáeramo opaete judío jare judío mbae vae Asia pegua reta uyandu ñee yandeYa Jesús regua. ¹¹ Jare Tumpa uyapo miacañi tuicha vae reta Pablo rupi. ¹² Echa'ã ñru vae reta güiraa yave mbaembae Pablo omonde vae imbaerasi vae reta pe, imbaerasi vae reta ucuera, jare aña reta usiri oya jese vae reta güi.

¹³ Jayave amocue judío reta umbipi tēi ueni yandeYa Jesús jee añā reta oya jese vae reta re. Cua nunga judío reta uguata opaete que rupi umbisiri añā reta oya jese vae reta güi. Jae reta jei:

—Poyocui Jesús Pablo umimbeu vae jee re. ¹⁴ Jare penti judío Esceva jee vae güinoi siete tai reta. Esceva co jae penti sacerdote reta itenondegua. Jare cua cuimbae tai reta vi jucuarāi jei añā pe. ¹⁵ Ērei añā jei chupe reta:

—Che aicuaa co Jesús, jare aicuaa catu quía co jae Pablo. Ērei ¿quía pa co pe reta?

¹⁶ Jare jocua cuimbae añā oya jese vae upurupeña jese reta, jare umiamiri. Jare jae reta opa osi jocua tenta güi nani jare ipere reve. ¹⁷ Jare cua jerācua opaete judío jare judío mbae vae Efeso pegua reta pe. Jáeramo opareve uquiye, jare umbiadora yandeYa Jesús jee.

¹⁸ Jare jeta upurugüirovia vae reta yugüeru umimbeu jeco icavi mbae vae ueya ma vae regua. ¹⁹ Jare jeta ipaye vae reta güeru itupapire reta, jare uapi opaete vae jovaque. Jare cua tupapire reta jepi uypapa yave, uepiti cincuenta mil corepoti tī vae. ²⁰ Echa'ā Tumpa iñee mbiri rupi ma uñemai, jare mbaepuere tuicha vae güinoi.

²¹ Cua jaicue rupi Pablo jei oo vaerā Macedonia jare Acaya rupi Jerusalén pe. Jare jae jei:

—Joco güi aata vi co Roma pe.

²² Jayave omondo Macedonia coti mocui imboria reta Timoteo jare Erasto jee vae. Ērei jae upita ye mbovi ara Asia pe.

Tecorai Efeso pe

²³ Jare jocua ara reta pe oī tecorai upurugüirovia vae reta ipurugüirovia re. ²⁴ Echa'ā penti cuimbae Demetrio jee vae umindicui corepoti, jare uyapo tupao-raanga michi vae corepoti pegua reta. Efeso pegua reta umbiadora itumpa-raanga Diana jee vae cua nunga tupao-raanga michi vae pe. Jare Demetrio umbiepi cavi ombori uyapo vae reta pe. ²⁵ Cua cuimbae umbati ombori uyapo vae reta jare ĩru cua nunga mbaraviqui uyapo vae reta, jare jei chupe reta:

—Cuimbae reta, picuaa catu co cua mbaraviqui güi ñamingana yaicocatu vaerā. ²⁶ Jare peecha jare piyandu ma quirāi cua Pablo umbiyerova jeta vae Efeso pe jare opaete seri Asia rupi jae iporomboe pe. Echa'ā jae jei tumpa-raanga cuimbae reta uyapo vae tumpa'ā co reta —jei—. ²⁷ Jare aramoi tenta guasu pegua reta güirōta cua yandeparaviqui. Jare aramoi güirōta vi tumpa cuña uyembadora vae Diana itupao, jare ndarau ma quía umbiadora. Echa'ā añave opaete Asia pegua reta jare opaete ivi pegua reta umbiadora —jei chupe reta.

²⁸ Cua uyandu reta yave, pochi ete, jare iñeeāta reve jei:

—Uyembadora co Diana Efeso pegua.

²⁹ Jare tecorai uñemai opaete tenta guasu rupi. Jare jeta vae penti rami osi tenta guasu pegua reta uyuvanga vae pe. Jare uipisi güiraa joco pe Pablo iguataĩru reta Gayo jare Aristarco. Cua reta co Macedonia pegua. ³⁰ Jayave Pablo uipota tēi uique tenta guasu pegua reta yati ñugüinoi vae pe. Ērei upurugüirovia vae reta umaño'ā jese. ³¹ Jare amocue Asia pegua mburuvicha Pablo ndive uyepocuaa vae reta omondo umimbeu Pablo pe agüiye vaerā oo tenta guasu pegua reta uyuvanga vae pe. ³² Jare opaete yati vae reta iñeeāta, ěrei oyovaque'ā iñee reta. Tecorai tuicha vaño uyapo reta. Echa'ā jeta joco pe ñugüinoi vae reta uicuaa'ā maera ra uyembati joco pe. ³³ Jayave judío reta umiaña jenonde Alejandro jee vae yati vae reta ipite güi, iñee omo'ē vaerā. Jayave Alejandro umupúa ipo umiqui vaerā tēi. Echa'ā uipota tēi imiari tenta guasu pegua reta pe, agüiye vaerā jae reta umbijeco judío reta. ³⁴ Ērei yati vae reta uicuaa yave jae co judío, opaete penti rami mocui ora seri iñeeāta reve jei:

—Uyembadora co Diana Efeso pegua.

³⁵ Jayave tenta guasu pegua reta juvicha umiqui yati vae reta, jare jei chupe reta:

—Cuimbae Efeso pegua reta. Diana co jae tumpa cuña uyembadora vae. Cua tenta guasu pegua reta uyandareco Diana itupao re. Jare uyandareco vi ita Diana echa vae Júpiter güi ou vae re. Opaete vae uicuaa cua —jei—. ³⁶ Jayave ipuere'ā quía cua uicuacu ramo, icavi co pequi vaerā, agüiye vaerā mbae piyapo güirave ndei pepia pe piyemingueta mbove. ³⁷ Echa'ā peru cua cuimbae reta cua pe, yepe tēi oñomi'ā mbae yandetupao güi, jare jei'ā vi mbae icavi mbae vae ñanetumpa cuña coti —jei chupe reta—. ³⁸ Demetrio jare imboria reta uipota yave uñeapo quía re, ime mburuvicha reta ñugüinoi uyapisaca vaerā jese reta. ³⁹ Ērei pipota yave piñeapo ĩru mbae re, mburuvicha reta uyapicatuta, uyembati yave —jei chupe reta—. ⁴⁰ Echa'ā aramoi mburuvicha reta yanembijecota yayapo vae re. Jei tēita yaipota ñañerāro jae reta ndive. Echa'ā yaicuaata'ā mbae ra yaeta chupe reta, jae reta upirandu yandave yave maera ra yayapo cua tecorai —jei.

⁴¹ Jare tenta guasu pegua reta juvicha cua jei yave, opa omondo yati vae reta.

20

Pablo oo Macedonia jare Grecia pe

¹ Opa ma tecorai yave, Pablo ueni upurugüirovia vae reta. Jayave opa umbiaracuaa reta yave, uicüáva jare oo chugüi reta Macedonia coti. ² Jare umbapi opaete jocua tenta guasu reta rupi umbiaracuaa cavi reve upurugüirovia vae reta. Jayave oo uvæ ivi Grecia pe. ³ Jare upita joco pe mbapi yasi. Jare i guasu rupi oota yave joco güi Siria coti, judío reta uyemboemboe uyapo vaerã icavi mbae vae chupe. Jáeramo Pablo jei oota Macedonia rupi. ⁴ Jare yugüiraa jae jupie Sópater Berea pegua, Aristarco jare Segundo Tesalónica pegua reta, Gayo Derbe pegua, Timoteo, jare Tiquico jare Trófimo Asia pegua reta. ⁵ Cua reta yugüiraa orerenonde, jare oreraãro Troas pe. ⁶ Ërei ara reta mbiyape ovu mbae vae pegua uasa yave, ore ndoo i guasu rupi Filipos güi, jare pandepo ara pe ndoo nuvæ Troas pe. Joco pe nuñvæ ñru reta ndive, jare ndupita joco pe siete ara.

Pablo opou Troas pe

⁷ Jare domingo ara pe upurugüirovia vae reta uyembati tembíu umbiyao vaerã uyupe. Jayave Pablo piareve pe oota ramo, ipiare mbite rupi omboe reta. ⁸ Jare jeta tembipe ñugüinoi jocua o ivate vae pe yati ñugüinoi vae pe. ⁹ Jare jocua tenta co mbapi o ivate vae. Jare penti cunumi Eutico jee vae uguapi oí ventana pe, jare tanta oque oí. Jare Pablo jecuae omboe oí rambueve, cunumi oque oí ramo, oa joco güi oca coti ivi pe. Jare ñru vae reta yugüiraa uupi yave, uecha umano ma. ¹⁰ Jayave Pablo ugüeyi jare ipe cunumi iárambo. Jayave uicüáva jare jei:

—Agüiye pepiatiti. Jecoveño oí.

¹¹ Jayave Pablo uyupi ye, jare joco pe ñugüinoi vae reta umbiyao uyupe tembíu, jare ucaru reta. Jayave Pablo icõe omboe. Jayave oo chugüi reta. ¹² Jare joco pe yati vae reta güiraa cunumi icove ye vae, jare ipiacatu reta.

Troas güi Mileto pe

¹³ Jare ore rani ndoo nduasa i guasu rupi tenta guasu Asón pe. Nduipota nuñvæ Pablo ndive joco pe, jae jei rami. Echa'ã jae uipota oo ivi rupi. ¹⁴ Jare nuñvæ yave jae ndive Asón pe, Pablo uyupi chalana guasu pe, jare ndoo päve ivi Mitilene pe. ¹⁵ Jare joco güi ndoo ye i guasu rupi, jare piareve pe ndoo nuvæ ivi Quío jovai. Piareve pe ndoo nuvæ ivi Samos pe. Jayave ndupita ivi Trogilio pe, jare piareve pe ndoo nuvæ tenta guasu Mileto pe. ¹⁶ Pablo iquirëi uasa güirave Efeso güi, agüiye vaerã uyembiavai Asia pe. Echa'ã jae uipota uvæ vaerã Jerusalén pe Pentecostés ara pe, ipuere yave.

Pablo imiari Mileto pe

¹⁷ Jayave Mileto güi Pablo omondo Efeso pe uenica upurugüirovia vae reta itenondegua reta. ¹⁸ Jare jae reta yugüeru uvæ yave Pablo oí vae pe, jae jei chupe reta:

—Pe reta picuaa catu co quirãi aico pe reta ndive tenonde ete Asia pe ayu güive. ¹⁹ Ayeyocui yandeYa pe añemimichi reve jare ayao reve. Judío reta chembiavai ete. Echa'ã jecuaño iquirëi reta uyapo icavi mbae vae cheve —jei—. ²⁰ Aipiu'ã amimbeu vaerã peve opaete icavi peve peguarã vae. Jare pomboc jeta vae ipite pe jare perenta rupi vi. ²¹ Jare amimbeu judío reta jare judío mbae vae reta pe ueya vaerã iyemingueta icavi mbae vae ipia pe oí vae jare uyerova vaerã Tumpa coti, jare güirovia vaerã yandeYa Jesucristo re —jei chupe reta—. ²² Jare añave aa Jerusalén coti, Espíritu Santo chemondo ramo. Jare aicuaa'ã mbae ra uyeyapota cheve joco pe —jei—. ²³ Ërei opaete tenta guasu reta rupi Espíritu Santo umimbeu cheve ñru vae reta cheñonota co peresoriru pe jare aiporarata. ²⁴ Ërei aquiye'ã. Chepia pe ayemingueta'ã etei ayerepi vaerã. Jaeño aipota ambapi cheguata Tumpa coti vae ayerovia reve. Aipota ayapo mbaraviqui yandeYa Jesús umee cheve vae. Echa'ã jecuaño aipota amimbeu ñru vae reta pe ñee icavi vae Tumpa ipiacavi regua —jei Pablo chupe reta—. ²⁵ Amimbeu ma pepite rupi Tumpa iporoyocua regua, jare añave aicuaa catu co pe reta ndarau ma cherecha ye. ²⁶ Jáeramo añave amimbeu peve che anoi'ã etei co teco pecoti —jei—. ²⁷ Echa'ã aipiu'ã etei amimbeu vaerã peve opaete Tumpa jei vae. ²⁸ Jáeramo piñemoa ngatu, jare piyandareco opaete upurugüirovia vae reta re, penti ovecha iyandarecoa ovecha reta re iyandareco rami. Echa'ã Espiritu Santo co preparavo piyandareco vaerã jese reta. Jare pemimbeu Tumpa iñee yandeYa re güirovia vae reta pe, penti ovecha reta iyandarecoa ovecha reta umingaru rami. Echa'ã yandeYa uepi reta jae jugüi pe —jei—. ²⁹ Che aicuaa catu co che aa ma yave, yugüeruta pepite pe ñru vae reta. Cua reta uyapota icavi mbae vae upurugüirovia vae reta pe, yaguapita ou jou ovecha reta rami —jei—. ³⁰ Jare pepite güi etei imeta cuimbae moromboc pichüi vae re oporomboeta vae reta. Cua reta ombopata upurugüirovia vae reta. ³¹ Jáeramo piñemoa ngatu, jare pemandüa quirãi chiyao reve pumbiaracuaa vae re. Mbapi año ma jucuarãi ayapo, ara rupi jare pütu rupi —jei—.

³² Añave ayerure Tumpa pe uyandareco vaerã peré, jare aeya pe reta ndive iñee ipiacavi regua. Echa'ã cua ñee ipuere pemimira'ta jare umee peve pembaerã opaete jocua ñru uñeño'no tee Tumpa peguarã vae reta ndive —jei Pablo—. ³³ Aipota'ã anoi ñru vae icorepoti, ioro jare jemimonde. ³⁴ Pe reta picuaa catu co quirã'i chepo pe etei aparaviqui, mbaembae uata cheve vae anoi vaerã, jare amee vaerã cheñru reta pe —jei—. ³⁵ Opaete rupi aicuaaca ma peve quirã'i icavi co yaparaviqui vaerã, yambori vaerã mbae uata chupe vae reta. Yanemandúa yandeYa Jesús etei jei vae re. Echa'ã jae jei: 'Tumpa umbiyerovia eteta mbae umeeiño vae mbae umbiresive vae güi' —jei, jei Pablo.

³⁶ Jare cua opa ma jei yave, Pablo uyeatica jare uyerure Tumpa pe opaete jae reta ndive. ³⁷ Jayave opaete joco pe ñugüinoi vae reta uyao, jare uicuãva reta Pablo jare uyurupite reta. ³⁸ Jare jae reta tuicha ipiatiti, Pablo jei chupe reta ndarau ma uecha ye ramo. Jayave jae reta yugüiraa jae jupie chalana guasu o'i vae pe.

21

Pablo oo Jerusalén pe

¹ Jare ndoo ma yave chugüi reta, nduasa simi i guasu rupi tenta guasu Cos pe. Jare piareve pe nduasa tenta guasu Rodas pe. Jayave joco güi nduasa tenta guasu Pátara pe. ² Jare nuvãe joco pe chalana guasu oota Fenicia pe vae. Jayave nduyupi pipe, jare ndoo. ³ Jare Chipre nduecha oreaso coti, jare nduasa. Jare jecuae ndoo Siria coti, jare ndoo nuvãe tenta guasu Tiro pe. Echa'ã joco pe chalana guasu ueyata jivita. ⁴ Jare nuñevãe upurugüirovia vae joco pegua reta ndive, jare ndupita joco pe siete ara. Jare jae reta Espiritu Santo rupi jei Pablo pe agüiye vaerã oo Jerusalén pe. ⁵ Jocua ara reta uasa yave, ndoo tenta guasu güi, jare opaete upurugüirovia vae reta jembireco reta jare isambiai reta ndive oremãru. Jayave nduyeatica i guasu jembei pe nduyurure Tumpa pe. ⁶ Jayave nuñecuãva yave jae reta ndive, nduyupi chalana guasu pe, jare jae reta yugüiraa ye jenta pe.

⁷ Jayave Tiro güi ndoo nuvãe tenta guasu Tolemaida pe. Jare joco pe numbisaluda upurugüirovia vae reta, jare ndupita jae reta ipi penti ara. ⁸ Piareve pe ndoo chugüi reta Pablo jupie Cesarea pe, jare joco pe nduique ndupita Felipe ñee icavi vae umimbeu vae jenta pe. Jae co jocua siete vae güi penti. ⁹ Cua cuimbae güinoi irundi tayi Tumpa iñee umimbeu vae. Cua irundi reve ndei umenda. ¹⁰ Jare ndupita joco pe mbovi ara. Jare Tumpa iñee umimbeu vae Agabo jee vae ou Judea güi. ¹¹ Jare jae ou ore no'i vae pe, jare uequi Pablo jumbicuaa. Jayave uñeapiti ipi rupi jare ipo rupi jae jei:

—Cua jei Espiritu Santo: 'Cuarãi Jerusalén pe judío reta uñapitita cua tumbicuaa iya, jare umeeta reta judío mbae vae reta pe' —jei, jei Agabo.

¹² Cua nduyandu yave, ore jare joco pegua reta numiñera tēi Pablo agüiye vaerã oo Jerusalén pe. ¹³ Erei Pablo jei:

—¿Maera pa piyao jare chembipiatiti? Echa'ã aipiu'ã añeapiti vaerã Jerusalén pe. Aipiu'ã vi amano vaerã joco pe yandeYa Jesús jeco pegua —jei.

¹⁴ Jayave ndoe'ã ye ma mbae chupe cua re, orepuere'ã jese ramo. Jayave ndoe:

—Tuyeyapo yandeYa jei vae.

¹⁵ Jare jocua ara reta uasa yave, nduyeyapicatu ndoo Jerusalén coti. ¹⁶ Jare yugüiraa vi orerupie Cesarea güi amocue upurugüirovia vae joco pegua reta. Oo vi jae reta jupie Chipre pegua Mnasón jee vae. Echa'ã ndupitata Mnasón jenta pe. Cua Mnasón tenonde voi güirovia Jesús re.

Uipisi reta Pablo Tumpa jo pe

¹⁷ Jare ndoo nuvãe yave Jerusalén pe, upurugüirovia vae reta orembiresive uyerovia reve. ¹⁸ Jayave piareve pe Pablo oo ore ndive opou Jacobo pe. Jare opaete upurugüirovia vae reta itenondegua reta uyembati joco pe. ¹⁹ Jare opa ma umbisaluda yave, Pablo umimbeu chupe reta quirã'i jae uparaviqui judío mbae vae reta ipite rupi, jare quirã'i Tumpa jeta mbaembae uyapo chupe reta. ²⁰ Jae reta uyandu yave, umbiadora Tumpa. Jayave jei reta Pablo pe:

—Orerivi, ndicuaa ma quirã'i jeta ete judío reta güirovia ma co Jesús re, jare opaete jae reta uñemiatangātu mboroyocui re. ²¹ Erei jerãcua chupe reta quirã'i nde nemboe opaete judío judío mbae vae reta ipite rupi ñugüinoi vae reta agüiye vaerã uyapo Moisés iporoyocui. Echa'ã jerãcua quirã'i nde ndere chupe reta agüiye vaerã umicircuncidaca tai reta, jare agüiye vaerã uyapo yande yayapoñoi vae —jei reta Pablo pe—. ²² ¿Mbae pa yayapota? Uyembatita co jeta vae. Echa'ã jae reta uicuata nde ndeyu ma co cua pe. ²³ Jáeramo iyapo cua ndoeta ndeve vae. Ime cua pe ñugüinoi irundi cuimbae tenonde yave jei mbae uyapota Tumpa pe vae. ²⁴ Eraa cua cuimbae reta jare iyeyoe Tumpa coti mboroyocui jei rami jae reta ndive, jare embiepi iñãca uñeapica reta vaerã. Jayave opaete vae uicuata añetete'ã nererãca chupe reta vae. Echa'ã jae reta uicuata nde vi co ndiyapo

ndico mboroyocui —jei reta—, ²⁵ Èrei yaicuatía ma judío mbae vae upurugüirovia vae reta pe agüiye vaerã uyapo mboroyocui. Jaeño agüiye tou reta soo tumpa-raanga pe uñemee vae, jare soo jugüi reve, jare maemimba uyeyuvi vae isoo, jare agüiye tuyapo aguasa —jei reta.

²⁶ Jayave Pablo oo jocua cuimbae reta jupíe, jare piareve pe uyeyoe Tumpa coti mboroyocui jei rami jae reta ndive, jare uique Tumpa jo pe umimbeu mbae ara pe opata uyeyoe vae. Echa'ã jocua ara penti penti umeeta iofrenda.

²⁷ Jare cua rendave pe siete ara opata ma yave, judío Asia pegua reta uecha Pablo Tumpa jo pe, jare uyapo reta tecorai jeta vae ndive. Jayave uipisi reta Pablo, ²⁸ jare iñeeãta reve jei:

—Cuimbae Israel pegua reta, orembori. Cua cuimbae oporomboc opaete que rupi opaete ñru vae reta oyovaicho vaerã yande ndive, mboroyocui ndive jare cua Tumpa jo ndive. Jare jae güeru griego reta uruique Tumpa jo pe, jare jucuarãi umingüiaca cua o Tumpa oĩ pippe vae —jei reta.

²⁹ Echa'ã tenonde yave uecha reta tenta guasu pe Efeso pegua Tróximo jee vae Pablo ndive. Jare ipia pe uyemingueta tēi Pablo uruique jocua cuimbae Tumpa jo pe.

³⁰ Jare opaete tenta guasu pegua reta pochi. Jáeramo uyembati reta, jare uipisi reta Pablo umbitiriri Tumpa jo güi oca pe. Jare jupivoiño Tumpa jo iyandarecoa reta uyuquenda onque reta. ³¹ Jayave yati vae reta uipota tēi uyuca Pablo. Èrei jerãcua sundaro reta juvicha pe opaete Jerusalén pegua reta uyapo ñugüinoi tecorai. ³² Jare jupivoiño jae osi ou yati vae reta coti sundaro reta jare sundaro reta juvicha reta ndive. Jare tenta guasu pegua reta uecha yave sundaro reta jare juvicha, ocua'ã ma Pablo re. ³³ Jayave sundaro reta juvicha oo Pablo coti jare uipisi. Oyocui sundaro reta uñapiti vaerã mocui cadena pe. Jayave upirandu quia ra co jae jare mbae ra co uyapo. ³⁴ Amocue tenta guasu pegua reta iñeeãta, èrei oyovaque'ã iñee reta. Jare tecorai jeco pegua sundaro reta juvicha ipuere'ã uicuaa mbae ra añete vae. Jáeramo oyocui sundaro reta güiraa vaerã Pablo jae reta yugüireco vae pe. ³⁵ Jare uyupi ñugüinoi yave sundaro reta yugüireco vae pe, sundaro reta ovoi güiraa Pablo, yati vae reta uipota uipisi ramo. ³⁶ Echa'ã opaete yati vae reta yugüiraa sundaro reta jaicue, jare iñeeãta reve jei:

—Tumano jocua cuimbae.

Pablo imiari tenta guasu pegua reta pe

³⁷ Jare sundaro reta uruiqueta ma yave yugüireco vae pe, Pablo jei sundaro reta juvicha pe:

—¿Nemañota pa mbae jae ndeve?

Jae jei Pablo pe:

—¿Ndicuaa pa griego iñee? ³⁸ Caramboe yave penti Egipto pegua omboemboe cuatro mil upuruyuca vae reta uñerãro vaerã mburuvicha reta ndive, jare güiraa ñana pe. ¿Nde pa co jae jocua Egipto pegua? —jei.

³⁹ Jayave Pablo jei chupe:

—Che co jae penti judío Tarso pegua. Jocua tenta guasu oĩ Cilicia pe, jare tuicha co. Emaño tachemiari tenta guasu pegua reta pe —jei.

⁴⁰ Jayave sundaro reta juvicha jei Pablo pe imiari vaerã. Jayave Pablo uyemboi ivate oĩ vae pe, jare umupãa ipo tenta guasu pegua reta coti. Jare opaete vae quii yave, Pablo imiari chupe reta hebreo iñee pe. Jei chupe reta:

22

¹ —Cherivi reta jare cheriquei reta, piyapisaca che jaeta peve chiyee vae re.

² Jare tenta guasu pegua reta uyandu yave jae imiari chupe reta hebreo iñee pe, opareve quii ngatu. Jayave Pablo jei chupe reta:

³ —Che co jae penti judío. Aa Tarso Cilicia pegua pe, èrei acuacuaa cua tenta guasu pe. Gamaliel chemboe cavi yandetenondegua reta iporoyocui re. Che aipota ayapo Tumpa jei vae, opaete pe reta añave pipota rami —jei—. ⁴ Che ayapo icavi mbae vae opaete Jesús re güirovia reve yugüireco vae reta pe. Jare aipisi amiingueca peresorirru pe cuimbae reta jare cuña reta. Ayucaca vi amocue vae —jei Pablo—. ⁵ Sacerdote tenondegua jare opaete tenta guasu pegua reta itenondegua reta ipuere umimbeu peve cheregua. Jae reta uicuatía umee cheve tupapire araa vaerã ñru judío reta pe. Jayave aa Damasco coti, aipisi vaerã tēi Jesús re güirovia vae joco pe ñugüinoi vae reta, jare aru vaerã tēi Jerusalén pe, aiporaraca vaerã tēi chupe reta —jei—.

Pablo jei quirãi güirovia Jesús re

(Hch 9.1-19; 26.12-18)

⁶ Èrei che coiño ma Damasco güi aa yave, guarasi ara mbite rupi yave, aramoño penti tembipe tuicha vae ara güi jembipe cheré. ⁷ Jare aa ivi re, jare ayandu penti ñee jei cheve:

‘Saulo, Saulo, ¿maera pa ndiyapo icavi mbae vae cheve?’⁸ Jayave che jae: ‘¿Quía pa co nde, cheYa?’ Jayave jae jei cheve: ‘Che co jae Jesús Nazaret pegua. Nde ndiyapo icavi mbae vae cheve’ —jei, jei Pablo—. ⁹ Jare che ndive ñugüinoi vae reta uecha co tembipe, jare uquiye reta. Ërei uicuaa’ã mbae jei jocua uyemingueta cheve vae. ¹⁰ Jayave che apirandu: ‘¿Mbae pa ayapota, cheYa?’ Jare yandeYa jei cheve: ‘Epüa ecua Damasco pe, jare joco pe amimbeucata ndeve opaete mbae nderoyocuita jese vae’ —jei, jei—. ¹¹ Jayave che ndive ñugüinoi vae reta chepoco chereraa cheryuvãe Damasco pe. Echa’ã chepuere’ã etei amae, jocua tembipe jembipe cheré vae jeco pegua —jei—. ¹² Jare ico joco pe penti cuimbae Ananías jee vae. Jae uipü Tumpa mboroyocui uyapo reve, jare opaete judío joco pe yugüireco vae reta uyemingueta cavi jese. ¹³ Jae ou chepi. Uyemboi cheyipí pe jare jei: ‘Saulo, nde co jae cherivi. Emae ye.’ Jare jupivoiño chepuere amae, jare aecha Ananías joco pe oí —jei Pablo—. ¹⁴ Jayave jae jei cheve: ‘Yandetenondegua reta iTumpa ndeparavo, ndicuaa vaerã jae jei vae, jare ndeecha vaerã jocua jupi vae, jare ndiyandu vaerã ñnee. ¹⁵ Echa’ã nemimbeuta co jesejua opaete ivi pegua reta pe. Nemimbeuta chupe reta ndeecha jare ndiyandu vae’ —jei, jei—. ¹⁶ ‘¿Maera pa añave neãro neí? Epüa iyembibitizaca ndiyerue reve chupe, nembraeyoa reta uyembai vaerã’ —jei, jei Pablo—.

Jesús omondo Pablo judío mbae vae reta pe

¹⁷ Jayave ayu ye Jerusalén pe, jare ayerure añ rambueve Tumpa jo pe, cheque pe aecha. ¹⁸ Jare aecha Jesús, jare jae jei cheve: ‘Ecuá imambae Jerusalén güi. Echa’ã ndarau uipota güirovia nde nemimbeuta cheregua chupe reta vae’ —jei cheve, jei—. ¹⁹ Jayave che jae chupe: ‘CheYa, jae reta uicuaa catu co quirãi che aase opaete judío reta itupao reta rupi añonoca vaerã peresoriru pe jare ainupaca vaerã nderé güirovia vae reta. ²⁰ Jare uyuca reta yave Esteban nderegua umimbeu vae, che vi añ joco pe, jare icavi cheve imano. Jare che ayandareco upuruyuca vae reta jemimonde re’ —jare chupe, jei—. ²¹ Jayave jae jei cheve: ‘Ecuá. Echa’ã che nomondota mbiri judío mbae vae reta coti’ —jei cheve, jei.

Sundaro reta uipisi Pablo

²² Jare Pablo cua jei yave, tenta guasu pegua reta uipota’ã ma uyapisaca jese. Ñneeãta reve jei reta:

—Tumano jocua cuimbae. Echa’ã icavi’ã ico vaerã —jei reta.

²³ Jare ñneeãta reta rambueve, umbivava jemimonde, jare ivicuii omombo ivate. ²⁴ Jayave sundaro reta juvicha oyocui sundaro reta uruique vaerã Pablo jae reta yugüireco vae pe. Jare oyocui vi uinupa reta vaerã chicote pe upirandu chupe reve, uicuaa cavi vaerã maera ra tenta guasu pegua reta ñneeãta jucuarã icoti. ²⁵ Ërei sundaro reta uñapiti yave timasa pe, Pablo jei sundaro reta juvicha joco pe oí vae pe:

—¿Jupi pa pinupa vaerã penti romano peãa mbae reve?

²⁶ Cua uyandu yave, sundaro reta juvicha oo itenondegua pe jare jei chupe:

—¿Mbae pa ndiyapota? Echa’ã jocua cuimbae penti romano co.

²⁷ Jayave sundaro reta juvicha itenondegua ou Pablo oí vae pe jare jei chupe:

—Emimbeu cheve, ¿romano pa co nde?

Jayave Pablo jei chupe:

—Jae co che.

²⁸ Jayave sundaro reta juvicha itenondegua jei chupe:

—Che jeta ambiepi ayeyapo vaerã romanorã. Jayave Pablo jei chupe:

—Ërei che pipe voi aa.

²⁹ Jayave yugüiraa Pablo güi upiranduta tãi chupe vae reta. Jare sundaro reta juvicha itenondegua uquiye, uicuaa yave jae romano co, uñapitica ramo.

Pablo mburuvicha reta jovai

³⁰ Jare piareve pe sundaro reta juvicha itenondegua uipota uicuaa cavi mbae re ra judío reta umbijeco Pablo. Jáeramo oyora Pablo, jare oyocui sacerdote reta itenondegua reta jare opaete ñru mburuvicha reta uyembati vaerã. Jayave güiraa Pablo oñono jae reta jovai.

23

¹ Jayave Pablo umae ngatu mburuvicha reta re jare jei:

—Cheriquei reta, che jecuaeño aico cavi, chepia icavi anoi vaerã Tumpa coti.

² Jayave sacerdote tenondegua Ananías jee vae oyocui Pablo iyipi pe ñugüinoi vae reta ocua vaerã iyuru re. ³ Jayave Pablo jei chupe:

—Tumpa tocua nderé. Echa’ã nde co jae iguambi tã asi vae rami. Nde ndeguapi co neí cherãa vaerã mboroyocui jei vae rupi. Ërei ndiyavi mboroyocui. Echa’ã ndiyocui reta ocua vaerã cheré —jei.

⁴ Jayave joco pe ñugüinoi vae reta jei chupe:

—¿Maera pa nde ndere ñee icavi mbae vae Tumpa isacerdote tenondegua pe?

⁵ Jayave Pablo jei:

—Cheriquei reta, aicuaa'ã jae co sacerdote tenondegua. Echa'ã uyecuatiã oĩ: 'Ndereta'ã ñee icavi mbae vae nderuvicha coti' —jei.

⁶ Jare Pablo uecha yave amocue jae reta saduceo reta jare amocue fariseo reta, ñeeãta reve jei mburuvicha reta ipite pe:

—Cheriquei reta, che co jae penti fariseo, jare cheru vi co jae penti fariseo. Che arovía umanocue vae reta icove yeta co. Cua jeco pegua pe reta cherãa peĩ —jei.

⁷ Jare cua jei yave, uyembiyao uyugüi yati vae reta, jare fariseo reta uyeaca saduceo reta ndive. ⁸ Echa'ã saduceo reta jei umanocue vae reta ndarau ma icove ye. Jei vi mbaeti co oĩ ángel jare espíritu. Ërei fariseo reta güirovia ime co. ⁹ Jare uyeaca reta uyupii. Jare upüa amocue fariseo pegua mboroyocui re oporomböe vae reta jare jei:

—Ore nuvãe'ã etei teco cua cuimbae re. Aramoi penti espíritu ani ángel imiari chupe. Agüiye yayovaicho Tumpa ndive —jei reta.

¹⁰ Jare jeiete uyeaca reta uyupii yave, sundaro reta juvicha itenondegua ipia pe uyemingueta aramoi uyucata reta Pablo, jare oyocui sundaro reta yugüeru vaerã güiraa Pablo jae reta ipite güi sundaro reta yugüireco vae pe.

¹¹ Jare piareve pe pütu yave yandeYa uyecuaa Pablo pe jare jei chupe:

—Ïñemiatangãtu, Pablo. Chemimbeu ma Jerusalén pe. Chemimbeuta vi co Roma pe.

Judío reta uipota tēi uyuca Pablo

¹² Jayave piareve pe amocue judío reta uyemboemboe, jare uyepipeyu reve iyee jei ucaruta'ã jare jouta'ã i, uyuca regua Pablo. ¹³ Jare cuimbae cua jei uyepipeyu reve iyee vae reta cuarenta uasa. ¹⁴ Jayave jae reta yugüiraa sacerdote reta itenondegua reta jare tenta guasu pegua reta itenondegua reta pe jare jei chupe reta:

—Ore ndoe ma nduyepipeyu reve oriyee nducaruta'ã, nduyuca regua Pablo. ¹⁵ Jáeramo pe reta ñru mburuvicha reta ndive pemimbeu sundaro reta juvicha itenondegua pe tugüeru Pablo peve piareve. Jae ipia pe uyemingueta tēita pe reta pipota pepirandu cavi ete chupe mbae uyapo vae re. Jayave ore nuuatirota noĩ jese nduyuca vaerã, ndei ou uvãe mbove —jei reta.

¹⁶ Ërei Pablo jindi imembi cuimbae vae uicuaa yave jae reta ucuatirota Pablo re vae, oo uique sundaro reta yugüireco vae pe, jare umimbeu Pablo pe.

¹⁷ Jayave Pablo ueni sundaro reta juvicha jare jei chupe:

—Eraa cua cunumi nderuvicha pe. Echa'ã uipota mbae umimbeu chupe —jei.

¹⁸ Jayave sundaro reta juvicha güiraa cunumi juvicha tenondegua vae pe, jare jei chupe: —Pablo uyepisi oĩ vae chereni, jare chemiñera aru vaerã ndepi cua cunumi. Echa'ã uipota mbae umimbeu ndeve —jei.

¹⁹ Jayave sundaro reta juvicha itenondegua uipisi cunumi ipo pe, jare güiraa ñru vae reta ñugüinoi vae güi. Jayave upirandu chupe:

—¿Mbae pa nemimbeuta cheve?

²⁰ Jayave cunumi jei chupe:

—Judío reta uyemboemboe ma, jare nemiñerata Pablo nderaaca vaerã curiye mburuvicha reta pe. Uipota nde ndepia pe ndiyemingueta tēi vaerã jae reta upirandu cavi eteta chupe mbae uyapo vae re —jei—. ²¹ Ërei agüiye erovia. Echa'ã judío reta ucuatirota jese. Jae reta cuarenta uasa. Jei reta uyepipeyu reve iyee ucaruta'ã jare jouta'ã i, uyuca regua Pablo. Jare añave uãro ñugüinoi, aramoi nderaaca pegua —jei chupe.

²² Jayave sundaro reta juvicha itenondegua jei cunumi pe:

—Agüiye emimbeu quia pe cua nemimbeu cheve vae.

Jayave omondo cunumi.

Omondo reta Pablo mburuvicha guasu Félix jee vae pe

²³ Jayave sundaro reta juvicha itenondegua ueni mocui sundaro reta juvicha jare jei chupe reta:

—Piyapicatu cavi doscientos sundaro reta, jare setenta sundaro cavayu re opo vae reta, jare doscientos sundaro güiraa ui vae reta, yugüiraa vaerã Cesarea pe nueve ora ma pütu yave. ²⁴ Jare peeca Pablo opo vaerã, peraa cavi vaerã mburuvicha guasu Félix pe —jei chupe reta.

²⁵ Jayave jae uicuatiã penti tupapire pe cuarãi: ²⁶ "Félix. Nde co jae mburuvicha guasu uyembutuichaca vae. Che co jae Claudio Lisias. Numbisaluda. ²⁷ Judío reta uipisi cua cuimbae, jare uyucata tēi. Jayave che aa sundaro reta ndive aepi chugüi reta. Echa'ã jerãcua cheve jae romano co. ²⁸ Jare aipota aicuaa maera ra jae reta umbijeco. Jáeramo araa judío reta juvicha reta upuruãa vae pe. ²⁹ Joco pe aicuaa jae reta umbijeco iporoyocui re. Ërei

jae uyapo'ã teco umano vaerã ani oĩ vaerã peresoriru pe. ³⁰ Ërei jerãcua cheve judío reta ucuatĩrota jese. Jáeramo jupivoiño amondo ndecoti. Jare ayocui umbijeco vae reta uñeapo vaerã jese ndeve teco uyapo chupe reta vae re. Jaeño ma." Jucuarãi uicuatiã.

³¹ Jayave pĩtu yave sundaro reta güiraa Pablo tenta guasu Antĩpatris pe, juvicha oyocui ramĩ. ³² Jayave piareve pe sundaro cavayu re opo vae reta güiraa Pablo, jare ĩru sundaro reta yugüeru ye yugüireco vae pe. ³³ Jare yugüiraa uvãe yave Cesarea pe, sundaro reta umee Pablo tupapire reve mburuvicha guasu pe. ³⁴ Jare opa umingueta yave tupapire, mburuvicha guasu upirandu Pablo pe quĩa tenta guasu pegua ra co jae. Jare uicuaa yave Cilicia pegua co, ³⁵ jei Pablo pe:

—Tayapisaca nderé, yugüeru yave nembijeco vae reta.

Jayave oyocui sundaro reta uyandareco vaerã jese mburuvicha Herodes jenta pe.

24

Pablo imiari Félix pe

¹ Pandepo ara ma uasa yave, yugüeru sacerdote tenondegua Ananías, amocue tenta guasu pegua reta itenondegua reta jare penti cuimbae Tértulo jee vae. Cua cuimbae iyaracuaa catu yemingüeta vaerã. Jae reta uñeapo Pablo re mburuvicha pe. ² Jare Pablo uñeenĩ ma yave, Tértulo umbĩpi umbijeco Pablo. Jae jei Félix pe:

—Ndereco pegua orepiacatu nduico. Ndearacuaa jeco pegua ndeporoyocui cavi jeta mbaembae re oreĩvi pe. ³ Nde co jae oreruvicha numbutuicha vae. Opaete que rupi jecuaño nduyapo yasurupai ndeve opaete cua re —jei—. ⁴ Ndepiacavi ramo, numñera ndiyapisaca vaerã oriñee re michi peguaño, agüiye vaerã numambeco mbatee —jei—. ⁵ Echa'ã nducuaa ma cua cuimbae upurumbiavai penti mbaerasi ramĩ. Jae omboemboe judío opaete ivi rupi ñugüinoi vae reta. Jare jae co penti nazareno pegua reta itenondegua —jei Tértulo Félix pe—. ⁶ Jae uipota vi uyapo jupi mbae vae Tumpa jo pe. Ërei ore nduipisi, jare nuãata tẽi oreporoyocui pe uyecuatiã oĩ vae rupi. ⁷ Ërei sundaro reta juvicha itenondegua Lisias ou umiãta oregüi jare upĩro güiraa oregüi. ⁸ Jare oyocui umbijeco vae reta yugüeru vaerã ndepi. Nde etei neãa yave, nducuaata opaete numbijeco vae —jei.

⁹ Judío reta vi jei añete co opaete cua mbaembae. ¹⁰ Jayave mburuvicha guasu upuvẽe Pablo re yemingüeta vaerã. Jayave Pablo jei:

—Che aicuaa catu co nde ĩma ete ma neãa cua ivi pegua reta. Jáeramo ayerovia reve chemiarita ayerepi vaerã —jei—. ¹¹ Nde ndepuere nducuaa ramĩ, doce ara ramo aa güive Jerusalén pe, ambiadora vaerã Tumpa. ¹² Jare cua reta cherecha'ã ayeaca quĩa ndive, ani amboemboe tenta guasu pegua reta Tumpa jo pe, ani itupao reta pe, ani tenta guasu rupi —jei—. ¹³ Añete chembijeco ma cua mbaembae re. Ërei mbaeti mbae añete vae ipuere umimbeu ndeve cua mbaembae re —jei Pablo—. ¹⁴ Ërei cua amimbeu ndeve. Che aico Jesús re arovia reve, jare jucuarãi ayeyocui chetenondegua reta iTumpa pe, yepe tẽi judío reta jei aico penti moromboe añete mbae vae re. Echa'ã che arovia opaete mboroyocui pe uyecuatiã oĩ vae, jare Tumpa iñee aracae umimbeu vae reta uicuatiacue —jei—. ¹⁵ Che arovia Tumpa umbijecove yeta co amanocue vae reta. Jae umbijecoveta jupi vae reta jare jupi mbae vae reta. Jucuarãi cua reta güirovia vi. ¹⁶ Jáeramo che jecuaño aipota chepia icavi anoi vaerã Tumpa coti jare ivi pegua reta coti —jei—.

¹⁷ Che mbovi año ma aico'ã cheivi pe. Jaeramo ayu ye, corepoti aru vaerã iparavete vae reta peguarã jare Tumpa peguarã. ¹⁸ Jare cua ayapo aĩ rambueve, amocue Asia pegua judío reta cherecha Tumpa jo pe. Joco pe ayeyoe aĩ Tumpa coti mboroyocui jei ramĩ. Ayembati'ã co jeta vae ndive. Ayapo'ã vi tecorai —jei—. ¹⁹ Icavi tẽi co jocua judío reta yugüeru vaerã cua pe uñeapo cheré ndeve, ime yave mbae chembijeco jese vae —jei Pablo Félix pe—. ²⁰ Cua reta etei tumimbeu ndeve mbae nunga teco uvãe cheré, mburuvicha reta jovai ayemboi yave. ²¹ Aramoi jaeño penti mbae re ipuere chembijeco. Mburuvicha reta ipite pe aĩ rambueve, chiñeeãta reve jae: 'Umanocue vae reta icove yeta vae re pe reta cherãa peĩ cua ara.' Jucuarãi jae —jei.

²² Jare Félix cua uyandu yave, oyopia judío reta. Echa'ã jae uicuaa catu Jesús re güirovia vae reta ipurugüirovia regua. Jáeramo jei judío reta pe:

—Sundaro reta juvicha itenondegua Lisias ou yave, aãata cua pemimbeu cheve vae re.

²³ Jayave Félix oyocui sundaro reta juvicha uyandareco vaerã Pablo re. Ërei oyocui vi umaño vaerã icoiño, jare agüiye vaerã oyopia jentarã reta, ou yave ipi uyeyocui chupe vaerã.

²⁴ Mbovi ara rupi Félix ou jembireco Drusila jee vae ndive. Drusila co jae penti judia. Jayave Félix ueni Pablo, jare uyapisaca quirãi yaroviata co Jesucristo re vae re. ²⁵ Jare Pablo jei chupe quirãi icavi yayapo vaerã jupi vae, jare yayopia vaerã yanderete uipota vae güi, jare quirãi Tumpa uãata ivi pegua reta. Jayave Félix uquiye jare jei Pablo pe:

—Ecuafno rani. Chepuere yave, turueni ye curi.

²⁶ Èrei Félix uipotata tēi vi Pablo umee vaerā corepoti chupe, oyoraca vaerā. Jáeramo güeruruca aveiño, uyemingueta vaerā jae ndive. ²⁷ Èrei mocui año ma uasa yave, Porcio Festo ou uipepica Félix. Jare Félix uipotata umbiyerovia judío reta ramo, ueya Pablo peresoriru pe.

25

Pablo uipotata oo mburuvicha guasu César jee vae pe

¹ Festo ou uvāe yave jocua ivi pe, mbapi ara ma uasa yave, oo Cesarea güi Jerusalén pe. ² Jayave sacerdote reta itenondegua reta jare judío reta itenondegua reta imiari chupe Pablo jeco re, jare umiñera ³ uyapo vaerā icavi vae chupe reta, güeruruca vaerā Pablo Jerusalén pe. Jare jae reta ucuatirota jese tape rupi, uyuca vaerā tēi. ⁴ Èrei Festo jei chupe reta:

—Ore nduyandareco noi Pablo re Cesarea pe, jare che aata joco pe curi. ⁵ Pepuere yave, pecua cherupíe. Jare uyapo yave teco icavi mbae vae jocua cuimbae, piñeapo jese —jei chupe reta.

⁶ Jayave Festo upitata yave joco pe aramoi ocho ani diez ara, ou ye Cesarea pe. Jayave piareve pe uguapi upuruāa vae pe, jare güeruruca Pablo. ⁷ Jare Pablo ou ma yave, judío Jerusalén güi yugüeru vae reta uyemboi Pablo iyipi rupi jare umbijeco jeta icavi mbae vae re. Èrei ipuere'ā uicuaca cua teco uipotata omboya jese vae añete co. ⁸ Jayave Pablo jei uyerepi vaerā:

—Ayovaicho'ā etei judío reta iporoyocui ndive, ani Tumpa jo ndive, ani César ndive.

⁹ Èrei Festo uipotata umbiyerovia judío reta. Jáeramo upirandu Pablo pe:

—¿Ndipotata pa ndeo Jerusalén pe, che nuāa vaerā joco pe cua teco reta re?

¹⁰ Èrei Pablo jei chupe:

—César ndeocui nepuruāa vaerā, jare icavi co nde cherāa vaerā cua pe. Ayapo'ā etei teco judío reta coti. Nde etei ndicuaa cua —jei—. ¹¹ Ime yave teco ayapo icoti, ani ime yave mbae ayapo amano vaerā, ndarau ayerure ndeve ayerepi vaerā mano güi. Èrei cua teco uipotata omboya cheré vae ayapo'ā yave, ndarau quia ipuere chemee chupe reta. Aipota César cherāa vaerā —jei chupe.

¹² Jayave Festo uyemingueta ñru mburuvicha reta ndive. Jayave jei Pablo pe:

—Ndipotata César nerāa vaerā. César pe ndeota —jei.

Pablo Agripa jare Berenice jovai

¹³ Jare mbovi ara ma uasa yave, mburuvicha guasu Agripa jare jindi Berenice yugüeru Cesarea pe, umbisaluda vaerā Festo. ¹⁴ Jare mbovi ara ma joco pe ñugüinoi yave, Festo umimbeu mburuvicha guasu pe Pablo regua. Jei chupe:

—Ime cua pe oi penti cuimbae Félix ueya peresoriru pe vae. ¹⁵ Jerusalén pe aa yave, judío pegua sacerdote reta itenondegua reta jare tenta guasu pegua reta itenondegua reta umimbeu cheve cua cuimbae regua. Jare reta chemiñera che jae vaerā icavi co uyeyucaca vaerā —jei—. ¹⁶ Èrei che jae chupe reta: 'Romano reta uyepocua'ā umee vaerā quia, ndei umbijeco vae reta yugüeru ñeapo jese mbove jare ndei uyerepi umbijeco vae reta güi mbove' —jae chupe reta, jei—. ¹⁷ Jáeramo jae reta yugüeru uvāe yave, año'ā. Piareve pe aguapi apuruāa vae pe, jare aruruca jocua cuimbae —jei—. ¹⁸ Jare umbijeco vae reta joco pe ñugüinoi, èrei umimbeu'ā cheve jocua nunga teco che chepia pe ayemingueta tēi omboyata jese vae. ¹⁹ Jaeño umbijeco reta jae ipurugüerovia re, jare penti cuimbae Jesús jee vae re. Jocua Jesús umano ma. Èrei Pablo jei icove ye co —jei—. ²⁰ Che aicuaa'ā mbae ra ayapota cua re. Jáeramo apirandu Pablo pe uipotata oo Jerusalén pe, joco pe che aā vaerā cua mbaembae re. ²¹ Èrei Pablo uipotata nduyandareco vaerā jese, Augusto uāa vaerā. Jáeramo ayocui sundaro reta uyandareco vaerā jese, César pe chepuere amondo regua —jei.

²² Jayave Agripa jei Festo pe:

—Che vi aipota ayapisaca jocua cuimbae re.

Jayave Festo jei chupe:

—Curiye ndiyapisacata jese.

²³ Jayave piareve pe Agripa jare Berenice yugüeru jemimonde ipōra vae ndive, jare uique reta Festo upuruāa vae pe sundaro reta juvicha itenondegua reta jare tenta guasu pegua reta itenondegua reta ndive. Jayave Festo oyocui güeru vaerā Pablo. ²⁴ Jayave Festo jei:

—Mburuvicha guasu Agripa, jare opaete pe reta cua pe pei vae, co oi cua cuimbae. Opaete judío Jerusalén pegua reta jare cua pegua reta chemiñera iñeēata reve jae umano vaerā —jei—. ²⁵ Èrei che avāe'ā teco jese umano vaerā. Jare jae etei uipotata mburuvicha guasu Augusto uāa vaerā. Jáeramo chepia pe ayemingueta ma amondo vaerā icoti —jei—.

26 Ërei aicuaa'ã mbae ra aicuatata cheruvicha pe. Jáeramo aruruca perovai, jare nderovai etei, mburuvicha guasu Agripa, aicuaa vaerã mbae ra aicuatata, opa yapirandu chupe yave —jei chupe reta—. 27 Echa'ã icavi'ã co yamondo vaerã penti pereso yamimbeu mbae reve mbae pereso re uñeapo vae reta umbijeco jese vae —jei.

26

Pablo imiari Agripa pe

1 Jayave Agripa jei Pablo pe: —Ndepuere nemiari ndiyee.

Jayave Pablo umupüa ipo, jare cuarãi imiari iyee:

2 —Mburuvicha guasu Agripa, ayerovia quirãi añave chemiarita chiye nderovai opaete judío reta chembijeco vae re. 3 Echa'ã nde ndicuaa catu opaete judío reta iyemboe jare iyeaca. Jáeramo numñera ndiyapisaca vaerã cheré ndepiaquirëi reve —jei—.

Quirãi Pablo uyapo ndei güirovia Jesús re mbove

4 Chetairusu güive aico cherentarã reta ndive Jerusalén pe, jare judío reta uicuaa catu quirãi aico. 5 Jae reta uicuaa catu vi quirãi iyipi güive che aico moromboe fariseo pegua re. Cua moromboe pegua reta uipota yayapo cavi ete vaerã iporomboe jei vae. Jae reta ipuere chemimbeu ndeve, uipota yave —jei—. 6 Jare añave che arovia Tumpa uyapota co yandetenondegua reta pe jei chupe vae. Jáeramo judío reta uñeapo cheré —jei Pablo—. 7 Jare jocua doce yandetenondegua reta iñemoñaa reta vi güirovia Tumpa uyapota co jei chupe vae. Jáeramo uyeyocui reta Tumpa pe iquirëi reve ara rupi jare pñu rupi. Mburuvicha guasu Agripa, cua che arovia ramo, judío reta chembijeco —jei—. 8 ¿Maera pa perovia'ã Tumpa ipuere umbijecove ye umanocue vae reta? —jei chupe reta—.

Pablo uyapo icavi mbae vae upurugüirovia vae reta pe

9 Che chepia pe ayemingueta tēi icavi co ayapo vaerã jeta icavi mbae vae Jesús Nazaret pegua re güirovia vae reta coti. 10 Jare jucuarãi ayapo Jerusalén pe. Sacerdote reta itenondegua reta mbaepuere umee cheve yave, añoño peresoriru pe jeta upurugüirovia vae reta. Jare ndei uyeyucaca mbove, che jae vi umanota co reta —jei—. 11 Jare jeta ainupaca opaete judío reta itupao reta rupi, jare aipota jae reta jei vaerã icavi mbae vae Jesús coti. Jare chepochi ete ma chupe reta ramo, ayapo icavi mbae vae chupe reta tenta guasu ambie vae reta rupi —jei—.

Pablo jei quirãi güirovia Jesús re (Hch 9.1-19; 22.6-16)

12 Cua ayapo aico rambueve, sacerdote reta itenondegua reta umee cheve mbaepuere chemondo Damasco coti. 13 Jare guarasi ara mbite ma oñ yave tape rupi aa rambueve, mburuvicha guasu, aecha penti tembipe ara güi jembipe ete guarasi güi vae. Jembipe cheré jare cherupie yugüiraa vae reta re —jei—. 14 Jare opareve ndoa ivi re, jare che ayandu penti ñee hebreo iñee pe jei cheve: 'Saulo, Saulo, ¿maera pa ndiyapo icavi mbae vae cheve? Nde co jae penti güeye ivira jacuarovi vae re upatara vae ramí. Jáeramo ndiporara neí' —jei cheve, jei—. 15 Jayave che apirandu: '¿Quía pa co nde, cheYa?' Jare yandeYa jei: 'Che co jae Jesús. Nde ndiyapo icavi mbae vae cheve. 16 Ërei epña iyemboi. Che aipota ndiyeyocui vaerã cheve, jare nemimbeu vaerã aicuaaca ndeve jare aicuaacata ndeve vae. Echa'ã cua jeco pegua ayecuaa ndeve' —jei, jei Pablo—. 17 'Jare che nduepita nerentaigua reta güi jare judío mbae vae reta güi. Echa'ã nomondota icoti, 18 nemimae reta vaerã, jare uyerova reta vaerã pñumimbi güi tembipe coti, jare Satanás güi Tumpa coti. Cua uyapo reta yave, Tumpa umbiasata chupe reta imbaeyoa reta cheré güirovia ramo, jare umeeta chupe reta imbaerã ñru uñeñoño tee Tumpa peguarã vae reta ndive' —jei, jei—.

Pablo uyapo Jesús oyocui vae

19 Jáeramo, mburuvicha guasu Agripa, cheatēi'ã ayapo vaerã Tumpa uicuaaca cheve ayapo vaerã vae. 20 Echa'ã tenonde amimbeu Damasco pegua reta pe. Jayave amimbeu vi Jerusalén pegua reta pe, opaete Judea pegua reta pe jare judío mbae vae reta pe. Amimbeu chupe reta ueya vaerã iyemingueta icavi mbae vae ipia pe oñ vae, jare uyerova vaerã Tumpa coti. Amimbeu vi chupe reta uyapo vaerã icavi vae, ñru vae reta uicuaa vaerã ueya ma co iyemingueta icavi mbae vae ipia pe oñ vae —jei—. 21 Cua jeco pegua, amocue judío reta chepisi Tumpa jo pe, jare uipota tēi cheyuca. 22 Ërei Tumpa chembori ramo, imeño aico cua ara. Moisés jare ñru Tumpa iñee araca umimbeu vae reta jei uyeyapota vae re. Jocuaño che vi amimbeu sambiai reta jare ucuacuaa vae reta pe —jei—. 23 Echa'ã jae reta jei Cristo uiporarañotai co, jare jae tenonde icove yeta co ou umanocue vae reta ipite güi, uechaca vaerã tembipe judío reta jare judío mbae vae reta pe —jei Pablo chupe reta.

Pablo jei tēi Agripa pe upurugüirovia vaerã

²⁴Jare Pablo jucuarāi imiari iyee yave, Festo iñeeāta reve jei:

—Pablo, nembiquere ma. Jeta mbaembae re ndiyemboe ramo, nembiquere ma —jei chupe.

²⁵Ērei Pablo jei chupe:

—Chembiquere'ā co, mburuvicha guasu Festo. Che jae ndeve vae añete vae jare aracuaa pegua co —jei—. ²⁶Echa'ā mburuvicha guasu Agripa uicuaa catu cua mbaembae regua, jare chepuere chemiari chupe aipiu mbae reve. Aicuaa jae uicuaa catu cua mbaembae regua. Echa'ā cua uyeyapo viari'ā —jei chupe—. ²⁷Mburuvicha guasu Agripa, ¿nderovia pa Tumpa iñee aracae umimbeu vae reta uicuatiaque? Che aicuaa nderovia co —jei Agripa pe.

²⁸Jayave Agripa jei Pablo pe:

—Ndipota tēi ndipo imambae cheapo cristianorā.

²⁹Jayave Pablo jei chupe:

—Ayerure Tumpa pe, imambae ani ima pe, nde jare opaete ĩru añave uyapisaca cheré vae reta piyeyapo vaerā che rami, ěrei agüiye vaerā penoi cua nunga cadena —jei.

³⁰Jare Pablo jucuarāi jei ma yave, uyemboi reta mburuvicha guasu Agripa, mburuvicha guasu Festo, Berenice jare jae reta ndive uguapi ñugüinoi vae reta. ³¹Jare oē reta oca pe yave, jei uyupe:

—Cua cuimbae uyapo'ā mbae umano vaerā ani oī vaerā peresoriru pe.

³²Jare Agripa jei Festo pe:

—Yayorata tēi cua cuimbae, uipota'ā yave César uña vaerā.

27

Omondo reta Pablo Roma pe

¹Jare mburuvicha reta ipia pe uyemingueta ma yave icavi co ndoo vaerā ivi Italia pe, umee reta Pablo jare amocue ĩru pereso reta sundaro reta juvicha Julio jee vae pe. Jae co penti ati Augusto jee vae pegua. ²Jare ndoo joco güi penti chalana guasu tenta guasu Adramitio pegua pe. Cua oota Asia pegua tenta guasu i guasu jembei pe ñugüinoi vae reta pe. Jare oo orerupíe Aristarco Tesalónica pegua. Tesalónica ivi Macedonia pegua co. ³Piareve pe ndoo nuvāe tenta guasu Sidón pe. Jare Julio ipiacavi Pablo pe. Jáeramo umaño jese oo vaerā opou ĩiru reta pe, jae reta uyandareco vaerā jese. ⁴Jayave joco güi ndoo ye i guasu rupi, jare nduasa Chipre icupe rupi, agüiye vaerā ivitu orerovāiti. ⁵Jayave nduasa i guasu Cilicia jare Panfilia jovai oī vae rupi, jare ndoo nuvāe tenta guasu Mira pe. Mira ivi Licia pegua co.

⁶Jare joco pe sundaro reta juvicha uvāe penti chalana guasu Alejandría pegua oota Italia coti vae pe, jare pipe orembuyupi. ⁷Jeta ara ndoo ndeve, jare yavai ete ndoo vaerā nuvāe tenta guasu Gnido jovai, ivitu orerovāiti ramo. Jare Gnido güi ndoo ivi Creta icupe rupi ivi Salmón jovai. ⁸Jare ndoo ivi iyipi rupi, ěrei yavai ete ndoo vaerā nuvāe Buenos Puertos pe. Cua güi coiño oī tenta guasu Lasea.

⁹Jare ima ete ma nduguata ramo, icavi'ā ma ndoo ye vaerā i guasu rupi. Echa'ā uyaro ma roi vaerā, jare jocua yasi reta rupi uguata'ā chalana guasu reta. Jayave Pablo umbiaracuaa jei:

¹⁰—Cherivi reta, yaaño yave, che aicuaa ucañita co tivita reta jare chalana guasu, jare yande vi aramoi ñamanota —jei.

¹¹Ērei sundaro reta juvicha güirovia chalana guasu uruguata vae reta juvicha jare chalana guasu iya Pablo güi. ¹²Jare jocua chalana uñeapitiarenda i guasu jembei pe icavi'ā ndupita vaerā opaete roi guasu iara reta uasa regua. Jáeramo jeta ore ndive ñugüinoi vae reta umbiaracuaa ndoo vaerā joco güi. Jei reta aramoi orepuereta ndoo nuvāe tenta guasu Fenice pe, ndupita vaerā joco pe roi guasu iara pegua. Fenice co jae penti chalana uñeapitiarenda Creta pegua. Joco güi i guasu uyecuaa guarasi oē vae coti.

Ivitu tanta vae i guasu pe

¹³Jare ivitu umbipi uyepayu ndeve catu sur coti güi yave, jae reta jei tēi icavita ndoo vaerā. Jayave chalana guasu uruguata vae reta uupi chalana iyepitasoca, jare ndoo Creta iyipi rupi coiño ivi güi. ¹⁴Ērei ndei ima mbove uñeovāiti chalana guasu ndive tanta ivitu cusumirón ndive Euroclidón jee vae. ¹⁵Jare ivitu uipota umbiyerova chalana guasu, jare orepuere'ā ma numisimi ivitu coti. Jayave numaeño ivitu re orereraa vaerā. ¹⁶Jayave ndoo yave ivi michi vae Claudia icupe rupi, añapea nduupi chalana-rai chalana guasu jaicue numbiritiri ndugüiraa vae. ¹⁷Jare nduupi ma yave chalana guasu pe, chalana guasu uruguata vae reta oyocua chalana guasu piola pe. Jare ipia pe uyemingueta aramoi oota upāa Sirte jee vae pe, jare uquiyeta. Echa'ā Sirte pe i tipi'ā co. Jáeramo umbigüeyi reta ivitu umiaña chalana guasu pipe vae tuicha vae ivate güi. Jare jucuarāi ivitu orereraa. ¹⁸Jare jecuaeño tanta ete ivitu oreve. Jáeramo piareve pe chalana guasu uruguata vae reta umbipi

omombo tivita reta. ¹⁹ Jare mbapi ara uasa ma yave orepo pe etei nomombo jocua ivitu umiaña chalana guasu pipe vae ivate güi umbigüeyi reta vae. ²⁰ Uyecuaa'ã guarasi jare yasitata jeta ara ma, jare jecuaeño tanta ivitu oreve. Nduicuaa'ã ma quirãi nduyembiasa vaerã.

²¹ Jare ima ma nducaru'ã yave, Pablo uyemboi orepite pe jare jei:

—Cuimbae reta, piyapisacata tõi co chiñee re, agüiye vaerã tõi yayu Creta güi pemicañi cua mbaembae. ²² Ërei añave che jae peve piñemiatangãtu vaerã. Echa'ã ndarau quia umano pepite pe. Jaeño chalana guasu ucañita —jei—. ²³ Echa'ã piare uyecuaa cheve penti ángel Tumpa pe uyeyocui vae. Che co jae Tumpa imbae, jare chupe ayeyocui —jei Pablo—. ²⁴ Ángel jei cheve: 'Pablo, agüiye equiye. Ndeoñotai co ndiyemboi César jovai. Jare Tumpa ipiacavi nde ndive ramo, uepita vi opaete cua nderupie yugüiraa vae reta' —jei cheve, jei—. ²⁵ Jáeramo, cuimbae reta, piñemiatangãtu. Echa'ã che arovia Tumpa, jare jae jei cheve vae uyeyapota co. ²⁶ Ërei yaañotai co ñavãe penti ivi oĩ vae pe —jei.

²⁷ Jare catorce ara uasa ma yave, ivitu orereraa rambueve i guasu Adriático rupi, piare catu yave chalana guasu uruguata vae reta uicuaa coiño ma yugüiraa ivi güi. ²⁸ Jayave umbigüeyi i tipi pe umiaanga vaerã, jare uicuaa i tipicue oĩ veintisiete metro rupi. Jare ndoo catu ye ma yave, umiaanga ye, jare uicuaa i tipicue oĩ veintisiete metro rupi. ²⁹ Jayave ipia pe uyemingueta aramoi upãata ita reta re, jare uquiye reta. Jayave umbigüeyi reta chalana guasu jaicue coti irundi chalana iyepitasoca reta. Jare uipota echa ma cõe vaerã tõi chupe reta. ³⁰ Jare chalana guasu uruguata vae reta uipota tõi osi chalana guasu güi. Jáeramo umbigüeyi chalana-rai i pe. Uipota ñru reta ipia pe uyemingueta vaerã jae reta umbigüeyita chalana guasu jenonde coti chalana iyepitasoca reta. ³¹ Jayave Pablo jei sundaro reta juvicha jare sundaro reta pe:

—Cua reta upita'ã yave chalana guasu pe, ndarau pepuere piyembiasa.

³² Jayave sundaro reta uyasia chalana-rai ichã, jare umaeño oo ucañi.

³³ Jare cõeta ma yave, Pablo umbiaracuaa opaete joco pe ñugüinoi vae reta ucaru vaerã. Jei chupe reta:

—Catorce ara ma piyemipia'ã, jare pecaru'ã. ³⁴ Jáeramo che pumiñera pecaru, pepirãta vaerã. Echa'ã ndarau ucañi pea ave peãca güi —jei.

³⁵ Jare cua jei yave, uipisi mbiyape, jare umee yasurupai Tumpa pe opaete vae jovaque. Jayave upisãa mbiyape jare jou. ³⁶ Jayave opaete jae reta uñemiatangãtu, jare ucaru reta vi. ³⁷ Jare opaete nducui chalana guasu pe vae co doscientos setenta y seis. ³⁸ Jare opareve iyangapii yave, omombo reta trigo i pe, jare jucuarãi umbivevi chalana guasu.

Chalana guasu icumegua

³⁹ Jare cõe ma yave, uicuaa'ã reta jocua ivi. Ërei uecha reta penti i jugua jare ivi ipiacavi joco pe. Jáeramo jocoti uipota reta omondo chalana guasu, ipuere yave. ⁴⁰ Jayave jae reta omombo ueya i pe chalana iyepitasoca reta, jare umungüe timón ichã. Jayave uupi ivitu umiaña chalana guasu pipe vae michi vae, jare güiraa i jembei coti. ⁴¹ Jayave chalana guasu oo uyererocua ivicuñti re upãa ndei oo uvãe i jugua pe mbove. Echa'ã joco pe i uyuaa oĩ. Jare chalana guasu itĩ uyeatica upita, jare omi'ã ye. Jayave i yacarachi ete ramo, oyoca chalana guasu jaicue coti. ⁴² Jare sundaro reta uipota tõi uyuca pereso reta, agüiye vaerã quia osi, uitai yave. ⁴³ Ërei sundaro reta juvicha uipota uepi Pablo. Jáeramo jei sundaro reta pe agüiye vaerã uyuca reta. Oyocui ipuere uitai vae reta rani oa vaerã i pe, yugüiraa vaerã uvãe ivi pe. ⁴⁴ Jare oyocui ñru reta yugüiraa vaerã ivirape re ani ipotave chalana guasu pe oĩ vae re. Jare jucuarãi opareve yugüiraa cavi uvãe ivi pe.

28

Pablo Malta pe

¹ Opareve noẽ ma ivi pe yave, nducuaa jocua ivi jee Malta. ² Jare joco pegua reta ipiacavi oreve. Echa'ã orembiresive cavi, jare uyatapi, ama oqui jare roi ramo. ³ Jare Pablo umbati yepea, jare oño tata pe. Jayave penti mboi tata güi oẽ osi, jare uñemama Pablo ipo re, uichuu yave. ⁴ Jare joco pegua reta uecha yave mboi usagüigüi oĩ Pablo ipo re, jei reta uyupe:

—Añetete yepe cua cuimbae upuruyuca vae. Yepe tõi umano'ã i guasu pe, ãrei ndarau ipuere icono, jupi'ã ramo.

⁵ Ërei Pablo umitimo ipo güi mboi tata pe, jare uyeyapo'ã mbae chupe. ⁶ Jare joco pegua reta ipia pe uyemingueta tõi iruruta ani aramoi oata jare umanota. Ërei jae reta uãro tõi ma ima yave, uecha uyeyapo'ã mbae chupe. Jayave jae reta jei'ã ma tenonde rami. Jei reta ma: —Cua cuimbae penti tumpa co.

⁷ Jare jocua ivi pegua reta juvicha Publio jee vae güinoi jocatoropi ivi reta. Jae orembiresive cavi, jare oremingaruru mbapi ara. ⁸ Jare Publio tu imbaerasi oi jupa pe. Jacu jare jepotiugüi. Pablo oo umae jese. Jare uyerure Tumpa pe yave, ofono ipo jese, jare umbigüera. ⁹ Jare cua uyeyapo yave, i ru imbaerasi vae jocua ivi pegua reta yugüeru, jare Pablo umbigüera vi. ¹⁰ Jayave jae reta umeei oreve jeta mbaembae. Jare nduyupi ye yave chalana guasu pe, umbuyupi vi oreve mbaembae nduipota vae.

Pablo oo uvãe Roma pe

¹¹ Jare mbapi yasi ma uasa yave, ndoo joco güi penti chalana guasu Alejandria pegua pe. Cua chalana guasu upita jocua ivi pe, roi iara umbiasa vaerã. Chalana guasu ití re ñugüinoi choguaquiri-raanga ivira pegua Cástor jare Pólux jee vae. ¹² Jayave ndoo nuvãe tenta guasu Siracusa pe, jare ndupita joco pe mbapi ara. ¹³ Jayave joco güi nduyere jare ndoo nuvãe tenta guasu Regio pe. Jayave piareve pe ivitu uyepeyu sur coti güi, jare piareve ye pe ndoo nuvãe tenta guasu Puteoli pe. ¹⁴ Jare joco pe nuñevãe upurugüirovia vae reta ndive. Jare jae reta uparea oreve ndupita vaerã jae reta ndive siete ara pegua. Jare joco güi ndoo tenta guasu Roma coti. ¹⁵ Jare orererãcua upurugüirovia vae Roma pegua reta pe, jare amocue jae reta yugüeru orerovãiti Foro Apio pe, jare i ru vae reta yugüeru orerovãiti Tres Tabernas pe. Jare Pablo uecha yave cua reta, umee yasurupai Tumpa pe, jare uñemiatangãtu. ¹⁶ Jare ndoo nuvãe yave Roma pe, sundaro reta juvicha umee pereso reta penti sundaro reta juvicha tenondegua vae pe. Ërei umaño Pablo re icoiño vaerã penti sundaro uyandareco jese vae ndive.

Pablo umimbeu ñee icavi vae Roma pe

¹⁷ Jare mbapi ara ma uasa yave, Pablo uenica judío reta itenondegua reta. Jare uyembati reta yave, Pablo jei chupe reta:

—Cheriquei reta, yepe tã ayapo'ã mbae nunga teco ñanerentaigua reta coti ani yandetenondegua reta iyemboe coti, ãrei Jerusalén pegua reta chemee romano reta pe, jare romano reta cheñoño peresoriru pe —jei—. ¹⁸ Jare jae reta upirandu yave cheve, uipota tã cheyora, ayapo'ã mbae nunga teco amano vaerã ramo. ¹⁹ Ërei judío reta oyovaicho cheré ramo, ayapo'ã vaerã mbae, jaeño ayu vaerã cherã César, yepe tã mbaeti mbae ambijeco vaerã cherentaigua reta jese vae —jei chupe reta—. ²⁰ Jáeramo che pueni puecha vaerã, jare ayemingueta vaerã pe reta ndive. Echa'ã Israel pegua reta güirovia vae jeco pegua añeapiti ai cua cadena pe —jei.

²¹ Ërei jae reta jei chupe:

—Mbaeti quía ombou tupapire oreve Judea güi nemimbeu vaerã oreve. Jare ou'ã penti ave ñanerentaigua joco güi umimbeu vaerã oreve icavi mbae vae nderegua. ²² Ërei nduipota nduicuaa mbae ndepia pe ndiyemingueta vae. Echa'ã nduicuaa opaete que rupi jei reta icavi'ã co cua moromboe —jei reta.

²³ Jayave jei reta Pablo pe i ru ara rupi yugüeruta co. Jayave jocua ara jeta vae yugüeru Pablo jenta pe. Jare neimbove güive Pablo icaaru umimbeu chupe reta Tumpa iporoyocua regua. Jare Moisés iporoyocui rupi jare Tumpa iñee aracae umimbeu vae reta uicuatiaque vae rupi umimbeu vi chupe reta Jesús regua. Cua uyapo, jae reta güirovia vaerã. ²⁴ Jare amocue güirovia Pablo jei vae. Ërei i ru vae reta güirovia'ã. ²⁵ Jáeramo uyembiyao reta uyugüi, jare yugüiraa Pablo jenta güi, Pablo opa yave jei chupe reta cua ñee:

—Jupi co jei Espiritu Santo Tumpa iñee aracae umimbeu vae Isaías rupi yandetenondegua reta pe. Echa'ã jei cuarã:

²⁶ 'Ecuã tenta guasu pegua reta pe, jare ere chupe reta:

Piyandu tãita, ãrei ndarau picuaa.
Peecha tãita, ãrei ndarau picuaa cavi.

²⁷ Echa'ã cua reta ipiatanta,
jare iyapisa pe uyandu tã,
jare usapimiño,
agüiye vaerã uecha jesa pe,
jare agüiye vaerã uyandu iyapisa pe,
jare agüiye vaerã uicuaa ipia pe,
jare agüiye vaerã uyerova checoti' —jei Tumpa—. 'Echa'ã uyerova checoti yave, ambaita tã imbaeyoa reta' —jei.
Jucuarãi jei —jei Pablo chupe reta—.

²⁸ Picuaa cavi cua: Tumpa umimbeucata cua ñee judío mbae vae reta pe, jae reta uyembiasaca vaerã. Echa'ã jae reta uyapisacata jese —jei.

²⁹ Jare cua Pablo opa ma jei yave, judío reta yugüiraa uyeaca reve uyupii.

³⁰ Jare Pablo uiporu penti o umbiepi reve, jare ico joco pe mocui año. Jare umbiresive opaete yugüeru opou ipi vae reta. ³¹ Jare jecuaño umimbeu Tumpa iporoyocuiia regua, jare oporomböe yandéYa Jesucristo re uquiye mbae reve, jare mbaeti quía umbiavai.

LA CARTA DEL APOSTOL SAN PABLO A LOS ROMANOS

¹ Che co jae Pablo. Che ayeyocui Jesucristo pe. Jae cheparavo aico vaerã jemimondorã, jare cheñono tee amimbeu vaerã ñee icavi vae Tumpa regua.

² Echa'ã aracae Tumpa umee ñee icavi vae ñee umimbeu vae reta rupi uyecuatía oĩ vae pe. ³ Ñee icavi vae umimbeu yandeve Tumpa Tai regua. Jae co yandeYa Jesucristo. Jae David ñemoñaã reta pegua co. ⁴ Ërei Espiritu iyoa mbae vae rupi jae uyecuaa Tumpa Tai mbaepuere güinoi vae. Echa'ã cua uyecuaa, icove ye yave ou umanocue vae reta ipite güi. ⁵ Jesucristo rupi Tumpa umee oreve ipiacavi jare oremondo numimbeu vaerã opaete ivi pegua reta pe, Tumpa jei rami jae reta upurugüirovia vaerã. Cua nduyapo, Tumpa uyembadoraca vaerã. ⁶ Jare pe reta co cua nunga amocue. Echa'ã Tumpa preparavo, pico vaerã Jesucristo imbaerã.

⁷ Aicuatía cua tupapire opaete Roma pe pico vae pe. Tumpa perau jare preparavo peñono tee vaerã iyupeguarã. YandeRu Tumpa jare yandeYa Jesucristo tumee peve ipiacavi jare ipiacatu.

Pablo uipota oo Roma pe

⁸ Tenonde voi amee yasurupai Tumpa pe Jesucristo rupi peré, quirã pepurugüirovia jerãcua opaete ivi rupi. ⁹ Che ayeyocui Tumpa pe opaete chequirëi reve. Echa'ã amimbeu ñru vae reta pe ñee icavi vae Tumpa Tai regua. Jare chepuere jae peve Tumpa jovaque quirã jecuaño ayerure chupe peré. ¹⁰ Aipota ete apou pepi. Jáeramo ayerure Tumpa pe jese. Tumpa uipota yave, aañotai co pepi. ¹¹ Echa'ã aipota puecha, pombori vaerã Espiritu pegua re, piñemimirãta vaerã. ¹² Jare cuarã yayembipiacatuta yandepurugüirovia rupi. Echa'ã pe reta vi pepurugüirovia che apurugüirovia rami.

¹³ Ërei, cherivi reta, aipota picuaa vaerã quirã jeta vese ma aata tẽi pepi, Ërei jecuaño mbae chembiavai. Echa'ã aipota ayeyocui Cristo pe pepite pe, jae uyembadoraca vaerã pe reta rupi, jucuarã uyeyapo ñru judío mbae vae reta ipite pe rami. ¹⁴ Echa'ã chepiã co Cristo pe ayeyocui vaerã uyemboe vae reta jare uyemboe mbae vae reta pe, jare iyaracuaa vae reta jare iyaracuaa mbae vae reta pe. ¹⁵ Jáeramo chepuere yave, aipota ete amimbeu ñee icavi vae pe reta Roma pe pico vae pe.

Ñee icavi vae imbaepuere

¹⁶ Echa'ã chemarã ñee icavi vae re. Echa'ã ñee icavi vae rupi Tumpa umbiasa imbaepuere pe opaete güirovia vae reta. Umbiasa judío reta rani jare judío mbae vae reta vi. ¹⁷ Echa'ã ñee icavi vae umimbeu yandeve quirã Tumpa yanembujupi co yarovia yave. Jare jucuarã umimbeu yandeve, yarovia vaerã. Echa'ã Tumpa ñee pe uyecuatía oĩ cuarã: “Tumpa umbujupi vae güinoita tecove upurugüirovia ramo.” Jucuarã uyecuatía oĩ.

Ivi pegua reta imbaeyoa

¹⁸ Jare uyecuaa ara güi quirã Tumpa uiporaraca ete opaete jae ndive oyovaicho vae reta jare icavi mbae vae uyapo vae reta pe. Echa'ã jae reta umbiavai añete vae icavi mbae vae uyapo vae rupi. ¹⁹ Opaete vae ipuere uicuaa Tumpa regua vae uyecuaa co chupe reta. Echa'ã Tumpa etei uicuaa chupe reta. ²⁰ Añete co, mbaeti quía ipuere uecha Tumpa jare imbaepuere opa mbae vae. Ërei ivi uyeyapo güive, Tumpa uicuaa cua imbaepuere jare quirã jae co Tumpa. Echa'ã ivi pegua reta ipuere tẽi uicuaa, opaete mbaembae Tumpa uyapo vae jeco pegua. Jáeramo mbaeti penti ave ipuere jei: “Che aicuaa'ã co.” ²¹ Yepe tẽi jucuarã uicuaa reta tẽi Tumpa, umbiadora'ã co. Umee'ã vi yasurupai chupe. Ërei ipia pe uyemingueta reta iyaracuaa mbae vae reta rami, jare iyaracuaa mbae vae reta rami ipuere'ã ipia pe uyemingueta cavi mbae re. ²² Jae reta ipia pe uyemingueta tẽi iye iyaracuaa catu vae reta co. Ërei uyeyapo reta iyaracuaa mbae vae reta. ²³ Jae reta umbiadora'ã Tumpa umano mbae vae. Ërei umbiadora cuimbae-raanga reta, yepe tẽi cuimbae reta umano vae co. Umbiadora reta vi güira-raanga reta, maemimba-raanga reta jare mboi-raanga reta.

²⁴ Jáeramo Tumpa umaño jese reta ipia pe uyemingueta vaerã icavi mbae vae re ipia jei vae rupi, jare jucuarã uyapo re uyupe imarata tẽi jese vae. ²⁵ Güirovia'ã añete vae Tumpa regua. Ërei güirovia reta apu. Echa'ã umbiadora'ã reta Tumpa opaete mbaembae uyapo vae, jare uyeyocui'ã vi chupe. Ërei umbiadora mbaembae Tumpa uyapo vae jare uyeyocui chupe reta. Tumpa tuyembadoraca jaño mai pegua. Amén.

²⁶ Jáeramo Tumpa umaño jese reta uyapo vaerã pichĩ vae imarata tẽi jese vae. Echa'ã cuña reta opoco iyee. Tumpa uyapo'ã cuña reta jucuarã uyapo vaerã. ²⁷ Jae ramiño vi

cuimbae reta uyapo'ã cuña reta ndive Tumpa uipota uyapo vaerã vae. Ërei cuimbae reta uyupii uyepota, jare opoco iyee. Jáeramo Tumpa uiporaraca chupe reta. Echa'ã jae reta uyemimbaerasi icavi mbae vae uyapo vae jeco pegua.

²⁸ Jare uipota'ã reta uicuaa Tumpa ramo, Tumpa umaeño jese reta ipia pe uyemingueta vaerã opaete mbae icavi mbae vae re, jae reta uyapo vaerã opaete mbae icavi mbae vae. ²⁹ Jare reta jecuaeño uyapo jupi mbae vae. Uyapo aguasa. Uipota ñru vae reta imbaembae. Uyapo icavi mbae vae. Nacatãa. Upuruyuca. Jovaichopota. Upurumbitavi. Ipia pe uyemingueta icavi mbae vae uyapo vaerã. Indayepota. ³⁰ Oporomboyovaichoca ñru ndive. Umitarëi Tumpa. Jecopochi. Uyembicate. Uyembutuicha. Icatu ete uyapo vaerã icavi mbae vae. Uyapo'ã tu jare ichi jei vae. ³¹ Imbiquere. Uyapo'ã jei uyapota tãe vae. Mbaeti etei güinoi mburuau. Ipiatanta. Mbaeti güinoi mburuparareco. ³² Cua reta uicuaa Tumpa jei ma co quirãi cua mbaembae icavi mbae vae uyapo vae reta umanota co. Ërei yepe tãe cua uicuaa, Ërei jecuaeño uyapo cua mbaembae icavi mbae vae, jare icavi chupe jucuarãi uyapo vae reta.

2

Tumpa upuruãa jupi vae rupi

¹ Nde vi ndarau ndepuere ndiyerepi. Echa'ã ime yave quía ñru vae umbijeco vae, uyembijeco vi co, ñru vae umbijeco yave. Echa'ã ñru vae umbijeco vae uyapo vi jocua jeco icavi mbae vae reta. ² Ërei yaicuaa quirãi Tumpa uãa añete vae rupi jocua jeco icavi mbae vae reta uyapo vae reta. ³ Agüiye ndepia pe iyemingueta nde ndiyerepi vae re, agüiye vaerã Tumpa nerãa. Echa'ã penti vae umbijeco yave jocua jeco icavi mbae vae reta uyapo vae reta, ndarau uyerepi. Echa'ã jae etei vi jucuarãi uyapo. ⁴ Nde neriro ndico Tumpa ipiacavi jare quirãi Tumpa uiaiguanta jare ipiaguasu ndeve. Ndicuaa co quirãi Tumpa ipiacavi ndeve, nde ndeeya vaerã icavi mbae vae ndepia pe oñ vae. ⁵ Ërei ndepiatanta yave, jare ndeeya'ã yave icavi mbae vae ndepia pe oñ vae, Tumpa uiporaracata ndeve jocua ara opaete ñru vae reta pe uiporaraca yave. Echa'ã jocua ara uyecuaata co quirãi Tumpa upuruãa jupi vae rupi. ⁶ Tumpa umeeta opaete vae pe ipotave vae uyapo vae rupi. ⁷ Icavi vae jecuaeño ipiaguasu reve uyapo vae reta pe Tumpa umeeta tecove opa mbae vae. Echa'ã jocua rupi jae reta uicuaaca quirãi jecuaeño ueca mbaembae opa mbae vae yembiadora pegua. ⁸ Ërei Tumpa uiporaracata co mbaembae iyupeguaraño uipota vae reta pe. Echa'ã uipota'ã uyapo añete vae rupi. Jaeño uipota uyapo jupi mbae vae. Jáeramo Tumpa uiporaracata chupe reta. ⁹ Opaete ivi pegua icavi mbae vae uyapo vae reta uiporarata co jare ipiatitita co - judío reta rani jare judío mbae vae reta vi. ¹⁰ Ërei opaete icavi vae uyapo vae reta güinoita yepiu jare mbiacatu - judío reta jare judío mbae vae reta vi. ¹¹ Echa'ã Tumpa uau'ã penti vaeño ñru vae güi. ¹² Echa'ã opaete Moisés iporoyocui mbaeti güinoi vae iyoa vae reta yugüiraata cañitei pe, yepe tãe mbaeti güinoi Moisés iporoyocui. Jare opaete Moisés iporoyocui güinoi vae iyoa vae reta uñeãacata Moisés iporoyocui re. ¹³ Echa'ã Tumpa umbujupí'ã mboroyocui uyanduiño vae reta. Tumpa umbujupita mboroyocui jei vae uyapo vae reta. ¹⁴ Echa'ã judío mbae vae reta, yepe tãe mbaeti güinoi Moisés iporoyocui, Ërei amo pe uyapo reta mboroyocui jei vae mbaeti quía umimbeu chupe reta reve. Cua uicuaaca ime güinoi penti mboroyocui ipia pe, yepe tãe mbaeti güinoi Moisés iporoyocui. ¹⁵ Echa'ã uicuaaca ime güinoi penti mboroyocui ipia pe, mbaembae uyapo vae rupi. Jare reta uicuaa vi ipia pe mbae icavi uyapo vaerã vae. Jáeramo ipia pe uyemingueta rupiño uyembijeco ani uyerepi mbaembae uyapo vae re. ¹⁶ Jucuarãi co uñeãacata reta, Tumpa uãa yave ivi pegua reta Jesucristo rupi. Echa'ã jocua ara uyecuaata co opaete vae uyapo vae tenonde yave uyecuaa mbae vae. Jare Tumpa upuruãata ñee icavi vae che amimbeu vae re.

Judío reta jare mboroyocui

¹⁷ Ërei nde ndere ndiyupe nde co jae judío. Nde ndiyeco mboroyocui re, jare ndiyembicate nde ndere ndicuaa co Tumpa ramo. ¹⁸ Nde ndicuaa Tumpa jei vae, jare mboroyocui jei vae rupi nde ndicuaa mbae icavi ete ndiyapo vaerã vae. ¹⁹ Nde nderovia ndepuere co nemimae jesa mbae Tumpa coti vae reta, jare ndepuere neme Tumpa jembipe pitumimbi pe ñugüinoi vae reta pe. ²⁰ Nde nderovia vi ndicuaa co quirãi ndepuere nembõe mbaeti mbae uicuaa vae reta jare sambiaí reta. Echa'ã mboroyocui umimbeu ndeve aracuaa jare añete vae. ²¹ Nde nembõe ñru vae. Jáeramo nde rani ndiyemboeta tãe. Nde nemimbeu ñru vae reta pe agüiye vaerã imonda. Jáeramo agüiyeta tãe nemonda nde vi. ²² Nde ndere ñru vae reta pe agüiye vaerã uyuvanga menda re. Jáeramo agüiyeta tãe ndiyuvanga menda re nde vi. Nde nemitarëi tumpa-raanga reta. Jáeramo agüiyeta tãe nde vi ñiñomi mbaembae icavi vae itupao reta güi. ²³ Nde ndiyembicate mboroyocui nenoí ramo.

Ērei Īru vae reta güirō Tumpa nde ndiyapo'ā mboroyocui jei vae ramo. ²⁴ Echa'ā Tumpa ĩñee pe uyecuatía oĩ cuarāi: “Judío mbae vae reta jei mbaembae icavi mbae vae Tumpa coti pereco pegua.” Jucuarāi uyecuatía oĩ.

²⁵ Icavi co niñemicircuncidaca vaerā, Moisés iporoyocui jei vae ndiyapo yave. Ērei ndiyapo'ā yave mboroyocui jei vae, ndiyeyapo co penti uñemicircuncidaca mbae vae rami, yepe tēi niñemicircuncidaca. ²⁶ Jare uñemicircuncidaca'ā vae uyapo yave mboroyocui jei vae, jae uyeyapo co penti uñemicircuncidaca vae rami, yepe tēi uñemicircuncidaca'ā. ²⁷ Jare uñemicircuncidaca'ā jete pe vae, mboroyocui jei vae uyapo yave, nembijecota co. Echa'ā nde ndiyavi mboroyocui jei vae, yepe tēi ime nenoĩ mboroyocui uyecuatía oĩ vae, jare yepe tēi niñemicircuncidaca. ²⁸ Echa'ā penti judío mbaeti co judío añetete vae uyecuaa vae jeco peguaño. Jare ramiño vi penti uñemicircuncidaca vae mbaeti co uñemicircuncidaca vae añetete vae uyecuaa vae jeco peguaño. Echa'ā jete peño uñemicircuncidaca. ²⁹ Ērei penti judío ipia pe oĩ vae jeco pegua judío añetete vae co. Jare ramiño vi penti uñemicircuncidaca vae ipia pe oĩ vae jeco pegua uñemicircuncidaca vae añetete vae co. Echa'ā cua nunga uyapo Espiritu jei vae rupi, uyecuatía oĩ vae rupiño'ā. Tumpa jeita icavi cua nunga, yepe tēi ĩru vae reta jeita'ā jucuarāi.

3

¹ Jáeramo ¿mbae pe pa uyuavi judío reta judío mbae vae reta güi? ¿Mbae pe pa uyuavi uñemicircuncidaca vae reta uñemicircuncidaca mbae vae reta güi? ² Jeta co opaete quirāirāi rupi. Tenonde tae cua: Tumpa unee ĩñee chupe reta, jae reta uñuvatu vaerā. ³ Añete co, aramoi amocue vae güirovia'ā. Ērei yepe tēi jae reta güirovia'ā, ĩrei cua uipotā'ā jei Tumpa ndarau uyapo jei vae. ⁴ Jucuarāi'ā etei co. Echa'ā Tumpa uyapo opaete añete vae rupi, yepe tēi opaete ivi pegua reta iyapu vae reta co. Echa'ā Tumpa ĩñee pe uyecuatía oĩ cuarāi: “Ndiyemingueta yave, uyecuaata añete vae co jocua nde ndere vae. Jare ĩru vae reta nembijeco yave, ndicuaacata jupi vae co nde ndiyapo vae.” Jucuarāi uyecuatía oĩ.

⁵ Upurugüirovia mbae vae reta jei cuarāi: “Jupi mbae vae yayapo vae uicuaaca quirāi Tumpa co jae jupi vae. Jáeramo Tumpa uiporaraca yandeve yave, jupi mbae vae co uyapo.” Jucuarāi jei reta. ⁶ Ērei yandepuere'ā yae jucuarāi. Echa'ā Tumpa uyapo yave mona jupi mbae vae, ndarau tēi ipuere uāa ivi pegua reta.

⁷ Jare jei reta vi cuarāi: “Cheapu yave, ĩru vae reta umbiadora eteta Tumpa. Echa'ā uicuaata añete vae Tumpa jei vae icavi ete co. Jáeramo Tumpa agüiyeta tēi chembijeco cheapu re.” ⁸ Añete co, yandepuere yae: “Yayapo icavi mbae vae, icavi vae uyeyapo vaerā.” Jucuarāi jei reta. Icavi co Tumpa umbijeco vaerā jucuarāi jei vae reta. Jare amocue vae jei ore jucuarāi ndoporomboe. Cuarāi jei icavi mbae orerē.

Mbaeti co jupi vae

⁹ Jáeramo yandepuere'ā etei yae judío reta icavi ete judío mbae vae reta güi. Echa'ā yaicuaaca ma quirāi judío reta jare judío mbae vae reta teco güinoi. Echa'ā opaete vae iyoa vae reta co. ¹⁰ Echa'ā Tumpa ĩñee pe uyecuatía oĩ cuarāi:

“Mbaeti co quía uyapo icavi vae, mbaeti penti ave.

¹¹ Mbaeti co quía uicuaa Tumpa vae.

Mbaeti co quía ueca Tumpa vae.

¹² Opaete vae uyerova Tumpa güi.

Opaete vae uyapo icavi mbae vae.

Mbaeti co quía uyapo icavi vae, mbaeti penti ave.

¹³ Iyuru co penti teögüeriru uyasoĩ mbae vae rami.

Uyemingueta yave, upurumbitaviñoi.

Opaete jei vae jasi ete, mboi imbayachi jasi ete rami.

¹⁴ Jecuaeño jei icavi mbae vae ĩru vae reta coti, jare jecuaeño iarasi ĩru vae reta pe.

¹⁵ Iquirēi ete upuruyuca.

¹⁶ Jecuaeño uyapo icavi mbae vae ĩru vae reta pe umbipiatiti vaerā.

¹⁷ Jare iquirēi'ā etei umbipiacatu ĩru vae reta.

¹⁸ Ipia pe uyemingueta'ā etei Tumpa re, yepe tēi uquiyeta tēi co chugüi.”

Jucuarāi uyecuatía oĩ.

¹⁹ Jare yaicuaa quirāi mboroyocui jei vae imiari mboroyocui güinoi vae reta pe, agüiye vaerā penti ave ipuere uyerepi, jare opaete ivi pegua reta uyecuaa vaerā iyoa vae reta co Tumpa jovai. ²⁰ Jáeramo mbaeti quía ipuere uyembujupi Tumpa jovai mboroyocui jei vae re uyapo vae rupi. Echa'ā mboroyocui güinoi ramo, uicuaa reta iyoa vae reta co.

Añave Tumpa yanembujupi yandepurugüirovia rupi

²¹ Ërei añave uyecuaa ma quirãi Tumpa ipuere yanembujupi mboroyocui jei vae yayapo mbae reve. Jare mboroyocui pe uyecuatía oĩ vae jare Tumpa iñee aracae umimbeu vae reta uicuatía vae umimbeu cua regua. ²² Echa'ã Tumpa umbujupita opaete Jesucristo re güirovia vae reta ipurugüirovia rupi. Penti vae uyuavi'ã ñru vae güi. ²³ Echa'ã opaete vae iyoa vae reta co. Tumpa ipuere'ã jei penti ave re: "Cua co jae jupi vae." ²⁴ Ërei Tumpa ipuere ma yanembujupi ipiacavi rupi. Jae co penti regalo Tumpa umee yandeve vae. Echa'ã Tumpa yanderepi ma Cristo Jesús rupi. ²⁵ Tumpa umee Cristo umano vaerã maemimba uyeyucacue sacerdote umee vae ramí, agüiye vaerã ma uiporaraca yandeve, yarovia yave Cristo umano co yanderé. Jare jucuarãi uyecuaa quirãi Tumpa jupi co. Echa'ã aracae yave, ivi pegua reta iyoa yave, Tumpa ipiaguasu chupe reta. Uiporaraca'ã chupe reta imbaeyoa reta re. ²⁶ Jare añave uyecuaa ma quirãi Tumpa jupi co. Echa'ã jae uyapo jupi vae, umbujupi yave Jesús re güirovia vae.

²⁷ Jáeramo mbaeti etei ñanoi mbae yandepuere yayembicate jese vae. Echa'ã yayapo'ã mboroyocui jei vae - jaeño yapurugüirovia. ²⁸ Jáeramo yaicuaa ma quirãi Tumpa yanembujupi yandepurugüirovia rupi. Yanembujupi'ã mboroyocui jei vae yayapo vae rupi.

²⁹ Jare Tumpa co jae judío mbae vae reta iTumpa - judío reta peguaño'ã co. ³⁰ Echa'ã Tumpa pentiño co, jare umbujupita uñemicircuncidaca vae reta ipurugüirovia rupi. Jae ramiño vi umbujupita uñemicircuncidaca mbae vae reta ipurugüirovia rupi. ³¹ Jáeramo aramoi quía jeita: "Jucuarãi yave, mboroyocui mbaeti co mbaerã. Echa'ã Tumpa yanembujupi yandepurugüirovia rupi." Jucuarãi'ã co. Echa'ã cua jeco pegua yaicuaa ma maera Tumpa uicuaaca mboroyocui.

4

Abraham pe uyeyapo vae

¹ Jáeramo, ¿mbae ra güinoi yandetenondegua Abraham jae uyapo vae rupi? (Abraham co jae opaete judío reta itenondegua.) ² Echa'ã Abraham uyembujupi yave mona jae uyapo vae rupi, uyembicacata tēi. Ërei ipuere'ã uyembicate Tumpa jovai. ³ Echa'ã Tumpa iñee pe uyecuatía oĩ cuarãi: "Abraham güirovia Tumpa, jare joca jeco pegua Tumpa umbujupi." Jucuarãi uyecuatía oĩ. ⁴ Ërei ime yave quía uparaviqui vae, umimbaraviqui vae umbiepi uparaviqui vae pe ipía chupe ramo - ipiacavi ramo'ã. ⁵ Ërei ime yave quía güirovia Tumpa mbae uyapo mbae reve vae, Tumpa umbujupi ipurugüirovia rupi. Echa'ã Tumpa umbujupi iyoa vae. ⁶ Jae ramiño vi David jei quirãi uyerovia catu co mbae uyapo mbae reve uyembujupica Tumpa pe vae. ⁷ Echa'ã aracae jei cuarãi:

"Uyerovia catu co imbaeyoa reta Tumpa umbiasa chupe vae reta.

Uyerovia catu co imbaeyoa reta uyembai oĩ vae reta.

⁸ Uyerovia catu co Tumpa umbijeco'ã imbaeyoa re vae reta."

Jucuarãi jei.

⁹ ¿Umee ra Tumpa cua yerovia catu uñemicircuncidaca vae reta peño? Aní ¿umee ra uñemicircuncidaca mbae vae reta pe vi? Echa'ã yae ma quirãi Tumpa umbujupi Abraham ipurugüirovia rupi. ¹⁰ Ërei ¿quirãi yave ra umbujupi? ¿Uñemicircuncidaca ma yave ra? aní ¿ndeiño uñemicircuncidaca mbove ra? Uñemicircuncidaca yave'ã co. Tumpa umbujupi ndeiño uñemicircuncidaca mbove. ¹¹ Jayave Abraham uñemicircuncidaca uicuaaca vaerã ñru vae reta pe Tumpa umbujupi co ipurugüirovia rupi ndei uñemicircuncidaca mbove. Jáeramo Abraham co opaete upurugüirovia vae uñemicircuncidaca mbae vae reta tu ramí. Echa'ã jae reta vi uyembujupica ma Tumpa pe. ¹² Jae ramiño vi Abraham co opaete uñemicircuncidaca vae reta tu ramí. Cua reta uñemicircuncidacaño'ã co. Jae reta güinoi mburugüirovia yandetenondegua Abraham ndei uñemicircuncidaca mbove güinoi vae ramí.

Tumpa jei uyapota Abraham pe vae

¹³ Echa'ã Tumpa jei Abraham jare iñemoñaeta reta pe umee vaerã chupe reta ivi. Ërei umee'ã chupe reta cua jei uyapota vae, Abraham uyapo mboroyocui jei vae ramo - jaeño umee chupe reta Abraham ipurugüirovia rupi umbujupi ramo. ¹⁴ Echa'ã Tumpa umee yave mona ivi mboroyocui jei vae uyapo vae reta pe mboroyocui jei vae uyapo reta ramo, jae reta mbaetita tēi mbaerã mburugüirovia güinoi vaerã, jare mbaetita tēi mbaerã vi co Tumpa jei uyapota vae. ¹⁵ Echa'ã mboroyocui uicuaaca quirãi Tumpa uiporaracata jei vae uyapo'ã vae reta pe. Ërei mbaeti yave mboroyocui, mbaetita tēi co quía uyavi mboroyocui.

¹⁶ Jáeramo jei uyapota vae mburugüirovia pegua co, Tumpa umee vaerã jei uyapota vae ipiacavi rupi, jare opaete Abraham iñemoñaeta reta añetete güinoi vaerã. Cua reta co opaete Abraham güinoi vae nunga mburugüirovia güinoi vae reta - mboroyocui jei vae uyapo vae retaño'ã co. Echa'ã Abraham co jae opaete yanderu ramí Tumpa jovai. ¹⁷ Echa'ã jae vi

güirovia Tumpa. Echa'ã Tumpa iñee pe uyecuatía oĩ cuarã: “Che nduyapo jeta vae reta tu rami” —jei Tumpa. Jucuarãi uyecuatía oĩ. Echa'ã Tumpa umee tecove umanocue vae reta pe, jare uyeyapota co mbaembae ndeiño uyeyapo vae.

¹⁸ Yepe tẽi mbaeti echa mbaerã Abraham uãro vaerã, ãrei jecuaẽño güirovia Tumpa jare uãro uyerovia reve. Jáeramo uyeyapo jeta vae reta tu rami. Echa'ã Tumpa jei ma chupe cuarã: “Ndiyeyapota jeta vae reta tu rami.” Jucuarãi jei. ¹⁹ Cien año seri ma güinoi yave, Abraham uicuaa ma jae jete pe umanota ma co. Uicuaa vi Sara ucuacuaa ete ma co jare jáeramo ndarau ma echa imembi. ãrei jecuaẽño güinoi mburugüirovia Tumpa coti. ²⁰ Umican'ã etei ipurugüirovia. Jecuaẽño güirovia Tumpa uyapota co jei chupe vae. Jáeramo ipurugüirovia umimirãta, jare cua jeco pegua umbiadora Tumpa. ²¹ Echa'ã jae uicuaa catu Tumpa ipuere co uyapo opaete jei vae. ²² Jáeramo Tumpa umbujupi ipurugüirovia rupi. ²³ Jare cua Tumpa umbujupi ipurugüirovia rupi vae uyecuatía'ã Abraham reño. ²⁴ Echa'ã uyecuatía vi yanderé. Echa'ã Tumpa yanembujupi yandepurugüirovia rupi, yande yarovia yave jese - umbijecove ye yandeYa Jesús güero umanocue vae reta ipite güi vae re. ²⁵ YandeYa Jesús uñemee umano vaerã yanembaeyoa reta re, jare icove ye ou umanocue vae reta ipite güi uicuaaca vaerã yayembujupica ma co.

5

Yembujupi rupi ñanoi vae

¹ Tumpa yanembujupi ma yandepurugüirovia rupi. Jáeramo ñanoi ma mbiacatu Tumpa ndive yandeYa Jesucristo rupi. ² Jae ramiño vi yaya ma Tumpa re Jesucristo rupi yandepurugüirovia rupi, Tumpa ipiacavi vaerã yandeve. Ñañemimirãta ma Tumpa ipiacavi re, jare ñaãro ñã yayerovia reve Tumpa ndive yaico vaerã jae uyembiadoraca yave. ³ Jare cuaño'ã co. Jae ramiño vi yayerovia yaiporara yave. Echa'ã yaicuaa quirã yaiporara yave, Tumpa umee yandeve yandepiaguasu vaerã. ⁴ Jare yandepiaguasu yave, yaicuaa ñanepirãta ma co. Jare yaicuaa yave ñanepirãta ma co, ñaãro yayerovia reve. ⁵ Jare ñaãro yave yayerovia reve, ndarau yandetavi. Echa'ã Tumpa uicuaaca ma yandeve yandepia pe ipuruau Espiritu Santo jae umee yandeve vae rupi.

⁶ Echa'ã yande yandepuere'ã etei yayembiasa. ãrei Cristo umano iyoa vae reta re ara ou ma uvãe yave umano vaerã. ⁷ Añete co, ndarau ndipo quía uipotã umano penti jupi vae ipepica pe. ãrei aramoi quía iquirẽita umano penti ipiacavi vae ipepica pe. ⁸ ãrei Tumpa uicuaaca ma ipuruau yandecoti. Echa'ã yepe tẽi yande co jae iyoa vae reta, ãrei Cristo umano yanderé. ⁹ Jare Tumpa jeta eteta uyapo yandeve. Echa'ã Tumpa yanembujupi ma Cristo imano rupi. Jáeramo Cristo uyapo vae rupi Tumpa ndarau uiporara yandeve. ¹⁰ Echa'ã yepe tẽi yande yayovaichose Tumpa ndive, ãrei añave yayembipiacatua ma Tumpa ndive Tai imano rupi. Jare Tumpa jeta eteta uyapo yandeve. Echa'ã yayembipiacatua ma Tumpa ndive ramo, yaicuaa catu yayembiasacata co Tai icove ye ramo. ¹¹ Jare cuaño'ã co. Jae ramiño vi yayerovia Tumpa re yandeYa Jesucristo rupi. Echa'ã Cristo rupi yayembipiacatua ma Tumpa ndive.

Adãn jare Cristo

¹² Jare mbaeyoa uique cua ivi pe penti cuimbae rupi. Jare mano uique mbaeyoa rupi. Jáeramo mano ou opaete vae pe. Echa'ã opaete vae iyoa. ¹³ Jare ndei Tumpa uicuaaca Moisés iporoyocui mbove, imeño mai mbaeyoa ivi pe. ãrei mbaeti mboroyocui yave, yandepuere'ã etei quía yambijeco uyavi ramo. ¹⁴ ãrei opaete vae umano Adãn güive Moisés ico regua, yepe tẽi ñru vae reta iyoa'ã Adãn iyoa rami. Jare Adãn uyemijaanga Cristo re, jae co outa vae.

¹⁵ ãrei yandepuere'ã yamboyoaque Adãn imbaeyoa Tumpa umee yandeve vae ndive. Echa'ã penti cuimbae iyoa ramo, jeta vae umano. ãrei Tumpa umee yandeve ipiacavi rupi vae tuicha ete co cua güi. Echa'ã Tumpa umee ma ipiacavi jeta vae pe penti cuimbae rupi - jae co Jesucristo. ¹⁶ Yandepuere'ã yamboyoaque jocua penti cuimbae imbaeyoa Tumpa umee yandeve vae ndive. Echa'ã jocua penti mbaeyoa jeco pegua Tumpa uãa jare umbijeco opaete vae. ãrei Tumpa umee yandeve vae rupi yayembujupica ma, yepe tẽi jeta mbaeyoa reta yayapo. ¹⁷ Echa'ã mano güinoi mbaepuere opaete vae re jocua penti cuimbae imbaeyoa jeco pegua. ãrei Tumpa imbaepuere tuicha ete co cua güi. Echa'ã umee ma yandeve ipiacavi yayembujupica vaerã, tecove imbaepuere ñanoi vaerã penti cuimbae rupi - jae co Jesucristo.

¹⁸ Jáeramo penti cuimbae imbaeyoa jeco pegua Tumpa umbijeco opaete vae. Jae ramiño vi penti cuimbae jupi vae uyapo vae jeco pegua Tumpa ipuere umbujupi opaete vae tecove opa mbae vae güinoi reta vaerã. ¹⁹ Penti cuimbae Tumpa jei vae uyapo'ã ramo, jeta vae

uyeyapo iyoa vae retarā. Jae ramiño vi penti cuimbae Tumpa jei vae uyapo ramo, Tumpa umbujupita jeta vae.

²⁰ Jare Tumpa uicuaaca mboroyocui, mbaeyoa uyecuaa cavi vaerā. Ērei uyecuaa yave jeta co mbaeyoa reta, uyecuaa vi tuicha ete co Tumpa ipiacavi. ²¹ Echa'ā mbaeyoa jecuaeño güinoi mbaepuere opaete vae re. Echa'ā opaete vae umano. Jae ramiño vi Tumpa ipiacavi güinoi mbaepuere yanembujupi vaerā, jare jucuarāi umee vaerā yandevete tecove opa mbae vae yandeYa Jesucristo rupi.

6

Ñamano ma mbaeyoa güi

¹⁻² Jáeramo icavi'ā etei yandepia pe yayemingueta vaerā cuarāi: “Icavi co yayapo vaerā mbaeyoa uyecuaa vaerā tuicha ete co Tumpa ipiacavi.” Yande ñamano ma co mbaeyoa güi. Jáeramo icavi'ā etei jecuaeño mbaeyoa yayapo vaerā. ³ Picuaa co quirāi opaete yandē yayembibautizaca pentiño Cristo Jesús ndive ñāi vaerā vae ñamano jae ndive yayembibautizaca yave. ⁴ Jáeramo yayembibautizaca yave, ñañeñotica Cristo ndive ñamano ramo. Ērei Tumpa umbijecove ye Cristo güeru umanocue vae reta ipite güi imbaepuere rupi. Jae ramiño vi Tumpa umee ma yandevete tecove ipiau vae.

⁵ Echa'ā Tumpa yandeapo pentiño Cristo ndive Cristo imano re. Jae ramiño vi Tumpa yanembijecove yeta yandereru umanocue vae reta ipite güi, umbijecove ye Cristo güeru umanocue vae reta ipite güi rami. ⁶ Yaicuaa quirāi yanderecove indechicue umano curusu re Cristo ndive, agüiye vaerā mbaeyoa yanderete pe oī vae mbaepuere güinoi yanderé, agüiye vaerā jecuaeño yayapo mbaeyoa. ⁷ Echa'ā umanocue vae ipuere'ā ma uyapo mbaeyoa. ⁸ Yande ñamano Cristo ndive ramo, yarovia yaicoveta vi co jae ndive. ⁹ Echa'ā yaicuaa quirāi Tumpa umbijecove ye Cristo güeru umanocue vae reta ipite güi. Jáeramo Cristo ndarau umano ye. Echa'ā mano ipuere'ā ma jese. ¹⁰ Echa'ā Cristo umano yave, penti veseño umano mbaeyoa jeco pegua. Ērei añave icoño mai. Jecuaeño ico pentiño Tumpa ndive. ¹¹ Jae ramiño vi pe reta perovia quirāi pemaño ma co mbaeyoa güi, jare pico Tumpa pe piyeyocui vaerā yandeYa Cristo Jesús rupi.

¹² Jáeramo agüiye pemaño mbaeyoa re güinoi vaerā mbaepuere perete re. Agüiye piyapo mbaeyoa perete uipota uyapo vae. ¹³ Agüiye vi pemee perete mbaeyoa uyapo vaerā. Echa'ā jucuarāi yave, perete uyapota icavi mbae vae. Ērei piñemee Tumpa pe. Echa'ā pe reta co jae umanocue vae tecove ipiau vae güinoi vae reta rami. Jáeramo pemee perete Tumpa pe. Echa'ā jucuarāi yave, perete uyapota icavi vae. ¹⁴ Echa'ā mbaeyoa ndarau güinoi mbaepuere peré. Echa'ā pico'ā mboroyocui jei vae re. Pico ma ñee mbiacavi pegua re.

Yaico jupi vae rupi

¹⁵ Jáeramo icavi'ā etei yandepia pe yayemingueta vaerā cuarāi: “Yayapo mbaeyoa, yaico'ā mboroyocui jei vae re ramo jare yaico ñee mbiacavi pegua re ramo.” ¹⁶ Piñemee yave quía pe piyeyocui chupe vaerā, pe reta co jae jembicui reta. Jecuaeño mbaeyoa piyapo yave, pemaño co. Ērei piyapo yave Tumpa jei vae, picota jupi vae rupi. ¿Picuaa'ā pa cua? ¹⁷ Jecuaeño piyapose mbaeyoa. Ērei amee yasurupai Tumpa pe piyapo ma Tumpa jei vae perovia reve jocua moromboe uñemee peve vae. ¹⁸ Jáeramo piyero va ma mbaeyoa güi, jare piyeyocui ma Tumpa pe pico vaerā jupi vae rupi. ¹⁹ (Chemiari ai peve cuarāi amijaanga reve, pepuere'ā picuaa cavi cua mbaembae ramo.) Tenonde yave pemee perete piyapo vaerā mbaeyoa, piyapo vaerā pichii vae jare jupi mbae vae. Ērei añave pemee perete Tumpa pe pico vaerā jupi vae rupi, perete uñeño tee vaerā Tumpa peguarā.

²⁰ Echa'ā jecuaeño mbaeyoa piyapose yave, piyeyocui'ā Tumpa pe pico vaerā jupi vae rupi. ²¹ Mbaeti etei mbae icavi vae piyapo jocua ara reta pe. Echa'ā añave pemara jocua mbaembae piyapose vae re. Echa'ā jocua mbaembae mano pegua co. ²² Ērei añave piyapo'ā ma mbaeyoa. Piyeyocui ma Tumpa pe. Jáeramo añave piyapo icavi vae. Echa'ā perete uñeño tee oī Tumpa peguarā. Jare perecove opa yave cua ivi pe, penoita tecove opa mbae vae. ²³ Echa'ā mbaeyoa uyapo vae umano co. Ērei regalo Tumpa umee yandevete yandeYa Cristo Jesús rupi vae tecove opa mbae vae co.

7

Menda re umijaanga vae

¹ Cherivi reta, pe reta picuaa co mboroyocui jei vae. Jare picuaa co quirāi mboroyocui güinoi mbaepuere penti vae re jae ico rambueveño. ² Echa'ā mboroyocui jei cuña umenda vae penti ramiño co ime ndive, ime ico rambueve. Ērei ime umano chugüi yave, cuña

uyeyora ma jocua mboroyocui ime regua güi. ³ Jáeramo cuña imegua yave ime tenondegua vae ico rambueve, cuña uyuvanga menda re. Ërei ime umano ma yave, cuña uyeyora ma jocua mboroyocui ime regua güi. Jayave umenda yave ñru cuimbae ndive, uyuvanga'a menda re.

⁴ Jae ramiño vi, cherivi reta, pe reta piyeyora mboroyocui güi Cristo imano rupi, pico vaerã Cristo re. Añete co, pico ma Tumpa umbijecove ye güeru umanocue vae reta ipite güi vae re, piyapo vaerã icavi vae, Tumpa uyembiadoraca vaerã. ⁵ Echa'a yaico yave yande yae vae reño, yaipota yayapo mbaeyoa, mboroyocui jei agüiye vaerã yayapo ramo. Jare cua mbaeyoa uparaviqui yanderete pe ñamano vaerã. ⁶ Ërei añave yayeyora ma mboroyocui güi. Echa'a yayeyora ma yandeocuisse vae güi. Jáeramo yandepuere yayeyocui Tumpa pe tecove ipiau vae rupi Espiritu umee yandevae vae rupi. Yayeyocui'a ma chupe mboroyocui indechi vae jei vae re.

Mbaeyoa ico chepia pe vae

⁷ Yandepuere'a etei yae icavi mbae vae co mboroyocui. Mboroyocui umimbeu'a yave cheve mbaeyoa regua, ndarau tēi aicuaa jesegua. Echa'a ndarau tēi aicuaa aipota ñru vae reta imbaembae yave cheyoa co vae, mboroyocui jei'a yave: "Agüiye ipota ñru vae reta imbaembae." ⁸ Ërei mboroyocui jei agüiye vaerã ayapo ramo, mbaeyoa jeiete uparaviqui chepia pe che aipota vaerã ñru vae reta imbaembae. Echa'a mbaeti yave mboroyocui, aicuaa'a co cheyoa. ⁹ Tenonde yave aicuaa'a mboroyocui jei vae yave, che aico penti icove catu vae rami. Ërei aicuaa yave mboroyocui jei vae, aicuaa vi cheyoa co mboroyocui jei vae ayavi ramo, jare aicuaa vi amanota co. ¹⁰⁻¹¹ Chepia pe ayemingueta tēi mboroyocui umeeta cheve tecove. Ërei chetavi. Echa'a cheyoa yave, mboroyocui uicuaaca cheve amanota co.

¹² Ërei mboroyocui mbaeyoa pegua'a co, jare mboroyocui jei vae iyoa mbae vae pegua jare jupi vae pegua jare icavi vae pegua co. ¹³ Jocua icavi vae pegua uyeyapo'a etei cheve mano peguarã. Mbaeyoa mano pegua co. Jare jucuarãi uyecuaa mbaeyoa. Jocua icavi vae pegua uicuaaca cheve amanota co cheyoa ramo. Jare jucuarãi mboroyocui uicuaaca mbaeyoa icavi mbae ete co.

¹⁴ Echa'a yaicuaa Espiritu Santo umee mboroyocui. Ërei che aico che jae vae reño. Añemee ayapo vaerã mbaeyoa. ¹⁵ Aicuaa'a maera ra ayapo cuarãi. Echa'a ayapo'a chequirēi tēi ayapo vae. Ërei ayapo cheatēi tēi ayapo vae. ¹⁶ Jáeramo aicuaa mboroyocui icavi vae pegua co. Echa'a ayapo cheatēi tēi ayapo vae. ¹⁷ Jáeramo icavi mbae vae uyapo vae che'a co. Icavi mbae vae uyapo vae co jae mbaeyoa chepia pe ico vae. ¹⁸ Che aico che jae vae reño. Jáeramo aicuaa mbaeti co mbae icavi vae anoi chiye. Echa'a chequirēi tēi ayapo icavi vae, Ërei chepuere'a ayapo. ¹⁹ Ayapo'a icavi vae chequirēi tēi ayapo vae. Ërei jecuae ayapo icavi mbae vae cheatēi tēi ayapo vae. ²⁰ Jáeramo icavi mbae vae uyapo vae che'a co. Icavi mbae vae uyapo vae co jae mbaeyoa chepia pe ico vae. Echa'a ayapo cheatēi tēi ayapo vae.

²¹ Uyeyapo cheve cua: Icavi vae chequirēi tēi ayapo yave, jecuaeño ayapo icavi mbae vae. ²² Aicuaa chepia pe icavi co Tumpa iporoyocui. ²³ Ërei che jae vae reño aico ramo, jecuaeño uyecuaa cheve chequirēi tēi chepia pe ayapo vae ndive oyovaicho vae. Jae co mbaeyoa ayapo vae. Cua mbaeyoa güinoi mbaepuere cherē.

²⁴ Chepiatiti ete. ¿Quía ra umeeta cheve mbaepuere agüiye vaerã ayapo mbaeyoa? Echa'a mbaeyoa mano pegua co. ²⁵ Jaeño Tumpa, yandeyã Jesucristo rupi. Yasurupai amee Tumpa pe. Jayave chequirēi reve chepia pe ayemingueta ayapo vaerã Tumpa iporoyocui jei vae. Ërei che jae vae reño aico ramo, jecuaeño ayapo mbaeyoa.

8

Ñanoi tecove opa mbae vae Espiritu Santo rupi

¹ Jáeramo Tumpa ndarau etei umbijeco Cristo Jesús re güirovia vae reta. ² Echa'a Espiritu Santo uparaviqui ma, anoi vaerã tecove opa mbae vae Cristo Jesús re arovia ramo. Jáeramo ayeyora ma mbaeyoa imbaepuere güi. Echa'a mbaeyoa ayapo ramo amanota tēi. ³ Moisés iporoyocui ipuere'a yanembori, yandepuere'a yayapo mboroyocui jei vae ramo. Jáeramo Tumpa yanembori. Echa'a ombou Tai etei cua ivi pe. Tai uyeyapo penti cuimbaerã. Yepe tēi opaete ivi pegua reta iyoa, jae iyoa'a co. Ou umano vaerã yanembaeyoa re. Umiamiri mbaeyoa, agüiye vaerã mbaeyoa güinoi mbaepuere yanderē. ⁴ Cristo cua uyapo, Tumpa yanembujupi vaerã. Echa'a mboroyocui jeise yayapo vaerã jupi vae. Echa'a yaico'a ma yande yae vae reño. Yaico ma co Espiritu Santo jei vae re.

⁵ Jei vae reño yugüireco vae reta ipia pe uyemingueta mbaembae jete uipota vae reño. Ërei Espiritu Santo jei vae re yugüireco vae ipia pe uyemingueta Espiritu Santo uipota vae re. ⁶ Echa'a mbaembae jete uipota vae reño ipia pe uyemingueta vae reta umanota co. Ërei

Espíritu Santo uipotá vae re ipia pe uyemingueta vae reta güinoi tecove opa mbae vae jare mbiacatu. ⁷Echa'ã mbaembae jete uipotá vae reño ipia pe uyemingueta vae reta oyovaicho Tumpa ndive. Echa'ã ñatēi reta uyapo Tumpa iporoyocui. Ipuere'ã etei uyapo Tumpa iporoyocui. ⁸Jáeramo jei vae reño yugüireco vae reta ipuere'ã uyapo Tumpa uipotá uyapo vaerã vae.

⁹Èrei pe reta pico'ã ma pipotá vae reño. Pico Espiritu Santo jei vae re. Echa'ã Tumpa iEspiritu ico pepia pe. Echa'ã Cristo iEspiritu mbaeti güinoi vae Cristo imbae'ã co. ¹⁰Èrei Cristo ico pepia pe. Jáeramo Espiritu Santo umee peve tecove opa mbae vae, yepe tēi perete umanota co mbaeyoa jeco pegua. Echa'ã Tumpa pembujupi ma. ¹¹Tumpa umbijecove ye Jesús güeru umanocue vae reta ipite güi. Jare Tumpa iEspiritu ico pepia pe. Jáeramo Tumpa umbijecove catuta co perete umanota vae iEspiritu ico pepia pe vae rupi. Echa'ã umbijecove ye Cristo Jesús güeru umanocue vae reta ipite güi.

¹²Jáeramo, cherivi reta, yandepuere'ã ma yayapo yanderete pe yayapose vae. ¹³Echa'ã ime yave quía jei vae reño ico vae, umanota co. Èrei Espiritu imbaepuere rupi pepuere peya piyugüi perete uipotá vae. Jare jucuarã yave, picóñotai co.

¹⁴Echa'ã opaete Espiritu Santo jei vae re yugüireco vae reta Tumpa tai reta co. ¹⁵Echa'ã Tumpa umee peve iEspiritu piyeyapo vaerã Tumpa tai retarã. Peapo'ã co uyeyocui vae uquiye ipatrón güi vae reta ramí. Jáeramo Espiritu Santo yanembori yandepuere vaerã yae: "CheRu." ¹⁶Jare Espiritu Santo etei uicuaaca yandeve yande co jae Tumpa tai reta. ¹⁷Jare yande co jae Tumpa tai reta ramo, ñanoita vi yanembaerã Tumpa umeeta yandeve vae. Ñanoita co yanembaerã Cristo ndive. Echa'ã yaiporara ñai Cristo uiporara ramí. Jáeramo Tumpa yanembutuichacata Cristo ndive.

¹⁸Añave yaiporara ñai. Èrei arovía cua yaiporara ñai vae mbae'ã co. Echa'ã icavi eteta co yandeve jocua ndeiño uyecuaa vae Tumpa umeeta yandeve vae. ¹⁹Echa'ã opaete Tumpa uyapo vae uãro oĩ iquirēi ete reve Tumpa umbutuichaca vaerã tai reta. ²⁰Tumpa uyapo opaete mbaembae icavi ete. Èrei opaete uyapo vae icumegua ma, yepe tēi mbaembae etei uyapo'ã mbae icumegua vaerã. Echa'ã Tumpa umaño icumegua vaerã Adán iyoa ramo. Èrei ndarau jecuaño mbaembae icumegua. ²¹Echa'ã Tumpa uepita tai reta opaete mbae icavi mbae vae güi, umbutuichaca reta yave. Jare ramiño vi Tumpa uepita uyapo vae etei, agüiye vaerã jecuaño icumegua. ²²Echa'ã yaicuaa co quirãi iyipi güiye jare jecuae añave opaete Tumpa uyapo vae uiporara oĩ penti cuña imembi oata vae uiporara oĩ ramí. ²³Jare ramiño vi yande yaiporara ñai yandepia pe, yepe tēi ñanoi ma Espiritu Santo - echa'ã Espiritu Santo rani Tumpa umee yandeve. Echa'ã ñaãro ñai Tumpa uicuaaca vaerã opaete pe yande co jae Tumpa tai reta. Cua uyeyapo yave, Tumpa uipepicata yanderete añave ñanoi vae, yanderete ipiau vaerã. ²⁴Echa'ã yayembiasaca yave, yambiipi ñaãro yayerovia reve. Èrei Tumpa uepi yanderete yave, ndarau ma ñaãro tēi. Echa'ã ime yave quía mbae uãro vae, jocua güinoi ma yave, uãro'ã ma. ²⁵Èrei ñaãro ñai mbae ndeiño ñanoi vae. Jáeramo ñaãro ñai yandepiaguasu reve.

²⁶Jare ramiño vi Espiritu Santo yanembori, ñanepirãta'ã ramo. Yayerureta tēi co Tumpa pe mbae re. Èrei yaicuaa'ã mbae re yayerure vaerã chupe. Amo pe yaicuaa'ã mbae yae vaerã. Èrei jeseve Espiritu Santo etei uyerure Tumpa pe yanderé. ²⁷Tumpa uicuaa opaete vae ipia pe oĩ vae, jare uicuaa vi Espiritu Santo ipiyemingueta. Echa'ã Espiritu Santo uyerure Tumpa pe yanderé Tumpa jei vae rupi. Yande co jae uñeño tee Tumpa peguarã vae reta.

Opaete mbaembae ñamiamiritá

²⁸Jare yaicuaa co quirãi opaete uyeyapo vae rupi Tumpa yanembori oĩ icavi vaerã yandeve, yande yaau Tumpa ramo. Echa'ã Tumpa jei vae rupi yandeparavo. ²⁹Echa'ã iyipi güiye Tumpa yandecuaa. Jare ramiño vi iyipi güiye Tumpa yandeparavo yande yayeyapo vaerã Tai ramí, jare Tai ico vaerã tenondeguarã opaete Tumpa tai reta ndive. ³⁰Jare ramiño vi Tumpa ñanereni, iyipi güiye yandeparavo ramo. Jare ramiño vi Tumpa yanembujupi, ñanereni ramo. Jare ramiño vi yanembutuichacata co, yanembujupi ramo.

³¹Jare cua yaicuaa ramo, yaicuaa vi cua: Tumpa yanembori ramo, mbaeti quía ipuere ñanemiamiri. ³²Tumpa ñatēi'ã umee yandeve Tai. Echa'ã umee co, jae umano vaerã yanderé. Jáeramo Tumpa umeeta co yandeve opaete mbaembae. Echa'ã umee yandeve Tai. ³³Mbaeti quía ipuere yanembijeco mbae re. Echa'ã yande co jae Tumpa uiparavo vae reta, jare Tumpa yanembujupi ma. ³⁴Mbaeti quía ipuere yanembijeco yanembaeyoa reta re. Echa'ã Cristo umano yanembaeyoa reta re, jare icove ye ou umanocue vae reta ipite güi, jare añave ime oĩ Tumpa iyacata coti. Jare etei uyerure Tumpa pe yanderé. ³⁵Cristo yanderarau, jare ndarau quía ipuere yanembisiri Cristo güi. Aramoi yaiporarata, ani yavaita co yandeve yaico vaerã, ani ñru vae reta uyapota icavi mbae yave yandeve, ani caruai outa yandeve. Aramoi ndarau ñanoi corepoti yanderemimonderã yagua vaerã. Aramoi ñru vae

reta iquirëita yandeyuca. Aramoi yepe yandeyucata. Ërei jecuaëño Cristo yanderauta. ³⁶Echa'ã Tumpa iñee pe uyecuatía oĩ cuarãi:

“Cristo re yarovia ramo, opa ara rupi ñru vae reta ñanemiatarëi ipia pe. Umae yanderé ovecha reta uyeyucacata vae re umae vae rami.”

Jucuarãi uyecuatía oĩ. ³⁷Ërei yepe tēi opaete cua uyeyapo yandeve, ërei jecuae ñamiamirita opaete yayerovia reve Cristo imbaepuere rupi. Echa'ã jae yanderau. ³⁸Che aicuaa catu Tumpa yanderau co, jare ndarau quía ipuere yanembisiri Tumpa güi. Aramoi ñamanota, ani aramoi jecuaëño yaicota. Ërei jeseve Tumpa yanderauta. Ángel reta jare mburuvicha ara pegua reta ndarau ipuere yanembisiri Tumpa güi. Opaete añave uyeyapo oĩ vae jare opaete uyeyapota vae ndarau ipuere yanembisiri Tumpa güi. ³⁹Ipotave ivate oĩ vae, jare ipotave ivigüi pe oĩ vae, jare ipotave ñru mbae Tumpa uyapo vae yepe ndarau ipuere yanembisiri Tumpa güi. Jecuaëño Tumpa yanderau. Echa'ã uicuaaca yandeve ipuruau yandeYa Cristo Jesús rupi.

9

Tumpa uiparavo Israel pegua reta

¹Che co jae Cristo imbae. Cua che jae vae añete vae co. Cheapu'ã co. Espíritu Santo ico chepia pe. Jáeramo aicuaa catu cua che jae vae añete vae co. ²Jecuaëño chepiatiti. ³Echa'ã aipota tēi ayembisiri vaerã Cristo güi penti yepipeyu oa jese vae rami, jucuarãi yave chepuere ambori cherivi reta. Jae reta co cherentaigua reta. ⁴Jae reta co Israel pegua reta. Uyeyapo reta Tumpa tai retarã. Tumpa uechaca imbaepuere jae reta jovaque. Tumpa umee chupe reta itrato reta, jare uicuaaca vi chupe reta Moisés iporoyocui. Jae reta uyeyocui Tumpa pe Tumpa jo pe. Tumpa umimbeu chupe reta uyapota chupe reta vae. ⁵Jae reta co Israel pegua reta itenondegua reta iñemoñaeta reta, jare chugüi reta Cristo ou uyeyapo cuimbaerã. Cristo co jae Tumpa etei. Jae co opaete mbaembae iYa. Tuyembadoraca jaeño mai pegua. Amén.

⁶Cua uipota'ã jei Tumpa uyapo'ã jae jei uyapota vae. Echa'ã mbaeti co opaete Israel iñemoñaeta reta Israel pegua añetete vae reta. ⁷Jae ramiño vi mbaeti co opaete Abraham iñemoñaeta reta Abraham tai añetete vae reta. Echa'ã Tumpa jei Abraham pe cuarãi: “Isaac iñemoñaeta retaño co jae iñemoñaeta añetete vae reta.” Jucuarãi jei. ⁸Cua uipota jei jocua uñemoñaeta cuimbae jei vae jeco peguaño vae reta Tumpa tai reta'ã co. Jaeño Tumpa jei vae rupi uñemoñaeta vae reta co jae iñemoñaeta añetete vae reta. ⁹Echa'ã Tumpa jei Abraham pe. Jei chupe cuarãi: “Ñru año re cuarãi yave ayu yeta, jare Sara imembita co.” Jucuarãi jei.

¹⁰Jare cua mbaeti co opaete Tumpa jei vae. Echa'ã Tumpa imiari Rebeca pe jae imembita yave. Jocua imembita reta tu co jae yandetenondegua Isaac. ¹¹⁻¹²Jare Tumpa imiari Rebeca pe yave, ndeiño oa choguaquiri reta. Jáeramo ndeiño uyapo icavi vae jare icavi mbae vae. Ërei Tumpa jei Rebeca pe cuarãi: “Tenondegua vae uyeyocuita co taicuegua vae pe.” Jucuarãi jei. Jare cua uicuaaca yandeve quirãi Tumpa uiparavo jae jei vae rupi. Tumpa uiparavo'ã mbae ipotave vae uyapo vae jeco pegua. Tumpa uiparavo jae etei uipota ramo.

¹³Echa'ã Tumpa iñee pe uyecuatía oĩ cuarãi: “Aiparavo Jacob. Aiparavo'ã Esaú” —jei Tumpa. Jucuarãi uyecuatía oĩ.

¹⁴Jare Tumpa uyapo'ã etei jupi mbae vae jucuarãi jei ramo. ¹⁵Echa'ã Tumpa jei Moisés pe cuarãi: “Aipararecota co chequirëi aiparareco vae. Jare chepiacavita co chequirëi chepiacavi chupe vae pe.” Jucuarãi jei. ¹⁶Jáeramo ñanoi mburuparareco Tumpa güi, Tumpa etei iquirëi yandeparareco ramo, yandeiño'ã ñanequirëi ramo, jare mbaeti vi mbae yande yayapo vae jeco pegua. ¹⁷Echa'ã Tumpa iñee pe uyecuatía oĩ vae pe yamingueta quirãi Tumpa jei Egipto pegua reta juvicha guasu pe cuarãi: “Cuarã etei che nduparavo mburuvicha guasurã, aicuaaca vaerã chembaepuere nderovaque, opaete ivi pegua reta pe chererãcua vaerã.” Jucuarãi jei. ¹⁸Jáeramo Tumpa uiparareco iquirëi uiparareco vae. Jae ramiño vi umipiatanta iquirëi umipiatanta vae.

¹⁹Jáeramo aramoi quía upiranduta cheve: “Jucuarãi yave, ¿maera pa Tumpa yanembijeco? Echa'ã mbaeti quía ipuere oyopia Tumpa jei vae.” ²⁰Agüiye ere jucuarãi. Echa'ã nde co jae penti ivi peguaño. Icavi'ã etei niñengata vaerã Tumpa pe. ñru ipuere'ã etei uñengata iyapoa pe. Ipuere'ã jei: “¿Maera pa nde cheapo cuarãi?” ²¹Ñaeu uyapo vae ipuere uyapo ñaeu güi jae uipota vae rupi. Iyapoaño ipuere uyapo penti mbae ipõra vae jare ñru mbae ipõra mbae vae.

²²Tumpa pochi co oĩ uyembaita oĩ vae reta pe. Ërei umiaguanta chupe reta ipiaguasu ete reve, yepe tēi iquirëi uicuaaca quirãi pochi chupe reta jare quirãi uicuaacata chupe reta imbaepuere. ²³Cua Tumpa uyapo, uicuaaca vaerã quirãi umbutuichacata co uiparareco vae reta. Echa'ã iyipi güive Tumpa uiparavo cua reta umbutuichaca vaerã. ²⁴Cua reta co

jae yande reta. Echa'ã Tumpa yandeparavo. Yande co jae judío reta jare judío mbae vae reta. ²⁵ Echa'ã Tumpa jei Oseas uicuatía vae pe cuarãi:

“Tenonde yave chembae'ã vae reta uyeyapota co chembae retarã, jare tenonde yave aau'ã vae reta añave aauta co.

²⁶ Tenonde yave che jae peve: ‘Pe reta chembae'ã co.’

Ërei jocua che jae vae pe etei che jaeta peve: Pe reta co jae cheraí reta. Che co jae Tumpa icove vae.”

Jucuarãi jei. ²⁷ Jare Isaías jei iñeeãta reve Israel pegua reta re: “Yepe tõi jeta ete Israel iñemoñaã reta jeta ete ivicuíti i guasu jembei pe oĩ vae rami, ãrei mbovño Tumpa umbiasata.

²⁸ Echa'ã yandeYa opa voita uyapo cua ivi pe jei uyapota vae.” Jucuarãi jei. ²⁹ Echa'ã tenonde yave Isaías jei cuarãi:

“YandeYa co jae opaete vae iYa. Jae umbiasa amocue ñanerentaigua reta.

Jucuarãi'ã yave uyapo, uyeyapota tõi yandeve Sodoma jare Gomorra pe uyeyapo vae rami.”

Jucuarãi jei.

Yembujupi Tumpa umee mburugüirovia re vae

³⁰ Jáeramo yandepuere yae cua: Judío mbae vae reta, yepe tõi ueca'ãse uyembujupica vaerã, añave uyembujupica ma co. Uyembujupica ma co, mburugüirovia güinoi ramo.

³¹ Ërei Israel pegua reta uipota tõi uyembujupica mboroyocui jei vae re uyapo vae rupi. Ërei ipuere'ã uyapo mboroyocui jei vae. ³² ¿Maera ra uyembujupica'ã? Uipota'ã uyembujupica mburugüirovia rupi ramo. Echa'ã uipota tõi uyembujupica mboroyocui jei vae re uyapo vae rupi. Jáeramo Cristo umbiavaí chupe reta penti ita re jae reta ipísayeyuca jese vae rami co. ³³ Echa'ã Tumpa iñee pe uyecuatía oĩ cuarãi:

“Che añoño judío reta ipite pe penti vae” —jei Tumpa—.

“Jae co penti ita ipísayeyuca jese vae rami. Ipísapaa reta jocua ita re.

Ërei güirovia jese vae cuarãi jeita: ‘Icaviño arovia jese.’ ”

Jucuarãi uyecuatía oĩ.

10

¹ Cherivi reta, aipota ete Israel pegua reta uyembiasaca vaerã. Jáeramo ayerure Tumpa pe jese reta. ² Echa'ã chepuere amimbeu jesegua reta quirãi uipota ete uyeyocui Tumpa pe, ãrei uyeyocui tõi chupe uicuaa mbae reve. ³ Echa'ã uicuaa'ã quirãi Tumpa yanembujupi. Jáeramo jecuaeño uipota tõi uyembujupi. Umaeño'ã Tumpa re umbujupi vaerã. ⁴ Echa'ã Cristo opa ma umbai Moisés iporoyocui. Mbaeti ma quía ipuere uyembujupica mboroyocui jei vae re uyapo vae rupi. Opaete Cristo re güirovia vae reta uyembujupica co.

⁵ Echa'ã Moisés uicuatía jocua uipota uyembujupica mboroyocui jei vae re uyapo vae rupi vae re cuarãi: “Ime yave quía jocua mbaembae uyapo vae, güinoita tecove opa mbae vae uyapo ramo.” Jucuarãi uicuatía. ⁶ Ërei uyembujupica mburugüirovia rupi vae re Tumpa jei cuarãi: “Agüiye ndepia pe iyemingueta: ‘¿Quía ra oota ara pe güeru vaerã cua ivi pe Cristo?’ ” ⁷ Agüiye vi ere: ‘¿Quía ra ugüeyita güeru vaerã Cristo umanocue vae reta ipite güi?’ ” Jucuarãi jei. ⁸ Jare Tumpa jei vi cuarãi: “Chiñee coiño oĩ ndegüi. Ndepuere ndiyemingueta jese, jare ndepuere ndepia pe ndiyemingueta jese.” Jucuarãi jei. Jae co ñee numimbeu vae. Echa'ã numimbeu ñru vae reta pe jae reta güirovia vaerã. ⁹ Nde ndere yave: “Jesús co jae cheYa”, jare nderovia yave ndepia pe Tumpa umbijecove ye co Jesús güeru umanocue vae reta ipite güi, ndiyembiasacata co. ¹⁰ Echa'ã ndepia pe nderovia yave, ndiyembujupicata co, jare ndere yave: “Jesús co jae cheYa”, ndiyembiasacata co.

¹¹ Echa'ã Tumpa iñee pe uyecuatía oĩ cuarãi: “Güirovia jese vae cuarãi jeita: ‘Icaviño arovia jese.’ ” Jucuarãi uyecuatía oĩ. ¹² Echa'ã judío jare judío mbae vae uyaví'ã uyugüi. Echa'ã yandeYa co jae opaete vae iYa, jare tuicha ete uyecuaa yandeve imbaepuere yayerure chupe mbae re yave. ¹³ Echa'ã uyerure yandeYa pe umbiasa vaerã vae uyembiasacata co. ¹⁴ Ërei ndarau quía uyerure yandeYa pe umbiasa vaerã, güirovia'ã yave jese. Jare ndarau güirovia jese, uyandu'ã yave jesegua. Jare ndarau uyandu jesegua, mbaeti yave quía umimbeu chupe. ¹⁵ Jare ndarau quía umimbeu chupe, Tumpa omondo'ã quía yave. Echa'ã Tumpa iñee pe uyecuatía oĩ cuarãi: “Yayerovia ete co. Echa'ã yugüeru ma uvã ñee mbiacatu pegua umimbeu vae reta. Yugüeru umimbeu vaerã yandeve ñee icavi vae, yande yayerovia vaerã.” Jucuarãi uyecuatía oĩ.

¹⁶ Ërei opaete vae'ã güirovia ñee icavi vae. Echa'ã aracae Isaías jei cuarãi: “CheYa, ¿quía ra güirovia numimbeu chupe vae?” Jucuarãi jei. ¹⁷ Jáeramo numimbeu Cristo regua, ñru vae reta uyandu vaerã. Jare uyandu yave, amocue vae güirovia.

¹⁸ Ērei tapirandu peve: ¿Uyandu'ã ra reta? Uyandu reta tēi co. Echa'ã Tumpa iñee pe uyecuatía oĩ cuarãi:

“Tumpa jembiocui reta yugüiraa opaete ivi rupi, jare umimbeu opaete vae pe.”

Jucuarãi uyecuatía oĩ. ¹⁹ Ērei tapirandu ye peve: ¿Uicuaa'ã ra Israel pegua reta? Uicuaa reta tēi co. Echa'ã tenonde voi aracae Moisés jei cuarãi:

“Ayapota icavi vae chembae'ã vae reta pe, pe reta piñemiagüiro vaerã jese reta” —jei Tumpa—.

“Ayapota icavi vae iyaracuaa mbae vae pere chupe vae reta pe, pombopochica vaerã” —jei. Jucuarãi jei. ²⁰ Jare Isaías jei vi uquiye mbae reve cuarãi:

“Chereca'ã vae reta chevãe ma” —jei Tumpa—.

“Ayecuaa upirandu'ã cheré vae reta pe” —jei.

Jucuarãi jei. ²¹ Jare Isaías jei vi Israel pegua reta re cuarãi: “Jecuaeño aeni tēi yugüeru vaerã checoti” —jei Tumpa—. “Ērei uyapo'ã che jae chupe reta uyapo vaerã vae. Jecuaeño oyovaicho che ndive” —jei. Jucuarãi jei.

11

Tumpa uiparavo amocue Israel pegua reta

¹ Ērei yepe tēi jucuarãi uyapo reta, ěrei Tumpa ueya'ã etei jae uiparavo vae reta. Echa'ã che vi co jae penti Israel pegua. Che co jae Abraham inẽmoñaã reta pegua jare Benjamín inẽmoñaã reta pegua. ² Tumpa ueya'ã co jae uiparavo vae reta. Echa'ã iyipi güive uicuaa reta. Picuaa co Tumpa iñee pe Elías regua uyecuatía oĩ vae. Echa'ã Elías uyerure Tumpa pe yave, umbijeco Israel pegua reta. Jei Tumpa pe cuarãi: ³ “CheYa, uyuca reta niñee umimbeu vae reta, jare umbai reta maemimba uyeyuca vae uñemeearenda reta. Cheño ayeyocui ndeve, jare jae reta uipota vi cheyuca.” Jucuarãi jei. ⁴ Ērei Tumpa jei chupe cuarãi: “Imeño siete mil cuimbae che aiparavo uyeyocui cheve vaerã vae reta. Jae reta uyeatica'ã tumpa-raanga Baal jovai umbiadora vaerã.” Jucuarãi jei. ⁵ Jae ramiño vi añave ime amocue vae Tumpa uiparavo ipiacavi rupi vae. ⁶ Tumpa uiparavo reta ipiacavi rupi. Uiparavo'ã mbae jae reta uyapo vae rupi. Echa'ã uiparavo yave mbae jae reta uyapo vae rupi, Tumpa ipiacavi mbiacavi'ã ma co.

⁷ Jáeramo Israel pegua reta güinoi'ã jocua uipota tēi güinoi vae. Jaeño Tumpa uiparavo vae reta güinoi. Jare İru reta uyemipiatantaca. ⁸ Echa'ã Tumpa iñee pe uyecuatía oĩ cuarãi: “Tumpa uyapo chupe reta agüiye vaerã iyaracuaa. Jáeramo yepe tēi umingüeta Tumpa iñee, ěrei uicuaa'ã, jare yepe tēi uyandu Tumpa iñee, ěrei güirovia'ã. Jare jecuaeño cuarãi oĩ.” Jucuarãi uyecuatía oĩ. ⁹ Jae ramiño vi aracae David jei cuarãi:

“Opaete uyeco reta jese vae toĩ ñuai reta rami.

Toa reta ñuai pe. Tuiporara reta imbaeyoa jeco pegua.

¹⁰ Agüiye tuicuaa, Tumpa iñee umingüeta reta yave.

Tuiporara reta, tivita poi ete vae güiraa vae rami.”

Jucuarãi jei.

Tumpa umbiasata judío mbae vae reta

¹¹ Aramoi amocue vae jei tēi Israel pegua reta uyemipiatantaca agüiye etei vaerã Tumpa uiparareco. Jucuarãi'ã co. Ērei iyoa reta ramo, Tumpa omondo ñee yembiasa pegua judío mbae vae reta pe. Jare judío mbae vae reta uyembiasaca yave, Israel pegua reta ñacatãata jese reta jare uipotata uyembiasaca vaerã vi. ¹² Jare Israel pegua reta uyavi ramo, icavi co judío mbae vae reta pe. Echa'ã Israel pegua reta iyoa ramo, Tumpa ipiacavi opaete ivi pegua reta pe. Ērei Israel pegua reta uyeyapo ye yave Tumpa imbaerã, icavi eteta co opaete ivi pegua reta pe.

¹³ Pe reta co jae judío mbae vae reta. Chemiari ai peve. Echa'ã che co jae Cristo jemimondo judío mbae vae reta pe. Ambutuicha ete co cua mbaraviqui Cristo umee cheve vae. ¹⁴ Jucuarãi aipota amiagüiroca judío reta, amocue vae uyembiasaca vaerã.

¹⁵ Echa'ã Tumpa uyerova chugüi reta ramo, opaete ivi pegua reta ipuere uyembipiacatu Tumpa ndive. Echa'ã uñatima Tumpa coti reta yave, icavi eteta co opaete ivi pegua reta pe - umanocue vae icove ye ou İru umanocue vae reta ipite güi yave rami. ¹⁶ Yamijaanga. Mbiyape tenonde voi oyi vae uñeño tee yave Tumpa peguarã, opaete harina omonacue vae vi uñeño tee Tumpa peguarã. Yamijaanga vi. Penti temiti japo reta uñeño tee yave Tumpa peguarã, opaete jãca reve uñeño tee Tumpa peguarã.

¹⁷ Yandepuere yayasia amocue temiti olivo jee vae jãca reta, ñaño vaerã jendacue pe olivo ñana rupigua jãca reta. Jucuarãi yave, temiti olivo iyaisi uguata olivo ñana rupigua jãca reta re jare umee chupe reta tecove. Jae ramiño vi Tumpa uyerova judío reta güi ipiacavi

vaerã peve. Pe reta co jae judío mbae vae reta. ¹⁸ Ërei agüiye pepia pe piyemingueta pe reta icavi ete co judío reta güi. Echa'ã pe reta co jae olivo ñana rupigua jãca reta rami. Jáeramo agüiye piyembicate. Echa'ã jãca reta umee'ã tecove japo reta pe. Japo reta umee tecove jãca reta pe.

¹⁹ Jayave aramai pereta: "Tumpa omombo judío reta olivo jãca reta yayasia rami, ipiacavi vaerã judío mbae vae reta pe. Echa'ã judío mbae vae reta olivo ñana rupigua jãca temiti olivo reta jãca reta jendacue pe ñeñoño vae reta rami." ²⁰ Añete co. Ërei Tumpa uyerova chugüi reta, jae reta güirovia'ã ramo, jare judío mbae vae reta upitata joco pe, güirovia yave. Jáeramo agüiye piyembicate. Pequiyeño. ²¹ Echa'ã Tumpa uyerova judío reta güi, yepe tẽi jae reta co temiti olivo jãca reta etei rami. Jae ramiño vi Tumpa uyerovata pegüi, perovia'ã yave. ²² ¡Mase! Tumpa ipiacavi co. Ërei uiporaraca vi. Echa'ã uiporaraca jocua Israel pegua uyavi vae reta pe. Ërei ipiacavita co judío mbae vae reta pe, jare jecuaeño ipiacavita chupe reta güirovia reta yave. Ërei güirovia'ã yave, Tumpa omombota vi temiti olivo jãca reta yayasia rami. ²³ Jare yayasia yaequi yave temiti olivo jãca reta, yandepuere ye ñañoño reta. Jae ramiño vi Tumpa ipiacavita co Israel pegua reta pe, jae reta mbaeti yave jecuae ñatẽi güirovia vaerã. Echa'ã Tumpa ipuere uyapo jucuarãi. ²⁴ Echa'ã yandepuere yave ñañoño jãca yayasia olivo ñana rupigua güi vae reta temiti olivo re, yava'ã co oĩ ñañoño vaerã temiti olivo jãcacue reta etei jese. Echa'ã olivo ñana rupigua uyuavi temiti olivo güi. Jae ramiño vi Tumpa ipiacavi yave judío mbae vae reta pe, yava'ã co oĩ ipiacavi vaerã Israel pegua reta pe.

Israel pegua reta uyembiasacata co

²⁵ Cherivi reta, aipota picuaa vaerã cua ndeiño uyecuaa vae regua, agüiye vaerã piyembicate. Jae co cua: Jeta Israel pegua reta ipiatanta ma. Ërei ndarau jecuaeño jucuarãi, jaeño opaete judío mbae vae reta uyembiasaca regua. ²⁶ Jare cua uyeyapo ma yave, Tumpa umbiasata opaete Israel pegua reta. Echa'ã Tumpa ñee pe uyecuatía oĩ cuarãi: "Outa judío reta ipite güi uepi vaerã.

Jae umbaita opaete Jacob iñemoña reta güi imbaeyoa reta.

²⁷ YandeYa jei: 'Echa'ã cuarãi ayapota jae chupe reta vae, ambai yave imbaeyoa reta.' "

Jucuarãi uyecuatía oĩ.

²⁸ Israel pegua reta oyovaicho Tumpa ndive. Echa'ã güirovia'ã reta ñee icavi vae. Ërei cua jeco pegua pe reta pepuere perovia ñee icavi vae. Ërei Tumpa uiparavo Israel pegua reta. Jáeramo uau reta, itenondegua reta uiparavo vae rupi. ²⁹ Echa'ã Tumpa umeeta co chupe reta jei umeeta co chupe reta vae. Ndarau omombo uiparavo vae reta. ³⁰ Pe reta co jae judío mbae vae reta. Tenonde yave pe reta piyapo'ã Tumpa jei vae. Ërei añave Tumpa reparareco, Israel pegua reta uyapo'ã Tumpa jei vae ramo. ³¹ Jae ramiño vi añave Israel pegua reta uyapo'ã Tumpa jei vae, Ërei Tumpa uipararecota reta, reparareco rami. ³² Echa'ã Tumpa uicuaaca opaete vae oyovaqueño. Mbaeti co quía Tumpa jei vae uyapo vae. Cuarãi Tumpa uyapo, ipuere vaerã uiparareco opaete vae.

³³ Tumpa iyaracuaa catu ete co, jare uicuaa opaete. Yandepuere'ã etei yaicuaa Tumpa ipiyemingueta. Uepiti'ã yaicuaa jae uyapo vae. ³⁴ Echa'ã mbaeti quía uicuaa yandeYa ipiyemingueta. Mbaeti quía umbiaracuaa yandeYa mbae re. ³⁵ Mbaeti quía ipuere umee rani mbae yandeYa pe, yandeYa umbijecovia chupe vaerã. ³⁶ Echa'ã opaete mbaembae ou yandeYa güi. Jae uyapo opaete mbaembae iyupeguarã. YandeYa tuyembidoraca jaeño mai pegua. Amén.

12

Upurugüirovia vae reta mbae uyapo vaerã

¹ Jáeramo, cherivi reta, pumiñera piñeme vaerã Tumpa pe. Echa'ã jae reparareco. Israel pegua reta umee Tumpa pe maemimba uyeyucacue. Jucuarãi vi pe reta pemee chupe perete icove vae. Perete tuñeñoño tee Tumpa peguarã. Cuarãi yave, Tumpa uyeroviata co. Echa'ã jupi co piyeyocui vaerã Tumpa pe cuarãi. ² Jare agüiye pico jei vae reño yugüireco vae rami. Pemañoño Tumpa re umee vaerã peve pepiyemingueta ipiau vae, pepia pe piyemingueta vaerã icavi vae re. Cuarãi yave, picuaata co Tumpa jei vae. Echa'ã icavi co peve piyapo vaerã Tumpa jei vae, pembiyerovia vaerã Tumpa. Echa'ã Tumpa jei vae icavi ete co.

³ Tumpa ipiacavi cheve ayeyocui vaerã chupe. Jáeramo che jae peve cua: Agüiye quía ipia pe tuyemingueta ete iyee uyemitenonde vaerã ipia pe uyeminguetata tẽi iyee vae güi. Penti penti ipia pe tuyemingueta cavi iyee. Echa'ã Tumpa umee penti penti pe mburugüirovia, ipuere vaerã mbae uyapo Tumpa peguarã. ⁴ Echa'ã pentiño co yanderete. Ërei yanderete

pe ñanoi yandepi jare yandepo jare yandeapisa jare yanderesa jare jeta İru İru vae. Jare opaete güinoi iparaviqui penti penti yanderete pe. ⁵ Jae ramiño vi yande jeta ete co. Ęrei yayeyapo ma Cristo ndive penti jete ramiño, jare yayemborimbóri penti jete rami.

⁶ Tumpa ipiacavi yandeve. Jáeramo umee yandeve mbaepuere uyuavi vae reta. Mbaepuere güinoi Tumpa inee umimbeu vaerã vae tumimbeu mburugüirovia Tumpa umee chupe vae rupi. ⁷ Mbaepuere güinoi İru upurugüirovia vae reta pe uyeyocui vaerã vae tuyeyocui cavi chupe reta. Mbaepuere güinoi oporomboe vaerã vae toporomboe cavi. ⁸ Mbaepuere güinoi upurumbiaracuaa vaerã vae tupurumbiaracuaa cavi. Mbae ipuere umee İru vae pe vae tumee iquirëi reve. Mbaepuere güinoi İru vae reta oyocui vaerã vae toporoyocui cavi. Mbaepuere güinoi ombóri vaerã iparavete vae reta vae tombóri uyerovia reve.

⁹ Piyerau mburuau añetete vae pe. Pemitarëi icavi mbae vae. Jecuaño piyapo icavi vae. ¹⁰ Piyerau penti cuimbae uau tiví rami. Pemaë cavi piyee piyepiu reve.

¹¹ Piyapo mbaraviqui peaqui mbae reve. Peratangãtu Espiritu Santo imbaepuere pe. Piyeyocui yandeYa pe.

¹² Peãro yandeYa piyerovia reve. Pepiaguasu piporara yave. Peratangãtu piyerure vaerã Tumpa pe.

¹³ Mbae uata yave İru uñeño tee Tumpa peguarã vae reta pe, pemee mbae chupe reta. Pepiacavi mboupa reta pe.

¹⁴ Piyerure Tumpa pe uyapo vaerã icavi vae chupe uiporaraca peve vae reta pe. Agüiye piyepipeyu jese reta.

¹⁵ Piyerovia uyerovia vae reta ndive. Pepiatiti ipiatiti vae reta ndive.

¹⁶ Pentí ramiño pico uyupii. Agüiye piyembicãte. Peau iparavete vae reta. Agüiye pepia pe piyemingueta piyee opaete aracuaa penoi co vae.

¹⁷ Yepe tēi quía uyapo icavi mbae vae peve, agüiye pembijecovia icavi mbae vae pe. Jecuaño piyapo icavi vae opaete vae jovaque. ¹⁸ Pepuere yave, İru vae reta umaño yave peré, pico cavi pepiacatu reve İru vae reta ndive. ¹⁹ Cherivi reta, agüiye pembijecovia mbae icavi mbae vae uyapo peve vae icavi mbae vae pe. Pemaño Tumpa tuiporaraca chupe. Echa'ã Tumpa inee pe uyecuatía oĩ cuarã: “Che taiporaraca chupe. Che tambijecovia” —jei yandeYa. Jucuarã uyecuatía oĩ. ²⁰ Jáeramo oyovaicho nde ndive vae iyembai yave, emingarú. Jare iúe yave, emee i tou. Echa'ã jucuarã yave, imarata co icavi mbae vae uyapo ndeve vae re. ²¹ İyapo icavi vae mbae icavi mbae vae uyapo ndeve vae pe. Echa'ã jucuarã nemiamirita icavi mbae vae. Icavi mbae vae ndarau nemiamiri.

13

¹ Opaete vae tuyapo mburuvicha reta jei vae. Echa'ã Tumpa etei oñoño mburuvicha retarã. Tumpa uiparavo mbaepuere güinoi reta vaerã. ² Jáeramo uyapo'ã mburuvicha jei vae oyovaicho co Tumpa iporoyocui ndive. Jare mburuvicha uiporaracata oyovaicho jae ndive vae pe ³ Echa'ã mburuvicha reta uminguiye'ã icavi vae uae. Uminguiye icavi mbae vae uyapo vae. Jáeramo iyapo icavi vae, agüiye vaerã ndequiye mburuvicha güi. Echa'ã mburuvicha uyemingueta cavita nderé. ⁴ Mburuvicha reta uyeyocui ñugüinoi Tumpa pe. Echa'ã Tumpa uiparavo, nembóri vaerã. Ęrei icavi mbae vae ndiyapo yave, equiye chugüi reta. Echa'ã Tumpa umee chupe reta mbaepuere uiporaraca vaerã. Jáeramo uyeyocui ñugüinoi Tumpa pe, uiporaraca yave icavi mbae vae uyapo vae reta pe. ⁵ Jáeramo piyapo mburuvicha reta jei vae, jupi co piyapo vaerã ramo, pequiye'ã uiporaracata peve vae güi ramoño. ⁶ Jare cua jeco pegua pemiëpi mburuvicha reta ocovara peve vae. Echa'ã uyeyocui ñugüinoi Tumpa pe, jare jae reta iparaviqui co ocovara vaerã peve.

⁷ Piyapo opaete vae pe jupi co piyapo vaerã vae. Echa'ã jupi co mburuvicha reta ocovara vaerã peve. Pequiye jupi co pequiye vaerã chugüi vae güi. Pipiu jupi co pipiu vaerã vae. ⁸ Agüiye pepia quía pe mbae re. Ęrei jecuaño piyerau. Echa'ã japicha uau vae uyapo ma opaete mboroyocui. ⁹ Echa'ã mboroyocui jei cuarã: “Agüiye iyuvanga menda re. Agüiye epuruyuca. Agüiye nemonda. Agüiye ndeapu İru vae re. Agüiye ipota İru vae reta imbaembae.” Jucuarã jei. Jare ime vi İru mboroyocui reta. Ęrei opaete cua mboroyocui reta penti ramiño co. Jae co cua: “Eau nderapicha nde ndiyerau rami.” ¹⁰ Echa'ã japicha uau vae ndarau uyapo icavi mbae vae chupe. Jáeramo japicha uau vae uyapo ma opaete mboroyocui.

¹¹ Coiño ma oĩ yanembiasa ete vaerã. Yapurugüirovia ramo yave, mbiri echa yandeve. Ęrei añave coiño ma oĩ. Picuaa cavi cua. Jáeramo icavi co ñañemiatangãtu vaerã.

¹² Yamijaanga pitu mbaeyoa re. Cõe seri ma. Jáeramo agüiye ma yayapo pitumimbi pe uyeyapo vae. Yayapo tembipe oĩ yave uyeyapo vae. Jucuarã yandepuereta ñañerãro mbaeyoa ndive. ¹³ Yaico cavi tembipe pe yugüireco vae reta rami. Agüiye yacau. Agüiye

yasavipo. Agüiye yandeporopotaiño. Agüiye yayapo pichü vae. Agüiye yayovaicho ñru vae ndive. Agüiye ñaneacatãa ñru vae re. ¹⁴ Ërei pemaño yandeYa Jesucristo re pemimiráta vaerã, pepuere vaerã piñerãro mbaeyoa ndive. Agüiye pepia pe piyemingueta quirãï pepuere piyapo pipota vaeño.

14

Upurugüirovia vae reta agüiye tiñera

¹ Pemaño upurugüirovia vae uicuaa cavi'ã mburugüirovia regua vae re uñemñru vaerã pe ndive, Ërei agüiye piyeaca jae ndive mbae uicuaa cavi'ã vae re. ² Echa'ã penti vae güirovia opaete mbaembae ipuere co jou. Ërei ñru vae uicuaa cavi'ã mburugüirovia regua vae jou'ã soo. ³ Opaete mbaembae ipuere jou vae agüiye tugüiro jou'ã soo vae. Jare soo jou'ã vae agüiye tiñera opaete mbaembae ipuere jou vae re. Echa'ã jae co Tumpa imbae. ⁴ Soo jou'ã vae agüiyeta tãï ñera Tumpa jembiocui re. Jaeño iYa ipuere jei icavi vae uyapo aní icavi mbae vae co uyapo. Jare Tumpa ipuere uparaviqui ipia pe, jae uyapo vaerã icavi vae.

⁵ Penti vae ipia pe uyemingueta penti ara icavi ete ñru ara reta güi. ñru vae jei opaete ara reta oyovaque co. Penti penti tuicuaa cavi maera ipia pe uyemingueta cuarãï. ⁶ Ipia pe uyemingueta penti ara icavi ete ñru ara reta güi vae jei cuarãï uipota umbiyerovia yandeYa ramo. Jae ramiño vi ipia pe uyemingueta opaete ara reta oyovaque co vae jei cuarãï uipota umbiyerovia yandeYa ramo. Opaete mbaembae ipuere jou vae umbiyerovia Tumpa jou yave. Echa'ã umee yasurupai Tumpa pe. Jae ramiño vi soo jou'ã vae umbiyerovia Tumpa jou'ã yave. Echa'ã jae vi umee yasurupai Tumpa pe.

⁷ Mbaeti penti ave yaico yayapo vaerã yande yaipota vaeño. Jae ramiño vi mbaeti penti ave ñamano yaipota ñamano ramo. ⁸ Echa'ã yaico rambueve, yayeyocui yandeYa pe. Jare ñamano, yandeYa uipota ñamano vaerã ramo. Jáeramo yaico rambueve jare ñamano yave, yande co jae yandeYa imbae reta. ⁹ Echa'ã cuarã Cristo umano jare icove ye ou umanocue vae reta ipite güi, uyeyapo vaerã umanocue vae reta jare icove vae reta iYarã.

¹⁰ Penti upurugüirovia vae agüiyeta tãï güiro ñru upurugüirovia vae re. Jae ramiño vi penti upurugüirovia vae agüiyeta tãï güiro ñru upurugüirovia vae. Echa'ã opaete yande yayemboita Tumpa jovai, jae uãa vaerã yandeparaviqui. ¹¹ Echa'ã Tumpa iñee pe uyecuatiã oí cuarãï:

“Añetete co” —jei Tumpa—. “Opaete vae uyeaticata cherovali, jare opaete vae chembiadorata co.”

Jucuarãï uyecuatiã oí. ¹² Jáeramo penti penti yamimbeuta Tumpa pe yayapocue vae regua.

¹³ Jáeramo agüiye ma ñaniñera. Ñañemoa ngatu quirãï yaico cavi vaerã, agüiye vaerã ñru upurugüirovia vae iyoa yandereco pegua. ¹⁴ Che aicuaa yandepuere co yau opaete mbaembae. Echa'ã yandeYa Jesús uicuaaca cheve cua regua. Ërei ime yave quía ipia pe uyemingueta jupi'ã jou vaerã mbae nunga tembiú vae, ndarau icavi chupe jou vaerã. ¹⁵ Ërei penti upurugüirovia vae umbipiatiti yave ñru upurugüirovia vae jou vae jeco pegua, ico'ã co upuruau reve. Agüiye tou jocua nunga tembiú. Echa'ã jou yave, aramoi ombopiacata ñru upurugüirovia vae jou vae jeco pegua. Echa'ã Cristo umano vi jocua ñru upurugüirovia vae re. ¹⁶ Jáeramo agüiye tou jocua nunga tembiú, yepe tãï uicuaa ipuere co jou. Echa'ã jou yave, ñru vae reta jeita uyapo icavi mbae vae. ¹⁷ Echa'ã Tumpa yandecocui ramo, agüiye yayemipia'ã mbae yau vae re. Yayapo jupi vae, jare yaico mbiacatu reve uyupii, jare yayerovia. Echa'ã Espiritu Santo yanembori, cuarãï yaico vaerã. ¹⁸ Uyeyocui Cristo pe cuarãï vae umbiyerovia co Tumpa, jare ñru vae reta uyemingueta cavi jese.

¹⁹ Jáeramo jecuaño yaico cavi, yandepiacatu vaerã uyupii, jare jecuaño yaipota ñañemimiráta vaerã. ²⁰ Agüiye yarucumegua Tumpa iparaviqui mbae yau vae jeco pegua. Añete co, yandepuere yau opaete mbaembae. Ërei ñru vae reta iyoa yave mbae nunga tembiú yau ramo, icavi'ã yau vaerã jocua nunga tembiú. ²¹ Agüiye yau soo jare vino, jare agüiye yayapo ñru mbaembae, yambiavai yave ñru upurugüirovia vae jocua nunga mbaembae jeco pegua. Echa'ã aramoi ñru upurugüirovia vae iyoata aní ipituta ipurugüirovia re. ²² Añete co, amocue upurugüirovia vae reta güirovia ipuere jou opaete mbaembae. Tumpaño tuicuaa jesegua. Jae reta jou yave uicuaa Tumpa uipota jou vaerã vae, uyeroviata co. ²³ Ërei ipia pe uyemingueta jupi'ã jou vaerã mbae nunga tembiú vae, uyembijeco jocua tembiú jou yave. Echa'ã güirovia'ã jupi jou vaerã. Echa'ã mbae yayapo yave, yarovia'ã yave jupi yayapo vaerã, yandeyoa co.

15

¹ Ime amocue yande ñanepirãta yandepurugüirovia re vae. Jáeramo icavi co yambori vaerã uicuaa cavi'ã mburugüirovia regua vae reta. Agüiye yayapo yande yaipota yayapo

vaeño. ² Penti penti yaico yambiyerovia vaerã ñru vae, jucuarã yandepuere yave yayapo icavi vae chupe, ipirãta vaerã ipurugüirovia re. ³ Echa'ã Cristo etei uyapo'ã jae uipota uyapo vaeño. Jae uyapo Tumpa jei vae. Echa'ã Tumpa ñnee pe uyecuatía oĩ cuarãi: “Jei icavi mbae vae ndeve vae jei vi icavi mbae vae checoti” —jei Cristo Tumpa pe. Jucuarã uyecuatía oĩ. ⁴ Opaete tenonde yave Tumpa ñnee pe uyecuatía oĩ vae uyecuatía co yande yayemboe vaerã. Echa'ã Tumpa ñnee pe uyecuatía oĩ vae ipuere umee yandev mbiaguasu jare mbiacatu, ñããro vaerã yayerovia reve. ⁵ Tumpa co jae mbiaguasu jare mbiacatu umee peve vae. Tumpa tuparaviqui pepia pe, pico cavi vaerã penti ramiño. Echa'ã cua co jae Cristo Jesús jei vae. ⁶ Pepia pe piyemingueta jare piyemingueta penti ramiño, pemiadora vaerã Tumpa. Jae co yandeYa Jesucristo Tu.

Umimbeu ñee icavi vae judío mbae vae reta pe

⁷ Jáeramo pemaec cavi piyee, Cristo umee cavi yanderé rami, ñru vae reta umbiadora vaerã Tumpa. ⁸ Echa'ã che jae peve cua: Cristo ou uyeyocui vaerã judío reta pe, uicuaaca vaerã chupe reta Tumpa ñnee añete vae. Echa'ã jae ou uicuaaca vaerã judío reta pe Tumpa uyapota itenondegua reta pe jei vae. ⁹ Jare Cristo ou judío mbae vae reta vi umbiadora vaerã Tumpa, jae uiparareco reta ramo. Echa'ã aracae David jei Tumpa pe cuarãi:

“Jáeramo che numbiadorata judío mbae vae reta ipite pe.

Che numbiadorata canta pe.”

Jucuarã jei. ¹⁰ Jare aracae Moisés vi jei cuarãi:

“Judío mbae vae reta tuyerovia Tumpa imbae vae reta ndive.”

Jucuarã jei. ¹¹ Jare David jei vi cuarãi:

“Judío mbae vae opaete ivi pegua reta tumbiadora yandeYa, tuyemingueta imbaepuere re, opaete ivi pegua reta.”

Jucuarã jei.

¹² Jare aracae Isaías jei cuarãi:

“Outa co Isaí ññemoña.

Jae uyeyapota judío mbae vae reta juvicha guasurã.

Judío mbae vae reta güiroviata jese.”

Jucuarã jei.

¹³ Tumpa uparaviqui yandepia pe ñããro vaerã yayerovia reve. Jecuaeño tuparaviqui pepia pe, pemiadorovia ete vaerã jare pemiapiacatu vaerã pepurugüirovia rupi. Jucuarã yave, peãrota co piyerovia ete reve Espiritu Santo imbaepuere rupi.

¹⁴ Che etei vi aicuaa catu, cherivi reta, quirã pe reta pepiacavi ete co. Picuaa catu jeta mbaembae regua. Jáeramo pepuere piyembiaracuaa. ¹⁵ Ërei aicuatía ma peve, cherivi reta, aquiye mbae reve amocue mbaembae re, pumimandúa jese vaerã. Cuarãi ayapo, Tumpa ipiacavi umee cheve vae rupi. ¹⁶ Echa'ã Tumpa cheparavoy ayeyocui vaerã Jesucristo pe judío mbae vae reta ipite pe. Jáeramo amimbeu chupe reta ñee icavi vae Tumpa regua. Jare judío mbae vae reta güirovia yave, Tumpa uyerovia co. Echa'ã Espiritu Santo oñono tee jocua judío mbae vae reta Tumpa peguarã.

¹⁷ Jáeramo chepuere chemiari cavi cheparaviqui re. Ërei jucuarã ambiadora Cristo Jesús. Echa'ã mbaraviqui co jae Tumpa iparaviqui. ¹⁸ Chemiarita Cristo uyapo che rupi vae reño. Jae uparaviqui judío mbae vae reta ipia pe che amimbeu vae jare ayapo vae rupi, jae reta upurugüirovia vaerã. ¹⁹ Jare Espiritu Santo umee cheve mbaepuere ayapo vaerã miacañi reta, judío mbae vae reta ipiacañi vaerã. Jare che ambapi opaete que rupi Jerusalén güi Ilirico pe amimbeu vaerã ñee icavi vae Cristo regua. ²⁰ Jare cuarãi aipota ayapo. Aipota ete amimbeu ñee icavi vae uyandu'ã etei Cristo regua vae pe, agüiye vaerã aparaviqui ñru vae uparaviqui vae pe. ²¹ Jare jucuarã uyeyapo Tumpa ñnee pe uyecuatía oĩ vae. Echa'ã uyecuatía oĩ cuarãi:

“Ndeño quía umimbeu Cristo chupe vae reta uyanduta co.

Ndeño uyandu vae reta uicuaata co.”

Jucuarã uyecuatía oĩ.

Pablo iquirëi oo Roma pe

²² Jare cua jeco pegua ayembiavai ete, yepe tõi aipota aa pepi. ²³ Jeta año ma aipota ete aa apou pepi, jare añave opa ma cheparaviqui cua pe. ²⁴ Jáeramo España pe aa yave, aipota aa apou pepi, ayerovia vaerã pe ndive mbovi ara pegua. Jayave joco güi aramoji pepuereeta chembori aa ye vaerã España coti. ²⁵ Ërei aata rani Jerusalén pe araa vaerã corepoti uñeño tee Tumpa peguarã vae reta pe. ²⁶ Echa'ã Macedonia jare Acaya pegua reta jei icavi co omondo vaerã corepoti Jerusalén pegua uñeño tee Tumpa peguarã vae iparavete vae reta pe. ²⁷ Añete co, jae reta uvã icavi cua uyapo vaerã. Jare ipia co judío reta pe. Echa'ã judío reta rani umimbeu judío mbae vae reta pe Tumpa ñnee. Jáeramo icavi co judío mbae

vae reta ombori vaerã judío reta mbaembae cua ivi pegua pe. ²⁸ Jáeramo araata rani chupe reta cua corepoti. Jayave cua mbaraviqui opa ma yave, aata pepi, jare joco güi aata España coti. ²⁹ Jare aicuaa che aa pepi yave, amimbeu cavita peve ñee icavi vae Cristo regua. Jáeramo piyerovia eteta co.

³⁰ Pe reta perovia yandeYa Jesucristo re, jare Espíritu Santo pemboe piyerau vaerã. Jáeramo che pumiñera, cherivi reta, piyere Tumpa pe cheré. ³¹ Piyere Tumpa pe jae cherepi vaerã upurugüirovia mbae vae Judea pegua reta güi. Piyere vi Jerusalén pegua Tumpa peguarã uñeño tee vae reta uyerovia vaerã cua corepoti araata chupe reta vae re. ³² Jae ramiño vi piyere aa vaerã pepi ayerovia reve Tumpa jei vae rupi, jare aputuu vaerã pe reta ndive. ³³ Tumpa toï opaete pe ndive. Echa'ã jae umee yandave mbiacatu. Amén.

16

Saludo reta

¹ Amondota pepi yanderindi Febe. Jae uyeyocui ñru upurugüirovia vae Cencrea pegua reta pe. ² Pembiresive cavi yandeYa jee pe. Echa'ã icavi co uñeño tee Tumpa peguarã vae reta jucuarã uyapo vaerã uyupe. Jare pembori, mbae uata chupe yave. Echa'ã jae ombori jeta vae, jare chembori vi.

³ Tumpa ndiveño toï Priscila jare Aquila. Jae reta chembori Cristo Jesús iparaviqui pe. ⁴ Jae reta umano seri cherepi vaerã. Jáeramo amee yasurupai chupe reta. Jae ramiño vi opaete judío mbae vae uyembatimbatí vae reta umee yasurupai chupe reta. ⁵ Jae ramiño vi Tumpa ndiveño toï opaete Priscila jare Aquila jenta pe uyembati vae reta. Jae ramiño vi Tumpa ndiveño toï yanderivi Epeneto. Jae rani güirovia Cristo re Acaya pe. ⁶ Jae ramiño vi Tumpa ndiveño toï María. Jae uparaviqui tanta pepite pe. ⁷ Jae ramiño vi Tumpa ndiveño toï Andrónico jare Junias. Jae reta co cherentaigua reta, jare yugüirecose peresoriru pe che ndive. Temimondo reta uyemingueta cavi ete jese reta. Jae reta güirovia Cristo re ndei che arovia jese mbove.

⁸ Jae ramiño vi Tumpa ndiveño toï Amplias. Jae güirovia yandeYa re jare che aau. ⁹ Jae ramiño vi Tumpa ndiveño toï Urbano. Jae orembori Cristo iparaviqui pe. Jae ramiño vi Tumpa ndiveño toï yanderivi Estaquis. ¹⁰ Jae ramiño vi Tumpa ndiveño toï Apeles. Uyecuaa co quirã uyeyocui cavi Cristo pe. Jae ramiño vi Tumpa ndiveño toï Aristóbulo jenta pegua reta. ¹¹ Jae ramiño vi Tumpa ndiveño toï Herodión. Jae co cherentaigua. Jae ramiño vi Tumpa ndiveño toï Narciso jenta pegua upurugüirovia vae reta. ¹² Jae ramiño vi Tumpa ndiveño toï Trifena jare Trifosa. Jae reta uparaviqui ñugüinoi yandeYa pe. Jae ramiño vi Tumpa ndiveño toï yanderindi Pérsida. Jae vi uparaviqui tanta yandeYa pe. ¹³ Jae ramiño vi Tumpa ndiveño toï Rufo jare ichi. Rufo uyeyocui cavi yandeYa pe. Jare ichi uyandareco cavi cheré chesi rami. ¹⁴ Jae ramiño vi Tumpa ndiveño toï Asíncrito, Flegonte, Hermas, Patrobas, Hermes jare opaete cherivi uyembati jae reta ndive vae reta. ¹⁵ Jae ramiño vi Tumpa ndiveño toï Filólogo, Julia, Nereo, Nereo jindi, Olimpás jare opaete uñeño tee Tumpa peguarã vae uyembati jae reta ndive vae reta.

¹⁶ Piyembisaluda yave, piñecuãva piyerau reve. Opaete upurugüirovia vae uyembatimbatí vae jei peve Tumpa ndiveño peí.

¹⁷ Añave che pumiñera, cherivi reta, piñemoa ngatu vaerã yembiyao uyapo vae reta güi. Echa'ã jae reta umbiavai Tumpa iparaviqui. Jae reta iporomboe uyuavi piyemboe jese vae güi. Agüiye piyembati jae reta ndive. ¹⁸ Echa'ã jae reta uyeyocui'ã yandeYa Jesucristo pe. Jae uñeño uparaviqui reta iyupeguarã. Jae reta uiporu ñee icavi vae echa. Ërei jucuarã umbitavi yemboe añete vae uicuaa cavi'ã vae reta. ¹⁹ Opaete vae uicuaa quirã pe reta perovia yandeYa re. Jáeramo ayerovia peré. Jare aipota jecuaeño pequiri vaerã piyapo icavi vae. Agüiye petavi piyapo vaerã icavi mbae vae. ²⁰ Tumpa jecuaeño umee yandave ipiacatu. Jae pemborita, imambae pemiamiri ete vaerã Satanás. YandeYa Jesucristo tumee peve ipiacavi.

²¹ Timoteu uparaviqui oï che ndive. Jae jare Lucio, Jasón jare Sosípater - jae reta co cherentaigua reta - jei peve Tumpa ndiveño peí.

²² Tercio uicuatía oï cua tupapire cheve peguarã. Jae vi jei peve Tumpa ndiveño peí yandeYa re perovia ramo.

²³ Gayo vi jei peve Tumpa ndiveño peí. Che aico jae jenta pe, jare opaete upurugüirovia vae reta vi uyembati cua pe. Erasto vi jei peve Tumpa ndiveño peí. Jae uñuvatu tenta guasu pegua reta icorepoti. Yanderivi Cuarto vi jei peve Tumpa ndiveño peí.

²⁴ YandeYa Jesucristo tumee opaete peve ipiacavi. Amén.

Tumpa tuyembadoraca

²⁵ Jare añave yambiadora Tumpa. Echa'ã jae ipuere pemimiráta. Cuarã amimbeu ma peve, ñee icavi vae Jesucristo regua amimbeu peve yave. Echa'ã jae umee cheve etei

amimbeu vaerã. Cua ñee icavi vae uyecuaa'ã etei ivi uyeyapo güive. Jaeramo Tumpa uicuaaca. ²⁶ Jáeramo añave uyecuaa. Jare Tumpa icoño mai vae oyocui uyecuaa vaerã opaete ivi pegua reta pe Tumpa iñee umimbeu vae reta uicuatía vae rupi, opaete vae güirovia vaerã Tumpa jei chupe reta rami.

²⁷Tumpaño co jae iyaracuaa catu vae. Tumpa tuyembidoraca Jesucristo rupi jaeño mai pegua. Amén.

PRIMERA CARTA DEL APOSTOL SAN PABLO A LOS CORINTIOS

¹ Che co jae Pablo. Tumpa cheparavo aico vaerã Jesucristo jemimondorã. Echa'ã cua co jae Tumpa jei vae. Cherivi Sóstenes ime cua pe oí che ndive. ² Aicuatía cua tupapire opaete pepurugüirovia vae Corinto pe piyembati vae reta pe. Pe reta co jae Tumpa imbae. Tumpa peparavo peñoño tee vaerã iyuepeguarã. Cuarãi Tumpa uyapo Cristo Jesús rupi. Jae ramiño vi Tumpa uiparavo opaete yondeYa Jesucristo re güirovia vae reta. Jae reta opaete que rupi ñugüinoi. Jae reta iYa co jae yandeYa Jesucristo. ³ YandeRu Tumpa jare yandeYa Jesucristo tumee peve ipiacavi jare ipiacatu.

Yasurupai umee Tumpa pe Corinto pegua reta re

⁴ Jecuaeño amee yasurupai Tumpa pe peré, Tumpa umee ipiacavi peve Cristo Jesús rupi ramo. ⁵ Echa'ã Tumpa pemivendise ete, pepuere vaerã pemimbeu ñru vae reta pe jare picuaa cavi vaerã. ⁶ Jare jucuarãi pe reta picuaaca ñru vae reta pe añetete vae co jocua amimbeu peve Cristo regua vae. ⁷ Jucuarãi uata'ã etei peve penti ave mbaepuere Espíritu Santo umee vae. Jare jecuaeño peãro piyerovia reve yandeYa Jesucristo ou ye vaerã. ⁸ YandeYa Jesucristo jecuaeño pemimirãtata jae ou ye regua, agüiye vaerã quía ipuere pembijeco mbae re jocua ara. ⁹ Tumpa jecuaeño uyapo jei uyapota vae. Echa'ã jae peparavo, pico vaerã Tai ndive. Jae co yandeYa Jesucristo.

Upurugüirovia vae reta uyembiyao uyugüi

¹⁰ Cherivi reta, che pumiñera, yandeYa Jesucristo jee re agüiye vaerã piyeaca uyupii, jare agüiye vaerã piyembiyao piyugüi. Pumiñera pico vaerã penti ramiño. Toyovaque pepia pe piyemingueta oí vae jare pearacuaa. ¹¹ Echa'ã Cloé jenta pegua reta umimbeu cheve peregua, cherivi reta, quirãi piyeaca pico uyupii. ¹² Amocue pe reta pere: “Che co jae Pablo regua.” Jare amocue pere: “Che co jae Apolos regua.” Jare ñru pe reta pere: “Che co jae Pedro regua.” Jare ñru pe reta pere: “Che co jae Cristo regua.” Jáeramo tae peve cua: ¹³ Cristo uyembiyao'ã etei. Che amano'ã co curusu re pembaeyoa reta jeco pegua. Piyembibautizaca'ã co cheree re. ¹⁴ Amee yasurupai Tumpa pe quirãi mbovño pumbibautiza. Jaeño ambibautiza Crispo jare Gayo. ¹⁵ Jáeramo pepuere'ã etei pere cheree re piyembibautizaca co. ¹⁶ Añete yepe, ambibautiza Estéfanos jenta pegua reta vi. Ërei chemandua'ã ambibautiza ra ñru vae. ¹⁷ Echa'ã Cristo chembou'ã apurumbibautiza vaerã. Jaeño chembou amimbeu vaerã ñee icavi vae. Ërei aiporu'ã ñee iyaracuaa catu vae pegua. Echa'ã jocua nunga ñee aiporu yave, aramoi ñee Cristo icurusu regua ndarau tẽi mbaepuere güinoi.

Cristo co jae Tumpa iyaracuaa jare imbaepuere

¹⁸ Echa'ã yamimbeu yave ñee Cristo icurusu regua, cañitei pe yugüiraata vae reta ipia pe uyemingueta tẽi jae penti mbiquere co. Ërei cua ñee rupi Tumpa uicuaaca yandeve imbaepure. Echa'ã yande yayemiasaca co. ¹⁹ Echa'ã Tumpa ñee pe uyecuatía oí cuarã: “Che aicuaacata quirãi iyaracuaa catu echa vae reta añetete iyaracuaa'ã etei co” —jei Tumpa—. “Jae ramiño vi aicuaacata quirãi opaete mbaembae uicuaa cavi echa vae reta añetete uicuaa cavi'ã etei co” —jei.

Jucuarãi uyecuatía oí.

²⁰ ¿Quía ra co jae iyaracuaa catu vae? ¿Quía ra co jae mboroyocui re oporomboe vae? ¿Quía ra co jae ipoqui cua ivi pe uyeaca vaerã vae? Echa'ã Tumpa uicuaaca quirãi aracuaa cua ivi pegua mbae'a co. ²¹ Ivi pegua reta ipuere'ã uicuaa Tumpa jae reta iyaracuaa catu echa vae rupi. Ërei Tumpa umbiasa upurugüirovia vae ñee icavi vae yamimbeu vae rupi, yepe tẽi penti mbiquere echa ñru vae reta pe.

²² Echa'ã judío reta uipota yayapo vaerã penti miacañi jae reta uecha vaerã. Jare judío mbae vae reta uipota yayemingueta vaerã iyaracuaa catu vae cua ivi pegua reta uyemingueta rami. ²³ Ërei yande yamimbeu chupe reta quirãi Cristo umano curusu re. Ërei cua yamimbeu vae penti yemiavai judío reta pe, jare judío mbae vae reta ipia pe uyemingueta tẽi penti mbiquere co. ²⁴ Ërei Tumpa uiparavo vae reta pe Tumpa uicuaaca Cristo rupi quirãi tuicha ete co imbaepuere jare quirãi iyaracuaa catu ete co. Tumpa uiparavo vae reta co jae judío reta jare judío mbae vae reta. ²⁵ Ime amocue ivi pegua iyaracuaa catu vae. Ërei Tumpa iyaracuaa catu ete ye cua reta güi, yepe tẽi jae reta ipia pe uyemingueta tẽi penti mbiquere co Tumpa Cristo rupi uyapo vae. Jae ramiño vi ime amocue ivi pegua mbaepuere güinoi vae. Ërei Tumpa imbaepuere tuicha ete cua

reta imbaepuere güi, yepe tēi jae reta ipia pe uyemingueta tēi Tumpa Cristo rupi uyapo vae jucuarāi uyapo mbaeti mbaepuere güinoi ramo. ²⁶ Cherivi reta, pemandúa Tumpa peparavo vae re, yepe tēi jeta'ā co iyaracuaa catu vae reta pepite pe - jucuarāi jei chupe reta ivi peguareta - jare jeta'ā co mbaepuere güinoi vae reta, jare jeta'ā co mburuvicha reta iñemoñaa reta. ²⁷ Echa'ā Tumpa uiparavo iyaracuaa mbae vae reta cua ivi pegua re vae reta, iyaracuaa catu vae reta uicuaa vaerā iyaracuaa mbae'ā co Tumpa pe. Jae ramiño vi Tumpa uiparavo mbaepuere güinoi mbae vae reta cua ivi pegua re vae reta, mbaepuere güinoi vae reta uicuaa vaerā imbaepuere mbae'ā co Tumpa pe. ²⁸ Jae ramiño vi Tumpa uiparavo iparavete vae reta jare uñererōca vae reta. Uiparavo vi mbaembae uyembutuichaca mbae vae, uicuaaca vaerā mbae'ā co mbaembae uyembutuichaca vae. ²⁹ Jare jucuarāi uyapo Tumpa, agüiye vaera quía uyembicate jae jovaque. ³⁰ Ērei Tumpa etei peapo penti ramiño Cristo Jesús ndive. Echa'ā Cristo Jesús rupi Tumpa umee yandeve aracuaa. Jae ramiño vi Cristo Jesús rupi Tumpa yanembujupi jare ñañeño tee iyupeguarā jare yanderepi mbaeyoa güi. ³¹ Jáeramo yayapo Tumpa iñee pe uyecuatía oī vae rami. Echa'ā uyecuatía oī cuarāi: “Ime yave quía uipota uyembicate vae, tuyembicate yandeYa re.” Jucuarāi uyecuatía oī.

2

Umimbeu quirāi Cristo umano curusu re

¹ Jare aa pepi yave, cherivi reta, amimbeu peve añete vae Tumpa regua. Aipota'ā pepia pe piyemingueta vaerā acatu co chemiari vaerā ani chearacuaa catu co. ² Echa'ā pepite pe añi rambueve, chequirēi amimbeu peve cuaño - Jesucristo jare quirāi jae umano curusu re. ³ Jare pepite pe añi rambueve, chepia pe ayemingueta aramo ndarau piyiasaca cheré. Jáeramo ariri aqüiye ramo. ⁴ Jare chemiari peve yave amimbeu vaerā peve ñee icavi vae, aiporu'ā ñee reta cuimbae iyaracuaa catu vae uiporu vae aicuaaca vaerā peve ñee icavi vae añete co. Echa'ā chemiari peve yave, aicuaaca peve ñee icavi vae añete co Espiritu Santo imbaepuere rupi. ⁵ Jare cua ayapo agüiye vaerā cuimbae iyaracuaa catu vae jei vae jeco pegua pepurugüirovia. Aipota pepurugüirovia vaerā Tumpa imbaepuere jeco pegua.

Tumpa uicuaaca yandeve Espiritu Santo rupi vae

⁶ Ērei ore nduiporu ñee aracuaa pegua ipirāta ipurugüirovia re vae reta ipite rupi. Ērei cua aracuaa ivi pegua'ā co jare jae'ā vi co ivi pegua reta juvicha reta iyaracuaa. Echa'ā cua juvicha reta imambae opata. ⁷ Ērei ore ndoe vae aracuaa Tumpa güi ou vae co. Cua aracuaa tenonde yave uyecuaa'ā. Echa'ā tenonde yave Tumpa uicuaaca'ā etei. Ērei iyipi güiye Tumpa iquirēi uicuaaca yandeve cua aracuaa, yayembiasaca vaerā. ⁸ Ērei mbaeti penti ave ivi pegua reta juvicha uicuaa cua aracuaa. Echa'ā mburuvicha reta uicuaa yave mona, ndarau tēi uyuca curusu re yandeYa yembiaadora pegua vae. ⁹ Ērei Tumpa iñee pe uyecuatía oī cuarāi:

“Mbaeti quía uecha jare mbaeti quía uyandu jocua mbaembae Tumpa umicuatiro ma uau Tumpa vae reta pe vae.
Mbaeti vi quía ipia pe uyemingueta jese.”

Jucuarāi uyecuatía oī. ¹⁰ Ērei Tumpa uicuaaca yandeve Espiritu Santo rupi. Echa'ā Espiritu Santo uicuaa opaete. Uicuaa vi opaete Tumpa regua yavaí ete yaicuaa vaerā vae.

¹¹ Penti vae ipuere'ā uicuaa ĩru vae ipia pe uyemingueta vae. Jae eteño uicuaa. Jae ramiño vi mbaeti quiave uicuaa Tumpa ipiyemingueta. Jaeño Tumpa iEspiritu uicuaa. ¹² Jare Tumpa umee ma yandeve Espiritu Santo. Jáeramo yandepia pe yayemingueta'ā ma upurugüirovia mbae vae reta ipia pe uyemingueta rami. Echa'ā Espiritu Santo uicuaaca yandeve mbaembae Tumpa umee yandeve ipiacavi jeco pegua vae. ¹³ Jare ore numimbeu ĩru vae reta pe cua mbaembae. Ērei nduiporu'ā ñee iyaracuaa catu vae oporomboc jese vae reta. Ore nduiporu ñee Espiritu Santo oremboe jese vae reta: Jáeramo nduicuaaca ĩru vae reta pe mbaembae Espiritu Santo pegua ñee Espiritu Santo oremboe jese vae reta pe.

¹⁴ Ērei upurugüirovia mbae vae uipota'ā güirovia Tumpa iEspiritu oporomboc jese vae. Echa'ā mbae'ā echa chupe. Ipuere'ā uicuaa. Echa'ā jaeño Espiritu Santo ico ipia pe vae ipuere uicuaa. ¹⁵ Echa'ā Espiritu Santo ico ipia pe vae ipuere uicuaa cavi opaete cua mbaembae. Ērei upurugüirovia mbae vae ipuere'ā uicuaa cavi upurugüirovia vae regua. ¹⁶ Echa'ā mbaeti quía uicuaa cavi yandeYa ipiyemingueta, jare mbaeti quía ipuere omboc yandeYa mbaembae re. Ērei yande yandepia pe yayemingueta Cristo ipia pe uyemingueta rami.

3

Uyeyocui reta Tumpa pe

¹ Cherivi reta, chepuere'ã pumingueta ipirãta ipurugüirovia re vae reta pe ayemingueta rami. Pumingueta jei vae rupiño yugüireco vae reta pe ayemingueta rami jare Cristo re güirovia ramo vae reta pe ayemingueta rami. ² Pe reta co jae sambiai necheño jou vae reta rami. Pe reta jae'ã co ucuaa vae tembiu ipuere jou vae reta rami. Echa'ã che pomboe mbaembae yavai'ã etei yaicuaa vaerã vae re. Chepuere'ã pomboe mbaembae yavai yaicuaa vaerã vae re. Echa'ã jecuaeño pepuere'ã picuaa yavai vae. ³ Pe reta pepia pe piyemingueta jei vae rupiño yugüireco vae reta ipia pe uyemingueta rami. Echa'ã peacataã jare piyovaicho uyupii. Cua uicuaaca quirãi pico upurugüirovia mbae vae reta yugüireco rami. Echa'ã jae reta yugüireco jei vae reño. ⁴ Echa'ã amocue pe reta pere: "Che co jae Pablo regua." Jare ñru pe reta pere: "Che co jae Apolos regua." Cua uicuaaca quirãi pepia pe piyemingueta jei vae reño yugüireco vae reta ipia pe uyemingueta rami co.

⁵ Che mbae'ã co, jare Apolos mbae'ã co. Jaeño nduyeyocui yandeYa pe, pe reta perovia vaerã jese. Jare penti penti nduyepo mbaraviqui yandeYa umee oreve vae. ⁶ Che rani amimbeu peve ñee icavi vae perovia vaerã jare taicue rupi Apolos pembori picuaa cavi vaerã. Ërei Tumpa co jae pemirãta pepurugüirovia re vae. Yamijaanga penti temiti. Che co jae temiti oñoti vae rami, jare Apolos co jae temiti umbiu vae rami. Ërei Tumpa etei umbicuacuaa temiti. ⁷ Jáeramo che mbae'ã co, yepe tẽi che co jae temiti oñoti vae rami. Jae ramiño vi Apolos mbae'ã co, yepe tẽi jae co temiti umbiu vae rami. Mbaraviqui Tumpa iparaviqui co. Echa'ã jae umbicuacuaa temiti. ⁸ Jare temiti oñoti vae jare temiti umbiu vae uparaviqui penti ramiño. Jare Tumpa umbiepita penti penti pe iparaviqui rupi. ⁹ Echa'ã ore nduparaviqui nduico Tumpa ndive. Pe reta co jae temiti Tumpa ico pe ñugüinoi vae reta rami. Jae ramiño vi pe reta co jae penti tenta Tumpa uyapo oĩ vae rami. ¹⁰ Che co jae icatu tenta uyapo vae rami. Jare Tumpa umaeño chere jae ipiacavi jeco pegua añaño vaerã tenta iguapicarã. Jare ñru vae co jae tenta oñono oĩ iguapica iárambo vae rami. Ërei penti penti tuñemoa ngatu quirãi uparaviqui tenta iguapica iárambo. ¹¹ Echa'ã Jesucristo co jae tenta iguapica rami. Tenta iguapica uñeñoño ma co. Mbaeti ye co ñru tenta iguapica. ¹² Tenta iyapoa reta ipuere oñono tenta iguapica iárambo oro jare corepoti jare ita ipõra ete vae, ani ipuere oñono ivira reta jare capii jare atigüe. ¹³ Penti penti iparaviqui uyecuaata co jocua ara Tumpa uicuaaca yave. Echa'ã jocua ara imeta co tata, jare tata uicuaacata mbae nunga mbaraviqui penti penti uyapo vae. ¹⁴ Mbaraviqui tenta iguapica iárambo uyeyapo vae ocai'ã yave, Tumpa umbiepita jocua mbaraviqui uyapo vae pe. ¹⁵ Mbaraviqui ocai yave, Tumpa ndarau umbiepi jocua mbaraviqui uyapo vae pe. Ërei mbaraviqui uyapo vae etei uyembiasacata co, penti cuimbae oyepe tata güi vae rami.

¹⁶ Picuaa co quirãi pe reta co jae Tumpa jo jare quirãi Tumpa iEspiritu ico pepia pe. ¹⁷ Ime yave quã Tumpa jo urucumegua vae, jocua Tumpa umbaita. Echa'ã Tumpa jo uñeñoño tee Tumpa peguarã. Pe reta co jae Tumpa jo.

¹⁸ Agüiye quã tuyembitavi. Ime yave quã ipia pe uyemingueta iyaracuaa catu co aracuaa ivi pegua re vae, tuicuaa uicuaa cavi'ã co mbae. Jucuarãi uicuaa yave, añetete iyaracuaa catuta co. ¹⁹ Echa'ã Tumpa uicuaaca quirãi aracuaa cua ivi pegua mbae'ã co. Echa'ã Tumpa ñee pe uyecuatía oĩ cuarã: "Tumpa umiamiri iyaracuaa catu vae reta aracuaa jae reta güinoi vae re." ²⁰ Jare: "YandeYa uicuaa quirãi iyaracuaa catu vae reta ipiyemingueta mbae'ã co." Jucuarãi uyecuatía oĩ. ²¹ Jáeramo agüiye quã tuyembicate cuimbae reta re. Echa'ã Tumpa uyapo opaete mbaembae pembori vaerã. ²² Echa'ã Tumpa umee peve Pablo jare Apolos jare Cefas pembori vaerã. Umee vi peve mbaembae ivi pegua piporu vaerã. Jae ramiño vi umee peve tecove pico cavi vaerã, jare pemano yave icavita peve. Opaete añave uyeyapo vae jare opaete uyeyapota vae icavita peve. ²³ Jare pe reta co jae Cristo imbae, jare Cristo co jae Tumpa imbae.

4

Uyeyocui reta Tumpa pe Tumpa jei vae rupi

¹ Oreré pepia pe piyemingueta yave, pemandúa cua re: Ore co jae Cristo jembiocui reta. Tumpa uicuaaca oreve jocua tenonde yave uyecuaa mbae vae, ore nduicuaaca vaerã ñru vae reta pe. ² Jare penti upurumimbaraviqui vae jecuaeño uipota jembiocui uyapo vaerã jei vae. ³ Ërei pe reta cherãa yave ani ñru vae reta cherãa yave, mbae'ã co cheve. Che añeã'ã vi. ⁴ Yepe tẽi aicuaa'ã co mbae ayembijeco jese vaerã, cua uipota'ã jei anoi'ã co teco. Echa'ã yandeYa co jae cherãa vae. ⁵ Jáeramo agüiye ñapuruãa añave. Peño yandeYa ou ye regua. Echa'ã jae güeruta tembipe opaete mbaembae añave uñemi pítumimbi pe vae uyecuaa cavi vaerã. Echa'ã yandeYa uicuaacata opaete vae ipiyemingueta. Jayave Tumpa umbiyeroviata penti penti. ⁶ Cherivi reta, cua moromboe amimbeu ma peve chiyee jare Apolos re, piyemboe vaerã cua pingueta oreré vae rupi quirãi icavi'ã pembutuicha vaerã cuimbae retaño. Pepia pe piyemingueta cuimbae reta re uyecuatía oĩ vae rupiño.

Jare agüiye pemptuicha penti vae ñru vae güi. Echa'ã jucuarãi piyapo yave, perñro jocua ñru vae. ⁷¿Quía ra co jei nde icavi ete ñru vae güi? ¿Mbae ra co nenoi Tumpa umee'ã ndeve vae? Tumpa co umee ndeve opaete nenoi vae. Jáeramo ¿maera pa ndiyembicate? ¿Ndepia pe ndiyemingueta ra Tumpa umee'ã co ndeve?

⁸Pe reta piyerovia iyangapüi vae reta uyerovia rami. Jare piyembicate icocatu vae reta uyembicate rami. Jae ramiño vi piyembicate mburuvicha reta uyembicate rami, jare pepia pe piyemingueta ndipo jucuarãi piyeyapo ore pombori mbae reve. Ërei tome piyeyapo mburuvicha añetete vae retarã, ore vi ndoporoyocui vaerã pe reta ndive. ⁹Ore co jae Cristo jemimondo reta. Ërei chepia pe ayemingueta quirãi Tumpa oreñoño opaete vae jaicue. Ore co jae jocua cuimbae uyeparavo umano vaerã vae reta rami. Opaete vae umae oreré. Ángel reta umae oreré, jare ivi pegua reta umae oreré. ¹⁰Ore nduyeyocui Cristo pe ramo, ñru vae reta orereni imbiquere vae reta. Ërei pe reta pepia pe piyemingueta pearacuaa catu co Cristo re. Ore co jae ipirãta mbae vae reta rami, jare pe reta co jae ipirãta vae reta rami. Pe reta piyepiua ñru vae reta pe, ñrei ñru vae reta orereriro. ¹¹Jecuaeño oriyembai jare oreúe. Jecuaeño uata oreve temimonde. ñru vae reta orenupa. Mbaeti co orerenta. ¹²Jecuaeño orecandi nduparaviqui orepo pe. ñru vae reta uyepipeyu oreré, ñrei ore nduyerure Tumpa pe uyapo vaerã chupe reta icavi vae. ñru vae reta uyapo mbaembae icavi mbae vae oreve, ñrei ore orepiaguasu chupe reta. ¹³Ñru vae reta iyapu oreré, ñrei ore oremiari cavi chupe reta. Jecuaeño ñru vae reta oremombo ipite güi, iti jare icavi'ã ma uyeporu vaerã vae uyemombo rami.

¹⁴Aicuatia'ã cuarãi pumimaraca vaerã. Pe reta co jae cherivi aau vae reta. Jáeramo cuarãi pumbiaracuaa. ¹⁵Echa'ã yepe tõi jocua pemboe Cristo re vae reta uyepapa diez mil, ñrei jeta'ã co peru. Echa'ã che co jae peru mburugüirovia Cristo Jesús regua re. Echa'ã che amimbeu peve ñee icavi vae. ¹⁶Jáeramo che pumiñera pico vaerã peecha che aico rami.

¹⁷Cua jeco pegua amondo ma peve Timoteo. Jae co cherivi aau vae, jare jae uyeyocui cavi yandeYa pe. Jae pemimanduata co quirãi che aico Cristo re, jare quirãi cuarãi amboe opaete upurugüirovia vae uyembatimbatu vae reta opaete que rupi. ¹⁸Ërei amocue pepite pe ñugüinoi vae uyembutuicha, ipia pe uyemingueta tõi ndarau ma aa pepi ramo. ¹⁹Ërei aata imambaño pepi, yandeYa uipota yave. Jare aa yave, aicuaata mbae ipuere uyapo jocua uyembutuicha vae reta. Ndarau apirandu mbae ra jei reta. ²⁰Echa'ã yayeyocui Tumpa pe yave, ñnanoi mbaepuere. Yayeminguetaiño'ã. ²¹¿Mbae nunga ra pipota? ¿Pipota ra aa vaerã pepi aiporaraca peve vaerã? Aní ¿pipota ra añemimichi reve aicuaaca vaerã peve chepurua?

5

Menda re uyuvanga vae uñeãa

¹Jeta vae uicuaa quirãi penti pepite pe oí vae güireco ichi-raanga. Jocua uyuvanga menda re vae mbae pichüi ete vae uyapo. Echa'ã uicuaa'ã Tumpa vae reta umaño'ã etei uyapo vaerã jucuarãi. ²Agüiyeta tõi piyembicate mbae re. Pemara eteta tõi ma cua re. Pemombota tõi pepite güi jocua cuimbae jucuarãi jeco vae. ³Echa'ã yepe tõi che ai'ã co pepi, ñrei jecuaeño chepia pe ayemingueta peré, jare aãa ma jocua cuimbae jucuarãi jeco vae. Jucuarãi aãata tõi pepi ai yave. ⁴Piyembati yave pemiadora vaerã yandeYa Jesús, pemandúa quirãi che chepia pe ayemingueta ai peré jare quirãi yandeYa Jesús imbaepuere penoita co. ⁵Agüiye pemañoño jocua cuimbae re uyembati vaerã pe reta ndive. Jucuarãi imarata uyapo vae re, jare jecove uyembiasacata yandeYa ou ye yave.

⁶Icavi'ã co piyembicate pico vaerã. Picuaa co jocua yae vae: “Mbovño levadura umbiyasi opaete masa uñemona vae.” ⁷⁻⁸Yamijaanga judío reta pascua pe uyapo vae. Echa'ã judío reta omombo mbiyape indechi vae levadura güinoi vae, jare fiesta uyapo yave jou mbiyape ipiau vae levadura güinoi mbae vae. Jae ramiño vi pe reta co jae mbiyape ipiau vae levadura mbaeti güinoi vae rami. Jáeramo agüiye ma yayapo icavi mbae vae yayapose vae. Echa'ã Cristo uyeyucaca yanderé, pascua pe maemimba reta uyeyucaca uñemee vaerã Tumpa pe rami. Jáeramo jecuaeño yayapo icavi vae añete vae rupi.

⁹Che aicutia peve ñru tupapire, jare joco pe che poyocui agüiye vaerã piñemiñru aguasa uyapo vae reta ndive. ¹⁰Poyocui'ã etei piyembiyao vaerã opaete cua ivi pegua aguasa uyapo vae reta güi, jare ñru vae reta imbaembae uipota vae reta güi, jare ñru vae reta güi imbaembae upiro vae reta güi, jare tumpa-raanga reta umbiadora vae reta güi. Echa'ã jucuarãi piyapo yave, pepuereta'ã tõi pico cua ivi pe. ¹¹Ërei aicutia co peve agüiye vaerã piñemiñru penti upurugüirovia vae jei iyupe vae ndive aguasa uyapo yave, ani ñru vae reta imbaembae uipota yave, ani tumpa-raanga reta umbiadora yave, ani icavi mbae vae japicha reta coti jei yave, ani jecuaeño usavipo yave, ani ñru vae reta güi imbaembae upiro

yave. Agüiye etei pecaru jocua nunga ndive. ¹²⁻¹³ Echa'ã chepuere'ã etei aãa upurugüirovia mbae vae reta. Tumpa uãata co jocua reta. Ërei pe reta penoi mbaepuere peãa vaerã upurugüirovia vae reta. Jáeramo pemsisirí pepite güi cuimbae jocua icavi mbae vae uyapo vae.

6

Ñeapo reta

¹ Ime yave quía pepite pe oĩ vae ñru vae mbae re umbijeco vae, icavi'ã co ñeapo vaerã ñru vae re upurugüirovia mbae vae reta pe. ¿Maera pa ñeapo'ã jese ñeñono tee Tumpa peguarã vae reta pe? ² ¿Picuaa'ã pa ñeñono tee Tumpa peguarã vae reta uãata co ivi pegua reta? Jáeramo ¿maera pa pepuere'ã pepuruãa mbaembae yavai'ã ñapuruãa jese vaerã vae re? Echa'ã pe reta peãata ivi pegua reta. ³ Picuaa co quirãí yande ñaãata ángel reta. Jáeramo ¿maera pa pepuere'ã pepuruãa cua ivi pegua teco re? Echa'ã cua mbaembae yavai'ã co ñapuruãa jese vaerã. ⁴ Jáeramo ime yave quía ñru vae cua ivi pegua teco re umbijeco vae, agüiye pemaño upurugüirovia mbae vae reta re uãa vaerã. ⁵ Cuarãí jae pumimaraa vaerã. ¿Mbaeti pa co penti iyaracuaa catu vae pepite pe? ¿Mbaeti pa quía pepite pe penti ñeapo ipuere uyapicatu vae? ⁶ Echa'ã upurugüirovia vae reta ñeapo iyee upurugüirovia mbae vae reta pe.

⁷ Ërei jucuarãí piñeapo piyee yave, penti teco tuicha vae co. Agüiye piñeapo piyee, yepe tẽi penti vae uyapo icavi mbae vae ñru vae pe ani penti vae umbitavi ñru vae. ⁸ Pe reta piyapo icavi mbae vae ñru upurugüirovia vae reta pe jare pemsitavi ñru upurugüirovia vae reta.

⁹ Picuaa co quirãí jupi mbae vae reta ndarau ico Tumpa iporoyocua pe. Agüiye piyembitavi. Aguasa uyapo vae reta, jare tumpa-raanga umbiadora vae reta, jare menda re uyuvanga vae reta, jare cuimbae uyupii uyereco vae reta, ¹⁰ jare imonda vae reta, jare ñru vae reta imbaembae uipota vae reta, jare usavipo vae reta, jare uyepipeyu vae reta, jare ñru vae reta güi imbaembae upiro vae reta ndarau ico Tumpa iporoyocua pe. ¹¹ Jare jucuarãí piyapote amocue pe reta. Ërei yandeRu Tumpa iEspíritu oyoe pegüi opaete cua mbaembae icavi mbae vae, jare peñono tee Tumpa peguarã, jare pempujupi. Cuarãí uyeyapo peve yandeYa Jesucristo jee re.

Pembiadora Tumpa perete pe

¹² Chepuere ayapo opaete aipota vae. Ërei icavi'ã opaete ayapo vaerã. Añete co, chepuere ayapo opaete aipota vae. Ërei ndarau che amañooca cherẽ mbae pe. ¹³ Tembú yanderie peguarã co, jare yanderie tembú pegua co. Ërei Tumpa umbaita co mocui reve. Ërei ñanoi'ã yanderete yayapo vaerã aguasa. Ñanoi yanderete yayeyocui vaerã yandeYa pe, jare yandeYa ipuere umee yandevẽ opaete yanderete uipota vae. ¹⁴ Jare Tumpa umbijecove ye yandeYa güeru umanocue vae reta ipite güi. Jae ramiño vi umbijecove yeta yanderete güeru umanocue vae reta ipite güi imbaepuere pe.

¹⁵ Picuaa co perete co jae Cristo jete pegua. Jáeramo agüiye etei peya cuña iaguasapota vae re. ¹⁶ ¿Picuaa'ã pa quirãí cuimbae ñemñiru penti cuña iaguasapota vae ndive vae uyeyapo pentiño jae ndive? Echa'ã Tumpa jei cuarãí: “Mocui reve uyeyapota penti ramiño.” Jucuarãí jei. ¹⁷ Ërei jocua ñemñiru yandeYa ndive vae uyeyapo pentiño yandeYa ndive Espíritu Santo rupi.

¹⁸ Agüiye piyapo aguasa. Opaete ñru mbaeyoa piyapo vae piyapo'ã co perete pe. Ërei aguasa piyapo yave, perete coti etei mbaeyoa piyapo. ¹⁹ ¿Picuaa'ã pa perete co jae Espíritu Santo ico pipe vae? Echa'ã Tumpa ombou peve Espíritu Santo, jare jae ico pepia pe. Jáeramo pe reta pico'ã ma piyupeguarã. ²⁰ Echa'ã Tumpa umbiepi jeta peré, peapo vaerã jae imbaerã. Jáeramo pembiadora Tumpa perete pe jare perecove pe. Echa'ã mocui reve Tumpa imbae co.

7

Menda regua

¹ Añave aipota aicuatiã peve jocua mbaembae picuatiã cheve jese vae re. Icavi tẽi co cuimbae agüiye vaerã güireco cuña. ² Ërei agüiye vaerã piyapo aguasa, penti penti cuimbae tugüinoi jembirecoi jare penti penti cuña tugüinoi imei. ³ Cuimbae tuico jembireco ndive, uyupii reta icavi yugüireco vaerã vae rupi. Jae ramiño vi cuña tuico ime ndive, uyupii reta icavi yugüireco vaerã vae rupi. ⁴ Cuña ipuere'ã uyapo jete pei jae uipota uyapo vae rupi. Echa'ã jete ime imbae co. Jae ramiño vi cuimbae ipuere'ã uyapo jete pei jae uipota uyapo vae rupi. Jae jete jembireco imbae co. ⁵ Mocui reve pipota'ã pepoco piyee yave mbovi ara pegua piyerure vaerã Tumpa pe, icaviño jucuarãí piyapo. Ërei agüiye piyeeya ete. Taicue rupi pepoco ye piyee, agüiye vaerã Satanás pe perẽgua pepuere'ã ma piyopia yave perete

uipota vae güi. ⁶ Ërei cua che jae peve picuaa vaerã mbae icavi piyapo vaerã. Poyocui'ã co mbae re. ⁷ Ërei aipota tõi opaete cuimbae reta yugüireco vaerã che aico rami. Ërei penti penti güinoi Tumpa umee chupe vae. Jare Tumpa umee penti vae pe vae uyuavi umee ñru vae pe vae güi.

⁸ Jáeramo che jae ndeño umenda vae reta pe jare ime umano vae reta pe cua: Icavi tõi co agüiye vaerã umenda, che amenda'ã rami. ⁹ Ërei ipuere'ã yave oyopia jete uipota vae güi, icavi co umenda vaerã. Echa'ã ipuere'ã yave uyapo jete uipota ete uyapo vae, uiporara eteta co. Jáeramo icavi co umenda vaerã.

¹⁰ Jare ayocui umenda vae reta cuarã - Ërei cheño'ã ayocui, echa'ã yandeYa vi oyocui cuarã: Cuña agüiye tomombo ime. ¹¹ Ërei omombo yave ime, tuico umenda mbae reve, ani tuñatima ye ime pe tuico ye jae ndive. Jare cuimbae agüiye tomombo jembireco.

¹² Ërei ñru reta pe che jae cua - mboroyocui yandeYa umee vae'ã co: Ime yave penti cuimbae upurugüirovia vae jare jembireco upurugüirovia'ã yave, jembireco uipota yave ico jae ndive, agüiye tomombo. ¹³ Jae ramiño vi ime yave penti cuña upurugüirovia vae jare ime upurugüirovia'ã yave, ime uipota yave ico jae ndive, agüiye tomombo. ¹⁴ Echa'ã cuimbae upurugüirovia mbae vae aramoi güiroviata Cristo re jembireco upurugüirovia vae jeco pegua. Jae ramiño vi cuña upurugüirovia mbae vae aramoi güiroviata Cristo re ime upurugüirovia vae jeco pegua. Jare uyemombo reta yave, isambiai reta ndarau ndipo güirovia Cristo re. Ërei uyemombo'ã reta yave, aramoi güiroviata Cristo re. ¹⁵ Ërei upurugüirovia mbae vae omombo yave upurugüirovia vae, cua mboroyocui amimbeu peve vae upurugüirovia vae peguarã'ã co. Echa'ã Tumpa yandeparavo yaico cavi vaerã yandepiacatu reve. ¹⁶ Echa'ã nde, cuña, ndicuaa'ã uyembiasacata ra neme ndereco pegua. Jae ramiño vi nde, cuimbae, ndicuaa'ã uyembiasacata ra nembireco ndereco pegua.

¹⁷ Ërei penti penti jecuaño tuyapo mbaraviqui yandeYa umee chupe uyapo vaerã vae. Penti penti tuico, Tumpa ueni uyembiasaca vaerã yave ico rami. Jare jucuarã ayocui opaete upurugüirovia vae uyembatimbatì vae reta. ¹⁸ Aramoi Tumpa ueni uñemicircuncidaca vae uyembiasaca vaerã. Tupita jucuarãño. Jae ramiño vi aramoi Tumpa ueni uñemicircuncidaca mbae vae uyembiasaca vaerã. Agüiye tuñemicircuncidaca. ¹⁹ Ñañemicircuncidaca yave, mbae'ã co. Jae ramiño vi ñañemicircuncidaca'ã yave, mbae'ã co. Jaeño icavi yayapo vaerã Tumpa iporoyocui reta. ²⁰ Pentì pentì jecuaño tuico Tumpa ueni uyembiasaca vaerã yave ico rami. ²¹ Aramoi Tumpa ueni pentì uyeyocui vae uyembiasaca vaerã. Agüiye tipiatiti jocua re. Ërei ipuere yave uyeyora ipatrón güi, icavi co uyapo vaerã. ²² Echa'ã yandeYa ueni yave uyeyocui vae uyembiasaca vaerã, yandeYa oyora ma opaete imbaeyoa güi. Jae ramiño vi yandeYa ueni yave uyeyocui mbae vae uyembiasaca vaerã, jae uyeyapo ma Cristo jembicuirã. ²³ Tumpa umbiepi ma perepi vaerã. Jáeramo piyemoci chupe. ²⁴ Cherivi reta, penti penti tuico Tumpa ueni uyembiasaca vaerã yave ico rami. Jucuarã tuyeyocui Tumpa pe.

²⁵ Añave taicuatía peve ndeño umenda vae re. Anoi'ã mboroyocui yandeYa güi jesegua. Ërei che tupumbiaracuaa. Jare pepuere chererovia, yandeYa cheparareco ramo. ²⁶ Jáeramo che jae icavi co penti cuimbae oí vaerã añave oí rami, cua ara reta pe yaiporara ramo. ²⁷ Jocua cuimbae umenda ma vae agüiye tomombo jembireco. Jare jocua cuimbae ndeño umenda vae, agüiye tueca jembirecorã. ²⁸ Ërei umenda yave, iyoa'ã co. Jae ramiño vi cuñatai umenda yave, iyoa'ã vi co. Ërei yemipia'ã ivi pegua güinoita umenda vae reta, jare che aipota'ã piyemipia'ã vaerã jucuarã.

²⁹ Ërei che jae peve cua, cherivi reta: Mbaetita ma ima yaico vaerã. Jáeramo mbaeti ma tiempo jembireco güinoi vae reta uyemipia'ã ete vaerã jembireco re. ³⁰ Jae ramiño vi mbaeti ma tiempo ipiatiti vae reta uyao vaerã. Jae ramiño vi mbaeti ma tiempo uyerovia vae reta upuca vaerã. Jae ramiño vi mbaembae ogua vae reta mbaeti ma güinoi tiempo opa vaerã uiporu imbaembae. ³¹ Jare mbaembae cua ivi pegua uiporu vae agüiye tuiptota ete. Echa'ã mbaembae cua ivi pegua opata co.

³² Ërei aipota'ã mbae uipota'ã vaerã. Cuimbae umenda mbae vae uyandareco yandeYa iparaviqui re. Echa'ã uipota umbiyerovia yandeYa. ³³ Ërei cuimbae umenda vae uyandareco mbaembae ivi pegua re. Echa'ã uipota umbiyerovia jembireco. ³⁴ Jae ramiño vi cuña ime reve vae uyuavi cuñatai ndeño umenda vae güi. Echa'ã ndeño umenda vae uyandareco yandeYa iparaviqui re. Echa'ã uipota jete jare jecove uñeño tee vaerã Tumpa peguarã. Ërei umenda vae uyandareco mbaembae ivi pegua re. Echa'ã uipota umbiyerovia ime.

³⁵ Jare cua che jae peve icavi peve vaerã. Aipota'ã etei poyopia menda güi. Jaeño aipota piyapo vaerã jocua icavi piyapo vaerã vae, pepuere vaerã piyeyocui yandeYa pe piyemipia'ã mbae reve.

³⁶ Ērei penti cuimbae uicuaa yave uyapo'ã co jupi vae tayi ndeiño umenda vae coti - echa'ã aramoi tayi tairusu'ã ma jare uipota tēi umenda. Tumaño tayi re umenda vaerã. Jucuarãi uyapo yave, iyoa'ã co. ³⁷ Ērei aramoi ĩru cuimbae ipia pe ipirãta jare güinoi mbaepuere uyapo vaerã iquirēi uyapo vae yepe tēi yavai chupe, jare jae ipia pe uyemingueta cavi tayi re agüiye vaerã umaño jese umenda vaerã. Jucuarãi yave, icavi uyapo. ³⁸ Jáeramo cuimbae umaño tayi re umenda vaerã vae icavi uyapo. Ērei cuimbae umaño'ã tayi re umenda vaerã vae icavi ete uyapo.

³⁹ Mboroyocui jei vae rupi cuña ime pegua co ime ico rambueve. Ērei ime umano yave, cuña ipuere umenda ye jae uipota vae ndive. Ērei tumenda cuimbae yandeYa re güirovia vae ndive. ⁴⁰ Ērei che jae icavi eteta co chupe umenda'ã ye yave. Jare aicuaa Tumpa iEspíritu chembiaracuaa che jae vaerã cuarãi.

8

Soo uñemee tumpa-raanga pe vae

¹ Añave taicuatía peve soo uñemee tumpa-raanga pe vae re. Añete co, opaete yaicuaa cua regua. Yaicuaaño yave yayembicate co, ěrei yayerau yave ñañemimirãta co. ² Ime yave quia ipia pe uyemingueta iyee uicuaa co mbaembae, jae uicuaa'ã viteño mbae uicuaata tēi vae. ³ Ērei ime yave quia uau Tumpa vae, Tumpa uicuaa cua nunga.

⁴ Jayave yayemingueta soo uñemee tumpa-raanga pe vae re. Yaicuaa co tumpa-raanga güinoi'ã co tecove. Jare yaicuaa vi Tumpa pentiño co. ⁵ Ime mbaembae ivi pegua reta umbijee tumpa vae. Cua mbaembae ñugüinoi ivi pe jare ara re. Jeta co jocua tumpa reta, jare jeta vi co ivi pegua iya reta. ⁶ Ērei yande yaicuaa ime co pentiño Tumpa. Jae co yandeRu. Jae uyapo opaete, jare yande yaico yambiadora vaerã. Ime vi co pentiño yandeYa. Jae co Jesucristo. Jae vi uyapo opaete, jare jae umee yandeve tecove.

⁷ Ērei ime amocue cua regua uicuaa mbae vae. Echa'ã jare reta tenonde yave umbiadora tumpa-raanga, jare jecuaño ipia pe uyemingueta quirãi soo jou vae uñemee co tumpa-raanga pe. Jáeramo jou yave, ipia pe uyemingueta tēi mbae icavi mbae vae co uyapo oĩ. Echa'ã ipirãta'ã ipurugüirovia re. ⁸ Ērei yau yave, mbae'ã co Tumpa pe. Echa'ã yau yave, Tumpa ndarau jei mbae icavi vae co yayapo. Jare yau'ã yave, Tumpa ndarau jei mbae icavi mbae vae co yayapo. ⁹ Pepuere peu jocua nunga soo. Ērei piñemoa agüiye vaerã cua piyapo vae rupi jocua ipirãta'ã ipurugüirovia re vae uyapo mbae icavi mbae echa chupe vae. ¹⁰ Echa'ã nde ndicuaa cavi co cua regua. Ērei jocua ipirãta'ã ipurugüirovia re vae nderecha yave ndeguapi neĩ tumpa-raanga jo pe soo ndeu vaerã, aramoi jae ipia pe uyeminguetata jae vi co ipuere jou soo uñemee tumpa-raanga pe vae. ¹¹ Jáeramo ipirãta'ã ipurugüirovia re vae opiata ndipo nde ndicuaa ndiyepe vae jeco pegua. Ērei jese vi co Cristo umano. ¹² Jáeramo jucuarãi peyoya vae ĩru upurugüirovia vae ipurugüirovia re ipirãta'ã vae coti, Cristo coti peyoya vi co. Echa'ã jocua ĩru upurugüirovia vae uyapo mbae ipia pe uyemingueta tēi icavi'ã uyapo vaerã vae. ¹³ Jáeramo ĩru upurugüirovia vae iyoa yave che jau vae jeco pegua, ndarau ye jau soo, agüiye vaerã ĩru upurugüirovia vae iyoa ayapo vae jeco pegua.

9

Temimondo ipuere uyapo vae

¹ Che vi chepuere ayapo che aipota vae rupi. Echa'ã che co jae penti temimondo. Che aecha yandeYa Jesús. Jare pe reta perovia yandeYa re che aparaviqui chupe ramo. ² Aramoi ĩru vae reta jei'ã che co jae penti temimondo. Ērei pe reta picuaa cavi che co jae penti temimondo. Echa'ã pe reta perovia yandeYa re, jare cua uicuaaca che co jae penti temimondo.

³ Cua co che jae iñera cheré vae reta pe: ⁴ Orepuere co ndou ipotave tembú. ⁵ Nduipotave yave, ore vi orepuere numenda cuña upurugüirovia vae ndive jare ndugüiraa orerupie, ĩru temimondo reta jare yandeYa tiví reta jare Pedro uyapo rami. ⁶ Aramoi pepia pe piyemingueta tēi jaeño Bernabé jare che orepuere'ã nduico nduparaviqui mbae reve. ⁷ Ime yave quia oo uñerãro vaerã vae, omondo vae umbiepi co chupe. Uva oñoti vae jou co uva iacue. Jae ramiño vi ovecha reta re uyandareco vae jou co ovecha ineche. ⁸ Cua mbaembae che jae ivi pegua reta jei rami. Ērei jucuarãi vi jei mboroyocui. ⁹ Echa'ã Moisés iporoyocui pe uyecuatía oĩ cuarã: “Güeye trigo umbipiriri oĩ yave, agüiye iyuryocua.” Jucuarãi uyecuatía oĩ. Ērei Tumpa cua jei yave, jei'ã co güeye reta reño. ¹⁰ Jei vi oreré. Echa'ã ore co jae co pe uparaviqui vae reta rami. Umaeti vae jare trigo umbipiriri vae uãro pãve uyerovia reve. Echa'ã mocui reve uipota ucaru iparaviqui güi. ¹¹ Ore co jae umaeti vae rami. Echa'ã numimbeu peve mbaembae Espiritu pegua. Jae ramiño vi ore co jae umbaeviro vae rami.

Echa'ã yavaita'ã tēi peve ore nonoi vaerã mbaembae ivi pegua jocua penoi vae güi. ¹² Ìru vae reta ipuere yave güinoi mbaembae pegüi, orepuere eteta tēi chugüi reta. Èrei yepe tēi orepuere nonoi mbaembae pegüi, èrei nduyere'ã peve jese. Opaete numiaguanta, agüiye vaerã numbiavai ñee icavi vae Cristo regua. ¹³ ¿Picuaa'ã pa quirãi Tumpa jo pe uparaviqui vae reta jou tembiu Tumpa jo pegua? Echa'ã maemimba uyeyucacue Tumpa pe uñemearenda pe vae uparaviqui vae reta jou maemimba uyeyucacue isoo. ¹⁴ Jae ramiño vi yandeYa oyocui Ìru vae reta umbiepi vaerã ñee icavi vae umimbeu vae reta pe. ¹⁵ Èrei che aipota'ã etei Ìru vae reta umbiepi vaerã cheve. Aicuatiã'ã vi cua mbaembae peve, pe reta pembiepi vaerã cheve. Ayerovia cua chepuere jae peve vae re. Icavi ete co amano vaerã pe reta pembiepi cheve vaerãve.

¹⁶ Yepe tēi amimbeu ñee icavi vae, èrei ayembicate'ã etei. Echa'ã yandeYa cheocui amimbeu vaerã. Amimbeu'ã yave ñee icavi vae, aramoi mbae icavi mbae vae uyeyapota cheve. ¹⁷ Echa'ã che ayapo yave cua mbaraviqui che etei aipota ramo, icavita tēi Ìru vae reta umbiepi vaerã cheve. Èrei ayapo cua mbaraviqui, yandeYa cheocui ayapo vaerã ramo. Jáeramo ñee icavi vae amimbeu yave, ayeyocui aĩ Tumpa pe. ¹⁸ Ayerovia ete quirãi amimbeu ñee icavi vae acovara mbae reve. Jae Tumpa umbiepi cheve cua yerovia anoi vae pe. Echa'ã yepe tēi amimbeu ñee icavi vae, jare yepe tēi icavi co Ìru vae reta umbiepi vaerã ñee icavi vae umimbeu vae pe, èrei che aipota'ã Ìru vae reta umbiepi vaerã cheve.

¹⁹ Jáeramo Ìru vae reta ipuere'ã cheocui mbae ayapo vaerã. Èrei ayeyapo na opaete vae jembiocuirã, jeta vae güirovia vaerã Cristo re chereco pegua. ²⁰ Judío reta ndive aico yave, che aico vi penti judío ico rami, judío reta güirovia vaerã Cristo re chereco pegua. Mboroyocui jei vae uyapo vae reta ndive aico yave, che aico vi penti mboroyocui jei vae uyapo vae ico rami, jae reta vi güirovia vaerã Cristo re chereco pegua. Cuarã ayapo, yepe tēi añave aico'ã ma mboroyocui jei vae re. ²¹ Moisés iporoyocui güinoi'ã vae reta ndive aico yave, che aico vi penti Moisés iporoyocui güinoi'ã vae ico rami, jae reta vi güirovia vaerã Cristo re chereco pegua. Cua uipota'ã jei aico'ã ma Tumpa iporoyocui re. Echa'ã che aico Cristo iporoyocui re. ²² Ipirãta'ã ipurugüirovia re vae reta ndive aico yave, che aico vi penti ipirãta'ã ipurugüirovia re vae ico rami, jae reta vi güirovia vaerã Cristo re chereco pegua. Jecuaeño ayemboyovaque penti penti ndive, amocue vae uyembiasaca vaerã chereco pegua. ²³ Jae opaete cua ayapo Ìru vae reta güirovia vaerã ñee icavi vae, jae reta uñemãru vaerã che ndive.

²⁴ Pe reta picuaa co quirãi amocue vae uñeñocui yave, opaete jae reta osi, èrei pentiño upurumiamiri jare güinoi upurumiamiri vae pe uñemeae vae. Pico penoi vaerã upurumiamiri vae pe uñemeeta vae. ²⁵ Jae penti penti uipota upurumiamiri vae uyecuacu opaete mbaembae icavi'ã chupe vae güi. Jae jae reta jucarãi uyapo güinoi vaerã upurumiamiri vae pe uñemeae vae imambae icumegua vae. Èrei yande yaipota ñanoi mbae jaefño mai pegua icota vae. ²⁶ Jáeramo che aico penti uñeñocui vae simi osi vae rami, mbaeti osiño vae rami. Che aico penti uñeñaro vae uipota upurumiamiri vae rami. ²⁷ Echa'ã aiporaraca cherepe pe, uyapo vaerã che aipota uyapo vaerã vae, agüiye vaerã che etei anoi'ã upurumiamiri vae pe uñemeeta vae, yepe tēi amimbeu Ìru vae reta pe.

10

Tumpa-raanga regua

¹ Jae aipota picuaa cavi vaerã, cherivi reta, quirãi opaete Israel pegua reta yugüiraa jocua amapütu igüi pe, jare opaete jae reta uasa i guasu. ² Jae opaete vae uyeyapo pentiño Moisés ndive amapütu igüi pe yugüiraa yave jare i guasu uasa reta vae. ³ Jae opaete vae jou tembiu Espiritu Santo umee chupe reta vae. ⁴ Jae opaete vae jou i Espiritu Santo umee chupe reta vae. Jae opaete vae jou jocua ita Espiritu pegua jae reta jupie oo vae güi. Jae jocua ita Cristo co. ⁵ Èrei Tumpa pochi jeta vae pe. Jáeramo opa uyucaca ueya ñana pe.

⁶ Jae Tumpa uechaca yandevae cua mbaembae uyeyapo chupe reta vae, agüiye vaerã yande yaipota mbaembae icavi mbae vae jae reta uipota vae rami. ⁷ Jáeramo agüiye pemiadora tumpa-raanga, amocue jae reta umbiadora tumpa-raanga rami. Echa'ã Tumpa iñee pe uyecuatiã oĩ cuarãi: "Jae reta uguapi ucaru vaerã. Jayave upüa reta upirae vaerã." Jucarãi uyecuatiã oĩ. ⁸ Agüiye vi yayapo aguasa, amocue jae reta uyapo rami. Jae jucarãi uyapo ramo, umano veintitrés mil jocua ara. ⁹ Agüiye vi yayapo icavi mbae vae yaicuaa vaerã tuicha ra yandeYa ipiaguasu. Echa'ã jucarãi uyapo amocue jae reta, jare uyucaca reta mboi reta pe. ¹⁰ Agüiye vi piñeenguru yandeYa coti. Echa'ã jucarãi uyapo amocue jae reta, jare Tumpa uyucaca penti ángel pe.

¹¹ Èrei Tumpa uechaca opaete cua mbaembae uyeyapo chupe reta vae, jare uyecuatiã oĩ yanembiaracuaa vaerã. Echa'ã yande yaico ara taicuegua vae reta pe. ¹² Jáeramo ipia pe

uyemingueta ipirāta co ipurugüirovia re vae tuñemoa ngatu agüiye vaerā iyoa. ¹³ Jecuaeño aña guasu pepiāro uyavica peve vaerā. Echa'ā jucuarāi uyapo opaete vae pe. Ērei jecuaeño pepuere perovia catu Tumpa pembori vaerā. Echa'ā Tumpa ndarau umaeño perēgua ete vaerā aña guasu pe. Echa'ā aña guasu pepiāro yave, Tumpa uicuaacata peve quirāi pepuere piyapo agüiye vaerā peyoa, jare jucuarāi pepuere pemiāmiri aña guasu.

¹⁴ Jáeramo, cherivī reta, agüiye pemiadora tumpa-raanga. ¹⁵ Che jae cua peve, jare chepia pe ayemingueta pe reta co jae iyaracuaa vae reta. Pe reta etei pepuere picuaa añete ra cua che jae peve vae. ¹⁶ Ñamee yasurupai yandeYa pe jocua vino re. Vino uyemijaanga icavi vae yandeYa uyapo yandeve vae re. Jucuarāi yayapo yave, yaicuaaca quirāi yande ñāi pentiño Cristo ndive Cristo jugüi uyepiyere vae jeco pegua. Jae ramiño vi ñapisāa yave mbiyape, yaicuaaca quirāi yande ñāi pentiño Cristo ndive Cristo jete umano vae jeco pegua. ¹⁷ Echa'ā yepe tēi yande co jeta vae, Ērei yande co jae Cristo jete pegua reta. Jáeramo yande ñāi penti rami. Echa'ā mbiyape pentiño co, jare opaete vae yau jocua mbiyape.

¹⁸ Yamijaanga Israel pegua reta. Jae reta jou maemimba uyeyucacue Tumpa pe uñemee vae isoo, jare jucuarāi uicuaaca quirāi jae reta uñemiru Tumpa ndive jocua maemimba uyeyucacue vae jeco pegua. ¹⁹ Aipota'ā etei jae penti tumpa-raanga co jae penti tumpa añetete vae. Aipota'ā vi jae soo tumpa-raanga pe uñemee vae ĩru soo rami'ā co. ²⁰ Ērei che jae peve cua: Jocua reta umee maemimba uyeyucacue vae isoo aña reta pe. Umee'ā Tumpa pe. Jae aipota'ā piñemiru vaerā aña reta ndive. ²¹ Icavi'ā etei pe vaerā vae uyemijaanga yandeYa jugüi re vae vino aña reta pe uñemee vae ndive. Jae ramiño vi icavi'ā etei pe vaerā mbiyape uyemijaanga yandeYa jete re vae soo aña reta pe uñemee vae ndive. ²² Agüiye ñamñemiro yandeYa aña reta pe. YandeYa ipuere ete co yandegüi.

Opaete mbae piyapo vae rupi pemiadora Tumpa

²³ Chepuere ayapo opaete aipota vae. Ērei icavi'ā opaete ayapo vaerā. Añete co, chepuere ayapo opaete aipota vae. Ērei opaete'ā yanembori ñanepirāta vaerā. ²⁴ Agüiye quía tuyapo jae uipota uyapo vaeño. Penti penti tuiyapa tombori ĩru vae reta.

²⁵ Pepuere pe uipotave soo mercado pe uñemee vae. Agüiye pepirandu uñemee ra tumpa-raanga pe. Echa'ā picuaa yave, aramoi pepia pe piyemingueta jupi'ā co pe vaerā. ²⁶ Echa'ā cua ivi jare opaete ivi pegua co jae yandeYa imbae.

²⁷ Penti upurugüirovia mbae vae uparea yave peve pecaru vaerā jae ndive, pipota yave peo, pe uipotave umee peve pe vaerā vae. Agüiye pepirandu uñemee ra soo tumpa-raanga pe. Echa'ā picuaa yave, aramoi pepia pe piyemingueta jupi'ā co pe vaerā. ²⁸ Ērei aramoi uparea peve vae jeita peve: “Uyuca reta cua maemimba umee vaerā tumpa-raanga pe.” Jucuarāi jei peve yave, agüiye pe umimbeu peve vae jeco pegua. Echa'ā aramoi jae ipia pe uyemingueta jupi'ā co pe vaerā. ²⁹ Añave chemiari aĩ ĩru vae ipia pe uyemingueta jese vae re, pe reta pepia pe piyemingueta'ā jese vae re. Ērei aramoi pepia pe piyemingueta cuarāi: “Ērei ŷmaera pa ndere cheve chepuere'ā co jau soo ĩru vae ipia pe uyemingueta jese vae jeco pegua? ³⁰ Echa'ā jecuaeño che amee yasurupai Tumpa pe cherembiu re. Jáeramo ŷmaera pa chembijeco jese? Echa'ā amee yasurupai Tumpa pe jese.” Jucuarāi ndipo pepia pe piyemingueta. ³¹ Ērei che jae peve cua: Jecuaeño pemiadora Tumpa. Opaete mbaembae pe vae rupi jare opaete mbaembae piyapo vae rupi pemiadora Tumpa. ³² Agüiye piyapo icavi mbae echa ĩru vae reta pe vae - judío reta pe, jare judío mbae vae reta pe, jare Tumpa uiparavo vae reta pe. Echa'ā piyapo yave, aramoi pemiavaita. ³³ Jucuarāiño vi che ayapo opaete mbaembae icavi echa opaete ĩru vae reta pe vae. Aico'ā che ayembiyerovia vaeraño. Jaeño aipota ambori jeta ĩru vae reta, jae reta uyembiasaca vaerā.

11

¹ Pico che aico rami. Echa'ā jecuaeño che aico Cristo uipota aico vaerā rami.

Cuña reta jemimonde

² Jare ayerovia peré, cherivī reta, quirāi jecuaeño pemandúa cheré, jare jecuaeño piyapo che amimbeu peve rami. ³ Ērei aipota picuaa vaerā cua: Cuimbae reta uyeyocui Cristo pe, jare cuña reta uyeyocui ime pe, jare Cristo uyeyocui Tumpa pe. ⁴ Penti cuimbae uyerure Tumpa pe yave ani umimbeu Tumpa iñee ĩru vae reta pe yave, uñeācasoi reve, penti ñemimaraca co. ⁵ Ērei penti cuña uyerure Tumpa pe yave ani umimbeu Tumpa iñee ĩru vae reta pe yave, uñeācasoi mbae reve, penti ñemimaraca vi co. Echa'ā jae oyovaque cuña opaete iñāca uñeāpi vae ndive. ⁶ Cuña uñeācasoi mbae vae tuñeāpi ía. Echa'ā penti ñemimaraca co cuña ía chutu ete yave ani opaete iñāca uñeāpi yave. Jáeramo cuña tuñeācasoi. ⁷ Añete co, icavi'ā cuimbae uñeācasoi vaerā. Echa'ā cuimbae uyemijaanga Tumpa re jare Tumpa yaruanda vae re. Ērei cuña uyemijaanga cuimbae yaruanda vae re. ⁸ Echa'ā Tumpa

uyapo'ã cuimbae cuña güi. Uyapo cuña cuimbae güi. ⁹ Jae ramiño vi Tumpa uyapo'ã cuimbae cuña iñurã. Uyapo cuña cuimbae iñurã. ¹⁰ Jáeramo icavi co cuña uñeãcasoi vaerã uicuaaca vaerã uyeyocui co cuimbae pe, jare ángel reta uecha vaerã. ¹¹ Ërei cuimbae ipuere'ã ico cuña mbae reve. Jae ramiño vi cuña ipuere'ã ico cuimbae mbae reve. YandeYa uyapo reta yugüireco vaerã penti rami. ¹² Añete co, Tumpa uyapo cuña cuimbae güi. Ërei cuimbae oa cuña güi. Jare Tumpa uyapo opaete.

¹³ Tapirandu peve cua re: ¿Icavi ra cuña uyereu vaerã Tumpa pe uñeãcasoi mbae reve? ¹⁴ Opaete vae yaicuaa quirãi penti cuimbae iavucu yave, penti ñemimaraca co. ¹⁵ Ërei penti cuña iavucu yave, iyaruandaca co. Echa'ã Tumpa umee cuña pe ía iñãca uyasoi vaerã. ¹⁶ Ërei ime yave quía uipota uyeaca cua re vae, tuicuaa quirãi ore nduyemboe jucuarãi. Jae ramiño vi upurugüirovia vae opaete que rupi uyembatimbatí umbiadora vaerã Tumpa vae reta jucuarãi vi uyemboe.

Icavi mbae uyapo vae, yandeYa re imandúa yave

¹⁷ Ërei chepuere'ã ayerovia peré añave aicuatiata peve jese vae re. Echa'ã piyembati yave, piyapo icavi mbae vae, icavi vae piyapo vaerãve. ¹⁸ Cua rani tae peve: Jerãcua cheve quirãi piyembiyao piyugüi, piyembati yave pemiadora vaerã Tumpa. Jare chepia pe ayemingueta aramoi añete co. ¹⁹ Echa'ã imeta co yembiyao reta pepite pe, añetete upurugüirovia vae reta uyecuaa vaerã pepite pe. ²⁰ Jáeramo piyembati yave pemandúa vaerã yandeYa re, añetete'ã co pemandúa yandeYa re tembíu peu yave. ²¹ Echa'ã amocue pe reta pembipi peu tembíu peru vae ndei ñru reta yugüeru mbove. Jáeramo penti vae iyembaí, jare ñru vae usaviño. ²² Pipota yave pecaru cavi, pepuere pecaru perenta pei. Agüiye períro ñru Tumpa uiparavo vae reta. Agüiye pemimaraca mbaeti mbae güinoi vae reta. ¿Mbae ra jaeta peve? ¿Ayeroviata ra peré cua jeco pegua? Ndarau etei co.

*Pablo oporomböe quirãí yanemandúa vaerã yandeYa re
(Mt 26.26-29; Mr 14.22-25; Lc 22.14-20)*

²³ Echa'ã yandeYa umimbeu cheve che amimbeu-yuapi ye peve vae. Jae co cua: YandeYa uipisi mbiyape jocua piare uñemeeta umano vaerã yave. ²⁴ Jayave yasurupai Tumpa pe umee yave, upisãa mbiyape jare jei: “Pipisi peu. Cua co jae cherete peré ameeta vae. Peu cua, pemandúa vaerã cheré.” Jucuarãi jei. ²⁵ Jae ramiño vi yandeYa uipisi copa opa ma ucaru reta yave, jare jei: “Cua vino co jae Tumpa jei piau ye vae cherugüi pe ayapota vae. Peu ñave ñave, pemandúa cheré.” Jucuarãi jei. ²⁶ Echa'ã mbiyape jare vino peu ñave ñave, picuaacata quirãí yandeYa umano co, jare jucuarãí piyapota yandeYa ou ye regua.

²⁷ Jáeramo ime yave quía jou mbiyape jare vino yanemimandúa yandeYa re vae cua icavi mbae vae uyapo reve vae, iyoa co yandeYa jete jare jugüi coti. ²⁸ Ërei penti penti tuñeãa ipia pe. Jayave tou jocua mbiyape jare jocua vino. ²⁹ Echa'ã ime yave quía jou mbiyape jare vino cua icavi mbae vae uyapo reve vae, uyembijeco jou ramo. Echa'ã uyandareco'ã yandeYa jete re. ³⁰ Cua jeco pegua jeta pepite pe ñugüinoi vae reta imbaerasi jare ipítu mbaerasi jeco pegua, jare jeta ma umano. ³¹ Echa'ã ñañeãa yave, yandeYa ndarau uiporaraca yandeve. ³² Ërei yaiporara yandeYa ñanenupa ramo, icavi vaerã yandeve, agüiye vaerã yayembijeco upurugüirovia mbae vae reta ndive.

³³ Jáeramo, cherivi reta, piyembati yave pecaru vaerã, piñeraãro rani. ³⁴ Jare ime yave quía iyembaí vae, tucaru rani jenta pe, agüiye vaerã yandeYa uiporaraca peve, piyembati yave. Jare opaete ñru mbaembae ayapicatuta aa pepi yave.

12

Mbaepuere reta Espíritu Santo umee vae

¹ Añave, cherivi reta, aipota amimbeu peve mbaepuere reta Espíritu Santo umee vae regua. Aipota'ã pico vaerã picuaa mbae reve.

² Picuaa cavi quirãí ndei perovia yandeYa re mbove, pemiadorase tumpa-raanga reta, piyemboe jese rami, yepe tẽi tumpa-raanga reta iñeã'ã etei. ³ Jáeramo aipota picuaa vaerã cua: Tumpa iEspíritu rupi piyemingueta yave, ndarau piyepipeyu Jesús re. Jare jaeño Espíritu Santo rupi ipuere quía jei: “Jesús co jae cheYa.”

⁴ Jare mbaepuere Espíritu Santo umee vae reta uyuavi, ãrei Espíritu Santo pentiño co. ⁵ Jare jocua mbaraviqui yayapo yayeyocui vaerã yandeYa pe vae reta uyuavi, ãrei yandeYa pentiño co. ⁶ Jare yepe tẽi mbaraviqui yayapo vae reta uyuavi, Tumpa pentiño co, jare Tumpa umbupuere opaete vae opaete mbaraviqui reta uyapo vaerã. ⁷ Ërei Espíritu Santo umee mbaepuere penti penti pe, penti penti ipuere vaerã ombori ñru vae reta. ⁸ Echa'ã Espíritu Santo umee penti vae pe uyemingueta vaerã iyaracuaa catu reve. Jare jae etei umee ñru vae pe uyemingueta vaerã uicuaa cavi reve. ⁹ Jare Espíritu Santo umee ñru vae pe mburugüirovia. Jare jae etei umee ñru vae pe umbigüera vaerã imbaerasi vae reta. ¹⁰ Umee

ĩru vae pe uyapo vaerã miacañi reta, jare ĩru vae pe umĩbeu vaerã Tumpa iñee. Umee ĩru vae pe uicuaa vaerã ou ra penti ñee Espĩritu Santo gũĩ ani ambie coti gũĩ. Umee ĩru vae pe uyemĩngueta vaerã ambiembie vae iñee reta pe, jare ĩru vae pe umĩbeu vaerã mbae uipota jei ambiembie vae iñee reta pe uyendu vae. ¹¹ Ĕrei pentiño co Espĩritu Santo opaete cua mbaepuere reta gũĩnoi vae reta umbupuere vae. Jare jae umee mbaepuere uyuaui vae reta jae uipota vae rupi.

Cristo jete pegua reta pentiño co

¹² Echa'ã pentiño co yanderete. Ĕrei yanderete pe ñanoi yandepi jare yandepo jare yandeapisa jare yanderesa jare jeta ĩru ĩru vae. Jare opaete yanderete pegua reta uyapo pentiño yanderete, yepe tẽi jeta uyuaui vae co. Jae ramiño vi Cristo jete pegua reta pentiño co. ¹³ Echa'ã pentiño co Espĩritu Santo jare jae yanembibautiza opaete, Cristo jete yayeyapo vaerã. Pentĩño vi co Cristo jete. Jucuarãĩ Espĩritu Santo uyapo judio reta jare judio mbae vae reta pe. Jae ramiño vi jae uyapo uyeyocui vae reta jare uyeyocui mbae vae reta pe. Jare pentiño co Espĩritu Santo cua uyapo yandeve vae.

¹⁴ ĩme jeta yanderete pegua reta, pentiño'ã co. ¹⁵ Aramoi yandepi jeita: "Che ipo'ã co. Jãeramo che jete pegua'ã co." Ĕrei yepe tẽi jucuarãĩ jeita, Ĕrei yanderete pegua co. ¹⁶ Jae ramiño vi aramoi yandeapisa jeita: "Che jesa'ã co. Jãeramo che jete pegua'ã co." Ĕrei yepe tẽi jucuarãĩ jeita, Ĕrei yanderete pegua co. ¹⁷ Opaete yanderete yanderesa catuii yave, ndarau tẽi yandepuere mbae yayandu. Jae ramiño vi opaete yanderete yandeapisa catuii yave, ndarau tẽi yandepuere mbae ñaetu. ¹⁸ Ĕrei Tumpa oñono penti penti yanderete pegua reta yanderete pe jae uipota vae rupi. ¹⁹ Jare ĩme yave pentiño yanderete pegua, ndarau tẽi yanderete. ²⁰ Ĕrei ĩme co jeta yanderete pegua reta, Ĕrei pentiño co yanderete.

²¹ Jare yanderesa ipuere'ã jei yandepo pe: "Che aipota'ã nde chembori vaerã." Jae ramiño vi ñaneãca ipuere'ã jei yandepi pe: "Che aipota'ã nde chembori vaerã." ²² Añete, jucuarãĩ'ã co. Echa'ã yanderete pegua reta iparaviqui'ã echa vae uparaviqui ete co. ²³ Jare yanderete pegua reta icavi'ã echa yandeve vae ñamopõra. Jae ramiño vi yanderete pegua reta ñanemara jese vae yamiemonde cavi.

²⁴ Ĕrei yanderete pegua reta icavi tẽi yandeve vae ñamopõra'ã. Ĕrei Tumpa umbiyuapiyuapi opaete yanderete pegua reta, jare uipiua jocua yanderete pegua yande yaipiu'ã vae reta. ²⁵ Jucuarãĩ uyapo, agũiye vaerã yanderete pegua reta uyembiyao uyugũĩ, opaete yanderete pegua reta uyandareco cavi vaerã iyee. ²⁶ Jare penti yanderete pegua uiporara yave, opaete yanderete pegua reta uiporara pãve. Jae ramiño vi penti yanderete pegua uyepiua yave, opaete yanderete pegua reta uyerovia pãve.

²⁷ Jare pe reta co jae Cristo jete, jare penti penti co jae Cristo jete pegua. ²⁸ Jare Tumpa oñono amocue vae upurugũirovia vae reta ipite pe temimondo retarã yugũireco vaerã. Oñono vi ĩru vae reta Tumpa iñee umĩbeu vaerã. Oñono vi ĩru vae reta omboe vaerã upurugũirovia vae reta. Oñono vi ĩru vae reta uyapo vaerã miacañi reta, jare ĩru vae reta umbigũera vaerã imbaerasi vae reta, jare ĩru vae reta ombori vaerã ĩru upurugũirovia vae reta, jare ĩru vae reta ipuere vaerã oyocui ĩru upurugũirovia vae reta, jare ĩru vae reta uyemĩngueta vaerã ambiembie vae iñee reta pe. ²⁹ Opaete'ã co temimondo reta vae. Opaete'ã vi co Tumpa iñee umĩbeu vae reta. Opaete'ã vi co upurugũirovia vae reta omboe vae reta. Opaete'ã vi co miacañi reta uyapo vae reta. ³⁰ Opaete'ã vi co imbaerasi vae reta umbigũera vae reta. Opaete'ã vi co ambiembie vae iñee reta pe uyemĩngueta vae reta. Opaete'ã vi co mbae uipota jei ambiembie vae iñee reta pe uyendu vae umĩbeu vae reta. ³¹ Ĕrei pipota ete penoi vaerã mbaepuere icavi ete ĩru reta gũĩ vae reta. Ĕrei amimbeuta peve mbae icavi ete cua mbaembae reta gũĩ vae.

13

Mburuau icavi ete

¹ Aramoi chepuere ayemĩngueta ambiembie vae iñee reta pe jare ángel reta iñee pe. Ĕrei apuruau'ã yave, che jae vae mbae'ã co, jare ayeyapo campana ipu rami ani temimbi iñee rami. ² Jare aramoi ĩme anoi mbaepuere Tumpa iñee amĩbeu cavi vaerã. Jare aramoi aicuaa mbaembae ĩru vae reta pe uyecuaa mbae vae jare mbaembae ĩru vae reta uicuaa mbae vae. Jare aramoi ĩme anoi mburugũirovia tuicha ete vae chepuere vaerã ambisiri ivitu guasu reta. Ĕrei apuruau'ã yave, che mbae'ã co. ³ Jare aramoi ameaeta opaete chembaembae amingaru vaerã iparavete vae reta. Jare aramoi ameaeta chereete etei aramoi vaerã tata pe. Ĕrei apuruau'ã yave, mbae'ã co cheve.

⁴ Yapuruau yave, yandepiaguasu jare yandepiacavi ĩru vae reta pe. Yapuruau yave, yaipota'ã ĩru vae reta imbaembae, yayemitenonde'ã, yayembicate'ã, ⁵ yayapo'ã icavi mbae vae, yaipota'ã mbae yandeyupeguarãño, yandearasi'ã, yanemandua'ã icavi mbae vae ĩru

vae reta uyapo yandeve vae re, ⁶yayerovia'ã ñru vae reta iyoa yave, ñrei yayerovia añete vae re. ⁷Yapuruaú yave, ñamiaguanta opaete yapurugüirovia reve, jare ñaãro yandepiaguasu reve.

⁸Mburuaú ndarau etei opa. Ñrei mbaepuere Tumpa ñnee umimbeu vaerã ñanoi vae opata co. Jae ramiño vi mbaepuere ambiembie vae ñnee reta pe yayingueta vaerã ñanoi vae opata co. Jae mbaepuere mbaembae yaicuaa vaerã ñanoi vae opata co. ⁹Echa'ã mboviño co jocua yaicuaa vae, jare Tumpa ñnee yamimbeu yave mboviño vi co jocua yamimbeu vae. ¹⁰Ñrei opaete uyecuaa yave, jocua mboviño vae opata co.

¹¹Che chemichi yave, ayemingueta penti sambiaí uyemingueta rami, jare aicuaa penti sambiaí uicuaa rami, jare chepia pe ayemingueta penti sambiaí ipia pe uyemingueta rami. Ñrei acuaa ma yave, ayapo'ã ma penti sambiaí uyapo rami. ¹²Ñmae yave yanderova re espejo pe, yayeecha cavi'ã. Jucuarãiño vi añave yaicuaa cavi'ã mbaembae regua. Ñrei ñmae yave ñru vae re coiño güi, yaecha cavi. Jucuarãiño vi penti ara yaicuaa cavita mbaembae regua. Echa'ã añave mboviño aicuaa. Ñrei jocua ara aicuaata opaete, Tumpa checuaa rami. ¹³Ñrei jecuae yapurugüiroviata, jare ñaãrota yayerovia reve, jare yapuruaú. Ñrei mburuaú icavi ete cua ñru mocui güi.

14

Ambiembie vae ñnee reta

¹Jecuaeño pepuruaú. Jare penoi quirã pipota vaerã mbaepuere Espiritu Santo umee vae reta. Ñrei pemitenonde mbaepuere Tumpa ñnee pepuere pemimbeu vaerã. ²Echa'ã ambiembie vae ñnee reta pe uyemingueta vae uyemingueta Tumpa pe, ñru vae reta pe'ã. Echa'ã quía uicuaa'ã mbae jei vae. Jae uyemingueta Espiritu Santo rupi uyecuaa mbae vae re. ³Ñrei Tumpa ñnee umimbeu vae uyemingueta ñru vae reta pe, umimirãta jare umbiaracuaa jare umbipiacatu vaerã. ⁴Ambie vae ñnee pe uyemingueta vae jaeño uñemimirãta. Ñrei Tumpa ñnee umimbeu vae umimirãta ñru upurugüirovia vae reta.

⁵Che aipota opaete pe reta piyemingueta vaerã ambiembie vae ñnee reta pe. Ñrei aipota ete pemimbeu vaerã Tumpa ñnee. Echa'ã Tumpa ñnee umimbeu vae uyeyocui ete ñru upurugüirovia vae reta pe ambiembie vae ñnee reta pe uyemingueta vae güi. Ñrei ambiembie vae ñnee reta pe uyemingueta vae umimbeu yave mbae uipota jei ambiembie vae ñnee reta pe uyandu vae, uyeyocui vi ñru upurugüirovia vae reta pe. Echa'ã umimbeu yave, umimirãta ñru upurugüirovia vae reta. ⁶Jáeramo, cherivi reta, che aa yave pepi, jare ayemingueta yave ambiembie vae ñnee reta pe, ndarau etei mbae icavi vae ayapo peve, aicuaaca'ã peve yave Tumpa uicuaaca cheve vae, ani amimbeu peve mbae aicuaa vae, ani Tumpa ñnee, ani pomboe mbae re.

⁷Yamijaanga mbaembae tecove güinoi mbae vae ipu vae. Temimbi ñamiñee yave ani miori yambopu yave, yambopu cavi'ã yave, ndarau quía uicuaa mbae nunga canta ra ipu oi vae. ⁸Picuaa co quirã sundaro reta uñerãrota yave, penti temimbi uñee sundaro reta uyeyapicatu uñerãro vaerã. Ñrei uñee cavi'ã yave temimbi, ndarau quía uyeyapicatu uñerãro vaerã. ⁹Jae ramiño vi pe reta piyemingueta'ã yave ñee ñru vae reta ipuere uicuaa cavi vae pe, ndarau quía uicuaa mbae pere vae. Piyemingueta yuvangaiño. ¹⁰Añete co, ime jeta ñee uyuaui vae reta cua ivi pe, jare opaete vae uicuaa ñneeñeei. ¹¹Jáeramo aicuaa'ã yave ñru vae ñnee, ayemingueta chupe yave, jae uicuaata che co jae ambie ivi pegua, jare jae uyemingueta cheve yave, che aicuaata jae co ambie ivi pegua. ¹²Jae ramiño vi pe reta pipota ete penoi vaerã mbaepuere Espiritu Santo umee vae reta. Jáeramo pipota ete jocua mbaepuere pipe ñru upurugüirovia vae reta pepuere pemimirãta vae reta.

¹³Jáeramo ambie vae ñnee pe uyemingueta vae tuyerure Tumpa pe ipuere vaerã umimbeu mbae uipota jei ambie vae ñnee pe uyandu vae. ¹⁴Echa'ã che ayerure yave Tumpa pe ambie vae ñnee pe, aicuaa'ã che jae vae. Echa'ã cheespirituño co uyerure. ¹⁵Jáeramo çmbae ra ayapota? Cheespiritu uyerure reve ayerureta Tumpa pe, jare ayerureta Tumpa pe aicuaa reve vi. Jae ramiño vi cheespiritu ucanta reve acantata, jare acantata aicuaa reve vi. ¹⁶Echa'ã nde neme yave yasurupai Tumpa pe ndeespiritu peño, ñee ndiyemingueta pipe vae uicuaa mbae vae ndarau ipuere uñemiru nde ndive, yasurupai Tumpa pe neme yave. Echa'ã uicuaa'ã mbae ndere vae. ¹⁷Añete co, icavi ete nde neme yasurupai Tumpa pe, ñrei jocua ñru vae nemimirãta'ã pipe. ¹⁸Che amee yasurupai Tumpa pe quirã jeta ete ayemingueta ambiembie vae ñnee reta pe opaete pe reta güi. ¹⁹Ñrei ayembati yave ñru upurugüirovia vae reta ndive, aipota ete jae pandepo ñeeño aicuaa reve amboe vaerã ñru vae reta, diez mil ñee ambie vae ñnee pe jae vaerãve.

²⁰Cherivi reta, agüiye pepia pe piyemingueta sambiaí reta ipia pe uyemingueta rami. Agüiye piyapo icavi mbae vae, sambiaí-rai reta uyapo'ã icavi mbae vae rami. Ñrei pepia pe

piyemingueta mbaembae re ucuacuaa vae reta ipia pe uyemingueta rami. ²¹ Mboroyocui pe uyecuatía oĩ cuarã: “Ayeminguetaa cua ivi pegua reta pe ambie ivi pegua reta iñee pei uyemingueta vae rupi. Ërei jeseve ndarau uyapisaca cheré” —jei yandeYa. Jucuarã uyecuatía oĩ. ²² Jáeramo ambiembie vae iñee reta pe yayemingueta yave, yaicuaaca Tumpa imbaepuere upurugüirovia mbae vae reta pe, upurugüirovia vae reta pe'ã. Ërei Tumpa iñee yamimbeu yave, yaicuaaca upurugüirovia vae reta pe, upurugüirovia mbae vae reta pe'ã. ²³ Jáeramo opaete pepurugüirovia vae reta piyembati yave, opaete pe reta piyemingueta yave ambiembie vae iñee reta pe, jare uique yave pepite pe cua nunga ñee reta uicuaa mbae vae reta ani upurugüirovia mbae vae reta, jae reta jeita pembiquere co. ²⁴ Ërei opaete pe reta pemimbeu yave Tumpa iñee, jare uique yave pepite pe penti upurugüirovia mbae vae ani penti uicuaa mbae vae, jae uicuaata iyugüi quirã jae co iyoa vae jare uñeãata, uyandu yave opaete pe reta pere vae. ²⁵ Jare jucuarã uyecuaata chupe opaete ipia pe oĩ vae, jare uyeaticata umbiadora reve Tumpa, jare jeita quirã añetete Tumpa ico pepite pe.

Piyapo cavi opaete mbiacatu reve

²⁶ Jáeramo, cherivi reta, ¿mbae ra yaeta? Piyembati yave, penti penti pipota pemiadora Tumpa pecanta reve, ani pipota peporombocoe, ani pipota piyemingueta ambie vae iñee pe, ani pipota picuaaca ñru reta pe Tumpa uicuaaca peve vae, ani pipota pemimbeu mbae uipota jei ambie vae iñee pe uyendu vae. Piyapo opaete piñemimirãta vaerã. ²⁷ Ime yave quía reta uipota uyemingueta ambiembie vae iñee reta pe vae, tuyemingueta mocui ani mbapiño, jare tuñeraãro tuyemingueta, jare penti vae tumimbeu mbae uipota jei ambiembie vae iñee reta pe uyendu vae. ²⁸ Ërei joco pe o'ã yave mbae uipota jei ambiembie vae iñee reta pe uyendu vae ipuere umimbeu vae, agüiye quía tuyemingueta ambie vae iñee pe uyembatia pe. Jaeño ipuere uyemingueta iyupe jare Tumpa pe ambie vae iñee pe. ²⁹ Jae ramiño vi tuyemingueta mocui ani mbapi Tumpa iñee umimbeu vae reta, jare uyapisaca jese vae reta ipia pe tuyemingueta icavi ra jocua uyandu vae. ³⁰ Ërei Tumpa uicuaaca yave mbae ñru vae uguapi oĩ vae pe, uyemingueta oĩ vae tiqüi. ³¹ Echa'ã jucuarã opaete pe reta pepuere pemimbeu Tumpa iñee penti penti rupi, opaete vae piyemboe vaerã jare piyembapiacatu vaerã. ³² Jare Tumpa iñee umimbeu vae reta ime mbaepuere güinoi uñeraãro vaerã. ³³ Echa'ã Tumpa uipota opaete piyapo vaerã mbiacatu reve. Uipota'ã piyapo vaerã tecorai piyembatia pe. Echa'ã jucuarã Tumpa uipota opaete uñeño tee Tumpa peguarã vae reta uyembatimbatia pe.

³⁴ Piyembati yave, tiqüi toĩ cuña reta. Echa'ã ñamaeño'ã jese reta oporombocoe vaerã. Penti penti tuyapo ime jei vae. Echa'ã jucuarã jei mboroyocui. ³⁵ Jare ime yave mbae cuña uipota uicuaa vae, tupirandu ime pe jenta pe. Echa'ã piyembatia pe cuña reta uyemingueta yave, penti ñemimaraca co.

³⁶ Pemandúa quirã pe reta rani'ã co pemimbeu Tumpa iñee, jare pe retaño'ã co piyandu Tumpa iñee. ³⁷ Aramoi quía ipia pe uyemingueta iyee jae co penti Tumpa iñee umimbeu vae ani mbaepuere Espiritu Santo umee vae güinoi vae. Jocua nunga tuicuaa quirã cua mbaembae aicutía peve vae yandeYa iporoyocui reta co. ³⁸ Ërei uipota'ã yave uicuaa, tupita uicuaa mbae reve.

³⁹ Jáeramo, cherivi reta, penoi quirã pipota vaerã pemimbeu Tumpa iñee, jare agüiye piyopia uipota uyemingueta ambiembie vae iñee reta pe vae. ⁴⁰ Ërei piyapo cavi opaete mbiacatu reve.

15

Cristo icove ye ou umanocue vae reta ipite güi

¹ Añave, cherivi reta, aipota pumimandúa ñee icavi vae amimbeu peve vae re. Echa'ã pe reta perovia cua ñee icavi vae jare pepirãta jese. ² Jare piyembiasaca ñee icavi vae rupi pemandúa yave amimbeu peve vae re, añetete pegua pepurugüirovia yave.

³ Echa'ã cua rani amimbeu peve, quirã Cristo umano yanembaeyoa reta re, cuarã Tumpa iñee pe uyecuatía oĩ rami. Cua co uyecuaaca cheve vae. ⁴ Amimbeu vi peve quirã Cristo uñeñoti jare mbapi ara rupi icove ye ou umanocue vae reta ipite güi, cuarã Tumpa iñee pe uyecuatía oĩ rami. ⁵ Jocua jaicue rupi uyecuaa Pedro pe, jare jocua rendave pe uyecuaa jocua doce vae pe. ⁶ Jocua rendave pe uyecuaa jeta upurugüirovia vae reta yati vae pe. Jocua reta quinientos uasa. Jare jeta jocua reta imeño co ñugüinoi. Ërei amocue umano ma. ⁷ Jocua rendave pe uyecuaa Jacobo pe, jare joco güi uyecuaa opaete temimondo reta pe.

⁸ Jare taicue ete uyecuaa cheve vi. Che co jae penti sambiai ocua seri vae echa rami. ⁹ Echa'ã che co jae penti temimondo, Ërei opaete ñru temimondo reta uyepiucha chegüi. Jupi'ã ayembijee vaerã temimondo pe. Echa'ã che ayapose icavi mbae vae Tumpa uiparavo

vae reta pe. ¹⁰ Che co jae penti temimondo Tumpa ipiacavi rupi. Jare ipiacavi umee cheve vae ucañi'ã etei. Echa'ã che aparaviqui tanta ete opaete İru reta güi. Ęrei chei'ã co aparaviqui. Tumpa ipiacavi umee cheve vae chemimbaraviqui. ¹¹ Aicuaa'ã quía ra umimbeu peve quirãi Cristo icove ye ou umanocue vae reta ipite güi, che ani İru reta. Ęrei jucuarãi numimbeu, jare jucuarãi pe reta perovia.

Umanocue vae reta icove yeta co

¹² Jáeramo ĺmaera pa jei amocue pepite pe ñugüinoi vae mbaeti quía ipuere icove ye ou umanocue vae reta ipite güi? Echa'ã ore numimbeu peve quirãi Cristo icove ye co ou umanocue vae reta ipite güi. ¹³ Ęrei mbaeti yave quía ipuere icove ye ou umanocue vae reta ipite güi, Cristo vi icove yeta'ã tēi ou umanocue vae reta ipite güi. ¹⁴ Jare Cristo icove ye'ã yave ou umanocue vae reta ipite güi, cua numimbeu peve vae mbaetita tēi co mbae, jare pepurugüirovia vi mbaetita tēi co mbae. ¹⁵ Jare jucuarãi yave, oreaputa tēi Tumpa re. Echa'ã ore numimbeu quirãi Tumpa umbijecove ye Cristo güeru umanocue vae reta ipite güi. Ęrei quía ipuere'ã yave icove ye ou umanocue vae reta ipite güi, Tumpa umbijecove yeta'ã tēi Cristo güeru umanocue vae reta ipite güi. ¹⁶ Echa'ã quía ipuere'ã yave icove ye ou umanocue vae reta ipite güi, Cristo icove yeta'ã tēi ou umanocue vae reta ipite güi. ¹⁷ Jare Cristo icove ye'ã yave ou umanocue vae reta ipite güi, pepurugüirovia mbaetita tēi co mbae, jare uyembaita'ã tēi pembaeyoa reta. ¹⁸ Jae ramiño vi, jucuarãi yave, Cristo re güirovia vae reta umano ma vae ucañiteita tēi co. ¹⁹ Cua ivi pe ñai rambueve ñaãro tēi yave yayerovia reve Cristo re, yandepiatiti eteta tēi upurugüirovia mbae vae reta güi.

²⁰ Ęrei yaicuaa Cristo icove ye co ou umanocue vae reta ipite güi. Jae rani icove ye ou umanocue vae reta ipite güi, uicuaaca vaerã opaete umanocue vae reta icove yeta co. ²¹ Echa'ã mano uique cua ivi pe penti cuimbae mbaeyoa uyapo vae jeco pegua. Jae ramiño vi umanocue vae reta icove yeta İru cuimbae uyapo vae jeco pegua. ²² Echa'ã Adán co jae opaete vae itenondegua. Jáeramo opaete vae umano. Jae ramiño vi yande yaico Cristo re. Jáeramo opaete yaicove yeta co. ²³ Cristo rani icove ye. Ęrei Cristo ou ye yave, opaete güirovia Cristo re vae reta icove yeta. ²⁴ Jare taicue ete opata co opaete, Cristo uequi ma yave imbaepuere opaete mburuvicha reta ara pegua jare ivi pegua jare ipotave mbaepuere güinoi vae güi, jare umee ma yave iporoyocúa Tumpa pe - jae co yandeRu. ²⁵ Echa'ã Cristo oyocuita co opaete ivi pegua reta, umiamiri opaete jovaicho reta regua. ²⁶ Jare taicue ete Cristo umbaita mano. ²⁷ Echa'ã Tumpa umee ma Cristo pe mbaepuere umiamiri vaerã opaete. Echa'ã jucuarãi jei Tumpa iñee pe uyecuatía oĩ vae. Ęrei cua opaete jei vae uipota'ã jei Tumpa etei. Echa'ã Tumpa umee mbaepuere Cristo pe. ²⁸ Jare Tumpa Tai umiamiri ma yave opaete, jae etei uyeyocuita Tumpa pe. Echa'ã Tumpa umee chupe mbaepuere umiamiri vaerã opaete. Jayave Tumpa oyocuita opaete.

²⁹ Jare amocue vae uyembibautizaca umanocue vae reta ipepica pe. ĺMaera ra uyapo reta jucuarãi? Echa'ã ndarau icove ye yave umanocue vae reta, ĺmaera ra uyembibautizaca umanocue vae reta ipepica pe?

³⁰ Jare ĺmaera ra requireñi nduiporara nduico opa ara rupi? ³¹ Opa ara İru vae reta uipota cheyuca. Cua añete co, cherivi reta, yerovia anoi peré vae añete rami. Echa'ã ayerovia peré yandeYa Jesucristo re. ³² Yandepuere yae yamijaanga reve che añeãro maemimba pochí vae reta ndive Efeso pe. Ęrei ĺmbae pe ra icavi cheve? Umanocue vae reta ndarau icove ye yave, yandepuere yae: "Yayecou. Echa'ã piareve ñamanota co."

³³ Agüiye petavi. Pochí vae reta ndive ñañemiİru yave, jae reta yanembopochí vi. ³⁴ Piyerova Tumpa coti piyapo vaerã jupi vae. Agüiye ma peyoa. Echa'ã amocue pe reta picuaa'ã Tumpa. Cua jae peve pemara vaerã.

¿Quirãita ra icove ye umanocue vae reta?

³⁵ Ęrei aramoi quía jeita: "¿Quirãita ra icove ye umanocue vae reta? Jare ĺmbae nunga jete ra güinoita?" ³⁶ Jucuarãi jei vae iyaracuaa'ã co. Echa'ã penti temiti jáicue ñañoti yave, umano co jeñi vaerã. ³⁷ Jare jocua ñañoti vae oyovaque'ã co temiti ucuacuaa ma vae ndive. Ñañoti jáicueño, aramoi trigo jáicue ani İru temiti jáicue. ³⁸ Ęrei Tumpa umbicuacuaa, temiti oĩ vaerã Tumpa jei vae rupi. Jare Tumpa umbuyuavi opaete temiti reta. ³⁹ Jae ramiño vi oyovaque'ã opaete jete. Echa'ã ime cuimbae jete, jare maemimba jete, jare jevae i rupigua jete, jare güira jete. Opaete uyuvavi uyugüi. ⁴⁰ Jae ramiño vi ime mbaembae ara re ñugüinoi vae, jare ime mbaembae ivi pe ñugüinoi vae. Mbaembae ara re ñugüinoi vae ipõra. Jare mbaembae ivi pe ñugüinoi vae ipõra. Ęrei ipõra vae pe uyuvavi uyugüi. ⁴¹ Ipõra co guarasi jare yasi jare yasitata reta. Ęrei ipõra vae pe uyuvavi uyugüi. Jae ramiño vi opaete yasitata reta ipõra vae pe uyuvavi uyugüi. ⁴² Jucuarãita vi uyeyapo, umanocue vae reta icove ye yave. Echa'ã uñeñoti yave, umano vae jetejecu icumegua. Ęrei icove ye yave ndarau etei

icumegua. ⁴³ Uñeñoti yave, mbaeti co mbae yaipiu vaerã. Ërei icove ye yave, ipõra eteta co. Uñeñoti yave, güinoiã etei mbaepuere. Ërei icove ye yave, ipirãta eteta co. ⁴⁴ Umano vae jetcuec uñeñoti yave, ivi pegua co. Ërei icove ye yave, ara pegua co. Ime co jete ivi pegua. Jae ramiño vi ime jete ara pegua.

⁴⁵ Echa'ã Tumpa iñee pe uyecuatía oĩ cuarã: "Tumpa umee tecove cuimbae tenondegua vae pe - jae co Adán. Jocua Adán taicuegua vae - jae co Cristo - tecove ara pegua umee vae co." Cuarã uyecuatía oĩ. ⁴⁶ Ërei ara pegua tenonde'ã oĩ. Jocua ivi pegua tenonde oĩ, jare taicue oĩ ara pegua. ⁴⁷ Cuimbae tenondegua vae ivi pegua co. Echa'ã Tumpa uyapo ivi güi. Ërei cuimbae taicuegua vae co jae yandeYa ara güi ou vae. ⁴⁸ Yanderete ivi pegua oyovaque cuimbae ivi pegua jete ndive. Jae ramiño vi yanderete ara pegua oyovaqueta cuimbae ara pegua jete ndive. ⁴⁹ Yaguacatu ma cuimbae ivi pegua. Jae ramiño vi yaguacatuta cuimbae ara pegua.

⁵⁰ Jare cua che jae peve, cherivi reta: Yanderete ivi pegua ndarau uique Tumpa iporoyocua pe. Jae ramiño vi mbae icumegua vae ndarau uique icumegua mbae oĩ vae pe. ⁵¹ Mase, tamimbeu peve ndeiño uyecuaa vae. Ndarau opaete ñamano, ërei opaete ñanoita yanderete ipiau vae. ⁵² Jare cua uyeyapota imabae pegua penti jei vae pe Tumpa itrompeta uñee yave. Echa'ã Tumpa itrompeta uñeeta co, jare umanocue vae reta icove yeta güinoi vaerã jete ndarau etei icumegua vae. Jare yande imeño ñaĩ vae vi ñanoita yanderete ipiau vae. ⁵³ Echa'ã yanderete icumegua vae uyepépica yanderete ndarau etei icumegua vae ndive. Jae ramiño vi yanderete ipuere umano vae uyepépica yanderete ndarau etei ipuere umano vae ndive. ⁵⁴ Jare ñanoi yave yanderete ndarau etei icumegua vae yanderete icumegua vae ipepica pe, jare ñanoi yave yanderete ndarau etei ipuere umano vae yanderete ipuere umano vae ipepica pe, uyeyapota ma co Tumpa iñee pe uyecuatía oĩ vae. Echa'ã uyecuatía oĩ cuarã: "Tumpa umiamiri mano jare umbai. ⁵⁵ Mano güinoiã etei mbaepuere yanderé. Ñanemiamiri'ã etei." Jucuarã uyecuatía oĩ. ⁵⁶ Añave mano güinoi mbaepuere yanderé mbaeyoa jeco pegua. Jare mboroyocui uicuaaca mbaeyoa. ⁵⁷ Ërei ñamee yasurupai Tumpa pe. Echa'ã jae umiamiri mano yandeve yandeYa Jesucristo rupi.

⁵⁸ Jáeramo, cherivi reta aau vae, piñemiatangãtu jare piñemimirãta. Jecuaeño tanta peparaviqui yandeYa pe. Echa'ã picuaa quirã peparaviqui yave yandeYa pe, yandeYa umbijecoviata peve.

16

Corepoti umbatita oporombori vaerã

¹ Añave tamimbeu peve quirãi pembati vaerã corepoti pembori vaerã Ìru uñeñono tee Tumpa peguarã vae reta. Ayocui ma cua re upurugüirovia vae reta Galicia rupi uyembatimbati vae. Jae ramiño vi pe reta piyapo jucuarã. ² Domingomingo pe penti penti piñuvatu corepoti Tumpa pempupuere rupi, agüiye vaerã pembati che aa pepi yave ramo. ³ Jare che aa avãe yave pepi, ameeta tupapire reta piparavo vae reta pe jare amondota reta Jerusalén pe güiraa vaerã corepoti pemeeta vae. ⁴ Jare icavi yave cheve che vi aa vaerã, jae reta yugüiraata cherupie.

Pablo ipia pe uyemingueta uyapo vaerã vae re

⁵ Jare che aata pepi, Macedonia rupi aasa yave. Echa'ã aasata co Macedonia rupi. ⁶ Jare aramo apitata pe reta ndive. Aramo apitata pepi ambiasa opaete roi ara reta, pe reta chembori vaerã aa ye yave icoti'ã perenta güi. ⁷ Aipota'ã apou pepi michi peguaño. Echa'ã aipota apita pepi ima pegua, yandeYa uipota yave. ⁸ Ërei apitata cua pe Efeso pe Pentecostés ara ou uvãe regua. ⁹ Echa'ã ime cua pe jeta mbaraviqui chepuere ayapo yandeYa pe vae, jare ime vi jeta oyovaicho yandeYa iparaviqui ndive vae reta.

¹⁰ Ërei Timoteo oo yave pepi, piyandareco cavi jese, ipiagüive oĩ vaerã pepite pe. Echa'ã jae vi uparaviqui yandeYa pe, che ayapo ramí. ¹¹ Agüiye quía tugüirõ. Ërei outa yave checoti perenta güi, pembori ou vaerã checoti ipiacatu reve. Echa'ã aipota jae ou vaerã chepi Ìru yanderivi reta jupie.

¹² Tamimbeu peve yanderivi Apolos. Chequirëi ete jae oo vaerã pepi Ìru yanderivi reta jupie. Ërei uipota'ã etei oo pepi añave. Ërei oota co jae ipuere yave.

Saludo reta

¹³ Piñemoa, pepirãta pepurugüirovia re, piyembucumbae, piñemiatangãtu. ¹⁴ Opaete piyapo vae piyapo pepuruau reve.

¹⁵ Añave, cherivi reta, pe reta picuaa quirãi Estéfanos jenta pegua reta rani güirovia Cristo re Acaya pe, jare quirãi jae reta jecuaeño uparaviqui tanta uyeyocui vaerã Ìru uñeñono tee Tumpa peguarã vae reta pe. ¹⁶ Jáeramo aipota pe reta piyeyocui vaerã cua nunga pe, jae reta

peocui yave, jare vi piyeyocui vaerã opaete orembori vae reta jare uparaviqui yandeYa pe vae reta pe, jae reta peocui yave. ¹⁷ Ayerovia Estéfanos jare Fortunato jare Acaico yugüeru chepi vae re. Echa'ã jae reta uyapo cheve icavi vae pe reta pepuere'ã piyapo cheve vae. ¹⁸ Echa'ã jae reta chembiyerovia co. Jae ramiño vi jae reta pembiyerovia. Jáeramo pepuere pipiu cua nunga reta.

¹⁹ Upurugüirovia vae reta Asia rupi uyembatimbati vae jei peve Tumpa ndiveño peĩ. Aquila jare Priscila jare upurugüirovia vae reta uyembati jae reta jenta pe vae jei vi peve Tumpa ndiveño peĩ yandeYa re perovia ramo. ²⁰ Opaete yanderivi reta jei peve Tumpa ndiveño peĩ. Saludo reta piyapo piyupe yave, piñecuãva piyerau reve.

²¹ Che aicutia cua chepo pe etei. Che vi jae peve Tumpa ndiveño peĩ.

²² Ime yave quia uau'ã yandeYa Jesucristo vae, Tumpa uiporaracata chupe. YandeYa outa.

²³ YandeYa Jesucristo tumee peve ipiacavi. ²⁴ Chepuruau toĩ opaete pe reta perovia Cristo Jesús re vae ndive. Amén.

SEGUNDA CARTA DEL APOSTOL SAN PABLO A LOS CORINTIOS

¹ Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo vi ime cua pe oī che ndive. Aicuatía cua tupapire opaete pepurugüirovia vae Corinto pe piyembati vae reta pe, jare opaete İru uñeño tee Tumpa peguarā vae opaete Acaya rupi ñugüinoi vae reta pe. ² YandeRu Tumpa jare yandeYa Jesucristo tumee peve ipiacavi jare ipiacatu.

Pablo uiporara

³ Yambiadora Tumpa. Jae co yandeYa Jesucristo Tu. Jae co yandeRu vi. Jae yandeparareco. Jae jecuaeño yanembipiacatu. ⁴ Echa'ā jae jecuaeño yanembipiacatu yaiporara yave, yandepuere vaerā yambipiacatu İru uiporara ñugüinoi vae reta. Echa'ā jucarāi vi Tumpa yanembipiacatu. ⁵ Echa'ā yaiporara ete yave Cristo re yarovia ramo, yandepiacatu ete vi Cristo rupi. ⁶ Jare ore nduiporara yave, nduiporara co pe reta penoi vaerā mbiacatu jare yembiasa. Jare Tumpa yanembipiacatu yave, jucarāi uyapo pe reta penoi vaerā mbiacatu jare yembiasa. Jare jucarāi pepuere pemiaguanta pepiaguasu reve piporara yave ore nduiporara rami. ⁷ Jare jecuaeño ndugüirovia catu peré pemiaguanta vaerā. Echa'ā nduicuaa quirāi pe reta vi piporara ore nduiporara rami. Jae ramiño vi nduicuaa quirāi Tumpa pembipiacatu orembipiacatu rami.

⁸ Echa'ā nduipota picuaa vaerā, cherivi reta, quirāi nduiporara Asia pe nduico yave. Nduiporara ete. Orepuere'ā seri numiaguanta. Jáeramo orepia pe nduyemingueta tēi numanota co. ⁹ Añete co, orepia pe nduyemingueta tēi Tumpa umaeñota co oreré numano vaerā. Ērei jucarāi Tumpa uicuaaca oreve orepuere'ā co nduyeco orembaepuere rei, jaeño orepuere nduyeco Tumpa re. Echa'ā Tumpa ipuere umbijecove ye umanocue vae reta. ¹⁰ Echa'ā jae orerepi numano seri yave, jare jecuae orerepi mano güi. Jae ramiño vi ndugüirovia orerepi yeta co. ¹¹ Pe reta vi pepuere orembori. Echa'ā pepuere piyerure Tumpa pe oreré. Jare jucarāi yave, jeta vae umeeta yasurupai Tumpa pe jae uyapota oreve vae re. Echa'ā Tumpa uyapota co oreve, jeta vae uyerureta chupe oreré ramo.

Maera Pablo uipota oo Corinto pe

¹² Echa'ā ore nduico cavi upurugüirovia mbae vae reta ipite pe jare pepite pe vi, Tumpa orembori ramo. Ndupurumbitavi'ā etei. Jare cuarāi nduico Tumpa ipiacavi rupi, nduico'ā orearacuaa rupiño. Jare nduicuaa cua añete co. Jáeramo nduyerovia. ¹³ Echa'ā peminguenta ramiño nduicuatía peve. Jare pepuere picuaa cavi nduicuatía peve vae. Jare aipota jecuaeño picuaa cavi vaerā. ¹⁴ Añete co, amocue pe reta orecuaa cavi ma. Echa'ā pe reta piyerovia oreré. Jae ramiño vi ore nduyeroviata peré yandeYa Jesús ivæ ara pe.

¹⁵ Jare cua aicuaa cavi ramo, aipota tēi aa rani pepi, che pumbiyerovia vaerā tēi mocui vese. ¹⁶ Echa'ā aipota tēi apou pepi Macedonia pe ayu yave, jare apou ye pepi Macedonia güi aa ye yave, pe reta pepuere vaerā chembori aa ye yave perenta güi Judea coti. ¹⁷ Jare chepia pe ayemingueta yave jucarāi ayapo vaerā, chepia pe ayeminguetaiño'ā co jese. Echa'ā chepia pe ayemingueta yave mbae ayapo vaerā, chepia pe ayemingueta'ā che jae vae rupiño. Che jae yave: "Ayapota co", ndarau jae voi ye: "Ayapota'ā." ¹⁸ Tumpa vi uicuaa quirāi ore ndoe yave: "Nduyapota co", ndarau ndoe voi ye: "Nduyapota'ā." ¹⁹ Echa'ā Tumpa Tai jae co Cristo Jesús - che jare Silvano jare Timoteo numimbeu peve vae jei yave: "Ayapota co", ndarau jei voi ye: "Ayapota'ā." Jaeño jae jei: "Ayapota co." ²⁰ Echa'ā opaete Tumpa jei uyapota vae Cristo uyapota co. Jáeramo orepuere ndoe: "Amén", Tumpa pe Cristo rupi, jare jucarāi numbiadora Tumpa. ²¹ Jare Tumpa oremimiráta Cristo rupi jare oreño tee nduyapo vaerā iparaviqui. Jae ramiño vi Tumpa pemimiráta. ²² Jare Tumpa umee ma yandeve Espiritu Santo, uicuaaca vaerā yande jae imbae co, jare Espiritu Santo yandepia pe ico ramo, yaicuaa jeta ete co Tumpa umeeta yandeve.

²³ Jare ndeiño aa Corinto pe agüiye vaerā añeengata peve. Tumpa uicuaa cua amimbeu peve vae añete co. ²⁴ Nonoi'ā etei mbaepuere pepurugüirovia re. Echa'ā pepirāta ma pepurugüirovia re. Jaeño nduipota pombori, pe reta piyerovia vaerā.

2

¹ Jáeramo che jae chiyupe ndarau aa ye pepi chepiatiti reve. ² Echa'ā che pumbipiatiti yave, ¿quia ra co chembiyeroviata? Pe retaño co. Ērei che pumbipiatitita tēi, aa pepi yave. ³ Jáeramo aicuatía peve, agüiye vaerā pe reta chembiyerovia vaerāve chembiatiti, aa pepi yave. Echa'ā che arovia che ayerovia yave, pe reta vi piyeroviata co. ⁴ Echa'ā aicuatía peve

ayao reve, chepiatiti ramo. Ayandu chepia pe. Aipota'ã pepiatiti vaerã. Ërei aipota picuaa vaerã quirã tuicha ete co chepurua pecoti.

Pembiasa icavi mbae vae uyapo vae pe

⁵ Jocua iyoa vae cheño'ã chembipiatiti. Amocue pe reta vi pembipiatiti. ⁶ Jeta ma pe reta piporaraca chupe. Jáeramo agüiye ma piporaraca ye chupe. ⁷ Añave icavi co pembiasa vaerã chupe. Icavi co añave pembipiacatu vaerã. Agüiye ma piporaraca ye chupe. Echa'ã piporaraca ye yave chupe, aramoi uyapota mbae icavi mbae vae, ipiatiti ete ramo. ⁸ Jáeramo che pumiñera pemimbeu vaerã chupe quirã jecuaeño co peau vae. ⁹ Echa'ã cua jeco pegua aicutia peve, aicuaa vaerã mbae ra piyapota. Aipota aicuaa piyapota ra opaete che jae peve piyapo vaerã vae. ¹⁰ Pe reta pembiasa yave quia pe mbae, che vi ambiasa chupe. Echa'ã jocua ambiasa quia pe vae, ime yave mbae ambiasa vaerã quia pe vae, ambiasa co chupe peré Cristo jovai. ¹¹ Yaipota'ã Satanás ñanemiamiri vaerã. Echa'ã yaicuaa cavi co mbae jae uipota uyapo vae.

Pablo uyempia'ã Troas pe

¹² Jare che aa avãe yave Troas pe amimbeu vaerã ñee icavi vae Cristo regua, yepe tẽi yandeYa umee cheve aparaviqui cavi vaerã chupe, ¹³ Ërei chepiacatu'ã etei avãe'ã yanderivi Tito joco pe ramo. Jáeramo che jae Troas pegua reta pe aa yeta co, jare ayu chugüi reta Macedonia coti.

Ñapurumiamiri Cristo rupi

¹⁴ Yasurupai numee Tumpa pe. Echa'ã jae jecuaeño orembori ndupurumiamiri vaerã Cristo rupi, jare umee oreve ñee icavi vae nduicuaaca vaerã opaete que rupi, mbae ipiche cavi vae uñeetu opaete que rupi rami. ¹⁵ Numimbeu yave ñru vae reta pe Cristo regua, numbierovia Tumpa, mbae ipiche cavi vae yanembierovia rami. Jare numimbeu uyembiasaca vae reta pe jare ucañiteita vae reta pe, mbae ipiche cavi vae uñeetu opaete que rupi vae rami. ¹⁶ Echa'ã numimbeu yave ucañiteita vae reta pe, mbae ipiche cavi vae amijaanga oreré vae uyeyapo mbayachi quia upuruyuca pipe vae rami. Jae ramiño vi numimbeu yave uyembiasaca vae reta pe, jae uyeyapo mbae tecove umee vae rami. Jare mbaeti quia ipuere jaeiño uyapo cua mbaraviqui. ¹⁷ Echa'ã jeta vae uiporu Tumpa ñee umingana vaerã mbaembae iyupeguarã. Ërei ore jae reta rami'ã co. Ore numimbeu cavi Tumpa ñee Tumpa oreocui numimbeu vaerã rami. Oremiari Tumpa jovaque Cristo re ndugüirovia ramo.

3

Trato ipiau vae

¹ Aramoi pe reta pepia pe piyemingueta tẽi ore numbipi ye nduyembutuicha. Jucuarã'ã co. Pipota'ã ndipo ndugüeru vaerã peve tupapire reta nduicuaaca vaerã peve quia co ore. Pipota'ã ndipo pemee oreve tupapire reta nduicuaaca vaerã ñru vae reta pe quia co ore. Echa'ã ñru vae reta güinoi jocua nunga tupapire. ² Nduyembutuicha'ã co. Echa'ã pe reta co jae oretupapire rami uyecuatia oñ orepia pe vae rami. Opaete vae ipuere perecha uicuaa vaerã quia co ore, penti tupapire ipuere umingueta rami. ³ Echa'ã opaete vae ipuere uicuaa quirã pe reta co jae penti tupapire Cristo güi ore ndugüeru vae rami. Ërei pe reta co penti tupapire Tumpa imeño mai ico vae iEspiritu pe uyecuatia vae rami, mbaeti co penti tupapire tinta pe uyecuatia vae rami. Tumpa uicuatia ñee pepia re etei. Uicuatia'ã ita reta re.

⁴ Jare cuarã orepuere ndoe peve, ndugüirovia catu Tumpa Cristo rupi ramo. ⁵ Oreiño orepuere'ã etei mbae nduyapo. Ërei Tumpa umee oreve imbaepuere. ⁶ Jae ramiño vi Tumpa umee oreve mbaepuere, nduyeyocui cavi vaerã chupe trato ipiau vae re. Cua trato ipiau vae Espiritu pegua co, mboroyocui uyecuatia oñ vae pegua'ã co. Echa'ã mboroyocui uyecuatia oñ vae jei vae uyapo'ã vae umanota co. Ërei Espiritu Santo umee yandeve opa mbae vae.

⁷ Jocua mboroyocui uyecuatia oñ ita reta re vae uñemee Moisés pe yave, Tumpa uñembipe Moisés iárambo. Jáeramo Israel pegua reta ipuere'ã umaen ngatu Moisés jova re. Echa'ã Moisés jova jembipe ete. Ërei yepe tẽi mboroyocui jei vae uyapo'ã vae umanota co, Ërei uñemee Moisés jova jembipe ete reve. Ërei jocua jembipe vae ima'ã ico. ⁸ Jáeramo jocua ñee Espiritu Santo güeru yandeve vae icavi ete mboroyocui jei vae güi. ⁹ Echa'ã yepe tẽi mboroyocui jei vae uyapo'ã vae umanota co, Ërei icavise. Jáeramo icavi ete ma jocua güi ñee uicuaaca yandeve Tumpa yanembujupi co vae. ¹⁰ Echa'ã tenonde yave Tumpa uipiuca mboroyocui. Ërei ucañi ma mboroyocui imbaepuere. Echa'ã cua añave Tumpa uipiuca ma

vae icavi ete chugüi. ¹¹ Echa'ã jocua mboroyocui ita reta re uyecatía vae icavise, yepe tēi uyembai ma. Jáeramo jocua taicuegua vae icavi ete chugüi, echa'ã ndarau opa.

¹² Jare cua ndugüirovia ramo, numimbeu cavi peve opaete. ¹³ Nduyapo'ã Moisés uyapo rami. Echa'ã jae umbiyasoi jova penti tarapo pe, agüiye vaerã Israel pegua reta umae ngatu jova re. Echa'ã uipota'ã Israel pegua reta uecha vaerã quirãi ove jocua jova re jembipe vae. ¹⁴ Ërei Israel pegua reta uicuaa cavi'ã. Echa'ã jecuaño iyaracuaa uyeasoi oï, Moisés jova tarapo pe uyeasoi rami. Jáeramo uicuaa cavi'ã, trato indechi vae umingueta yave. Ërei jocua trato indechi vae Cristo umbai ma. ¹⁵ Ërei Moisés uicuatía vae umingueta yave, jecuaño ime oï jocua iyaracuaa uyasoi vae. ¹⁶ Ërei yandeYa coti uyerova yave, yeeequita jocua iyaracuaa uyasoi vae. ¹⁷ Jare yandeYa oyovaque Espíritu Santo ndive. Jare ime yave quia güinoi yandeYa iEspíritu vae, ipuere iyaracuaa catu. ¹⁸ Jare yande co jova uyasoi mbae vae rami co. Jáeramo yande co jae penti espejo rami. Echa'ã iru vae reta ipuere uicuaa yandeYa regua, umae yave yanderé. Jare yande ñamae ngatu yandeYa re ramo, jecuaño yandeYa iEspíritu uparaviqui yandepia pe, ñai vaerã yandeYa rami.

4

¹ Jáeramo orecuri'ã. Echa'ã Tumpa oreparareco jare umee oreve nduyeyocui vaerã chupe. ² Nduyapo'ã etei iru vae reta uyapo viari imara ramo vae. Nduyapo'ã etei mbae ndupurumbitavi vaerã. Ndorova'ã vi Tumpa ifnee. Jaeño numimbeu iru vae reta pe añete vae, jare jucuarãi opaete vae ipuere uicuaa quirãi ore nduico cavi Tumpa jovaque. ³ Amocue vae jei ipuere'ã uicuaa cavi ñee icavi vae ore numimbeu vae. Ërei jucuarãi jei, jae reta ucañiteita ramo. ⁴ Echa'ã jae reta güirovia'ã Tumpa. Jáeramo cua ivi pegua reta iya umipitumimbi iyaracuaa, agüiye vaerã uicuaa cavi ñee icavi vae Cristo uyembidora vae regua. Cristo co jae Tumpa etei cuimbaerã uyeyapo vae. Echa'ã ñee icavi vae penti tembipe yanemiembipe vae rami co. ⁵ Ore nuñemiñee yave, numimbeu yandeYa Cristo Jesús, oremiari'ã co oriye. Echa'ã ore co jae perembiocui retaño, Jesús nduau ramo. ⁶ Echa'ã opaete pitumimbi yave, Tumpa jei tome toï tembipe. Jae ramiño vi Tumpa umiembipe orepia pe penti tembipe rami, nduicuaa vaerã quirãi jae uyembidoraca ete. Tumpa imbaepuere uyecuaa Jesucristo rupi.

Mburugüirovia rupi yaico

⁷ Jare cua icavi ete vae ime Tumpa güi nonoi vae ico orerete pe, yepe tēi orerete ivi pegua co, uyecuaa vaerã cua mbaepuere tuicha ete vae ime nonoi vae Tumpa imbaepuere co, orembaepueri'ã co. ⁸ Opaete que rupi nduiporara, Ërei jecuaño orepuere nduparaviqui Tumpa pe. Nduicuaa'ã mbae nduyapo vaerã, Ërei jecuaño Tumpa uicuaaca oreve. ⁹ Iru vae reta uyapo icavi mbae vae oreve, Ërei jecuaño Tumpa ime oï ore ndive. Numano seri, Ërei jecuaño Tumpa umee oreve tecove. ¹⁰ Opaete que rupi nduquiy'e'ã numano vaerã Jesús umano rami, uyecuaa vaerã oreverete re tecove Jesús ime güinoi vae. ¹¹ Echa'ã yepe tēi imeño noï, Ërei jecuaño nduquiy'e'ã numano vaerã Jesús nduau ramo, uyecuaa vaerã orerete umanota vae re tecove Jesús ime güinoi vae. ¹² Jáeramo jecuaño nduiporara ete nduico, pe reta penoi vaerã tecove opa mbae vae.

¹³ Orepurugüirovia oyovaque co jocua mburugüirovia yamingueta jese vae ndive. Echa'ã Tumpa ifnee pe uyecatía oï cuarãi: “Che arovia. Jáeramo chemiari jese.” Jucuarãi uyecatía oï. Jae ramiño vi ore ndugüirovia. Jáeramo oremiari jese. ¹⁴ Jare nduicuaa Tumpa umbijecove ye co yandeYa Jesús güeru umanocue vae reta ipite güi. Jae ramiño vi nduicuaa Tumpa orembijecove yeta co orereru umanocue vae reta ipite güi nduico vaerã Jesús ndive, jare oreñonota pe reta ndive jae jovai. ¹⁵ Echa'ã opaete nduiporara, orepuere vaerã pombori, jare Tumpa ipiacavi oï vaerã jeta vae ndive. Echa'ã jucuarãi yave, jeta vae umeeta yasurupai Tumpa pe, jare jucuarãi Tumpa uyembidoracata.

¹⁶ Jáeramo orecuri'ã. Echa'ã yepe tēi orerete pe jecuaño nduiporara, Ërei Tumpa jecuaño umee oreve imbaepuere. ¹⁷ Echa'ã yaiporara vae michi ete jare michi peguaño co. Jare yaiporara yave, Tumpa umeeta yandeve yerovia tuicha ete vae ndarau etei opa vae. ¹⁸ Jáeramo yandepia pe yayemingueta'ã mbaembae yandepuere yaecha vae re. Yandepia pe yayemingueta mbaembae yandepuere'ã yaecha vae re. Echa'ã mbaembae yandepuere yaecha vae opata co. Ërei mbaembae yandepuere'ã yaecha vae ndarau etei opa.

5

¹ Echa'ã yaicuaa yanderete umanota co. Jae co penti tenta ima'ã ico vae rami. Ërei Tumpa umeeta yandeve yanderete ipiau vae. Jae co penti tenta Tumpa uyapo vae rami. Jare cua Tumpa umeeta yandeve vae ara pegua co, ivi pegua'ã co, jare ndarau etei opa. ² Echa'ã cua yanderete pe yaico rambueve, yaiporara, jare yaipota ete ñanoi yanderete ipiau vae penti tenta Tumpa uyapo vae rami. ³ Jare Tumpa umee yave yandeve yanderete ipiau

vae, ndarau etei ñaï yanderete mbae reve. ⁴ Echa'ã cua yanderete pe yaico rambueve, yaiporara co, yavai ete yandeve ramo. Ërei yaipota'ã ñaï yanderete mbae reve. Yaipota ñanoi yanderete ipiau vae, ñanoi vaerã tecove opa mbae vae, agüiye vaerã ñamano. ⁵ Jare cuarã Tumpa uparaviqui yandepia pe, jare umee ma yandeve Espiritu Santo uicuaaca vaerã yandeve jocua umeeta yandeve vae.

⁶ Jáeramo jecuaeño yayerovia. Echa'ã yaicuaa cua ivi pe yaico rambueve, ndei ñaï yandeYa ndive. ⁷ Echa'ã yaico yandeYa re yandepurugüirovia reve. Ërei ndeiño yaecha. ⁸ Ërei jecuaeño yayerovia. Jare ñanequirëi yaeya yanderete, ñaï vaerã yandeYa ndive. ⁹ Jáeramo jecuaeño yaipota yambiyerovia yandeYa cua ivi pe yaico rambueve jare jae ndive ñaï ma yave. ¹⁰ Echa'ã opaete vae ñaïta Cristo jovai, jae ñanerã vaerã. Jare Cristo umbijecoviata penti penti pe cua ivi pe ico rambueve uyapo vae. Jae umbijecoviata icavi vae uyapo vae jare icavi mbae vae uyapo vae pe.

Umimbeu quirãiyayembipiacatu Tumpa ndive

¹¹ Jáeramo ore nduparaviqui ñru vae reta güirovia vaerã yandeYa re. Echa'ã nduicuaa yandeYa orerãata co. Ërei Tumpa uicuaa maera nduyapo opaete nduyapo vae. Jae ramiño vi aipota pe reta picuaa vaerã cua. ¹² Ndoe'ã co peve cua nduyembicate vaerã. Ërei nduipota pe reta picuaa vaerã cua, pepuere vaerã pepimaina orecoti. Echa'ã jucuarãiyave, pepuere pemiari cua re ñru vae reta pe, jae reta uyembicate yave. Echa'ã jae reta uyembicate mbae uyecuaa vae re. Uyembicateta tã co ipia pe güinoi vae re. ¹³ Aramoi ñru vae reta jeita orembiquere co. Ërei jaeño nduipota numbiadora Tumpa. Ërei jei reta yave ore orearacuaa co, icavi co peve. ¹⁴ Echa'ã Cristo orerau ramo, orequirëi ete nduyeyocui chupe. Echa'ã nduicuaa cavi Cristo umano opaete yanderë. Jáeramo opaete yande ñamano vi yaicose vae güi. ¹⁵ Jare Cristo umano opaete vae re, yande jecuaeño yayeyocui vaerã chupe yaico rambueve cua ivi pe, agüiye vaerã yaico yandiyepe vaerãño. Echa'ã Cristo umano yanderë jare icove ye ou umanocue vae reta ipite güi. ¹⁶ Jáeramo añave güive ndarau yandepia pe yayemingueta ñru vae re jae co ivi peguaño. Yepe tã yaicuaa quirãiyave Cristo ico cua ivi pe, Ërei añave güive ndarau yandepia pe yayemingueta jese jocua re. ¹⁷ Jáeramo ime yave quia güirovia Cristo re vae, Tumpa umee chupe tecove ipiau vae. Uipotã ma mbaembae tenonde yave uipota vae. Uipota ma mbaembae tecove ipiau vae pegua.

¹⁸ Jare Tumpa uyapo opaete cua. Jare jae yanembipiacatu jae ndive Cristo rupi, jare umee yandeve yamimbeu vaerã ñru vae reta pe quirãiyave uipotã umbipiacatu reta jae ndive. ¹⁹ Cua uipotã jei Tumpa umbipiacatu jae ndive opaete ivi pegua reta Cristo rupi, agüiye vaerã umbijeco reta imbaeyoa reta re. Jare Tumpa umee yandeve yamimbeu vaerã ñru vae reta pe quirãiyave uipotã umbipiacatu reta jae ndive. ²⁰ Jáeramo Cristo yanemondo jae ipepica pe. Jare ñanemiari yave, jae co Tumpa imiari oï yande rupi. Echa'ã Tumpa uipotã umbipiacatu ñru vae reta jae ndive. Jáeramo yande ñamifiera ñru vae reta Cristo jee re uyembipiacatu vaerã Tumpa ndive. ²¹ Cristo iyoa'ã etei. Ërei Tumpa uiporaraca chupe opaete yanembaeyoa re, Tumpa ipuere vaerã yanembujupi yarovia Cristo re yave.

6

¹ Ore nduparaviqui Tumpa ndive. Jáeramo ore pumiñera agüiye vaerã piyuvanga Tumpa ipiacavi re. ² Echa'ã Tumpa jei ñnee uyecuatã oï vae pe cuarãiyave:

“Chepiacavi ramo, ayapisaca nderë.

Che nduepi jocua ara ndiyembiasaca yave.”

Jucuarãiyave. Mase, añave Tumpa ipiacavi. Añave ara co yembiasa pegua.

³ Jecuaeño nduico cavi, agüiye vaerã quia numbiavai. Jucuarãiyave nduico, agüiye vaerã ñru vae reta jei: “Jocua Tumpa jembiocui reta uyapo icavi mbae vae.” ⁴ Jecuaeño nduipota nduicuaaca ñru vae reta pe quirãiyave nduyeyocui cavi Tumpa pe. Echa'ã orepiaguasu. Nduiporara ete. Jecuaeño uata mbaembae oreve. Yavai co nduico vaerã. ⁵ ñru vae reta orenupa jare oreñoño peresoriru pe. ñru vae reta uyapo tecorai orerë. Tanta nduparaviqui. Amo pe ndoe'ã. Amo pe mbaeti orerembiurã. ⁶ Nduyapo'ã mbae pichüi vae ñru vae reta coti. Nduicuaaca añete vae ñru vae reta pe. Numiaguanta ñru vae reta uyapo icavi mbae vae oreve yave. Orepiacavi ñru vae reta pe. Jecuaeño Espiritu Santo orembori. Añetete nduau ñru vae reta. ⁷ Numimbeu ñru vae reta pe ñee añete vae, jare Tumpa orembori imbaepuere pe. Jecuaeño nduyapo jupi vae, amocue vae güirovia vaerã Cristo re, jare agüiye vaerã ñru vae reta ipuere orembijeco mbae re. ⁸ Amocue vae orepiu, jare amocue vae orereriro. Amocue vae jei mbaembae icavi vae orerë, jare amocue vae jei mbaembae icavi mbae vae orerë. Yepe tã ñru vae reta jei ore co jae upurumbitavi vae reta, jecuaeño ndoe añete vae. ⁹ ñru vae reta orecuaa'ã. Ërei Tumpa orecuaa cavi. Numano seri aveiño, Ërei jecuaeño noï. ñru vae reta orenupa, Ërei ndeiño oreyuca. ¹⁰ Orepiatiti, Ërei jecuaeño nduyerovia. Oreparavete,

ĕrei jeta ĩru vae reta güirovia Cristo re ore rupi. Mbovi ete mbaembae ivi pegua nonoi, ĕrei ime nonoi jeta ete Tumpa umee oreve vae.

¹¹ Numisimi oremiari peve, Corinto pegua reta. Picuaa ma quirāi ore puau vae. ¹² Yayerau'ā yave, ore nonoi'ā teco. Pe reta co penoi teco. ¹³ Tachemiari peve penti tu imiari isambiai reta pe rami. Ore puau ramo, pe reta vi picuaaca oreve quirāi pe reta orerau.

Agüiye piñemĩru upurugüirovia mbae vae reta ndive

¹⁴ Agüiye piñemĩru upurugüirovia mbae vae reta ndive. Echa'ā upurugüirovia mbae vae reta ipiyemingueta oyovaque'ā upurugüirovia vae reta ipiyemingueta ndive. Echa'ā jupi vae oyovaque'ā etei jupi mbae vae ndive. Jae ramiño vi tembipe jare piñumimbi ipuere'ā etei yugüireco päve. ¹⁵ Cristo uñemĩru'ā etei Satanās ndive. Jae ramiño vi upurugüirovia vae ico'ā upurugüirovia mbae vae ico rami. ¹⁶ Icavi'ā etei tumpa-raanga reta ñugüinoi vaerā Tumpa ico vae pe. Jare pe reta co jae Tumpa ico pipe vae rami. Echa'ā Tumpa jei cuarāi:

“Aicota jare aguatata ipite rupi.

Aicota jae reta iTumparā,

jare jae reta yugüirecota chembaerā.”

Jucuarāi jei Tumpa imeño mai ico vae. ¹⁷ Jáeramo jae jei vi peve cuarāi:

“Jáeramo pesiri icavi mbae vae uyapo vae reta ipite güi.

Agüiye ye ma piñemĩru jae reta ndive.

Agüiye piyapo icavi mbae vae jae reta uyapo rami.

Jare che pumbiresiveta.

¹⁸ Jare che aicota peRurā,

jare pe reta picota cherairā jare cherayirā.”

Jucuarāi jei yandeYa opaete mbaepuere güinoi vae.

7

¹ Tumpa umimbeu ma yandeve opaete cua jei uyapota vae. Jáeramo, cherivi reta, aicutía peve cuarāi: Agüiye ma yayapo icavi mbae vae yanderete pegua jare yanderecove pegua. Jecuaeño ñañeño tee Tumpa peguarā yaquiye reve Tumpa güi.

Pablo uyerovia Corinto pegua reta uyapo vae re

² Picuaaca oreve quirāi co orerau. Ore nduyapo'ā etei mbae icavi mbae vae ipotave vae pe. Jae ramiño vi nduyapoca'ā etei mbae icavi mbae vae ipotave vae pe. Ndupurumbitavi'ā etei. ³ Jae'ā peve cua pumbijeco vaerā. Echa'ā che jae ma peve quirāi ore puau ete. Jáeramo ñamano yave ani jecuae yaico yave, ipuereta'ā mbae uequi cua mburuau orepia güi. ⁴ Amisimi chemiari peve, jare ĩru vae reta pe chemiari yave ayerovia ete peré. Yepe tēi nduiporara ete noĩ, Tumpa jecuaeño chembipiacatu jare ayerovia ete.

⁵ Macedonia pe ndoyu nuvāe güive, orepuere'ā etei nduputu opaete nduiporara vae güi. ĩru vae reta oyovaicho ore ndive oreminguiye vaerā. ⁶ Ĕrei Tumpa umbipiacatu ipiatiti vae reta. Jáeramo jae orembipiacatu Tito ou yave uvāe orepi. ⁷ Jare orepiacatu'ā Tito ou uvāe orepi vae reño. Orepiacatu ete vi nducuaa yave quirāi pe reta pembipiacatu Tito. Echa'ā jae umimbeu oreve quirāi pe reta pipota ete cherecha vaerā, jare quirāi pepiatiti ete jocua uyeyapo vae re, jare quirāi pipota ete chembierovia. Jáeramo che ayerovia ete peré.

⁸ Aicuaa yave quirāi che pumbipiatiti aicutía peve vae pe, che vi chepiatiti, yepe tēi mbovi ara rupiño pepiatiti. Ĕrei añave chepiatiti'ā, yepe tēi che pumbipiatiti aicutía peve vae pe. ⁹ Añave ayerovia. Ĕrei ayerovia'ā pepiatiti ramoño. Echa'ā pepiatiti ramo, peeya piyemingueta icavi mbae vae pepia pe oĩ vae. Jare cua jeco pegua ayerovia ma. Echa'ā mbiatiti penoi vae icavi Tumpa pe. Jáeramo ore nduyapo'ā co mbae icavi mbae vae peve. ¹⁰ Echa'ā mbiatiti ñanoi vae icavi yave Tumpa pe, yaeya yandiyemingueta icavi mbae vae yandepia pe oĩ vae, jare Tumpa yanderepi. Jare cua re ndarau yandepiatiti. Ĕrei yandepiatiti yave upurugüirovia mbae vae reta ipiatiti rami, Tumpa yanderepita'ā tēi. ¹¹ Echa'ā picuaa ma quirāi piñemiatangātu ete Tumpa coti, mbiatiti penoi vae icavi Tumpa pe ramo. Echa'ā pipota picuaaca cheve pe reta penoi'ā co teco. Pepochi jocua mbaeyoa re, jare pequiye vi jese. Pipota ete cherecha vaerā. Pipota ete vi piyapo che amimbeu peve piyapo vaerā vae. Echa'ā pipota piporaraca icavi mbae vae uyapo vae pe. Aicuaa ma quirāi mbaeti etei teco penoi cua uyeyapo vae re. ¹² Aicutía peve yave, aicutía'ā icavi mbae vae uyapo vae jeco peguaño, jare aicutía'ā vi icavi mbae vae uyeyapo chupe vae jeco peguaño. Ĕrei aicutía peve picuaa vaerā quirāi pe reta orerau ete co Tumpa jovaque. Echa'ā cuarāi Tumpa uyembidoracata co. ¹³ Jáeramo Tumpa orembipiacatu ma. Jare nduyerovia ete Tito uyerovia peré vae re. Jare jucuarāi Tumpa orembipiacatu. Echa'ā pe reta pembierovia Tito. ¹⁴ Echa'ā chemiari cavi Tito pe peré, jare chemarā'ā jocua re. Opaete ndoe peve

vae añete co. Jae ramiño vi Tito uicuaa ma añete co jocua che jae chupe peré vae. Echa'á chemiari cavi chupe peré. ¹⁵ Jare Tito perau ete ma. Echa'á imandúa quirái piyapo jae jei peve piyapo vaerá vae, jare quirái pembiresive cavi pipiu reve jare piñemimichi reve. ¹⁶ Jáeramo ayerovia peré. Echa'á opaete pe chepuere pugüirovia catu.

8

Corepoti umbati oporombori vaerá

¹ Añave aipota aicuaaca peve quirái upurugüirovia vae Macedonia pe uyembatimbati vae reta uicuaaca Tumpa ipiacavi uñemee chupe reta vae. ² Echa'á uiporara ramo, yavai ete chupe reta. Ērei uyerovia. Jare yepe tēi iparavete ete reta, ērei jeta umee, ombori vaerá ĩru upurugüirovia vae reta. ³ Chepuere amimbeu peve quirái jae reta umee che chepia pe ayemingueta icavi co umee vaerá vae. Añete co, umee reta jeta ete ye chepia pe ayemingueta icavi co umee vaerá vae güi. Jare umee reta che ayocui mbae reve. ⁴ Jare uyerure oreve numbiresive vaerá jocua uipota umee vae, jucuarái ipuere vaerá ombori ĩru uñeño tee Tumpa peguará vae reta. ⁵ Jare uyapo reta jeta ete ye ore nuáro tēi uyapota vae güi. Echa'á uñemee reta yandeYa pe uyeyocui vaerá. Añete co, umee reta jeta ete ye ore ombori vaerá Tumpa jei vae rupi. ⁶ Jáeramo numiñera Tito opa vaerá umbati pe reta pemeeta pepiacavi jeco pegua vae. Echa'á jae etei umbipi umbati. ⁷ Pepurugüirovia tuicha ete co. Icavi ete peporomboc. Jeta mbaembae picuaa. Peratangātu jare orerau ete. Opaete cua piyapo cavi. Jáeramo picuaaca vi quirái pepiacavi ete cua pemeeta vae re.

⁸ Cua che jae peve vae penti mboroyocui'á co. Ērei chemiari peve cuarái ĩru vae reta uipota umee ombori vaerá ĩru upurugüirovia vae reta ramo, jare cuarái piyapo yave, picuaacata pepuruau añetete co. ⁹ Picuaa cavi co quirái yandeYa Jesucristo uicuaaca ipiacavi. Echa'á yepe tēi jae icocatu ete, ērei uyembiparavete yanderau ramo, yande yaicocatu vaerá Tumpa coti.

¹⁰ Che pumbiaracuaa cua re cuarái: Icavi co piyapo vaerá cua. Echa'á penti año ma pe reta pipota tēi pembori vaerá, jare pembipi pembati pemee vaerá. ¹¹ Jáeramo añave jucuarái piyapo. Echa'á cue año pe pipota piyapo cua. Jáeramo añave opa piyapo cue año pe pipota piyapo vae. Pemee jocua penoi vae güi, pembori vaerá ĩru upurugüirovia vae reta. ¹² Echa'á yaipota yave ñamee ñanequirēi reve, Tumpa uipota ñamee vaerá ime ñanoi vae rupi. Tumpa uipota'á ñamee vaerá mbaeti yave ñanoi ñamee vaerá.

¹³ Echa'á aipota'á etei piyembiparavete vaerá ĩru vae reta yugüireco cavi vaerá. ¹⁴ Ērei aipota opaete vae oyovaque yugüireco vaerá. Añave pe reta pepuere pemee mbovi jeta penoi vae güi pembori vaerá mbaembae uata chupe vae reta. Jae ramiño vi jae reta jeta güinoi yave jare mbaembae uata peve yave, jae reta ipuereta umee peve mbovi jeta güinoita vae güi. Jáeramo jucuarái opaete vae oyovaque yugüirecota. ¹⁵ Echa'á Tumpa ñee pe uyecuatía oĩ cuarái: "Jocua jeta güinoi vae uasa'á mbae güinoi, jare jocua mboviño güinoi vae pe uata'á mbae." Jucuarái uyecuatía oĩ.

Tito jare ĩru reta

¹⁶ Ērei amee yasurupai Tumpa pe quirái jae umiatangātu Tito pecoti, oremiatangātu pecoti rami. ¹⁷ Echa'á Tito uipota uyapo ore nduipota uyapo vaerá vae. Ērei jatangātu ete pecoti ramo, jaeiño iquirēi oo pepi.

¹⁸ Jare nomondo jae jupie orerivi opaete upurugüirovia vae reta uyembatimbati vae pe uyemingueta cavi jese vae. Echa'á jae umimbeu cavi ñee icavi vae. ¹⁹ Jare jocua reño'á. Echa'á upurugüirovia vae reta uyembatimbati vae uiparavo, jae oo vaerá orerupie ombori vaerá cua mbaraviqui mbicacavi pegua re. Cua mbaraviqui nduyapo numbiadoraca vaerá yandeYa jare nduicuaaca vaerá quirái nduipota ndoporombori. ²⁰ Cuarái nduipota nduyapo, agüiye vaerá quía orembijeco cua jeta corepoti numbati opaete que rupi numee vaerá iparavete vae reta pe vae re. ²¹ Jecuaeño nduipota nduyapo jupi vae ĩru vae reta jovaque, yandeYa jovaqueño'á.

²² Jare nomondo vi jae reta jupie ĩru orerivi. Jeta vese ma jae uicuaaca oreve quirái jatangātu jeta mbaembae re. Jare añave jae jatangātu ete pererovia catu ramo. ²³ Ime yave quía upirandu Tito re vae, pepuere pere jae co cheiru jare uparaviqui co che ndive ore pombori vaerá. Ani upirandu yave ĩru orerivi reta re, pepuere pere upurugüirovia vae uyembatimbati vae reta omondo, jare jae reta umbiadoraca co Cristo. ²⁴ Jáeramo picuaaca chupe reta quirái peau. Jucuarái yave, ĩru upurugüirovia vae uyembatimbati vae reta vi uicuaata, jare jucuarái uicuaata añete co mbaembae icavi vae ndoe chupe reta peré vae.

9

Corepoti uyembatita vae

¹ Tamimbeu ye peve corepoti pambatita vae re. Cua corepoti rupi pepuereta pombori İru uñeño te Tumpa peguarā vae reta. Ērei cua picuaa ma che aicutiā mbae reve. ² Che aicutaa quirāi pipota ete piyapo cua. Echa'ā cua re chemiari cavi peré Macedonia pegua reta pe. Che jae chupe reta quirāi penti año ma pipota peporombori pe reta Acaya pe pico vae. Jare İru vae reta uyandu yave quirāi pe reta pipota peporombori, jae reta vi uipota oporombori. ³ Ērei amondo ma orerivi reta pepi, agüiye vaerā oremiariño peré cua re, jare pemicutāiro voi penoi vaerā corepoti, che jae ma rami. ⁴ Aramoi amocue Macedonia pegua reta yugüiraata cherupie, che aa yave pepi. Jare pambati'ā yave corepoti, jae reta uicutaa yave, oremarata. Echa'ā ndoe chupe reta quirāi pe reta pipota peporombori. Jae ramiño vi pe reta pamarata. ⁵ Jáeramo chepia pe ayemingueta icavi co ayocui vaerā orerivi reta jae reta rani yugüiraa vaerā pepi. Jucuarāi jae reta ipuereta pombori opa vaerā pambati corepoti tenonde yave pere pipota pemee vae. Jare jucuarāi yave, che aa yave pepi, uyecuaata quirāi pemee pepiacavi ramo, mbaeti ore poyocui ramoño. ⁶ Yamijaanga umaeti vae mbaembae pemee vae re. Pemandúa cua re: Mboviño oñoti vae mboviño uavirota. Jare jeta oñoti vae jeta uavirota. ⁷ Penti penti tumee iquirēi reve uipota umee rami. Agüiye quia tumee jacatēi reve ani che ayocui ramoño. Echa'ā Tumpa uau uyerovia reve umee vae. ⁸ Jare Tumpa ipuere umee peve jeta mbaembae ipiacavi jeco pegua, agüiye vaerā mbae uata peve, pe reta jecuaeño pepuere vaerā peporombori opaete mbaraviqui icavi vae re. ⁹ Echa'ā Tumpa İnee pe uyecuatia oĩ cuarāi:

“Jeta umee iparavete vae reta pe.

Jupi vae uyapo vae re Tumpa jaeño mai pegua imanduata.”

Jucuarāi uyecuatia oĩ. ¹⁰ Tumpa umee yandeve ñaneremitirā ñañoti vaerā, jare yanderemi biurā yau vaerā. Jae ramiño vi umeeta peve opaete, pepuere vaerā piyapo icavi vae, jare umivendiseta İru vae reta jupi vae piyapo vae rupi. ¹¹ Jucuarāi pe reta penoita opaete mbaembae icavi vae, pepuere vaerā jeta pemee. Jare ore ndugüiraa yave İru vae reta pe pemeeta vae, jae reta umeeta yasurupai Tumpa pe. ¹² Echa'ā piyecocui yave Tumpa pe cuarāi, pemeeta İru uñeño te Tumpa peguarā vae reta pe mbaembae uata chupe reta vae. Ērei cuaño'ā uyeyapota. Echa'ā cuarāi piyapo yave, jeta vae umeeta yasurupai tuicha Tumpa pe. ¹³ Jare piyecocui yave Tumpa pe pemeeta chupe reta vae rupi, jae reta umbiadorata Tumpa peré. Echa'ā cuarāi picuaacata chupe reta quirāi piyapo cua icavi vae, ñee icavi vae Cristo regua perovia ramo. Jare jae reta umbiadorata Tumpa jeta pemeeta chupe reta jare opaete vae pe vae jeco pegua. ¹⁴ Jare jae reta uyerureta Tumpa pe peré, jare perauta Tumpa ipiacavi uyecuaa peré vae jeco pegua. ¹⁵ Ñamee yasurupai Tumpa pe regalo jae umee yandeve vae re. Yandepuere'ā etei yaicutaa cavi cua regalo Tumpa umee yandeve vae.

10

Mbaepuere Pablo güinoi vae

¹ Che etei pumiñera cua re. Cristo umee cheve añemimichi jare chepiaguasu vaerā. Jáeramo chepuere pumiñera cuarāi, yepe tēi amocue vae jei añemimichi ete pepi aĩ ram-bueve, ěrei aĩ'ā yave pepi chemiari peve aquiye mbae reve. ² Ērei che pumiñera cua re. Echa'ā aipota'ā añeengata peve aa yave pepi. Ērei chepia pe ayemingueta aramoi icavi co añeengata vaerā amocue pepite pe ñugüinoi vae pe. Echa'ā jae reta ipia pe uyemingueta tēi ore nduico ore ndoe vae rupiño. ³ Ērei yepe tēi ore nduico cua ivi pe, ěrei nduiporu'ā orembaepuereño nuñerāro vaerā año guasu ndive. ⁴ Echa'ā ore nuñerāro'ā orembaepuere peño. Ore nuñerāro Tumpa imbaepuere tuicha vae pe, orepuere vaerā numiamiri año guasu, yepe tēi imbaepuere tuicha co. ⁵ Jucuarāi nduicuaaca añete'ā co upurugüirovia mbae vae reta ipiyemingueta jare opaete morombocue año guasu uiporu agüiye vaerā İru vae reta uicutaa Tumpa vae. Jare jucuarāi nduyapo opaete vae ipia pe uyemingueta vaerā Cristo uipota ipia pe uyemingueta vaerā rami. ⁶ Jare jeta pe reta pe pia pe piyemingueta yave Cristo uipota pe pia pe piyemingueta vaerā rami, chepuere aiporaraca opaete jucuarāi'ā uipota ipia pe uyemingueta vae reta pe.

⁷ Pe reta pembutuicha İru vae reta mbae uyecuaa vae re. Aramoi quia uicutaa cavi jae co Cristo imbae. Ērei tuicutaa cavi ore vi co jae Cristo imbae, jae rami. ⁸ YandeYa umee oreve mbaepuere orepuere vaerā pombori. Umee'ā oreve pumbiavai vaerā. Jare cua mbaepuere nonoi vae jecuaeñotai co aipiu. Ndarau chemara jese. ⁹ Jáeramo agüiye pe pia pe piyemingueta che aipota puminguie aicutiā peve vae pe. ¹⁰ Echa'ā amocue vae jei cuarāi: “Pablo uicutiā yandeve vae pe jei yandeve jeta mbaembae yavai vae yayapo vaerā, jare uicutiā mbaepuere güinoi vae rami. Ērei jae etei oĩ yave yandepi, uyecuaa quirāi jae mbaeti etei mbaepuere güinoi, jare imiari yave, ñarāro co.” Jucuarāi jei. ¹¹ Ērei jucuarāi jei

vae tuicuaa cua: Nduicuaaca oreмбаepuere nduicuatía peve vae pe, pepi noĩã yave. Jae ramiño vi nduicuaacata oreмбаepuere nduyapota vae pe, pepi noĩ yave.

¹² Ime amocue vae uyembutuicha vae. Nduipotã etei nduyemboyovaque jae reta ndive. Nduipotã vi ndoe peve mbaraviqui ore nduyapo vae icavi ete co mbaraviqui jae reta uyapo vae güi. Jae reta iyaracuaa'ã. Echa'ã uñeãã reta iyemingueta rupiño, jare jei reta mbaraviqui jae reta uyapo vae icavi ete mbaraviqui ñru reta uyapo vae güi. ¹³ Ërei ore ndarau ndoe ore nduyapo penti mbaraviqui icavi vae, nduyapo'ã yave. Echa'ã ore nduyapo mbaraviqui icavi vae Tumpa umee oreve nduyapo vaerã vae. Jare Tumpa umaeño oreré nduyapo vaerã mbaraviqui icavi vae pepite pe vi. ¹⁴ Tumpa etei umee oreve mbaepuere cua mbaraviqui nduyapo vaerã. Nduyavi'ã. Añete co, nduyavita tõi, Tumpa umee'ã yave oreve cua mbaepuere. Jáeramo ndoo ma pepi numimbeu vaerã peve ñee icavi vae Cristo regua. ¹⁵ Ndarau etei ndoe ore nduyapo mbaraviqui icavi vae ñru vae reta uyapo vae. Ërei nduipota uyembutuicha vaerã pepurugüirovia. Jare jucuarã yave, pepuereta orebori jeta ete mbaraviqui orepuere vaerã nduyapo, Tumpa uipota nduyapo vaerã vae rupi, ¹⁶ jare orepuere vaerã numimbeu ñee icavi vae perenta cuti rupi ñugüinoi vae reta pe. Echa'ã nduipotã etei ndoe ore nduyapo mbaraviqui icavi vae ñru vae uyapo Tumpa jei vae rupi vae.

¹⁷ Ërei ime yave quía uipota uyembicate vae, tuyembicate yandeYa re. ¹⁸ Echa'ã yandeYa umbutuichaca vae uyembutuichacata co, uyembutuichaca'ã co jaeiño.

11

Pablo jare temimondo añetete mbae vae reta

¹ Aipota pepiaguasu vaerã cheve, chemiari rambueve iyaracuaa mbae vae rami. Jáeramo pepiaguasu cheve. ² Añemiagüiro ete peré. Echa'ã Tumpa umee cheve jucuarã añemiagüiro vaerã peré. Echa'ã aipota pumee Cristo pe, penti cuñatai icavi vae ndeiño cuimbae güireco vae penti cuimbae ndive umenda yave uñemee ime pe rami. ³ Ërei chepia pe ayemingueta quirã aramoi petavita, agüiye vaerã pepia pe piyemingueta cavi Cristo re. Echa'ã jucuarã jocua mboi ipoqui upurumbitavi vaerã vae umbitavi Eva. ⁴ Echa'ã ou yave pepi quía Jesús regua umimbeu peve vae, chupe pepiaguasu ete co, yepe tõi jae umimbeu'ã Jesús regua ore numimbeu peve rami. Jae ramiño vi pepiaguasu co chupe jae umimbeu peve yave pembiresive vaerã ñru espíritu tenonde yave Espíritu pembiresive vae güi uyuavi vae. Jae ramiño vi pepiaguasu co chupe jae umimbeu peve yave ñru ñee icavi echa vae tenonde yave ñee icavi vae perovia vae güi uyuavi vae. ⁵ Ërei che arovia jocua temimondo tenondegua vae reta pe reta pere chupe vae jeta'ã etei uyapo Tumpa pe che ayapo vae güi. ⁶ Yepe tõi chepoqui'ã chemiari vaerã, Ërei aicuaa catu chemiari peve jese vae. Jare jecuaeño nduicuaa cua peve opaete nduyapo vae rupi.

⁷ Amimbeu peve yave ñee icavi vae Tumpa güi ou vae acovara'ã etei peve mbae re. ¿Ayapo echa ra mbaeyoa peve? Echa'ã che añemimichi ayapo vaerã icavi vae peve. ⁸ Ambiresive ñru upurugüirovia vae reta uyembatimbatí vae güi corepoti agüiyeta tõi ambiresive chugüi reta vae. Echa'ã jae reta umbiepi cheve, chepuere vaerã ayeyocui peve. ⁹ Jare aico pepi rambueve mbae uata cheve yave, mbaeti quía pepite pe amambeco chembori vaerã. Echa'ã yanderivi Macedonia güi yugüeru vae reta güeru cheve mbae uata cheve vae. Jare jucuarã aico, agüiye vaerã pumambeco chembori vaerã. Jare jecuaeño aicota jucuarã. ¹⁰ Ayerovia ete cua re, jare jecuae chemiarita jese opaete Acaya rupi. Mbaetita quía ipuere chemiqui. Echa'ã Cristo ico chepia pe. Jáeramo aicuaa cua che jae vae añete vae co. ¹¹ Cua uipota'ã jei che puau'ã co. Tumpa uicuaa puau co.

¹² Ërei jecuaeño ayapo vae jecuaeñota co ayapo. Echa'ã jocua ñru reta uipota ete tõi uyemboyovaque ore ndive, ipuere vaerã uyembutuicha. Ërei cuarã jecuae ayapo yave, ndarau ipuere. ¹³ Jae reta temimondo añetete vae reta'ã co. Uparaviqui reta upurumbitavi vaerã. Jae reta uipota ñru vae reta ipia pe uyemingueta jese vaerã jae reta co Cristo jemimondo reta. ¹⁴ Jare agüiye ñanepiacañi cua re. Echa'ã Satanás etei ipuere uyembiambie, uyecuaa vaerã penti ángel tembipe pe ico vae rami. ¹⁵ Jáeramo penti miacañi'ã co Satanás pe uyeyocui vae reta uyembiambie yave uyecuaa vaerã jupi vae uyapo vae reta rami. Ërei taicue rupi Tumpa uiporaracata chupe reta uyapo vae jeco pegua.

Pablo uiporara

¹⁶ Cua che jae ye peve: Agüiye quía ipia pe tuyemingueta che co jae iyaracuaa mbae vae. Ërei jucuarã pepia pe piyemingueta yave, pepiaguasu cheve penti iyaracuaa mbae vae pe pepiaguasu rami, che vi ayembicate vaerã michi pegua. ¹⁷ Aicuaa cavi chepuere ayembicate. Ërei cuarã chemiari yave, chemiari añ penti iyaracuaa mbae vae imiari rami. Chemiari'ã co añ yandeYa uipota chemiari vaerã rami. ¹⁸ Jeta vae uyembicate ñugüinoi jae

retaiño uyapo vae re. Jáeramo che vi ayembicateta. ¹⁹ Echa'ã pe reta pepiaguasu piyerovia reve iyaracuaa mbae vae reta pe, pe reta pepia pe piyemingueta pearacuaa ramo. ²⁰ Echa'ã pepiaguasu pemimbaraviqui tanta piyeyocui vaerã chupe vae reta pe, jare pecorepoti umingasta vae reta pe, jare pemitaví vae reta pe, jare pereríro vae reta pe, jare ocua perova re vae reta pe. ²¹ Êrei pe reta pere ore orepirãta'ã co. Che jae peve añete co jocua pere oreve vae. Êrei ime yave quía ipuere uyembícate vae, che vi chepuere ayembícate. Añave chemiari añ iyaracuaa mbae vae imiari rami.

²² Jae reta jei: “Ore co jae hebreo reta.” Che jae vi co. Jare jei reta: “Ore co jae Israel pegua reta.” Che jae vi co. Jare jei reta: “Ore co jae Abraham inemoñaeta reta pegua.” Che jae vi co. ²³ Jare jei reta: “Ore nduyeyocui Cristo pe.” Che ayeyocui ete Cristo pe chugüi reta. Ayemingueta ve añ iyaracuaa mbae vae uyemingueta rami. Che aparaviqui tanta ete chugüi reta. Jeta vese ñru vae reta chenupa chicote pe - chepuere'ã opa aipapa. Jeta vese añeñonoca peresoríru pe. Jeta vese amano seri. ²⁴ Pandepo vese judío reta chenupa chicote pe. Chenupa ñave ñave uporu cheré treinta y nueve vese chicote. ²⁵ Mbapí vese ñru vae reta chenupa ivira pe. Penti vese cheapi reta ita pe. Mbapí vese chalana guasu aa i guasu rupi pipe vae uyeca. Penti vese apita i guasu pe etei penti piare jare penti ara. ²⁶ Jeta ete aguata opaete que rupi. I chereraa seri. Upurupiãro vae reta cheraãro aguata vae rupi. Cherentaigua reta oyovaicho che ndive. Jae ramiño vi judío mbae vae reta oyovaicho che ndive. Amano seri tenta guasu reta pe jare tape rupi jare i guasu pe. Jare upurugüirovia-raanga vae reta oyovaicho che ndive. ²⁷ Tanta aparaviqui aiporara reve. Jeta vese aque cavi'ã. Chiyembaí jare cheúe. Jeta vese uata cheve tembúu, roi cheve jare uata cheve temimonde.

²⁸ Jare ñru mbaembae amimbeu'ã peve vae uyeyapo cheve chembiavai vaerã. Jare opa ara rupi jeta ete chepia pe ayemingueta opaete upurugüirovia vae uyembatimbatí vae reta re. ²⁹ Ime yave quía ipirãta'ã ipurugüirovia re vae, che vi añemiñru jae ndive chepia pe. Ime yave quía ñru vae umbiavai vae, che vi chepochí jese. ³⁰ Pipota yave ayembícate vaerã, ayembicateta co jocua mbaembae chepirãta'ã co uicuaaca vae re. ³¹ Tumpa uicuaa cheapu'ã etei añ. Jae co yandeYa Jesús Tu. Opaete vae umbiadorata jaeño mai pegua. ³² Damasco pe aico yave, Damasco pegua reta juvicha mburuvicha guasu Aretas jee vae pe uyeyocui vae uipota tēi chepisi. Jáeramo oyocui sündaro reta uãro vaerã opaete Damasco jonque reta. ³³ Êrei cheñru reta chembigüeyi penti canasta pe penti ventana Damasco iquesemba ita pegua vae pe oí vae rupi. Jare jucuarãí asi Damasco pegua reta juvicha güi, agüiye vaerã chepisi.

12

YandeYa umee ipiacavi Pablo pe

¹ Pipota ayembutuicha vaerã, yepe tēi icavi'ã co ayembutuicha vaerã. Êrei tamimbeu peve quirãí yandeYa uechaca jare uicuaaca cheve mbaembae. ² Che co jae penti cuimbae Cristo re güirovia vae. Uasa ma catorce año ayereraa vae ara ivate ete oí vae pe. Aicuaa'ã oo ra cherete ani oo'ã ra. Tumpaño uicuaa. ³⁻⁴ Jare aicuaa quirãí ayereraa ara pe, jare joco pe ayandu ñee reta jupí'ã penti cuimbae ñee uaa vaerã vae. Tumpa umaño'ã penti cuimbae re ñee omoë jocua ñee reta re. Aicuaa'ã oo ra cherete ani oo'ã ra. Tumpaño uicuaa. ⁵ Ayembicateta tēi cua re. Êrei ndarau ayembícate. Jaeño ayembicateta jocua mbaembae chepirãta'ã co uicuaaca vae re. ⁶ Êrei ndarau chemiari iyaracuaa mbae vae imiari rami, yepe tēi ayembícate. Echa'ã chemiarita tēi añete vae re. Êrei ndarau chemiari jese, agüiye vaerã quía chembutuicha jese. Echa'ã aipota ñru vae reta ipia pe uyemingueta vaerã mbae ayapo vae uecha vae jare cheporomboe uyandu vae reño.

⁷ Jeta vese yandeYa uicuaaca cheve mbaembae. Jare agüiye vaerã ayembícate ete cua re, ou cheve penti mbaerasi chemambeco vaerã. Chemambeco penti yuu yandesoo pe oí vae yanemambeco rami. Jocua mbaerasi Satanás ombou uporaraca cheve vaerã. ⁸ Ayerure yandeYa pe mbapi vese cua mbaerasi re, upita vaerã chegüi. ⁹ Êrei yandeYa jei cheve cuarãí: “Tamee ndeve chepiacavi nemiaguanta vaerã. Echa'ã nde nepirãta'ã ramo, chepuere aicuaaca quirãí tuicha ete co chembaepuere.” Jucuarãí jei. Jáeramo ayerovia chepirãta'ã ramo. Echa'ã chepirãta'ã ramo, Cristo umee cheve imbaepuere. ¹⁰ Añete co, chepirãta'ã. ñru vae reta chereríro. Mbaembae uata cheve. ñru vae reta uyapo icavi mbae vae cheve. Yavai ete aico vaerã. Êrei opaete cua mbaembae uyeyapo cheve yave Cristo pe ayeyocui ramo, ayerovia co. Echa'ã che etei chepirãta'ã yave, yandeYa chemimiráta.

¹¹ Ayeyapo ma penti iyaracuaa mbae vae rami ayembícate vaerã. Pe reta etei pipota jucuarãí ayapo vaerã. Pe reta chembicatecata tēi co. Echa'ã jocua temimonde tenondegua vae reta pe reta pere chupe vae jeta'ã etei uyapo Tumpa pe che ayapo vae güi. Chepuere

jae cua, yepe tēi che mbae'ā etei co. ¹² Añete co, che aicuaaca peve quirāi che co jae penti temimondo añetete vae pepi aico rambueve. Echa'ā aparaviqui chepiaguasu reve. Ayapo miacañi reta picuaa vaerā. ¹³ ¿Maera pa pepia pe piyemingueta che ayapo'ā pepite pe ĩru upurugüirovia vae uyembatimbati vae reta ipite pe ayapo rami? Añete co, pemiepi'ā cheve jae reta umbiepi cheve rami. Jocua icavi'ā echa peve yave, chembiasa.

Pablo umimbeu oo yeta co Corinto pegua reta ipi

¹⁴ Mase, mocui vese ma apou pepi. Jare añave ayeyapicatu añ, aa ye vaerā pepi. Jare ndarau aipota pemiepi vaerā cheve. Echa'ā aipota'ā pecorepoti. Pombori vaerāño aipota. Che co jae peru rami. Icavi co tu reta uñuvatu vaerā mbaembae umee vaerā isambiai reta pe. Yae'ā co sambiai reta pe uñuvatu vaerā mbaembae umee vaerā tu pe. ¹⁵ Chequirēi amingasta chembaembae jare chequirēi vi ayemingasta ayerovia reve chepuere vaerā pombori. Yepe tēi pe reta cherau ete'ā, ěrei che puau ete.

¹⁶ Ęrei aramoi amocue vae jeita cuarāi: “Añete co, Pablo jei'ā yandeve yambiepi vaerā chupe. Ęrei jae ipoqui upurumbitavi vaerā. Yanembitavi co.” Aramoi jucuarāi jeita. ¹⁷ Che pumbitavica'ā etei jocua amondo pepi vae reta pe. ¹⁸ Amiñera Tito oo vaerā pepi, jare amondo jae jupie ĩru yanderivi. Tito pemitavi'a etei co. Jae uyapo Espĩritu Santo imbaepuere pe che ayapo vae rami.

¹⁹ Aramoi pepia pe piyemingueta quirāi añave oremiari cuarāi nduyerepi vaerāño. Ęrei jucuarāi'ā co. Oremiari cuarāi Tumpa jovaque Cristo re ndugüirovia ramo. Jare opaete nduyapo pe reta pepirāta vaerā pepurugüirovia re. Echa'ā ore puau ete. ²⁰ Ęrei aa ye yave pepi, chepia pe ayemingueta aramoi aechata pico'ā che aipota pico vaerā rami, jare aramoi jocua jeco pegua che ayapota pe reta pipota'ā ayapo vaerā vae. Echa'ā chepia pe ayemingueta aramoi piyeaca uyupii, peacatāa piyee, pepochi piyupe, piyembiyao piyugüi, pemiari ndaye re ĩru pe, piñera piyee, piyembicate jare piñeengueta piyupe. ²¹ Jae ramiño vi chepia pe ayemingueta aramoi Tumpa umaefota cherē chemara vaerā pegüi, aa ye yave pepi. Echa'ā aramoi chepiatiti eteta jeta pepite pe ñugüinoi vae mbaeyoa uyapo vae re, uyerova'ā yave teco pichii vae güi, jare aguasa uyapo vae güi, jare mbiquere uyapo vae güi.

13

Aracuaa reta jare saludo reta

¹ Mocui vese ma apou pepi. Añave aa yeta pepi. Ime yave quía teco uyapo vae, timiari mocui ani mbapi uicuaa cavi jeco regua vae, yaicuaa vaerā añete co. ² Amimbeu ma peve taicue rupi pepi aa yave, jare añave añ'ā pepi, ěrei amimbeu ye añ peve. Cua aicuatia opaete mbaeyoa uyapo vae reta pe jare opaete ĩru reta pe: Che aa ye yave pepi, aiporaracata co iyoa vae reta pe. ³ Jocua uicuaacata peve quirāi Cristo imiari peve che rupi. Echa'ā cua pipota picuaa. Jare Cristo ipuere'ā vae rami'ā co perē. Echa'ā uicuaaca peve imbaepuere. ⁴ Echa'ā yepe tēi Cristo mbaeti mbaepuere güinoi vae rami co uyecutu curusu re yave, ěrei icove ye Tumpa imbaepuere rupi. Jae ramiño vi ore etei mbaeti mbaepuere nonoi, ěrei picuaata quirāi nonoi tecove ipiau vae Cristo güi Tumpa imbaepuere rupi. Jáeramo nonoita co mbaepuere pepite pe.

⁵ Jecuaeño pemaē piyee picuaa vaerā pe reta co upurugüirovia vae añetete vae reta. Picuaa co quirāi Jesucristo ico pepia pe, pe reta co jae upurugüirovia vae añetete vae reta yave. ⁶ Ęrei aipota picuaa vaerā ore co jae upurugüirovia vae añetete vae reta. ⁷ Jare nduyere Tumpa pe agüiye vaerā piyapo mbae icavi mbae vae. Nduipotā'ā cua, ĩru vae reta ipia pe uyemingueta vaerā ore nduyapo icavi vae. Jaeño nduipota pe reta piyapo vaerā icavi vae, yepe tēi aramoi ĩru vae reta ipia pe uyemingueta ore nduyapo'ā icavi vae. ⁸ Echa'ā nonoi'ā mbaepuere ndoyovaicho vaerā añete vae ndive. Jaeño orepuere nuñemiñru añete vae ndive. ⁹ Pe reta pepirāta yave pepurugüirovia re, ore nduyerovia, yepe tēi pere ore orepirāta'ā co. Jare cua re nduyerure: Tumpa tapemimirāta ete pepurugüirovia re. ¹⁰ Jáeramo aicuatia peve cuarāi pepi añ'ā rambueve, agüiye vaerā aiporu mbaepuere yandeYa umee cheve vae aiporaraca vaerā peve pepi aa yave. Echa'ā yandeYa umee cheve jocua mbaepuere pombori vaerā, aiporaraca peve vaerāño'ā.

¹¹ Jaeño ma, cherivi reta. Piyerovia. Piñemimirāta pepurugüirovia re. Piyembipiacatu. Pico cavi pepiacatu reve penti ramiño. Jare Tumpa etei oita pe ndive. Tumpa yanderau jare yanembipiacatu. ¹² Saludo reta piyapo piyupe yave, piñecuāva piyerau reve. ¹³ Opaete uñeño tee Tumpa peguarā vae reta jei peve Tumpa ndiveño pei.

¹⁴ YandeYa Jesucristo tumee opaete peve ipiacavi. Tumpa tumee opaete peve ipuruau. Espĩritu Santo tumee opaete peve yerovia jae uñemiñru pe ndive ramo. Amén.

LA CARTA DEL APOSTOL SAN PABLO A LOS GÁLATAS

1 Che co jae Pablo. Che co jae Jesucristo jemimondo. Cuimbae reta'ã cheparavo, jare cuimbae reta'ã chemondo. YandeRu Tumpa jare Jesucristo chemondo. Tumpa umbijecove ye Jesucristo güeru umanocue vae reta ipite güi. 2 Che jare opaete yanderivi che ndive ñugüinoi vae reta nduicuatía cua tupapire opaete pepurugüirovia vae reta Galacia rupi piyembatimbati vae pe. 3 YandeRu Tumpa jare yandeYa Jesucristo tumee peve ipiacavi jare ipiacatu. 4 YandeYa Jesucristo uñemee umano vaerã yanembaeyoa reta re, yanderepi vaerã teco icavi mbae vae ivi pegua güi. Echa'ã cua co jae yandeRu Tumpa jei vae. 5 YandeRu Tumpa tuyembiaadoraca jaëño mai pegua. Amén.

Ñee icavi vae pentiño co

6 Chepicañi ete quirãi imambae ete piyembopiaca Tumpa güi perovia vaerã ñru ñee icavi echa vae. Echa'ã Tumpa preparavo Cristo ipiacavi rupi. 7 Ërei mbaeti co ñru ñee icavi vae. Jaëño ime amocue pempoba vae. Echa'ã jae reta uipota perovia vaerã ñru ñee icavi echa vae ñee icavi vae Cristo regua ipepica pe. 8 Ërei numimbeu ma peve ñee icavi vae. Jare ime yave quía ñru ñee icavi echa vae umimbeu peve vae - ore yepe ani penti ángel ara güi ou vae yepe - Tumpa tuyapo mbae icavi mbae vae chupe. 9 Cua co tenonde yave ndoe ma peve. Ërei añave amimbeu ye peve. Perovia co ñee icavi vae. Ime yave quía ñru ñee icavi echa vae umimbeu peve vae. Tumpa tuyapo mbae icavi mbae vae chupe. 10 Aipota'ã etei ivi pegua reta chembutuicha vaerã. Aipota Tumpaño chembutuicha vaerã. Aipota'ã etei vi ivi pegua reta uyemingueta cavi vaerã checoti. Echa'ã aipota yave mona ivi pegua reta uyemingueta cavi vaerã checoti, ndarau tēi ayeyocui Cristo pe.

Quirãi Pablo uyeyapo Jesucristo jemimondorã

11 Ërei aipota picuaa vaerã, cherivi reta, cua: Cua ñee icavi vae che amimbeu vae ou'ã co cuimbae güi. 12 Echa'ã mbaeti penti ave cuimbae umimbeu cheve. Ayemboe'ã etei jese cuimbae güi. Jaëño Jesucristo uicuaaca cheve.

13 Pe reta picuaa ma quirãi judío reta iporomboe re che aicose. Echa'ã ayapose jeta ete mbae icavi mbae vae Tumpa uiparavo vae reta coti, jare aipota tēi opa amicañi. 14 Jare judío reta iporomboe re cheratangātu ete jeta cherentaigua cheaveigua reta güi. Echa'ã cheratangātu ete chetenondegua reta iporomboe re. 15 Ërei Tumpa cheño tee iyupeguarã ndei chesi güi aa mbove, jare cheparavo ipiacavi jeco pegua. Jare jae uipota ma yave, 16 uicuaaca Tai cheve, che amimbeu vaerã judío mbae vae reta pe. Cua uyeyapo yave, ayemingueta'ã jese quía ndive. 17 Aa'ã vi Jerusalén pe Tumpa jemimondo reta tenonde Tumpa omondo chegüi vae ñugüinoi vae pe. Ërei aa Arabia pe, jare joco güi ayu ye Damasco pe.

18 Cua jaicue rupi, mbapi año uasa ma yave, aa Jerusalén pe ayemingueta vaerã Pedro ndive, jare apita jae ndive quince ara. 19 Ërei aecha'ã penti ave ñru temimondo. Jaëño aecha Jacobo - jae co yandeYa tivi. 20 Mase, cua aicuatía peve vae añete vae co. Tumpa uicuaa catu añete vae co.

21 Cua jaicue rupi aa Siria jare Cilicia pe. 22 Jare Cristo re güirovia vae Judea pe uyembatimbati vae reta checuaa'ã, cherecha'ã ramo. 23 Jaëño jae reta uyandu jei cuarã: "Jocua cuimbae icavi mbae vae uyapose yandave vae añave umimbeu mburugüirovia tenonde yave uipota tēi opa umicañi vae." Jucuarã uyandu jei. 24 Jare umbiaadora reta Tumpa chereco pegua.

2

1 Cua jaicue rupi, catorce año uasa ma yave, aa ye Jerusalén pe Bernabé ndive, jare araa vi Tito. 2 Jare aa, Tumpa uicuaaca cheve aa vaerã ramo, jare amimbeu cavi chupe reta jocua ñee icavi vae amimbeu judío mbae vae reta pe vae. Ërei amimbeu rani itenondegua reta peño. Echa'ã aipota ayemingueta cavi jae reta ndive, jae reta uicuaa cavi vaerã jocua jecuaëño amimbeu vae. 3 Jare ipuere'ã quía umicircuncidaca Tito che ndive oï vae, yepe tēi jae griego co, 4 jare yepe tēi amocue mbaeti añetete upurugüirovia vae reta uique viari orepite pe. Echa'ã uipota uecha viari quirãi ra nduico. Echa'ã uicuaa reta ore numimbeu co quirãi Cristo Jesús orepora ma mboroyocui güi. Echa'ã uipota tēi nduico ye vaerã mboroyocui re. 5 Ërei nuñemaëño'ã etei jese reta. Echa'ã nduipota jecuaëño penoi vaerã ñee icavi vae añetete vae.

⁶ Ërei itenondegua uyembutuichaca echa vae reta ipuere'ã etei umiñru ñee amimbeu vae ndive. Yepe tēi tenonde yave uyembutuichaca reta co, ãrei jocua uipota'ã jei mbae cheve. Echa'ã Tumpa uau'ã penti vaeño ñru vae güi. ⁷ Ërei jae reta uicuaa ma Tumpa umee co cheve amimbeu vaerã ñee icavi vae judío mbae vae reta pegua, Pedro pe umimbeu vaerã ñee icavi vae judío reta pegua umee rami. ⁸ Echa'ã Tumpa omondo Pedro ico vaerã jemimondorã judío reta pegua. Jae ramiño vi jae chemondo aico vaerã jemimondorã judío mbae vae reta pegua. ⁹ Jáeramo uicuaa reta ma yave quirã Tumpa umee cheve ipiacavi, Jacobo, Cefas jare Juan - jae reta co itenondegua echa vae reta - chepopisi jare uipopisi vi Bernabé, uicuaaca vaerã penti rami co noi, jare ore ndoo vaerã judío mbae vae reta pe, jare jae reta yugüiraa vaerã judío reta pe. ¹⁰ Jaeño jei reta oreve oremandúa vaerã iparavete vae reta re. Ërei che etei aipota ete ayapo jucuarãi.

Pablo umbijeco Pedro Antioquia pe

¹¹ Ërei Pedro ou yave Antioquia pe, chupe etei ambieta, teco güinoi ramo. ¹² Echa'ã ndei amocue judío reta Jacobo güi yugüeru mbove, Pedro ucaruñoi judío mbae vae reta ndive. Ërei yugüeru ma yave, Pedro ucaru'ã ma judío mbae vae reta ndive, jare opou'ã ma ipi. Echa'ã uquiye judío reta güi. ¹³ Jayave ñru judío reta vi uyemboe Pedro jeco re, jare uyapo reta jae uyapo rami. Jáeramo Bernabé vi uñemaño chupe reta, uyapo vaerã jae reta uyapo rami. ¹⁴ Ërei aecha yave uyapo'ã jupi añete vae ñee icavi vae pegua rupi, che jae Pedro pe opaete vae jovaque: “Yepe tēi nde co jae penti judío, ãrei ndico judío mbae vae reta yugüireco rami, ndico'ã judío reta yugüireco rami. Jáeramo ¿maera pa ndipota judío mbae vae reta yugüireco vaerã judío reta yugüireco rami?” Jucuarãi jae chupe. ¹⁵ Ore mbaeti etei co judío mbae vae reta - mbaeyoa pegua ndoe chupe vae. Ërei yepe tēi ore co jae judío reta etei, ¹⁶ nducuaa ndarau quía ipuere uyembujupica mboroyocui jei vae re uyapo vae rupi. Jaeño ipuere uyembujupica güirovia yave Jesucristo re. Jáeramo ore vi ndugüirovia ma Jesucristo re nduyembujupica vaerã mburugüirovia Cristo re nonoi vae rupi, nduyembujupica'ã mboroyocui jei vae re nduyapo vae rupi. Echa'ã ndarau quía uyembujupica mboroyocui jei vae re uyapo vae rupi.

¹⁷ Jare nduipota yave nduyembujupica Cristo re, ore vi nduyecuaa mbaeyoa pegua reta. Ërei yepe tēi nduyecuaa cuarãi, ãrei Cristo oreapo'ã etei co mbaeyoa pegua retarã. ¹⁸ Echa'ã aipota yave ayapo ye jocua ambai vae, añete co che ayeyapo mbaeyoa peguarã. ¹⁹ Mboroyocui jei vae rupi amano ma co. Jáeramo añave che co jae penti umano ma mboroyocui coti vae rami. Jare jáeramo añave chepuere ayeyocui Tumpa pe. ²⁰ Cristo umano curusu re yave, che amano vi jae ndive. Jáeramo aicove'ã ma, jaeño Cristo icove chepia pe. Jare cua ivi pe aico rambueve, aico co mburugüirovia Tumpa Tai re anoi vae re. Echa'ã jae cherau, jare uñemee umano vaera cheré. ²¹ Arño'ã Tumpa ipiacavi. Echa'ã mboroyocui jei vae re yayapo vae rupi yandepuere yayembujupi yave mona, Cristo umanoñota tēi.

3

Mboroyocui ani mburugüirovia

¹ Galacia pegua reta, pe reta co jae iyaracuaa mbae vae reta rami. ¿Quía pa pemitavi, agüiye vaerã perovia añete vae? Echa'ã perovaque etei amimbeu cavi ma quirai Jesucristo uyecutu curusu re. ² Cuaño aipota pemimbeu vaerã cheve: ¿Pembiresive pa Espíritu Santo mboroyocui jei vae re piyapo vae rupi, ani ñee icavi vae piyandu yave pepurugüirovia ramo? ³ ¿Pearacuaa'ã etei pa co? Pe reta pembipi Espíritu Santo rupi. ¿Piñemimirãtata pa pe retaiño pepuere piyapo vae rupi? ⁴ ¿Piporaraño ma pa jeta mbaembae? Quirã mona agüiye piporaraño. ⁵ Tumpa umee peve Espíritu Santo, jare uyapo miacañi reta pepite pe. ¿Uyapo pa cua mbaembae mboroyocui jei vae re piyapo vae rupi, ani ñee icavi vae piyandu yave pepurugüirovia ramo?

⁶ Jucuarãi vi Abraham güirovia Tumpa, jare Tumpa umbujupi ipurugüirovia jeco pegua. ⁷ Jáeramo picuaa co cua: Mburugüirovia güinoi vae reta co jae Abraham tai reta rami. ⁸ Tumpa ñee pe uyecuatía oñ ñee icavi vae Tumpa umimbeu Abraham pe vae. Tumpa umimbeu chupe ndei uyeyapo mbove. Echa'ã jei Abraham pe cuarãi: “Nde rupi opaete ivi pegua reta amivendiseta.” Jucuarãi jei chupe. Echa'ã Tumpa uicuaa ndei uyeyapo mbove quirã umbujupita judío mbae vae reta ipurugüirovia jeco pegua. ⁹ Jáeramo Tumpa añave amivendise mburugüirovia güinoi vae reta, Abraham amivendise rami. Echa'ã Abraham vi güinoi mburugüirovia.

¹⁰ Opaete uipota uyembujupi mboroyocui jei vae re uyapo vae rupi vae reta jecuaño teco güinoi. Echa'ã Tumpa ñee pe uyecuatía oñ cuarãi: “Tuyembijeco toi jocua jecuaño uyapo'ã opaete uyecuatía oñ mboroyocui itupapire pe vae.” Jucuarãi uyecuatía oñ. ¹¹ Echa'ã

yandepuere yaicuaa quirāi mbaeti penti ave ipuere uyembujupi Tumpa jovaque mboroyocui jei vae re uyapo vae rupi. Echa'ā Tumpa iñee pe uyecuatía oī cuarāi: “Tumpa mburujupi vae güinoita tecove upurugüirovia ramo.” Jucuarāi uyecuatía oī. ¹² Jare mboroyocui mbrugüirovia pegua'ā co. Echa'ā Tumpa iñee pe uyecuatía oī mboroyocui re cuarāi: “Ime yave quía cua nunga uyapo vae, icota uyapo ramo.” Jucuarāi uyecuatía oī.

¹³ Mboroyocui yanembijecose. Ērei Cristo yanderepi ma chugüi. Echa'ā jae uyembijecoca yandepioca pe. Echa'ā Tumpa iñee pe uyecuatía oī cuarāi: “Teco güinoi jocua uyecutu curusu re vae.” Jucuarāi uyecuatía oī. ¹⁴ Jare cua uyeyapo Cristo pe, Tumpa umivendise vaerā Cristo Jesús rupi judío mbae vae reta, umivendise Abraham rami, jare yande ñanoi vaerā Espíritu Tumpa jei umeeta vae yandepurugüirovia jeco pegua.

¹⁵ Cherivi reta, tacheimiari peve cua ivi pe mbae uyeyapo vae re. Ivi pegua reta penti trato uyapo yave uyupe, yepe tēi ivi pegua retaño co, ndarau quía ipuere umbai, jare ndarau quía ipuere mbae umĩru jae ndive. ¹⁶ Cuarāi vi Tumpa jei umeeta mbaembae Abraham jare iñemoña pe. Tumpa imiari'ā iñemoña reta re. Echa'ā jucuarāi yave mona, uipotata tēi jei jeta vae. Ērei imiari iñemoña re. Echa'ā cua uipota jei penti vae. Jare jocua penti vae Cristo co. ¹⁷ Jáeramo che jae peve cua: Tumpa tenonde yave uyapo penti trato Abraham ndive, jare uicuaaca chupe añetete vae co. Jayave cuatrocientos treinta año uasa ma yave ramo, Tumpa umĩbeu mboroyocui. Jáeramo mboroyocui ipuere'ā umbai jocua trato. Echa'ā umbai yave mona, Tumpa ndarau tēi uyapo jei uyapota vae. ¹⁸ Echa'ā mboroyocui re yave mona Abraham güinoita Tumpa jei umeeta chupe vae, ndarau tēi güinoi jei uyapota vae re. Ērei uyeyapo co Tumpa jei uyapota vae Abraham pe.

¿Maera pa uñemee mboroyocui?

¹⁹ Jayave ¿maera pa uñemee mboroyocui? Uñemĩru co mbaeyoa reta jeco pegua, jocua Abraham iñemoña Tumpa jei umeeta vae ou regua. Jare Tumpa uicuaaca mboroyocui Moisés pe ángel reta rupi, Moisés uicuaaca-yuapi ye vaerā Israel pegua reta pe. ²⁰ Jare uicuaaca-yuapi ye vae oī mocui vae ipāu pe, uicuaaca-yuapi ye vaerā penti vae güi ĩru vae pe. Ērei Tumpa co jae pentiño.

²¹ Ērei mboroyocui oyovaicho'ā etei co Tumpa jei uyapota vae ndive. Echa'ā tecove uñemee yave mona mboroyocui Tumpa uicuaaca vae re, añetete co mboroyocui upurumbujupita tēi. ²² Ērei Tumpa iñee pe uyecuatía oī vae uicuaaca opaete vae iyoa co, Tumpa jei uyapota vae uñemee vaerā mbrugüirovia Jesucristo re güinoi vae reta pe. ²³ Ērei ndei ndugüirovia Jesucristo re mbove, mboroyocui güinoise mbaepuere oreré, penti persoriru iyandarecoa mbaepuere güinoi pereso reta re rami. Jare mboroyocui güinoise mbaepuere oreré, Tumpa uicuaaca regua ndugüirovia vaerā Jesucristo re. ²⁴ Jáeramo mboroyocui oreyandarecoa rami vi co. Jae uyandarecose oreré, Cristo ou regua orembujupica vaerā mbrugüirovia rupi. ²⁵ Ērei güinoi'ā ma mbaepuere oreré jocua uyandarecose oreré vae. Echa'ā ndugüirovia ma Cristo re. ²⁶ Jare opaete pe reta vi Tumpa tai reta co mbrugüirovia Cristo Jesús re penoi vae rupi. ²⁷ Echa'ā opaete pe reta piyembautizaca ma piyeyapo vaerā Cristo jete peguarā. Jáeramo pe reta piyeyapo ma penti ramiño Cristo ndive. ²⁸ Cristo Jesús re uyaviv'ā uyupii judío jare judío mbae vae, uyeyocui vae jare uyeyocui mbae vae, cuimbae jare cuña. Echa'ā Cristo Jesús re opaete pe reta penti ramiño co. ²⁹ Jare pe reta co jae Abraham iñemoña reta rami. Echa'ā pe reta co jae Cristo imbae. Jáeramo pembae co jocua Tumpa jei Abraham pe umeeta vae.

4

¹ Ērei che jae peve cua: Penti cuimbae umano yave, tai güinoita tu imbaembaecue vae sambiaí ico rambueve, oyovaque penti uyeyocui vae ndive, yepe tēi opaete mbaembae imbae ma co. ² Echa'ā omboe vae reta jare uyandareco jese vae reta güinoi mbaepuere jese jare imbaembae re, jae uepiti regua iaño tu amĩri ndei umano mbove umĩbeu vae. ³ Jae ramiño vi tenonde yave moromboe ivi pegua mbaepuere güinoi oreré. Echa'ā jayave nduicose jocua sambiaí rami. ⁴ Ērei ou ma uvāe yave ara, Tumpa ombou Tai. Jae oa cuña güi, jare mboroyocui güinoi mbaepuere jese, ⁵ jae ipuere vaerā uepi mboroyocui güinoi mbaepuere jese vae reta, ore orepuere vaerā nduyeyapo Tumpa tai retarā. ⁶ Jare tai reta ma pe reta pico ramo, Tumpa ombou pepia pe Tai iEspíritu. Jae jei: “CheRu, cheRu.” ⁷ Jáeramo pe reta uyeyocui vae reta'ā ma. Pe reta co jae Tumpa tai reta. Jare tai reta ma pico ramo, Tumpa umee vae pembae co Cristo rupi.

Pablo ipiatiti upurugüirovia vae reta re

⁸ Añete co, tenonde yave picuaa'ā Tumpa yave, piyeyocuisse tumpa-raanga reta pe. Jae reta mbaeti etei tecove güinoi. ⁹ Ērei añave picuaa ma Tumpa, Tumpa picuaa ma ramo. Jáeramo ¿maera pa pipota perovia ye moromboe reta ivi pegua? Echa'ā güinoi'ā mbaepuere

pembori vaerã. ¿Maera pa pipota güinoi vaerã mbaepuere peré? ¹⁰ Echa'ã piyandareco peĩ ara reta re, yasi reta re, fiesta reta iara reta re jare año reta re. ¹¹ Chepiatiti ete peré. Echa'ã chepia pe ayemingueta aramoi aparaviquiño ma pepite pe.

¹² Cherivi reta, pumiñera piyapo vaerã che ayapo rami. Echa'ã che ayeyapo peĩrurã. Mbaeti etei mbae icavi mbae vae piyapo checoti. ¹³ Echa'ã pe reta picuaa co quirãi chembaerasi jeco pegua tenonde yave amimbeu peve ñee icavi vae. ¹⁴ Jare yepe tẽi chembaerasi, ãrei chererĩro'ã jare chemitarẽi'ã. Echa'ã pe reta chembiresive cavi. Penti ángel Tumpa güi ou yave mona pepi, pembiresiveta tẽi jucuarãi. Jare Cristo Jesús ou yave mona pepi, pembiresiveta tẽi jucuarãi. ¹⁵ ¿Maera pa penoi'ã ma jocua yerovia penoise vae? Echa'ã chepuere amimbeu peregua cua: Pepuere yave mona, peequita tẽi peresa piyugũi, pemee vaerã cheve. ¹⁶ Che amimbeu peve añete vae. Cua uipota'ã jei ayemboyovaicho ma pe ndive.

¹⁷ Jocua pembopa vae reta jatangãtu ete peré, ãrei icavi'ã peve peguarã. Echa'ã uipota pembopia oregũi, pe reta peratangãtu vaerã jese reta. ¹⁸ Ërei icavi jecuaeño peratangãtu vaerã icavi vae re - mbaeti pepi aĩ yaveño. ¹⁹ Cherivi reta, penti cuña uiporara imembi oata yave vae rami che aiporara ye ma aĩ Cristo jecove uyecuaa vaerã peré. ²⁰ Aipota tẽi aĩ vaerã pe reta ndive añave, jare aipota'ã tẽi pumingueta vaerã cuarãi. Echa'ã chepiacañi ete peré.

Umijaanga Agar jare Sara

²¹ Pe reta pipota mboroyocui güinoi vaerã mbaepuere peré. Pemimbeu cheve, ¿picuaa'ã pa mboroyocui pe uyecuatía oĩ vae? ²² Echa'ã Tumpa iñee pe uyecuatía oĩ vae umimbeu quirãi Abraham mocui tai güinoi. Penti tai cuña uyeyocui vae imembi co, jare ĩru tai cuña uyeyocui mbae vae imembi co. ²³ Jare jocua uyeyocui vae imembi uñemoña cuimbae jei vae jeco peguaño. Ërei jocua uyeyocui mbae vae imembi uñemoña Tumpa jei ramo. ²⁴ Jare cua co penti jaanga. Echa'ã cua cuña reta uyemijaanga jocua mocui trato re. Penti trato co jae ivitu guasu Sinaí jee vae re uñemee vae. Cua trato pegua reta co jocua oa uyeyocui vaerã vae reta rami. Echa'ã jucuarãi vi co Agar imembi. ²⁵ Echa'ã cua Agar uyemijaanga ivitu guasu Sinaí Arabia pegua re, jare uyemijaanga vi tenta guasu Jerusalén cua ivi pe oĩ vae re. Echa'ã jocua tenta guasu Jerusalén jare joco pegua reta uyeyocui vae reta rami co. ²⁶ Ërei jocua Jerusalén ara pe oĩ vae uyeyocui mbae vae reta rami co. Echa'ã jae yandesi rami co. ²⁷ Echa'ã Tumpa iñee pe uyecuatía oĩ cuarãi:

“Nde nemembi'ã. Ërei iyerovia,

yepẽ tẽi ndepuere'ã etei nenoi nemembi'ã.

Nde nemembi'ã etei. Ërei esapicai ndiyerovia reve.

Echa'ã cuña ime mbae vae güinoita jeta ete imembi cuña ime reve vae güi.”

Jucuarãi uyecuatía oĩ.

²⁸ Cherivi reta, Isaac oa Tumpa jei ramo. Jae ramiño vi yande ñanoi tecove Tumpa jei vae jeco pegua. ²⁹ Ërei jocua cuimbae jei vae jeco peguaño uñemoña vae uyapo icavi mbae vae jocua Espiritu Santo imbaepuere rupi uñemoña vae pe. Jae ramiño vi añave uyeyapo yandeve jucuarãi. ³⁰ Ërei ¿mbae pa jei Tumpa iñee pe uyecuatía oĩ vae? Jei cuarãi: “Emombo cuña uyeyocui vae jare imembi. Echa'ã cuña uyeyocui vae imembi ndarau güinoi Abraham imbaembae. Jaeño cuña uyeyocui mbae vae imembi güinoita Abraham imbaembae.” Jucuarãi jei. ³¹ Jáeramo, cherivi reta, yande mbaeti co jocua cuña uyeyocui vae imembi rami. Yande co jae jocua cuña uyeyocui mbae vae imembi rami.

5

Cristo yandeyora ma

¹ Yayeyora ma. Echa'ã Cristo yandeyora ma. Jáeramo jecuaeño pipota ete pico uyeyora vae reta rami. Agũiye ye ma pipota pico uyeyora mbae vae reta rami.

² Mase, che jae peve, piñemicircuncidaca yave, pe reta co jae uyeyoraca'ã etei Cristo pe vae rami. ³ Amimbeu ye opaete piñemicircuncidaca vae pe, cua piyapo vae uipota jei piyapota co opaete mboroyocui jei vae. ⁴ Jare cua uipota jei pipota'ã ma Cristo pembujupi vaerã. Echa'ã pipota tẽi piyembujupi mboroyocui jei vae re piyapo vae rupi. Pipota'ã ma piyembujupi mbiacavi rupi. ⁵ Echa'ã yande yarovia Tumpa yanembujupi yandepu-rugũirovia rupi. Jare Espiritu Santo yanembori cuarãi yarovia vaerã. ⁶ Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanoi yave jocua mburugũirovia umee yandeve mburuau ĩru vae reta coti vae.

⁷ Tenonde voi peguata cavi co Tumpa coti. ¿Quía pa pemiavai, agũiye vaerã perovia añete vae? ⁸ Echa'ã Tumpa peparavo ma jare umee peve aracuaa, ãrei cua ĩru aracuaa ou'ã Tumpa güi. ⁹ Mboviño levadura uñemai opaete masa rupi. ¹⁰ YandeYa umee ma cheve

mbiacatu peré, quirãí pe reta pepia pe piyemínguetata che chepia pe ayemínguetá rami. Aicuaa'á quía ra co jae pemiavai vae. Èrei Tumpa uiporacata co chupe.

¹¹ Cheriví reta, che amimbeu'á etei ñru vae reta pe uñemicircuncidaca vaerã. Echa'á cherovaicho reta uyapo icavi mbae vae cheve amimbeu'á ramo. Echa'á jocua amimbeu yave, ndarau tēi quía chereriro Cristo icurusu regua amimbeu vae jeco pegua. ¹² Quirãí mona uyembisiri reta jocua pemambeco vae reta.

¹³ Añete co, cheriví reta, Tumpa peparavo pico vaerã uyeyora vae reta rami. Èrei agüiye pere piyupe: “Tumpa yandeyora ma. Jáeramo yandepuere yayapo ipotave yaipota vaeño.” Agüiye pere jucuarãí. Èrei piyeyocui piyupe, piyerau ramo. ¹⁴ Echa'á opaete mboroyocui oyovaque cua ndive: “Eau nderapicha nde ndiyerau rami.” ¹⁵ Èrei piñerãro yave uyupii, aramoi piñemitarēita.

Espíritu Santo jei vae uyuavi yande yaipota vae güi

¹⁶ Jáeramo che jae peve cua: Pico Espiritu Santo jei vae re, agüiye vaerã pico pe pere vae reño. ¹⁷ Echa'á peiño pere vae uyuavi Espiritu Santo jei vae güi, jare Espiritu Santo jei vae uyuavi peiño pere vae güi. Mocui reve uyuavi uyugüi. Jáeramo pepuere'á piyapo pipota piyapo vae. ¹⁸ Èrei pico yave Espiritu Santo jei vae re, mboroyocui mbaeti etei mbaepuere güinoi peré.

¹⁹ Jare jocua mbaeyoa reta yae vae reño yaico yave, yayapo vae uyepocuavi'á co. Echa'á yayapo cuarãí: Yayuvanga menda re. Yayapo aguasa. Yayapo pichü vae. Yanembiquere. ²⁰ Yambiadora tumpa-raanga reta. Yayapo paye reta. Ñanemitarēi. Yayovaicho ñru vae reta ndive. Ñanemiariro. Yandepochi catu ñru vae reta coti. Yaipota mbaembae yandiyupe peguarãño. Yayembiyao ñru vae reta güi. Yarovia moromboc añete mbae vae. ²¹ Ñaneacatãa yanderapicha re. Yapuruycua. Yasaviyo. Uasa ete yacaru. Jare ñru cua nunga icavi mbae vae yayapo. Echa'á amimbeu ma peve quirãí cua nunga icavi mbae vae jecuaeño uyapo vae reta ndarau yugüireco Tumpa iporoyocua pe. Jare añave amimbeu ye peve.

²² Èrei Espiritu Santo umee yandev mburuau, yerovia, mbiacatu, mbiaguasu, mbiacavi, mburugüirovia, ²³ jare ñemimichi. Yayapo icavi vae jare ñañemoa. Cua reta re ipuere'á etei co mboroyocui. ²⁴ Jare Cristo imbae reta umbai ma jei vaeño. Echa'á uipota'á ma tenonde yave uau jare uipota vae reño vae. ²⁵ Echa'á Espiritu Santo umee yandev tecove ipiau vae. Jáeramo yaico Espiritu Santo jei vae re. ²⁶ Agüiye yaipota ñru vae reta yanembicate vaerã. Agüiye yayovaicho uyupii. Agüiye ñaneacatãa yandiyee.

6

Piyemborimbori

¹ Cheriví reta, ime yave quía uyepocouca mbae icavi mbae vae uyapo yave vae, pe reta peguata cavi Tumpa coti vae piyapicatu piñemimichi reve. Piñemoa ngatu. Echa'á aramoi añã guasu uipotata vi uyapoca vaerã peve mbae icavi mbae vae. ² Piyemborimbori, tivita poi vae reta piyemborimbori pevoi vaerã rami. Echa'á jucuarãí piyapo yave, piyapota co Cristo iporoyocui.

³ Èrei ime yave quía uyembutuicha vae, uyembitavi co. Echa'á jae mbae'á co. ⁴ Èrei penti penti tuyemboe quirãí ipuere uicuaa icavi ra mbaraviqui uyapo vae. Jayave mbaraviqui icavi vae uyapo yave, ipuere ta uyerovia jese iyee. Ndarau uipota ñru vae reta umbiyerovia vaerã jese. ⁵ Echa'á penti penti tuyapo iparaviqui, yepe tēi yavai chupe penti tivita poi vae rami.

⁶ Tumpa iñee re uyemboe vae tumee mbaembae güinoi vae güi oporomboc vae pe.

⁷ Agüiye piyembitavi. Pepuere'á pemitavi Tumpa. Echa'á Tumpa umeeta penti penti pe uyapo vae rupi. ⁸ Ime yave quía ico jei vae reño vae, Tumpa ndarau umee chupe mbae icavi vae. Èrei ime yave quía ico Espiritu Santo jei vae re vae, Tumpa umeeta chupe tecove opa mbae vae Espiritu Santo rupi. ⁹ Jare agüiye yandecueri icavi vae yayapo vae güi. Echa'á Tumpa umbijecoviata yandev, yandecueri'á yave. ¹⁰ Jáeramo yandepuere yave, yayapo icavi vae opaete vae pe. Icavi ete co yayapo vaerã icavi vae upurugüirovia vae reta pe.

Pablo uyerovia yandeYa Jesucristo icurusu re

¹¹ Mase, tuicha co cua cuatía reta chepo pe etei aicutía peve vae. ¹² Uipotata uyepiucua ñru vae reta pe vae reta uipotata ete piñemicircuncidaca vaerã, agüiye vaerã ñru vae reta uyapo icavi mbae vae chupe reta Cristo icurusu jeco pegua. ¹³ Èrei jae reta etei uyapo'á mboroyocui jei vae, yepe tēi uñemicircuncidaca reta. Èrei uipotata pe reta piñemicircuncidaca vaerã, jae reta uyerovia ete vaerã ñru vae reta jovaque, jucuarãí piyapo yave. ¹⁴ Èrei yandeYa Jesucristo icurusu reño ayeroviata ñru vae reta jovai. Jesucristo re arovia ramo, opaete mbaembae upurugüirovia mbae vae reta ueca vae mbae'á co cheve. Penti cuimbae

uyecutu curusu re vae umano mbaembae ivi pegua güi. Jae ramiño vi che aeca'ã ma mbaembae ivi pegua. ¹⁵ Echa'ã Cristo Jesús re yarovia yave, ñañemircuncidaca yave mbae'ã co, jare ñañemircuncidaca'ã yave mbae'ã co. Jaeño icavi Tumpa pe ñanoi vaerã tecove ipiau vae. ¹⁶ Jare opaete cua tecove ipiau vae re yugüireco vae pe tumee Tumpa mbiacatu jare mburuparareco. Tumee vi Israel pegua reta Tumpa imbae vae pe.

¹⁷ Añave güive agüiye quía tachemambeco. Echa'ã chere re uyecuaa chepere reta. Cua anoi yandeYa Jesús pe ayeyocui ramo. ¹⁸ Cherivi reta, yandeYa Jesucristo ipiacavi toĩ pe ndive. Amén

LA CARTA DEL APOSTOL SAN PABLO A LOS EFESIOS

¹ Che co jae Pablo. Che co jae Jesucristo jemimondo Tumpa jei vae rupi. Aicuatía cua tupapire Efeso pe pico vae pe. Tumpa peñoño tee iyupeguarã, jare piyeyocui cavi Cristo Jesús pe. ² YandeRu Tumpa jare yandeYa Jesucristo tumee peve ipiacavi jare ipiacatu.

Tumpa yanemivendise Cristo rupi

³ Yambiadora Tumpa. Jae co yandeYa Jesucristo Tu. Tumpa umee yandeve jeta mbaembae icavi vae ara pegua Espiritu Santo rupi, Cristo re yarovia ramo. ⁴ Echa'ã ndei ivi uyeyapo mbove, Tumpa yandeparavo, yande ñaï vaerã Cristo imbaerã. Cua uyapo, ñaneñoño tee vaerã iyupeguarã, jare yanembujupi vaerã jae jovaque. ⁵ Tumpa yanderau. Jáeramo tenonde yave yandeparavo yayeyapo vaerã tai retarã Jesucristo rupi. Echa'ã cua iquirëi ete uyapo jae jei vae rupi. ⁶ Jare cua uyapo, yambiadora vaerã ipiacavi tuicha vae jeco pegua. Tumpa ipiacavi ete yandeve Tai uau vae rupi. ⁷ Jesucristo yanderepi ma. Echa'ã umano yanderé. Jáeramo Tumpa umbiasa yandeve yanembaeyoa reta. Echa'ã jae ipiacavi tuicha ete co. ⁸ Tumpa iyaracuaa catu jare opaete uicuaa. Jáeramo ipiacavi ete yandeve. ⁹ Tenonde yave uicuaaca'ã iquirëi uyapo vae. Ërei añave uicuaaca yandeve iquirëi uyapo vae. Cua uyapo jae jei vae rupi. ¹⁰ Cua co Tumpa iquirëi uyapo vae: Umbatita opaete mbaembae uyeyapocue vae, Cristo oi vaerã iYarã - opaete mbaembae ara pe ñugüinoi vae, jare opaete mbaembae ivi pe ñugüinoi vae. Cua Tumpa uyapota ara iyapi yave.

¹¹ Tenonde yave Tumpa yandeparavo ñanoi vaerã jae umeeta yandeve. Jae yandeparavo, yande ñaï vaerã Cristo imbaerã. Jare Tumpa cua uyapo iquirëi ramo. Echa'ã jae uyapo opaete mbaembae jae jei vae rupi. ¹² Cua Tumpa uyapo uyembiaadoraca vaerã ñru vae reta pe ore rupi. Echa'ã ore rani ndugüirovia Cristo re. ¹³ Jare pe reta vi perovia Cristo re, piyandu yave ñee añete vae. Echa'ã jocua ñee icavi vae umimbeu peve quirã piyembiasaca vaerã. Jare perovia Cristo re yave, Tumpa umee peve Espiritu Santo, uicuaaca vaerã pe reta jae imbae co. Echa'ã Tumpa jei umee vaerã Espiritu Santo. ¹⁴ Tumpa umee yandeve Espiritu Santo, uicuaaca vaerã ñanoita opaete Tumpa umeeta yandeve vae. Cua Tumpa umeeta yandeve yanderepi ete yave. Yande co jae imbae. Jare Tumpa cua uyapo yave, uyembiaadoracata co cua jeco pegua.

Pablo uyerure Tumpa pe upurugüirovia vae reta re

¹⁵ Jáeramo che aicuaa güive quirã pe reta perovia yandeYa Jesús re, jare quirã peau opaete Tumpa oñoño tee iyupeguarã vae reta, ¹⁶ jecuaeñoi amee yasurupai Tumpa pe peré, jare jecuaeñoi chemandúa peré, ayerure Tumpa pe yave. ¹⁷ Tumpa tumee peve aracuaa Espiritu Santo rupi, jare tuicuaaca peve mbaembae, picuaa cavi vaerã Tumpa regua. Tumpa co jae yandeYa Jesucristo uicuaaca yandeve vae. Jae co yandeRu uyembiaadoraca vae. ¹⁸ Tumpa tumee peve aracuaa, picuaa vaerã quirã pepuere peãro piyerovia re. Echa'ã jae preparavo cuarã. Tumpa tuicuaaca vi peve quirã uyembiaadoraca eteta opaete vae pe umeeta yandeve vae jeco pegua. Echa'ã jae ñaneñoño tee iyupeguarã. ¹⁹ Tumpa tuicuaaca vi peve quirã tuicha ete imbaepuere yanembori vaerã. Echa'ã yande yarovia Cristo re. Tumpa uicuaaca ma tuicha ete co cua imbaepuere. ²⁰ Echa'ã cua imbaepuere rupi Tumpa umbijecove ye Cristo güeru umanocue vae reta ipite güi, jare umee chupe uguapi vaerã iyacata coti ara pe. ²¹ Cristo imbaepuere tuicha ete opaete mburuvicha reta ara pegua jare ivi pegua jare ipotave mbaepuere güinoi vae imbaepuere güi. Cristo imbaepuere tuicha ete opaete cua ara reta pe mbaepuere güinoi vae reta jare opaete ara reta outa vae pe mbaepuere güinoita vae reta imbaepuere güi. ²² Echa'ã Tumpa umee Cristo pe ico vaerã opaete vae iYarã. Umee vi chupe ico vaerã upurugüirovia vae reta iYarã. ²³ Echa'ã upurugüirovia vae reta Cristo jete co. Jáeramo upurugüirovia vae reta jare Cristo pentiño co. Jare Tumpa umee opaete mbaembae Cristo pe.

2

Tumpa yanembiasa ipiacavi jeco pegua

¹ Jare Tumpa umee ma peve tecove ipiau vae. Echa'ã tenonde yave penoi'ã tecove ipiau vae pereco icavi mbae vae jare pembaeyoa reta jeco pegua. ² Jare jocua jeco pegua jecuaeño piyapose icavi mbae vae upurugüirovia mbae vae reta jeco rami. Echa'ã jucuarã uipota piyapo vaerã jocua mburuvicha icavi mbae vae yandepuere mbae yaecha vae - jae co jocua añe guasu upurugüirovia mbae vae reta ipia pe uparaviqui oi vae. Jucuarã uparaviqui, agüiye vaerã jae reta uyapo Tumpa jei vae. ³ Tenonde yave opaete yande vi yaico yande yae vae reño jae reta rami. Echa'ã yaicose yanderete jare yandepiyemingueta

uipotava vae re. Jáeramo Tumpa uiporaracata tēi yandeve, opaete ĩru vae reta pe uiporaracata rami. Echa'ã yande vi ivi pegua reta co jae reta rami. ⁴ Ērei Tumpa yandeparareco ete, jare yanderau ete. ⁵ Jáeramo umee yandeve tecove opa mbae vae yaico vaerã Cristo ndive, yepe tēi tenonde yave ñanoi'ã tecove opa mbae vae yanembaeyoa reta jeco pegua. Tumpa yanembiasa ipiacavi jeco pegua. ⁶ Tumpa umbijecove ye Cristo Jesús güeru umanocue vae reta ipite güi. Jae ramiño vi umee yandeve tecove opa mbae vae Cristo Jesús ndive, jare yandeapo pentiño Cristo Jesús ndive. ⁷ Cua uyapo, uicuaaca vaerã ara reta outa vae pe quirã tuicha ete co ipiacavi. Cua ipiacavi uicuaaca ma yandeve Cristo Jesús rupi. ⁸ Echa'ã Tumpa yanembiasa ipiacavi jeco pegua, yapurugüirovia ramo. Yande yamingana'ã etei yembiasa. Jae co Tumpa umeeiño yandeve vae. ⁹ Mbaeti quia ipuere umingana yembiasa ipotave mbaraviqui rupi, agüiye vaerã quia ipuere jei: "Cheparaviqui rupi co amingana yembiasa." ¹⁰ Echa'ã Tumpa yandeapo. Jare yandeapo ma penti ramiño Cristo Jesús ndive, yande yayapo vaerã icavi vae. Echa'ã tenonde yave Tumpa iquirēi jecuaeño yayapo vaerã icavi vae.

Cristo yanembipiacatu Tumpa ndive

¹¹ Jáeramo pemandúa cua re: Pe reta co jae judío mbae vae reta. Jare jocua uñemicircuncidaca jee vae reta - jae reta uñemicircuncidaca co jete pe - jae reta pembijee uñemicircuncidaca mbae vae reta. ¹² Jáeramo jocua ara reta pe Cristo mbae'ã co peve. Echa'ã pe reta Israel pegua reta'ã co, jare Tumpa jei umeeta Israel pegua reta pe vae pemaerã'ã co. Jáeramo peãro'ã mbae piyerovia reve. Echa'ã picose cua ivi pe Tumpa picuaa mbae reve. ¹³ Tenonde yave pe reta mbari pico Tumpa güi. Ērei añave piyeyapo penti ramiño Cristo Jesús ndive, jare coiño ma co pico Tumpa güi Cristo imano jeco pegua. ¹⁴ Echa'ã Cristo co jae mbiacatu umee yandeve vae. Jae uyapo penti ramiño judío reta jare judío mbae vae reta. Tenonde yave judío reta jare judío mbae vae reta oyovaicho uyupii. Uyembiyao reta uyugüi. Ērei Cristo umbai ma yembiyao. ¹⁵ Echa'ã Cristo umano yave, umbai mboroyocui. Echa'ã mboroyocui umimbeu judío reta pe mbae uyapo vaerã. Jáeramo Cristo umbai mboroyocui, uyapo vaerã mocui reve penti ramiño jae ndive. Jucuarã umee mbiacatu. ¹⁶ Jare cua uyapo, umbipiacatu vaerã Tumpa ndive mocui reve penti ramiño imano jeco pegua. Echa'ã imano jeco pegua oyovaicho'ã ma uyupii.

¹⁷ Jayave ou umimbeu mbiacatu regua pe reta tenonde yave mbari pico chugüi vae pe jare ore tenonde yave coiño nduico chugüi vae pe. ¹⁸ Echa'ã Cristo rupi mocui reve yandepuere yaya yandeRu re Espiritu Santo rupi. Echa'ã Espiritu Santo pentiño co. ¹⁹ Jáeramo pe reta ambie ivi pegua reta rami'ã ma co. Pe reta co jae uñeño tee Tumpa peguarã vae reta jentaigua reta. Pe reta co jae Tumpa jentarã reta. ²⁰ Yamijaanga penti tenta. Temimondo reta jare Tumpa iñee umimbeu vae reta tenta iguapicarã oñono vae reta rami co, jare pe reta co jae tenta rami. Jesucristo etei co jae ita uñeño tenonde tentarã vae rami. ²¹ Opaete tenta uyeyapocavi oĩ ita uñeño tenonde tentarã vae ndive, jare uyeyapo oĩ penti tenta uñeño tee yandeYa peguarã vae. ²² Pe reta vi penti ramiño co yandeYa ndive. Jáeramo pe reta vi co jocua tenta rami. Echa'ã Tumpa ico jocua tenta pe Espiritu Santo rupi.

3

Tumpa uicuaaca Pablo pe tenonde yave uyecuaa mbae vae

¹ Jáeramo che etei ayerure Tumpa pe peré. Che co jae penti pereso pereco pegua, Cristo Jesús pe ayeyocui ramo - pe reta co jae judío mbae vae reta. ² Picuaa ma co aipo quirã Tumpa uicuaaca cheve ñee Tumpa ipiacavi regua, che aicuaaca-yuapi ye vaerã peve. Cuarã ayeyocui aĩ Tumpa pe. ³ Picuaa ma co aipo quirã jae etei uicuaaca cheve jocua tenonde yave uyecuaa mbae vae. Echa'ã cua regua aicuatía ma peve mbovi ñee peño. ⁴ Pingueta yave, picuaa cavita co quirã che aicuaa jocua Cristo regua tenonde yave uyecuaa mbae vae. ⁵ Tenonde yave cua uyecuaa'ã etei ivi pegua reta pe. Ērei añave Tumpa uicuaaca temimondo oñono tee iyupeguarã vae reta pe jare iñee umimbeu vae reta pe. Jae uicuaaca chupe reta Espiritu Santo rupi. ⁶ Jae co cua: Uyandu yave ñee icavi vae, jare güirovia yave Cristo Jesús re, judío mbae vae upurugüirovia vae reta güinoita imbaerã judío upurugüirovia vae reta ndive, jare mocui reve uyeyapota penti ramiño - penti jete rami - jare mocui reve güinoita Tumpa jei umeeta vae. ⁷ Che ayeyocui Tumpa pe. Ipiacavi jeco pegua Tumpa umee cheve jae imbaepuere rupi che amimbeu vaerã ñee icavi vae. ⁸ Yepe tēi che co jae uñeño tee Tumpa peguarã vae reta jaicuegua ete, Ērei Tumpa cua umee cheve ipiacavi jeco pegua, che amimbeu vaerã judío mbae vae reta pe quirã yaicocatu ete co Tumpa coti, Cristo re yarovia yave. Echa'ã mbaeti quia ipuere uicuaa cua regua ipiyemingueta rupiño. ⁹ Jare Tumpa umee cheve aicuaaca vaerã opaete vae pe quirã Tumpa umee cheve ayeyocui vaerã chupe cua tenonde yave uyecuaa mbae

vae re. Echa'ã tenonde yave Tumpa uicuaaca'ã etei quíã pe cua. Tumpa co jae opaete mbaembae iyapoa. ¹⁰ Cua Tumpa umee cheve, mburuvicha reta jare mbaepuere güinoi vae ara pe ñugüinoi vae reta uicuaa vaerã quirã: Tumpa iyaracuaa catu co. Cua uicuaata reta upurugüirovia vae reta rupi. ¹¹ Echa'ã cuarã: Tumpa jecuaeño iquirëi uyapo yandeYa Jesucristo rupi. ¹² Yandepuere yaya Tumpa re Cristo rupi. Echa'ã yarovia ma Cristo re ramo, yandepuere yaya yaquie mbae reve. ¹³ Jáeramo agüiye pepiatiti aiporara pereco pegua vae re. Pepuere pemiadora Tumpa cua re.

Cristo ipuruau

¹⁴ Jáeramo che ayeatica yandeYa Jesucristo Tu jovai. ¹⁵ Opaete jentarã ara pe ñugüinoi vae reta jare jentarã ivi pe ñugüinoi vae reta güinoi jee chugüi. ¹⁶ Ayerure Tumpa pe umee vaerã peve mbaepuere. Echa'ã jae imbaepuere jeco pegua uyembadoraca ete. Jare cua mbaepuere rupi Tumpa iEspíritu tapemimirãta pepia pe. ¹⁷ Tuyecuaa cavi quirã: Cristo ico pepia pe pepurugüirovia jeco pegua. Tumpa tapemimirãta jare tapemiatangãtu ipuruau pe, ¹⁸ pepuere vaerã picuaa cavi opaete uñeño tee Tumpa peguarã vae reta ndive quirã tuicha ete co Cristo ipuruau, ¹⁹ jare picuaa vaerã Cristo ipuruau, yepe tã ipuere'ã quíã uicuaa cavi ete opaete jocua mburuau. Pepia titínee Tumpa pe.

²⁰ Jare añave yambiadora Tumpa. Echa'ã jae ipuere ete opaete yande yayerure chupe jese vae güi, jare opaete yandepia pe yayemingueta jese vae güi. Jeta ete uyapota yandeve imbaepuere yandepia pe uparaviqui vae rupi. ²¹ Tumpa tuyembadoraca opaete vae pe upurugüirovia vae reta rupi jare Cristo Jesús rupi jaeño mai pegua. Amén.

4

Penti ramiño Espíritu Santo rupi

¹ Che co jae penti pereso, yandeYa pe ayeyocui ramo. Che pumiñera jecuaeño pico cavi vaerã, ñru vae reta uicuaa vaerã Tumpa peparavo co. ² Piñemimichi uyucoti. Agüiye pepochi piyupe. Pepiaguasu piyupe. Piyerau ramo, agüiye piñeengata piyupe. ³ Piñemiatangãtu pico vaerã penti ramiño pepiacatu reve Espíritu Santo rupi. ⁴ Cristo jete pegua reta pentiño co, jare Espíritu Santo pentiño co. Jae ramiño vi Tumpa peparavo, peãro vaerã piyerovia reve penti ramiño. ⁵ Ime vi pentiño yandeYa, jare opaete yarovia yandeYa re, jare opaete yayembibautizaca Espíritu Santo pe. ⁶ Tumpa vi pentiño co. Jae co yandeRu. Jae co yandeYa. Jae uparaviqui opaete yande rupi. Jae ico yandepia pe.

⁷ Ërei Cristo umee yandeve penti penti pe ipiacavi, yandepuere vaerã yayapo mbaraviqui Cristo uipota yayapo vaerã vae. ⁸ Echa'ã Tumpa ñee pe uyecuatiã oí cuarã:

“Uyupi oo ara pe yave, güiraa pereso reta, jare umee mbaepuere ivi pegua reta pe Tumpa iparaviqui uyapo vaerã.” Jucuarã uyecuatiã oí.

⁹ Tapirandu peve, ¿mbae pa uipota jei cua uyupi oo ara pe jei vae? Uipota jei ugüeyi rani vi co ivi igüi pe etei. ¹⁰ Jocua ugüeyi vae co jae uyupi oo ivate ete opaete ara reta güi vae etei. Jucuarã uyupi, uyeyapo vaerã opaete mbaembae iyarã. ¹¹ Jare Cristo etei umee amocue vae pe temimondo retarã yugüireco vaerã. Jare umee amocue vae pe Tumpa ñee umimbeu vaerã. Umee vi amocue vae pe umimbeu vaerã ñee icavi vae. Umee vi ñru vae reta pe uyandareco vaerã upurugüirovia vae reta re, jare ñru vae reta pe omboe vaerã upurugüirovia vae reta. ¹² Cua Cristo uyapo, uñeño tee Tumpa peguarã vae reta ipirãta vaerã ipurugüirovia re, jare reta ipuere vaerã uparaviqui Tumpa pe, Cristo jeterã uyeyapo vaerã. ¹³ Cristo uipota yayeyapo vaerã penti ramiño yandepurugüirovia rupi, yaicuaa cavi vaerã jae co Tumpa Tai. Uipota yayeyapo vaerã penti cuimbae ipirãta vae rami. Jare jucuarã yayeyapota co, yandepia tinee oí Cristo pe yave. ¹⁴ Cristo uipota'ã yaico vaerã sambiai reta rami. Echa'ã sambiai reta uicuaa'ã mbae ra güirovia vaerã. Echa'ã penti ara ipuere güirovia penti moromboe, jare ñru ara ipuere güirovia ñru moromboe. Echa'ã moromboe añete mbae vae re oporomboe vae reta ipoqui ete co upurumbitavi vaerã. ¹⁵ Ërei yande jecuaeño yae añete vae yayerau reve. Jucuarã yave, yaicota ucuacuaa vae reta rami, Cristo uipota rami. Echa'ã jae co upurugüirovia vae reta ñãca. ¹⁶ Cristo jare upurugüirovia vae reta penti cuimbae rami co. Echa'ã opaete cuimbae jete jare opaete iyupapiapia uparaviqui penti ramiño, icavi oí vaerã cuimbae. Jae ramiño vi opaete upurugüirovia vae reta uparaviqui penti ramiño uyerau reve, Cristo jeterã uyeyapocavi vaerã.

Tecove ipiau vae

¹⁷ Jáeramo che amimbeu peve yandeYa jee re cua: Agüiye ma pico upurugüirovia mbae vae reta yugüireco rami. Echa'ã jae reta yugüireco ipiyemingueta cavi mbae reve. ¹⁸ Echa'ã ipiyemingueta uñemipitumimbi ma. Güinoi'ã tecove Tumpa umee vae. Echa'ã

uicuaa'ã Tumpa regua, ipiatanta ramo. ¹⁹ Jecuaeño imbiquere, jare imara'ã etei. Echa'ã uipota ete reta uyapo vaerã opaño mbae pichii vae. ²⁰ Ërei jucuarã'ã co Cristo pemboe. ²¹ Piyandu ma co aipo chupe, jare piyemboe ma co aipo añete vae re. Echa'ã añete vae co jae Jesús. ²² Jáeramo agüiye ma pico picose rami. Peeya piyugüi pereco mai indechicue pichii vae. Echa'ã picose pe pere vae reño, jare jucuarãi piyembitavi. ²³ Tuyembipiau pepiyemingueta. ²⁴ Pipisi teco mai ipiau vae. Echa'ã teco mai ipiau vae jupi co, jare uyapoca'ã etei mbaeyoa peve. Cua teco mai ipiau vae icavi co Tumpa pe.

²⁵ Jáeramo agüiye ma peapu piyupe. Opaete pere añete vae perapicha pe. Echa'ã opaete yande penti ramiño co.

²⁶ Pepochi yave, agüiye peyoa. Agüiye pepitu pearasi reve.

²⁷ Agüiye pemaño aña guasu re mbaepuere güinoi vaerã peré.

²⁸ Imondase vae agüiye ye ma timonda. Ërei tuyapo ipo pe mbaraviqui icavi vae, ime vaerã güinoi mbae umee vaerã iparavete vae pe.

²⁹ Agüiye pemoë ñee pichii vae. Ërei pemoë ñee icavi vae, pembedi vaerã ñru vae reta. Echa'ã jucuarãi Tumpa ipuere ombori uyapisaca peré vae reta. ³⁰ Jare agüiye pembediatiti Tumpa iEspíritu Santo. Echa'ã Tumpa umee ma peve Espiritu Santo, uicuaaca vaerã pe reta jae imbae co. Jare Espiritu Santo icota pe reta ndive, Tumpa perepi ete regua.

³¹ Agüiye pembasi pico piyupe. Agüiye pepochi piyupe. Agüiye pearasi piyupe. Agüiye piñeengata piyupe. Agüiye pere icavi mbae vae piyupe. Agüiye piyapo icavi mbae vae piyupe. ³² Ërei pepiacavi piyupe. Piyerau. Piyembiasa uyupii. Echa'ã Tumpa pembiasa ma Cristo rupi.

5

Yaico Tumpa jei vae re

¹ Jecuaeño pico Tumpa jei vae re. Echa'ã Tumpa co jae yandeRu jare jae yanderau. ² Jáeramo pico piyerau reve, Cristo yanderau rami. Echa'ã Cristo uñemee umano vaerã, penti maemimba uyeyucacue Tumpa pe uñemee vae rami. Jare cua uyapo umbai vaerã yanembaeyoa reta. Cua umbiyerovia Tumpa, mbae ipiche cavi vae upurumbiyerovia rami.

³ Ërei agüiye etei piyapo aguasa jare opaete mbae pichii vae, jare agüiye pipota ñru vae reta imbaembae. Echa'ã Tumpa peñoño tee ma iyupeguarã. ⁴ Jare agüiye vi piyemingueta imbiquere vae reta uyemingueta rami. Agüiye piyemingueta iyaracuaa mbae vae reta uyemingueta rami. Agüiye peyurupichii ñee icavi mbae vae pe. Echa'ã icavi'ã piyemingueta vaerã jucuarãi. Ërei cua mbaembae icavi mbae vae pere vaerãve pemee yasurupai Tumpa pe. ⁵ Echa'ã pe reta picuaa cua: Aguasa uyapo vae reta, jare opaete mbae pichii vae uyapo vae reta, jare ñru vae reta imbaembae uipota vae reta - echa'ã uipota ete ñru vae reta imbaembae Tumpa güi - ndarau yugüireco Cristo jare Tumpa iporoyocua pe. ⁶ Agüiye pemaño quia re pemitavi vaerã cua re. Echa'ã cua icavi mbae vae jeco pegua Tumpa uiporaracata co Tumpa jei vae uyapo'ã vae reta pe. ⁷ Jáeramo agüiye pico jae reta yugüireco rami.

⁸ Echa'ã tenonde yave pe reta picose yugüireco pitumimbi pe vae reta rami. Ërei añave pico tembipe yandeYa umee peve vae pe. Jecuaeño pico yugüireco tembipe pe vae reta rami. ⁹ Echa'ã tembipe pe yugüireco vae reta ipiacavi, jare jupi vae uyapo, jare jei añete vae. ¹⁰ Jecuaeño pipota picuaa yandeYa uipota piyapo vaerã vae. ¹¹ Agüiye etei piñemñru pitumimbi pe yugüireco vae reta ndive. Echa'ã jocua uyapo reta vae icavi'ã Tumpa pe. Ërei picuaaca icavi mbae vae co jocua uyapo reta vae. ¹² Echa'ã penti ñemimaraca co yayemingueta vaerã jocua uyapo viari reta vae re. ¹³ Tembipe oñ yave, opaete uyecuaa cavi, jare yandepuere yaicuaaca icavi mbae vae co opaete jocua mbaembae. Echa'ã jocua uyapo opaete uyecuaa cavi vaerã vae tembipe co. ¹⁴ Jáeramo Tumpa jei oque vae pe cuarã: "Esarecoño ma.

Icove ye penti ou umanocue vae reta ipite güi vae rami.

Cristo tumee ndeve tembipe."

Jucuarãi jei.

¹⁵ Jáeramo piñemiatangātu pico cavi vaerã. Agüiye pico iyaracuaa mbae vae reta yugüireco rami. Pico iyaracuaa catu vae reta yugüireco rami. ¹⁶ Jecuaeño piyapo icavi vae. Echa'ã jeta vae uyapo icavi mbae vae. ¹⁷ Jáeramo agüiye pearacuaa mbae vae echa. Ërei picuaa cavi yandeYa jei vae. ¹⁸ Jare agüiye pesavipo. Echa'ã usavipo vae reta uyapo jeta mbae icavi mbae vae. Ërei pemaño Espiritu Santo re umitinee vaerã pepia. ¹⁹ Picuaaca quirã piyerovia ete canta reta yambiadora Tumpa pipe vae pe. Pecanta jare pemiadora

yandeYa pepia pe. ²⁰ Jecuaeño pemee yasurupai opaete mbae re yandeRu Tumpa pe yandeYa Jesucristo jee re.

Yayeyocui yandiyupe

²¹ Piyeyocui piyupe, pipiu Cristo ramo.

²² Cuña reta tuyeyocui ime pe, uyeyocui yandeYa pe rami. ²³ Echa'a cuimbae oyocui jembireco, ñaneãca oyocui yanderete rami. Jae ramiño vi Cristo co jae upurugüirovia vae reta iñaca. Jare upurugüirovia vae reta co jae Cristo jete, jare Cristo co jae upurugüirovia vae reta umbiasa vae. ²⁴ Jare upurugüirovia vae reta uyeyocui Cristo pe. Jáeramo jae ramiño vi cuña reta tuyeyocui ime pe opaete mbae re.

²⁵ Cuimbae reta tuau jembireco, Cristo uau upurugüirovia vae reta rami. Echa'a jae uñemee umano vaerã jese reta, ²⁶ oñono tee vaerã iyupeguarã, jare oyoe vaerã. Echa'a iñee yandeyoe, mbae yayoe i pe rami. ²⁷ Jucuarãi Cristo uyapo, upurugüirovia vae reta uyembutuichaca vaerã jae jovai ñugüinoi yave. Ndarau güinoi mbae iquia vae jare mbae picñi vae. Ndarau etei güinoi cua nunga mbaembae. Echa'a Cristo uñemee umano vaerã, upurugüirovia vae reta uñeño tee vaerã chupeguarã, jare icavi ete ñugüinoi vaerã. ²⁸ Cuimbae reta tuau jembireco, jete uau rami. Cuimbae jare jembireco pentiño co. Jáeramo jocua uau jembireco vae jae co uyerau. ²⁹ Echa'a mbaeti etei quia umitarẽi jete. Opaete vae umingaru jete, jare uyandareco jese. Jae ramiño vi Cristo uyandareco upurugüirovia vae reta re. ³⁰ Echa'a yande co jae Cristo jete pegua reta. Yande co jae Cristo isoo jare icãgüe pegua reta. ³¹ Cua jeco pegua penti cuimbae tusiri tu jare ichi güi, jare tuñemiru jembireco ndive, mocui reve uyeyapo vaerã penti ramiño. ³² Yandepuere'a etei yaicuaa cavi cua regua. Ërei chemiari ai peve Cristo jare upurugüirovia vae reta re. ³³ Ërei penti penti tuau jembireco, jae uyerau rami. Jare cuña tuiþiu ime.

6

¹ Cunumi reta jare cuñatai reta tuyapo tu jare ichi jei vae, yandeYa re güirovia ramo. Echa'a cua jupi co. ² Tumpa umimbeu Moisés rupi mboroyocui reta. Jare mboroyocui itenondegua vae co cua: "Iþiu nderu jare ndesi, ³ ndico cavi vaerã, jare ndicopucu vaerã ivi pe." Jucuarãi Tumpa jei umeeta vae.

⁴ Jare tu reta agüiye tumbiarasiño isambiai reta. Ërei tumbicuacuaa cavi. Tomboe jupi vae re, jare tumbiaracuaa, yandeYa uipota rami.

⁵ Uyeyocui vae reta tuyapo ipatrón jei vae uipiu reve jare umbutuicha reve. Iþiaquirẽi reve tuyeyocui ipatrón pe. Tuyeyocui chupe, Cristo pe uyeyocui rami. ⁶ Agüiye tuyeyocui cavi ipatrón pe jae umae oi jese yaveño, umbiyerovia vaerãño. Tuyeyocui chupe, Cristo pe uyeyocui ramo, jare Tumpa jei vae iþiaquirẽi reve uyapo ramo. ⁷ Tuyeyocui chupe, iquirẽi ete ramo. Tuyeyocui chupe, Cristo pe uyeyocui rami. Echa'a cuimbae peño'a uyeyocui. ⁸ Tuicuaa cua: Ipotave vae - penti uyeyocui vae ani penti uyeyocui mbae vae - mbae icavi vae uyapo yave, yandeYa uyapota vi chupe mbae icavi vae.

⁹ Jare patrón reta tuyapo icavi vae jembiocui reta coti. Agüiye jecuaeño tuyuvanga catu. Echa'a tuicuaa jae reta vi güinoi co iYa ara pe. Jare yandeYa ara pe oi vae uau'a penti vaeño ñru vae güi.

Mbaepuere yandeYa ipuere umee yandeve vae

¹⁰ Taiçue rupi ete tae peve, cherivi reta, cua: Piñemiatangãtu jocua mbaepuere yandeYa ipuere umee yandeve vae re. ¹¹ Piporu opaete Tumpa ipuere umee yandeve vae, pepuere vaerã piyerepi opaete mbae icavi mbae vae aña guasu uipota uyapo peve vae güi. ¹² Echa'a ñañerãro'a ñai ivi pegua reta ndive. Ñañerãro ñai espíritu icavi mbae vae ara pe ñugüinoi vae reta ndive. Jae reta co ivi pegua pitumimbi pe yugüireco vae reta iya reta, jare mbaepuere güinoi reta oporoyocui vaerã. ¹³ Jáeramo piporu opaete Tumpa ipuere umee yandeve vae, agüiye vaerã pemaño piyee icavi mbae vae uñerãro pe ndive vae reta pe, jare piñerãro yave, jecuaeño pepirãta vaerã. ¹⁴ Jáeramo piñemimãrãta. Yamijaanga sundaro. Sundaro güinoi mbaembae ipuere vaerã uñerãro cavi. Jae ramiño vi Tumpa umee yandeve vae yanembupuere, yandepuere vaerã ñañerãro cavi. Echa'a pere yave añete vae, icavita peve sundaro jumbicuaa icavi sundaro pe rami. Jare piyapo yave jupi vae, icavita peve sundaro icamisã fierro pegua icavi sundaro pe rami. ¹⁵ Jare pipota yave pemimbeu ñru vae reta pe ñee icavi vae mbiacatu regua, icavita peve sundaro ipipasa icavi sundaro pe rami. ¹⁶ Jare mburugüirovia jecuaeño penoi yave, icavita peve penti yeyopiaca icavi sundaro pe rami. Echa'a sundaro ipuere oyopia yeyopiaca pe opaete ui jovaicho reta uyapi pipe vae. Jae ramiño vi mburugüirovia jecuaeño penoi yave, ndarau piyapo icavi mbae vae, yepe tẽi aña guasu uipota ete piyapo vaerã. ¹⁷ Jare jecuaeño pemandúa yave quirãi Tumpa pembiasa ma co, icavita peve aca regua fierro pegua icavi sundaro pe rami. Jare piporu yave Tumpa iñee Espíritu Santo imbaepuere rupi, icavita peve penti quisepucu icavi

sundaro pe rami. ¹⁸Jecuaeño piyerure Tumpa pe mbaembae re. Jecuaeño piyerure Espiritu Santo rupi. Jecuaeño piñemiatangātu, agüiye vaerã pecueri. Jecuaeño piyerure Tumpa pe opaete uñeño tee Tumpa peguarã vae reta re. ¹⁹Piyerure ete cheré, Tumpa umee vaerã cheve chemiari vaerã aquiye mbae reve, aicuaaca vaerã ñee icavi vae tenonde yave uyecuaa mbae vae. ²⁰Echa'ã Tumpa chembou amimbeu vaerã cua ñee, jare cua ñee jeco pegua pereso aĩ. Piyerure cheré, amimbeu vaerã aquiye mbae reve. Echa'ã jucuarã icavi co amimbeu vaerã.

²¹Tíquico umimbeuta peve opaete mbaembae, picuaa vaerã cheregua jare ayapo aĩ vae regua. Tíquico co jae yanderivi. Aau co. Jae uyeyocui cavi yandeYa pe. ²²Jáeramo amondo pepi, picuaa vaerã oreregua, jare jae pembipiacatu vaerã.

²³Cherivi reta, yandeRu Tumpa jare yandeYa Jesucristo tumee peve mbiacatu jare mburuau jare mburugüirovia. ²⁴Tumpa tumee ipiacavi opaete mburuau opa mbae vae yandeYa Jesucristo coti güinoi vae reta pe. Amén.

LA CARTA DEL APOSTOL SAN PABLO A LOS FILIPENSES

¹ Che co jae Pablo, jare Timoteo ime cua pe oĩ che ndive. Ore nduyeyocui Cristo Jesús pe. Aicuatía cua tupapire Filipos pe pico vae pe - pe reta co jae tenondegua reta, jare İru upurugüirovia vae reta ombori vae reta, jare opaete İru uñeño tee Tumpa peguarã vae reta. Pe reta perovia Cristo Jesús re. ² YandeRu Tumpa jare yandeYa Jesucristo tumee peve ipiacavi jare ipiacatu.

Pablo uyerure Tumpa pe upurugüirovia vae reta re

³ Amee yasurupai Tumpa pe chemandúa peré ñave ñave. ⁴ Ayerure Tumpa pe opaete peré yave, jecuaeño ayerure ayerovia reve. ⁵ Echa'ã pe reta jecuaeño chembori amimbeu vaerã ñee icavi vae pe reta piyandu güive. ⁶ Tumpa umbipi ma uyapo penti mbaraviqui icavi vae pepia pe, jare aicuaa catu jae etei co jecuaeño uyapota jocua mbaraviqui Jesucristo ou ye regua. ⁷ Icavi co chepia pe ayemingueta vaerã cuarãi peré. Echa'ã puau ete. Peresoriru pe aĩ rambueve, jare aicuaaca yave İru vae reta pe ñee icavi vae Tumpa pegua co jare añete vae co, Tumpa jecuaeño umee cheve ipiacavi. Jare mbiacavi umee cheve vae umee peve vi. ⁸ Echa'ã Tumpa uicuaa quirãi che puau ete co, Jesucristo etei perau rami. ⁹ Jare ayerure Tumpa pe jecuaeño tucuacuaa pepuruau picuaa catu reve jare pearacuaa catu reve, ¹⁰ pipota vaerã piyapo icavi vae, pico cavi vaerã, agüye vaerã quia ipuere pembijeco mbae re Cristo ou ye regua. ¹¹ Ayerure jecuaeño piyapo vaerã mbaembae icavi vae jupi vae pegua Jesucristo rupi. Echa'ã cuarãi Tumpa uyembiadoraca.

Pablo jecuaeño uipota uyeyocui Cristo pe

¹² Cherivi reta, aipota picuaa vaerã quirãi uyeyapo cheve vae ombori ma uñemiai vaerã ñee icavi vae. Umbiavaĩ'ã etei. ¹³ Echa'ã opaete sundaro mburuvicha guasu jenta pe ñugüino vae reta jare opaete İru vae reta uicuaa quirãi che cua peresoriru pe aĩ Cristo pe ayeyocui ramo. ¹⁴ Jare jeta yanderivi reta uñemiatangãtu ma yandeYa coti, uicuaa reta peresoriru pe uyeyapo cheve vae ramo. Jare jae reta umimbeu Tumpa ifee uquiye mbae reve.

¹⁵ Añete co, amocue vae umimbeu Cristo regua ñacatãa cheré ramo, jare jovaichopota che ndive ramo. Ęrei İru vae reta umimbeu iquirẽi ramo. ¹⁶ Jocua jovaichopota che ndive vae reta umimbeu Cristo regua uipota tẽi cheacatãa vaerã jese reta ramo. Jucuarãi uipota tẽi aiporara vaerã, peresoriru pe aĩ rambueve. ¹⁷ Ęrei İru vae reta umimbeu Cristo regua, cherau ramo. Echa'ã uicuaa reta quirãi Tumpa cheñoño cua pe, aicuaaca vaerã İru vae reta pe ñee icavi vae Tumpa pegua co. ¹⁸ Ęrei icaviño co. Echa'ã opaete quirãi rupi jaeñoi umimbeu reta Cristo regua - amocue vae uipota tẽi uyapo icavi mbae vae cheve, jare İru vae reta uipota uyapo icavi vae cheve. Cua jeco pegua ayerovia aĩ. Jare jecuaeño co ayeroviata. ¹⁹ Echa'ã aicuaa opaete cua icavita co cheve, pe reta piyerure cheré ramo, jare Jesucristo iEspiritu chembori ramo. ²⁰ Cuarãi uyeyapota che aipota ete vae. Echa'ã jecuaeño aipota aico, agüye vaerã chemara mbae re. Aipota aico aquie mbae reve, jecuaeño Cristo uyembiadoraca vaerã cherete rupi, amano yave ani jecuaeño aico yave. ²¹ Echa'ã jecuaeño aico yave, ayeyocuiñotai co Cristo pe. Jare amano yave, icavi eteta co cheve. ²² Jare jecuaeño aico yave, aparaviquita Tumpa pe, icavi vae ayapo vaerã. Aicuaa'ã icavi ra amano vaerã, ani icavi ra aicoño vaerã. ²³ Mocui reve aipota tẽi. Echa'ã aipota amano, Cristo ndive aĩ vaerã. Cua icavi eteta co cheve. ²⁴ Ęrei icavi ndipo jecuaeño aico vaerã, chepuere vaerã pombori. ²⁵ Aicuaa catu cua. Jáeramo aicuaa jecuaeño aicota, apita vaerã opaete pe reta ndive, jare pombori vaerã, piñemimirãta vaerã pepurugüirovia re piyerovia reve, ²⁶ jare pe reta pemiadora ete vaerã Cristo Jesús chereco pegua, che aĩ ye yave pepi.

²⁷ Jaeño pico cavi. Echa'ã perovia ma ñee icavi vae Cristo regua. Jáeramo icavi co pico cavi vaerã. Aramoi aata apou pepi. Ęrei aa'ã yave, aipota pererãcua cavi vaerã cheve, quirãi piñemimirãta penti ramiño, jare quirãi piñemiatangãtu penti ramiño mburugüirovia ñee icavi vae regua penoi vae re, ²⁸ jare quirãi pequie'ã etei oyovaicho pe ndive vae reta güi. Echa'ã cua uicuaaca jae reta yugüiraata co cañitei pe. Ęrei cua uicuaaca vi Tumpa pemiãsa ma co. ²⁹ Echa'ã Tumpa umee peve perovia vaerã Cristo re. Jare ramiño vi umee peve piporara vaerã Cristo jeco pegua. ³⁰ Jáeramo pe reta piporara peĩ, tenonde yave cherecha aiporara rami, jare añave picuaa aiporara co.

2

Cristo uñemimichi, jare Tumpa umbiadoraca

¹ Jáeramo Cristo ipuere pemiatangātu ramo, jare Cristo ipuruau ipuere pembipiacatu ramo, jare Espíritu Santo ipuere imiari peve ramo, jare pepuere piyerau ramo, jare pepuere piyeparareco ramo, ² pico cavi uyupii, jare piyerau, jare penti ramiño pico pepia pe piyemingueta vae oyovaque reve. Cuarái piyapo yave, ayerovia eteta co. ³ Agüiye mbae piyapo piyovaicho reve uyupii. Agüiye mbae piyapo piyembicate reve. Ērei opaete mbaembae piyapo piñemimichi reve. Penti penti tumae cavi ĩru vae re. Agüiye tuyembicate. ⁴ Penti penti tuyandareco ĩru vae reta re. Agüiye tuyandareco iyeeiño.

⁵ Pepia pe piyemingueta uyucoti, Cristo Jesús ipia pe uyemingueta rami. ⁶ Echa'ã jae etei co Tumpa. Ērei yepe tēi jae oyovaque Tumpa ndive, uyembutuicha'ã cua re. ⁷ Ērei jae uñemimichi, jare uyeyapo cuimbaerã uyeyocui vaerã ivi pegua reta pe. ⁸ Jare cuimbaerã uyeyapo ma yave, uñemimichi ye, jare umano Tumpa jei vae uyapo vaerã. Jare umano penti curusu re cuimbae jeco vae umano vae rami. ⁹ Jáeramo Tumpa umbutuichaca ete ma, jare umee chupe mbaepuere opaete ĩru mbaepuere güi tuicha ete vae, ¹⁰ opaete ara pe ñugüinoi vae reta, jare opaete ivi pe ñugüinoi vae reta, jare opaete cañitei pe ñugüinoi vae reta uyeatica vaerã Jesús jovai, ¹¹ jare opaete vae jei vaerã Jesucristo co jae opaete vae iYa. Jare cua uyeyapo yave, yandeRu Tumpa uyembidoracata opaete vae pe.

Upurugüirovia vae reta tembipe rami co

¹² Che puau co. Pe ndive aico rambueve, jecuaeño piyapo che jae peve piyapo vaerã vae. Jare yepe tēi añave añã ma pe ndive, Ērei jecuaeño piñemiatangātu ete yembiasa penoi vae rupi pipiu reve Tumpa güi jare pemiadora reve. ¹³ Echa'ã Tumpa etei umee peve quirēi piyapo vaerã jae jei vae. Echa'ã Tumpa jei vae icavi co.

¹⁴ Opaete piyapo vae piyapo piñeenguru mbae reve jare piyeaca mbae reve. ¹⁵ Jucuarái yave, ndarau quia pembijeco mbae re, jare ndarau mbae icavi mbae vae piyapo ĩru vae coti, jare picota upurugüirovia mbae vae reta ipite pe pereco mbae reve. Pe reta co jae Tumpa tai reta. Jáeramo piyecuaa upurugüirovia mbae vae reta ipite rupi, guarasi umiembipe ivi pe vae rami. Echa'ã upurugüirovia mbae vae reta jupi'ã jare jecopochi co. ¹⁶ Jecuaeño pemimbeu ĩru vae reta pe ñee tecove opa mbae vae ipuere umee chupe reta vae, chepuere vaerã ayerovia Cristo ou ye yave. Echa'ã aicuaata añemiatangätuiño'ã jare aparaviquiño'ã. ¹⁷ Ayeyocui ma Tumpa pe pepite pe, pe reta pepurugüirovia vaerã. Jare jocua mburugüirovia penoi vae amee Tumpa pe, sacerdote maemimba uyeyucacue umee rami. Aramoi cherugüi uyepiyereta vi, vino uyepiyere maemimba uyeyucacue iárambo rami. Ērei cua uyeyapo yave, jeseve ayeroviata co opaete pe reta ndive. ¹⁸ Cua jeco pegua pe reta vi piyerovia che ndive.

Timoteo jare Epafrodito

¹⁹ Ērei yandeYa Jesús uipota yave, amondota Timoteo pepi curi, che vi chepiacatu vaerã, aicuaa yave peregua. ²⁰ Echa'ã mbaeti co quía ye ipia pe uyemingueta peré che chepia pe ayemingueta peré rami vae. Mbaeti co quía ye añetete iquirēi uyandareco peré vae. ²¹ Echa'ã opaete ĩru vae reta iquirēi uyandareco iyeeiño. Iquirēi'ã uyandareco Cristo Jesús iparaviqui re. ²² Ērei picuaa co quirái Timoteo jecocavi, jare quirái jae uyeyocui Tumpa pe che ndive, ñee icavi vae numimbeu vaerã. Jae uparaviqui Tumpa pe che ndive, penti tai uparaviqui tu ndive vae rami. ²³ Jáeramo aipota amondo curi, aicuaa yave mbae ra uyeyapota cheve. ²⁴ Ērei yandeYa uipota yave, che vi aata pepi curi.

²⁵ Ērei amondo ma pecoti Epafrodito. Echa'ã icavi echa cheve amondo vaerã. Jae co yanderivi yandeYa re. Jae vi uparaviqui Tumpa pe che ndive, jare jecuaeño uñemiatangātu yandeYa re. Pe reta pembou chepi uyandareco vaerã cheré. ²⁶ Jae uipota ete perecha, jare ipiatiti ete. Echa'ã jerãcua peve quirái jae imbaerasi. ²⁷ Añete co, imbaerasi ete. Umano seri. Ērei Tumpa uiparareco. Jare jucuarái Tumpa uicuaaca vi cheve ipuruparareco - mbaeti Epafrodito peño. Echa'ã chepiatiti ĩru mbaembae re. Ērei jae umano yave mona, chepiatiti eteta tēi. ²⁸ Jáeramo amondo pecoti chequirēi ete reve, piyerovia vaerã, peecha ye yave, jare agüiye vaerã che chepiatiti ete. ²⁹ Pembiresive cavi yandeYa re piyerovia reve. Jare jecuaeño pemae cavi jae rami vae reta re. ³⁰ Echa'ã Cristo iparaviqui jeco pegua umano seri. Uipiu'ã umano vaerã, ipuere vaerã uyandareco cheré pepepica pe. Echa'ã pe reta pepuere'ã piyandareco cheré.

3

Añemiatangātu, aipisi vaerã Tumpa umeeta cheve vae

¹ Cuaño ma tamimbeu peve, cherivi reta: Piyerovia yandeYa re. Checueri'ã etei aicuatía cua peve. Echa'ã icavi peve jecuaeño cua aicuatía vaerã, agüiye vaerã petavi. ² Piñemoa ñee icavi vae re oyovaicho vae reta güi. Echa'ã jae reta oporomböe moromböe añete mbae vae

re. Jae reta uñemicircuncidaca jete peño. ³Echa'ã yande co jae uñemicircuncidaca ipia pe vae reta. Echa'ã yande yambiadora Tumpa iEspíritu rupi. Yayerovia catu Cristo Jesús re. Yayeco'ã etei yandiyee. ⁴Ërei che vi ime tēi anoi ayeco vaerã chiyee. Ime yave quía ye ipia pe uyemingueta ime güinoi uyeco vaerã iyee vae, che vi ime tēi anoi jeta ete chugüi. ⁵Echa'ã añemicircuncidaca ocho ara ma anoi yave aa güive. Che co jae penti Israel pegua. Che co jae Benjamín iñemoña pegua. Che co jae penti hebreo añetete vae. Che co jae penti fariseo. Echa'ã jecuaeño aicose mboroyocui jei vae re. ⁶Añemiatangätuse ayeyocui vaerã Tumpa pe. Jáeramo ayapose icavi mbae vae Cristo re güirovia vae reta pe. Mbaeti quía ipuere chembijeco mbae re. Echa'ã cherecove jecuaeño jupi mboroyocui rupi. ⁷Tenonde yave ayembiccate tua mbaembae re. Ërei añave ayembiccate'ã etei jese Cristo re arovia güive. ⁸Jae ramiño vi ayembiccate'ã etei ipotave mbae re, aicuaa vaerã cheYa Cristo Jesús. Echa'ã cua icavi ete cheve opaete güi. Cristo Jesús re arovia güive ayembiccate'ã etei ma mbae re. Echa'ã opaete jocua mbaembae iti rami co cheve, Cristo anoi vaerã, ⁹jare uyecuaa vaerã quirã che co jae Cristo imbae. Aipota'ã ma ayembujupi mboroyocui jei vae re ayapo vae rupi. Ayembujupi ma mburugüirovia Cristo re anoi vae rupi. Echa'ã Tumpa chembujupi ma, Cristo re arovia ramo. ¹⁰Aipota co aicuaa cavi Cristo. Aipota anoi jocua mbaepuere Cristo icove ye yave ou umanocue vae reta ipite güi uyeporu vae. Aiporara yave, aipota aicuaa aiporara co Cristo jeco pegua, chequirēi vaerã amano Cristo umano vae rami. ¹¹Jucuarã yave, aãrota aicove ye vaerã ayu umanocue vae reta ipite güi.

¹²Ndeño aicuaa cavi Cristo. Ndeño co che jupi. Ërei jecuaeño añemiatangätu, aipisi vaerã Tumpa umeeta cheve vae. Echa'ã cua jeco pegua Cristo Jesús cherepi. ¹³Cherivi reta, chepia pe ayemingueta'ã chiyee aepiti ma co. Ërei cuaño ayapo - checañi uasacue güi, aepiti vaerã chequirēi reve uyemiaanga oñ cheve vae. ¹⁴Jáeramo añemiatangätu, aepiti vaerã Tumpa umeeta cheve vae. Umeeta cheve Cristo Jesús uyapo yandeve vae jeco pegua, ara pe chereraa yave.

¹⁵Jáeramo opaete ñañemimiráta Tumpa coti vae cuarã yandepia pe yayemingueta. Jare pepia pe piyemingueta'ã yave cuarã, Tumpa uicuaacata peve. ¹⁶Ërei jecuaeño yaico yaicuaa ma vae re. Yandepia pe yayemingueta penti ramiño.

¹⁷Cherivi reta, piyapo che ayapo rami. Jare jecuaeño pemaie ngatu jocua yugüireco cavi vae reta re. Echa'ã jucuarã picuaa ore nduico. ¹⁸Echa'ã ime jeta yugüireco oyovaicho reve Cristo icurusu regua ndive vae. Jeta vese ma amimbeu peve cua reta regua, jare añave amimbeu ye peve ayao reve. ¹⁹Cua reta yugüiraata cañitei pe. Mbae yau vae reño ipia pe uyemingueta reta. Icavi chupe reta jocua imarata tēi jese vae. Mbaembae cua ivi pegua reño ipia pe uyemingueta reta. ²⁰Ërei yandeivirã ara pe co oñ. Echa'ã ñaãro ñaã joco güi ou vaerã yanembiasa vae - jae co yandeya Jesucristo. ²¹Jae umbiambieta yanderete cua ivi pe ñanoi vae yanderete ipiau vae ndive. Echa'ã yanderete ipiau vae icavi eteta co jae jete rami. Cuarã yandeYa uyapota imbaepuere rupi. Echa'ã jocua imbaepuere rupi ipuere opaete mbaembae re.

4

Jecuaeño piyerovia catu yandeYa re

¹Jáeramo, cherivi reta, jecuaeño piñemimiráta yandeYa imbaepuere rupi. Che puau, jare aipota puecha. Ayeroviaño mai peré. Chemiari cavi peré ñru vae reta pe.

²Amiñera Evodia jare Síntique yugüireco cavi vaerã uyupii. Echa'ã mocui reve güirovia yandeYa re. ³Jare che numiñera vi - echa'ã nde co jae cheparaviqui ñru ete - nembori vaerã cua cuña reta. Echa'ã jae reta uparaviqui tanta che ndive, numimbeu vaerã ñee icavi vae. Uparaviqui reta Clemente ndive jare ñru che ndive uparaviqui vae reta ndive vi. Cua reta jee Tumpa uicuatía ma ilibro pe. Echa'ã Tumpa umee ma tecove opa mbae vae chupe reta.

⁴Jecuaeño piyerovia catu yandeYa re. Tae ye cua: Piyerovia catu. ⁵Opaete vae tuicuaa quirã pe reta pepiacavi co. YandeYa ou ye seri ma co.

⁶Agüiye etei piyemipia'ã mbae re. Ërei jecuaeño piyurure Tumpa pe opaete mbaembae re yasurupai Tumpa pe pemee reve, jare cuarã pemimbeu Tumpa pe mbae pipota vae. ⁷Jare Tumpa umeeta peve ipiacatu. Yandepia pe yayemingueta rupiño yandepuere'ã etei yaicuaa Tumpa ipiacatu. Cua mbiacatu uyandarecota pepia re jare pepiayemingueta re. Echa'ã ou Cristo Jesús güi.

Pepia pe piyemingueta cua re

⁸Cuaño ma tamimbeu peve, cherivi reta: Pepia pe piyemingueta opaete mbae añete vae re, opaete mbae icavi vae re, opaete mbae jupi vae re, opaete mbae iyoa mbae vae re, opaete mbae ipõra vae re, jare opaete mbae yandepuere ñanemiari cavi jese vae re.

Yandepuere yae yave: “Cua icavi co”, jare yandepuere yaipiu icavi vae ramo, yandepia pe yayemingueta jese.

⁹Piyemboe ma che amimbeu peve piyapo vaerã vae re. Piyandu co che jae peve vae, jare peecha co che ayapo vae. Jáeramo cuarã piyapo, jare Tumpa pemborita. Echa'ã jae umee yandeve ipiacatu.

Filipos pegua reta ofrenda ombou Pablo pe vae

¹⁰ Èrei ayerovia ete, jare amee yasurupai yandeYa pe peré. Echa'ã ima ma pembou'ã mbae chembori vaerã. Èrei añave pemandúa ye ma cheré. Añete co, jecuaeño pemandúa cheré, èrei pepuere'ã pembou mbae chembori vaerã. ¹¹ Jae'ã cuarã, mbae uata cheve ramo. Echa'ã aicuaa ma quirã aico vaerã chepiacatu reve chepuere rupiño. ¹² Aicuaa quirã aico vaerã, mboviño mbaembae anoi yave. Aicuaa vi quirã aico vaerã, jeta mbaembae anoi yave. Opaete pegua aicuaa ma quirã aico vaerã cheangapii reve jare chiyembae reve. Aicuaa ma quirã aico vaerã, jeta mbaembae anoi yave, jare jeta mbaembae uata cheve yave. ¹³ Opaete chepuere ayapo Cristo rupi. Echa'ã jae umee cheve imbaepuere.

¹⁴ Èrei piyapo ma icavi vae cheve. Echa'ã chembori ma, aiporara añ yave. ¹⁵ Jare pe reta Filipos pegua picuaa vi quirã ñee icavi vae ambipi amimbeu yave, aa Macedonia güi yave, mbaeti ye ñru uyembatimbatì vae reta ombou cheve ofrenda chembori vaerã, jaeño pe reta pembou cheve. ¹⁶ Echa'ã Tesalónica pe aico yave, pembou cheve ofrenda chembori vaerã. Jayave taicue rupi pembou ye ofrenda cheve. ¹⁷ Ayerovia pembou cheve vae re. Èrei ayerovia'ã jese chembori ramoño. Ayerovia ete jese mbae icavi vae piyapo ramo. Jare aipota jecuaeño mbae icavi vae piyapo vaerã, Tumpa umbijecovia vaerã peve. ¹⁸ Èrei che opaete mbaembae anoi. Jeta ete anoi. Mbaeti mbae uata cheve. Echa'ã Épafrodito umee ma cheve pembou cheve vae. Jocuá pembou vae penti ofrenda icavi vae uñemee Tumpa pe vae rami co. Jocuá nunga umbiyerovia Tumpa. Jae co mbae ipiche cavi vae rami. ¹⁹ Jare cheRu Tumpa umeeta peve opaete mbaembae icavi peve vae jeta ete güinoi vae güi. Echa'ã Cristo Jesús uyapo vae jeco pegua jeta ete güinoi yandeve peguarã. ²⁰ YandeRu Tumpa tuyembadoraca jaeño mai pegua. Amén.

²¹ Tumpa ndiveño toí opaete uñeño tee Tumpa peguarã vae reta. Echa'ã güirovia Cristo Jesús re. Yanderivi reta che ndive ñugüinoi vae vi jei peve Tumpa ndiveño peí. ²² Jae ramiño vi opaete uñeño tee Tumpa peguarã vae reta cua pe ñugüinoi vae jei peve Tumpa ndiveño peí. Cua reta ipite pe ime amocue César pe uyeyocui vae.

²³ YandeYa Jesucristo tumee opaete peve ipiacavi. Amén.

LA CARTA DEL APOSTOL SAN PABLO A LOS COLOSENSES

¹ Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo ime vi cua pe oi che ndive. ² Aicuatía cua tupapire Colosas pe pico vae pe. Pe reta vi co jae cherivi reta. Tumpa peñono tee iyupeguarā, jare piyeyocui cavi Cristo pe. YandeRu Tumpa jare yandeYa Jesucristo tumee peve ipiacavi jare ipiacatu.

Pablo uyeyocui upurugüirovia vae reta re

³ Numee yasurupai Tumpa pe peré. Jae co yandeYa Jesucristo Tu. Jare jecuaeño nduyere peré. ⁴ Cuarai nduyapo, nduicuaa güive quirai perovia Cristo Jesús re, jare quirai peau opaete uñeño tee Tumpa peguarā vae reta. ⁵ Pe reta penoi cua mburuau, peāro pei piyerovia reve Tumpa umeeta peve vae ramo. Echa'ā Tumpa uñuvatu ma peve ara pe. Pe reta picuaa cua regua, ñee icavi vae piyandu yave. Echa'ā ñee icavi vae añete vae co. ⁶ Cua ñee jerācua peve vae jerācua vi opaete ivi rupi. Jare opaete que rupi quia quia güirovia, jare uyeyocui Tumpa pe pe reta rami. Echa'ā pe reta perovia, jare piyeyocui Tumpa pe, joca ara Tumpa ipiacavi regua piyandu güive. Echa'ā picuaa añete co cua ñee. ⁷ Cua re piyemboe Epafras güi. Epafras uyeyocui Cristo pe ore ndive, jare nduau ete. Jae co penti Cristo jembiocui pepuere perovia catu vae. ⁸ Jare jae uicuaaca oreve mburuau Espiritu Santo umee peve vae.

⁹ Jáeramo ore vi cua nduyandu güive, jecuaeño nduyere peré. Nduyere Tumpa pe, jae uicuaaca cavi vaerā peve jei vae. Tumpa tumee peve opaete aracuaa Espiritu pegua, picuaa cavi vaerā jae jei vae. ¹⁰ Tumpa tapembori, pico cavi vaerā. Echa'ā pe reta co jae yandeYa imbae. Jare cuarai pico yave, pembiyerovia co yandeYa. Jecuaeño piyeyocui yandeYa pe icavi vae piyapo vae rupi. Jare jecuaeño piyemboe Tumpa re, picuaa cavi ete vaerā. ¹¹ Tumpa tapemimirāta imbaepuere tuicha ete vae pe, pepiaguasu vaerā piyerovia reve. ¹² Pemee yasurupai yandeRu pe. Echa'ā jae umee ma peve penoi vaerā pembaerā opaete ĩru uñeño tee Tumpa peguarā vae reta pe uñemeeta vae. Echa'ā cua reta yugüireco tembipe pe. ¹³ YandeRu yanderepi ma mbaepuere pitumimbi re güinoi vae güi, jare yandererova ma Tai iporoyocua pe. Jae uau Tai. ¹⁴ YandeRu yanderepi Tai imano rupi, jare yanembiasa yanembaeyoa reta güi.

Cristo yanembipiacatu ma Tumpa ndive imano rupi

¹⁵ Mbaeti etei quia uecha Tumpa. Ērei Tai uicuaaca yandeve quirai co jae. Tai co jae opaete mbaembae uyeyapo vae iYa. ¹⁶ Echa'ā jae uyapo opaete. Jae uyapo opaete ara pe oi vae jare opaete ivi pe oi vae. Jae uyapo opaete yandepuere yaecha vae jare opaete yandepuere mbae yaecha vae. Jae uyapo opaete mburuvicha reta ara pegua jare ivi pegua, jare opaete mbaepuere güinoi vae. Jae etei uyapo opaete iyupeguarā. ¹⁷ Jare jae icoño mai ndei mbae uyeyapo mbove, jare mbaetita tēi mbae ipuere ico jae uyandareco'ā yave jese. ¹⁸ Jare upurugüirovia vae reta co jae Cristo jete rami, jare Cristo co jae upurugüirovia vae reta ĩñāca rami. Jae co tenondegua vae. Echa'ā jae tenonde voi icove ye ou umanocue vae reta ipite güi, jae ico vaerā opaete vae iYarā. ¹⁹ Echa'ā Tumpa uipota vae co jae etei ico vaerā Cristo jete pe. ²⁰ Tumpa uipota vae vi co umbipiacatu vaerā jae ndive Cristo rupi opaete ivi pe ñugüinoi vae reta jare opaete ara pe ñugüinoi vae reta. Echa'ā umee ma yandeve ipiacatu Cristo imano rupi curusu re.

²¹ Jare tenonde yave pe reta mbiri ete pico Tumpa güi. Echa'ā piyovaichose pepia pe Tumpa ndive, jare piyapoe icavi mbae vae. Ērei añave Cristo pembipiacatu ma Tumpa ndive. ²² Jucuarai jae uyapo imano rupi cuimbaerā uyeyapo yave. Jare jucuarai uyapo, peñono tee vaerā iyupeguarā, jare agüiye vaerā penoi mbaeyoa, jare agüiye vaerā quia ipuere pembijeco mbae re, jae jovai pei yave, ²³ jecuaeño piñemimirāta yave jare piñemiatangātu yave pepurugüirovia re, jare jecuaeño peāro yave piyerovia reve ñee icavi vae rupi uñeme peve vae. Echa'ā pe reta picuaa ñee icavi vae opaete ivi pegua reta pe jerācua vae. Jare che vi amimbeu ñee icavi vae, jare cuarai ayeyocui Tumpa pe.

Pablo uyeyocui upurugüirovia vae reta pe

²⁴ Añave ayerovia aiporara ai peré vae re. Echa'ā aiporara ai cherete pe jocua uataño co Cristo jete uiporara vaerā vae. Echa'ā jae jete co jae upurugüirovia vae reta. ²⁵ Echa'ā uñeme cheve ayeyocui vaerā upurugüirovia vae reta pe. Tumpa etei cheapo jae jembiocuirā, che ayeyocui vaerā peve, jare amimbeu vaerā peve opaete Tumpa ĩñee. ²⁶ Cua co jocua tenonde yave uyecuaa mbae vae. Echa'ā Tumpa uicuaaca'ā etei tenonde yave. Ērei añave Tumpa uicuaaca co oño tee iyupeguarā vae reta pe. ²⁷ Echa'ā Tumpa iquirēi uicuaaca chupe reta quirai cua tenonde yave uyecuaa mbae vae mbaeyecou tuicha vae

güinoi judío mbae vae reta coti. Jae co Cristo ico pepia pe vae. Jáeramo pepuere peãro piyerovia reve Tumpa pembiyeroviata vae re.

²⁸ Ore vi numimbeu Cristo regua. Numbiaracuaa opaete vae, jare nombœ opaete vae orearacuaa catu reve, opaete vae ipirãta vaerã Cristo imbaepuere rupi. ²⁹ Cua jeco pegua che vi aparaviqui aĩ Tumpa pe. Tanta aparaviqui aĩ aiporara reve Cristo imbaepuere rupi. Echa'ã jae tanta uparaviqui oĩ chepia pe.

2

¹ Ërei aipota picuaa vaerã quirãi tanta aparaviqui aiporara reve peré, jare Laodicea pegua reta re, jare opaete cherecha mbae vae reta re. ² Aipota ete pepiacatu vaerã, jare piyerau vaerã, penti ramiño pico vaerã. Aipota piñemimirãta vaerã opaete picuaa vae rupi, jare picuaa vaerã jocua tenonde yave uyecuaa mbae vae Cristo regua yanderu Tumpa uicuaa yandeve vae. ³ Pipota yave pearacuaa catu, Cristo re uñevãe opaete aracuaa. Jare pipota yave picuaa cavi mbae regua, Cristo uicuaa cavi opaete mbae regua. ⁴ Jare cua che jae peve, agüiye vaerã quía pemitavi ñee icavi echa vae pe. ⁵ Echa'ã yepe tẽi che aĩ'ã pepi, Ërei jecuaeño chepia pe ayemingueta peré. Aicuaa quirãi pico cavi co uyupii, jare quirãi piñemimirãta pepurugüirovia Cristo regua re. Jare cua re ayerovia.

⁶ Pembiresive ma yandeYa Jesucristo mburugüirovia rupi. Jae ramiño vi jecuaeño pico perovia reve jese. ⁷ Piñemimirãta Cristo imbaepuere rupi, pecuacuaa cavi vaerã jese. Piñemiatangãtu pepurugüirovia re. Echa'ã jucuarãi co piyembœ. Jecuaeño pemee yasurupai Tumpa pe pepurugüirovia re.

Cristo umee ma yandeve tecove ipiaua vae

⁸ Piñemoa, agüiye vaerã quía pemitavi aracuaa tavi pegua pe. Echa'ã cua nunga aracuaa morombœ ivi pegua retaño co. Oporombœ'ã Cristo re, jaeño mbaembae ivi pegua re.

⁹ Echa'ã Cristo co jae Tumpa etei cuimbaerã uyeyapo vae. ¹⁰ Jáeramo opaete mbaembae penoi, Cristo penoi ramo. Echa'ã jae co opaete mburuvicha reta ara pegua jare ivi pegua iYa. ¹¹ Jare piñemicircuncidaca ma vi pepia pe, Cristo re perovia ramo. Echa'ã Cristo uyapo peve pepia pe vae penti cuimbae uñemicircuncidaca vae jete pe uyeyapo vae rami co. Echa'ã Cristo perepi opaete mbaeyoa imbaepuere güi. ¹² Piyembibautizaca yave, piñeñoti co Cristo ndive, jare Tumpa umee peve tecove opa mbae vae Cristo ndive. Cua uyeyapo Tumpa imbaepuere rupi, pepurugüirovia ramo. Echa'ã Tumpa umbijecove ye Cristo güeru umanocue vae reta ipite güi. ¹³ Tenonde yave pe reta penoi'ã tecove opa mbae vae pembaeyoa reta jeco pegua, jare piñemicircuncidaca'ã pembaeyoa reta güi ramo. Ërei Tumpa umee ma peve tecove opa mbae vae Cristo ndive jare pembiasa ma opaete pembaeyoa reta güi. ¹⁴ Tumpa umbai ma mboroyocui uyecuatia oĩ vae. Echa'ã jocua uyecuatia oĩ vae oyovaichose ore ndive, jare jecuaeño orembijecose. Ërei Tumpa güiraa co oregüi, Cristo uyecutuca curusu re yave. ¹⁵ Jáeramo Tumpa yanderepi ma opaete mbaepuere yanderé güinoise vae reta güi, jare umimaraca reta opaete vae jovaque. Echa'ã Tumpa umiamiri reta, Cristo umano yave curusu re.

¹⁶ Jáeramo agüiye quía tapembijeco mbae peu vae re, jare fiesta reta iara reta re, jare yasipiau re, jare mbutuu ara reta re. ¹⁷ Echa'ã opaete cua reta jaanga retaño co. Tenonde yave Tumpa umijaanga reta uyeyapota vae re. Echa'ã cua reta uyemijaangaño Cristo re. ¹⁸ Agüiye quía tapeopia Tumpa umeeta peve vae güi. Echa'ã amocue vae uñemimichi-raanga, jare umbiadora ángel reta. Cua nunga ipia pe uyemingueta tẽi uicuaa co uecha mbae vae regua, jare uyembicate ipiyemingueta rupiño uicuaa vae re, yepe tẽi mbae uicuaa cavi'ã. ¹⁹ Cua nunga uyeco'ã Cristo re. Echa'ã Cristo co jae upurugüirovia vae reta iñãca. Echa'ã opaete yandeyuapiapia jare yanderayi uyapo yanderete penti ramiño. Ërei yanderete uyeco ñaneãca re, ucuaacuaa cavi vaerã. Jucuarãiño vi Cristo jete ucuaacuaa Tumpa jei vae re.

²⁰ Pe reta pemaño co Cristo ndive morombœ ivi pegua reta güi. Jáeramo ¿maera pa jecuaeño pico ivi pegua reta yugüireco rami? jare ¿maera pa piyapo iporoyocui reta? ²¹ Echa'ã jae reta peocui cuarã: "Agüiye pipisi. Agüiye peu. Agüiye piyaviqui." Jucuarãi jei reta. ²² Ërei opaete jocua mbaembae uyembaita co, uyeporu yave. Jare opaete cua mboroyocui reta morombœ ivi pegua retaño co. ²³ Añete co, cua nunga mboroyocui aracuaa pegua echa co. Echa'ã cua nunga mboroyocui iyapoa reta umbiadora-raanga Tumpa pe ipia pe uyemingueta vae reño, jare uñemimichi-raanga, jare uiporaraca jete pe. Ërei cua mbaembae rupi ipuere'ã etei oyopia jete uipota vae reta.

3

¹ Tumpa umee ma peve tecove opa mbae vae Cristo ndive. Jáeramo jecuaeño pepia pe piyemingueta mbaembae ara pe ñugüinoi vae re. Echa'ã joco pe Cristo uguapi oĩ Tumpa

iyipi pe iyacata coti. ² Jecuaeño pepia pe piyemingueta mbaembae ara pe ñugüinoi vae re. Agüiye jecuaeño pepia pe piyemingueta mbaembae ivi pe ñugüinoi vae reño. ³ Echa'ã pemano ma ivi pegua güi, jare perecove añetete vae ime ma oï Cristo ndive Tumpa oï vae pe. Mbaeti quia ipuere uecha. ⁴ Cristo co jae perecove añetete vae. Cristo uyecuaa ye yave, pe reta vi piyecuaata jare piyeroviata jae ndive.

Teco mai indechi vae jare teco mai ipiau vae

⁵ Jáeramo agüiye pemaño icove vaerã jocua teco mai ivi pegua icavi mbae vae perete pe oï vae. Agüiye piyapo aguasa. Agüiye pepia pe piyemingueta icavi mbae vae re. Agüiye peporopotaño. Agüiye pipota icavi mbae vae. Agüiye pipota ñru vae reta imbaembae - echa'ã pipota yave, pipota ete ñru vae reta imbaembae Tumpa güi. ⁶ Cua icavi mbae vae jeco pegua Tumpa uiporaracata co jae jei vae uyapo'ã vae reta pe. ⁷ Tenonde yave pe reta vi piyapose cua icavi mbae vae reta. Echa'ã picose jucuarã piyapo vaerã. ⁸ Ërei añave pemombo piyugüi opaete cua ñru icavi mbae vae reta. Agüiye pepochi. Agüiye pearasi. Agüiye piyapo icavi mbae vae piyupe. Agüiye pere icavi mbae vae piyupe. Agüiye pemoë ñee pichii vae. ⁹ Agüiye peapu piyupe. Echa'ã pemombo ma piyugüi pereco mai indechicue pichii vae jare icavi mbae vae reta piyapose vae. ¹⁰ Jare pipisi ma teco mai ipiau vae. Echa'ã cua teco mai ipiau vae umbipiauta pepia pe piyemingueta vae, picuaa cavi vaerã Tumpa regua, jare pico vaerã jae jei vae re. Echa'ã Tumpa umee peve cua teco mai ipiau vae. ¹¹ Jare cua teco mai ipiau vae güinoi vae reta ipite pe mbaeti ma uyuavi uyugüi judío mbae vae jare judío, uñemicircuncidaca vae jare uñemicircuncidaca mbae vae, ñanaigua reta, uyeyocui vae jare uyeyocui mbae vae. Echa'ã jaeño Cristo ico opaete vae ipia pe.

¹² Tumpa perau, jare preparavo peño tee vaerã iyueguarã. Jáeramo pico cavi. Piyeparareco. Pepiacavi piyupe. Piñemimichi piyupe. Pepiaguasu piyupe. ¹³ Pemiaguanta piyupe, jare piyembiasa, ime yave quia ñru vae mbae re umbijeco vae. Echa'ã yandeYa pembiasa ma. Jae ramiño vi pe reta piyembiasa. ¹⁴ Jare piyerau. Echa'ã mburuau icavi ete opaete ñru güi. Echa'ã piyerau yave, pico cavi eteta uyupii penti ramiño. ¹⁵ Jare Tumpa ipiacatu pepia pe oï vae tuicuaaca peve mbae icavi piyapo vaerã vae. Echa'ã cuarã Tumpa preparavo, pico vaerã penti ramiño. Jare jecuaeño pemee yasurupai Tumpa pe.

¹⁶ Ñee Cristo regua jecuaeño tuico pepia pe. Piyemboe jare piyembiaracuaa pearacuaa catu reve. Piyerovia reve pecanta yandeYa pe canta reta yambiadora pipe vae. ¹⁷ Jare mbae re piyemingueta yave jare mbae piyapo yave, piyemingueta jese jare piyapo opaete yandeYa Jesús jee re. Jare jecuaeño pemee yasurupai yandeRu Tumpa pe yandeYa Jesús rupi.

Yayeyocui yandiyupe

¹⁸ Cuña reta tuyeyocui ime pe. Echa'ã icavi co jucuarã uyapo vaerã. Echa'ã güirovia ma yandeYa re.

¹⁹ Cuimbae reta tuau jembireco, jare agüiye tipochiño chupe.

²⁰ Cunumi reta jare cuñatai reta tuyapo opaete tu jare ichi jei vae. Echa'ã cua icavi co yandeYa pe.

²¹ Tu reta agüiye tumbiarasiño isambiai reta, agüiye vaerã isambiai reta umbiaqui.

²² Uyeyocui vae reta tuyapo opaete ipatrón jei vae. Agüiye tuyeyocui cavi ipatrón pe jae umae oï jese yaveño, umbiyerovia vaerãño. Ipiquirẽi reve tuyeyocui chupe uipiu reve yandeYa güi. ²³ Jare opaete uyapo vae, tuyapo ipiaquirẽi reve. Tuyeyocui ipatrón pe, yandeYa pe uyeyocui rami. Echa'ã cuimbae peño'ã uyeyocui oï. ²⁴ Jare tuicuaa yandeYa umbijecoviata co chupe jocua umeeta chupe vae pe. Echa'ã uyeyocui co oï yandeYa Cristo pe. ²⁵ Ërei icavi mbae vae uyapo vae pe Tumpa umbijecoviata vi icavi mbae vae uyapo vae re. Echa'ã Tumpa uau'ã penti vaerã ñru vae güi.

4

¹ Patrón reta tuyapo jupi vae jembiocui reta pe, jare agüiye tumbitavi. Echa'ã tuicuaa jae reta vi güinoi co iYa ara pe.

² Jecuaeño piyerure Tumpa pe. Piñemiatangãtu, jecuaeño piyerure vaerã pemee reve yasurupai Tumpa pe. ³ Jae ramiño vi piyerure orerẽ, Tumpa uicuaaca vaerã oreve quirãi numimbeu vaerã ñee. Echa'ã chequirẽi chemiari tenonde yave Cristo regua uyecuaa mbae vae re. Echa'ã jáeramo che ai cua peresoriru pe. ⁴ Piyerure cherẽ, aicuaa cavi vaerã ñru vae reta pe. Echa'ã icavi co cuarã ayapo vaerã.

⁵ Pico pearacuaa catu reve upurugüirovia mbae vae reta ndive. Jecuaeño piyapo icavi vae. ⁶ Jecuaeño piyemingueta ñee icavi vae pe mbae icavi vae re. Jare piyemboe quirãi piyemingueta vaerã ipotave vae pe.

Saludo reta

⁷ Tíquico co jae cherivi aau vae. Jae co penti yandeYa jembiocui che ndive uyeyocui cavi yandeYa pe vae. Jae umimbeuta peve opaete cheregua. ⁸ Echa'ã cuarã amondo pepi, jae uicuaa vaerã peregua, jare jae pembipiacatu vaerã. ⁹ Amondo vi jae ndive Onésimo. Jae vi co cherivi aau vae yandeYa pe uyeyocui cavi vae. Jae co penti perentaigua. Jae umimbeuta peve opaete mbae cua pe uyeyapo vae. ¹⁰ Aristarco jei peve Tumpa ndiveño peĩ. Jae ime che ndive oi peresoriru pe. Marcos vi jei peve Tumpa ndiveño peĩ. Jae co Bernabé jii. Echa'ã che poyocui ma pembiresive cavi vaerã, jae oo pepi yave. ¹¹ Jesús vi jei peve Tumpa ndiveño peĩ. Jae co Justo pe uyembijee vae. Echa'ã opaete judío reta upurugüirovia vae güi cua retaño chembori amimbeu vaerã Tumpa iporoyocua regua. Jae reta chembipiacatu ete. ¹² Epafras vi jei peve Tumpa ndiveño peĩ. Jae vi uyeyocui Cristo pe. Jare jae vi co penti perentaigua. Jae jecuaeño uyerure ete Tumpa pe peré, piñemimirãta vaerã, jare picuaa cavi vaerã opaete Tumpa jei vae. ¹³ Echa'ã che etei chepuere amimbeu peve quirãi Epafras uparaviqui tanta peré, jare Laodicea jare Hierápolis pe ñugüinoi vae reta re. ¹⁴ Lucas jare Demas vi jei peve Tumpa ndiveño peĩ. Lucas co jae upurupiano vae aau vae.

¹⁵ Tumpa ndiveño toĩ upurugüirovia vae reta Laodicea pegua, jare Ninfas jare opaete upurugüirovia vae reta Ninfas jenta pe uyembati vae. ¹⁶ Pe reta pemingüeta ma yave cua tupapire, pemondo Laodicea pe upurugüirovia vae reta joco pe uyembati vae vi umingüeta vaerã. Jare jocua tupapire Laodicea pe amondo vae pe reta pemingüeta vi. ¹⁷ Pere Arquipo pe tuñemiatangãtu, uyapo vaerã mbaraviqui yandeYa umee chupe vae, uyeyocui vaerã yandeYa pe.

¹⁸ Che etei jae peve Tumpa ndiveño peĩ. Cua aicutia chepo pe etei. Pemandúa peresoriru pe ai vae re. Tumpa tumee peve ipiacavi. Amén.

PRIMERA CARTA DEL APOSTOL SAN PABLO A LOS TESALONICENSES

¹ Che co jae Pablo. Che ndive ime ñugüinoi Silvano jare Timoteo. Aicutatía cua tupapire opaete pepurugüirovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. YandeRu Tumpa jare yandeYa Jesucristo tumee peve ipiacavi jare ipiacatu.

Jeta vae uicuaa Tesalónica pegua reta ipurugüirovia regua

²Jecuaeño numee yasurupai Tumpa pe peré, jare oreacañi'ã pegüi. Jecuaeño nduyureru Tumpa pe peré. ³Jare nduyureru yandeRu Tumpa pe yave, jecuaeño oremandúa quirãï pico Tumpa coti vae re. Echa'ã preparaviqui Tumpa pe, perovia Jesucristo re jare peau ramo, jare jecuaeño pepiaguasu, peãro piyerovia reve yandeYa Jesucristo ou ye vaerã ramo. ⁴Pe reta co jae orerivi reta. Tumpa perau jare preparavo. Cua nduicuaa cavi co. ⁵Echa'ã numimbeu yave peve ñee icavi vae, Espiritu Santo umee oreve mbaepuere numimbeu cavi vaerã peve. Ñeeiño'ã co. Echa'ã nduicuaa cavi añetete co ñee icavi vae. Jare pe reta picuaa cavi co quirãï ore nduico cavi pepite pe, puau ramo.

⁶Jare pe reta pembipi pico, ore nduico rami, jare yandeYa ico rami. Perovia co numimbeu peve vae. Jáeramo piporara ete. Ërei Espiritu Santo pembiyerovia. ⁷Cua jeco pegua opaete upurugüirovia vae reta Macedonia pegua jare Acaya pegua uicuaa quirãï icavi co yugüireco vaerã. ⁸Echa'ã pe reta pemimbeu ñee icavi vae yandeYa regua ñru vae reta pe. Macedonia jare Acaya pegua reta uicuaa perovia co Tumpa re. Jare opaete que rupi rupi uicuaa vi. Jáeramo uata'ã ma mbae ore numimbeu vaerã chupe reta. ⁹Echa'ã jae reta etei umimbeu ñru vae reta pe quirãï ore ndoo perenta pe, jare mbae uyeyapo joco pe. Umimbeu reta vi quirãï pembiadora'ã ma tumpa-raanga reta - echa'ã piyerova ma jocua reta güi Tumpa coti - jare quirãï piyeyocui ma Tumpa añetete vae pe - jae co jecuaeño ico vae. ¹⁰Umimbeu reta vi quirãï peãro peï Tumpa Tai ou ye vaerã ara güi - jae co Jesús. Echa'ã Tumpa umbijecove ye güeru umanocue vae reta ipite güi. Tumpa uiporaracata co upurugüirovia mbae vae reta pe, ërei Jesús yanderepi ma ñru vae reta uiporarata vae güi.

2

Quirãï Pablo uyeyocui Tumpa pe Tesalónica pe

¹Ndoo yave perenta pe, ndooiño'ã co. Cua picuaa pe reta etei, cherivi reta. ²Yepe tēi nduiporara Filipos pe, ñru vae reta uyapo icavi mbae vae oreve yave - cua vi picuaa - ërei numimbeu peve ñee icavi vae Tumpa ombou vae. Nduquiye'e, yepe tēi yavai ete oreve. Echa'ã Tumpa orembori. ³Jocua numimbeu peve vae añete co. Ndueca'ã co pembiepi vaerã oreve cua numimbeu peve vae. Nduipotã'ã etei vi pumbitavi. ⁴Tumpa etei uicuaa quirãï nduyeyocui chupe, jare uicuaa ma icavi numimbeu vaerã ñee icavi vae. Jáeramo numimbeu ñru vae reta pe, Tumpa numbiyerovia vaerã. Numimbeu'ã, ivi pegua retaño numbiyerovia vaerã. Echa'ã Tumpa uicuaa cavi orepia pe oï vae. ⁵Ndoe'ã etei mbae peve, piyembutuicha vaerã. Cua picuaa co pe reta. Nduipotã viari'ã mbae pegüi oreyupeguarã. Cua uicuaa vi co Tumpa. ⁶Ndueca'ã vi pe reta jare ñru vae reta orembutuicha vaerã. Ërei icavita tēi ndueca pe reta orembutuicha vaerã. Echa'ã ore co jae Cristo jemimondo reta. ⁷Ërei ore nduyandareco peré puau reve, penti ichi imembi umicambu vae uyandareco uau reve vae rami. ⁸Ore puau. Jáeramo numimbeu ma peve ñee icavi vae Tumpa ombou vae. Ore puau ete co. Jáeramo orerecove yepe numeeta tēi peré. ⁹Pemandúa quirãï tanta nduparaviqui orecandï reve, cherivi reta. Nduparaviqui ara rupi jare pïtu rupi, agüiye vaerã pumambeco mbae pemee vaerã oreve vae re. Jucuarãï nduyapo, jare numimbeu vi peve ñee icavi vae Tumpa ombou vae.

¹⁰Pe reta co jae upurugüirovia vae reta. Pe reta picuaa, jare Tumpa vi uicuaa quirãï nduico pepite pe. Jecuaeño nduyapo icavi vae. Mbaeti quía ipuere orembijeco mbae re. Jecuaeño nduyapo jupi vae. ¹¹Oremiari peve - penti penti pe - penti tu imiari tai reta pe rami. Ore pumbiaracuaa, jare pumbipiacatu. Opaete cua picuaa cavi. ¹²Ore poyocui piyapo vaerã icavi vae. Echa'ã pe reta co jae Tumpa imbae. Jare Tumpa preparavo ma, pe reta vi pico vaerã iporoyocua pe.

¹³Jáeramo jecuaeño numee yasurupai Tumpa pe. Echa'ã numimbeu peve yave Tumpa iñee, perovia jae co Tumpa iñee añetete vae - ore numimbeu peve vaeño'ã co. Jare cua Tumpa iñee jecuaeño uparaviqui pepia pe, pe reta pepurugüirovia ramo. ¹⁴Jare uyeyapo ma peve, Judea pe uyembatimbatï vae reta pe uyeyapo vae rami, cherivi reta. Jae reta vi co Tumpa imbae. Echa'ã güirovia Cristo Jesús re. Echa'ã perentaigua reta uyapo icavi mbae

vae peve, judío reta uyapo icavi mbae vae jocua upurugüirovia vae reta pe rami. ¹⁵ Echa'ã judío reta uyucaca Tumpa iñee aracae umimbeu vae reta jare yandeYa Jesús vi, jare oreve vi uyapo icavi mbae vae. Uipotã'ã uyapo Tumpa jei vae, jare oyovaicho opaete vae ndive. ¹⁶ Echa'ã jecuaeño orembiavai, agüiye vaerã oremiari judío mbae vae reta pe, uyembiasaca vaerã. Jucuarãi jecuaeño judío reta uyapo jeta ete icavi mbae vae. Ërei Tumpa uiporaraca eteta co chupe reta.

Pablo uipotã oo opou ye Tesalónica pegua reta pe

¹⁷ Michi peguaño co mbiri noĩ pegüi, cherivi reta. Ërei yepe tẽi puecha'ã ma, Ërei jecuaeño oremandúa perẽ. Nduipotã ete tẽi puecha ye. ¹⁸ Jáeramo nduipotã tẽi ndoo Tesalónica pe. Jecuaeño che etei aipotã tẽi aa pepi. Ërei Satanás jecuaeño orembiavai. ¹⁹ YandeYa Jesús ou yeta co ara güi. Jare ore nuãro noĩ nduyerovia reve. Echa'ã jae ndive ñãi yave, ore nduyeroviata, jare yandeYa jeita icavi co nduyapo, pe reta vi joco pe peĩta ramo. ²⁰ Añete co, nduyeroviata pereco pegua, yandeYa jei yave icavi co nduyapo.

3

¹ Jare orequirẽi ete tẽi ndoo pepi ramo, nduyemingueta ndupita vaerã oreño Atenas pe, ² jare nomondo vaerã pepi Timoteo. Jae co yanderivi. Jae uyeyocui Tumpa pe. Umimbeu ore ndive ñee icavi vae Cristo regua. Jáeramo nomondo Timoteo, jae pematangãtu vaerã, jare pembipiacatu vaerã pepurugüirovia re. ³ Agüiye pepiatiti ete, piporara ramo. Echa'ã pe reta etei picuaa jucuarãi yaiporarata co. ⁴ Ore nduico yave pe ndive, numimbeu peve yaiporarata vae. Jare jucuarãi uyeyapo ma. Cua picuaa co. ⁵ Jáeramo chequirẽi ete tẽi aa pepi ramo, amondo Timoteo, aicuaa vaerã pepurugüirovia regua. Echa'ã chepia pe ayemingueta aramoĩ jocua uipotã ivi pegua reta icavi mbae vae uyapo vaerã vae uparaviqui ma pepia pe, uyapoca vaerã peve icavi mbae vae. Echa'ã jucuarãi yave mona, nduparaviquiñota tẽi co.

⁶ Ërei Timoteo ou uvãe yave cua pe Tesalónica güi, umimbeu oreve quirãi pepurugüirovia cavi peĩ, jare quirãi peau yandeYa. Jei vi oreve quirãi jecuaeño pemandúa orerẽ orerau reve, jare quirãi pipota orerecha, ore nduipotã puecha rami. ⁷ Jáeramo, cherivi reta, yepe tẽi ñru vae reta uyapo icavi mbae vae oreve jare nduiporara noĩ, Ërei orepiacatu pepurugüirovia jeco pegua. ⁸ Orepiacatu noĩ, pe reta jecuaeño piyeyocui yandeYa pe ramo. ⁹ Jáeramo numee yasurupai tuicha Tumpa pe perẽ. Echa'ã nduyerovia ete pereco pegua yandeRu Tumpa jovaque. ¹⁰ Jare tanta nduyerure Tumpa pe ara rupi jare pitu rupi, ndoo vaerã puecha. Nduipotã numimbeu peve mbaembae ndeño picuaa cavi vae, pepirãta vaerã pepurugüirovia re.

¹¹ YandeRu Tumpa etei jare yandeYa Jesús taoremondo pepi. ¹² Jare yandeYa tuparaviqui pepia pe, piyerau ete vaerã, jare peau vaerã opaete vae. Pepuruau, ore puau rami. ¹³ Jare yandeYa tapemimirãta, piyapo vaerã jupi vae, jare agüiye vaerã yandeRu Tumpa pembijeco mbae re, yandeYa Jesús ou ye yave. Jae ou yeta co opaete uñeño tee chupeguarã vae reta ndive.

4

Quirãiyandepuere yambiyerovia Tumpa

¹ Pe reta picuaa ma quirãi pico vaerã, jare quirãi pembiyerovia vaerã Tumpa. Cua numimbeu ma peve. Jáeramo añave pumbiaracuaa yandeYa Jesús jee re, cherivi reta, jecuaeño pico cuarãi, pembiyerovia ete vaerã Tumpa.

² Echa'ã pe reta picuaa mboroyocui reta numimbeu peve vae. YandeYa Jesús umimbeu oreve numimbeu peve vaerã. ³ Echa'ã Tumpa uipota piñeño tee vaerã chupeguarã. Uipotã piyapo vaerã agusa. ⁴ Jáeramo penti penti penoi pembireco. Piyapo jupi vae pembireco coti, jare pemaie cavi jese pipiu reve. ⁵ Agüiye peporopotaño. Echa'ã jucuarãi uyapo ivi pegua güirovia'ã Tumpa re vae reta. ⁶ Agüiye piyapo cua nunga icavi mbae vae. Echa'ã cua nunga icavi mbae vae piyapo yave, piyapo co icavi mbae vae perivi reta pe. Jare jucuarãi piyapo yave, yandeYa uiporaracata co peve jocua jeco pegua. Cua numimbeu ma peve, agüiye vaerã piyapo. ⁷ Echa'ã Tumpa yandeparavo, ñañeño tee vaerã chupeguarã - yandeparavo'ã yaporopota vaerã. ⁸ Jáeramo periro yave ore poyocui piyapo vaerã vae, periro co Tumpa iporoyocui - oreporoyocui'ã co. Echa'ã Tumpa umee ma yandeve Espiritu Santo, jae ico vaerã yandepia pe.

⁹ Aicuatia'ã peve mburuau penoi vaerã ñru upurugüirovia vae reta coti vae re. Echa'ã picuaa ma co. Tumpa pemboe ma piyerau vaerã. ¹⁰ Añete co, peau opaete upurugüirovia vae Macedonia pegua reta. Ërei pumiñera jecuaeño piyerau ete vaerã, cherivi reta. ¹¹ Cua poyocui: Pico pepiacatu reve. Jare piyapo peparaviqui. Pemimbaraviqui pepo. Jucuarãi

ore poyocui ma. ¹²Jucuarāi pico yave, piyepiucata co upurugüirovia mbae vae reta pe, jare ndarau mbae uata peve.

YandeYa ou yeta

¹³¿Picuaa'ā pa umanocue vae reta regua, cherivi reta? Nduipotā picuaa vaerā, agüiye vaerā pepiatiti, ĩru vae reta ipiatiti rami. Echa'ā jae reta mbaeti mbae uāro vaerā uyerovia reve. ¹⁴Yande yarovia Jesús umano co jare icove ye co ou umanocue vae reta ipite güi. Jae ramiño vi Tumpa ombouta Jesús ndive upurugüirovia vae umanocue vae reta.

¹⁵Jáeramo numimbeu peve yandeYa umimbeu oreve vae. Jae co cua: YandeYa ou ye yave, yande imeño ñāi vae ndarau yaa umanocue vae reta jenonde. ¹⁶Echa'ā yandeYa etei ugüeyita ara güi ñee mbaepuere pegua reve. Uyenduta vi penti ángel tenondegua vae ñee jare Tumpa ĩtrompteta. Jare Cristo re güirovia vae umanocue vae reta icove yeta rani yugüeru ĩru umanocue vae reta ipite güi. ¹⁷Cua jaicue rupi yande cua ĩvi pe imeño ñāi vae ndeiño ñamano vae yaa pāveta jae reta ndive. YandeYa yandereupita, ñañeovāiti vaerā jae ndive amapĩtu re. Jare jaeño mai pegua yaicota yandeYa ndive. ¹⁸Jáeramo piyembipiacatu cua ñee reta pe.

5

¹Ērei jocua ara reta re mbaeti ma mbae uata amimbeu vaerā peve, cherivi reta. ²Penti imonda vae ou aramoño pĩtu yave. Jae ramiño vi yandeYa outa aramoño. Cua picuaa cavi ma co. ³ĩvi pegua reta jeita ñugüinoi: “Tecorai'ā ma. Mbaeti ma mbae yaquiye chugüi vae.” Jucuarāi jeita. Jayave outa aramoño chupe reta mbaesusere, cuña imembarasi aramoño ou chupe rami. Jare ndarau oyepe reta jocua mbaesusere güi. ⁴Penti imonda vae uique aramoño penti tenta pe pĩtumimbi yave, tenta iya uicuaa mbae reve. Ērei pe reta jocua tenta iya rami'ā co, cherivi reta. Pico'ā pĩtumimbi pe. ⁵Echa'ā opaete pe reta pico guarasi jembipe yave yugüireco vae rami. Echa'ā guarasi umee tembipe. Yaico'ā co pĩtu yave yugüireco vae rami. Echa'ā pĩtu yave, pĩtumimbi co. ⁶Jáeramo agüiye pico oque vae reta rami. Echa'ā ĩru vae reta yugüireco jucuarāi. Ērei ñañemiatangātu, jare ñañemoa ngatu ñāi. ⁷Echa'ā oque vae reta oque pĩtu yave, jare usavĩpo vae reta usavĩpo pĩtu yave. ⁸Ērei yande yaico guarasi jembipe yave yugüireco vae rami. Jáeramo ñañemoa ñāi. Yarovia jare yaau Tumpa. Echa'ā cuarāi yave, jae co penti camisa fierro pegua uñerāro vae omonde vae rami. Ñāāro vi yayerovia reve yayembiasaca ete vaerā. Echa'ā cuarāi yave, jae co penti āca regua fierro pegua uñerāro vae oñono vae rami. ⁹Echa'ā Tumpa yandeparavo'ā uiporaca vaerā yandevē. Jae yandeparavo co, yayembiasaca vaerā yandeYa Jesucristo uyapo yandevē vae jeco pegua. ¹⁰Echa'ā yandeYa Jesucristo umano yanderé, yande yaico vaerā jae ndive. Ñamano yave ani ndei ñamano yave, yaicota jae ndive. ¹¹Jáeramo piyembipiacatu jare piñemimiráta, jucuarāi piyapo pei rami.

Pablo umbiaracuaa upurugüirovia vae reta

¹²Cherivi reta, pumiñera pipĩu vaerā yandeYa pe uyeyocui vae pepite pe ñugüinoi vae reta. Echa'ā jae reta co petenondegua reta yandeYa iparavĩqui re. Jae reta pembiaracuaa. ¹³Pipĩu jare peau iparavĩqui jeco pegua. Jare pico cavi uyupĩi pepiacatu reve.

¹⁴Cherivi reta, pumiñera vi pembiaracuaa vaerā iyaqui vae reta, jare pembipiacatu vaerā ipiatiti vae reta, jare pembori vaerā ĩpirāta mbae vae reta, jare pepiaguasu vaerā opaete vae pe.

¹⁵Piñemoa ngatu. ĩru vae uyapo yave icavi mbae vae pecoti, agüiye piyeepe icavi mbae vae pe. Jecuaeño pico cavi uyupĩi, jare pico cavi vi opaete vae ndive.

¹⁶Jecuaeño piyeruvia catu. ¹⁷Jecuaeño piyerure Tumpa pe. ¹⁸Jecuaeño pemee yasurupai Tumpa pe ipotave mbae re. Echa'ā cua co jae Tumpa uipotā vae. Echa'ā perovia ma Cristo Jesús re.

¹⁹Agüiye piyopia Espĩritu Santo iparavĩqui. Echa'ā jae uparavĩqui oĩ pepia pe. ²⁰Agüiye periro Tumpa ñee umimbeu vae reta ñee. ²¹Pepia pe piyemingueta cavi opaete mbae re. Piñuvatu piyupe icavi vaeño. ²²Agüiye piyapo ipotave icavi mbae vae.

²³Tumpa umee ma yandevē ipiacatu. Tumpa etei tapeño tee iyupeguarāño. Tuyandareco cavi peespĩritu re, jare perecove re, jare perete re, agüiye vaerā quía ĩpuere pembijeco mbae re yandeYa Jesucristo ou ye yave. ²⁴Tumpa uyapota co cua. Echa'ā jae peparavo ma, jare jecuaeño uyapo jei uyapota vae.

²⁵Cherivi reta, piyerure Tumpa pe oreré.

²⁶Saludo reta piyapo piyupe yave, piñecuāva piyeruro reve.

²⁷Che pumiñera pemingueta vaerā cua tupapire opaete yanderivi reta pe. Jae co yandeYa jei vae. Jae oñono tee reta iyupeguarā.

²⁸YandeYa Jesucristo tumee peve ipiacavi. Amén.

SEGUNDA CARTA DEL APOSTOL SAN PABLO A LOS TESALONICENSES

¹ Che co jae Pablo. Che ndive ime ñugüinoi Silvano jare Timoteo. Aicutatía cua tupapire opaete pepurugüirovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. ² YandeRu Tumpa jare yandeYa Jesucristo tumee peve ipiacavi jare ipiacatu.

Tumpa upuruãata jupi vae rupi

³ Jecuaeño nумee yasurupai Tumpa pe peré, cherivi reta. Jare icavi co cuarāi nduyapo vaerā. Echa'ā jecuaeño ucuacuaa pepurugüirovia, jare mburuau penoi uyucoti vae jecuaeño ucuacuaa vi. ⁴ Jáeramo ore nduyemingueta cavi peré ĩru upurugüirovia vae uyembatimbatí vae reta pe orempiari peré yave. Numimbeu chupe reta quirāi pepiaguasu jare tanta pepurugüirovia, yepé tēi ĩru vae reta jecuaeño uyapo icavi mbae vae peve jare uiporaraca peve. ⁵ Cua uicuaaca quirāi Tumpa jecuaeño upuruãa jupi vae rupi, jare jucuarāi Tumpa jeita jupi co pe reta pico vaerā jae ndive iporoyocua pe. Echa'ā jocua jeco pegua añave piporara pico.

⁶ Echa'ā jupi co Tumpa uiporaraca vaerā uiporaraca peve vae reta pe. ⁷ Jare pe reta piporara vae peputuuta ore ndive. Echa'ā jupi co Tumpa yanembuputu vaerā, yandeYa Jesús uyecuaa ye yave, ara güi ou yave ángel mbaepuere güinoi vae reta ndive. ⁸ Yugüeruta tata jendi vae rami. Jayave yandeYa uiporaracata uicuaa'ā Tumpa vae reta pe. Echa'ā jae reta uipota'ā güirovia ñee icavi vae yandeYa Jesucristo regua. ⁹ Jáeramo uiporarata co. Echa'ā yandeYa umbisirita reta yugüireco vaerā jaeño mai pegua mbiri chugüi. Ndarau etei uecha reta yandeYa imbaepuere tuicha ete vae rupi uyapota vae. ¹⁰ Echa'ā jucuarāi uyeyapota, yandeYa ou ye yave. Jare jocua ara reta pe opaete ñeñoño tee yandeYa peguarā vae reta umbidorata yandeYa. Opaete güirovia jese vae reta ipiacañita yandeYa re. Jare pe reta vi perovia numimbeu peve vae.

¹¹ Jáeramo jecuaeño nduyerure Tumpa pe peré. Echa'ā ore nduyeyocui Tumpa pe jare jae preparavo vi. Nduipota Tumpa jei vaerā jupi co preparavo vaerā. Tumpa tapembori imbaepuere rupi, piyapo vaerā opaete mbae icavi vae pipota piyapo vae, jare preparaviqui vaerā pepurugüirovia reve. ¹² Jucuarāi yave, ĩru vae reta umbidorata yandeYa Jesucristo jee icavi vae piyapo vae regua. Jare pe reta vi piyepiucata perovia jese ramo. Jare cua uyeyapota yandeRu Tumpa jare yandeYa Jesucristo ipiacavi jeco pegua.

2

Cuimbae mbaeyoaño iparaviqui vae uyecuaata

¹ YandeYa Jesucristo ou yeta co jare jae yanembatita ñañeovāiti vaerā jae ndive. Jáeramo ore pumiñera cua, cherivi reta: ² Agüiye piyembopa jare agüiye piyempia'ā. Aramoi ĩru vae reta jei ma peve uyaro ma oĩ yandeYa ivāe ara. Aramoi jei peve Espíritu Santo umimbeu chupe reta, ani jei jerācua chupe reta, ani jei ore nduicuatía jucuarāi penti tupapire pe. ³ Ērei agüiye pemaño quía re pemitaví vaerā. Echa'ā jocua ara ndarau ou rai. Echa'ā ndei ou mbove, upurugüirovia mbae vae reta oyovaicho eteta Tumpa ndive, jare uyecuaata jocua cuimbae mbaeyoaño iparaviqui vae. Jae co ucañiteita vae. ⁴ Jae uyembutuichata jare oyovaichota opaete moromboe Tumpa regua ndive jare ndarau umaño ivi pegua reta re umbidora vaerā Tumpa. Jae uguapita Tumpa jo pe jare jeita: “Che Tumpa co.”

⁵ ¿Pemandua'ā pa quirāi che añ pepi rambueve amimbeu peve cua mbaembae re? ⁶ Jare picuaa vi quirāi añave ime quía oyopia vae. Echa'ā jae oyopia oĩ jocua mbaeyoaño iparaviqui vae, agüiye vaerā uyecuaa ndei ivāe ara ou mbove. ⁷ Echa'ā jocua icavi mbae ndeiño uyecuaa vae uparaviqui ma oĩ. Ērei añave oyopia oĩ vae oyopiata co, Tumpa güiraa cua ivi güi regua. ⁸ Jayave uyecuaata jocua icavi mbae vae. Ērei yandeYa uyucata ipitūé pe. Umbaita co, ou yave jembiye asi reve. ⁹ Jocua icavi mbae vae outa uyapo vaerā Satanás iparaviqui. Güinoita mbaepuere tuicha vae jare uyapota miacañi reta upurumbitaví vaerā. ¹⁰ Uyapota opaete mbae jupi mbae vae umbitaví vaerā ucañiteita vae reta. Echa'ā jae reta uipota'ā güirovia añete vae. Echa'ā güirovia yave, uyembiasacata tēi co. ¹¹ Jáeramo Tumpa umañota jese reta uyembitaví vaerā añete mbae vae rupi, güirovia reta vaerā jocua apu. ¹² Jáeramo ucañiteita reta. Echa'ā güirovia'ā añete vae. Jaeño uyerovia jupi mbae vae re.

Tumpa yandeparavo yanembiasa vaerā

¹³ Ērei icavi co jecuaeño nумee vaerā yasurupai Tumpa pe peré, cherivi reta. Echa'ā yandeYa perau jare Tumpa preparavo iyipi güiye pemiassa vaerā, Espiritu Santo peñoño tee

Tumpa peguarã ramo jare añete vae perovia ramo. ¹⁴ Cuarã Tumpa preparavo ñee icavi vae numimbeu peve vae rupi, pe reta vi piyembutuichaca vaerã yandeYa Jesucristo ndive.

¹⁵ Jáeramo, cherivi reta, pepirãta pepurugüirovia re. Agüiye peacañi ore pomboe jese vae güi. Echa'ã ore pomboe oriñee pe jare tupapire nduicuatia peve vae pe. ¹⁶ YandeRu Tumpa yanderau jare umee yandeve mbiacatu ndarau etei opa vae. Jáeramo yandepuere ñaãro yayerovia reve ipiacavi jeco pegua. YandeYa Jesucristo etei jare yandeRu Tumpa ¹⁷ tumee peve ipiacatu jare tapemimirãta ñee icavi vae pere vaerã, jare icavi vae piyapo vaerã.

3

Tumpa iñee tuyepiua

¹ Cuaño aipota, cherivi reta -piyerure oreré, yandeYa iñee jecuaeño uñemai vaerã, opaete vae güirovia vaerã pe reta perovia rami. Jucuarãi yave, yandeYa iñee uyepiucata co. ² Piyerure vi yandeYa orerepi vaerã cuimbae icavi mbae vae oyovaicho ore ndive vae reta güi. Echa'ã opaete vae'ã güirovia yandeYa re. ³ Ërei jecuaeño yandepuere yarovia catu yandeYa re. Jae pemimirãtata pepurugüirovia re, jare umeeta peve mbaepuere agüiye vaerã piñemiamirica icavi mbae vae pe. ⁴ Jare ore pugüirovia catu yandeYa re perovia ramo, quirãi piyapo pei jare piyapota ore ndoe peve piyapo vaerã vae. ⁵ YandeYa tapembori picuaa cavi vaerã quirãi Tumpa perau, jare penoi vaerã mbiaguasu Cristo uipota umee peve vae.

Icavi co uparaviqui vaerã

⁶ Añave ore poyocui, cherivi reta, yandeYa Jesucristo jee re, piyembiyao vaerã ipotave upurugüirovia vae iyaqui vae güi. Echa'ã jocua nunga uipota'ã ico moromboe nduicuaaca peve vae re. ⁷ Pe reta etei picuaa quirãi icavi co pico vaerã ore nduico rami. Echa'ã ore nduico pepite pe yave, nduico'ã co nduparaviqui mbae reve. ⁸ Nducaruiño'ã vi numbiepi mbae reve. Ërei tanta nduparaviqui ara rupi jare pïtu rupi, agüiye vaerã quia pepite pe oi vae uyemambeco oreré. ⁹ Cuarãi nduyapo yepe tēi mbaepuere nonoi nduyerure vaerã peve mbaembae re. Ërei nduipota nduicuaaca peve quirãi ore nduico, pe reta vi pico vaerã ore nduico rami. ¹⁰ Echa'ã nduico pepi yave, poyocui cuarãi: Ime yave quia ñatēi uparaviqui vae, agüiye quia tumingararu. ¹¹ Echa'ã jerãcua oreve quirãi ime pepite pe amocue iyaqui vae. Yugüiraaiño ñru vae reta iparaviqui re umaie uicuaa vaerã. Ërei iquii'ã-raanga iyupe uparaviqui vaerã. Ërei uyapo'ã mbae ave. ¹² Ërei ndoyocui jare numbiaracuaa jocua nunga yandeYa Jesucristo jee re uparaviqui reta vaerã mbiacatu reve, ime vaerã güinoi mbae jou vaerã.

¹³ Ërei pe reta, cherivi reta, agüiye pecueri icavi vae piyapo vae güi. ¹⁴ Jare ime yave quia cua nduicuatia peve piyapo vaerã vae uyapo'ã vae, picuaa cavi jesequa quia nunga vae, jare agüiye piñemiñru jae ndive, jae imara vaerã. ¹⁵ Agüiye piyovaicho jae ndive. Ërei pembiaracuaa penti perivi pembiaracuaa rami.

Saludo reta

¹⁶ Jare yandeYa etei mbiacatu umee vae jecuaeño tumee peve ipiacatu opaete rupi. YandeYa toi opaete pe ndive.

¹⁷ Che etei jae peve Tumpa ndiveño pei. Aicuatia cua chepo pe etei. Jucuarãi ayapo opaete aicuatia vae pe, aechaca vaerã añetete co. Cuarãi aicuatia. ¹⁸ YandeYa Jesucristo tumee opaete peve ipiacavi. Amén.

PRIMERA CARTA DEL APOSTOL SAN PABLO A TIMOTEO

¹ Che co jae Pablo. Che co jae Jesucristo jemimondo. Tumpa jare yandeYa Jesucristo iporoyocui rupi che ayeyapo temimondorã. Tumpa yanembiasa ma jare ñaãro yandeYa Jesucristo yayerovia reve. ²Aicuatia cua tupapire ndeve, Timoteo. Nde co jae cherai añetete vae yandepurugüirovia re. YandeRu Tumpa jare yandeYa Jesucristo tumee ndeve ipiacavi jare ipuruparareco jare ipiacatu.

Umimbeu moromboe añete mbae vae reta regua

³ Epita Efeso pe, Macedonia coti aa yave che jae ndeve rami, ndiyocui vaerã amocue vae agüiye vaerã oporomboe ambie moromboe re. ⁴ Ìru vae reta umimbeu aracae ndaye retaño jare jecuaeño umierãcua mbae itenondegua reta pe uyeyapo vae reguaño. Che jae ndeve ndiyocui vaerã vi agüiye vaerã uyapisaca jocua nunga re. Echa'ã uyapisaca jese yave, umbipita uyeaca jocua mbaembae re, jare jucuarãi yave, ndarau uyeyocui cavi Tumpa pe. Echa'ã yayeyocui Tumpa pe mburugüirovia re.

⁵ Jare jucuarãi iyocui, jae reta güinoi vaerã mburuau. Yandepia uyeyoe yave mbaeyoa güi, jare yaicuaa yave yayapo'ã co icavi mbae vae, jare ñanoi yave mburugüirovia añetete vae Tumpa coti, ñanoita mburuau. ⁶ Èrei amocue vae uyavi cua mbaembae. Jáeramo uyembopa jare añave uyeacaño. ⁷ Jae reta uipota tõi oporomboe mboroyocui re. Èrei uicuaa cavi'ã mbae jei vae jare mbae imiari jese vae, yepe tõi imiari jese uicuaa cavi vae imiari rami.

⁸ Yaicuaa mboroyocui icavi co, uyeporu yave Tumpa uipota uyeporu vaerã rami. ⁹ Echa'ã yaicuaa mboroyocui uyeyapo'ã co mbaepuere güinoi vaerã jupi vae reta re. Jaeño uyeyapo mbaepuere güinoi vaerã mboroyocui jei vae uipota'ã uyapo vae reta re, jare Tumpa jei vae uipota'ã uyapo vae reta re, jare iyoa vae reta re, jare icavi mbae vae uyapo vae reta re, jare icavi mbae vae Tumpa coti jei vae reta re, jare tu uyuca vae reta re, jare ichi uyuca vae reta re, jare opaete upuruyuca vae reta re, ¹⁰ jare aguasa uyapo vae reta re, jare cuimbae reta uyupii uyerereco vae re, jare oñomi japicha umee vaerã corepoti re vae reta re, jare iyapu vae reta re, jare Ìru vae re uñeapo iyapu reve vae reta re, jare ipotave moromboe añete vae ndive oyovaicho vae reta re. ¹¹ Cua moromboe añete vae ñee icavi vae pegua co. Tumpa jecuaeño uyerovia catu jare uyembidoraca ñee icavi vae rupi. Jae umimbeu cheve ñee icavi vae, che amimbeu-yuapi ye vaerã.

Quirãi Pablo uyeyocui yandeYa pe

¹² Jare amee yasurupai yandeYa Cristo Jesús pe imbaepuere umee cheve vae re. Jae uicuaaca quirãi chererovia catu. Echa'ã umee cheve ayeyocui vaerã chupe. ¹³ Jucuarãi uyapo, yepe tõi tenonde yave che jae icavi mbae vae yandeYa coti, jare ayapo icavi mbae vae yandeYa re güirovia vae reta pe, jare cherecopochi icoti. Èrei yandeYa cheparareco. Echa'ã apurugüirovia'ã ramo, opaete cua ayapo aicuaa'ã icavi mbae vae ayapo ramo. ¹⁴ Jare yandeYa umee cheve jeta ete ipiacavi. Jae ramiño vi umee cheve mburugüirovia jare mburuau. Echa'ã cua reta yanembae co Cristo Jesús re yarovia yave.

¹⁵ Cua co jae ñee yandepuere yarovia catu vae, jare icavi co opaete vae güirovia vaerã: Cristo Jesús ou cua ivi ou umbiasa vaerã iyoa vae reta, jare che co jae iyoa vae reta güi iyoa ete ye vae. ¹⁶ Èrei cuarã yandeYa cheparareco. Echa'ã che co jae iyoa ete vae ramo, Jesucristo cheparareco yave, jae uicuaaca quirãi jae ipiaguas tuicha ete co. Jare che co jae penti jaanga rami, Ìru vae reta vi uicuaa vaerã ipuere güirovia jese, jae reta vi güinoi vaerã tecove opa mbae vae. ¹⁷ Yambadora jaeño mai pegua yanderuvicha guasu opa mbae vae. Jae ndarau etei umano jare mbaeti quía ipuere uecha. Jaeño co Tumpa. Amén.

¹⁸ Cua mbaraviqui re ndoyocui, cherai Timoteo. Echa'ã jucuarãi tenonde yave nemimbeu Tumpa ñee umimbeu vae reta. Nemandúa jocua re, ndepuere vaerã niñerãro cavi icavi mbae vae ndive. ¹⁹ Ìñemimiràta ndepurugüirovia re, jare agüiye iyapo mbae ndicuaa agüiyeta tõi ndiyapo vae. Echa'ã amocue vae uyapo agüiyeta tõi uyapo vae. Jáeramo, uyembopa ipurugüirovia re. ²⁰ Cuarãi uasa Himeneo jare Alejandro. Jáeramo amaño'ã jese reta uñemiru vaerã Ìru upurugüirovia vae reta ndive. Cua jeco pegua ndarau ndipo jei reta icavi mbae vae Tumpa coti.

2

Umimbeu quirãi uyerure vaerã Tumpa pe

¹ Cua rani jae peve: Upurugüirovia vae reta tuyerure Tumpa pe opaete vae re, jare tumeë yasurupai Tumpa pe jese reta. ² Jucuaräi tuyerure mburuvicha guasu reta re, jare opaete mbaepuere güinoi vae reta re, yaico cavi vaerä yandepiacatu reve, yandepuere vaerä yayeyocui Tumpa pe yambiadora reve. ³ Echa'ä icavi co yayapo vaerä jucuaräi, yambiroyvia vaerä Tumpa - jae co yanembiasa vae. ⁴ Jae uipota opaete vae uyembiasa vaerä jare uicuaa cavi vaerä añete vae. ⁵ Echa'ä ime pentiño Tumpa. Jae ramiño vi ime pentiño ipuere umbipiacatu ivi pegua reta Tumpa ndive vae. Jae co penti cuimbae Cristo Jesús jee vae. ⁶ Jae uñemeë umano vaerä, ipuere vaerä uepi opaete vae. Jare Tumpa uicuaaca cua, ara ou ma uväe yave uicuaaca vaerä. ⁷ Jare yandeYa cheparavo amimbeu vaerä cua regua. Jae cheapo jemimondorä, amboe vaerä judío mbae vae reta mburugüirovia añete vae re. Cua che jae peve vae añete vae co. Cheapu'ä etei co.

⁸ Jáeramo aipota cuimbae reta uyerure vaerä Tumpa pe opaete que rupi rupi. Agüiye tuyerure mbochi reve jare mbae umbasi reve. Tuyerure ipia icavi reve. ⁹ Jae ramiño vi cuña reta agüiye tomonde temimonde ipōra ete vae ñru vae reta pe uechaca vaeräño. Agüiye tiyemipia'ä ete temimonde re, ani ia re, ani mbaembae oro pegua vae re jare mbaembae ipōra ete vae re. ¹⁰ Èrei tuyapo icavi vae. Echa'ä amocue cuña reta jei uyapo co Tumpa uipota uyapo vaerä vae. Jáeramo icavi co jocua nunga uyapo vaerä icavi vae. ¹¹ Cuña reta tiquiñi yemboe pe uñemimichi reve. ¹² Jare ayocui'ä cuña reta oporomboe vaerä jare güinoi vaerä mbaepuere cuimbae reta re. Tiquiñiño. ¹³ Echa'ä Tumpa uyapo Adán rani jare jaicue rupi uyapo Eva. ¹⁴ Jare Adán itavi'ä. Cuña itavi. Jare itavi ramo, cuña iyoa. ¹⁵ Cuña reta jecuaeño imembita uiporara reve, èrei Tumpa uepita. Èrei jecuaeño tupurugüirovia jare tupuruau. Tuñeño tee Tumpa peguarä. Jecuaeño tuico cavi.

3

Quiräi icavi ico vaerä upurugüirovia vae reta itenondegua

¹ Añete co cua yae vae: Ime yave quia uipota uyeyapo upurugüirovia vae reta itenondeguarä vae, uipota uyapo mbaraviqui icavi vae. ² Jáeramo upurugüirovia vae reta itenondegua tuico cavi, agüiye vaerä quia umbijeco mbae re. Tugüireco pentiño cuña. Tuñemoa ngatu. Jecuaeño tuyapo icavi vae, uyepiucua vaerä ñru vae reta pe. Tiquirëi umbiresive vaerä mboupa reta jenta pe. Ticatu toporomboe. ³ Agüiye ticause. Agüiye tiñerärose. Tipiacavi. Agüiye tijaiaichopota. Agüiye tuiyapa ete corepoti iyupeguarä. ⁴ Toyocui cavi opaete jenta pegua reta. Toyocui cavi isambiai reta, jae reta uyapo vaerä tu jei vae jare uipi vaerä. ⁵ Echa'ä cuimbae icatu'ä yave oyocui cavi vaerä jenta pegua reta, ndarau etei ipuere uyandareco Tumpa uiparavo vae reta re. ⁶ Jare agüiye tuyeyapo upurugüirovia vae reta itenondeguarä penti cuimbae güirovia ramo yandeYa re vae. Echa'ä jucuaräi uyeyapo yave, aramoi uyembicaceta, jare ñru vae reta umbijecota icate re, Tumpa umbijeco añä guasu jae uyembicaceta yave rami. ⁷ Jae ramiño vi upurugüirovia vae reta itenondegua tieräcua cavi, upurugüirovia mbae vae reta imiari cavi vaerä jese. Echa'ä jucuaräi'ä yave, aramoi jae reta umbijecota, jare jucuaräi upurugüirovia vae reta itenondegua aramoi uñemiamiricata añä guasu pe.

Quiräi icavi ico vaerä ñru upurugüirovia vae reta ombori vae

⁸ Jae ramiño vi ñru upurugüirovia vae reta ombori vae reta tuyepiucua ñru vae reta pe. Agüiye tipurumbitavise. Agüiye ticause. Agüiye tuiyapa ete corepoti iyupeguarä. ⁹ Tuicuaa cavi jocua opaete vae pe'ä uyecuaa vae yandepurugüirovia regua, jare agüiye tuyapo mbae uicuaa agüiyeta tēi uyapo vae. ¹⁰ Epirandu rani jese jecocavi ra, jare ñru vae reta uicuaa cavi yave ico cavi co, ipuere uyeyocui Tumpa pe jucuaräi. ¹¹ Cua reta jembireco vi tuyepiucua ñru vae reta pe. Agüiye tiyapu ñru vae re. Tuñemoa ngatu jare tuico cavi, ñru vae reta ipuere vaerä güirovia catu opaete pe. ¹² ñru upurugüirovia vae reta ombori vae reta tugüireco pentiño cuña, jare toyocui cavi isambiai reta jare opaete jenta pegua reta. ¹³ Echa'ä cua reta uyeyocui cavi yave Tumpa pe, uyepiucua ñru vae reta pe, jare ipuere imiari uquiyē mbae reve mburugüirovia güinoi Cristo Jesús re vae re.

Uyecuaa yandeve vae

¹⁴ Chepia pe ayemingueta imambaeño aa vaerä ndepi. Èrei cua mbaembae re aicuatia ndeve, ¹⁵ ndicuaa vaerä quiräita ndico Tumpa jentarä reta ndive - jae reta co Tumpa imeño mai ico vae uiparavo vae reta - jae reta uñemimiräta añete vae re jare uicuaaca ñru vae reta pe añete vae. Echa'ä aramoi apitata ima cua pe. ¹⁶ Añete co, ñanemipiacañi ete cua yandeveño uyecuaa vae. Echa'ä yande yayeyocui Tumpa pe. Tumpa uyeyapo cuimbaerä. Espiritu Santo uicuaaca jae co jupi vae. Ángel reta uecha.

Jerăcua opaete ivi pegua reta pe.
Ivi pegua reta güirovia jese.
Jare Tu umbiresive ye ara pe.

4

Umimbeu yarovia vae güi uyerovata vae reta

¹ Jare Espiritu Santo umimbeu yandeve quirăi ara reta taicuegua vae pe amocue vae uyerovata yarovia vae güi. Jae reta güiroviata aña upurumbitavi vae reta jare morombœe reta aña reta uipota güirovia vaeră vae. ² Oporombœe reta yave, iyaputa upurumbitavi vaeră. Jare ndarau ipiatiti jese, ipiatanta ramo. ³ Oyopiata İru vae reta agüiye vaeră umenda, jare oyopiata İru vae reta agüiye vaeră jou mbae nunga tembıu, yepe tēi Tumpa uyapo yandeve tembıu yau vaeră yasurupai ñamee reve chupe. Echa'ă yande yarovia Tumpa jare yaicuaa ma añete vae. ⁴ Echa'ă opaete mbaembæe Tumpa uyapo vae icavi co. Agüiye ñarıro mbae nunga tembıu. İcavi co yau vaeră yasurupai ñamee reve Tumpa pe. ⁵ Echa'ă uñeñoño tee co yau vaeră Tumpa iñee jare yerure rupi.

Jesucristo pe uyeyocui cavi vae

⁶ Nemimandúa yave yanderivi reta cua mbaembæe re, ndiyeyocui cavi co Jesucristo pe. Jecuae iñemimirăta ñee yarovia vae reta re jare morombœe añete vae regua re. Echa'ă cua reta re jecuaeño ndico. ⁷ Ęrei agüiye erovia aracae ndaye vae reta. Ęrei iñemiatangătu ndiyapo vaeră Tumpa uipota yayapo vaeră vae. ⁸ Echa'ă yanderete yamungúe yave, michi peguaño icavi yandeve. Ęrei ñañemiatangătu yave yayapo vaeră Tumpa uipota yayapo vaeră vae, jecuaeacuae icavi ete yandeve. Echa'ă icavi yandeve cua ivi pe yaico rambueve, jare icavita vi yandeve Tumpa ndive ma yaico yave. ⁹ Cua co ñee yandepuere yarovia catu vae, jare icavi co opaete vae güirovia vaeră. ¹⁰ Echa'ă cuară yaparaviqui ñai yaiporara reve, Tumpa imeño mai ico vae re yarovia ramo. Jae co opaete vae umbiasa vae. Jae umbiasa güirovia jese vae reta.

¹¹ Cua mbaembæe re eporoyocui jare eporombœe. ¹² Agüiye quía tanererİro ndetairusu ramo. Ęrei jecuaeño nde rani ico cavi, İru upurugüirovia vae reta uicuaa vaeră quirăi icavi co jae reta vi yugüireco vaeră. Jæramo jecuaeño nemiarı icavi vae re. Jecuaeño iyapo icavi vae. Jecuaeño epuruau. Jecuaeño erovia Tumpa. Agüiye iyapo mbae pichıi vae. ¹³ Che aa avæ ndeve regua, jecuaeño iñemiatangătu nemingueta vaeră Tumpa iñee İru vae reta pe, jare ndepurumbiaracuaa vaeră, jare ndeporombœe vaeră. ¹⁴ Jecuaeño iñemiatangătu ndiporu vaeră mbaepuere Tumpa umee ndeve vae. Echa'ă uñemee ndeve Tumpa iñee umimbeu vae reta jei rami, upurugüirovia vae reta itenondegua reta oñoño yave ipo nderé.

¹⁵ Jecuaeño iyandareco cavi cua mbaembæe re opaete ndepia reve, uyecuaa vaeră opaete vae pe quirăi icavi ete co ndiyembœe neı. ¹⁶ İñemoa ngatu ndico cavi vaeră jare ndeporombœe cavi vaeră. Jecuaeño iñemiatangătu jese reta. Echa'ă jucuarăi ndiyapo yave, ndiyerepicata jare ndeepicata vi uyapisaca nderé vae reta.

5

Quirăi umbiaracuaa vaeră İru upurugüirovia vae reta

¹ Agüiye iñeengata cuimbae indechi vae reta pe. Ęrei embiaracuaa, penti cuimbae umbiaracuaa tu rami. Jare embiaracuaa cuimbae tairusu vae reta, penti cuimbae umbiaracuaa tivı rami. ² Embiaracuaa cuña ucuacuaa vae reta, penti cuimbae umbiaracuaa ichı rami, jare embiaracuaa cuñatai reta, penti cuimbae umbiaracuaa jındı rami. Agüiye ndepia pe iyemingueta icavi mbae vae jese reta.

³ Embori ime umano vae reta mbaeti etei güinoi yave quía ombori vaeră. ⁴ Ęrei ime umano vae ime yave güinoi imembi reta ani jamarıro reta, jae reta rani tombori, uicuaaca vaeră uyeyocui co Tumpa pe. Echa'ă ime umano vae jae reta jentară co. Jucuarăi tuyapo reta ombori vaeră ichı jare iyari. Echa'ă jucuarăi uyapo yave, umbiyerovia Tumpa. ⁵ Ęrei penti ime umano vae mbaeti etei güinoi quía ombori vaeră vae co jae penti añete ime umano vae. Jae güirovia Tumpa, jare jecuaeño uyerure chupe pıtu rupi jare ara rupi. ⁶ Ęrei ime umano vae ueca yave jete umbiyerovia vaerăño, uyeyocui'ă etei Tumpa pe, penti umanocue vae ipuere'ă etei uyeyocui İru vae pe rami. ⁷ Jæramo cua mbaembæe re iyocui upurugüirovia vae reta, agüiye vaeră quía umbijeco reta mbae re. ⁸ Ęrei ime yave penti upurugüirovia vae uyandareco'ă jenta pegua reta re jare İru jentară reta re vae, upurugüirovia mbae vae echa. Jeta upurugüirovia mbae vae reta uyapo cavi ete chugüi. Echa'ă jae reta uyandareco jenta pegua reta re jare İru jentară reta re.

⁹ Agüiye emİru ime umano vae İru ime umano vae reta ndive ndei sesenta año güinoi mbove. Sesenta año güinoi yave ramo emİru jae reta ndive mbaeti yave imegua, ¹⁰ jare İru

vae reta umierācua yave icavi vae uyapo vae, jare uyandareco cavi yave sambiai reta re, jare umingarū yave jenta pe opou vae reta, jare uyeyocui yave uñemimichi reve ĩru uñeñoño tee Tumpa peguarā vae reta pe, jare ombori yave uiporara vae reta, jare uñemiatangātu yave uyapo vaerā icavi vae.

¹¹ Ērei agüiye emāru tairusu ime umano vae reta ĩru ime umano vae reta ndive. Echa'ā cua nunga uipota ye yave cuimbae, uipota'ā ma uyeyocui Cristo pe ĩru ime umano vae reta uyeyocui chupe rami. Uipotāño umenda. ¹² Jáeramo güinoi teco. Echa'ā uyapo'ā ma tenonde yave jei uyapo vaerā upurugüirovia vae reta pe vae. ¹³ Jae ramiño vi iyaqui uyeyapo jare opou reño. Jae ramiño vi uyemingueta japicha re jare ĩru vae iparaviqui re iyurungueta. Imiari mbaembae agüiyeta tēi imiari jese vae re. ¹⁴ Jáeramo aipota tairusu ime umano vae reta umenda ye vaerā. Icavi co imembi vaerā jare uyandareco cavi vaerā jenta pegua reta re. Agüiye tuyapo mbae icavi mbae vae, agüiye vaerā oyovaicho Cristo ndive vae ipuere umbijeco mbae re. ¹⁵ Echa'ā amocue vae uyerova ma uyapo vaerā Satanás uipota uyapo vaerā vae.

¹⁶ Pentī cuña upurugüirovia vae jentarā ime umano yave, upurugüirovia vae tombori ime umano vae, agüiye vaerā ime umano vae uyeco ĩru upurugüirovia vae reta re jae reta ombori vaerā, jae reta ipuere vaerā ombori ĩru ime umano vae reta mbaeti etei jentarā güinoi ombori vaerā vae.

¹⁷ Jupi co upurugüirovia vae reta itenondegua Tumpa iparaviqui uyapo cavi vae reta uyepiua vaerā jare ĩru reta umbiepi vaerā chupe reta. Jae ramiño vi jupi co upurugüirovia vae reta itenondegua Tumpa iñee umimbeu jare oporombocoe vae reta uyepiua ete vaerā jare ĩru reta umbiepi vaerā chupe reta. ¹⁸ Echa'ā Tumpa iñee pe uyecuatía oĩ cuarāi: “Güeye trigo umbipiriri oĩ yave, agüiye iyuruyocua.” Jare: “Jupi co umimbaraviqui vae umbiepi vaerā uparaviqui vae pe mbaraviqui uyapo vae.” Cuarāi uyecuatía oĩ.

¹⁹ Ime yave quia pentī upurugüirovia vae reta itenondegua mbae re umbijeco vae, agüiye iyapisaesa jese ipuere'ā yave imiari mocui ani mbapi uicuaa cavi jeco regua vae. ²⁰ Iyova vae reta pe ere iyova co opaete vae jovaque, ĩru vae reta uquiye vaerā mbaeyoa uyapo. ²¹ Che ndoyocui Tumpa jare yandeYa Jesucristo jare ángel reta Tumpa uiparavo vae jovaque: Cua mbaembae jecuaeño iyapo, jare agüiye eau pentī vaeño ĩru vae güi. Oyovaque reve iyapo opaete vae pe. ²² Agüiye ndeapura iyapo vaerā upurugüirovia vae reta itenondeguarā, agüiye vaerā niñemĩru ĩru cuimbae reta ndive imbaeyoa reta re. Agüiye iyapo mbae pichii vae.

²³ Imeño nderie pe nembraerasi. Cua jeco pegua vino jeu michi michi nepoarā. Agüiye iño jeu.

²⁴ Amocue vae imbaeyoa reta tenonde voi uyecuaa cavi jare uicuaaca quirāi uñeñacata co. ĩru vae reta imbaeyoa reta uyecuaata taicue rupi. ²⁵ Jae ramiño vi icavi vae amocue vae uyapo vae tenonde voi uyecuaa cavi, jare icavi vae añave uyecuaa mbae vae vi uyecuaata co.

6

¹ Opaete uyeyocui patrón pe vae reta tuiipi ipatrón, agüiye vaerā ĩru vae reta jei icavi mbae vae Tumpa coti jare yandeporombocoe coti. ² Jare ipatrón upurugüirovia yave, chupe uyeyocui vae reta agüiye tugüiro. Echa'ā aramoi ipia pe uyeminguetata güiro vaerā, ipatrón vi upurugüirovia ramo. Ērei uyeyocui vae reta tuyeyocui cavi ipatrón pe. Echa'ā ipatrón vi güirovia yandeYa re, jare yandeYa uau. Jare icavi eteta co ipatrón pe, jembiocui reta uparaviqui cavi yave chupe. Cua mbaembae re eporombocoe jare epurumbiaracuaa.

Yayeyocui Tumpa pe yandepiacatu reve

³ Aramoi ĩru vae oporombocoe ambie morombocoe re, jare ndarau güirovia morombocoe añete vae, yepe tēi morombocoe añete vae co jae yandeYa Jesucristo regua. Echa'ā jocua morombocoe añete vae yanemboe quirāi yayeyocui vaerā Tumpa pe. ⁴ Ērei jocua nunga oporombocoe vae uyembicata co, jare uicuaa'ā mbae ave. Echa'ā jecuaeño uyeaca. Jare cua icavi'ā co. Jáeramo ñacatāa, jare jovaichopota, jare jei icavi mbae vae, jare jei quirāi ĩru vae reta uyapo icavi mbae vae. ⁵ Jocua nunga uyeacaiño mbae icavi mbae vae re. Ipiayemingueta jupi'ā co. Jae reta uicuaa'ā etei añete vae. Ipia pe uyemingueta tēi ipuere uyeyocui Tumpa pe icocatu vaerā. Agüiye iñemĩru jocua nunga ndive. ⁶ Ērei yayeyocui yave Tumpa pe, icavi ete co yandeve, yaico yave yandepiacatu reve. ⁷ Echa'ā yaa yandesí güi yave, mbaeti etei mbae yaru. Jae ramiño vi ñamano yave, ndarau etei mbae yaraa. ⁸ Jáeramo ñanoi yave añave yanderembiurā jare yanderemimonderā, yaico yandepiacatu reve. ⁹ Ērei yavai'ā uipota icocatu vae reta iyova vaerā. Yavai'ā añe guasu uyavica chupe reta vaerā. Jáeramo jae reta ipia pe uyemingueta cavi mbae reve uipota ete jeta mbaembae icavita'ā etei chupe reta vae. Echa'ā jocua nunga mbaembae pe uñemicañitei reta. ¹⁰ Echa'ā

corepoti uipota ete vae uyapo opaete mbaembae icavi mbae vae. Jare amocue vae uipota ete icocatu ramo, uyembopia mburugüirovia yandeYa regua güi, jare umbieta tēi jucuarāi uyapo ramo.

Tanta eparaviqui Tumpa pe

¹¹ Ĕrei nde co jae cuimbae Tumpa pe uyeyocui vae. Jáeramo agüiye etei iyapo jucuarāi. Ĕrei ipota ete ndiyapo vaerā jupi vae jare ndiyeyocui vaerā Tumpa pe. Jae ramiño vi ipota ete mburugüirovia, jare mburuau, jare mbiaguasu, jare ñemimichi. ¹² Jecuaeño eparaviqui tanta ndiporara reve yarovia vae re. Ico cavi yandeYa ndive, echa'ã jae umee yandeve tecove opa mbae vae. Echa'ã cuarā Tumpa ndeparavo. Jare nemimbeu cavi ma ndepurugüirovia jeta uyapisaca nderé vae reta pe. ¹³ Cua re co che ndoyocui Tumpa jee re. Echa'ã jae umee tecove opaete pe. Ndoyocui vi jese Cristo Jesús jee re. Echa'ã jae umimbeu cavi añete vae regua Poncio Pilato jovaque. ¹⁴ Jecuaeño iyapo cua che ndoyocui jese vae. Jucuarāi ndiyapo yave, ndarau mbae icavi mbae vae ndiyapo, jare ndarau quía ipuere nembijeco mbae re, yandeYa Jesucristo ou ye regua. ¹⁵ Echa'ã ara ou uvāe yave, Tumpa uechacata co yandeYa Jesucristo. Tumpa jecuaeño uyerovia catu. Jaeño co opaete vae iYa. Jae co mburuvicha guasu mbaepuere tuicha ete vae güinoi vae. Jae imbaepuere tuicha ete co opaete ĩru mburuvicha guasu reta imbaepuere güi. Jae co opaete ivi pegua reta iya reta iYa. ¹⁶ Jaeño co umano mbae vae. Jae ico tembipe oĩ vae pe. Mbaeti quía ipuere oya jocua tembipe re. Mbaeti etei quía uecha Tumpa, jare mbaeti etei quía ipuere uecha. Tuyembiaadoraca Tumpa jaeño mai pegua. Imbaepuere tuicha ete co. Amén.

¹⁷ Iyocui cua ivi pegua mbaembae re icocatu vae reta agüiye vaerā ticate iyee iparavete vae reta güi, jare agüiye vaerā uyeco icorepoti re. Echa'ã aramoi imambae opata. Ĕrei tuyeco Tumpa imeño mai ico vae re. Echa'ã jae umee yandeve opaete mbaembae yayerovia vaerā. ¹⁸ Jare iyocui vi tuyapo icavi vae. Echa'ã jucuarāi yave, icocatuta co Tumpa coti icavi vae uyapo vae re. Jecuaeño tiquirēi umee vaerā güinoi vae güi ĩru vae reta pe, ombori reta vaerā. ¹⁹ Echa'ã jucuarāi uyapo yave, güinoita mbae icavi vae opa mbae vae ara outa vae reta peguarā, jare güinoita tecove opa mbae vae.

Pablo jaeño ma oyocui Timoteo vae

²⁰ Timoteo, jecuaeño iyandareco cavi jocua uñemee ndeve ndiyandareco vaerā jese vae re. Agüiye iyapisaca ndaye reta re. Echa'ã jei vae mbae'ã co. Agüiye erovia Tumpa ndive oyovaicho vae reta jei tēi uicuaa cavi vae. Echa'ã uicuaa'ã co mbae. ²¹ Echa'ã amocue jei tēi uicuaa cavi vae uyembopia yarovia vae güi.

Tumpa tumee ndeve ipiacavi. Amén.

SEGUNDA CARTA DEL APOSTOL SAN PABLO A TIMOTEO

¹ Che co jae Pablo. Che co jae Jesucristo jemimondo Tumpa jei vae rupi. Echa'ã cheparaviqui jae co amimbeu vaerã quirã Tumpa jei umee vaerã tecove opa mbae vae opaete Cristo Jesús re güirovia vae reta pe. ² Aicutia'ã cua tupapire ndeve, Timoteo. Echa'ã nde co jae cherai aau ete vae. YandeRu Tumpa jare yandeYa Cristo Jesús tumee ndeve ipiacavi jare ipuruparareco jare ipiacatu.

Cristo regua umimbeu ñru vae reta pe

³ Jecuaeño chemandúa nderé pïtu rupi jare ara rupi ayerure Tumpa pe yave. Jáeramo amee yasurupai Tumpa pe. Ambiadora Tumpa, chetenondegua reta umbiadora rami. Jare jucarã ayapo yave, ayapo'ã mbae aicuaa agüiyeta tã ayapo vae. ⁴ Aipota ete nduecha, ayerovia ete vaerã. Echa'ã chemandúa quirã oremondo pei yave nderesai nemombo vae re. ⁵ Chemandúa vi ndepurugüirovia añetete vae re. Ndiyari Loida jare ndesi Eunice rani güinoi jocua mburugüirovia, jare aicuaa cavi nde vi co neno.

⁶ Jáeramo turumimandúa cua re. Ñemiatangãtu jocua mbaepuere Tumpa umee ndeve vae re ndiyapo vaerã iparaviqui. Echa'ã uñemee co ndeve chepo añono nderé yave. ⁷ Tumpa umee yandev Espiritu Santo ñanoi vaerã mbaepuere, jare yapuruau vaerã, jare ñañemoa vaerã, agüiye vaerã yaquiye mbaembae güi. ⁸ Jáeramo agüiye nemara nemimbeu vaerã yandeYa regua. Agüiye vi nemara chereco pegua. Echa'ã che aico cua peresoriru pe yandeYa pe ayeyocui ramo. Ërei iporaraño che aiporara rami ñee icavi vae jeco pegua. Echa'ã Tumpa umee yandev mbaepuere, yaiporara yave. ⁹ Tumpa yanembiasa jare yandeparavo ñañeño tee vaerã iyupeguarã. Yandeparavo'ã co mbae icavi vae yande yayapo vae jeco pegua. Yandeparavo co jae jei vae rupi jare ipiacavi rupi. Echa'ã ipiacavi yandev Cristo Jesús rupi ndei ivi uyeyapo mbove. ¹⁰ Cristo Jesús ou cua ivi pe yanembiasa vaerã. Jocua rupi Tumpa añave uicuaaca yandev ipiacavi. Echa'ã Cristo Jesús umbai mano imbaepuere, jare uicuaaca quirã yandepuere ñanoi tecove opa mbae vae. Jare cua yamimbeu ñee icavi vae rupi.

¹¹ Tumpa cheparavo amimbeu vaerã ñee icavi vae. Jae umee cheve aico vaerã Jesucristo jemimondorã, jare aporomboe vaerã jese. ¹² Jáeramo aiporara añ. Ërei chemarã. Echa'ã aicuaa arovia co Cristo re, jare aicuaa vi jae ipuere uñuvatu cheve che amee chupe uñuvatu vaerã vae jocua ara ou uvãe regua.

¹³ Jecuaeño eporomboe moromboe añete vae re. Echa'ã jocua re che nombos. Jare jecuaeño enoi mburugüirovia jare mburuau Cristo Jesús umee yandev vae. ¹⁴ Tumpa umee ndev mbaepuere. Jecuaeño iporu jocua mbaepuere ndiyeyocui cavi vaerã chupe Espiritu Santo rupi. Echa'ã Espiritu Santo ico yandepia pe.

¹⁵ Ndicuaa ma co quirã opaete Asia pegua reta usiri chegüi. Cua reta ipite pegua co jae Figelo jare Hermógenes. ¹⁶ YandeYa tuiparareco Onesiforo jenta pegua reta. Echa'ã Onesiforo jeta vese chembiyerovia, jare imara'ã opou vaerã chepi, yepe tã aico peresoriru pe. ¹⁷ Añete co, Roma pe ou uvãe rupive, chereca opaete que rupi chevãe regua. ¹⁸ YandeYa tumaeño tugüinoi ipuruparareco jocua ara ou uvãe yave. Echa'ã nde etei ndicuaa catu quirã jeta ete uyeyocui cheve Efeso pe.

2

Jesucristo pegua sundaro icavi vae

¹ Jáeramo, cherai, ñemimiráta mbiacavi Cristo Jesús umee yandev vae rupi. ² Jeta mbaembae re aporomboe jeta vae jovaque. Jocua mbaembae ndiyandu vae re emboe cuimbae nderovia catu vae reta, jae reta vi ipuere vaerã ombos-yuapi ye jese ñru vae reta.

³ Iporara che aiporara rami. Echa'ã uiporara co Cristo Jesús isundaro reta. ⁴ Jare penti sundaro ou uñerãro vaerã vae mbaeti uyemipia'ã etei mbaembae cua ivi pegua re, umbiyerovia vaerã uiparavo sundarorã vae. ⁵ Jae ramiño vi uñeñocuiñocui vae, osi'ã yave oporombosi vae reta jei vae rupi, ipuere'ã etei güinoi upurumbisipe vae pe uñemee vae. ⁶ Jae ramiño vi co pe uparaviqui vae rani uipisita uyeaviro vae. ⁷ Jecuaeño ndepia pe iyemingüeta che jae ndev vae re. Jare yandeYa tumee ndev aracuaa ndicuaa cavi vaerã opaete.

⁸ Jesucristo co jae David ñemoña pegua. Imandúa quirã jae etei icove ye ou umanocue vae reta ipite güi. Jae umee cheve cua ñee icavi vae amimbeu vaerã. ⁹ Jare ñee icavi vae amimbeu ramo aiporara añ. Echa'ã cheñoño peresoriru pe icavi mbae vae uyapo vae rami. Ërei mbaeti quia ipuere oñoño Tumpa ñee peresoriru pe. ¹⁰ Jáeramo opaete aiporara

chepiaguasu reve Tumpa uiparavo vae reta jeco pegua, jae reta vi güinoi vaerã yembiasa Cristo Jesús rupi, jare güinoi vaerã vi yembutuicha opa mbae vae.

¹¹ Cua co jae ñee yandepuere yarovia catu vae:

“Jae ndive ñamano yave,
jae ndive yaicove yeta vi.

¹² Yandepiaguasu reve yaiporara yave, jae ndive yaporoyocuita vi.
Yaicuaçu yave, jae vi yandecuaçuta.

¹³ Yepe tẽi yarovia'ã, ãrei jae jecuaeño uyapo jei vae.

Echa'ã jae jei yave mbae uyapota, uyapota co.”

Uparaviçui cavi Tumpa pe vae

¹⁴ Emimandúa reta cua mbaembae re, jare iyocui reta yandeYa jee re agüiye vaerã uyeaca reta ñee reta re. Echa'ã jucuarãi uyeaca yave, ndarau etei icavi chupe reta, jaeño ombopata uyapisaca jese vae reta. ¹⁵ Ññemiatangãtu ndeporombocue cavi vaerã ñee añete vae umimbeu yandeve vae, Tumpa uicuaa vaerã icavi co ndeparaviçui. Jucuarãi yave, ndarau nemara ndeparaviçui jeco pegua. ¹⁶ Ërei agüiye iyapisaca ndaye reta re. Echa'ã jei vae mbae'ã co. Jare ndaye reta re imiari vae reta uyapota jeta mbaeyoa reta. ¹⁷ Jare jae reta iporombocue ññemaiata mbaerasi yanderete pe ññemai vae rami. Cua reta ipite pegua co jae Himeneo jare Fileto. ¹⁸ Jae reta uyavi añete vae. Echa'ã jei tẽi uasa ma co ara upurugüirovia vae reta icove ye vaerã ou umanocue vae reta ipite güi. Jare jucuarãi jei ramo, amocue vae uicuaa'ã mbae güirovia vaerã. ¹⁹ Ërei Tumpa jei vae añete co uyepepica'ã etei. Yaicuaa cua Tumpa ññee pe uyecuatia oĩ vae rupi. Echa'ã uyecuatia oĩ cuarã: “YandeYa uicuaa imbae reta.” Jare: “Penti penti che co jae Cristo imbae jei vae agüiye tuyapo jupi mbae vae.” Jucuarãi uyecuatia oĩ.

²⁰ Ërei penti tenta tuicha vae pe ime plato reta oro pegua jare corepoti pegua. Jae ramiño vi ime plato reta ivira pegua jare ñaeu pegua. Jare iya uiporu amocue, plato ipõra vae reta uipota yave, jare uiporu ñru reta, plato ipõra mbae vae uipota yave. ²¹ Jae ramiño vi yaeya yave icavi mbae vae, yandeYa ññaneño teeta iyupeguarã, ipuere vaerã yandeporu, tenta tuicha vae iya plato ipõra vae reta uiporu rami. Jare jucuarãi yave, yandeYa ipuereta yandeporu ipotave mbae icavi vae yayapo vaerã.

²² Agüiye etei iyapo mbaembae icavi mbae vae tairusu vae reta uipota uyapo vae. Ërei ipota ete ndiyapo vaerã jupi vae. Jae ramiño vi ipota ete mburugüirovia, jare mburuau, jare mbiacatu. Jare ññemifru uyerure yandeYa pe ipia iquia mbae reve vae reta ndive. ²³ Ërei agüiye iyeaca iyaracuaa mbae vae reta ndive. Echa'ã jae reta uicuaa'ã etei uyeaca jese vae. Jare nde ndicuaa quirãi uyeaca yave uyupii, umbipii ññerãro uyupii. ²⁴ Jare icavi'ã co yandeYa pe uyeyocui vae ññerãro vaerã. Tipiacavi opaete vae pe. Ticatu oporombocue vaerã. Tipiaguasu. ²⁵ Tomboe ññemimichi reve oyovaicho jae ndive vae reta. Echa'ã aramoi Tumpa umaeñoeta jese reta ueya vaerã ipiayemingueta icavi mbae vae jare uicuaa vaerã añete vae, ²⁶ jare ññemoa vaerã, oyepe vaerã aña guasu güi. Echa'ã maemimba yaipisi ññuai pe rami, aña guasu uipisi reta, jae reta uyapo vaerã aña guasu jei vae.

3

Ara taicuegua reta pe uyeyapota vae

¹ Icuua catu cua vi: Ara taicuegua reta pe yavai eteta co yaico cavi vaerã. ² Upurugüirovia mbae vae reta jaeño uyerauta. Uipota eteta reta corepoti. Uyembicateta jae reta uyapo vae re. Uyembicateñoita. Jeita icavi mbae vae Tumpa coti. Ndarau uyapo tu jare ichi jei vae. Ndarau umee yasurupai mbae re. Ndarau uyeyocui Tumpa pe. ³ Ndarau upuruparareto. Ndarau umbiasa japicha reta. Iyaputa japicha re. Ndarau ññemioa. Jovachopata. Umitarãeta icavi vae uyapo vae reta. ⁴ Umbitavita japicha reta. Uyapota mbaembae ipia pe uyemingueta mbae reve. Uyererovia catu eteta. Tumpa uau vaerãve, uipota eteta uyembiyerovia. ⁵ Uyapota mbaembae ñru vae reta ipia pe uyemingueta vaerã tẽi jese jae reta uyeyocui co Tumpa pe. Ërei ndarau güinoi Tumpa imbaepuere. Agüiye ññemifru jocua nunga ndive.

⁶ Jocua nunga cuimbae reta oo ñru vae jenta pe, jare umbitavi cuña reta iyaracuaa mbae vae. Jocua nunga cuña reta iyoa ete, jare jeta mbae icavi mbae vae uipota uyapo ramo, uyembopa. ⁷ Jecuaeño uipota uyemboe mbaembae re, ãrei ndarau etei ipuere uicuaa añete vae. ⁸ Jare ipaye vae reta Janes jare Jambres jee vae oyovaicho Moisés ndive rami, jocua nunga cuimbae reta vi oyovaicho añete vae ndive. Pichii vae reño ipia pe uyemingueta. Jae reta'ã co upurugüirovia vae añetete vae reta. ⁹ Ërei ndarau ipuere jecuaeño upurumbitavi. Echa'ã uyecuaata opaete vae pe quirã jae reta iyaracuaa mbae vae co, jucuarãi Janes jare Jambres uyecuaa rami.

Pablo oyocui Timoteo

¹⁰ Ērei nde ndicuaa catu co cheporombœ, jare quirāi che aico, jare aipota ayapo Tumpa pe vae, jare chepurugüirovia, jare quirāi chepiaguasu aiporara reve, jare chepuruau, ¹¹ jare quirāi aiporara ĩru vae reta uyapo icavi mbae vae cheve yave Antioquā pe jare Iconio pe jare Listra pe. Ērei yandeYa cherepi opaete aiporara vae güi. ¹² Añete co, opaete Cristo Jesús re güirovia vae reta uipota uyeyocui Tumpa pe vae pe uyapota icavi mbae vae ĩru vae reta. ¹³ Jare icavi mbae vae uyapo vae reta jare upurumbitavi vae reta jeta ete icavi mbae vae uyapota. Jae reta umbitavita ĩru vae reta jare uyembitavita vi.

¹⁴ Ērei nde jecuaeño eporombœ ndiyembœ jese vae re. Echa'ā ndicuaa catu jocua morombœ añete co. Jare ndicuaa catu vi quā co nemboe jese, ¹⁵ jare quirāi nemichi güive ndicuaa Tumpa re uyecatā oĩ vae. Echa'ā jocua ipuere nembiaracuaa, ndiyembiasaca vaerā mburugüirovia Cristo Jesús regua rupi. ¹⁶ Opaete Tumpa ĩnee pe uyecatā oĩ vae Tumpa co umimbeu, jare icavi co yandevae. Echa'ā uyecatā oĩ vae rupi yaicuaa mbae nunga morombœ añete vae jare mbae nunga morombœ añete mbae vae. Umimbeu yandevae yayavi yave, jare yandepuere yayembœ jupi vae re. ¹⁷ Jucuarā yande yayeyocui Tumpa pe vae yandepuere yaicuaa opaete Tumpa uipota yaicuaa vaerā vae, jare yandepuere yayapo opaete mbae icavi vae.

4*Emimbeu ñee icavi vae*

¹ Jáeramo che ndoyocui cua re, Tumpa jare yandeYa Jesucristo jee re. Echa'ā yandeYa Jesucristo uāata ime ñugüinoi vae reta jare umanocue vae reta jae ou ye yave oporoyocui vaerā. ² Emimbeu Tumpa ĩnee. Jecuaeño ĩñemiatangātu opa ara rupi. Icuaca iyoa vae pe imbaeyoa, jare embieta chupe jese. Epurumbiaracuaa jare eporombœ ndepiaguasu reve. ³ Echa'ā outa ara reta uvāe agüiye vaerā ĩvi pegua reta uipota uyapisaca morombœ añete vae re. Ērei jei vae reño uecata reta jeta oporombœ vae reta, uyembœ vaerā chugüi reta mbae uipota uyapisaca jese vae reño. ⁴ Jare ndarau uipota uyapisaca añete vae re. Ērei uipotata uyapisaca araca vae ndaye reta re. ⁵ Ērei jecuaeño ĩñemoa ngatu. Agüiye neatēi ndiporara vaerā. ĩñeño nemimbeu vaerā ñee icavi vae. Iyapo opaete ndiyeyocui vaerā Tumpa pe.

⁶ Jecuaeño ayeyocui Tumpa pe, jare añave aicavi ma aĩ amano vaerā. Echa'ā coiño ma ou amano vaerā. ⁷ Che aparaviqui tanta aiporara reve. Opa ma ayapo Tumpa umee cheve ayapo vaerā vae. Jecuaeño añemimiráta yarovia vae re. ⁸ Jaeño ma. Uñeñuvatu ma oĩ cheve penti corona jupi vae pegua. Jare yandeYa umeeta cheve penti corona jocua ara. YandeYa co jae upuruāa jupi vae rupi vae. Jare umeeta vi jocua nunga corona opaete uāro ñugüinoi ivāe ara re vae reta pe - cheveño'ā co.

Pablo oyocui Timoteo

⁹ ĩñemiatangātu imabae ndeyu vaerā chepi. ¹⁰ Demas oo ma chegüi Tesalónica coti, jae uau ete mbaembae cua ĩvi pegua ramo. Crescente vi oo Galacia coti, jare Tito oo Dalmacia coti. ¹¹ Jaeño Lucas upita che ndive. Eeca Marcos nderu vaerā nderupie. Echa'ā jae ipuereta chembori Tumpa iparaviqui pe. ¹² Amondo ma Tíquico Efeso pe. ¹³ Aeya chesaco Troas pe Carpo jenta pe. Ndeyu yave chepi, eru cheve. Eru libro reta vi jare tupapire reta. Agüiye neacañi tupapire reta güi.

¹⁴ Alejandro mbaembae fierro pegua uyapo vae uyapo jeta icavi mbae vae cheve. YandeYa tumbiepi chupe uyapo vae re. ¹⁵ Nde vi ĩñemoa chugüi. Echa'ā jae oyovaicho ete yande ndive, ñaniñee güirovia'ā ramo.

¹⁶ Tenonde uñeapo reta cheré yave, chembori'ā quā. Quiave upita'ā che ndive. Ayerure Tumpa pe agüiye vaerā jae umbijeco reta jese. ¹⁷ Ērei yandeYa chembori jare chemimiráta, amimbeu cavi vaerā ñee icavi vae opaete vae pe, jare opaete judío mbae vae reta uyandu vaerā. Jucuarāi yandeYa cherepi, janti cuimbae uyerepi yaguapita iyuru güi rami. ¹⁸ Jare yandeYa cherepita opaete icavi mbae vae güi, jare chereraata ara pe iporoyocua pe. YandeYa tuyembiadoraca jaeño mai pegua. Amén.

Saludo reta

¹⁹ Tumpa ndiveño toĩ Priscila jare Aquila, jare Onesíforo jenta pegua reta. ²⁰ Erasto upita Corinto pe. Ērei aeya Trófilo Mileto pe. Jae imbaerasi oĩ ayu joco güi yave. ²¹ ĩñemiatangātu ndeyu vaerā ndei roi iara ou uvāe mbove. Eubulo, jare Pudente, jare Lino, jare Claudia, jare opaete ĩru upurugüirovia vae reta jei peve Tumpa ndiveño peĩ.

²² YandeYa Jesucristo toĩ nde ndive. Tume ĩpicavi peve. Amén.

LA CARTA DEL APOSTOL SAN PABLO A TITO

¹ Che co jae Pablo. Ayeyocui Tumpa pe. Echa'ã che co jae Jesucristo jemimondo. Jae chemondo Tumpa uiparavo vae reta pe güirovia vaerã jese, jare uicuaa vaerã añete vae, uyeyocui vaerã Tumpa pe, ² jare uãro vaerã uyerovia reve tecove opa mbae vae. Echa'ã Tumpa ipuere'ã etei iyapu, jare jae jei ndei ivi uyeyapo mbove umee vaerã yandeve tecove opa mbae vae. ³ Ërei uicuaaca ñee jae uipota ma yave che amimbeu vae rupi. Echa'ã Tumpa co jae yanembiasa vae, jare umee cheve ñee amimbeu vaerã iporoyocui rupi. ⁴ Aicuatiã cua tupapire ndeve, Tito. Nde co jae cheraí añetete vae yandepurugüirovia re. YandeRu Tumpa jare yandeYa Cristo Jesús yanembiasa vae tumee ndeve ipiacavi, ipuruparareco jare ipiacatu.

Tito iparaviquí Creta pe

⁵ Che ndueya Creta pe nde ndiyapicatu vaerã opaete uata uyeyapicatu vaerã vae, jare niñono vaerã upurugüirovia vae reta itenondegua retarã tenta guasu-rai-rai rupi che ndoyocui rami. ⁶ Upurugüirovia vae reta itenondegua tuico cavi, agüiye vaerã quía umbijeco mbae re. Tugüireco pentiño cuña. Isambiaí reta tupurugüirovia, jare agüiye tuyapo icavi mbae vae, jare jecuaeño tuyapo tu jare ichi jei vae. Echa'ã jucuarã yave, ndarau quía umbijeco reta. ⁷ Upurugüirovia vae reta itenondegua uyeyocui Tumpa pe. Jáeramo tuico cavi, agüiye vaerã quía umbijeco mbae re. Agüiye tuyembicate. Agüiye tipiarai. Agüiye ticause. Agüiye tijovaichopota. Agüiye tuipota ete corepoti iyupeguarã. ⁸ Ërei tiquirëi tumingararu opou ipi vae reta. Icavi vaeño tuyapo. Tuñemoa. Tuyapo jupi vae. Tuyeyocui cavi Tumpa pe. ⁹ Tuñemiatangãtu ñee yandepuere yarovia catu vae re. Echa'ã jese uyemboe. Jucuarã yave, ipuereta upurumbiaracuaa moromboe añete vae rupi, jare ipuereta vi uicuaaca oyovaicho jae ndive vae reta pe uyavi vae.

¹⁰ Ime jeta ñru vae ipurumbiaracuaa re uipota'ã uyapisaca vae reta. Jeta ete judío reta jocua nunga. Jae reta imiariño jare upurumbitavi. ¹¹ Icavi co ñamiquí vaerã jocua nunga. Echa'ã jae reta oporomboe agüiyeta tēi oporomboe jese vae re umingana vaerã corepoti iyupeguarã. Jare iporomboe rupi ombopã jeta tenta pegua reta.

¹² Penti oporomboe vae Creta pegua jei jentaigua reta re cuarã: “Creta pegua reta jecuaeño iyapu, jovaichopota, iyaquí jare icaru ete.” Jucuarã jei. ¹³ Cua jei jese reta vae añete co. Jáeramo tanta rupi embieta chupe reta, uñemimirãta reta vaerã ipurugüirovia re.

¹⁴ Agüiye tuyapisaca judío reta aracae vae indaye reta re. Agüiye vi tuyapisaca uyerova ma añete vae güi vae reta iporoyocui reta re.

¹⁵ Ipiayemingueta iquia mbae vae pe opaete mbaembae iquia mbae co. Ërei upurugüirovia mbae vae ipiayemingueta iquia vae pe opaete mbaembae iquia co. Echa'ã ipiayemingueta iquia co, jare ipiatiti'ã etei mbae icavi mbae vae uyapo yave. ¹⁶ Jae reta jei tēi uicuaa Tumpa. Ërei mbae uyapo vae uicuaaca ñru vae reta pe uicuaa'ã co Tumpa. Echa'ã jae reta uyapo mbaembae pichii ete vae. Uyapo'ã reta Tumpa jei vae. Uyapo'ã etei mbae icavi vae.

2

Pablo jei Tito pe umimbeu vaerã moromboe añete vae

¹ Ërei nde emimbeu ñru vae reta pe mbaembae moromboe añete vae pegua. ² Ndechí reta tuñemoa jare tuyepiuaa ñru vae reta pe. Tipirãta ipurugüirovia re. Tupuruau. Tipiaguasu. ³ Jae ramiño vi cuña ucuacuaa vae reta tuyugüireco cavi uyeyocui vaerã Tumpa pe. Agüiye tiyapu ñru vae re. Agüiye ticause. Toporomboe icavi vae re. ⁴ Tomboe cuña tairusu vae reta uau vaerã ime jare imembi reta. ⁵ jare uñemoa vaerã, jare agüiye vaerã uyapo mbae pichii vae, jare uparaviquí cavi vaerã jenta pe, jare uyapo vaerã icavi vae, jare uyapo vaerã ime jei vae. Echa'ã jucuarã uyapo reta yave, ñru vae reta ndarau jei icavi mbae vae Tumpa ñee coti.

⁶ Jae ramiño vi iyocui cuimbae tairusu vae reta uñemoa vaerã. ⁷ Jecuaeño nde rani iyapo icavi vae, ñru vae reta uicuaa vaerã quirã icavi co jae reta vi yugüireco vaerã. Eporomboe añete vae re Tumpa ndipiú reve. ⁸ Iporu ñee reta icavi vae, agüiye vaerã quía nembijeco nde ndere vae re, jare oyovaicho nde ndive vae imara vaerã, ipuere'ã etei jei mbae icavi mbae vae ndecoti ramo.

⁹ Iyocui uyeyocui vae reta uyapo vaerã ipatrón jei vae jare umbiyerovia vaerã ipatrón opaete mbae re. Agüiye ñee tomoë güirave. ¹⁰ Agüiye timonda. Tuechaca ipatrón pe ipuere

vaerã güirovia catu. Echa'ã jucuarãi yave, ipatrón uicuaata icavi ete co moromboe Tumpa regua jembiocui uyemboe jese vae. Tumpa co jae yanembiasa vae.

¹¹ Echa'ã Tumpa ipiacavi rupi yayembiasaca co, jare Tumpa uicuaaca opaete vae pe jae ipiacavi vae co. ¹² Tumpa ipiacavi rupi yayemboe ma quirãi icavi co yaeya vaerã mbaeyoa reta jare mbaembae upurugüirovia mbae vae reta uipota ete vae, jare ñañemoa vaerã, jare yayapo vaerã jupi vae, jare yayeyocui vaerã Tumpa pe. Jucuarãi yaico cua ivi pe ñañ rambueve. ¹³ Jare jecuaño ñañro yayerovia reve Cristo Jesús ou ye yecuaa vaerã jembipe reve. Jae co Tumpa etei uyembia doraca vae. Jae co yanembiasa vae. ¹⁴ Echa'ã jae uñmee umano vaerã yanderé, jae yanderepi vaerã opaete icavi mbae vae güi, jare oyoe vaerã yandepia yanembaeyoa reta güi, yande yayeyapo vaerã imbae retarã, yande yaipota ete vaerã yayapo icavi vae.

¹⁵ Cua mbaembae re eporomboe. Epurumbiaracuaa jare embieta icavi mbae vae uyapo vae pe. Jecuaño iporu mbaepuere Tumpa umee ndeve vae. Agüiye quía tanereriro.

3

Tumpa yanembujupi ipiacavi rupi

¹ Emimandúa uyapisaca nderé vae reta uyapo vaerã mburuvicha reta jare mbaepuere güinoi vae reta jei vae, jare uyapo vaerã ipotave mbae icavi vae. ² Agüiye tei icavi mbae vae ipotave vae coti. Agüiye tijovaichopota. Tipiaguasu. Tuñemimichi opaete vae ndive.

³ Tenonde yave yande vi yandearacuaa'ã. Yayapo'ãse Tumpa jei vae. Yayembitavise. Yaicose yaipota vae reño yayembiyerovia vaerã. Jecuaño yayapose icavi mbae vae jare yaipotase ñru vae reta imbaembae. Ñru vae reta ñanemitarëise jare ñañemitarëise. ⁴ Ërei Tumpa uicuaaca yandev qurãi jae ipiacavi yandev jare yanderau co. Jae co yanembiasa vae. ⁵ Tumpa yanembiasa yandeparareco ramo, jupi vae yayapo ramo'ã. Jae yandeyoe yanembaeyoa güi, ñanoi vaerã tecove ipiau vae. Espiritu Santo rupi ñanoi ma tecove ipiau vae. ⁶ Echa'ã Tumpa umee yandev Espiritu Santo opaete imbaepuere reve Jesucristo rupi. Jesucristo co jae yanembiasa vae. ⁷ Jucuarãi Tumpa uyapo ñanoi vaerã tecove opa mbae vae, jare jocua ñañro ñañ yayerovia reve. Echa'ã Tumpa yanembujupi ipiacavi rupi.

⁸ Cua co ñee yandepuere yarovia catu vae. Jare aipota jecuaño tanta ndeporoyocui vaerã cua mbaembae re, Tumpa re güirovia vae reta uñemiatangātu uyapo vaerã icavi vae. Echa'ã jucuarãi uyapo reta yave, icavita co opaete vae pe. ⁹ Ërei agüiye iyeaca iyaracuaa mbae vae reta rami. Agüiye vi iyapisaca mbae itenondegua reta pe uyeyapo vae reguaño umieräcua vae reta re. Agüiye iyeaca mbaembae mboroyocui regua re. Echa'ã jucuarãi uyapo vae reta uyapo'ã co mbae icavi vae. Mbae'ã co uipota jei jae reta imiari jese vae.

¹⁰ Ime yave quía uipota umbiyao amocue upurugüirovia vae reta ñru upurugüirovia vae reta güi vae, ere chupe penti ani mocui vese agüiye vaerã uyapo jucuarãi. Ërei uipota'ã yave ueya jeco, agüiye inemñru jae ndive. ¹¹ Echa'ã ndicuaa jocua nunga ipuere'ã co ipia pe uyemingueta cavi. Jae iyoa, jare jae etei uicuaa iyoa co.

Mboroyocui reta

¹² Amondo yave ndepi Artemas ani Tíquico, inemiatangātu ndeyu vaerã chepi Nicópolis pe. Echa'ã chequirëi apita joco pe roi iara uasa regua. ¹³ Embori opaete ndepuere rupi Zenas mboroyocui uicuaa catu vae jare Apolos, yugüiraa cavi vaerã, agüiye vaerã mbae uata chupe reta. ¹⁴ Jare upurugüirovia vae reta tuyemboe jecuaño uyapo vaerã icavi vae, ipuere vaerã embori mbae uata chupe vae reta. Echa'ã jucuarãi uyapo reta yave, uyeyocui co Tumpa pe.

Saludo reta

¹⁵ Opaete che ndive ñugüinoi vae jei peve Tumpa ndiveño peñ. Tumpa ndiveño toñ opaete upurugüirovia vae reta. Echa'ã jae reta orerau ete. Tumpa tumee opaete peve ipiacavi. Amén.

LA CARTA DEL APOSTOL SAN PABLO A FILEMÓN

¹ Che co jae Pablo. Che co jae penti pereso Cristo Jesús pe ayeyocui ramo. Yanderivi Timoteo ime vi cua pe oĩ che ndive. Aicuatía cua tupapire ndeve, Filemón. Ore nduau co. Nde ndeparaviqui ore ndive. ² Aicuatía ndeve vi, Apia. Nde co jae orerindi yandeYa re. Jae ramiño vi aicuatía ndeve, Arquipo. Nde ndeparaviqui tanta ore ndive. Aicuatía vi opaete upurugüirovia vae reta nerenta pe uyembati vae pe, Filemón. ³ YandeRu Tumpa jare yandeYa Jesucristo tumee peve ipiacavi jare ipiacatu.

Filemón ipuruau jare ipurugüirovia

⁴ Jecuaeño ayerure Tumpa pe nderé, Filemón, jare amee yasurupai Tumpa pe nderé. ⁵ Echa'ã jerãcua cheve mburuau jare mburugüirovia nde neno yandeYa Jesús coti jare opaete uñeñoño tee yandeYa peguarã vae reta coti vae. ⁶ Ime amocue ndepurugüirovia rupi yandeYa re güirovia vae. Ayerure Tumpa pe jocua reta uicuaa cavi vaerã opaete mbae icavi vae Cristo rupi ñanoi vae. ⁷ Ayerovia ete jare chepiacatu ndepuruau re, cherivi. Echa'ã nde nembipiacatu uñeñoño tee yandeYa peguarã vae reta.

Pablo umiñera Onésimo re

⁸ Che ndoyocuita tēi ndiyapo vaerã jupi ndiyapo vaerã vae. Echa'ã Cristo umee cheve mbaepuere cuarãi ndoyocui vaerã. ⁹ Ërei mburuau checoti neno ramo, cheiño numiñera. Chendechi ma co, jare che co jae penti pereso Cristo Jesús pe ayeyocui ramo. ¹⁰ Che numiñera Onésimo re. Echa'ã jae uyeypa ma cherairã yandeYa re peresoriru pe ñi rambueve.

¹¹ Tenonde yave Onésimo uyeypocui cavi'ã ndeve. Ërei añave uyeypocui cavita co ndeve uyeypocui cavi cheve rami. ¹² Jare amondo ye ndepi, yepe tēi aau ete. Embiresive nde chembiresive rami. ¹³ Echa'ã amimbítata tēi che ndive, jae uyeypocui vaerã cheve ndepépica pe, peresoriru pe ñi rambueve. Cua peresoriru pe ñi ñee icavi vae amimbeu ramo. ¹⁴ Ërei aipota'ã ayapo jucuarãi, aicuaa'ã icavita ra ndeve ramo. Aipota ndiyapo vaerã icavi vae cheve, nde etei nequirēi ndiyapo yave. Aipota'ã ndoyocui jese. ¹⁵ Aramoi Onésimo osi ndegüi ndereya michi pegua, nde neno ye vaerã jaeño mai pegua. ¹⁶ Ërei jae penti uyeypocui vaeño'ã ma co. Echa'ã añave jae co yanderivi yaau vae. Jare penti nderivi icavi ete ndeve penti uyeypocui ndeve vae güi. Che aau co. Jae ramiño vi nde ndeau eteta co. Echa'ã jae co penti cuimbae nde rami, jare mocui reve perovia yandeYa re.

¹⁷ Jáeramo embiresive cavi nde chembiresive rami. Echa'ã nde cheapo penti neñurã. ¹⁸ Jae uyapo yave icavi mbae vae ndeve ani ipía yave ndeve mbae re, cheve ecovara. ¹⁹ Chepo pe etei aicuatía ndeve cua. Che tambiepi ndeve. Ërei chepuere numimandúa quirãi nde ndepía vi cheve nderecove re. ²⁰ Añete co, cherivi, iyapo cua icavi vae cheve yandeYa re yarovia ramo. Chembipiacatu. Echa'ã mocui reve yarovia yandeYa re.

²¹ Aicuatía cuarãi ndeve, aicuaa catu nde ndiyapota co che jae ndeve vae ramo. Aicuaa catu vi ndiyapota co jeta ete che jae ndeve vae güi. ²² Jae numiñera vi cua: Iyapicatu cheve ñi pepi vaerã. Echa'ã chepia pe ayemingueta ñi aramoi Tumpa chemondota pepi. Echa'ã pe reta piyerure Tumpa pe cheré chemondo vaerã pepi.

Saludo reta

²³ Epafraas jei ndeve Tumpa ndiveño eĩ. Jae ime peresoriru pe oĩ che ndive Cristo Jesús pe uyeypocui ramo. ²⁴ Jae Marcos, Aristarco, Demas jare Lucas jei vi ndeve Tumpa ndiveño eĩ. Jae reta chembori yandeYa iparaviqui re.

²⁵ YandeYa Jesucristo tumee peve ipiacavi. Amén.

LA CARTA A LOS HEBREOS

Tumpa uyemingueta ma Tai rupi

¹ Aracae yave Tumpa uyemingueta aveiño yandetenondegua reta pe iñee umimbeu vae reta rupi. Jeta quirairai rupi uyemingueta chupe reta. ² Ërei añave cua ara reta pe Tumpa uyemingueta ma yandeve Tai rupi. Tumpa uyapo opaete uyeyapo vae Tai rupi, jare Tai rupi vi jei mbae uasata opaete uyeyapo vae pe vae. Tumpa jei vae co Tai güinoi vaerã opaete uyeyapo vae. ³ Tumpa Tai oyovaque Tumpa ndive, jare cua ivi pe ico rambueve uicuaaca quirai Tumpa imbaepuere tuicha ete co. Echa'ã jae uiporu Tumpa imbaepuere etei. Opaete uyeyapo vae jecuaeño ico Tumpa Tai jei vae rupi jare imbaepuere rupi. Jae etei uñemee umano vaerã, ipuere vaerã umbai yanembaeyoa reta, jare cua jaicue rupi uguapi Tumpa iyipi pe iyacata coti ara pe.

Tumpa Tai jare ángel reta

⁴ Jucuarai Tumpa Tai uicuaaca quirai jae imbaepuere tuicha ete ángel reta imbaepuere güi. Jae ramiño vi tee uñemee chupe vae uyembutuichaca ete ángel reta jee güi. ⁵ Echa'ã Tumpa jei Tai pe cuarai:

“Nde co jae cheRai.

Cua ara aicuaaca nde co jae cheRai.”

Jucuarai jei. Jucuarai'ã jei Tumpa ángel pe. Jare Tumpa jei Tai re cuarai:

“Che co jae Tu,

jare jae co cheRai.”

Jucuarai jei. Jucuarai'ã jei Tumpa ángel regua. ⁶ Tumpa Tai co jae opaete mbaembae uyeyapo vae iYa. Jare Tumpa ombou ye yave Tai cua ivi pe Tumpa jeita cuarai:

“Jare opaete ángel reta tumbiadora.

Echa'ã jae reta uyeyocui cheve.”

Jucuarai jeita. ⁷ Ángel reta re imiari yave, Tumpa jei cuarai:

“Ayocui ángel reta uyapo vaerã che jae vae.

Jatangātu ete uyeyocui vaerã cheve.”

Jucuarai jei. ⁸ Ërei Tumpa jei Tai pe cuarai:

“Nde co jae Tumpa etei.

Ndeporoyocuita jaeño mai pegua.

Nde ndeporoyocuita jupi vae rupi.

⁹ Nde jecuaeño ndiyapo jupi vae.

Ndiyapota'ã etei mbaeyoa.

Jáeramo che noñono opaete ñru vae reta itenondegua, ndiyerovia ete vaerã.

Che co jae neTumpa.”

Jucuarai jei. ¹⁰ Jare Tumpa jei vi Tai pe cuarai:

“Nde co jae opaete mbae iYa.

Aracae ete nde ndiyapo ivi.

Jae ramiño vi ndiyapo opaete ara re oĩ vae.

¹¹ Jae reta opata, ãrei nde jaeño mai ndicota.

Jae reta opaete indechita penti temimonde indechi vae rami.

¹² Echa'ã indechi ete ma yave, uyemombo, jare uyeporu ñru temimonde jocua indechi vae ipepica pe.

Ërei nde jaeño mai ndicota.

Nde ndarau etei nendechi.”

Jucuarai jei. ¹³ Jare Tumpa jei vi Tai pe cuarai:

“Eguapi cheyipipi pe cheacata coti, nderovaicho reta opa amiamiri regua.”

Jucuarai jei. Jucuarai'ã jei Tumpa ángel pe.

¹⁴ Echa'ã ángel reta uyeyocui Tumpa pe, jare Tumpa ombou ángel reta ombori vaerã uyembiasacata vae reta.

2

Yembiasa icavi ete vae

¹ Jáeramo icavi co ñaneratangātu ete vaerã yayapisaca jese vae re, agüiye vaerã yapia chugüi. ² Echa'ã aracae yave Tumpa uyemingueta Israel pegua reta pe ángel reta rupi. Ërei Israel pegua reta uyapo'ã Tumpa jei vae. Jáeramo Tumpa uiporaraca chupe reta iyoa reta

ramo. Echa'ã Tumpa co jae jupi vae. ³ Jae ramiño vi Tumpa uyemingueta ma yandeve yembiasa icavi ete yandeve vae re. Jáeramo uiporacata yandeve vi, yayapisaca'ã yave jese. Echa'ã yandeYa rani imiari cua yembiasa re, jare yaicuaa añete co uyapisaca jese vae reta umimbeu yandeve vae rupi. ⁴ Tumpa etei vi uicuaaca añete co jae reta umimbeu yandeve vae. Echa'ã umaño jese reta uyapo vaerã miacañi reta uecha vae reta uicuaa vaerã, jare Tumpa umee chupe reta mbaepuere reta Espiritu Santo rupi jae etei uipota vae rupi.

Jesucristo uyeyapo cuimbaerã

⁵ Ángel reta ndarau yugüireco mburuvicha retarã ivi icota vae yayemingueta jese vae pe.

⁶ Ërei Tumpa iñee pe yamingueta quirãi penti vae jei Tumpa pe cuarãi:

“Yepe tẽi ivi pegua reta mbaeti co mbae,

ërei nde ndiyandareco jese reta jare jecuaño nembori reta.

⁷ Añave jae reta imbaepuere michi ete ángel reta imbaepuere güi.

Cuarãi oĩ nde ndipota ramo.

Ërei michi peguaño cuarãita oĩ.

Echa'ã tenonde yave neme Adán pe mbaepuere tuicha vae jare nembutuichaca.

Nde neme chupe güinoi vaerã mbaepuere opaete nde ndiyapo vae re.

⁸ Nde nemeño jese ico vaerã opaete mbaembae juvicharã.”

Jucuarãi jei. Cua uipota jei mbaeti co mbae Adán jei vae ñatẽi uyapo vae. Ërei yaicuaa quirãi

añave ivi pegua reta ndei yugüireco opaete mbaembae juvicha retarã. ⁹ Ërei yaicuaa Tumpa

umee ma co Jesús pe mbaepuere tuicha vae jare umbiadoraca. Echa'ã Jesús imbaepuere vi

uyeyapo michi ete ángel reta imbaepuere güi, ërei michi peguaño. Echa'ã jucuarãi uyeyapo,

Jesús umano vaerã opaete ivi pegua reta re, Tumpa uicuaaca vaerã ipiacavi co yandeve.

¹⁰ Tumpa uyapo opaete, jare jae uyembutuichaca opaete uyapo vae pe. Jae uipota jeta ivi

pegua reta uyeyapo vaerã tai retarã jare uyembutuichaca vaerã. Jáeramo icavi chupe Jesús

uiporara vaerã. Echa'ã uiporara vae rupi Jesús uepiti upurumbiasa vaerã.

¹¹ Jesús ñaneño tee Tumpa peguarã, jare yande co jae pentiño Jesús ndive. Jáeramo jae

ñanereni tiví reta. Imara'ã jucuarãi ñanereni vaerã. ¹² Echa'ã yamingueta Tumpa iñee pe

quirãi Jesús jei Tumpa pe cuarãi:

“Che numimbeuta cherivi reta pe.

Yati yave, numbiadorata canta pipe ipite pe.”

Jucuarãi jei. ¹³ Jare jei vi cuarãi:

“Aroviata Tumpa.”

Jare jei vi cuarãi:

“Mase, co aĩ jare ime vi cua pe ñugüinoi Tumpa tai reta jae umãru che ndive vae.”

Jucuarãi jei.

¹⁴ Opaete tai reta ivi pegua reta co. Jáeramo Jesús etei vi uyeyapo ivi peguarã, imano rupi

umiamiri vaerã aña guasu. Echa'ã aña guasu güinoise mbaepuere mano regua. ¹⁵ Cua

jeco pegua Jesús ipuere yanderepi. Echa'ã ñanemichi güive yaquiye mano güi. Ërei Jesús

yandeyora ma cua quiye güi. ¹⁶ Añete co, Jesús ou'ã ombori vaerã ángel reta. Ou co ombori

vaerã Abraham iñemoñaeta. ¹⁷ Jocuá uyeyapota Jesús tiví retarã vae ivi pegua reta

co. Jáeramo icavi co Jesús vi uyeyapo vaerã ivi peguarã, ipuere vaerã umbai ivi pegua

reta imbaeyoa reta. Jae co sacerdote tenondegua Israel pegua rami. Echa'ã sacerdote

tenondegua uique Tumpa oĩ vae pe Israel pegua reta imbaeyoa reta re. Jae ramiño vi Jesús

uique Tumpa oĩ vae pe yanderé. Yandepuere yarovia catu. Jae yandeparareco. ¹⁸ Echa'ã

aña guasu umingueta uyavica vaerã tẽi chupe. Jáeramo aña guasu yanemingueta yave

uyavica vaerã yandeve, Jesús ipuere yanembori.

3

Jesús jare Moisés

¹ Cherivi reta, Tumpa peño tee iyupeguarã. Tumpa etei ara pe ico vae preparavo.

Jáeramo pepia pe piyemingueta cavi Jesús re. Tumpa ombou Jesús umimbeu vaerã

yandeve Tumpa regua, yande yarovia vaerã jese, jare añave Jesús ico Tumpa oĩ vae

pe yanembori vaerã yandepurugüirovia re, sacerdote tenondegua ombori Israel pegua

reta rami. ² Moisés uyapo cavi mbaraviqui Tumpa umee chupe uyapo vaerã vae. Jae

ramiño vi Jesús uyapo cavi mbaraviqui Tumpa umee chupe uyapo vaerã vae. ³ Jare Jesús

uyembutuichaca ete Moisés güi. Yamijaanga penti tenta. Moisés uyemijaanga tenta re. Ërei

Jesús uyemijaanga tenta iyapoa re. Jecuaño yambutuicha ete co tenta iyapoa tenta güi.

⁴ Jare penti penti tenta uyeyapoca tenta iyapoa pe. Ërei Tumpa uyapo opaete. ⁵ Moisés

uyapo cavi mbaraviqui Tumpa umee chupe uyapo vaerã vae. Jucuarãi uyeyocui cavi

Tumpa pe, jare Tumpa uicuaaca cua yandeve yaicuaa vaerã quirãî opaete Moisés imiari Tumpa re vae añete co. ⁶ Ërei Cristo co jae Tumpa Tai jare jae co opaete Tumpa re güirovia vae reta iYa. Echa'ã yande vi co jae imbae, jecuaeño yave ñaneratangãtu jare yayerovia yave ñããro ñãî vae re.

Tumpa imbae reta iputuu

⁷ Jáeramo pemandúa Espíritu Santo jei vae re. Echa'ã Tumpa iñee pe yamingueta quirãî Espíritu Santo jei yandetenondegua reta pe cuarãî:

“Cua ara piyapisaca chiñee re.

⁸⁻⁹ Jáeramo agüiye piyemipiatanta.

Echa'ã petenondegua reta uyemipiatanta ñana pe ñugüinoi yave.

Jae reta chembiavai jare chembiarasi.

Jare cuarenta año uecha reta opaete ayapo vae.

¹⁰ Jáeramo chearasi petenondegua reta pe, jare che jae cuarãî:

‘Jecuaeño opia reta chegüi ipia pe.

Uipota'ã etei reta uyapo che aipota tẽi uyapo vaerã vae.’

Jucuarãî che jae.

¹¹ Jáeramo chearasi chupe reta ramo, che jae cuarãî:

‘Añete co, jae reta ndarau uique Canaán pe.

Echa'ã joco pe uputuuta tẽi co.’

Jucuarãî che jae.”

Jucuarãî jei Espíritu Santo.

¹² Jáeramo, cherivi reta, piñemoa, agüiye vaerã pepia uñemitanta perovia'ã Tumpa ramo.

Echa'ã pepia uñemitanta yave, peopiata Tumpa imeño mai ico vae güi. ¹³ Ërei pepuere rambueve, piñemiatangãtungãtu opa ara rupi, agüiye vaerã penti pepite pe oï vae yepe uyemipiatanta mbaeyoa rupi. Echa'ã mbaeyoa ipuere yanembitavi yayemipiatanta vaerã.

¹⁴ Echa'ã yande yayeyapo ma Cristo iiru retarã jecuaeño yave ñaneratangãtu tenonde voi mburugüirovia ñanoi vae re. ¹⁵ Pemandúa cua Tumpa iñee pe uyecuatía oï vae re:

“Cua ara piyapisaca chiñee re” —jei Espíritu Santo—.

“Jáeramo agüiye piyemipiatanta.

Echa'ã petenondegua reta uyemipiatanta ramo, chearasi chupe reta.”

Jucuarãî uyecuatía oï.

¹⁶ Yepe tẽi uyandu reta Tumpa iñee, ãrei amocue yandetenondegua reta umbiarasi

Tumpa. Añete co, opaete Moisés güero Egipto güi vae reta umbiarasi Tumpa. ¹⁷ Jáeramo Tumpa iarasi cuarenta año jocua yandetenondegua reta pe, iyoa reta ramo. Jare jae reta umano ñana pe. ¹⁸ Echa'ã Tumpa jei cuarãî:

“Añete co, jae reta ndarau uique Canaán pe.

Echa'ã joco pe uputuuta tẽi co.”

Jucuarãî jei Tumpa. Jare jucuarãî uyeyapo chupe reta, güirovia'ã Tumpa ramo. ¹⁹ Jáeramo

yaicuaa jae reta ipuere'ã co uique Canaán pe, güirovia'ã Tumpa ramo.

4

¹ Jáeramo pequie. Echa'ã aramoi amocue pe reta ndarau peepiti penoi vaerã jocua mbutuu Cristo ipuere umee peve vae. Tumpa etei jei umee vaerã yandeve cua mbutuu.

² Tumpa umimbeu yandetenondegua reta pe ñee icavi vae, ãrei jocua ñee icavi vae uyapo'ã mbae chupe reta. Echa'ã güirovia'ã reta jocua uyandu vae. Jae ramiño vi Tumpa umimbeu yandeve penti ñee icavi vae. ³⁻⁵ Jare yande yarovia Tumpa vae yaepiti jocua mbutuu Cristo umee yandeve vae. Echa'ã Tumpa jei cuarãî:

“Chearasi ete chupe reta.

Añete co, jae reta ndarau uique Canaán pe.

Echa'ã joco pe uputuuta tẽi co.”

Jucuarãî jei Tumpa. Echa'ã Tumpa iñee pe uyecuatía oï cuarãî:

“Tumpa opa iparaviqui uyapo seis ara pe.

Jayave jocua jaicue rupi uputuu penti ara.”

Jucuarãî uyecuatía oï. Ërei yepe tẽi opa iparaviqui uyapo cua ivi uyeyapo ma yave, ãrei

uyecuatía oï Tumpa iñee pe quirãî Tumpa jei cuarãî:

“Jae reta ndarau uique Canaán pe.

Echa'ã joco pe uputuuta tẽi co.”

Jucuarãî jei Tumpa.

⁶ Jáeramo yaicuaa cua: Tenonde voi Tumpa umimbeu jocua ñee icavi vae yandetenondegua reta pe. Ërei jae reta mbaeti güinoi jocua mbutuu Tumpa umeeta tẽi chupe reta vae, güirovia'ã Tumpa ramo. Jáeramo imeño jocua mbutuu amocue vae güinoita vae. ⁷ Jare

Tumpa umimbeu yandeve ara. Echa'ã ima ma jae jei yave David rupi cuarãi: “Cua ara.” Echa'ã uyecuatia oĩ cuarãi:

“Cua ara piyapisaca chiñee re” —jei Espiritu Santo—.

“Jáeramo agüiye piyemipiatanta.”

Jucuarãi uyecuatia oĩ.

⁸ Josué umee'ã jocua mbutuu yandetenondegua reta pe. Echa'ã umee chupe reta yave mona, mbaetita tẽi Tumpa uyemingueta taicue rupi ñru ara re. ⁹ Jáeramo imeño mbutuu Tumpa umeeta imbae reta pe vae. ¹⁰ Tumpa uputuu opa iparaviqui uyapo yave. Jae ramiño vi yande ñanoi yave jocua mbutuu Tumpa umee yandeve vae, yaparaviqui'ã ma yembiasa ñanoi vaerã. ¹¹ Jáeramo ñaneratangãtu ñanoi vaerã jocua mbutuu. Jocua yandetenondegua güirovia'ã Tumpa vae reta opa umano. Jae ramiño vi pe reta perovia'ã yave Tumpa, pecañiteita co.

¹² Echa'ã Tumpa iñee güinoi mbaepuere umee vaerã yandeve tecove opa mbae vae. Penti quisepucu jaimbeyovai vae ipuere yanembipere ete. Ipuere uyasia yandesoo jare ñanecãgüe yepe. Ërei Tumpa iñee imbaepuere tuicha ete quisepucu imbaepuere güi. Echa'ã Tumpa iñee uique yandepia pe etei jare uicuaaca yandeve mbae yaipota vae regua jare mbae Espiritu Santo regua. Tumpa iñee ipuere uicuaaca yandeve yandepiyemingueta etei, icavi ra ani icavi'ã ra. ¹³ Mbaeti mbae Tumpa uyapo vae ipuere uñemi Tumpa güi. Echa'ã jae uecha jare uicua opaete regua. Jare jae ñaneraata opaete yayapo vae re.

Jesús co jae sacerdote tenondegua rami

¹⁴ Jesús co jae Tumpa Tai. Jae uyupi oo ara pe, jare joco pe uyerure Tumpa pe yanderé, sacerdote tenondegua uyerurese yandetenondegua reta re rami. Ërei Jesús imbaepuere tuicha ete sacerdote tenondegua imbaepuere güi. Jare cua yaicuaa ramo, jecuae ñaneratangãtu ñanoi vaerã mburugüirovia. ¹⁵ Jesús mbaeti co sacerdote tenondegua ipuere'ã ipiatiti yaiporara yave vae rami. Echa'ã aña guasu umingueta uyavica vaerã tẽi chupe, aña guasu yanemingueta rami. Ërei jae iyoa'ã etei. ¹⁶ Jáeramo yaya yaquiye mbae reve Tumpa re, Tumpa yandeparareco vaerã jare ñanoi vaerã ipiacavi. Echa'ã Tumpa ipiacavi jeco pegua yanemborita yaiporara yave.

5

¹ Tumpa uiparavo penti cuimbae uyeyapo vaerã sacerdote tenondeguarã, jare umee chupe uyerure vaerã Tumpa pe ñru vae reta re, jare ipuere vaerã umee Tumpa pe ofrenda reta jare maemimba uyeyucacue reta. Maemimba uyeyucacue reta mbaeyoa reta regua co. ² Amocue iyoa vae reta uicuaa cavi'ã imbaeyoa reta regua, ãrei ñru iyoa vae reta uicuaa uyapo'ã co Tumpa jei vae. Ërei sacerdote tenondegua ipuere uiparareco opaete vae, yavai'ã co jae etei iyoa vaerã ramo. ³ Jare cua jeco pegua icavi co sacerdote tenondegua umee vaerã Tumpa pe maemimba uyeyucacue imbaeyoa reta re, jucuarãi umee ñru vae reta imbaeyoa reta re rami. ⁴ Jare mbaeti quia ipuere uyeparavo jaeiño, ico vaerã sacerdote tenondeguarã. Jaeño Tumpa uiparavo vae ipuere ico sacerdote tenondeguarã. Echa'ã jucuarãi Tumpa uiparavo Aarón.

⁵ Jae ramiño vi Cristo uyembutuicha'ã jaeiño. Echa'ã uyeparavo'ã jaeiño, ico vaerã sacerdote tenondeguarã. Tumpa uiparavo Cristo ico vaerã sacerdote tenondeguarã. Echa'ã uyecuatia oĩ Tumpa iñee pe quirãi Tumpa jei Cristo pe cuarãi:

“Nde co jae cheRai.

Cua ara aicuaaca nde co jae cheRai.”

Jucuarãi jei. ⁶ Jare Tumpa iñee pe uyecuatia ye oĩ cuarãi:

“Nde ndicota penti sacerdoterã jaeño mai pegua” —jei Tumpa—, “Melquisedec rami.”

Jucuarãi uyecuatia oĩ.

⁷ Cristo cua ivi pe ico rambueve, uyao reve uyerure Tumpa pe ombori vaerã. Echa'ã Tumpa ipuere tẽi umbiasa mano güi. Jare Tumpa uyapisaca iyerure re, Cristo jecuaeño uipota uyapo Tumpa jei vae ramo. ⁸ Ërei yepe tẽi jae co Tumpa Tai, ãrei uyemboe uyapo vaerã Tumpa jei vae uiporara vae rupi. ⁹ Jare opaete Tumpa jei vae uyapo ma yave, ipuere umee yembiasa opa mbae vae opaete uyapo jae jei uyapo vaerã vae reta pe. ¹⁰ Tumpa iñee pe uyecuatia oĩ cuarãi:

“Nde co jae penti sacerdote tenondegua” —jei Tumpa—, “Melquisedec rami.”

Jucuarãi uyecuatia oĩ.

Agüiye pepia Tumpa güi

¹¹ Aipota tẽi amimbeu peve jeta cua regua, ãrei yavai co oĩ amimbeu peve vaerã. Echa'ã picuaata'ã, yepe tẽi piyapisaca jese. ¹² Añave pe reta pemboeta tẽi ñru vae reta mbaembae re, piyemboe yave jese. Ërei piyemboe'ã jese. Jáeramo icavi co che pomboe ye vaerã jocua

Tumpa umimbeu yandeve vae yavai'ã etei co yaicuaa vaerã vae. Tamijaanga tembiú re. Sambiai-rai reta ipuere'ã jou tembiú, jaefio neche. Pe reta sambiai-rai reta rami co. Echa'ã piyemboe cavi'ã Tumpa umimbeu yandeve vae re. ¹³ Sambiai-rai necheño ipuere jou vae uicuaa'ã mbae ave. Jae ramiño vi pe reta piyemboe'ã ñee Tumpa umimbeu yandeve vae re. Echa'ã piyemboe jese yave, picuaata tẽi mbae jupi vae. ¹⁴ Èrei ucuacuaa vae reta jou tembiú. Jae ramiño vi Tumpa umimbeu yandeve vae re uyemboe cavi vae reta uicuaa cavi mbae icavi vae jare mbae icavi mbae vae.

6

¹ Jáeramo agüiye yayemboe ye moromboe tenondegua Cristo regua re. Aipota pombõe ñru moromboe pepirãta vaerã pepurugüirovia re. Tenonde yave piyemboe quirãi pepuere peeya piyemingueta icavi mbae vae pepia pe oĩ vae - echa'ã piyapose vae rupi pepuere'ã penoi tecove opa mbae vae. Piyemboe vi mburugüirovia Tumpa coti vae re, ² jare quirãi piyembautizaca piyeyoe vaerã Tumpa coti. Piyemboe vi quirãi temimondo reta ofiono ipo ñru vae reta ñãca re. Piyemboe vi umanocue vae reta icove ye vae re jare quirãi Tumpa uãata ivi pegua reta jare jae reta uiporarata jaefio mai pegua. ³ Cua aipota ayapo, Tumpa umaefio yave cheré. ⁴⁻⁶ Penti vae uicuaa yave Tumpa, Tumpa uicuaaca chupe vae rupi, jae uicuaa vi quirãi icavi ete mbaepuere Tumpa umee vae, jare uñemñru Espiritu Santo ndive. Jae uicuaa vi Tumpa ññee icavi ete vae jare mbaepuere reta ara ndeño ou uvãe vae reta pe Tumpa uicuaacata vae. Èrei cua nunga opia yave Tumpa güi, ndarau etei ipuere ye ueya iyemingueta icavi mbae vae ipia pe oĩ vae. Jae co uyuca ye Tumpa Tai rami, jare jucuarãi güirãoca ñru vae reta pe.

⁷ Echa'ã oquĩñoi yave, ama umãqui ivi. Jayave ivi iya ofnoti temiti, jare temiti yagüiye cavi yave, ofnoti vae uyerovia ete. Jayave ivi iya jeita icavi ete jocua ivi. Echa'ã ivi uiporu cavi ama Tumpa ombou vae. ⁸ Èrei jocua ivi pe uñemoña yave yurãti catuii, ivi iya jeita icavi'ã etei jocua ivi. Aramo Tumpa uyepipeyuta jese. Jocua ivi opata ociai.

⁹ Èrei, cherivi reta, yepe tẽi chemiari ma peve cuarãi, èrei acuaa pe reta pepia'ã co Tumpa güi. Piyapo co icavi vae piyembiasaca ramo. ¹⁰ Uyecuaa quirãi peau Tumpa. Picuaaca pepuruau co piyapo vae rupi. Echa'ã jecuaefio piyeyocui ñru uñeño tee Tumpa peguarã vae reta pe. Tumpa ndarau ñacañi piyapo vae güi. Echa'ã ñacañi chugüi yave, mbaetita tẽi jupi. ¹¹ Jare aipota pe reta penti penti jecuae picuaaca piñemiatangãtu co cua re, jecuae piyerovia catu vaerã peãro peĩ vae re. ¹² Agüiye peaqui. Pico ñru güirovia Tumpa vae reta yugüireco rami. Echa'ã jae reta ipurugüirovia jeco pegua ipiaguasu, güinoi vaerã Tumpa jei umeeta chupe reta vae.

Tumpa jei umeeta chupe Abraham pe vae

¹³ Tumpa jei umeeta Abraham pe vae re, Tumpa jei jee re uyapota co. Echa'ã mbaeti co mbaepuere tuicha ete Tumpa imbaepuere güi vae. ¹⁴ Jare Tumpa jei Abraham pe cuarãi: "Añete co, che numivendiseta co.

Ameeta ndeve jeta ete niñemoña retarã."

Jucuarãi jei. ¹⁵ Jare Abraham, ima ma uãro yave ipiaguasu reve, güinoi Tumpa jei umeeta chupe vae. ¹⁶ Penti vae jei yave ñru vae pe mbae uyapota chupe, jei mbaepuere tuicha vae güinoi vae jee re uyapota co. Jare cua jei vae uicuaaca ñru vae pe uyapota co, agüiye vaerã ñru vae ipia pe uyemingueta ndarau ndipo uyapo. ¹⁷ Jae ramiño vi Tumpa uipota ete uicuaaca jei güinoita vae reta pe quirãi jae jei vae uyepepica'ã etei. Jáeramo jei jee re uyapota co jei vae. ¹⁸ Mocui reve - Tumpa jei vae jare jei jee re vae - uyepepica'ã etei, jare yaicuaa cua mocui reve añete co, Tumpa iyapu'ã etei ramo. Jáeramo cua ñanemimirãta yandepurugüirovia re. Echa'ã yande yayerova yandereco mai indechi vae güi jare yayerure Tumpa pe yanderepi vaerã. Jare ñãro ñãi yayerovia reve ñanoi vaerã Tumpa jei umeeta yandeve vae. ¹⁹ Jare cua ñãro ñãi yayerovia reve vae yanembori agüiye vaerã yapia Tumpa güi, jare yanemboya Tumpa ara pe oĩ vae re. ²⁰ Echa'ã Jesús rani oo ma uique ara pe yanderenonde, jare Tumpa uyapo ma sacerdote tenondeguarã jaefio mai pegua Melquisedec rami.

7

Jesús co jae sacerdote Melquisedec rami

¹ Cua Melquisedec co jae Salem pegua reta juvicha guasu. Tumpa ara pe ico vae uyapo cua Melquisedec sacerdoterã. Abraham ou ye yave Salem pe uyucaca yave jocua mburuvicha guasu reta, uñeñoñãiti Melquisedec ndive, jare Melquisedec jei Abraham pe cuarãi: "Tumpa tanemivendise." ² Jayave Abraham umee Melquisedec pe diezmo opaete güinoi vae güi. Tee Melquisedec uipota jei "mburuvicha guasu jupi vae". Cua Melquisedec co jae Salem pegua reta juvicha guasu, jare cua uipota jei "mburuvicha guasu mbiacatu

pegua".³ Yaicuaa'ã quía reta ra jae tu jare jae ichi. Yaicuaa'ã vi quía reta ra jae itenondegua reta. Yaicuaa'ã vi quirãï yave ra ichi güi oa, jare quirãï yave ra umano. Jáeramo yandepuere yamijaanga Melquisedec Tumpa Tai re. Echa'ã jae co penti sacerdote imeño mai ico vae rami.

⁴Mase, Tumpa uipiua ete co cua cuimbae. Echa'ã yandetenondegua Abraham etei umee chupe diezmo opaete mbaembae upíro jovaicho reta güi vae güi. ⁵Jare Israel pegua reta umee diezmo Leví iñemoñaa sacerdote retará uyeyapo vae reta pe, yepe tēi jentarã reta co. Echa'ã opareve Abraham iñemoñaa reta co. Tumpa oyocui jucuarãï Moisés iporoyocui pe. ⁶Èrei Melquisedec Leví iñemoñaa pegua'ã co. Èrei Abraham umee diezmo chupe, jare Melquisedec jei Abraham pe cuarãï: "Tumpa tanemivendise." Jare pemandúa cua re: Abraham co jae uipisi Tumpa güi jei umeeta chupe vae. ⁷Jare penti vae jei yave: "Tumpa tanemivendise", ñru vae pe, añetete jocua cuarãï jei vae uyembutuichaca ete ñru vae güi. ⁸Jare cua ivi pe Israel pegua reta umee diezmo sacerdote reta pe, yepe tēi jocua sacerdote reta umano vae co. Èrei Abraham umee diezmo Melquisedec pe. Jare Tumpa iñee pe uyecuatía oï jese vae rupi jae co imeño ico vae rami. ⁹Jare yandepuere yae cua: Leví co jae Abraham iñemoñaa pegua ramo, jae etei umee diezmo Melquisedec pe, yepe tēi Israel pegua reta umee diezmo Leví iñemoñaa reta pe. ¹⁰Echa'ã Leví Abraham iñemoñaa pegua co, ãrei ndeiño oa Abraham tai Isaac jee vae Melquisedec uñeñovãiti Abraham ndive yave. Jare Leví Isaac iñemoñaa pegua co.

¹¹Tumpa uicuaaca Moisés iporoyocui Israel pegua reta pe yave, umee amocue Leví iñemoñaa reta pe sacerdote retará yugüireco vaerã. Èrei jocua nunga sacerdote reta ipuere'ã opa umbai mbaeyoa reta. Jáeramo icavi co ico vaerã ñru sacerdote uyuvavi jocua reta güi vae. Cua ñru sacerdote Melquisedec rami co, Aarón iñemoñaa pegua'ã co. ¹²Jocua reta uyeyapo sacerdote retará, jae reta co Leví iñemoñaa pegua reta ramo. Èrei cua ñru sacerdote uyuvavi jocua reta güi vae Leví iñemoñaa pegua'ã co. ¹³⁻¹⁴Echa'ã uyecuaa cavi quirãï cua ñru sacerdote Tumpa iñee jucuarãï imiari jese vae - jae co yandēYa - Judá iñemoñaa pegua co, Leví iñemoñaa pegua'ã co. Judá iñemoñaa ave uparaviqui'ã sacerdoterã maemimba uyeyucacue uñemearendã pe. Echa'ã Moisés umimbeu'ã etei Judá iñemoñaa reta ipuere uyeyapo sacerdote retará.

¹⁵Èrei uyecuaa cavi ete quirãï icavi co uyeyapo vaerã ñru sacerdoterã Melquisedec rami vae. ¹⁶Jocua reta uyeparavoca yugüireco vaerã sacerdote retará mboroyocui rupi, jae reta co Leví iñemoñaa pegua reta ramo. Èrei cua ñru vae uyeparavoca ico vaerã sacerdoterã, imbaepuere tuicha ete ramo. Echa'ã jae güinoi tecove ndarau etei opa vae. ¹⁷Echa'ã Tumpa iñee pe uyecuatía oï jese cuarãï:

"Nde ndicota penti sacerdoterã jaeño mai pegua" —jei Tumpa—, "Melquisedec rami."

Jucuarãï uyecuatía oï. ¹⁸⁻¹⁹Tenonde yave Tumpa oyocui amocue Leví iñemoñaa reta yugüireco vaerã sacerdote retará. Èrei jae reta ipuere'ã opa umbai mbaeyoa reta. Jáeramo Tumpa oyocui'ã ma yugüireco vaerã sacerdote retará. Umee yandev icavi ete jocua reta güi vae. Echa'ã añave ñanoi ñaãro ñaï yayerovia reve vae, jare cua jeco pegua yandepuere yaya Tumpa re. ²⁰⁻²¹Jare jocua reta sacerdote retará uyeyapo yave, Tumpa jei'ã etei mbae jee re. Èrei Tumpa umee yave cua ñru vae pe ico vaerã sacerdoterã, jei co mbae jee re. Echa'ã yandēYa Tumpa jei chupe cuarãï:

"Che jae ma cheree re, jare ndarau aipepica cua jae vae:

'Nde ndicota penti sacerdoterã jaeño mai pegua, Melquisedec rami.' "

Jucuarãï jei. ²²Trato ipiaui vae icavi ete trato tenondegua vae güi. Jare Jesús co jae penti sacerdoterã imeño mai ico vae ramo, yaicuaa añetete Tumpa uyapota cua taicue rupi jei vae.

²³Jare jeta ete co jocua sacerdote reta. Echa'ã penti penti umano. Jare sacerdote umano yave, ñru vae uyeyapo sacerdoterã uyapo vaerã mbaraviqui. ²⁴Èrei cua cuimbae imeño mai ico. Jáeramo ipuere uyapo sacerdote iparaviqui jaeño mai pegua. Ndarau uipota ñru vae uyapo vaerã iparaviqui. ²⁵Jáeramo Jesús ipuere umbiasa ete opaete oya Tumpa re jae uyapocue vae rupi vae reta. Echa'ã jae imeño mai ico uyerure vaerã Tumpa pe jese reta.

²⁶icavi ete co uyerure vaerã yanderé cua nunga sacerdote tenondegua. Echa'ã jae co jupi vae. Mbaeti etei jeco. Jae co iyoa mbae vae. Ipuere'ã etei iyoa. Jae ico ara pe. ²⁷Jocua ñru sacerdote tenondegua reta opa ara rupi umee Tumpa pe maemimba uyeyucacue reta imbaeyoa reta re rani jare ñru Israel pegua reta imbaeyoa reta re. Èrei Jesús uyapo'ã jucuarãï. Echa'ã penti veseño Jesús umee Tumpa pe uyeyucacue vae. Jare jocua uyeyucacue vae jae etei co. ²⁸Echa'ã cuimbae reta mboroyocui rupi uyeparavoca yugüireco vaerã sacerdote tenondegua retará vae iyoa mbae vae reta'ã co. Èrei añave mboroyocui uasa ma, jare Tumpa uiparavo Tai ico vaerã sacerdote tenondeguarã jocua jei jee re vae rupi. Jare Tumpa Tai iyoa mbae vae co jaeño mai pegua.

8

Jesús jare trato ipiau vae

¹ Opaete che jae ma peve vae uipota jei cua: Ime ñanoi cua nunga sacerdote tenondegua. Jae uguapi ma oí Tumpa iyipi pe iyacata coti ara pe. ² Tumpa jo ñana pe Israel pegua reta uyapo vae uyemijaanga ara re. Echa'ã jocua o japipe pe Tumpa oí vae pe sacerdote tenondegua uyapose iparaviqui. Jae ramiño vi Jesús añave uyapo iparaviqui ara pe Tumpa oí vae pe. Israel pegua reta uyapo jocua o. Ërei yandeYa Tumpa uyapo ara.

³ Jare sacerdote tenondegua penti penti uyeparavoca umee vaerã Tumpa pe ofrenda reta jare maemimba uyeyucacue reta. Jáeramo icavi co cua sacerdote tenondegua vi güinoi vaerã mbae umee vaerã chupe. ⁴ Ivi peño ico yave mona, mbaetita tēi ico sacerdoterã. Echa'ã jocua ñru sacerdote reta umee Tumpa pe ofrenda reta mboroyocui rupi. ⁵ Ërei mbaraviqui jae reta uyapo vae uyemijaangaño mbaraviqui ara pegua re. Echa'ã ndei Moisés uyapoca Tumpa jo mbove, Tumpa umimbeu chupe quirãi uyapoca vaerã. Jei chupe cuarã: "Mase, iyapoca opaete o cua amijaanga ndeve cua ivitu guasu re vae rami." Jucuarãi jei chupe. ⁶ Jare mbaraviqui Tumpa umee Jesús pe vae icavi ete mbaraviqui jocua ñru sacerdote reta uyapo vae güi. Jae ramiño vi trato Jesús rupi yande ñanoi vae icavi ete trato tenondegua vae güi. Echa'ã jocua Tumpa jei umeeta yandevae vae icavi ete jocua Tumpa jei umeeta trato tenondegua vae rupi vae güi.

⁷ Jocua trato tenondegua vae rupi ipuere'ã opa uyembai mbaeyoa reta. Jáeramo icavi co Tumpa uyapo vaerã ñru trato. ⁸ Echa'ã Tumpa uicuaa Israel pegua reta iyoa vae reta co. Jáeramo Tumpa ñíee pe uyecuatía oí quirãi yandeYa Tumpa jei cuarã: "Mase, outa ara reta amee vaerã trato ipiau vae Israel pegua reta jare Judá pegua reta pe. ⁹ Jocua trato tenondegua vae amee itenondegua reta pe, aru yave Egipto güi.

Ërei trato ipiau vae uyuavi trato tenondegua vae güi.

Echa'ã jae reta uyapo'ã che jae chupe reta uyapo vaerã vae, trato ñanondegua vae amee chupe reta yave.

Jáeramo ayandareco cavi'ã jese reta.

¹⁰ Echa'ã jocua ara reta rendave pe amee trato ipiau vae Israel pegua reta pe.

Jae co cua: Ipia pe ambiyeminguetata reta cheporoyocui reta re, jare ayapocata chupe reta cheporoyocui reta.

Jae reta chembiadorata.

Echa'ã uicuaata che co jae Tumpa.

Jare che amborita reta.

Echa'ã yugüirecota chembae retarã.

¹¹ Ndarau etei quía omboe jentaigua cheré.

Ndarau etei quía omboe jentarã cheré.

Ndarau etei quía jei ñru vae pe: 'Iyamboe yandeYa re'.

Echa'ã opaete vae - sambiaí reta jare ucuacuaa vae reta - checuaata co.

¹² Aipararecota reta. Echa'ã ambiasata chupe reta imbaeyoa reta.

Ndarau ye chemandúa imbaeyoa reta re."

Jucuarãi jei Tumpa. ¹³ Tumpa jei umeeta co chupe reta trato ipiau vae. Cua uipota jei jocua trato tenondegua vae indechi ma co. Jare mbae indechi vae opa seri ma co oí.

9

¹ Tumpa umee yave Israel pegua reta pe trato tenondegua vae, oyocui quirãi umbiadora reta vaerã jocua o ñana pe uyapo reta vae pe. ² Jocua o güinoi mocui o-rai. Tenondegua vae pe ñugüinoi lámpara reta, jare mesa, jare mbiyape uñeñoño tee vae reta Tumpa peguarã. Cua o-rai jee Lugar Santo. ³ Jare jocua Tumpa jo umbiyao vae cuti oí ñru o-rai Lugar Santísimo jee vae. ⁴ Joco pe ñugüinoi mesa oro pegua mbae ipiche cavi vae sacerdote reta uapi iárambo vae, jare ita reta Tumpa uicuatía mboroyocui reta jese vae jiru. Jocua jiru ivira pegua vae co, Ërei opaete icupe rupi oro catuui. Jare jocua jiru japipe pe ñugüinoi yapepo oro pegua maná oí pipe vae, jare Aarón ipopoca joqui vae, jare ita reta Tumpa uicuatía mboroyocui reta jese vae. ⁵ Jare jocua jiru iarambogua jocua oro catuui Tumpa uicuaaca Israel pegua reta pe ipuruparareco pipe vae co, jare jocua iárambo ñugüinoi jocua mocui ángel-raanga oro pegua ipóra ete vae. Jocua nunga ángel jee co querubine. Aipota tēi amimbeu cavi peve jocua jiru iarambogua regua, Ërei chepuere'ã añave.

⁶ Opaete cua mbaembae uyeyapocavi ma yave, sacerdote reta jecuaeño uique o-rai tenondegua vae pe, joco pe uyapo vaerã iparaviqui. ⁷ Ërei sacerdote tenondeguaño uique ñru o-rai pe penti veseño año pe, jare jecuaeño uruique tugüi. Jae jare ñru Israel pegua reta iyoa uicuaa cavi'ã reve ramo, sacerdote tenondegua umee tugüi Tumpa pe opaete jocua mbaeyoa reta re. ⁸ Jucuarãi Espiritu Santo uicuaaca ipuere'ãño uique opaete vae Tumpa

oĩ vae pe, jocua o-rai tenondegua vae oĩ rambueve. ⁹ Echa'ã jocua o-rai tenondegua vae penti jaangaño co. Joco pe sacerdote reta umee Tumpa pe ofrenda reta jare maemimba uyeyucacue reta. Ërei jocua ipuere'ã opa umbai jucuarãi umbiadora Tumpa vae imbaeyoa reta. Jare sacerdote reta etei uicuaa uyembai'ã co imbaeyoa reta. ¹⁰ Jaeño güinoi mboroyocui tembiu regua reta jare quirãi jae reta uyeyoe vaerã Tumpa coti. Opaete jocua mboroyocui reta ivi peguaño co. Tumpa umimbeu chupe reta jocua mboroyocui reta jae reta uyapo vaerã, Tumpa opaete uyapicatu regua.

¹¹ Ërei Cristo uyeyapo ma sacerdote tenondeguarã uyapo vaerã icavi vae yandeve. Jare jae uyapo iparaviqui ara pe. Ara icavi ete jocua Tumpa jo Israel pegua reta ñana pe uyapo vae güi. Echa'ã jocua Tumpa jo ivi peguaño co. ¹² Jare sacerdote tenondegua ivi pegua uique yave Lugar Santísimo pe, uruique capura jugüi jare vaca tairusu vae jugüi. Ërei Cristo uique yave ara pe, uruique jae jugüi etei. Penti veseño uique jare cuarãi umbiepi yanembaeyoa reta re. Jáeramo ñanoi ma yembiasa opa mbae vae. ¹³ Penti Israel pegua uyapo yave mbae Tumpa coti uyeminguia vae, sacerdote ipuere uipi toro jugüi pe ani capura jugüi pe ani i vaca ocaicue ndive uyea vae pe oyoe vaerã jete Tumpa coti. Jucuarãi uñeño tee Tumpa peguarã. ¹⁴ Ërei Cristo jugüi ipuere ete jocua reta güi. Echa'ã Cristo iyoa mbae vae co. Ërei jae umano uñemee vaerã Tumpa pe Espiritu Santo imeño mai ico vae rupi. Jáeramo jae jugüi ipuere umbai mbaembae mano pegua piyapo vae. Jare picuaata uyembai ma co, pepuere vaerã piyeyocui Tumpa imeño mai ico vae pe.

¹⁵ Jare cua jeco pegua Tumpa uicuaaca ma trato ipiaü vae Cristo rupi. Echa'ã Cristo umano umbiepi vaerã trato tenondegua vae güinoi vae reta imbaeyoa reta re. Jáeramo jocua Tumpa uiparavo vae reta güinoita imbaerã opa mbae vae Tumpa jei umeeta chupe reta vae.

¹⁶ Cuimbae jei yave umee vaerã mbaembae ñru vae reta pe jae umano yave, jae reta ndarau ipuere güinoi jocua mbaembae imbaerã ndei iya umano mbove. ¹⁷ Echa'ã cuimbae umano yave ramo jae reta ipuere güinoi imbaerã jocua mbaembae. Ndarau ipuere güinoi mbaembae jei umeeta vae imeño ico rambueve. ¹⁸ Jáeramo Moisés uiporu tugüi trato tenondegua vae uyeyapo vaerã. ¹⁹ Echa'ã Moisés opa rani umimbeu Israel pegua reta pe opaete mboroyocui reta. Jayave jocua jaicue rupi uiporu vaca tairusu vae reta jugüi jare capura reta jugüi jare i jare ovecha-raague uñemipita vae jare ñana hisopo jee vae uipi vaerã tupapire jare opaete Israel pegua reta. ²⁰ Jare Moisés jei chupe reta cuarã:

“Cua tugüi uicuaaca peve trato Tumpa umee ma peve vae.
Echa'ã cua trato rupi Tumpa peocui mbae piyapo vaerã.”

Jucuarãi jei. ²¹ Jae ramiño vi Moisés uipi tugüi pe Tumpa jo jare opaete sacerdote reta jembiporu reta. ²² Jare mboroyocui rupi opaete seri uyeyoe Tumpa coti tugüi pe. Jare maemimba reta uyeyuca'ã yave, Tumpa umbiasata'ã tẽi Israel pegua reta pe imbaeyoa reta.

Jesús umano güiraa vaerã imbaeyoa reta

²³ Jare opaete cua reta mbaembae ara pegua jaanga retaño co. Jáeramo icavi co uyeyoe vaerã Tumpa coti jucuarãi. Ërei icavi co mbaembae ara pegua etei uyeyoe vaerã Tumpa coti Cristo jugüi pe. Echa'ã Cristo jugüi icavi ete maemimba reta jugüi güi. ²⁴ Cristo uique ma ara pe, uique'ã penti o uñeño tee Tumpa peguarã vae Israel pegua reta uyapo vae pe. Echa'ã jocua o penti jaangaño co. Jocua o uyemijaanga Tumpa jo añetete vae re. Cristo ico ma Tumpa oĩ vae pe yanembori vaerã. ²⁵ Jare sacerdote tenondegua ivi pegua uruique Lugar Santísimo pe maemimba reta jugüi. Ipuere'ã co uruique jae jugüi. Jare jucuarãi jecuaño uyapo opa año rupi. Ërei Cristo uñemee'ã ma jecuaño umano vaerã. ²⁶ Echa'ã jecuaño jucuarãi uñemee yave mona, umanota tẽi uiporara reve jeta vese ivi uyeyapo güive. Ërei añave penti veseño ara taicuegua reta pe ou ma Cristo cua ivi pe umbai vaerã mbaeyoa reta imano rupi. ²⁷ Ivi pegua reta umano, ou uvãe yave ara umano vaerã. Jare umano yave Tumpa uãata co. ²⁸ Jae ramiño vi Cristo penti veseño uñemee umano vaerã, ipuere vaerã güiraa chugüi reta jeta vae imbaeyoa reta. Jare uyecuaa yeta opaete uyerovia reve uãro ñugüinoi vae reta pe. Ërei uyecuaa ye yave, outa umbiasa ete reta vaerã, outa'ã umbiepi ye vaerã mbaeyoa re.

10

¹ Mboroyocui michiño uicuaaca icavi vae Tumpa uyapota vae. Uicuaaca cavi'ã. Echa'ã maemimba uyeyucacue reta uñemee Tumpa pe opa año. Ërei jocua nunga ipuere'ã etei opa umbai jucuarãi oya Tumpa re vae reta imbaeyoa reta. ² Echa'ã ipuere yave mona opa umbai, uñemee yeta'ã tẽi co maemimba uyeyucacue reta. Echa'ã jucuarãi umbiadora Tumpa vae reta ipia pe uyemingueta yeta'ã tẽi co jecuaño mbaeyoa reta güinoi vae re.

³ Ērei jocua maemimba uyeyucacue reta Tumpa pe uñemee vae umimandúa opa año Israel pegua reta imbaeyoa reta re. ⁴ Echa'ã toro jugüi jare capura jugüi ipuere'ã etei umicañi ete mbaeyoa reta.

⁵ Jáeramo Cristo ou yave cua ivi pe, jei Tumpa pe cuarãi:
 “Ndipota'ã jocua maemimba uyeyucacue uñemee ndeve vae reta.

Jáeramo nde neme cheve cherete uñemee vaerã.

⁶ Maemimba uyeyucacue reta ocai uñemee vaerã ndeve.

Ērei jocua reta nembiyerovia'ã.

Jae ramiño vi maemimba uyeyucacue reta mbaeyoa reta re uñemee vae nembiyerovia'ã.

⁷ Jayave che jae ndeve:

‘Mase, che ayu ayapo vaerã nde ndere vae.

Nde co jae Tumpa.

Echa'ã jucuarãi uyecuatía oĩ cheré niñee pe.’ ”

Jucuarãi jei Cristo Tumpa pe. ⁸ Cristo jei tenonde voi cuarãi:

“Ndipota'ã jocua maemimba uyeyucacue uñemee ndeve vae reta.

Maemimba uyeyucacue reta ocai uñemee vaerã ndeve.

Ērei jocua reta nembiyerovia'ã.

Jae ramiño vi maemimba uyeyucacue reta mbaeyoa reta re uñemee vae nembiyerovia'ã.”

Jucuarãi jei, yepe tõi jocua nunga uñemee Tumpa pe mboroyocui rupi. ⁹ Jayave jocua jaicue rupi jei ye cuarãi:

“Mase, che ayu ayapo vaerã nde ndere vae.

Nde co jae Tumpa.”

Jucuarãi jei. Cua uipota jei jocua maemimba uyeyucacue uñemee vae reta mbaeti ma co mbaerã icavi, jare jocua ipepica pe Cristo jete uñemee Tumpa pe. ¹⁰ Echa'ã Jesucristo umee jete Tumpa pe penti veseño jaeño mai pegua. Jare cua jeco pegua Tumpa ñaneño tee iyupeguarã jei vae rupi.

¹¹ Jocu ivi pegua sacerdote reta uyemboi Tumpa jo pe opa ara rupi uyeyocui vaerã Tumpa pe. Jeta vese jae reta umee Tumpa pe maemimba uyeyucacue reta. Opa ara jocua jocuaño uyapo reta. Ērei jocua nunga ipuere'ã etei umbai mbaeyoa reta. ¹² Ērei cua cuimbae Cristo jee vae umano umee vaerã jete Tumpa pe. Pentu veseño jucuarãi uyapo, ipuere vaerã umbai mbaeyoa reta jaeño mai pegua. Jare jocua jaicue rupi uguapi Tumpa iyipi pe iyacata coti. ¹³ Jare uguapi joco pe güive, jecuaeño uãro oĩ Tumpa opa umiamiri vaerã jovaicho reta regua. ¹⁴ Echa'ã pentu veseño umee jete Tumpa pe, jare jucuarãi umbiasa ete jaeño mai pegua Tumpa oñono tee iyupeguarã vae reta.

¹⁵ Jare Espiritu Santo vi umimbeu cua yandevae. Echa'ã uyecuatía oĩ Tumpa iñee pe quirãi yandeYa tenonde voi jei cuarãi:

¹⁶ “Jocua ara reta rendave pe ameeta cua trato ipiau vae chupe reta.

Ipia pe ambiyeminguetata reta cheporoyocui reta re,

jare ayapocata chupe reta cheporoyocui reta.”

Jucuarãi jei. ¹⁷ Jayave taicue rupi jei cuarãi:

“Jare ndarau ye chemandúa imbaeyoa reta re.”

Jucuarãi jei. ¹⁸ Jare Tumpa umbiasa yandevae yanembaeyoa reta ramo, mbaeti ma mbae ñamee vaerã yanembaeyoa reta re.

Yaique Tumpa oĩ vae pe

¹⁹ Jáeramo, cherivi reta, yandepuere yaique yaquie mbae reve Tumpa oĩ vae pe Jesús jugüi jeco pegua. ²⁰ Echa'ã Jesús umano yanderé yandepuere vaerã yaique Tumpa oĩ vae pe, maemimba uyeyuca yave sacerdote tenondegua uique Lugar Santísimo pe rami. Jucuarãi Jesús uyapo yandevae pentu tape ipiau vae Tumpa oĩ vae pe, ñanoi vaerã tecove opa mbae vae. ²¹ Yande co jae Tumpa imbae reta, jare Jesús co jae sacerdote tenondegua uyerure Tumpa pe yanderé vae. ²² Jáeramo yaya Tumpa re ñanequirẽi ngatu reve. Yarovia Tumpa uipota co yaya vaerã jese. Sacerdote ivi pegua oyase Tumpa re yave, uyeipi tugüi pe jare oyoe jete i icavi vae pe. Jae ramiño vi yande yaya Tumpa re yave, tuyeyoe Tumpa coti mbaeyoa güi yandepia jare yanderete. ²³ Jecuaeño ñaneratangãtu yamimbeu vaerã ñru vae reta pe ñaãro ñaã yayerovia reve vae. Echa'ã yandepuere yarovia catu Tumpa jei umeeta yandevae vae. ²⁴ Jare yayandareco yandiyee. Ñañemiatangãtu yayerau vaerã jare icavi vae yayapo vaerã. ²⁵ Amocue vae uyembati'ã ma ñru upurugüirovia vae reta ndive. Agüiye yayapo jae reta rami. Yayembati jare ñañemiatangãtu. Ñañemiatangãtu ete, yaicuaa jocua ara outa ma oĩ ramo.

²⁶ Ērei yandeyoa yave ñanequirẽi ngatu reve añete vae yaicuaa yave, mbaeti ye ma quia uñemee vaerã mbaeyoa reta re. ²⁷ Jaeño ñaãrota yaquie reve Tumpa ñanerãa vaerã. Echa'ã Tumpa pochü ete jovaicho reta pe. Jae co pentu tata mbaembae opa uapi vae rami. ²⁸ Pentu

Israel pegua Moisés iporoyocui uyapo'ã vae umano, ñru mocui ani mbapi Israel pegua reta umimbeu yave imbaeyoa re. Ñru vae reta uiparareco'ã etei. ²⁹ Ërei Tumpa upuruãa yave, güiriro Tumpa Tai vae uiporara eteta Israel pegua reta güi. Echa'ã güiriro Tumpa Tai vae ipia pe uyemingueta Tumpa Tai jugüi mbae'ã co, yepe tẽi jocua jugüi uicuaaca chupe trato Tumpa umee chupe vae, jare jocua jugüi rupi Tumpa oñono teeta tẽi iyupegarã. Jucuarãi güiriro Tumpa Tai vae güiriro vi Espiritu Santo ipiacavi. ³⁰ Yaicuaa co Tumpa jare quirãi jae jei Israel pegua reta pe cuarãi:

“Che co jae peYa.

Che puãata co.

Che aiporaracata co peve.”

Jucuarãi jei. Jare yaicuaa quirãi jei vi chupe reta cuarãi:

“Che co jae peYa.

Pe reta co jae chembae reta.

Che puãata co.”

Jucuarãi jei vi. ³¹ Penti quiye tuicha vae co Tumpa imeño mai ico vae uiporaraca yave quía nunga vae pe.

³² Ërei pemandúa ara reta uasa vae re. Jocua ara reta pe, Cristo re piyemboe yave, ñru vae reta uiporaraca ete peve, Ërei jecuaeño pepirãta pepurugüirovia re. ³³ Ñru vae reta pereriro. Echa'ã jei reta icavi mbae vae peve jare uyapo reta icavi mbae vae peve. Jae ramiño vi piñemiñru ma jucuarãi uiporara vae reta ndive. ³⁴ Echa'ã piparareco peresoriru pe ñugüinoi vae reta. Jare ñru vae reta pembaembae upiro pegüi yave, piyerovia catu. Echa'ã picuaa penoi co ara pe mbaembae icavi ete jocua güi vae. Echa'ã mbaembae ara pegua jaeño mai pegua co. Ërei mbaembae ivi pegua jaeño mai pegua'ã co. ³⁵ Jáeramo jecuaeño perovia catu Tumpa pequiye mbae reve, Tumpa umee vaerã peve icavi ete vae. ³⁶ Echa'ã Tumpa uipota pepiaguasu vaerã. Jucuarãi yave, Tumpa umeeta peve jei umeeta vae, opa ma piyapo yave Tumpa jei vae. ³⁷ Tumpa ñínee pe uyecuatía oĩ cuarãi:

“Imambae jae outa vae outa co.

Ou seri ma co oĩ.

³⁸ Tumpa umbujupi vae güinoita tecove opa mbae vae, upurugüirovia ramo.

Ërei ime yave quía opia Tumpa güi vae, ndarau ayerovia jese.”

Jucuarãi uyecuatía oĩ. ³⁹ Ërei yande jae'ã co Tumpa güi opia vae reta. Echa'ã jae reta yugüiraata cañitei pe. Yande yapurugüirovia yanderecove uyembiasaca vaerã.

11

Mburugüirovia regua

¹ Mburugüirovia ñnanoi yave, yaicuaa ñnanoi co ññaño ñaĩ yayerovia reve vae, yepe tẽi mbaetiño yaecha. ² Yandetenondegua reta umbiyerovia Tumpa ipurugüirovia re.

³ Yapurugüirovia yave, yaicuaa ivi jare opaete ara re ñugüinoi vae uyeyapo co Tumpa jei vae rupi, jare opaete cua reta yandepuere yaecha vae uyeyapo'ã mbae güi. Echa'ã ndei Tumpa uyapo mbove, mbaeti co mbae ave.

⁴ Abel güirovia Tumpa. Jáeramo umee Tumpa pe maemimba uyeyucacue. Cua icavi ete Tumpa pe jocua Caín umee Tumpa pe vae güi. Jare Tumpa uicuaaca umbujupi co Abel jocua umee Tumpa pe vae rupi. Jare yepe tẽi Abel umano, Ërei jocua uyapo vae mbae uicuaaca yandev.

⁵ Enoc güirovia Tumpa. Jáeramo Tumpa güiraa ivi güi jecove reve. Mbaeti quía ipuere uvãe chupe. Echa'ã Tumpa güiraa ivi güi. Echa'ã ndei Tumpa güiraa mbove, Tumpa uicuaaca quirãi Enoc umbiyerovia. ⁶ Ërei yarovia'ã yave Tumpa, yandepuere'ã yambiyerovia. Echa'ã yarovia'ã yave ime co penti Tumpa, yandepuere'ã yaya jese. Jae ramiño vi yarovia'ã yave Tumpa uyecuaata co yandev jecuaeño yaeca yave, yandepuere'ã yaya jese.

⁷ Noé güirovia Tumpa. Jáeramo uyapo chalana guasu jentarã reta oyepo vaerã iporu guasu güi. Echa'ã ndei iporu guasu uyeyapo mbove, Tumpa uicuaaca Noé pe uyeyapota co. Jáeramo Noé uyapo chalana guasu umbiadora Tumpa ramo. Jare jocua uyapo vae rupi Noé uicuaaca ivi pegua reta icavi mbae vae uyapo vae reta co, jare Tumpa umbujupi ipurugüirovia jeco pegua.

⁸ Abraham güirovia Tumpa. Jáeramo uyapo Tumpa umimbeu chupe uyapo vaerã vae. Echa'ã Tumpa umimbeu chupe oo vaerã ambie ivi Tumpa umeeta imbaerã vae pe. Jayave Abraham oẽ oo jenta güi, yepe tẽi uicuaa'ã queti oo vae. ⁹ Abraham güirovia Tumpa ramo, icoiño ivi Tumpa jei umeeta chupe vae pe jo carpa guacapi pegua pe. Jucuarãi uyecuaa jocua ivi jae imbae'ã co. Jae ramiño vi Isaac jare Jacob yugüireco joco pe jo guacapi pegua

pe, yepe tēi Tumpa jei chupe reta vi umeeta co jocua ivi imbaerã. ¹⁰ Echa'ã Abraham uãro oĩ uique vaerã tenta guasu Tumpa uyapo vae. Jocua tenta guasu ndarau opa.

¹¹ Sara güirovia Tumpa. Jáeramo Tumpa umee chupe imembi vaerã. Jare Sara imembi, yepe tēi ucuacuaa ete. Echa'ã güirovia Tumpa uyapota co jei uyapota vae. ¹² Jáeramo jeta ete co Abraham iñemoñaã reta, yepe tēi Abraham indechi ete ma. Jeta ete co yasitata ara re ñugüinoi vae reta jare jeta ete co ivicuĩti i guasu jembei pe oĩ vae. Jae ramiño vi jeta ete co Abraham iñemoñaã reta.

¹³ Cua reta umano güirovia reve Tumpa, yepe tēi Tumpa ndeiño umee chupe reta jei umeeta chupe reta vae. Jae reta jei iyupe imbae'ã co cua ivi. Ërei uicuaa ima yave Tumpa uyapota co jei uyapota vae. ¹⁴ Jare jei reta yave iyupe co cua ivi imbae'ã vae co, uipota jei uãro ñugüinoi ñru ivi yugüireco pipe vaerã. ¹⁵ Añete co ipia pe uyemingueta yave jocua ivi Abraham oē oo chugüi vae re yugüiraa ye vaerã joco pe, aramoi ipuereta tēi yugüiraa ye joco pe. ¹⁶ Ërei uipota reta ivi icavi ete jocua güi vae. Uipota penti ivi ara pegua. Jáeramo Tumpa imara'ã jee re. Echa'ã jee co Abraham jare Isaac jare Jacob i Tumpa. Jare jae uyapo ma chupe reta tenta guasu jentarã.

¹⁷ Tumpa uipota uicuaa uyapota ra Abraham Tumpa jei chupe uyapo vaerã vae. Jáeramo Abraham uyucata tēi Isaac umee vaerã Tumpa pe. Jucuarãi uyapo güirovia Tumpa ramo. Yepe tēi Tumpa umee ma chupe jei umeeta chupe vae reta, Ërei uyucata tēi tai jae vaeño umee vaerã Tumpa pe. ¹⁸ Echa'ã Tumpa jei ma Abraham pe Isaac re cuarãi: “Nenoita niñemoñaã reta Isaac rupi.” Jucuarãi jei. ¹⁹ Abraham uicuaa jae uyuca yave tai, Tumpa ipuere umbijecove ye. Jare yandepuere yamijaanga cua uyeyapo vae, yae yave Abraham umbiresive Isaac mano güi.

²⁰ Isaac güirovia Tumpa. Jáeramo uyerure Tumpa pe umivendise vaerã Jacob jare Esaú uyeyapota chupe reta vae re.

²¹ Jacob güirovia Tumpa. Jáeramo umanota ma yave, uyerure Tumpa pe umivendise vaerã José tai reta mocui reve, jare umbiadora Tumpa uyeco oĩ rambueve ipopoca re.

²² José güirovia Tumpa. Jáeramo umanota ma yave, jei Israel pegua reta pe oēta co yugüiraa Egipto güi, jare oyocui reta jetecue re.

²³ Moisés tu jare ichi güirovia Tumpa. Jáeramo Moisés ichi güi oa ma yave, tu jare ichi oñomi jo pe mbapi yasi. Echa'ã uecha Moisés ipõra ete co, jare uquiye'ã mburuvicha guasu Egipto pegua iporoyocui güi.

²⁴ Moisés güirovia Tumpa. Jáeramo ucuacuaa ma yave, uipota'ã ico vaerã Faraón tayi imembiã. ²⁵ Ipuere tēi uyapo mbaeyoa uyembiyerovia vaerã michi pegua. Ërei uipota ete jocua güi uiporara Tumpa imbae reta ndive. ²⁶ Echa'ã Moisés güirovia icavi ete chupe uñereriroca vaerã Cristo jeco pegua opaete corepoti Egipto pe oĩ vae güinoi vaerã vae güi. Echa'ã uicuaa icavi ete co Tumpa umeeta chupe vae opaete corepoti Egipto pe oĩ vae güi.

²⁷ Moisés güirovia Tumpa ramo, oē oo Egipto güi. Uquiye'ã mburuvicha guasu güi, yepe tēi mburuvicha guasu pochĩ ete chupe. Jare Moisés urupia ima ñana pe. Echa'ã yepe tēi mbaeti quia ipuere uecha Tumpa, Ërei jae ico quia uecha Tumpa vae ico ramo. ²⁸ Moisés güirovia Tumpa ramo, omboe Israel pegua reta pascua re. Jocua ara pe jae reta uipi jonque penti penti tugüi pe, agüiye vaerã ángel uyuca tai tenondegua reta. Echa'ã jocua ángel uyuca Egipto pegua reta tai tenondegua vae reta.

²⁹ Israel pegua reta güirovia Tumpa. Jáeramo I Guasu Pĩta jee vae uasa ivi utini vae rupi uasa ramĩ. Ërei Egipto pegua reta uasa rambueve, i ou ye chupe reta jare opa umbipitupa.

³⁰ Israel pegua reta güirovia Tumpa ramo, Jericó iquēsea ita pegua vae uyapara Israel pegua reta siete ara ma uyere jese yave.

³¹ Cuña aguasa rupi ico vae Rahab jee vae güirovia Tumpa. Jáeramo opaete Jericó pegua güirovia'ã Tumpa vae reta umano yave, Rahab umano'ã. Echa'ã jae umbiresive cavi Israel pegua reta uipiãro yave Jericó.

³² Jeta ete ma che jae güirovia Tumpa vae reta re. Chepuere'ã ma amimbeu vaerã peve Gedeón, Barac, Sansón, Jefté, David, Samuel jare Tumpa iñee umimbeu vae reta regua.

³³ Jae reta vi güirovia Tumpa. Jáeramo umiamiri mburuvicha guasu reta, uyapo jupi vae, Tumpa umee chupe reta jei umeeta chupe reta vae, jare Tumpa uyandareco jese reta agüiye vaerã yaguapĩta reta uyuca. ³⁴ Jae reta ombove tata tuicha vae reta. Amocue vae jovaicho reta uipota tēi uyuca quisepucu pe, Ërei ipuere'ã. Ipiueta yave, Tumpa umee chupe reta mbaepuere. Jatangātu ete reta uñerãro vaerã jare ombosi sundaro reta ambie ivi reta güi yugüeru uñerãro vaerã jae reta ndive vae. ³⁵ Amocue cuña reta icuimbae uyeyucaca, jare Tumpa umbijecove ye güeru umanocue vae reta ipite güi, jae reta ipuere ye vaerã uyandareco cuña reta re. ñru vae reta uyeyucaca ivira pe. Uiporaraca chupe reta vae reta jei ipuere jecuae yugüireco cua ivi pe, uyapo yave jae reta jei chupe reta uyapo vaerã vae, Ërei uipota'ã reta. Echa'ã uicuaa Tumpa umbijecove yeta güeru umanocue vae reta

ipite güi jare jayave icavi eteta chupe reta cua ivi pe jecuae yugüireco vae güi. ³⁶ İru vae reta uiporara ete uñeririroca jare uñenupaca chicote pe yave. Jare İru vae reta uñeñonoca peresorıru pe jare uyepocuaaca joco pe. ³⁷ Amocue vae jovaicho reta uyapi ita pe uyucu. İru vae reta jovaicho reta uyasia icúa rupi sierra pe uyucu. İru vae reta uiporara jovaicho reta jei yave ipuere jecuae yugüireco cua ivi pe, uyapo yave jae reta jei chupe reta uyapo vaerã vae. İru vae reta uyeyucaca quisepecu pe. Amocue vae uguata opaete que rupi jare jemimonde co jae ovecha ipirecue ani capura ipirecue. Mbaeti etei mbae güinoi reta. Uiporara ete reta. Jovaicho reta uyapo icavi mbae vae chupe reta. ³⁸ Jocua güirovia Tumpa vae reta uguataguata ñana reta rupi jare ivitu guasu reta rupi, jare yugüireco ivicua tuicha vae reta pe. İvi pegua reta iyoa ete. Jáeramo ipuere'ã uicuaa icavi ete co jocua güirovia Tumpa vae reta.

³⁹ Opaete jocua reta umbiyerovia Tumpa ipurugüirovia re. Ērei Tumpa umee'ã chupe reta jei umeeta chupe reta vae. ⁴⁰ Echa'ã Tumpa uicuaa yande ñanoita co mbae icavi ete umeeta chupe reta vae güi vae, agüiye vaerã jae reta uyembiasaca ete ndei yande yayembiasaca ete mbove.

12

Yarovia catu Jesús yanembori vaerã

¹ Jeta ete co güirovia Tumpa vae amimbeu peve vae reta. Jocua reta rupi yandepuere yaicuaa icavi co yandeve yarovia vaerã Tumpa. Jáeramo yamombo yandeyugüi opaete yanembaeyoa. Echa'ã mbaeyoa yanembiavai ete. Yamijaanga penti ñeñocui. Ñañeñocuiñocui yave, icavi co yamombo vaerã yandeyugüi opaete poi vae, jare yasi vaerã ñamiaguanta reve. Jae ramiño vi yaico yandepiaguasu reve cua ivi pe. Echa'ã Tumpa umee yandeve yaico vaerã cua pe. ² Jare yarovia catu Jesús yanembori vaerã. Echa'ã Jesús ipurugüirovia tuicha ete opaete İru vae reta ipurugüirovia güi. Jae tuicha urupia umano vaerã curusu re. Joco pe oĩ rambueve, İru vae reta güirıro, Ērei jae jei'ã mbae ave jocua re. Echa'ã uicuaa taicue rupi uyerovia catuta co. Añave uguapi oĩ Tumpa iyipi pe iyacata coti.

³ Pepia pe piyemingueta Jesús re, quirãi iyoa vae reta icavi mbae vae jei yave icoti, jae umiaguanta. Echa'ã pepia pe piyemingueta yave jese, ndarau pecueri jare ndarau pepitu pepia pe. ⁴ Yepe tēi piñerãro mbaeyoa ndive, Ērei ndeiño piñerãro pemano vaerã. ⁵⁻⁶ Tumpa imiari peve penti tu imiari tai pe rami. Echa'ã Tumpa iñee pe uyecuatia oĩ cuarãi:

“Cherai, agüiye ndepochi yandeYa uiporaraca ndeve yave agüiye vaerã ndeyoa, jare agüiye ndecueri yandeYa umimbeu ndeve nembaeyoa yave.

Echa'ã yandeYa uiporaraca uau vae pe, agüiye vaerã iyoa.

Jucuarãi uiporaraca chupe, tairã uyapo yave.”

Jucuarãi uyecuatia oĩ. Aramoi pe reta peacañi jocua güi. ⁷ Pemiaguanta Tumpa jucuarãi uiporaraca peve yave. Echa'ã Tumpa jucuarãi uyapo, pe reta co jae tai reta ramo. Echa'ã tu reta uiporaraca tai pe jucuarãi. ⁸ Yaicuaa opaete tai reta uiporara jucuarãi. Jáeramo piporara'ã yave jucuarãi, pe reta jae'ã co tai ete reta. ⁹ Añete co, yanderu ivi pegua uiporaraca yandeve, agüiye vaerã yandeyoa, jare yaicuaa icavi co uyapo. Jáeramo agüiye etei yandepochi yandeRu ara pegua uiporaraca yandeve yave yaico vaerã icavi vae yayapo reve. ¹⁰ Echa'ã yanderu ivi pegua uiporaraca yandeve michi pegua jei vae rupiño. Ērei yandeRu ara pegua uiporaraca yandeve, agüiye vaerã yandeyoa. Cua icavi co yandeve. Echa'ã jae vae co. ¹¹ Añete co, yaiporara ñai yave, yandepiatiti. Yayerovie'ã co. Ērei taicue rupi jocua yaiporara vae yanembori yayapo vaerã jupi vae yandepiacatu reve, ñamaeño yave Tumpa re yanemboe jese yaiporara vae rupi.

Piyapisaca Tumpa jei vae re

¹² Jáeramo agüiye ma pecueri. Agüiye ma pepitu. ¹³ Piyapo jupi vae, agüiye vaerã ipitu vae opia Tumpa güi. Jucuarãi piyapo yave, pepuereta pembori ipitu vae ipirãta vaerã.

¹⁴ Piñemiatangãtu pepiacatu vaerã opaete vae ndive, jare piñeño tee vaerã Tumpa peguarã. Echa'ã uñeño tee Tumpa peguarã vaeño ipuere uecha yandeYa Tumpa. ¹⁵ Jare piñemoa, agüiye vaerã quia uyerova Tumpa ipiacavi güi, jare agüiye vaerã pembipi piñemitarãi. Echa'ã piñemitarãi yave, piyembiavaita co jare jeta vae iyoata. ¹⁶ Jare piñemoa, agüiye vaerã oĩ pepite pe aguasa uyapo vae, jare agüiye vaerã oĩ quia güirıro uñeño tee Tumpa peguara vae. Esau jucuarãi uyapo. Echa'ã Esau umee tivı pe tembıu re Tumpa umeeta tēi Esau pe vae. Echa'ã Tumpa umeeta tēi co chupe, Esau co jae Isaac tai tenondegua ramo. ¹⁷ Jare picuaa quirãi taicue rupi Esau uipotã tēi güinoi Tumpa umeeta tēi chupe vae. Ērei Isaac jei chupe ipuere'ã co güinoi. Yepe tēi uyerure jese uyao reve, Ērei ipuere'ã etei mbae uyapo. Tu jecuaeño jei chupe ipuere'ã co güinoi.

¹⁸ Ērei pe reta mbaeti co Israel pegua ivitu guasu Sinaí iyipi pe ñugüinoi vae reta rami. Echa'ã jocua ivitu guasu ivi pegua co. Israel pegua reta ipuere oya jocua ivitu guasu re. Jocua ivitu guasu re tata jendi oĩ. Pítumimbi oĩ jare ivitu ete joco pe. ¹⁹ Jare jae reta uyandu trompeta iñee jare Tumpa iñee. Jare Tumpa iñee uyandu ma yave, uyerure Moisés pe agüiye vaerã Tumpa uyemingueta ye chupe reta. ²⁰ Echa'ã Tumpa oyocui reta cuarã: "Penti maemimba upiro yave cua ivitu guasu re, piyapita co ita pe piyua." Cua mboroyocui yavai ete Israel pegua reta pe. ²¹ Opaete vae uquiye ete uecha vae jeco pegua. Jare Moisés etei jei cuarã: "Aquiye ete. Ariri ete aquiye ramo." Jucuarãi jei.

²² Ērei pe reta peya ma ivitu guasu Sión re. Joco pe oĩ Tumpa imeño mai ico vae jenta guasu. Jae co Jerusalén ara pegua. Joco pe ñugüinoi vi jeta ete ángel reta. ²³ Joco pe ñugüinoi vi opaete Tumpa uiparavo tecove ipiau vae güinoi vaerã vae reta. Echa'ã Tumpa uicuatiã jae reta jee ara pe. Opaete vae uyembati joco pe. Jare joco pe oĩ vi Tumpa - jae uãata opaete vae. Jare joco pe ñugüinoi vi jupi vae reta lespíritu. Jae reta uyembiasaca ete ma. ²⁴ Jare joco pe oĩ vi Jesús. Echa'ã Jesús rupi ñanoi trato ipiau vae. Jare joco pe oĩ vi Jesús jugüi jae yanderipi pipe vae. Jocua tugüi icavi ete tugüi Abel mbae uipi pipe vae güi.

²⁵ Tumpa pemingueta oĩ. Piñemoa piyapo vaerã jae jei peve piyapo vaerã vae. Israel pegua reta uiporara uyapo'ã Tumpa ivi pe jei chupe reta uyapo vaerã vae ramo. Jae ramiño vi yande yaiporara eteta, yayapo'ã yave Tumpa jei yandeve yayapo vaerã vae. Echa'ã añave Tumpa umingueta oĩ ara güi. ²⁶ Tumpa ivi pe umingueta yave, iñee umicãta ivi. Ērei añave jei cuarã: "Tamicãta penti vese ye ivi jare ara." Jucuarãi jei. ²⁷ Jare cua penti vese ye jei vae uipota jei Tumpa umbaita co umicãta vae reta. Echa'ã Tumpa etei uyapo jocua reta. Jucuarãi uyapota Tumpa jecuaeño ñugüinoi vaerã ipuere'ã uñemicãta vae reta.

²⁸ Jare Tumpa umeë yandeve yaico vaerã iporoyocua pe, jare iporoyocua ipuere'ã uñemicãta. Jáeramo ñameë yasurupai Tumpa pe ipiacavi re. Echa'ã Tumpa ipiacavi rupi yandepuere yayeyocui chupe, jare jucuarãi yambiyyerovia. Jecuaeño yayeyocui chupe yambiadora jare yaipiu reve. ²⁹ Echa'ã Tumpa co jae penti tata opaete mbaembae uapi vae rami.

13

Quirã pembiyyerovia Tumpa

¹ Cherivi reta, jecuaeño piyyerau.

² Jecuaeño pequirëi pemingarua vaerã mboupa reta. Echa'ã jucuarãi amocue vae umingarua ángel reta uicuua mbae reve. ³ Jecuaeño pemandúa peresoriru pe ñugüinoi vae reta re, pemanduata tēi co jese reta jae reta ndive pei yave rami. Amocue vae uiporara ñugüinoi ñru vae reta uyapo icavi mbae vae chupe reta ramo. Pemandúa vi jese reta. Echa'ã pe reta vi pico cua ivi pe, jare aramai ñru vae reta uiporaracata peve vi jucuarãi.

⁴ Umenda vae reta jecuaeño tuyapo jupi vae güireco vae coti. Agüiye quã tuyuvanga menda re. Echa'ã Tumpa uãata aguasa uyapo vae reta jare menda re uyuvanga vae reta.

⁵ Agüiye pico jecuaeño jeta corepoti pipota ete reve. Pemeë yasurupai Tumpa pe mbaembae penoi vae re. Agüiye piñemiro ñru vae pe jeta'ã mbaembae penoi ramo. Echa'ã Tumpa etei jei cuarã: "Jecuaeño aicota nde ndive nombori vaerã." Jucuarãi jei. ⁶ Jáeramo yandepuere yae yaquiye mbae reve cuarã: "YandeYa chembori.

Ndarau aquiye mbae güi.

Ñru vae reta ndarau ipuere mbae uyapo cheve cheminguiye vaerã."

Jucuarãi yandepuere yae.

⁷ Piyapisaca cavi petenondegua reta iñee re. Echa'ã jae reta umimbeu peve Tumpa iñee. Pepurugüirovia jae reta upurugüirovia rami. Echa'ã picuaa quirã jae reta yugüireco umbiadoraca vaerã Tumpa. ⁸ Jesucristo uyepépica'ã etei. Iyipi güiye jare jaeño mai pegua uyepépica'ã. ⁹ Ime amocue moromboë uyuavi vae ore ndoporomboë'ã jese vae. Agüiye perovia jocua nunga moromboë. Echa'ã perovia yave, pepiata Tumpa güi. Icavi co ñañemimirãta vaerã yandepurugüirovia re Tumpa ipiacavi rupi. Ndarau yandepuere ñañemimirãta yandepurugüirovia re mboroyocui reta tembiu regua rupi. Echa'ã ñru vae reta uipota tēi uñemimirãta ipurugüirovia re jocua rupi, ěrei ipuere'ã.

¹⁰ Israel pegua reta jou maemimba uyeyucacue isoo Tumpa jo ivi pegua pe uñemearendã pe. Yande vi ñanoi jocua maemimba uyeyucacue uñemearendã rami vae, jare jae reta ipuere'ã uñemirru yande ndive joco pe. ¹¹ Echa'ã sacerdote tenondegua güiraa maemimba uyeyucacue reta jugüi Lugar Santísimo japipe pe Israel pegua reta imbaeyoa reta re. Jayave ñru vae reta güiraa maemimba uyeyucacue reta isoo tenta reta güi ñana pe uapi. ¹² Jáeramo Jesús vi umano uiporara reve tenta guasu güi ñana pe, ñañeño tee vaerã Tumpa peguarã jae jugüi rupi. ¹³ Jáeramo yaeya yandeyugüi yandereco mai indechicue vae jare yaya

Jesucristo re, yepe tēi ĩru vae reta ñanererĩro güirĩro Jesús rami. ¹⁴ Echa'ã mbaeti ñanoi penti tenta guasu jaeño mai pegua oĩ vae cua ivi pe. Ęrei ñaãro ñaĩ jocua tenta guasu oĩta vae. ¹⁵ Jáeramo jecuaeño yambiadora Tumpa Jesús rupi, yambiyerovia vaerã Tumpa. Cua uipotã jei ñanemiari yave ĩru vae reta pe, yamimbeu chupe reta Tumpa regua. ¹⁶ Ęrei agũiyē ñaneatēi yayapo vaerã icavi vae jare ñamee vaerã mbaembae iparavete vae reta pe. Echa'ã cua yayapo yave, yambiyerovia Tumpa.

¹⁷ Piyapĩsaca cavi petenondegua reta iñee re jare piyapo jae reta jei peve piyapo vaerã vae. Echa'ã jae reta uyandareco oĩ perecove re, jare uicuaa Tumpa uãata co iparaviqui re. Jucuarãi piyapo yave, jae reta uparaviquita Tumpa pe uyerovia reve, ipiatiti mbae reve. Echa'ã ipiatiti reve uparaviqui yave Tumpa pe, ndarau icavi peve.

¹⁸ Piyerure Tumpa pe oreré. Echa'ã nduicuaa jecuaeño nduyapo icavi vae pecoti. Jecuaeño nduipota nduyapo jupi vae. ¹⁹ Jare che pumiñera ete piyerure vaerã Tumpa pe, jae chemondo ye vaerã imambae pepi.

Tumpa ndiveño toĩ

²⁰ Añave ayerure Tumpa mbiacatu umee yandave vae pe peré. YandeYa Jesús imbaepuere tuicha ete co, jare jae uyandareco yanderé penti ovecha reta iyandarecoa iovecha reta re uyandareco rami. YandeYa Jesús umano, Tumpa ipuere vaerã umee yandave itrato opa mbae vae. Jáeramo Tumpa umbijecove ye güeru umanocue vae reta ipite güi. ²¹ Tumpa tuparaviqui pepia pe, piyapo vaerã icavi vae, jare jucuarãi piyapo vaerã jei vae. Tumpa tuparaviqui pepia pe Jesucristo rupi, pe reta piyapo vaerã jocua umbiyerovia Tumpa vae. Jesucristo tuyembadoraca jaeño mai pegua. Amén.

²² Cherivi reta, che pumiñera pepiaguasu vaerã cua che jae peve piyapo vaerã vae re. Echa'ã mboviño aicutia peve cua tupapire pe. ²³ Tamimbeu peve cua: Yanderivi Timoteo oē ma peresoriru güi. Aramoi jae oota imambae pepi. Jare che aata jae jupie.

²⁴ Tumpa ndiveño toĩ opaete petenondegua reta jare opaete ĩru Tumpa oñono tee iyupeguarã vae reta. Italia pegua reta vi jei peve Tumpa ndiveño peĩ.

²⁵ Tumpa tumee opaete peve ipiacavi. Amén.

LA CARTA DE SANTIAGO

¹ Che co jae Santiago. Che co jae Tumpa jare yandeYa Jesucristo jembicuci. Aicuatía añ cua tupapire doce ati Israel pegua uñemíai ñugüinoi vae reta pe. Tumpa ndiveño peñ.

Aracuaa Tumpa umee vae

² Cheriví reta, amo pe yavai ete peve pico cavi vaerã Tumpa coti. Ërei jucuarãí yave, piyerovia eteño. ³ Echa'ã picuaa co quirãí mbaembae pemiavai vae uicuaaca peve ipirãta co pepurugüirovia. Jare cua picuaa yave, pepiaguasu ucuacuaa. ⁴ Ërei pemaño pepiaguasu re ucuacuaa cavi vaerã, pepiaguasu ete vaerã. Jucuarãí yave, ndarau mbae uata peve. Piyeyocui cavita Tumpa pe. ⁵ Ime yave quía aracuaa uata chupe vae, tuyerovia Tumpa pe jese. Echa'ã Tumpa uipota ete umee aracuaa penti penti pe. Ndarau uñeengata quía pe mbaeti aracuaa güinoi ramo. Umeeta co aracuaa chupe. ⁶ Ërei tuyerovia Tumpa pe jese mburugüirovia reve. Agüiye tuyerovia chupe jese mburugüirovia mbae reve. Echa'ã uyerovia chupe jese mburugüirovia mbae reve vae iaparoa i guasu pe oí vae rami co. Echa'ã ivitu uyepeyu yave, coti coti güiraa. ⁷ Jocuá uyerovia yandeYa Tumpa pe aracuaa re mburugüirovia mbae reve vae agüiye ipia pe tuyemingueta Tumpa umeeta co mbae chupe. ⁸ Echa'ã yepe tēi uyerovia Tumpa pe mbae re, Ërei güirovia'ã Tumpa umeeta co chupe. Jocuá nunga uicuaa'ã etei mbae uyapo vaerã.

⁹ Pentí upurugüirovia vae iparavete vae tuyerovia jeta Tumpa umee chupe vae re. ¹⁰ Ërei upurugüirovia vae icocatu vae tuyerovia Tumpa umimichi ramo. Echa'ã yepe tēi icocatu, Ërei umanota co penti mbaepoti umano rami. ¹¹ Guarasi jasi yave jare ivitu jacu ou yave, ñana ipiru jare mbaepoti reta umano. Ipõra'ã ma. Jae ramiño vi icocatu vae aramoño umanota.

Ipiaguasu vae uicuaata ipurugüirovia ipirãta co

¹² Tuyerovia ipiaguasu vae jocua mbaembae umbiavai vae ou chupe yave. Echa'ã uicuaata ipurugüirovia ipirãta co jare uñemeeta chupe tecove opa mbae vae. Echa'ã yandeYa jei umee vaerã tecove opa mbae vae opaete uau vae reta pe. ¹³ Ime yave quía yavai ete chupe ico cavi vaerã Tumpa coti vae, jare jocua jeco pegua uipota yave uyapo mbaeyoa, agüiye tei: "Tumpa uipota ayapo vaerã mbaeyoa." Echa'ã Tumpa uipota'ã etei uyapo mbaeyoa. Jae ramiño vi uipota'ã etei quía uyapo vaerã mbaeyoa. ¹⁴ Ërei penti penti ipiyemingueta icavi mbae vae rupi uipota uyapo mbaeyoa. Echa'ã jocua mbaeyoa icavi echa chupe uyapo vaerã. ¹⁵ Ipiayemingueta icavi mbae vae reta uyapoca mbaeyoa reta. Jae taicue rupi mbaeyoa upuruyuca.

¹⁶ Agüiye petavi, cheriví reta aau vae. ¹⁷ Tumpa umee mbaembae yandevē ipiacavi ramo, jare opaete umee yandevē vae icavi ete co. Jae uyapo tembipe jare uyepepica'ã etei. Jecuaño ipiacavi yandevē. ¹⁸ Tumpa uipota ramo, yandeapo tai retarã ñee añete vae rupi, ñaneño tee vaerã iyupeguarã, mbae yagüiye vae reta tenondegua vae Tumpa pe uñeño tee rami.

Piyapo ñee piyapisaca jese vae

¹⁹ Jáeramo, cheriví reta aau vae, penti penti tuipota ete tuyapisaca, agüiye tiñee rai, agüiye tipochi rai. ²⁰ Echa'ã pochi vae ndarau uyapo jupi vae Tumpa uipota tēi uyapo vaerã vae. ²¹ Jáeramo peeya opaete pichii vae jare opaete icavi mbae vae. Jare perovia piñemimichi reve ñee pepia pe uñeño vae. Echa'ã jucuarãí yave, piyembiasacata co.

²² Ërei piyapo ñee piyapisaca jese vae. Agüiye piyapisacaiño jese. Echa'ã piyapisacaiño yave ñee re, piyembitaviño co peñ. ²³ Ime yave quía ñee uyapisaca jese vae uyapo'ã vae - uyapisacaiño jese - jae co espejo pe vae uiae iyee vae rami. ²⁴ Yepe tēi uiae ma iyee, Ërei joco güi oo rupive ñacañi uyeecha vae güi. ²⁵ Ërei ime yave quía jecuaño mboroyocui icavi ete vae oporoyora vae re uyapisaca cavi vae, ñacañi'ã yave uyapo vaerã mboroyocui jei vae uyapisaca jese yave, Tumpa umivendiseta uyapo ramo.

²⁶ Ime yave quía mbaembae uyapo vae rupi Tumpa pe uyeyocui echa vae, tuñemoa cavi mbae jei vae re. Echa'ã uñemoa cavi'ã yave mbae jei vae re, uyembitavi co oí, jare mbaembae uyapo vae umbiyerovia'ã etei Tumpa. ²⁷ Añetete yaipota yave yayapo mbaembae yayeyocui vaerã yandeRu Tumpa pe, yaa yapou tirēi reta jare cuña ime umano vae reta uiporara ñugüinoi vae ipi, jare agüiye yayapo icavi mbae vae upurugüirovia mbae vae reta uyapo vae.

2

Icocatú vae reta jare iparavete vae reta

¹ Cheriví reta, pe reta perovia yandeYa Jesucristo re. Jae uyembíadoraca ma. Jáeramo agüiye piparavo pipiu vaerã icocatú vae reta jare períro vaerã iparavete vae reta. ² Aramoi uiqueta piyembatia pe cuimbae icocatú vae jare cuimbae iparavete vae. Cuimbae icocatú vae jemimonde ipõra ete jare güinoi ipoãcaregua oro pegua vae. Ërei cuimbae iparavete vae jemimonde indechi ete. ³ Pemae cavi yave jemimonde ipõra ete vae re jare pere yave chupe: “Eguapi cua pe. Cua tenda icavi co”; jare pere yave iparavete vae pe: “Iyemboi joco pe”; ani: “Eguapi ivi pe”, ⁴ pipiu co peĩ jocua icocatú vae jare períro co peĩ iparavete vae. Icaviã jucuarã pepuruyapo vaerã. Icavi mbae co pepia pe piyemingueta.

⁵ Piyapisaca cheré, cheriví reta aau vae. Tumpa uiparavo iparavete vae reta icocatú vaerã ipurugüirovia re jare güinoi vaerã imbaerã iporoyocua pe. Echa'ã jocua Tumpa jei umeeta opaete uau vae reta pe. ⁶ Ërei pe reta períro iparavete vae reta. Picuaa co quirã icocatú vae reta uyembíiye pembaembae re jare ñeapo peré. ⁷ Tumpa preparavo Jesucristo jee re. Ërei picuaa co quirã icocatú vae reta jei icavi mbae vae jocua tee icavi vae coti.

⁸ Tumpa ñee pe uyecuatía oĩ cuarã: “Eau nderapicha nde ndiyerau rami.” Cua co jae mboroyocui Tumpa iporoyocua pegua. Piyapo yave cua mboroyocui, piyapo co icavi vae. ⁹ Ërei piparavo yave pipiu vaerã icocatú vae reta jare períro vaerã iparavete vae reta, piyapo mbaeyoa. Echa'ã mboroyocui uicuaaca peve piyavi co mboroyocui. ¹⁰ Ime yave quía opaete mboroyocui jei vae uyapo cavi vae, penti uyavi yave, uyavi ma opaete mboroyocui. ¹¹ Mboroyocui pe uyecuatía oĩ cuarã: “Agüiye iyuvanga menda re.” Ërei jae ramiño vi uyecuatía oĩ cuarã: “Agüiye epuruyuca.” Aramoi nde ndiyuvanga'ã menda re. Ërei ndepuruyuca yave, ndiyavi ma mboroyocui. ¹² Tumpa perãata mboroyocui oporoyora vae rupi. Jáeramo piyemingueta cavi jare piyapo icavi vae. ¹³ Echa'ã ime yave quía uiparareco'ã japicha vae, Tumpa uãata uiparareco mbae reve, yepe tẽi Tumpa upuruparareco uyerovia reve upuruãa yave.

Mburugüirovia jare mboroyocui jei vae

¹⁴ Cheriví reta, aramoi quía jei güinoi co mburugüirovia, Ërei uyapo'ã mboroyocui jei vae. Jucuarã yave, ipurugüirovia mbae'ã co. Ndarau uyembiasaca ipurugüirovia rupi. ¹⁵ Aramoi penti periví ani penti perindí mbaeti güinoi jemimonderã jare jemiurã. ¹⁶ Pere yave chupe: “Tumpa reño ecua”, Ërei pemee'ã yave chupe mbaembae uata chupe vae, jocua pere vae mbae'ã co. ¹⁷ Jae ramiño vi piyapo'ã yave mboroyocui jei vae, jaeño mburugüirovia penoi, jare jocua mbae'ã co.

¹⁸ Aramoi quía jeita: “Nde ndere nenoi co mburugüirovia jare che jae ayapo mboroyocui jei vae.” Nde ndepuere'ã ndicuaaca cheve ndepurugüirovia. Echa'ã ndiyapo'ã mboroyocui jei vae. Ërei che aicuaacata ndeve chepurugüirovia mboroyocui jei vae ayapo vae rupi. ¹⁹ Nde nderovia ime co pentiño Tumpa. Icavi co jocua nderovia vaerã. Ërei añã reta vi güirovia jocua. Ërei jae reta uriví uquiye ramo. ²⁰ Nde co jae iyaracuaa mbae vae. ¿Ndiporta pa aicuaaca vaerã ndeve quirã ndepurugüirovia mbae'ã co, ndiyapo'ã yave mboroyocui jei vae? ²¹ Nemandúa yandetenondegua Abraham re. Jae uyembujupica uyapo vae re, umeet tai Isaac Tumpa pe ñemeearenda pe yave. ²² Ndepuere ndicuaa quirã Abraham ipurugüirovia uyapoca chupe Tumpa jei chupe uyapo vaerã vae. Abraham uyapo vae uicuaaca icavi ete co ipurugüirovia. ²³ Jare uyeyapo Tumpa ñee pe uyecuatía oĩ vae. Echa'ã uyecuatía oĩ cuarã: “Abraham güirovia Tumpa, jare Tumpa umbujupi ipurugüirovia jeco pegua. Jare Abraham uyembijee Tumpa iamigo pe.” Jucuarã uyecuatía oĩ. ²⁴ Jáeramo pepuere picuaa quirã Tumpa umbujupi mboroyocui jei vae uyapo vae. Umbujupi'ã mburugüiroviaño güinoi vae.

²⁵ Jae ramiño Rahab aguasa rupi ico vae uyembujupica uyapo vae re, Israel pegua reta Josué omondo vae re umaefio upita vaerã jenta pe yave jare omondo ye ambie tape rupi yave.

²⁶ Penti jete tecove mbaeti güinoi vae umano ma co. Jae ramiño vi ndepurugüirovia mbae'ã co, ndiyapo'ã yave mboroyocui jei vae.

3

Ñanecü

¹ Cheriví reta, agüiye pipota opaete piyeyapo vaerã oporomböe vae retarã. Echa'ã picuaa quirã oporomböe vae reta uyavi yave, uyembijeco ete ñru vae reta güi. ² Echa'ã yande opaete yayavi. Ime yave quía uyavi'ã jei vae re vae, jae icavi ete co. Jocua nunga güinoi mbaepuere opaete jete re. ³ Mase, ñañoño cavayu reta iyuru pegua iyuru pe, jae reta

yugüiraa vaerã yaipota vae coti. Jucuarã yandepuere yarovarova cavayu reta. ⁴ Jae ramiño vi yepe tẽi chalana guasu reta tuicha ete jare yepe tẽi amo pe ivitu tanta vae güiraa i guasu rupi, yepe tẽi chalana guasu itimón michi ete, ãrei pipe chalana guasu uruguata vae ipuere güirovarova chalana guasu jae uipota vae coti. ⁵ Jae ramiño vi ñanecũ michi co, ãrei pipe yandepuere yayembicate ete.

Penti tata michi ete jendi vae ipuere uapi ñuu guasu. ⁶ Jare ñanecũ penti tata rami co. Uyapoca jeta ete icavi mbae vae. Yepe tẽi yanderete pegua co, ãrei uyapo icavi mbae vae opaete yanderete pegua pe. Echa'ã tata mbaembae uapi rami, ñanecũ uyapoca yandevẽ icavi mbae vae. Jare cua icavi mbae vae ou cañitei güi etei. ⁷ Ivi pegua reta umimaso ma ipotave maemimba reta, jare güira reta, jare mboi reta, jare jevae i rupigua reta. Güinoi reta mbaepuere umimaso vaerã. ⁸ ãrei yandepuere'ã etei ñamimaso ñanecũ. Yandepuere'ã jese. Jecuaeño uyapoca yandevẽ jeta ete icavi mbae vae. Imbayachi ete vae rami co. ⁹ Ñanecũ pe yambiadora yandeRu Tumpa. Jae ramiño vi ñanecũ pe yayepipeyu ñru vae reta re, yepe tẽi Tumpa uyapo reta jae etei rami. ¹⁰ Ñanecũ pe yambiadora Tumpa jare yayepipeyu ñru vae reta re. Cherivi reta, icavi'ã yayapo vaerã cuarã. ¹¹ I icavi vae jare i iro vae ipuere'ã etei oẽ penti icua i oẽ vae güiño. ¹² Iva ipuere'ã etei umee saini reta. Jae ramiño vi uva ipuere'ã etei umee ìva reta. Jae ramiño vi penti icua i oẽ vae ipuere'ã etei umee i icavi vae jare i iro vae.

Piyerure Tumpa pe aracuaa re

¹³ Ime yave quia pepite pe iyaracuaa vae, tuico cavi. Jucuarã yave, icavi vae uyapo vae uicuaacata quirã iyaracuaa co uñemimichi reve. ¹⁴ ãrei peacatãa yave ñru vae reta re jare pepochi yave chupe reta, agüiye piyembicate. Echa'ã piyembicate yave, peapu co. Piyapo'ã pei añete vae rupi. ¹⁵ Jucuarã piyapo yave, piyerure'ã pei Tumpa pe umee vaerã peve aracuaa. Pico upurugüirovia mbae vae reta yugüireco rami. Pico pere vae reño. Pico añã reta yugüireco rami. ¹⁶ Echa'ã peacatãa yave ñru vae reta re jare pepochi yave chupe reta, piñerãrota uyupii jare piyapota opaete mbae icavi mbae vae. ¹⁷ ãrei piyerure yave Tumpa pe umee vaerã peve aracuaa, ndarau piyapo pichii vae. Pepiacatuta co. Pepiaguasuta co. Piyapota co Tumpa uipota piyapo vaerã vae. Pipararecota co opaete vae. Pepiacavita co. Pepirãta co pepurugüirovia re. Ndarau pepurumbitavi. ¹⁸ Pe reta penoi yave mbiacatu, pico pepiacatu reve. Jucuarã yave, piyapota jupi vae.

4

Cua ivi pegua iamigo oyovaicho Tumpa ndive

¹ ¿Maera pa piñerãro uyupii? Tamimbeu peve. Piñerãro uyupii, ime ñugüinoi icavi mbae vae pepia pe ramo. ² Pipota tẽi mbaembae, ãrei penoi'ã. Pepuruyuca jare jecuae pipota tẽi mbaembae, ãrei pepuere'ã penoi. Piñerãro uyupii. ãrei penoi'ã, piyerure'ã Tumpa pe jese ramo. ³ Piyerure tẽi mbaembae re Tumpa pe, ãrei jae umee'ã peve. Piyerure cavi'ã. Echa'ã piyerure mbaembae re piporu vaerã pepia jei vae reño. ⁴ Pe reta menda re uyuvanga vae reta rami co. ¿Picuaa'ã pa quirãi cua ivi pegua iamigo oyovaicho Tumpa ndive? Jáeramo pipota yave piyeyapo ivi pegua iamigorã, piyeyapota co Tumpa jovaichorã. ⁵ Añete vae co cua Tumpa ñee pe uyecuatia oĩ vae: “Espíritu Santo yandepia pe ico vae yanderau ete.” Jucuarã uyecuatia oĩ. ⁶ ãrei Espíritu Santo umee yandevẽ jeta ete ipiacavi. Echa'ã Tumpa ñee pe uyecuatia oĩ cuarã: “Tumpa oyovaicho uyembicate vae reta ndive. ãrei umee ipiacavi uñemimichi vae reta pe.” Jucuarã uyecuatia oĩ.

⁷ Jáeramo piyapo Tumpa uipota piyapo vaerã vae. Piñerãro añã guasu ndive, jare jae osita pegüi. ⁸ Peya Tumpa re jare Tumpa oyata peré. Pe reta co jae iyoa vae reta. Agüiye ma piyapo pichii vae. Piyoe pepia agüiye vaerã penoi pepiyemingueta icavi mbae vae. ⁹ Pepiatiti jare piyao. Pepiatiti pepuca vaerãve. Pepiatiti piyerovia vaerãve. ¹⁰ Piñemimichi yandeYa jovai, jare jae pemptuichacata.

Agüiye pere icavi mbae vae uyucoti

¹¹ Cherivi reta, agüiye pere icavi mbae vae uyucoti. Ime yave quia jei icavi mbae vae tivi coti vae, uãa co oĩ tivi. Jocua nunga jei oĩ icavi mbae vae mboroyocui coti jare uãa co oĩ mboroyocui. ãrei neãa yave mboroyocui, ndiyapo'ã mboroyocui jei vae. Jaeño neãa mboroyocui. ¹² Jaeño Tumpa umee mboroyocui jare ipuere upuruãa. Jae ipuere upurumbiasa jare ipuere upurumbai. Nde ndepuere'ã etei ndepuruãa.

Picuaa'ã mbae ra uyeyapota piareve pe

¹³ Piyapisaca michi pegua cua re. Echa'ã pe reta pere cuarã: “Añave ani curiye yaata jocua tenta guasu pe, jare yaicota joco pe penti año pegua. Yaguata mbaembae jare ñameeta mbaembae ñamingana vaerã corepoti.” Jucuarã pere. ¹⁴ ãrei pe reta picuaa'ã mbae ra

uyeyapota piareve pe. Picuaa'ã imeñota ra peĩ piareve pe. Echa'ã perecove ivĩti rami co. Uyecuaa michi peguaño. Jayave imambae mbaeti ma oĩ. ¹⁵ Jáeramo pereta tẽi cuarãi: “YandeYa uipota yave, yaicota joco pe jare yayapota jocua jocua.” Jucuarãi pereta tẽi. ¹⁶ Pere'ã yave jucuarãi, piyembicate co peĩ pe reta etei piyapota vae re. Jare jucuarãi piyembicate yave, piyapo icavi mbae vae.

¹⁷ Jáeramo picuaa yave mbae icavi piyapo vaerã vae, piyapo'ã yave, peyoa co.

5

Icocatú vae icavi mbae vae uyapo vae reta

¹ Piyapisaca michi pegua, picocatú vae reta. Piporara eteta co. Jáeramo piyao pesapicai reve. ² Jeta ete penoi vae jepita'ã mbae ave, jare cupiĩ reta urucumeguata peremimonde ipõra ete vae reta. ³ Oro jare corepoti penoi vae opata iyuquiri. Jare jocua uicuaacata pe reta piyapo co icavi mbae vae. Jáeramo piporarata co, tata yanderapi yave yaiporara rami. Picocatú co. Ërei ndarau penoi ara reta piyerovia vaerã jeta ete penoi vae re. ⁴ Mase, uparaviqui peve vae reta umbaeviro peco reta pe, ërei pemiẽpi'ã chupe reta. Jae reta iñeengueta peve. Jare yandeYa uyandu ma quirãi iñeengueta peve jocua umbaeviro vae reta. ⁵ Cua ivi pe pico rambueve, piyecou tembiu icavi vae pe jare piporu pecorepoti piyapo vaerã jeta icavi mbae vae. Piyeminguira ma co. Ërei imambae pemanota. ⁶ Pe reta pemiẽjeco jocua jupi vae jare piyuca vi. Jare jae ipuere'ã uyerepi pegüi.

Pepiaguasu jare piyerure Tumpa pe

⁷ Jáeramo, cherivi reta, pepiaguasu yandeYa ou ye regua. Tamijaanga umaeti vae. Umaeti yave, uãro ima güinoi vaerã mbaeviro. Ipiaguasu ete. Echa'ã oquiñoi yave, temiti ucuacuaa jare yagüiye. ⁸ Jae ramiño vi pe reta pepiaguasu. Jecuaeño piñemiatangãtu. Echa'ã uyaro ma yandeYa ou ye vaerã.

⁹ Agüiye piñeenguru piyupe, cherivi reta. Echa'ã piñeenguru yave piyupe, piyemiẽjecota. Echa'ã upuruãa vae imambae outa uvãe. ¹⁰ Cherivi reta, pemandúa Tumpa iñee aracae umimbeu vae reta re. Jae reta imiari ñru vae reta pe yandeYa jee re. Jae reta uicuaaca yandevẽ quirãi yaiporara yave, icavi co ñamiaguanta vaerã yandepiaguasu reve. ¹¹ Añete co, yande yae uyerovia ma co jucuarãi umiaguanta vae reta. Picuaa co quirãi Job ipiaguasu ete, jare quirãi yandeYa umivendise ete taicue rupi. Echa'ã yandeYa yanderau jare yandeparareco ete.

¹² Ërei, cherivi reta, agüiye mbae pere ara jee re ani ivi jee re ani mbae jee re ave. Pere “añete co” ani “añete'ã co.” Uasa pere yave, peyoata co jare Tumpa perãata co.

¹³ Ime yave quia pepite pe uyemipia'ã oĩ vae, tuyerure Tumpa pe. Ime yave quia pepite pe uyerovia vae, tumbiadora Tumpa canta pe. ¹⁴ Ime yave quia pepite pe imbaerasi vae, tueni upurugüirovia vae reta itenondegua reta. Jayave jae reta toñoño aceite imbaerasi vae re yandeYa jee re, jare tuyerure Tumpa pe jese. ¹⁵ Jare mburugüirovia reve uyerure reta yave, imbaerasi vae ucuerata. Echa'ã yandeYa umbigüerata. Jare imbaerasi vae uyapo yave mbaeyoa reta, Tumpa umbiasata chupe. ¹⁶ Peyoa yave uyucoti, pemimbeu piyupe. Jayave piyerure piyee Tumpa pe, Tumpa pemiẽgüera vaerã. Penti jupi vae uyerure yave ipia reve, Tumpa uyapota jeta ete chupe. ¹⁷ Elías co jae penti ivi pegua yande rami. Ërei jae uyerure ipia reve Tumpa pe agüiye vaerã oqui. Jare oqui'ã etei mbapi año jare seis yasi. ¹⁸ Jayave Elías uyerure ye Tumpa pe jare uyemiẽpi oqui jare temiti ucuacuaa ye.

¹⁹ Cherivi reta, ime yave quia pepite pe añete vae güi opia vae, jare ñru vae ombori yave umiñatima ye vaerã añete vae pe, ²⁰ picuaa cua: Jocua oporombori vae uepi opia vae jecove mano güi, jare jucuarãi ombori ramo, Tumpa umbiasata opia vae pe opaete imbaeyoa.

PRIMERA CARTA DEL APOSTOL SAN PEDRO

¹ Che co jae Pedro. Che co jae Jesucristo jemimondo. Aicutía aĩ cua tupapire opaete Israel pegua Ponto jare Galacia jare Capadocia jare Asia jare Bitinia rupi uñemai vae reta pe. ² YandeRu Tumpa preparavo jare ndei ivi uyeyapo mbove uicuaa pe reta piyeyapota co tai retarã. Jare Espiritu Santo peñono tee Tumpa peguarã. Oyoe ma pepia Jesucristo jugüi pe. Jáeramo añave piyapo Tumpa uipota piyapo vaerã vae. Tumpa tumee peve jeta ete ipiacavi jare ipiacatu.

Ñãro ñãiyayerovia reve

³ Tuyembadoraca Tumpa. Jae co yandeYa Jesucristo Tu. Jae yandeparareco ete. Jáeramo yandeyapo tai retarã. Jare Jesucristo icove ye ou umanocue vae reta ipite güi ramo, añave ñãro ñãiyayerovia reve. ⁴ Tumpa uñuvatu ma peve ara pe pembaerã. Jocua icavi ete co. Ipuere'ã etei uyepepica jare ndarau etei opa. ⁵ Jare imbaepuere pe Tumpa uyandareco oĩ peré perovia jese ramo. Jáeramo piyembiasacata. Cua uyecuaata ara taicuegua reta pe.

⁶ Jáeramo piyerovia ete cua re, yepe tẽi aramoi añave michi pegua pepiatiti mbaembae yavai peve vae jeco pegua. ⁷ Echa'ã cua mbaembae yavai peve vae uicuaacata peve ipirãta ra pepurugüirovia. Oro yambichiriri tata pe, yandepuere vaerã yamombo chugüi iquiacue, ipõra ete oĩ vaerã oro, yepe tẽi oro opata. Jae ramiño vi Tumpa uipota ipirãta ete vaerã pepurugüirovia. Echa'ã pepurugüirovia icavi ete Tumpa pe oro güi. Jare pepurugüirovia ipirãta yave, piyembutuichaca eteta co Jesucristo uyecuaa ye yave. ⁸ Yepe tẽi peecha'ã Jesucristo, ãrei peau. Yepe tẽi añave peecha'ã, ãrei perovia jese. Jáeramo piyerovia ete. Tumpa etei umee peve cua yerovia, jare yavai pemimbeu cavi vaerã ñru vae reta pe cua yerovia regua. ⁹ Jare perovia Jesucristo re ramo, Tumpa umeeta peve piyembiasaca vaerã.

¹⁰ Tumpa iñee araca umimbeu vae reta uicutía mbiacavi Tumpa umeeta peve vae re. Jae reta uipota ete uicuaa yembiasa uñemeeta peve vae regua, jare upirandu ete uyupe jese. ¹¹ Cristo iEspiritu ico jae reta ipia pe jare umimbeu ndei uyeyapo mbove quirãi Cristo uiporarata jare quirãi taicue rupi uyembadoracata. Jare jae reta upirandu tẽi uyupe mbae ra uipota jei Espiritu Santo jare quirãi yave ra uyeyapota. ¹² Tumpa uicuaaca chupe reta jocua uicutía vae yandeve peguarã co - iyupeguarã'ã co. Jare Jesucristo ombou Espiritu Santo ara güi jemimondo reta pe, jae reta umimbeu vaerã peve ñee icavi vae. Jare ángel reta uipota ete uicuaa cua mbaembae regua.

Pico peyoya mbae reve

¹³ Jáeramo pepia pe piyemingueta cavi cua re. Piñemoa. Jecuaeñoi peãro piyerovia reve mbiacavi Jesucristo uyecuaa ye yave uñemeeta peve vae. ¹⁴ Pe reta co jae Tumpa tai reta. Jáeramo piyapo jae uipota piyapo vaerã vae. Tenonde yave pico pe pere vae reño, picuaa'ã Tumpa ramo. Agüiye ma pico jucuarãi. ¹⁵ Tumpa preparavo, jare Tumpa iyoa mbae vae co. Jáeramo opaete mbae piyapo vae pe pico peyoya mbae reve. ¹⁶ Echa'ã Tumpa iñee pe uyecuatía oĩ cuarã: "Pico peyoya mbae reve" —jei Tumpa—. "Echa'ã che co jae iyoa mbae vae." Jucuarãi uyecuatía oĩ.

¹⁷ Jare pemandúa quirãi piyerure yandeRu pe yave, piyerure peĩ uau'ã penti vaeño ñru vae güi vae pe. Jae upuruãata opaete vae uyapo vae rupi. Jáeramo cua ivi pe pico rambueve, pequiye chugüi. ¹⁸ Tenonde yave pe reta pico petenondegua reta iyemboe rupi. Ërei mbaerã'ã co pico. Añave Tumpa perepi jocua güi. Ërei piyerepi'ã corepoti jare oro pe. Echa'ã corepoti jare oro opata co. ¹⁹ Tumpa perepi Cristo jugüi pe. Jocua jugüi icavi ete Tumpa pe. Echa'ã Cristo uñeme mano vaerã, Israel pegua reta penti ovecha-rai icavi ete vae umee Tumpa pe rami. ²⁰ Tumpa uiparavo Cristo umano vaerã ndei ivi uyeyapo mbove. Ërei cua ara taicuegua reta pe ramo Cristo ou ivi pe mano vaerã peré. ²¹ Jare pe reta perovia Tumpa re Cristo jeco pegua. Echa'ã Tumpa umbijecove ye Cristo güeru umanocue vae reta ipite güi jare umbiadoraca ma. Añave perovia ma Tumpa re, jare pepuere peãro piyerovia reve jae perepi ete vaerã.

²² Espiritu Santo pembedori perovia vaerã añete vae. Jáeramo añave pepia uyeyoe jare cua jeco pegua añetete piyerau. Jáeramo jecuaeño piyerau opaete pepia reve. ²³ Penoi ma tecove ipiau vae. Cua nunga tecove ou'ã peru jare pesi güi. Echa'ã tecove jae reta umee peve vae opata. Ërei tecove ipiau vae ndarau etei opa. Penoi tecove ipiau vae Tumpa iñee rupi. Tumpa iñee jecuaeño umee tecove jare ndarau etei opa. ²⁴ Tumpa iñee pe uyecuatía oĩ cuarã:

"Ivi pegua reta temiti reta rami co.
Echa'ã temiti ipoti yave, ipõra co.

Ērei temiti umano yave, umano vi ipoti.

Jae ramiño vi yepe tēi ivi pegua reta uyembutuicha, ěrei opata co ipirāta.

²⁵ Ērei yandeYa iñee ndarau etei opa.”

Jucuarāi uyecuatía oī. Jare cua co jae ñee icavi vae ĩru vae reta umimbeu peve vae.

2

¹ Jáeramo agüiye piyapo icavi mbae vae. Agüiye piyembitavi. Agüiye piñecatāa. Agüiye pendayepota. ² Sambiai oa ramo vae reta jou neche jare jucuarāi ipirāta. Jae ramiño vi pequirēi reve piyemboe Tumpa iñee re pepirāta vaerā pepurugüirovia re. ³ Echa'ā picuaa ma yandeYa ipiacavi co peve.

Ita icove vae

⁴ Jecuaeño peya yandeYa re. Jae co jocua ita icove vae. Ivi pegua reta omombo jocua ita. Ērei Tumpa uiparavo. Echa'ā uau ete. ⁵ Jae ramiño vi pe reta co jae ita icove vae reta rami. Piyeyapo ma penti tenta Espiritu Santo uyapo oī vae rami. Tumpa peñono tee iyupeguarā. Piyeyapo ma sacerdote retarā. Echa'ā sacerdote reta Israel pegua umee Tumpa pe maemimba uyeyucacue reta. Jae ramiño vi pe reta piyapo Espiritu Santo uipota piyapo vaerā vae. Jucuarāi yave, pembiyeroviata Tumpa Jesucristo rupi. ⁶ Echa'ā Tumpa iñee pe uyecuatía oī cuarāi:

“Mase” —jei Tumpa—, “añono Jerusalén pe ita tenondegua vae.

Che aiparavo jare aau.

Güirovia jese vae ndarau etei jei: ‘Agüiyeta tēi arovia jese.’ ”

Jucuarāi uyecuatía oī. ⁷ Pe reta peau, perovia jese ramo. Ērei güirovia'ā jese vae reta pe tae cua Tumpa iñee pe uyecuatía oī vae:

“Ita tenta iyapoa reta omombo vae uyeyapo ma ita tenondegua vae.

⁸ Jae co penti ita ivi pegua reta ipisapāa jese vae rami.

Uyepiaca reta jocua ita re.”

Jucuarāi uyecuatía oī. Echa'ā jae reta uicuaa cavi'ā Tumpa iñee, güirovia'ā Jesucristo re ramo. Tumpa uipota jucuarāi uyeyapo vaerā.

Pe reta co jae Tumpa uiparavo vae reta

⁹ Ērei pe reta co jae Tumpa uiparavo vae reta. Pe reta piyeyocui Tumpa pe iporoyocua pe. Tumpa peñono tee iyupeguarā pico vaerā jae imbaerā. Jucuarāi Tumpa uyapo pe reta pemimbeu vaerā ĩru vae reta pe quirāi Tumpa ipiacavi co jare quirāi jae preparavo pico vaerā jae jembipe icavi ete vae pe, agüiye vaerā pico pītumimbi pe. ¹⁰ Tenonde yave pe reta Tumpa jentarā reta'ā co. Ērei piyeyapo ma Tumpa jentarā retarā. Tenonde yave Tumpa preparareco'ā. Ērei añave preparareco.

Piyeyocui cavi Tumpa pe

¹¹ Cherivi reta, pe reta pico'ā upurugüirovia mbae vae reta yugüireco rami, jare michi peguaño picota cua ivi pe. Jáeramo agüiye pico pe pere vae reño. Echa'ā perete perecove jovaicho co. ¹² Piyapo icavi vae upurugüirovia mbae vae reta ipite pe. Echa'ā jucuarāi piyapo yave, yepe tēi jae reta jei icavi mbae vae pecoti, ěrei uechata icavi vae piyapo vae, jare jocua jeco pegua umbiadorata reta Tumpa, ou uvāe yave ara Tumpa uāa reta vaerā.

¹³ Piyapo opaete ivi pegua mboroyocui reta. Echa'ā cua yandeYa jei vae co. Jáeramo piyapo peruvicha guasu jei peve piyapo vaerā vae. Echa'ā jae co opaete perentaigua reta juvicha guasu. ¹⁴ Piyapo vi peruvicha reta jei peve piyapo vaerā vae. Echa'ā peruvicha guasu ombou reta peve uiporaraca vaerā icavi mbae vae uyapo vae reta pe jare umbutuichaca vaerā icavi vae uyapo vae reta. ¹⁵ Iyaracuaa mbae vae reta jei icavi mbae vae pecoti, pecuaa'ā ramo. Jáeramo piyapo icavi vae agüiye vaerā ipuere reta jei jucuarāi. Echa'ā cua co jae Tumpa jei vae. ¹⁶ Tumpa perepi ma mbaeyoa güi. Ērei agüiye piyapo icavi mbae vae Tumpa perepi ma mbaeyoa güi ramo. Echa'ā Tumpa perepi mbaeyoa güi, piyeyocui vaerā chupe. ¹⁷ Pipiu opaete vae. Peau opaete upurugüirovia vae reta. Pequiye Tumpa güi. Pipiu peruvicha guasu.

¹⁸ Che tae uyeyocui vae reta pe cua: Piyapo pepatrón jei peve piyapo vaerā vae pipiu reve. Amocue pepatrón reta ipiacavi jare ipiaguasu peve. Ērei yepe tēi amocue pepatrón reta uyapo icavi mbae vae peve, ěrei jeseve piyapo jei peve piyapo vaerā vae. ¹⁹ Piyapo yave picuaa Tumpa uipota piyapo vaerā vae, jare piporara yave jocua jeco pegua, pembiyeroviata Tumpa. ²⁰ Ērei piyapo yave icavi mbae vae, pepatrón uiporacata peve. Jare yepe tēi piporara pepiaguasu reve, ěrei ndarau piyembutuichaca. Ērei pepatrón uiporaraca yave peve, yepe tēi piyapo icavi vae, piporara yave pepiaguasu reve, pembiyeroviata Tumpa. ²¹ Echa'ā cuarā Tumpa preparavo. Echa'ā Cristo uiporara peré, pe

reta piyapo vaerã jae uyapo rami. ²² Echa'ã Cristo iyoa'ã. Upurumbitavi'ã etei. ²³ Yepe tēi ĩru vae reta jei icavi mbae vae icoti, ěrei Cristo jei'ã icavi mbae vae icoti reta. Uiporara oĩ yave, jei'ã uiporaracata co uiporaraca chupe vae reta pe. Jaeño oĩono Tumpa ipo pe. Echa'ã uicuaa Tumpa upuruãa jupi vae rupi. ²⁴ Cristo etei güiraa yanembaeyoa reta jete re jocua curusu re, yande ñamano vaerã mbaeyoa reta güi jare yaico vaerã jupi vae re. Jae umano ramo, yande ñanoi tecove opa mbae vae. ²⁵ Echa'ã tenonde yave pe reta pepia Tumpa güi, ovecha reta tape güi opia rami. Ěrei añave peyu ye ma uyandareco perecove re vae pe, ovecha reta yugüeru ye iyandarecoa pe rami.

3

Umenda vae reta tuyugüireco cavi uyupii

¹ Jae ramiño vi cuña reta tuyeyocui ime pe. Echa'ã jucuarãi yave, yepe tēi ime güirovia'ã Tumpa iñee, ěrei aramoi jembireco ipuere güiroviaca ime pe Tumpa iñee umimbeu'ã chupe reve. Echa'ã ime uechata quirãi icavi ico jembireco. ² Uechata quirãi jembireco ico cavi uipiu reve, jare quirãi uyapo'ã mbae pichii vae. ³ Cuña reta agüiye tuipota tuñemopõra ete mbaembae jete re uyecuaa vae peño. Echa'ã amocue cuña reta uyapicatu cavi ia jare oĩono iyee mbaembae oro pegua vae jare omonde temimonde jepi ete vae uñemopõra vaerã. ⁴ Ěrei cuña reta tuipota tuñemopõra icavi vae ipia pe oĩ vae pe. Echa'ã jocua mbaembae jete re oĩ vae opata co. Ěrei icavi vae ipia pe oĩ vae ndarau opa. Jáeramo tuñemimichi jare agüiye tuñeengata ime pe. Echa'ã cua icavi ete Tumpa pe. ⁵ Aracae yave cuña güirovia Tumpa re vae reta uñeño tee Tumpa peguarã, jare jae reta vi uñemopõra icavi vae ipia pe oĩ vae pe. Echa'ã jae reta vi uyeyocui ime pe. ⁶ Sara uyeyocui Abraham pe jare jei chupe: “Cheya.” Jáeramo cuña añave güirovia Tumpa re vae reta Sara rami co, icavi vae uyapo reta yave. Jare jucuarãi uyapo yave, ndarau uquiyee mbaembae güi.

⁷ Jae ramiño vi cuimbae reta tuyugüireco cavi jembireco ndive. Tuyandareco cavi jese jare tumbutuicha. Timandúa quirãi cuimbae ipirãta ete cuña güi. Echa'ã Tumpa uyapo cuimbae jare jembireco penti ramiño jare umee mocui reve pe yugüireco vaerã ipiacavi rupi. Cuimbae reta jucuarãi yugüireco yave, Tumpa uyapisacata iyerure reta re.

Pico cavi uyupii

⁸ Cuaño ma tamimbeu ye peve. Pico cavi penti ramiño. Pepiacavi piyupe. Piyerau. Piyeparareco. Piñemimichi. ⁹ ĩru vae uyapo yave icavi mbae vae peve, agüiye piyapo icavi mbae vae chupe. Jae ramiño vi ĩru vae uñeengata yave peve, agüiye piñeengata chupe. Piñeengata vaerãve piyerure Tumpa pe jese, Tumpa uyapo vaerã icavi vae chupe. Echa'ã cuarã Tumpa peparavo, ipuere vaerã uyapo icavi vae peve vi. ¹⁰ Tumpa iñee pe uyecuatiã oĩ cuarãi:

“Pipota yave pico cavi pepiacatu reve,
agüiye pere icavi mbae vae quía pe,
jare agüiye peapu quía re.

¹¹ Agüiye piyapo icavi mbae vae.

Jaeño piyapo icavi vae.

Jecuaeño pipota pico cavi pepiacatu reve.

¹² Echa'ã yandeYa jecuaeño uma jupi vae reta re, jare uyapisaca iyerure reta re.

Ěrei uma'e'ã icavi mbae vae uyapo vae reta re.”

Jucuarãi uyecuatiã oĩ.

¹³ Ndarau ndipo quía uipota uyapo icavi mbae vae peve, pe reta icavi vae jecuaeño piyapo yave. ¹⁴ Ěrei piporara yave jupi vae piyapo ramo, piyerovia. Aramoi ĩru vae reta uipotata peminguiye. Ěrei agüiye pequiyee chugüi reta. Agüiye piyemambeco jese.

¹⁵ Pemiadora Cristo pepia pe. Echa'ã jae co yandeYa. Jare ime yave quía upirandu peve maera ra peãro pei piyerovia reve vae, jecuaeño piñemicuatiro pemimbeu vaerã chupe piñemimichi jare pipiu reve. ¹⁶ Agüiye piyapo mbae picuaa agüiyeta tēi piyapo vae. Jucuarãi yave, ĩru vae reta jei yave icavi mbae vae pecoti, imarata co iyapu peré vae re. Echa'ã uicuaata quirãi piyapo icavi vae Cristo re perovia ramo. ¹⁷ Tumpa uipotata yave, aramoi piporarata icavi vae piyapo vae jeco pegua. Ěrei cua icavi co. Icavi'ã co piyapo yave icavi mbae vae jare piporara yave jocua jeco pegua. ¹⁸ Cristo vi penti veseño uiporara yanembaeyoa reta re. Jae co jupi vae, ěrei uiporara jupi mbae vae reta imbaeyoa reta re. Jare jucuarãi uiporara yanembipiacatu vaerã Tumpa ndive. Ěrei yepe tēi ĩru vae reta uyuca, ěrei Espiritu Santo umbijecove ye güeru umanocue vae reta ipite güi. ¹⁹ Jayave Cristo oo espíritu rupi uñemimiche umanocue vae reta ipereso ñugüinoi vae pe. ²⁰ Echa'ã jocua umanocue vae reta yugüireco Noé ico yave. Jae reta güirovia'ã Tumpa jei vae, yepe tēi Tumpa ipiaguasu chupe reta jare uãro Noé jocua chalana guasu uyapo oĩ rambueve. Ěrei

mbovño oyepe i güi jocua chalana guasu pe. Ochoño uyembiasaca. ²¹ Jare jocua penti jaanga co. Jae ramiño vi añave pe reta piyembiasaca piyembibautizaca yave Jesucristo icove ye ou umanocue vae reta ipite güi ramo. Pepuere'ã piyembiasaca piyoe perete vae rupi. Jaeño pepuere piyembiasaca pipota yave piyapo Tumpa jei piyapo vaerã vae. ²² Jesucristo oo ma ara pe jare ico ma Tumpa iyipi pe iyacata coti. Ángel reta jare opaete mbaepuere güinoi vae reta uyeyocui chupe.

4

Piyeyocui piyupe mbaepuere reta penoi vae pe

¹ Cristo uiporara cua ivi pe ico rambueve. Jáeramo piñemicuatiro piporara vaerã jae uiporara rami. Echa'ã yaiporara yave, mbaeyoa ipuere'ã ma yanderé. ² Jucuarãi yave, ndarau yaico yae vae reño cua ivi pe yaico rambueve. Yaipotata yayapo Tumpa jei vae. ³ Echa'ã ara uasa vae reta pe yaico yae vae reño upurugüirovia mbae vae reta yugüireco rami. Jocua ara reta pe yayapose pichii vae, yacause, yayapose pareta reta yasavipo vaerã, jare yambidorase tumpa-raanga reta, yepe tõi mboroyocui jei agüiye vaerã yambidora. ⁴ Jare upurugüirovia mbae vae reta pe yavai ma uicuaa vaerã maera ra pe reta piyapo'ã ma opaete mbae icavi mbae vae jae reta ndive. Jáeramo jei reta icavi mbae vae pecoti. ⁵ Èrei Tumpa uãa yave icove vae reta jare umanocue vae reta, jae reta vi uyemboita Tumpa jovai. ⁶ Jare cua jeco pegua Tumpa jembiocui reta umimbeu ñee icavi vae umanota vae reta pe, iespíritu reta yugüireco vaerã Tumpa ico rami, yepe tõi cua ivi pe yugüireco rambueve ivi pegua reta uiporaraca chupe reta.

⁷ Èrei uyaro ma opaete mbae opa vaerã. Jáeramo piñemoa jare jecuaeño piyerure Tumpa pe. ⁸ Tamimbeu peve cua icavi ete vae: Piyerau. Echa'ã piyerau yave, ndarau piyembijeco jeta pemaeyoa reta re. ⁹ Piyemíngaru piñeenguru mbae reve. ¹⁰ Tumpa umee penti penti pe mbaepuere reta piyeyocui vaerã chupe. Jáeramo piyeyocui piyupe mbaepuere reta penoi vae pe. Jucuarãi piyeyocui cavita co Tumpa pe Tumpa ipiacavi tuicha vae rupi. ¹¹ Uñemíñee vae tuñemíñee Tumpa umimbeu chupe mbae jei vaerã vae rami. Uyeyocui ñru vae reta pe vae, tuyeyocui chupe reta mbaepuere Tumpa umee chupe vae pe. Jucuarãi yave, ñru vae reta umbiadorata Tumpa Jesucristo rupi opaete piyapo vae re. YandeYa Jesucristo tuyembidoraca jare tugüinoi opaete mbaepuere jaeño mai pegua. Amén.

Cristo re güirovia ramo uiporara vae

¹² Cherivi reta, piporara eteta co. Èrei piporara pei yave, agüiye pepiacañi jese. Echa'ã uyeyapo vi jucuarãi ñru vae reta pe. ¹³ Èrei piporara pei yave, piyerovia. Echa'ã picuaa piporara pei Cristo uiporara rami. Jare cua jeco pegua, opaete vae uicuaa yave quirãi Cristo uyembidoraca co, pe reta piyerovia eteta. ¹⁴ ñru vae reta jei yave icavi mbae vae pecoti Cristo re perovia ramo, piyerovia. Echa'ã Tumpa iEspíritu ico pepia pe. Jae reta jei icavi mbae vae Cristo coti. Èrei pe reta pemiadoraca Cristo. ¹⁵ Èrei agüiye quia tupuruyuca ani toñomi mbaembae ani tuyapo icavi mbae vae ani tumae ñru vae iparaviqui re. Echa'ã jucuarãi uyapo yave, uiporarata co icavi mbae vae uyapo ramo. ¹⁶ Èrei penti Cristo imbae vae uiporara yave Cristo re güirovia ramo, agüiye timara. Tumbidora Tumpa jese.

¹⁷ Tumpa uãata co opaete ivi pegua reta, jare tenonde uãata rani jae imbae reta. Yepe tõi yande co jae imbae reta, èrei ñanerãata co. Jáeramo uiporara eteta co jocua Tumpa ñnee icavi vae güirovia mbae vae reta. Echa'ã Tumpa jei chupe reta güirovia vaerã. ¹⁸ Tumpa ñnee pe uyecuatía oĩ cuarã:

“Tumpa umbujupi ma vae reta yavai rupi uyembiasacata.

Jáeramo ndarau etei uyembiasaca Tumpa jei vae güirovia'ã vae reta.

Echa'ã uyembai'ã imbaeyoa reta.”

Jucuarãi uyecuatía oĩ. ¹⁹ Jáeramo Tumpa jei vae rupi uiporara vae reta jecuaeño tuyapo icavi vae jare tumaeño Tumpa re uyandareco vaerã jese reta. Echa'ã Tumpa yandeapo jare jecuaeño uyandarecota yanderé.

5

Pemiatangãtu Tumpa imbae reta

¹ Tambiaracuaa ma tenondegua pepite pe ñugüinoi vae reta. Echa'ã che co jae penti tenondegua, jare amimbeu ñru vae reta pe quirãi Cristo uiporara yanderé. Jare Cristo uyecuaa yave, che vi ayeroviata jae ndive. Tupumbiaracuaa cuarã: ² Pemiatangãtu Tumpa imbae pepite pe ñugüinoi vae reta. Piyandareco jese reta pequirëi reve. Agüiye piyapo peparaviqui peatëi reve. Piyapo peparaviqui pipota ete piyeyocui Tumpa pe ramo. Agüiye piyapo pemingana corepoti vaerãño. ³ Jare pe reta pico cavi, ñru upurugüirovia vae reta uicuaa vaerã quirãi icavi co jae reta vi yugüireco vaerã. Agüiye piyocuiño pembae vae echa

rami. Echa'ã jae reta Tumpa imbae reta co. ⁴Jare Cristo ou ye yave - jae co opaete yanderé uyandareco vae - umeeta peve corona ndarau etei opa vae. Echa'ã pe reta piyeroziata jae ndive.

⁵Tambiaracuaa ma cuimbae tairusu vae reta cuarã: Piyapo petenondegua reta jei vae. Jare opaete vae piyeyocui piyupe piñemimichi reve. Echa'ã Tumpa umee ipiacavi uñemimichi vae reta pe. Ërei oyovaicho uyembicate vae reta ndive. ⁶Jáeramo piñemimichi Tumpa jovaque. Echa'ã jae imbaepuere tuicha ete co. Jare jae pembutuichacata ara ou uvãe yave piyembutuichaca vaerã. ⁷Pemimbeu Tumpa pe opaete pepiatiti jare piyemipia'ã jese vae. Echa'ã jae uyandareco oi peré.

⁸Jecuaeño piñemoa. Echa'ã aña guasu perovaicho co, jare uipota uyapo icavi mbae vae peve, penti yaguapita uguata ueca mbae uyuca jou vaerã vae rami. ⁹Ërei piñemimirãta pepurugüirovia re agüiye vaerã aña guasu pemiamiri. Picuaa co quirã opaete ïru upurugüirovia vae ivi pe yugüireco vae reta uiporara ñugüinoi pe reta piporara rami. ¹⁰Ërei Tumpa ipiacavi tuicha ete co. Jae yandeparavo umee vaerã yandeve yerovia opa mbae vae Cristo Jesús rupi. Piporarata co michi pegua. Ërei Tumpa etei pembiaracuaata, jare pemimirãtata, jare pemiatangãtuta. ¹¹Tumpa tuyembiadoraca jare tugüinoi opaete mbaepuere jaeño mai pegua. Amén.

Saludo reta

¹²Cua mboviño ma aicuatía peve pumbiaracuaa vaerã, jare araacata Silvano ndive peve. Aicuaa Silvano co jae yanderivi uyeyocui cavi peve vae. Amimbeu ma peve Tumpa ipiacavi añetete vae. Piñemimirãta pei jocua mbiacavi re.

¹³Opaete upurugüirovia vae Babilonia pe ñugüinoi vae reta jei peve Tumpa ndiveño pei. Tumpa uiparavo reta jae reparavo rami. Jae ramiño vi cherivi Marcos jei peve Tumpa ndiveño pei. ¹⁴Piyembisaluda yave, piñecuãva piyerau reve. Tipiacatu opaete Cristo Jesús re güirovia vae reta. Amén.

SEGUNDA CARTA DEL APOSTOL SAN PEDRO

¹ Che co jae Simón Pedro. Che co jae Jesucristo jemimondo jare ayeyocui chupe. Jesucristo co jae yanembiasa vae. Tumpa jare Jesucristo jupi co. Jáeramo umee peve pepurugüirovia vaerã ore ndupurugüirovia rami. Yayerovia ete cua mburugüirovia re. Aicuatía aĩ cua tupapire peve.

² Aipota picuaa cavi vaerã Tumpa jare yandeYa Jesús, penoi vaerã jeta ete Tumpa ipiacavi jare ipiacatu.

Pico penti ramiño Tumpa ndive

³ Tumpa umee ma yandeve imbaepuere rupi yaico cavi vaerã jare yayapo vaerã jae uipota yayapo vaerã vae. Jare opaete cua ñanoi yaicuaa Tumpa ramo. Echa'ã Tumpa yandeparavo yayapo vaerã icavi vae jare yayembuichaca vaerã. ⁴ Jare imbaepuere rupi Tumpa umee ma yandeve jei uyapota vae icavi ete vae reta. Yayerovia ete cua re. Jare cua jei uyapota vae reta rupi Tumpa umee ma peve pico vaerã penti ramiño jae ndive. Echa'ã jae perepi opaete icavi mbae vae ivi pegua güi, agüiye vaerã pico pe pere vae reño. ⁵ Jáeramo piñemiatangātu. Perovia co Tumpa re. Jecuaeño pipota piyapo icavi vae. Jare ramiño vi jecuaeño pipota picuaa cavi Tumpa regua. ⁶ Jare ramiño vi jecuaeño piñemioa. Jare ramiño vi jecuaeño pepiaguasu. Jare ramiño vi jecuaeño piyapo Tumpa uipota piyapo vaerã vae. ⁷ Jare ramiño vi jecuaeño pepiacavi. Jare ramiño vi jecuaeño pepuruau. ⁸ Echa'ã opaete cua piyapo yave, piñemimirãtata co pepurugüirovia re jare picuaa cavita co yandeYa Jesucristo. Jáeramo pepuereta piyeyocui cavi yandeYa pe. ⁹ Ërei opaete cua uata chupe vae uicuaa cavi'ã mbaembae regua. Iyaracuaa'ã co. Ñacañi ma co aipo quirãi Tumpa umbiasa chupe imbaeyoa uyapocue vae reta.

¹⁰ Jáeramo, cherivi reta, piñemiatangātu picuaaca vaerã İru vae reta pe quirãi pe reta co jae añete Tumpa uiparavo vae reta. Echa'ã jucuarãi piyapo yave, ndarau etei pepia Tumpa güi. ¹¹ Jare jucuarãi piyapo yave, pique cavita co piyerovia ete reve yandeYa Jesucristo iporoyocua opa mbae vae pe. Jare co yanembiasa vae.

¹² Jáeramo che jecuaeño pumimanduata cua re, yepe tēi picuaa ma co jare pepirãta ma co añete vae piyemboe jese vae re. ¹³ Icavi echa cheve pumimandúa vaerã jese cua ivi pe aico rambueve, pumiatangātu vaerã. ¹⁴ Echa'ã aicuaa imambae amanota co yandeYa Jesucristo uicuaaca cheve rami. ¹⁵ Jecuaeño pumimanduata cua re, jecuaeño pemandúa vaerã jese che amano ma yave.

Ore nduecha co yandeYa Jesucristo imbaepuere

¹⁶ Nduicuaaca peve yandeYa Jesucristo imbaepuere jare quirãi jae ou yeta co. Jocua nduicuaaca peve vae aracae ndaye reta'ã co. Jocua ndugüirovia vae añete co. Echa'ã ore nduecha co yandeYa Jesucristo imbaepuere. ¹⁷⁻¹⁸ Echa'ã ore noĩ jae ndive jocua ivitu guasu jae uiparavo vae re, yandeRu Tumpa umbiadoraca yave jare uechaca oreve imbaepuere. Jare ore nduyandu jocua ñee ara güi ou chupe vae. Echa'ã Tumpa etei uyembadoraca vae jei cuarã: "Cua co jae cheRai aau ete vae. Chembiyerovia ete." Jucuarãi jei.

¹⁹ Ërei pepuere perovia catu Tumpa iñee aracae umimbeu vae reta uicuatía vae ore nduecha vae güi. Jáeramo icavi co pepia pe piyemingueta cavi vaerã jae reta uicuatía vae re. Echa'ã jae reta uicuatía vae yanembori yaicuaa cavi vaerã yavai yaicuaa vaerã vae, penti tembipe yanembori yaecha cavi vaerã pitumimbi pe rami. Pepia pe piyemingueta cavi yave jese, picuaa cavita co, penti yasitata jembipe tuicha ete vae pepia pe umiembipe rami. ²⁰ Taicuaaca peve cua: Jocua Tumpa iñee aracae umimbeu vae reta uicuatía vae jae reta iyeminguetaiño'ã co. ²¹ Echa'ã Tumpa iñee aracae umimbeu vae reta imiari'ã jae reta etei uipota imiari ramo. Espiritu Santo etei umimbeu chupe reta mbae jei vaerã. Jáeramo jae reta jei vae Tumpa iñee etei co.

2

*Upurumbitavi vae reta
(Jds 4-13)*

¹ Ërei Israel pegua reta ipite pe yugüireco aracae amocue upurumbitavi vae reta. Jare reta jei iyapu reve: "Che co jae penti Tumpa iñee umimbeu vae." Jare ramiño vi yugüirecota pepite pe amocue upurumbitavi vae reta. Jare reta jeita iyapu reve: "Che co jae penti Tumpa iñee re oporomoe vae." Jare reta ipoqui eteta umimbeu vaerã moromoe añete mbae vae. Uipotata reta urucumegua Tumpa iparaviqui. Jare uicuaacuta reta yandeYa umbiepi

imbaeyoa reta re vae. Ērei imambae yandeYa urucumeguata reta. ²Jare jeta vae uyapota pichii vae upurumbitavi vae reta umimbeuta chupe reta uyapo vaerã vae. Jare cua jeco pegua ĩru vae reta jeita icavi mbae vae moromboe añete vae coti. ³Jare upurumbitavi vae reta uipotata pemaembae jare pemitavita upĩro vaerã pegũĩ pemaembae. Ērei ima ma Tumpa uãa reta. Jáeramo urucumeguata reta imambae.

⁴Echa'ã Tumpa umbiasa'ã ángel iyoa vae reta. Jae omombo ara güi cañitei pe. Joco pe uñeapiti ñugũinoi pitumimbi pe jare uãro ñugũinoi Tumpa uãa reta vaerã. ⁵Jae ramiño vi aracae Tumpa umbiasa'ã upurugũirovia mbae vae reta. Jaeño uepi iporu guasu güi Noé jocua ĩru siete vae ndive. Echa'ã Noé umimbeu tẽi ĩru vae reta pe uyapo vaerã jupi vae. Ērei jae reta uipota'ã güirovia Tumpa jei chupe reta uyapo vaerã vae. Jáeramo Tumpa ombou iporu guasu opa vaerã umbai reta. ⁶Jae ramiño vi Tumpa ombou tata tenta guasu reta Sodoma jare Gomorra pe opa umbai vaerã. Jaeño upita joco pe tanimbu reta. Jare jocua tenta guasu reta pe uyeyapo vae rupi Tumpa jei vae uyapo'ã vae reta ipuere uicuaa Tumpa uiporacata co chupe reta. ⁷Ērei Tumpa uepi Lot. Echa'ã jae jupi jare uyemipia'ã mbaembae pichii vae jocua jecopochi vae reta uyapo vae re. ⁸(Echa'ã jocua jupi vae ico jae reta ipite pe, jare uecha jare uyandu icavi mbae vae uyapo reta vae. Jáeramo uyemipia'ã opa ara rupi.) ⁹Jae ramiño vi yandeYa uicuaa quirãĩ uepi vaerã jei vae uyapo vae reta mbaesusereta güi jare quirãĩ uiporacata vaerã jupi mbae vae uyapo vae reta pe ara jae uãa reta vaerã vae ou vaerã regua. ¹⁰Amocue vae uyapo pichii vae jae jei vae rupiño jare güĩro mbaepuere güinoi vae reta. Tumpa uiporacata eteta co jocua reta pe. Echa'ã jae reta uyembicate jare ñatẽi uyapo mburuvicha reta jei uyapo vaerã vae. Uquiyẽã reta jei vaerã icavi mbae vae mbaepuere güinoi vae reta coti. ¹¹Ángel reta imbaepuere tuicha ete jocua jupi mbae vae uyapo vae reta imbaepuere güi. Ērei yepe tẽi imbaepuere tuicha co, Ērei ángel reta ipuere'ã umbijeco yandeYa jovaque jocua mbaepuere güinoi vae reta. ¹²Ērei jocua jupi mbae vae uyapo vae reta jei icavi mbae vae uicuaa mbae vae coti. Jae reta maemimba reta rami co. Yaipisi jare yayuca maemimba reta. Jae ramiño vi jocua jupi mbae vae uyapo vae reta umanota icavi mbae vae uyapo vae jeco pegua. ¹³Jare cua uyeyapota chupe reta jupi mbae vae uyapo ramo. Echa'ã ara rupi yepe icavi echa chupe reta uyapo vaerã icavi mbae vae. Jae reta uñemĩru pe reta ndive. Ucaru reta yepe pe reta ndive. Ērei uyerovia upurumbitavi vaerã. Icavi'ã co ucaru reta vaerã pe reta ndive. Echa'ã peĩru añetete vae reta'ã co. ¹⁴Jae reta jecuaeño uipota uyuvanga menda re. Jecuaeño uipota uyapo ipotave mbaeyoa, jare uyapoca mbaeyoa ipurugũirovia re ipirãta'ã vae reta pe. Jae reta jecuaeño uyemboe uipotata vaerã ĩru vae reta imbaembae. Tumpa uiporacata chupe reta. ¹⁵Echa'ã yugũireco'ã Tumpa jei yugũireco vaerã rami. Opia reta Tumpa güi. Uyapo reta Beor tai Balaam jee vae uyapo rami. Echa'ã Balaam uau ete corepoti jupi mbae vae uyapo vae rupi umingana vae. ¹⁶Ērei Tumpa uicuaaca Balaam pe agũiyẽ vaerã tẽi uyapo jocua jupi mbae vae. Echa'ã yepe tẽi penti mburica ipuere'ã uyemingueta, Ērei Tumpa umee Balaam imburica pe uyemingueta vaerã penti cuimbae uyemingueta rami, jare jucuarãĩ uicuaaca Balaam pe - jae co penti Tumpa iñee aracae umimbeu vae - agũiyẽ vaerã tẽi uyapo jocua uipotata uyapo vae.

¹⁷Jocua jupi mbae vae uyapo vae reta icua tipa ma vae reta rami co. Jae ramiño vi amapĩtu ivitu ete yave tanta osi vae reta rami co. Echa'ã yugũĩraa voita pitumimbi oi vae pe. ¹⁸Imiari reta uyembicate reve. Jáeramo jei vae reño yugũireco vae reta güirovia reta, jare uyapo ye pichii vae, yepe tẽi tenonde yave oyepẽ uyapo'ã Tumpa jei vae reta güi. ¹⁹Jocua jupi mbae vae uyapo vae reta jei tẽi chupe reta uyerorata co. Ērei jae reta etei icavi mbae vae jembiocui reta co. Echa'ã ime yave quã mbae güinoi mbaepuere jese vae, jae ico jocua mbae jembiocuirã. ²⁰Echa'ã oyepẽ yave pichii vae ivi pegua güi yandeYa Jesucristo regua uicuaa vae rupi - jae co yanembiasa vae - Ērei taicue rupi umbipi yave uyapo ye pichii vae jare pichii vae güinoi mbaepuere jese, icavi mbae ete co tenonde ico vae güi. ²¹Echa'ã uicuaa ma quirãĩ uyembujica vaerã. Ērei uyapo'ã mboroyocui Tumpa umimbeu chupe reta vae. Icavi ete tẽi co agũiyẽ vaerã uicuaa quirãĩ uyembujupica vaerã. ²²Ērei uyeyapo chupe reta jocua yae chupe vae rami. Echa'ã yae cuarãĩ: “Yimba oo ye jou igũeẽcue. Jae ramiño vi cuchi uyeyoe vae oo ye uñemutuñuu.” Jucuarãĩ yae. Jare cua añete co.

3

YandeYa ivãe ara uvãeta co

¹Cherivi reta, cua tupapire aicutãĩa peve vae mocui ma co. Mocui reve pe pumimandúa picuaa ma vae re, añetete pepia pe piyemingueta vaerã jese. ²Aipota pepia pe piyemingueta vaerã Tumpa iñee aracae umimbeu vae reta jei vae re. Jae reta uñeñoõ tee Tumpa peguarã. Jae ramiño vi aipota pepia pe piyemingueta vaerã mboroyocui ore numimbeu peve vae re.

Ore co jae yandeYa jemimondo reta. Jae co yanembiasa vae. ³Aipota picuaa vaerã cua rani: Ara taicuegua reta pe amocue vae oyoyaita Tumpa iñee umimbeu vae reta. Yugüirecota jae jei vae reño. ⁴Jare jeita cuarãi: “Pe reta pere tẽi Jesucristo ou yeta co. Ërei ndarau etei ou. Echa'ã yandetenondegua reta umano güive opaete mbaembae oyovaqueño co oĩ. Tumpa opaete uyapo güive opaete mbaembae oyovaqueño co oĩ.” Jucuarãi jeita. ⁵Ërei jae reta uipota'ã imandúa quirãi aracae ete Tumpa uyapo opaete ara re ñügüinoi vae iñee imbaepuere pe jare quirãi uyapo ivi jare i guasu reta, ⁶jare quirãi opa umbai opaete ivi pe oĩ vae iporu guasu ombou yave. ⁷Ërei Tumpa umimbeu yandevẽ quirãi mbaembae ara re añave ñügüinoi vae jare ivi vi oyovaqueñota oĩ umbai regua tata pe. Echa'ã jucuarãita Tumpa uyapo, uãa uyapo'ã jei vae reta yave. Jayave jae omondota reta tata guasu pe.

⁸Cherivi reta, icavi co picuaa vaerã cua: YandeYa pe penti ara mil año ramiño co jare mil año penti ara ramiño co. ⁹Amocue vae ipia pe uyemingueta tẽi yandeYa ndarau ou ye. Echa'ã jei reta ima ete ma co jei uyapota vae. Ërei jucuarãi'ã. Echa'ã yandeYa ipiaguasu yandevẽ. Uipota'ã penti ave oo vaerã tata guasu pe. Uipota opaete vae ueya vaerã iyemingueta icavi mbae vae ipia pe oĩ vae.

¹⁰Ërei yandeYa ivãe ara outa co penti imonda vae pĩtu yave ou mbaembae oĩomi vaerã rami. Jare yandeYa ivãe ara pe opaete mbaembae ara re añave yaecha vae uyembaita tanta jiapu reve. Jacu eteta co jare opaete mbaembae opata ocai. Ivi vi jare opaete mbaembae ivi pe ñügüinoi vae ocaita co. ¹¹Jáeramo pico cavi peyoa mbae reve jare jecuaeño piyapo Tumpa jei vae. Echa'ã picuaa opaete mbaembae añave yaecha vae opata ocai. ¹²Peãro pequirẽi reve Tumpa ivãe ara ou uvãe vaerã. Echa'ã Tumpa ivãe ara pe Tumpa uapita opaete mbaembae ara re ñügüinoi vae jare opata umbai. Jacu eteta co jare opaete mbaembae opata ocai. ¹³Ërei Tumpa uyapota ara re mbaembae ipiau vae. Jae ramiño vi uyapota ivi ipiau vae. Jare joco pe imeta jaeño mbae jupi vae. Echa'ã Tumpa cua jei uyapota co.

¹⁴Jáeramo, cherivi reta, cua mbaembae ipiau vae peãro ramo, piñemiatangãtu agüiye vaerã piyapo mbaeyoa. Jucuarãi yave, pepiacatuta jare ndarau quía pembijeco mbae re yandeYa ou ye yave. ¹⁵Picuaa quirãi yandeYa ipiaguasu co yandevẽ yayembiasaca vaerã. Jare cua re yanderivi Pablo yaau vae uicuatía ma peve. Tumpa umee Pablo pe aracuaa umimbeu cavi vaerã peve. ¹⁶Jare opaete tupapire uicuatía vae pe Pablo umimbeu yembiasa regua. Amo pe yavai yaicuaa vaerã mbae ra uipota jei Pablo uicuatía vae. Jare amocue vae güirova Pablo uicuatía vae. Jae ramiño vi jae reta güirova ñru Tumpa iñee uyecuatía oĩ vae. Jae reta uyemboe cavi'ã Tumpa iñee re jare ipirãta'ã ipurugüirovia re. Jare jucuarãi güirova ramo, jae reta etei uyerova Tumpa güi.

¹⁷Picuaa ma co cua mbaembae regua, cherivi reta. Jáeramo pe reta vi piñemoa, agüiye vaerã piyavi jocua icavi mbae vae uyapo vae reta uyavi rami. Echa'ã jucuarãi piyavi yave, ndarau pepirãta pepurugüirovia re. ¹⁸Ërei piñemimãrãta pepurugüirovia re Tumpa ipiacavi rupi. Jare jecuaeño pipota picuaa cavi yandeYa Jesucristo regua. Jae co yanembiasa vae. YandeYa tuyembiaadoraca añave jare jaeño mai pegua. Amén.

PRIMERA CARTA DEL APOSTOL SAN JUAN

Ñee tecove opa mbae vae umee vae

¹ Nduicuatía noĩ peve jocua Ñee tecove opa mbae vae umee vae regua. Jae jecuaeño ico ndei ivi uyeyapo mbove. Jare ore nduyandu jocua Ñee. Nduecha cavi. Numae jese. Nduyaviqui vi orepo pe etei. ² Jocua Ñee tecove opa mbae vae etei co. Numimbeu peve quirāi ore etei nduecha. Nduicuaaca peve jae co tecove opa mbae vae. Jae imeño mai ico yandeRu Tumpa ndive ndei ivi uyeyapo mbove, ěrei ou uyecuaa oreve. ³ Numimbeu peve nduecha jare nduyandu vae, pe reta vi piñemĩru vaerā ore ndive. Añetete ñañemĩru ma yandeRu Tumpa jare Tai Jesucristo ndive. ⁴ Jare cua mbaembae regua nduicuatía peve piyerovia ete vaerā.

Tumpa ico tembipe oĩ vae pe

⁵ Numimbeu peve ñee Jesucristo umimbeu oreve vae. Jae co cua: Tumpa ico tembipe oĩ vae pe. Ico'ā etei pitumimbi oĩ vae pe. ⁶ Aramoi yae ñañemĩru ma co jae ndive. ěrei yaico yave pitumimbi oĩ vae pe yugũireco vae rami, yandeapu co. Yaico'ā co añete vae rupi. ⁷ ěrei yaico yave tembipe oĩ vae pe yugũireco vae rami - echa'ā Tumpa vi ico tembipe oĩ vae pe - ñañemĩru uyupii, jare Jesucristo jugũi yandeyoe opaete yanembaeyoa reta güi. Jesucristo co jae Tumpa Tai.

⁸ Yae yave yandeyoa'ā co, yayembitavi co. Yae'ā etei co añete vae. ⁹ Yamimbeu yave Tumpa pe yanembaeyoa reta, yandepuere yarovia catu Tumpa umbiasa vaerā yandeve yanembaeyoa reta, jae jupi ramo. Jae yandeyoeta co opaete jupi mbae vae yayapo vae güi. ¹⁰ Yae yave yayapo'ā co mbaeyoa, Tumpa iñee ico'ā yandepia pe. Echa'ā Tumpa jei yayapo co mbaeyoa. Jáeramo yayapo'ā yave mbaeyoa, Tumpa iyaputa tēi co.

2

Cristo uyerure Tumpa pe yanderé

¹ Cherai reta, aicuatía cua mbaembae regua peve agũiye vaerā peyoa. ěrei yandeyoa yave, ime co quía uyerure yandeRu Tumpa pe yanderé vae. Jae co Jesucristo. Jae co jupi vae. ² Tumpa uiporaracata tēi yandeve yanembaeyoa reta jeco pegua. ěrei Jesucristo uiporara yandepica pe, agũiye vaerā Tumpa uiporaraca yandeve. Jare Jesucristo umano opaete ivi pegua reta imbaeyoa reta re, yanembaeyoa reta reño'ā co.

³ Jesucristo iporoyocui reta yayapo yave, cua uicuaaca yandeve yaicuaa co. ⁴ Ime yave quía, “Aicuaa co Jesucristo”, jei vae, iyapu co uyapo'ā yave Jesucristo iporoyocui reta. Jocua nunga jei'ā añete vae. ⁵ ěrei Jesucristo jei vae uyapo vae añetete uau ete Tumpa. Jare yaau yave Tumpa, yaicuaa yande co jae Jesucristo imbae reta. ⁶ Ime yave quía, “Che co jae Cristo imbae”, jei vae, tuico cavi Jesucristo ico rami.

Mboroyocui ipiau vae

⁷ Cherivi reta, cua aicuatía aĩ peve vae mboroyocui ipiau vae'ā co. Jaeño penti mboroyocui indechi vae iyipi güive picuaa vae. Cua mboroyocui indechi vae co jae ñee piyandu iyipi güive vae. ⁸ ěrei cua mboroyocui mburuau regua jecuaeño ipiau. Jesucristo yanderau jare pe reta piyerau vi. Echa'ā pitumimbi uasa ma jare tembipe añetete vae jembipe oĩ.

⁹ Ime yave quía, “Che aico tembipe oĩ vae pe”, jei vae, ěrei umitarēi yave ĩru upurugũirovia vae, jecuaeño ico pitumimbi oĩ vae pe. ¹⁰ Ime yave quía ĩru upurugũirovia vae uau vae, jae jecuaeño ico tembipe oĩ vae pe. Jáeramo ipuere uecha cavi uguata cavi vaerā uyepiaca mbae reve. ¹¹ ěrei ime yave quía ĩru upurugũirovia vae umitarēi vae, jae jecuaeño ico pitumimbi oĩ vae pe. Jáeramo jae co uguata oo pitumimbi pe vae rami. Uicuaa'ā queti ra oo oĩ vae. Echa'ā ipuere'ā etei uecha pitumimbi pe.

¹² Aicuatía cuarāi peve, cherai reta, Tumpa umbiasa peve pembaeyoa reta ramo. Umbiasa ma peve Jesucristo jee re. ¹³ Tae ucuacuaa vae reta pe cua: Aicuatía cuarāi peve picuaa Jesucristo ramo. Jae imeño mai ico ndei ivi uyeyapo mbove. Tae tairusu vae reta pe cua: Aicuatía cuarāi peve pemiamiri aña guasu ramo. Aicuatía cuarāi peve, cherai reta, picuaa yandeRu Tumpa ramo.

¹⁴ Tae ye ucuacuaa vae reta pe cua: Aicuatía cuarāi peve picuaa Jesucristo ramo. Jae imeño mai ico ndei ivi uyeyapo mbove. Tae tairusu vae reta pe cua: Aicuatía cuarāi peve pepirāta pepurugũirovia re ramo, jare Tumpa iñee ico pepia pe ramo, jare pemiamiri aña guasu ramo.

¹⁵ Agüiye peau cua ivi pegua. Agüiye peau mbaembae ivi pe ñugüinoi vae. Ime yave quía cua ivi pegua uau vae, uau'ã co Tumpa. ¹⁶ Cua ivi pegua uau vae reta jecuaño uipota iporopota jare uipota opaete mbaembae ipõra vae uecha vae jare uyembicate imbaembae re. Ërei opaete cua ivi pegua co. YandeRu Tumpa pegua'ã co. ¹⁷ Jare cua ivi pegua opata co. Jare opa ma yave, ndarau quía uipota ye. Ërei Tumpa jei vae uyapo vae icota jaeño mai pegua.

Cristo ndive oyovaicho vae

¹⁸ Cherai reta, ou ma uvãe ara taicuegua reta. Piyandu quirãi Cristo ndive oyovaicho vae outa co. Ërei añave ime ñugüinoi jeta Cristo ndive oyovaicho vae reta. Jáeramo yaicuaa ou ma co uvãe ara taicuegua reta. ¹⁹ Jae reta uyembiyao yandegüi, añetete'ã uñemiñru yande ndive ramo. Echa'ã añetete uñemiñru yave yande ndive, jecuae uyembatita tẽi yande ndive. Ërei uyembiyao reta yandegüi, uyecuaa vaerã añetete'ã co uñemiñru yande ndive.

²⁰ Ërei Espiritu Santo ou ma pepia pe. Jáeramo pe reta picuaa opaete. ²¹ Pe reta jae'ã co añete vae picuaa'ã vae. Picuaa co añete vae. Jáeramo aicutatã peve. Jare picuaa quirãi penti apu añete vae pegua'ã co.

²² Ime yave quía, "Jesús jae'ã co Cristo", jei vae, jae co penti iyapu vae. Ime yave quía güirovia'ã yandeRu Tumpa jare Tai re vae, jae co Cristo ndive oyovaicho vae. ²³ Ime yave quía güirovia'ã Tumpa Tai re vae, jae uicuaa'ã etei yandeRu Tumpa. Ërei güirovia Tumpa Tai re vae uicuaa co yandeRu Tumpa.

²⁴ Jáeramo jecuaño perovia iyipi güive piyemboe jese vae. Echa'ã jucuarãi yave, jecuaño piñemiñru cavita Tumpa Tai ndive jare yandeRu Tumpa ndive vi. ²⁵ Jare Tumpa jei ma umeeta co yandeve tecove opa mbae vae.

²⁶ Cuarãi aicutatã ma peve, amimbeu vaerã peve jocua uipota pembopia vaerã Tumpa güi vae reta. ²⁷ Ërei Tumpa umee ma peve Espiritu Santo, jare jae ico pepia pe. Jáeramo picuaa ma cua regua ñru vae umimbeu peve mbae reve. Echa'ã Espiritu Santo pemboe opaete mbaembae re, jare Espiritu Santo jecuaño jei añete vae. Ipuere'ã etei iyapu. Jáeramo jecuaño piñemiñru Jesucristo ndive Espiritu Santo pemboe rami.

²⁸ Añave, cherai reta, piñemiatangãtu piñemiñru vaerã Jesucristo ndive. Jucuarãi yave, jae ou ye yave, ñãita jae jovai yayerovia reve. Ndarau ñanemara jae ndive ñãieovãiti yave. ²⁹ Picuaa quirãi Tumpa co jae jupi vae. Jáeramo picuaa vi quirãi Tumpa umee ma tecove opa mbae vae opaete jupi vae uyapo vae reta pe.

3

Tumpa tai reta

¹ Mase, yandeRu Tumpa ñanereni jae tai retarã. Cua uicuaaca yandeve quirãi yandeRu Tumpa yanderau ete. Jáeramo upurugüirovia mbae vae reta yandecuaa cavi'ã, uicuaa'ã Tumpa ramo. ² Cherivi reta, añave yande co jae Tumpa tai reta. Jare Tumpa ndeiño uicuaaca yandeve quirãita ra ñã. Ërei yaicuaa ñãita co Cristo rami jae ou ye yave. Echa'ã yaecha cavita. Jae etei oita yanderovai. ³ Jare ime yave quía uãro oĩ uyerovia reve uecha vaerã vae, jae uipota ete ico iyoa mbae reve. Echa'ã Cristo iyoa mbae vae co.

⁴ Ime yave quía mbaeyoa uyapo vae, jae uyavi Tumpa iporoyocui. Echa'ã iyoa vae uyavi Tumpa iporoyocui. ⁵ Jare picuaa quirãi Jesucristo uyeyapo cuimbaerã umbai vaerã yanembaeyoa reta. Jare jae iyoa'ã etei. ⁶ Ime yave quía uñemiñru Jesucristo ndive vae, jae uipota'ã jecuaño iyoa. Jecuaño uipota iyoa vae Jesucristo imbae'ã co. Uicuaa'ã etei Jesucristo.

⁷ Cherai reta, agüiye quía tapembãtavi. Jesucristo jupi co. Jae ramiño vi jupi vae uyapo vae jupi co. ⁸ Jecuaño mbaeyoa uyapo vae añã guasu imbae co. Echa'ã añã guasu jecuaño iyoa iyipi güive. Jare Tumpa Tai uyeyapo cuimbaerã umbai vaerã añã guasu iparaviqui.

⁹ Tumpa güi tecove opa mbae vae güinoi vae jecuaño uyapo'ã mbaeyoa. Echa'ã güinoi ma tecove Tumpa güi. Jáeramo ipuere'ã jecuaño uyapo mbaeyoa. Echa'ã ime ma güinoi tecove opa mbae vae Tumpa güi. ¹⁰ Jare yandepuere yaicuaa quía ra co jae Tumpa tai reta jare quía ra co jae añã guasu tai reta. Ime yave quía jupi vae uyapo mbae vae, jae Tumpa imbae'ã co. Jae ramiño vi ime yave quía ñru upurugüirovia vae uau'ã vae, jae Tumpa imbae'ã co.

¹¹ Echa'ã iyipi güive piyandu cua ñee: Yayerau. ¹² Agüiye yayapo Caín uyapo rami. Echa'ã Caín añã guasu imbae co jare uyuca tivi. Jare picuaa co maera uyuca. Caín uyapo icavi mbae vae, jare tivi uyapo jupi vae. Jáeramo Caín uyuca tivi.

¹³ Agüiye pepiacañi, cherivi reta, upurugüirovia mbae vae reta pemitarẽi yave. ¹⁴ Yande yaicuaa yaasa ma co mano güi tecove opa mbae vae pe, ñru upurugüirovia vae reta yaau ramo. ñru upurugüirovia vae uau'ã vae güinoi'ã tecove opa mbae vae. ¹⁵ Ime yave quía

iru upurugüirovia vae umitarēi vae, jae penti upuruyuca vae rami co. Jare picuaa quirāi penti upuruyuca vae güinoi'ā etei tecove opa mbae vae. ¹⁶ Jesucristo etei uicuaaca yandev Tumpa ipuruau. Echa'ā umano yanderé. Jae ramiño vi icavi co yande ñamano vaerā Iru upurugüirovia vae reta re. ¹⁷ Ērei ime yave quía mbaembae ivi pegua re icocatu vae, jare ime yave upurugüirovia vae mbaembae uata chupe vae, jocua icocatu vae ñatēi yave ombori mbaembae uata chupe vae, jae güinoi'ā Tumpa ipuruau ipia pe. ¹⁸ Cherai reta, aŕetete yaau yave Iru vae, yayapota mbae yambori vaerā. Ndarau ñanemiariiño yandepurugüirovia re. ¹⁹⁻²⁰ Cuarāi yaicuaata yaico co aŕete vae re, jare yepe tēi yayembijeco mbae re yandepia pe, Ērei yandepiacatuta Tumpa jovaque. Echa'ā Tumpa uicuaa jeta ete opaete yande yaicuaa vae güi. Tumpa uicuaa opaete. ²¹ Cherivi reta, yayembijeco'ā yave yandepia pe, jecuaeño yandepuere yaya Tumpa re yaquiye mbae reve. ²² Jare yayerure yave Tumpa pe mbae re, jae umeeta yandevae, yayapo iporoyocui reta ramo. Echa'ā jocua yayapo vae umbiyerovia Tumpa. ²³ Jare Tumpa jei yandevae yarovia vaerā Tai Jesucristo jee re jare yayerau vaerā. Jae co mboroyocui Tumpa umimbeu yandevae vae. ²⁴ Jare Tumpa iporoyocui reta uyapo vae uñemĩru Tumpa ndive, jare Tumpa uñemĩru jae ndive. Jare yaicuaa Tumpa uñemĩru co yande ndive. Echa'ā Tumpa umee yandevae Espĩritu Santo ico vaerā yandepia pe.

4

Ñee uyuavi vae reta

¹ Cherivi reta, ime cua ivi pe jeta upurumbitavi vae reta. Jae reta jei iyapu reve: “Che co jae penti Tumpa ñee umimbeu vae.” Jáeramo pepia pe piyemingueta cavi piyandu vae re, agüiye vaerā perovia ñee ou'ā Tumpa güi vae. ² Yandepuere yaicuaa ou ra ñee Tumpa iEspĩritu güi. Echa'ā ñee umimbeu peve vae jei yave Jesús co jae Cristo cuimbaerā uyeyapo vae, jocua ñee ou Tumpa güi. ³ Ērei ñee umimbeu peve vae yave jei'ā Jesús co jae Cristo, jocua ñee ou'ā Tumpa güi. Jocua upurumbitavi vae oyovaicho Tumpa ndive. Echa'ā piyandu quirāi Cristo ndive oyovaicho vae reta yugüeruta co. Jare ime ma ñugüinoi ivi pe.

⁴ Cherai reta, pe reta co jae Tumpa imbae reta, jare pemiamiri ma Cristo ndive oyovaicho vae reta. Echa'ā Espĩritu Santo ico pepia pe jare jae imbaepuere tuicha ete ivi pegua reta iya imbaepuere güi. ⁵ Echa'ā jae reta ivi pegua co. Jáeramo uyemingueta mbaembae ivi pegua reño, jare upurugüirovia mbae vae reta uyapisaca cavi jese reta. ⁶ Ērei yande co jae Tumpa imbae reta. Ime yave quía uicuaa Tumpa vae, jae uyapisaca yanderé. Ērei ime yave quía Tumpa imbae'ā vae, jae uyapisaca'ā yanderé. Jare cuarāi yaicuaa aŕete vae pegua ra penti ñee, ani tavi pegua ra.

Tumpa mburuau etei co

⁷ Cherivi reta, yayerau. Echa'ā Tumpa umee yandevae mburuau. Jare upuruau vae güinoi tecove opa mbae vae Tumpa güi, jare uicuaa Tumpa. ⁸ Upuruau mbae vae uicuaa'ā Tumpa. Echa'ā Tumpa mburuau etei co. ⁹ Tumpa ombou Tai jae vaeño ivi pe yande ñanoi vaerā tecove opa mbae vae Tai uyapo yandevae vae jeco pegua. Jare jucuarāi Tumpa uicuaaca yandevae yanderau co. ¹⁰ Jáeramo yaicuaa ma mburuau aŕetete vae. Echa'ā tenonde yave yande yaau'ā Tumpa. Ērei Tumpa yanderau jare ombou Tai ivi pe, jae uiporara vaerā yanembaeyoa reta re, agüiye vaerā Tumpa uiporaraca yandevae.

¹¹ Cherivi reta, Tumpa yanderau ete. Jáeramo jae uipota yayerau vaerā. ¹² Mbaeti etei quía uecha Tumpa. Ērei yayerau yave, Tumpa ico yandepia pe, jare mburuau Tumpa coti ñanoi vae jecuaeño ucuacuaa.

¹³ Jare Tumpa umee ma yandevae iEspĩritu. Jáeramo yaicuaa yande ñañemĩru co Tumpa ndive, jare Tumpa ico yandepia pe. ¹⁴ Ore nduecha Tumpa Tai, jare numimbeu Iru vae reta pe quirāi yandeRu Tumpa ombou Tai ivi pe umbiasa vaerā ivi pegua reta. ¹⁵ Ime yave quía, “Jesús co jae Tumpa Tai”, jei vae, jae uñemĩru Tumpa ndive, jare Tumpa ico ipia pe. ¹⁶ Yaicuaa Tumpa yanderau co jare yarovia jecuaeño yanderauta co. Tumpa mburuau etei co. Jare upuruau reve ico vae uñemĩru Tumpa ndive, jare Tumpa ico ipia pe.

¹⁷ Jare ñañemĩru Tumpa ndive ramo, mburuau Tumpa coti ñanoi vae ucuacuaa, yandepuere vaerā ñai Tumpa jovai yaquiye mbae reve jocua ara ñanerāa yave. Echa'ā cua ivi pe yaico rambueve, Tumpa ico yandepia pe. ¹⁸ Ndarau yaquiye Tumpa güi, jae yanderau ramo. Tumpa ipuruau tuicha ete. Jáeramo ndarau yaquiye chugüi. Echa'ā ime yave quía Tumpa güi uquiye vae, jae ipia pe uyemingueta Tumpa uiporaracata co chupe. Tumpa güi uquiye vae uicuaa'ā Tumpa uau ete co.

¹⁹ Yande yaau Tumpa jae rani yanderau ramo. ²⁰ Ime yave quía, “Che aau Tumpa”, jei vae, umitarēi yave Iru upurugüirovia vae, iyapu co. Echa'ā uau'ā Iru upurugüirovia vae, yepe tēi ipuere uecha. Jáeramo ipuere'ā uau Tumpa. Echa'ā uecha'ā etei Tumpa. ²¹ Jare Tumpa umimbeu ma yandevae cua mboroyocui: “Uau Tumpa vae tuau vi Iru upurugüirovia vae.”

5

Quirāi yaicuaa Tumpa tai reta

¹ Opaete güirovia Jesús co jae Cristo vae reta güinoi tecove opa mbae vae Tumpa güi. Jare uau yanderu Tumpa vae uau vi Tumpa tai reta. ² Yaau yave Tumpa jare yayapo yave Tumpa iporoyocui reta, yaicuaa yaau co Tumpa tai reta. ³ Echa'ā yaau yave Tumpa, yayapo iporoyocui reta, jare yavai'ā co yayapo vaerā iporoyocui reta. ⁴ Tecove opa mbae vae Tumpa güi güinoi vae umiamiri ivi pegua oyovaicho jae ndive vae. Añete co, yandepuere ñamiamiri ivi pegua oyovaicho yande ndive vae yandepurugüirovia rupi. ⁵ Güirovia Jesús co jae Tumpa Tai vae ipuere umiamiri ivi pegua oyovaicho jae ndive vae.

Espíritu Santo umimbeu vae

⁶ Jesucristo umbipi iparaviqui uyembibautizaca ma i pe yave, jare opa uyapo iparaviqui umano curusu re yave. Jaeño'ā umbipi iparaviqui. Opa uyapo umano curusu re yave. Jare Espiritu Santo umimbeu cua regua. Echa'ā Espiritu Santo jecuaeño umimbeu añete vae. ⁷ Jare ime ara pe mbapi cua regua umimbeu vae. Echa'ā yanderu Tumpa jare Ñee jare Espiritu Santo umimbeu päve. Jare cua mbapi pentiño co. ⁸ Jae ramiño vi ime ivi pe mbapi cua regua umimbeu vae. Echa'ā Espiritu Santo jare i jare Jesús jugüi umimbeu päve penti ramiño. ⁹ Yarovia ivi pegua reta umimbeu yandive vae, yepe tēi amo pe umimbeu yandive vae añete vae'ā co. Ërei Tumpa umimbeu yandive vae jecuaeño añete vae. Jáeramo jecuaeño yandepuere yarovia Tumpa umimbeu yandive vae. Jare jae umimbeu yandive Jesús regua cuarāi: “Cua co jae cheRai.” ¹⁰ Tumpa Tai re güirovia vae uicuaa ipia pe Jesús co jae Tumpa Tai. Jare Tumpa etei umimbeu yandive cua. Jáeramo cua güirovia'ā vae güirovia'ā Tumpa. Ërei cua añete'ā yave, Tumpa iyaputa tēi co yandive. ¹¹ Jare Tumpa umimbeu yandive cua: Jae umee yandive tecove opa mbae vae. Ime ñanoi cua tecove opa mbae vae Tumpa Tai re yarovia ramo. ¹² Tumpa Tai güinoi ipia pe vae ime güinoi tecove opa mbae vae. Tumpa Tai güinoi mbae ipia pe vae güinoi'ā tecove opa mbae vae.

Picuaa penoi co tecove opa mbae vae

¹³ Pe reta perovia Tumpa Tai jee re. Jáeramo aicutatía cua peve picuaa vaerā penoi co tecove opa mbae vae. ¹⁴ Jare yandepuere yarovia catu Tumpa. Echa'ā yaicuaa Tumpa uyandu co yandive yayerure yave chupe mbae jae uipota yayerure vaerā chupe jese vae re. ¹⁵ Jare cuarāi yayerure chupe mbae re yave, yaicuaa jae uyapota co yandiyerure. Echa'ā yaicuaa jae uyandu co yandive.

¹⁶ Pentí upurugüirovia vae uyapo yave mbaeyoa, ñru upurugüirovia vae ipuere uyerure Tumpa pe jese, jocua mbaeyoa mano pegua'ā yave. Jucuarāi yave, Tumpa umaeñota mbaeyoa uyapo vae re icono vaerā. Ime co penti mbaeyoa mano pegua. Pentí upurugüirovia vae uyapo yave jocua nunga mbaeyoa, ñru upurugüirovia vae agüiye tuyerure Tumpa pe jese. ¹⁷ Opaete mbae jupi mbae vae mbaeyoa co. Ërei ime mbaeyoa mano pegua'ā vae.

¹⁸ Yaicuaa tecove opa mbae vae Tumpa güi güinoi vae jecuaeño uyapo'ā mbaeyoa. Echa'ā Tumpa Tai etei uyandareco jese agüiye vaerā aña guasu uipisi.

¹⁹ Yaicuaa yande co jae Tumpa tai reta jare quirāi aña guasu güinoi mbaepuere opaete upurugüirovia mbae vae reta re.

²⁰ Jae ramiño vi yaicuaa Tumpa Tai ou ma co cua ivi pe jare umee yandive yaicuaa vaerā Tumpa añetete vae. Ñañemñru ma Tumpa ndive. Echa'ā ñañemñru ma Tumpa Tai Jesucristo ndive. Jae co Tumpa añetete vae. Jae umee yandive tecove opa mbae vae.

²¹ Cheraí reta, agüiye pemiadora tumpa-raanga reta. Amén.

SEGUNDA CARTA DEL APOSTOL SAN JUAN

¹ Che co jae Juan. Jecuaeño aico upurugüirovia vae reta itenondegua. Nde co jae penti cuña Tumpa uiparavo vae. Aicuatia ai cua tupapire ndeve jare nemembi reta pe. Che puau añete vae perovia ramo. Jae ramiño vi opaete añete vae uicuaa vae reta perau che puau rami. ² Echa'ã jocua jecuaeño añete vae ico yandepia pe, jare icota yande ndive jaeño mai pegua.

³ YandeRu Tumpa jare yandeYa Jesucristo - jae co yandeRu Tai - tumee peve ipiacavi jare ipuruparareco jare ipiacatu, añetete co peau ramo.

Moromboe añete vae Cristo regua güirovia vae

⁴ Aicuaa yave nemembi reta yugüireco añete vae rupi, ayerovia ete. Echa'ã yandeRu yandeocui jucuarai yaico vaerã. ⁵ Jare añave che numifera, cherindi, nemandua vaerã iyipi güive yaicuaa vae re. Echa'ã iyipi güive Tumpa yandeocui yayerau vaerã. Cua aicuatia ndeve vae mboroyocui ipiau vae'ã co. ⁶ Añetete yaau yave Tumpa, yayapota Tumpa iporoyocui reta. Jare iyipi güive piyandu cua mboroyocui. Jáeramo icavi co jecuaeño piyapo vaerã.

⁷ Echa'ã ime ma ivi pe ñugüinoi jeta upurumbitavi vae reta. Jae reta jei'ã Jesús co jae Cristo cuimbaerã uyeyapo vae. Jocua upurumbitavi vae reta oyovaicho Cristo ndive. ⁸ Yaparaviqui ma tanta ñanoi vaerã Tumpa umeeta yandeve vae. Jáeramo piñemoa, agüiye vaerã pemicañi. Aipota penoi vaerã opaete Tumpa uipota penoi vaerã vae.

⁹ Amocue vae ipia pe uyemingueta tēi jae reta uicuaa cavi ete mbaembae regua İru vae reta güi. Ērei güirovia'ã yave moromboe añete vae Cristo regua, uicuaa'ã Tumpa. Moromboe añete vae Cristo regua güirovia vae uicuaa yandeRu Tumpa. Jae ramiño vi uicuaa Tumpa Tai. ¹⁰ Ou yave pepi penti oporomboe vae, umimbeu'ã yave peve cua moromboe añete vae, agüiye pemaño jese upita vaerã perenta pe, jare agüiye pere chupe: "Tumpa ndiveño." ¹¹ Echa'ã pere yave chupe: "Tumpa ndiveño", piñemiİru ma jae ndive icavi mbae vae uyapo vae re.

Aipota aa pepi

¹² Aipota jeta jae peve, Ērei jaeño ma jaeta peve cua tupapire pe. Echa'ã aipota aa pepi ñanemiari yandiyupe vaerã, yayerovia ete vaerã.

¹³ Ndepiquii Tumpa uiparavo vae imembi reta jei ndeve: "Tumpa ndiveño eĩ." Amén.

TERCERA CARTA DEL APOSTOL SAN JUAN

¹ Che co jae Juan. Jecuaeño aico upurugüirovia vae reta itenondegua. Che nduau, cherivi Gayo, añete vae nderovia ramo.

² Cherivi, aicuaa quirai nde ndico cavi Tumpa coti. Jare jecuaeño ayerure Tumpa pe nderé, jecuaeño ndico cavi vaerá opaete mbaembae re jare agüiye vaerá nembraerasi. ³ Echa'á amocue yanderivi reta yugüeru cua pe umimbeu cheve quirai añete vae ico ndepia pe jare quirai nde jecuaeño ndico añete vae rupi. Jáeramo ayerovia ete nderé. ⁴ Añete co, ayerovia ete ayandu yave quirai cheraí reta jecuaeño yugüireco anete vae rupi.

Gayo ombori ñru upurugüirovia vae reta

⁵ Cherivi, ñru upurugüirovia vae reta nembori yave, yepe tēi ndicuaa'á reta, ndiyeyocui cavi neñ Tumpa pe. ⁶ Jae reta etei umimbeu ndepuruau upurugüirovia vae cua pe uyembati vae reta pe. Icavi ete co nembori reta vaerá yugüeru yave nerenta güi. Ndiyapota Tumpa uipota ndiyapo vaerá vae. ⁷ Echa'á jae reta vi uyeyocui ñugüinoi Tumpa pe. Jare uguata reta opaete que rupi rambueve, jei'á upurugüirovia mbae vae reta pe ombori vaerá. ⁸ Jáeramo icavi co yande yambori reta vaerá. Echa'á cuarai yandepuere ñañemñru jae reta ndive umimbeu vaerá ñru vae reta pe añete vae regua.

Icavi mbae vae Diótfefes uyapo vae

⁹ Aicuatía ma cua re upurugüirovia vae uyembati vae reta pe. Ërei Diótfefes uipota'á uyapo che jae chupe uyapo vaerá vae. Echa'á icavi ete echa chupe uyemitenonde vaerá ñru upurugüirovia vae reta ipite pe. ¹⁰ Jáeramo che aa yave pepi chemanduata co Diótfefes uyapo vae re. Jae uyemingueta icavi mbae vae ore coti. Ombori'á etei upurugüirovia vae ambie coti güi pepi yugüiraa vae reta. Jae ramiño vi jei ñru upurugüirovia vae reta pe agüiye vaerá ombori reta. Jare ime yave upurugüirovia vae reta iquirēi ombori reta vae, Diótfefes umaño'á jese reta uyembati vaerá ñru upurugüirovia vae reta ndive.

Opaete vae uyemingueta cavi Demetrio re

¹¹ Cherivi, jecuaeño iyapo icavi vae. Agüiye iyapo icavi mbae vae. Icavi vae uyapo vae Tumpa tai co. Ërei icavi mbae vae uyapo vae uicuaa'á Tumpa.

¹² Opaete vae uyemingueta cavi Demetrio re. Echa'á jae jecuaeño ico añete vae rupi. Ore vi numimbeu peve jae jecuaeño uyapo icavi vae. Jare picuaa ore numimbeu peve vae añete co.

Saludo reta

¹³ Aipota tēi jeta jae ndeve, Ërei jaeño ma jaeta ndeve cua tupapire pe. ¹⁴ Ërei aipota aa apou ndepi imambaño ñañemiari yandiyupe vaerá.

¹⁵ Tumpa tumee ndeve ipiacatu. Neamigo reta jei ndeve Tumpa ndiveño eñ. Tumpa ndiveño toñ cheamigo joco pe ñugüinoi vae reta.

LA CARTA DEL APOSTOL SAN JUDAS

¹ Che co jae Judas. Che co jae Jacobo tivi. Che ayeyocui Jesucristo pe. Aicutia añ cua tupapire yandeRu Tumpa uiparavo vae reta pe. Tumpa perau jare peñoño tee Jesucristo peguarã. Jesucristo jecuaeño uyandareco peré.

² Tumpa tumee peve jeta ete ipuruparareco jare ipiacatu jare ipuruau.

Moromboe añete mbae vae reta

(2 P 2.1-7)

³ Cherivi reta, aipota ete aicutia peve yandiyembiasa regua. Ërei icavi echa cheve aicutia vaerã peve ñru mbaembae regua. Jáeramo cua tupapire pe aipota pumbiaracuaa pepuere vaerã piñemiatangātu yandepurgüirovia re. Echa'ã Tumpa uicuaaca cua mburugüirovia oñoño tee iyupeguarã vae reta pe. Agüiye etei perovia moromboe añete mbae vae. ⁴ Echa'ã amocue cuimbae Tumpa jei vae uyapo mbae vae uñemiru viari pe reta ndive. Jae reta jei Tumpa ipiacavi chupe reta ramo, ipuere uyapo pichñi vae. Ërei jae reta oyovaicho yandeYa Jesucristo ndive. Ìma ma Tumpa uicuaaca yandeve quirã jae reta uiporarata co.

⁵ Jáeramo yepe tēi picuaa ma, Ërei aipota pumimandúa ye cua re: YandeYa uepi Israel pegua reta güero Egipto güi. Ërei taicue rupi opa uyuca jei vae güirovia'ã vae reta. ⁶ Jae ramiño vi Tumpa uiporaraca amocue ángel pe. Echa'ã tenonde voi Tumpa umee chupe reta mbaepuere. Ërei jae reta uipota'ã uyeyocui Tumpa pe ramo, ueya yugüirecorenda. Jáeramo Tumpa uñapiti oñoño reta pitumimbi pe. Joco pe jaeño mai pegua uãro ñugüinoi Tumpa uãa reta vaerã jocua ara pe. ⁷ Jae ramiño vi Tumpa uiporaraca Sodoma jare Gomorra jare tenta guasu iyipi rupi ñugüinoi vae reta pegua reta pe. Echa'ã jocua tenta guasu reta pegua reta jecuaeño uyapo aguasa jare cuimbae joco pe yugüireco vae reta jecuaeño uyerereco uyupii. Jáeramo Tumpa uiporaraca ete chupe reta uicuaaca vaerã ñru vae reta pe agüiye vaerã uyapo jae reta uyapo rami. Jáeramo Tumpa opa uyuca reta tata pe. Jae jocua tata uyemijaanga tata opa mbae vae re.

⁸ Jae ramiño vi moromboe añete mbae vae re oporomboe vae reta ipia pe uyemingueta cavi'ã. Jae reta uyapo pichñi vae jete pe, jare güiro mburuvicha reta, jare jei icavi mbae vae mbaepuere güinoi vae reta coti. ⁹ Ërei Miguel etei - jae co ángel reta itenondegua - uipiu umbijeco vaerã aña guasu. Echa'ã jae uyeaca yave aña guasu ndive Moisés jetcue re, jei chupe: "YandeYa tuñeengata ndeve." ¹⁰ Ërei moromboe añete mbae vae re oporomboe vae reta jei icavi mbae vae uicuaa mbae vae coti. Jae reta maemimba reta rami co. Echa'ã yugüireco jei vae reño. Jáeramo uiporaracata. ¹¹ Tumpa uiporaracata chupe reta. Uyapo reta Caín uyapo rami. Jae ramiño vi corepoti uipota ete ramo, uyapo reta icavi mbae vae Balaam uyapo rami. Jae ramiño vi uyapo reta Tumpa jei chupe reta agüiye vaerã uyapo vae, Coré uyapo rami. ¹² Pe reta piyembati yave pecaru vaerã piyerau reve, jae reta vi ucaru pe reta ndive imara mbae reve. Ërei icavi'ã co ucaru reta vaerã pe reta ndive. Echa'ã añetete'ã co peiru reta. Jae reta amapitu ama mbaeti güinoi vae reta rami co. Echa'ã jocua nunga amapitu tanta osi ivitu ete yave, Ërei ama oqui'ã etei. Jae ramiño vi temiti reta ía ipiru ndei ipuere yagüiye mbove vae rami co. Echa'ã taicue rupi temiti reta etei ipiru, iya opa omombo japo reta reve ramo. ¹³ Ou ivitu tanta uyepuyu i guasu íarambo yave, uyeyapo iaparoa tuicha vae, Ërei i íarambo jaeño uyecuaa tiriyai. Jocua oporomboe vae reta jocua iaparoa rami co. Echa'ã jae reta uyapo uñemimaraca vaerãño. Jae ramiño vi jae reta yasitata uguata vae reta rami co. Echa'ã yugüiraata pitumimbi oí vae pe yugüireco vaerã joco pe jaeño mai pegua.

¹⁴ Jae Enoch - jae co siete ñemoña pegua Adán güi vae - jae co penti Tumpa ñíee aracae umimbeu vae - jei cua reta re cuarã: "Mase, yandeYa outa jeta ete oñoño tee iyupeguarã vae reta ndive. ¹⁵ Jae ou yave, uãata opaete vae. Uicuaacata quirã Tumpa jei vae uyapo'ã vae reta jecuaeño uyapo icavi mbae vae uipota'ã uyapo Tumpa jei vae ramo. Jae ramiño vi uicuaacata quirã jocua iyoa vae reta jei icavi mbae vae icoti." Jucuarã jei.

¹⁶ Jae reta ñíeenguru ñru vae reta re jare ñíera ñru vae reta re. Jecuaeño yugüireco jei vae reño. Umbiyerovia-raangaiño ñru vae reta. Echa'ã uipotañoi ñru vae reta umee vaerã mbaembae chupe reta.

Piñemirãta pepurugüirovia re

¹⁷ Ërei, cherivi reta, pemandúa yandeYa Jesucristo jemimondo reta umimbeu peve vae re.
¹⁸ Echa'ã jae reta umimbeu peve quirã ara taicuegua reta pe amocue vae oyoyaita Tumpa

iñee umimbeu vae reta jare quirãi jecuaeño yugüirecota jei vae reño Tumpa jei vae uyapo'ã ramo. ¹⁹ Jocua reta iporomboe güirovia vae reta uyembiyao moromboe añete vae güirovia vae reta güi. Echa'ã jocua reta uicuaa'ã etei Tumpa jare mbaeti güinoi Espíritu Santo ipia pe. ²⁰ Ërei piñemimirãta pepurugüirovia re, cherivi reta. Echa'ã pepurugüirovia Tumpa pegua co. Jare piyerure Espíritu Santo imbaepuere rupi. ²¹ Jecuaeño pico cavi, Tumpa ipuere vaerã uicuaaca pepe ipuruau. Jare jecuaeño peãro piyerovia reve penoi vaerã tecove opa mbae vae yandeYa Jesucristo ipuruparareco rupi.

²² Piparareco amocue ipurugüirovia re ipirãta'ã vae. ²³ Pembori ñru vae reta uyembiasaca vaerã mbaembae tata güi peepi rami. Piparareco reta, Ërei piñemoa vi imbaeyoa reta güi. Echa'ã icavi co piñamitãa vaerã chugüi imbaeyoa reta.

Yambiadora Tumpa

²⁴⁻²⁵ Añave yambiadora Tumpa. Echa'ã jae yanembiasa yandeYa Jesucristo uyapo vae rupi. Jaeño co Tumpa. Jae uyembiaadoraca ete co jare güinoi mbaepuere tuicha ete vae añave jare jaeño mai pegua. Jáeramo ipuere umee pepe mbaepuere agüiye vaerã pepia chugüi jare piyemboi vaerã teco mbae reve jae jovai. Joco pe peechata Tumpa jare piyerovia eteta. Amén.

APOCALIPSIS O REVELACIÓN A SAN JUAN

¹ Che co jae Juan. Che co jae Jesucristo jembiocui. Tumpa uicuaaca Jesucristo pe imambae uyeyapota vae. Jare Jesucristo ombou ángel uyeyocui chupe vae umimbeu vaerã cheve, che amimbeu-yuapi ye vaerã Jesucristo jembiocui reta pe. ² Cua aicutiã vae Tumpa iñee co. Jesucristo etei umimbeu cheve cua. Che aecha cua opaete.

³ Cua amimbeu peve ndei uyeyapo mbove. Cua umingueta vae reta jare cua uyandu vae reta uyeroviata co, uyapo reta yave Tumpa jei vae cua pe aicutiã vae. Echa'ã uyaro ma ara reta cua amimbeu peve vae uyeyapo vaerã.

Siete tenta guasu Asia pegua pe uyembatimbati vae reta pe

⁴⁻⁵ Che aicutiã aĩ cua tupapire pepurugüirovia vae siete tenta guasu Asia pegua pe piyembatimbati vae reta pe. Tumpa jare Espiritu Santo siete jembiapo güinoi vae - jae Tumpa iguapia jovai oĩ - jare Jesucristo tumee peve ipiacavi jare ipiacatu. Tumpa iyipi güive jare añave jecuaeño ico. Jare jae jecuae oĩta. Jesucristo co jae jecuaeño umimbeu cavi Tumpa regua vae. Jae tenonde voi icove ye ou umanocue vae reta ipite güi. Jae co opaete ivi pegua reta jovicha guasu reta Jovicha. Jae yanderau jare umbai opaete yanembaeyoa reta jugüi pe. ⁶ Jare yandepo mburuvicha guasu retarã jare sacerdote retarã yayeyocui vaerã Tumpa pe - jae co Jesucristo Tu. Jesucristo tuyembadoraca jare tugüinoi opaete mbaepuere jaeño mai pegua. Amén.

⁷ Mase, jae outa amapĩtu reve, jare opaete vae uechata. Israel pegua reta vi uechata. Echa'ã Israel pegua reta uicutuca. Jare opaete jocua ivi pegua reta ipiatiti eteta jese. Cuarã tuyeyapo. Amén.

⁸ —Che co jae Alfa jare Omega jee vae —jei yandeYa Tumpa—. Che co jae tenondegua vae jare taicuegua vae. Che co jae añave jare iyipi güive ico vae. Che co jae jecuae oĩta vae. Che co jae opaete mbaepuere güinoi vae —jei.

Juan uecha cuimbaerã uyeyapo vae

⁹ Che co jae periquei Juan, Jesús re yarovia ramo. Che vi aiporara aĩ pe reta rami Tumpa iporoyocua jeco pegua, jare chepiaguasu pe reta pepiaguasu rami.

Che aĩ ivi i mbite pe oĩ vae Patmos jee vae pe penti peresorã Tumpa iñee amimbeu jare Jesús regua chemiari ramo. ¹⁰ Espiritu Santo imbaepuere rupi añevãe domingo ara pe, jare ayandu cheraicue coti ñee jiapu ete vae. Jiapu penti trompeta rami. ¹¹ Jare ñee jei:

—Che co jae Alfa jare Omega jee vae. Che co jae tenondegua vae jare taicuegua vae.

Jayave jei:

—Icutiã penti tupapire pe ndeechata vae. Jayave emondo tupapire upurugüirovia vae siete tenta guasu Asia pegua pe uyembatimbati vae reta pe. Emondo Efeso pe, jare Esmirna pe, jare Pérgamo pe, jare Tiatira pe, jare Sardis pe, jare Filadelfia pe, jare Laodicea pe —jei cheve.

¹² Jayave ayerova aecha vaerã chemingueta vae. Jare ayerova amae yave, aecha siete vela iguapica oro pegua reta. ¹³ Jare aecha jocua siete vela iguapica reta ipite pe penti cuimbae. Cuimbaerã uyeyapo vae echa cheve. Güinoi temimbeu pucu ipi rupi uvãe vae. Jare ipitia rupi aecha güinoi penti cuacuaa oro pegua. ¹⁴ Ía tĩ ovecha-raagüe tĩ vae rami echa cheve. Tĩ asi co roi tĩ asi vae rami. Jare jesa tata jendi oĩ vae rami co. ¹⁵ Ipi bronce uyembacu yave tata pe uyepiro ete vae rami echa cheve. Jare uyemingueta yave, iñee jiapu ete i guasu jiapu rami. ¹⁶ Jae güinoi siete yasitata reta ipo iyacata pe, jare iyuru güi oẽ penti quisepucu jaimbeyovai vae. Jova jembipe ete guarasi ara mbite yave jembipe rami.

¹⁷ Jare aecha yave, aa jae jovai cuimbae umano vae rami. Jayave jae oñono ipo iyacata cheré jare jei cheve:

—Agüiye equiye. Che co jae tenondegua vae jare taicuegua vae —jei—. ¹⁸ Che co jae jecuaeño ico vae. Amano, ñrei, mase, añave aico jaeño mai pegua. Jare che anoi mbaepuere mano jare cañitei re —jei—. ¹⁹ Icutiã opaete mbaembae ndeecha vae regua jare emimbeu mbae re uyemijaanga jocua mbaembae. Jucuarã nemimbeuta mbae taicue rupi uyeyapota vae —jei cheve—. ²⁰ Taicuaaca ndeve mbae re uyemijaanga siete yasitata reta chepo cheacata pe ndeecha vae jare mbae re uyemijaanga siete vela iguapica oro pegua reta. Siete yasitata reta uyemijaanga siete ángel reta re. Jocua siete ángel reta uyeyocui upurugüirovia vae jocua siete tenta guasu reta pe uyembatimbati vae reta pe. Jare siete vela iguapica reta uyemijaanga upurugüirovia vae jocua siete tenta guasu reta pe uyembatimbati vae reta re —jei—.

2

Ñee Efeso peguarã

¹ Icuatía ángel upurugüirovia vae Efeso pe uyembati vae reta pe uyeyocui vae pe cuarã: ‘Cua jei siete yasitata reta ipo iyacata pe uipisi vae - jae siete vela iguapica oro pegua reta ipite pe uguata vae co:

² Che aicuaa preparaviqui. Tanta preparaviqui jare pepiaguasu vi. Piñemĩru’ã icavi mbae vae uyapo vae reta ndive. Ime pepite pe ñugüinoi jocua “Che co jae Jesús jemimondo” jei vae reta. Êrei jae reta Jesús jemimondo reta’ã co. Jare pe reta peeca picuaa vaerã añetete ra co Jesús jemimondo reta. Jare añave picuaa iyapo reta co. ³ Jare pe reta cherau ramo, pepiaguasu jare pemiaquanta pecueri mbae reve.

⁴ Êrei chepuere pumbijeco mbae re. Jae co cua: Cherau’ã ma tenonde yave cherause vae rami. ⁵ Jáeramo pemandúa quirã tenonde yave cherau ete. Peeya piyemingueta icavi mbae vae pepia pe oĩ vae, jare piyapo ye mbaraviqui reta tenonde yave piyapose vae rami. Echa’ã peeya’ã yave piyemingueta icavi mbae vae pepia pe oĩ vae, aata imambae pepi jare ambisirita pevela iguapica jenda güi.

⁶ Êrei ayerovia cua re: Nicolaita reta uyapo vae icavi’ã peve. Echa’ã jocua icavi’ã ete vi cheve.

⁷ Uipota uyandu vae tuyapisaca Espiritu Santo upurugüirovia vae uyembatimbatì vae reta pe jei vae re. Upurumiamiri vae pe ameeta jou vaerã jocua ivira tecove umee vae güi. Jocua ivira ime paraíso mbite pe oĩ. Joco pe ico Tumpa.’

Jucuarãi icuatía —jei—.

Ñee Esmirna peguarã

⁸ Jare icuatía ángel upurugüirovia vae Esmirna pe uyembati vae reta pe uyeyocui vae pe cuarã: ‘Cua jei jocua tenondegua vae jare taicuegua vae - jae umano, êrei icove ye: ⁹ Che aicuaa preparaviqui jare quirã piporara jare preparavete (Êrei picocatu co Tumpa coti). Aicuaa vi quirãi jocua judío-raanga reta jei icavi mbae vae pecoti. Yepe tẽi jei reta: Ore co jae judío reta, êrei jae’ã co. Echa’ã jae reta uyapo Satanás jemiapi. ¹⁰ Agüiye pequiye piporarata vae güi. Mase, aña guasu peñonocata amocue pe reta peresoriru pe, uyecuaa vaerã pepurugüirovia añetete ra. Jare piporarata diez ara pegua. Jecuaño perovia cheré, yepe tẽi aramoi pamanota pepurugüirovia jeco pegua. Jucuarãi yave, ameeta peve tecove opa mbae vae.

¹¹ Uipota uyandu vae tuyapisaca Espiritu Santo upurugüirovia vae uyembatimbatì vae reta pe jei vae re. Upurumiamiri vae re ndarau ete mbaepuere güinoi mano mocuia.’

Jucuarãi icuatía —jei—.

Ñee Pérgamo peguarã

¹² Jare icuatía ángel upurugüirovia vae Pérgamo pe uyembati vae reta pe uyeyocui vae pe cuarã: ‘Cua jei quisepucu jaimbeyovai vae güinoi vae:

¹³ Aicuaa preparaviqui jare quiupe pico. Echa’ã perenta guasu pe jeta ete vae uyapo Satanás jemiapi. Êrei pe reta jecuaño picuaaca quirãi perovia cheré. Peeya’ã etei pepurugüirovia, yepe tẽi yavai ete peve jocua ara reta pe Antipas uyeyucaca pepite pe yave. Antipas uyeyucaca, chemimbeu cavi ramo. Echa’ã Satanás etei ico perenta guasu pe.

¹⁴ Êrei chepuere pumbijeco mbovi mbaembae re. Echa’ã ime pepite pe ñugüinoi Balaam iporomboe güirovia vae reta. Balaam omboe Balac quirãi ipueré umbiavaí Israel pegua reta. Echa’ã jae reta umbipi jou tembiu tumpa-raanga reta pe uñemee vae jare uyapo aguasa. ¹⁵ Jae ramiño vi ime pepite pe ñugüinoi nicolaíta reta iporomboe güirovia vae reta, jare jocua moromboe icavi’ã ete cheve.

¹⁶ Jáeramo peeya piyemingueta icavi mbae vae pepia pe oĩ vae. Peeya’a yave, aata pepi imambae jare añerãrota jae reta ndive. Aiporuta jese reta quisepucu cheyuru güi oẽ vae.

¹⁷ Uipota uyandu vae tuyapisaca Espiritu Santo upurugüirovia vae uyembatimbatì vae reta pe jei vae re. Upurumiamiri vae pe ameeta jocua manã uyecuaa mbae vae. Ameeta vi chupe penti ita tĩ vae. Jocua ita re ime penti tee ipiau vae uyecuatía oĩ. Jaeño ameeta ita chupe vae uicuaata jocua tee.’

Jucuarãi icuatía —jei—.

Ñee Tiatira peguarã

¹⁸ Jare icuatía ángel upurugüirovia vae Tiatira pe uyembati vae reta pe uyeyocui vae pe cuarã: ‘Cua jei Tumpa Tai. Jae jesa tata jendi oĩ vae rami co, jare ipi bronze uyembacu yave tata pe uyepiro ete vae rami:

¹⁹ Che aicuaa peparaviqui jare pepuruau jare pepurugüirovia jare quirã piyeyocui cheve jare pepiaguasu. Jare jecuaño peparaviqui tanta. Añete co, tenonde yave peparaviqui tanta, ãrei taicue rupi peparaviqui tanta ete.

²⁰ Ërei chepuere pumbijeco cua re: Pemaño jocua cuña Jezabel jee vae re oporombœ vaerã pepite pe. Jae jei jae co penti cuña Tumpa iñee umimbeu vae. Ërei jae umbitavi cherembiocui reta. Echa'ã jae umimbeu chupe reta uyapo vaerã aguasa jare jou vaerã tembã tumpa-raanga reta pe uñemee vae. ²¹ Jare amee ma ara reta jocua cuña pe ueya vaerã iyemingueta icavi mbae vae ipia pe oĩ vae, agüiye vaerã uyapo aguasa. Ërei jecuaño uyapo jocua icavi mbae vae. ²² Mase, amimbaerasita jocua cuña, jare aiporaraca eteta jae ndive menda re uyuvanga vae reta pe, ueya'ã reta yave icavi mbae vae jae ndive uyapo vae. ²³ Jare ayucata jocua cuña imembi reta, jare opaete upurugüirovia vae uyembatimbati vae reta uicuaa quirã che aicuaa opaete vae iyemingueta ipia pe oĩ vae. Jare ameeta peve penti penti mbae piyapo vae rupi. ²⁴⁻²⁵ Ërei tae peve cua: Cua reño pumbijeco. Ërei piñemimirãta mburugüirovia penoi vae re che ayu ye regua. (Cuarã chemiari aĩ upurugüirovia vae Tiatira pegua jocua cuña iporombœ güirovia mbae vae reta pe. Echa'ã jae reta uicuaa'ã Satanás iporombœ uyecuaa mbae vae jei chupe vae.)

²⁶ Upurumiamiri vae pe ameeta mbaepuere ipuere vaerã oyocui ivi pegua reta, jecuaño yave uyapo cheparaviqui. ²⁷ Jare oyocuita penti popoca fierro pegua pe. Güinoita mbaepuere jese reta mbaepuere penoi pembiperasoraso vaerã penti iru ñaeu pegua vae rami. Echa'ã cheRu umee cheve etei cua nunga mbaepuere. ²⁸ Jare ameeta chupe yasitata neimbove asi uyecuaa vae.

²⁹ Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarã icuatía —jei—.

3

Ñee Sardis peguarã

¹ Jare icuatía ángel upurugüirovia vae Sardis pe uyembati vae reta pe uyeyocui vae pe cuarã: 'Cua jei jocua siete yasitata reta güinoi vae - jae co Espiritu Santo siete jembiape güinoi vae uyeyocui chupe vae:

Che aicuaa peparaviqui. Ìru vae reta jei tã picove catu co, ãrei picove catu'ã co Tumpa coti. ² Piñemœa ngatu jare piñemimirãta jocua imeño penoi vae re. Echa'ã pepirãta'ã etei jese. Piyapo'ã mbaraviqui Tumpa uipota piyapo vaerã vae. ³ Jáeramo pemandúa Tumpa umee peve vae re jare quirã piyapisaca jese. Piñemimirãta jocua re, jare peeya piyemingueta icavi mbae vae pepia pe oĩ vae. Echa'ã piñemœa ngatu'ã yave, aata pepi immbae penti imonda vae uique o pe rami, jare ndarau picuaa quirã yave ra aata pepi.

⁴ Ime mbovi Sardis pegua uyapo'ã icavi mbae vae reta. Jae reta uguatata che ndive jemimonde tĩ vae reve icavi vae uyapo vae ramo.

⁵ Upurumiamiri vae pe ameeta temimonde tĩ vae omonde vaerã, jare ndarau ambai jee libro tecove opa mbae vae pegua güi. Aicuaacata cheRu jare ángel cheRu pe uyeyocui vae reta jovaque jae co chembae.

⁶ Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarã icuatía —jei—.

Ñee Filadelfia peguarã

⁷ Jare icuatía ángel upurugüirovia vae Filadelfia pe uyembati vae reta pe uyeyocui vae pe cuarã: 'Cua jei iyoa mbae vae. Jae co añete vae jei vae. Jae güinoi mbaepuere Tumpa umee David pe vae. Jocua mbaepuere penti onque illave rami co. Echa'ã jae uipea yave penti onque, mbaeti quía ipuere uyuguenda ye. Jae ramiño vi jae uyuguenda yave penti onque, mbaeti quía ipuere uipea ye:

⁸ Che aicuaa peparaviqui. Mase, aechaca ma peve penti onque uyepea oĩ vae. Mbaeti quía ipuere uyuguenda jocua onque. Pembaepuere michi co, ãrei piyapo che jae peve piyapo vaerã vae jare checuacu'ã.

⁹ Ime pepite pe ñügüinoi jocua uyapo Satanás jembiape vae reta. Yepe tã jei reta: Ore co jae judío reta, ãrei jae'ã co. Iyapu reta. Mase, ayapota chupe reta yugüiraa vaerã uyeatica perovai, jare aicuaacata chupe reta che puau co.

¹⁰ Piyapo che jae peve piyapo vaerã vae pepiaguasu reve ramo, che puepita opaete ivi pe yugüireco vae reta uiporarata vae güi. ¹¹ Mase, aa yeta immbae. Piñemimirãta mburugüirovia penoi vae re, agüiye vaerã Ìru vae pe uñemee ndecorona ndegüi.

¹² Upurumiamiri vae pe ameeta ico vaerã cheTumpa jo pe, jare ndarau etei oẽ chugüi. Güinoita mbaepuere tuicha vae penti oquita ipirãta ete vae rami. Jare aicutiata jese cheTumpa jee jare cheTumpa jenta guasu jee - jae co Jerusalén ipiau vae cheTumpa ombouta ara güi vae. Jae ramiño vi aicutiata jese cheree ipiau vae.

¹³ Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarãi icuatía —jei—.

Ñee Laodicea peguarã

¹⁴ Jare icuatía ángel upurugüirovia vae Laodicea pe uyembati vae reta pe uyeuocui vae pe cuarã: 'Cua jei jocua Amén jee vae. Jae jecuaeño umimbeu cavi añete vae Tumpa regua. Jae co opaete Tumpa uyapo vae iYa:

¹⁵ Che aicuaa reparaviqui, jare quirãi chemitarëi'ã jare cherau'ã. Icavita tõi co cheve chemitarëi yave aní cherau yave. ¹⁶ Chemitarëi'ã jare cherau'ã. Jáeramo pomombota, penti cuimbae tembü uyúe mbae vae iyuru güi omombo rami.

¹⁷ Echa'ã pe reta pere cuarã: Yaicocatu co. Jeta mbaembae ñanoi. Mbaeti etei mbae uata yandeve. Jucuarãi pere. Èrei picuaa'ã quirãi pepiatiti ete, jare reparavete, jare peresa mbae, jare penani.

¹⁸ Che pumbiaracuaa pegua vaerã chegüi oro tata pe uyembichiriri iquiacue oẽ vaerã chugüi vae, picocatu vaerã, jare temimonde tĩ vae peremimonderã, agüie vaerã penani yave pemara. Jae ramiño vi che pumbiaracuaa piñono vaerã moa peresa pe pepuere vaerã pemae. ¹⁹ Che aiporaraca aau vae pe, amboe vaerã. Jáeramo piñemiatangãtu jare peeya piyemingueta icavi mbae vae pepia pe oĩ vae.

²⁰ Mase, che ayemboi añ onque pe jare ambopu añ onque. Ime yave quía chiñee uyandu vae, uipea yave onque, aikueta acarú vaerã jae ndive, jare jae ucaruta che ndive.

²¹ Upurumiamiri vae pe ameeta uguapi vaerã che ndive cheguapia pe. Echa'ã che vi apurumiamiri jare aguapi cheRu ndive iguapia pe.

²² Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarãi icuatía —jei.

4

Ara pe ñugüinoi vae reta umbiadora yandeYa

¹ Cua jaicue rupi amae jare aecha penti onque uyepea oĩ ara pe. Jare ñee tenonde yave ayandu vae jei cheve. Penti trompeta rami iñeeãta reve jei cheve:

—Iyupi cua pe jare aechacata ndeve mbaembae uyeypota vae.

² Jare jupivoiño Espiritu Santo imbaepuere rupi aecha penti guapia ara pe jare quía uguapi oĩ guapia pe. ³ Jare joco pe uguapi oĩ vae ita ipõra ete vae reta jaspe jare cornalina jee vae echa cheve. Jare aecha penti yii jocua guapia iyipi rupi. Jare yii ita ipõra ete vae esmeralda jee vae echa cheve. ⁴ Jare aecha jocua guapia iyipi rupi ñru veinticuatro guapia reta. Jare aecha jocua guapia reta pe uguapi ñugüinoi veinticuatro tenondegua reta. Omonde reta temimonde tĩ vae jare iñãca re güinoi reta corona oro pegua. ⁵ Jare jocua guapia güi ou ama uvera rami vae. Jare ayandu jiapu vae reta. Jare aecha jocua guapia jovai siete lámpara jendi ñugüinoi vae reta. Jae co Espiritu Santo siete jembiapo güinoi vae. ⁶ Jare jocua guapia jovai aecha vi i guasu rami vae, èrei vidiro pegua echa cheve. Jare jocua guapia iyipi pe etei aecha irundi mbaembae icove vae reta. Jae reta güinoi jeta jesa ipuere vaerã umae jenonde jare jaicue uyerova mbae reve. ⁷ Jare penti jocua icove vae penti yaguapita echa. Jare ñru icove vae penti toro echa. Jare ñru icove vae jova cuimbae jova echa. Jare ñru icove vae penti güiraquee tuicha vae uveve oĩ vae echa. ⁸ Jare penti penti jocua irundi mbaembae icove vae reta güinoi seis ipepo reta, jare jete rupi güinoi jeta jesa. Jare jecuaeño jei reta:

—YandeYa Tumpa opaete mbaepuere güinoi vae iyoa mbae etei co. Jae iyipi güive jare añave jecuaeño ico. Jare jae jecuae oita.

Jucuarãi jei reta ara rupi jare pĩtu rupi. Uputuu'ã etei reta.

⁹ Jare jocua mbaembae icove vae reta umbiadora jocua guapia pe uguapi vae jecuaeño ico vae, jare umee yasurupai chupe. ¹⁰ Jare jocua veinticuatro tenondegua reta uyeatica jocua guapia pe uguapi vae jecuaeño ico vae jovai umbiadora vaerã, jare oñono reta icorona jocua guapia jovai, jare jei reta:

¹¹ —Jupi co nde nenoi vaerã opaete yembiadora jare mbaepuere, oreYa Tumpa. Echa'ã nde ndiyapo opaete mbaembae. Opaete mbaembae uyeypota nde ndere vae rupi —jei reta.

5

Tupapire jare Ovecha-rai

¹ Jare aecha penti libro guapia pe uguapi vae ipo iyacata pe. Jocua libro güinoi uyequatiacue japipe rupi jare icupe rupi, jare uyeyuquenda oï. Güinoi siete yemboyaa, agüiye vaerã quía uipea umingueta. ² Jare aecha penti ángel ipirãta vae, jare ángel iñeeãta reve jei:

—¿Ime pa quía jupi co cua libro uipea vaerã vae? ¿Ime pa quía jupi co cua libro iyemboyaa uequi vaerã vae? —jei.

³ Jare mbaeti co jocua libro ipuere uipea vae ara pe jare ivi pe jare ivigüi pe. Mbaeti co quía ipuere umae jese.

⁴ Jare ayao ete. Echa'ã mbaeti quía uñevãe jupi libro uipea umingueta vaerã vae. Mbaeti quía uñevãe jupi libro re umae vaerã vae.

⁵ Jayave penti tenondegua vae jei cheve:

—Agüiye iyao. Mase, Judá iñemoñaa reta pegua Yaguapãta jee vae - jae co David Iyipi jee vae - upurumiamiri ma uequi vaerã jocua siete libro iyemboyaa jare uipea vaerã tupapire —jei.

⁶ Jare aecha penti Ovecha-rai. Uyeyucaca echa cheve. Uyemboi oï jocua guapia jare jocua irundi mbaembae icove vae reta ipãu pe, jocua tenondegua reta ipite pe. Jae güinoi siete jãti jare siete jesa - jae co Espiritu Santo siete jembiapo güinoi vae opaete ivi rupi uyemondoca vae. ⁷ Jare jocua Ovecha-rai oo uequi libro guapia pe uguapi vae ipo iyacata güi. ⁸ Jare libro güinoi ma yave, jocua irundi mbaembae icove vae reta jare jocua veinticuatro tenondegua reta uyeatica Ovecha-rai jovai. Penti penti güinoi arpa jare mbae ipiche cavi vae tinee oï copa oro pegua pe. Jocua mbae ipiche cavi vae uñeño tee Tumpa peguarã vae reta iyerure reta co.

⁹ Jare jae reta ucanta penti canta ipiau vae. Ucanta cuarã:

—Jupi co nde neno vaerã jocua libro. Jupi co nde ndeequi vaerã jocua libro iyemboyaa reta. Echa'ã nde ndiyeyucaca jare ndeepi Tumpa imbae retarã noderugüi rupi opaete ivi ambiembie pegua reta ipite güi. ¹⁰ Jare ndiyapo reta mburuvicha guasu retarã jare sacerdote retarã ipuere vaerã uyeyocui ñaneTumpa pe. Jare oporoyocuita reta ivi pe.

Jucuarã ucanta reta.

¹¹ Jayave amae ye, jare ayandu jeta ángel reta iñee. Jocua ángel reta uyemboi ñugüinoi jocua guapia jare jocua mbaembae icove vae reta jare jocua tenondegua reta iyipi rupi. Jare uyepapa jeta ye ye. ¹² Jare ángel reta iñeeãta reve jei:

—Jupi co Ovecha-rai uyeyucaca vae güinoi vaerã mbaepuere, jare icocatu vaerã, jare iyaracuaa vaerã, jare uyembiadoraca vaerã. Jupi co yasurupai tuicha ñamee vaerã chupe —jei reta.

¹³ Jayave opaete ara pe jare ivi pe jare ivigüi pe jare i guasu pe ñugüinoi vae reta ayandu jei:

—Tuyembiadoraca guapia pe uguapi vae jare Ovecha-rai jaeño mai pegua. Ñamee yasurupai tuicha chupe reta. Tugüinoi reta opaete mbaepuere.

¹⁴ Jayave jocua irundi mbaembae icove vae reta jei:

—Amén.

Jare jocua veinticuatro tenondegua reta uyeatica jare umbiadora imeño mai ico vae.

6

Libro iyemboyaa reta

¹ Jare aecha Ovecha-rai uipea penti jocua libro iyemboyaa. Jayave ayandu penti mbaembae icove vae jei:

—Eyu.

Ara jiapu vae echa uyemingueta yave.

² Jare aecha penti cavayu ti vae, jare opo cavayu re vae güinoi güirapa. Jare uñemee chupe corona. Jare jecuaeño upurumiamiri.

³ Jare Ovecha-rai uipea ñru libro iyemboyaa. Uyepea ma mocui. Jayave ayandu ñru mbaembae icove vae jei:

—Eyu.

⁴ Jare aecha oo ñru cavayu. Ërei cua cavayu pãta vae. Jare opo cavayu re vae pe uñemee mbaepuere umiferãro vaerã ivi pegua reta uyeyuca vaerã. Jare uñemee vi chupe penti quisepucu tuicha ete vae.

⁵ Jare Ovecha-rai uipea ñru libro iyemboyaa. Uyepea ma mbapi. Jayave ayandu ñru mbaembae icove vae jei:

—Eyu.

Jare aecha ñru cavayu. Ērei cua cavayu jũ vae. Jare opo cavayu re vae güinoi ipo pe umipesa pipe vae. ⁶Jare ayandu ñee jocua irundi mbaembae icove vae reta ipite pe jei:

—Mocui libra trigo jepi penti ara mbaraviqui jepi pegua, jare seis libra cebada jepi penti ara mbaraviqui jepi pegua. Jare agüiye erucumegua aceite jare vino.

⁷Jare Ovecha-rai uipea ñru libro iyemboyaa. Uyepea ma irundi. Jayave ayandu ñru mbaembae icove vae jei:

—Eyu.

⁸Jare aecha ñru cavayu. Ērei cua cavayu iyu vae. Jare opo cavayu re vae jee co Mano. Jare Cañitei jee vae oo Mano jee vae jaicue. Jare uñemee chupe reta mbaepuere jeta ye ye ivi pegua reta re, ipuere vaerã uyucaca reta quisepecu pe jare caruai pe jare mbaerasi pe jare maemimba pochi vae reta pe.

⁹Jare Ovecha-rai uipea ñru libro iyemboyaa. Uyepea ma pandepo. Jayave aecha uñemeearenda igüi pe Tumpa ñnee jeco pegua uyeyucaca vae reta. Echa'ã jae reta uyeyucaca, umimbeu Tumpa ñnee ñru vae reta pe ramo. ¹⁰Jare jae reta ñneeãta reve jei:

—Nde co jae iyoo mbae vae, oreYa. Nde co jae añete vae jei vae. ¿Maera pa ndeño neña ivi pegua oreyuca vae reta? ¿Quirã i yave pa ndiporaracata chupe reta? —jei reta.

¹¹Jare temimonde tĩ vae uñemee penti penti pe, jare penti vae jei chupe reta:

—Peputuño joco pe michi pegua. Echa'ã uyeyucacata vi rani perivi Tumpa pe uyeyocui vae reta, pe reta piyeyucaca rami —jei.

¹²Jare aecha Ovecha-rai uipea ñru libro iyemboyaa. Uyepea ma seis. Jayave ivi tanta ucãta. Jare guarasi uyeyapo jũ penti tarapo jũ vae rami, jare yasi uyeyapo pita tugüi rami. ¹³Jare yasitata ara re ñügüinoi vae reta oa ivi pe, penti iva ía yagüiye mbae vae reta oa jáca güi ivitu tanta umicãta yave vae rami. ¹⁴Jare ara etei uyembiyao mbite rupi jare uñeñoma penti tupapire uñeñoma rami. Jare opaete ivitu reta jare ivi i mbite pe ñügüinoi vae reta usiri jenda güi. ¹⁵Jare ivi pegua reta juvicha guasu reta jare mburuvicha reta jare icocatu vae reta jare sundaro reta juvicha reta jare mbaepuere güinoi vae reta jare opaete uyeyocui vae reta jare opaete uyeyocui mbae vae reta uñemi ivicua reta pe jare ita ivitu reta re ñügüinoi vae reta ipite rupi. ¹⁶Jare jei ivitu guasu reta jare ita reta pe:

—Pea oreré. Oreñomi guapia pe uguapi vae jova güi. Oreñomi, agüiye vaerã nduecha Ovecha-rai. Echa'ã jae pochi ete oreve —jei reta—. ¹⁷Ou ma uvãe ara Ovecha-rai pochi vaerã oreve, jare mbaeti etei quia ipuere umiaguanta —jei reta.

7

Ciento cuarenta y cuatro mil vae reta

¹Jare cua jaicue rupi aecha irundi ángel reta uyemboi ñügüinoi ivi pe. Penti uyemboi guarasi oẽ vae coti, jare ñru uyemboi guarasi uique vae coti. Ñru uyemboi norte coti, jare ñru uyemboi sur coti. Jare jae reta oyopia irundi ivitu ivi iyipi rupi uyepeyu vae, agüiye vaerã uyepeyu ivi reta iárambo jare i guasu reta iárambo, jare agüiye vaerã uipeyu ivira reta. ²⁻³Jare aecha ñru ángel ou guarasi oẽ vae coti güi, jare jocua ángel güeru Tumpa imeño mai ico vae imarca. Jayave ángel ñneeãta reve jei jocua irundi ángel reta:

—Agüiye perucumegua ivi reta jare i guasu reta jare ivira reta, ndei ñaneTumpa jembiocui reta isiva numimarca mbove.

Echa'ã jocua irundi ángel pe uñemee ma mbaepuere urucumegua vaerã ivi reta jare i guasu reta.

⁴Jare ayandu mbovi Tumpa jembiocui reta ángel reta umimarca vae. Umimarca reta ciento cuarenta y cuatro mil Israel pegua reta opaete ati reta güi. ⁵Umimarca reta doce mil Judá ñeñoñaeta reta güi. Umimarca reta doce mil Rubén ñeñoñaeta reta güi. Umimarca reta doce mil Gad ñeñoñaeta reta güi. ⁶Umimarca reta doce mil Aser ñeñoñaeta reta güi. Umimarca reta doce mil Neftalí ñeñoñaeta reta güi. Umimarca reta doce mil Manasés ñeñoñaeta reta güi. ⁷Umimarca reta doce mil Simeón ñeñoñaeta reta güi. Umimarca reta doce mil Leví ñeñoñaeta reta güi. Umimarca reta doce mil Isacar ñeñoñaeta reta güi. ⁸Umimarca reta doce mil Zabulón ñeñoñaeta reta güi. Umimarca reta doce mil José ñeñoñaeta reta güi. Umimarca reta doce mil Benjamín ñeñoñaeta reta güi.

Jeta ete vae jemimonde tĩ vae reta

⁹Cua jaicue rupi aecha jeta ete vae opaete ivi ambiembie ipite güi yugüeru vae reta. Mbaeti quia ipuere uipapa. Jae reta uyemboi ñügüinoi jocua guapia jare Ovecha-rai jovai. Jae reta jemimonde tĩ jare ipo pe güinoi carandaí joqui. ¹⁰Jare ñneeãta reve jei reta:

—ÑaneTumpa guapia pe uguapi vae upurumbiasa vae co. Ovecha-rai vi upurumbiasa vae co —jei reta.

¹¹ Jare opaete ángel reta uyemboi ñugüinoi jocua guapia jare jocua tenondegua reta jare jocua irundi mbaembae icove vae reta iyipi rupi. Jayave jae reta uyeatica guapia jovai jare umbiadora Tumpa. ¹² Jae reta jei:

—Amén. Ñamee yasurupai tuicha ñaneTumpa pe. Jae co iyaracuaa catu vae. Jae co opaete mbaepuere güinoi vae. Tuyembioraca jaeño mai pegua. Amén —jei reta.

¹³ Jayave penti jocua tenondegua vae upirandu cheve:

—¿Quía reta pa co cua jemimonde tí vae reta? ¿Queti güi pa yugüeru? —jei.

¹⁴ —Cheya, nde co ndicuaa —jae chupe.

Jayave jei cheve:

—Cua reta yugüeru cua pe uiporara ete rendave pe. Uputuca jemimonde jare umiñ Ovecha-rai jugüi pe —jei—. ¹⁵ Jáeramo yugüireco ma Tumpa iguapia jovai, jare uyeiocui reta Tumpa pe ara rupi jare pítu rupi Tumpa jo pe. Jare guapia pe uguapi vae uyandarecota jese reta —jei—. ¹⁶ Ndarau ye iyembaí reta. Ndarau ye iúe reta. Ndarau ye jasi chupe reta guarasi. ¹⁷ Echa'á Ovecha-rai jocua guapia mbite pe oí vae uyandarecota jese reta jare güiraata reta icua i oé vae tecove umee vae reta pe. Jare Tumpa oyoeta jesai chugüi reta —jei.

8

Libro iyemboyaa taicuegua vae

¹ Jare Ovecha-rai uipea írú libro iyemboyaa. Uyepea ma siete. Jayave mbaeti mbae uyendu ara pe media ora rupi. ² Jare aecha jocua siete ángel Tumpa jovai uyemboi ñugüinoi vae reta. Jare uñemee chupe reta siete trompeta.

³ Jare ou írú ángel uyemboi mbae ipiche cavi vae imesa iyipi pe, jare güinoi mbae ipiche cavi vae jiru oro pegua. Jare uñemee ángel pe jeta mbae ipiche cavi vae, ángel umee vaerá Tumpa pe opaete uñeño tee Tumpa peguará vae reta iyerure reta reve jocua mbae ipiche cavi vae imesa oro pegua pe. Echa'á jocua mesa oí Tumpa iguapia jovai. ⁴ Jare mbae ipiche cavi vae jatáti jare uñeño tee Tumpa peguará vae reta iyerure reta uyupi páve ángel ipo güi Tumpa jovai.

⁵ Jayave ángel uipisi jocua mbae ipiche cavi vae jiru jare umitinee tatápi jendi vae mesa pe oí vae pe. Jayave omombo ivi pe. Jare jiapu ara, jare uyecuaa ama uvera vae reta, jare ivi ucáta.

Trompeta reta

⁶ Jare jocua siete ángel siete trompeta güinoi vae reta uñemicuatíro umiñee vaerá.

⁷ Jayave penti ángel umiñee trompeta, jare oa ivi pe amandau jare tata tugüi reve. Jare mbite seri ivira reta jare opaete ñana ocai.

⁸ Jayave írú ángel umiñee trompeta. Mocui ma umiñee. Jare penti ivitu guasu echa vae oa i guasu pe. Ocai echa jocua ivitu guasu. Jare mbite seri i guasu uyeyapo tugüirá. ⁹ Jare mbite seri jevae i rupigua i guasu pe yugüireco vae reta umano. Jare mbite seri chalana guasu reta icumegua.

¹⁰ Jayave írú ángel umiñee trompeta. Mbapi ma umiñee. Jare oa ara güi penti yasitata tuicha vae. Jendi oí penti lámpara rami, jare oa mbite seri i usiri vae reta pe jare icua icua i oé vae pe. ¹¹ Jare jocua yasitata co jee Ajenjo. Jare jocua mbite seri i usiri vae reta iro ma. Jare jeta ete vae umano i iro vae jou ramo.

¹² Jayave írú ángel umiñee trompeta. Irundi ma umiñee. Jare mbae uyeyapo guarasi pe agüiye vaerá jembipe irundi ora rupi opa ara. Jae ramiño vi mbae uyeyapo yasi jare yasitata reta pe agüiye vaerá jembipe irundi ora rupi opa pítu. ¹³ Jayave aecha penti güiraquee uveve ara mbite rupi, jare ayandu iñeeáta reve jei:

—Ivi pegua reta uiporara eteta co írú mbapi ángel reta trompeta umiñee yave. Echa'á jae reta ndeño umiñee —jei.

9

¹ Jayave írú ángel umiñee trompeta. Pandepo ma umiñee. Jare aecha penti yasitata oa ara güi ivi pe. Jare uñemee chupe ivicua quipe ete vae illave. ² Jayave uipea ivicua quipe ete vae, jare jocua ivicua güi oé tatáti. Tatáti tata tuicha ete vae güi oé vae echa. Jare guarasi uyecuaa'á tatáti ivicua güi oé vae jeco pegua. Jáeramo pítumimbi ma oí.

³ Jare oé jocua tatáti güi tucu reta, jare uguata ivi rupi. Jare uñemee chupe reta mbaepuere oñöpi vaerá ivi pegua reta, chumicarape reta ñaneöpi rami. ⁴ Jare Tumpa oyocui tucu reta agüiye vaerá urucumegua ñana jare ivira reta jare opaete temiti reta. Èrei ipuere oñöpi mbaeti güinoi Tumpa imarca isiva re vae reta. ⁵ Jare uñemee tucu reta pe uiporaraca vaerá ivi pegua reta pe pandepo yasi pegua. Tucu reta ndarau upuruyuca. Jaeño jasi eteta ivi pegua reta pe, penti chumicarape ñaneöpi yave jasi ete yandave vae rami. ⁶ Jare jocua ara

reta pe ivi pegua reta uipota tēita umano. Ērei ndarau ipuere. Iquirēi ete tēita umano. Ērei ndarau etei ipuere.

⁷ Jare jocua tucu reta cavayu uñemicuatīro ma uñerāro vaerā vae reta echa. Jare iñāca re güinoi vae corona oro pegua echa. Jare jova cuimbae jova echa. ⁸ Jare ía cuña ía echa. Jare jāi reta yaguapīta jāi reta echa. ⁹ Jare ipitía re güinoi vae camisa fierro pegua echa. Jare uveve reta yave, ipepo tanta jiapu, jeta ete cavayu reta uruguata icarretón ñerāro pe jiapu rami. ¹⁰ Jare tucu reta juguai chumicarape juguai echa. Jare juguai pe güinoi ipōpia. Jare güinoi mbaepuere uiporaraca vaerā ivi pegua reta pe pandepo yasi pegua. ¹¹ Jare jocua tucu reta juvicha guasu penti ángel jocua ivicua quipe ete vae pe ico vae co. Jare hebreo iñee pe jae jee co Abadón. Jare griego iñee pe jee co Apolión.

¹² Uasa ma penti susere. Ērei mocui mbaesusere ye uyeyapota curi.

¹³ Jayave ĩru ángel umiñee trompeta. Seis ma umiñee. Jare ayandu ñee jocua mbae ipiche cavi vae imesa oro pegua jāti reta ipite güi ou vae. Jocu mesa oĩ Tumpa jovai jare güinoi irundi jāti. ¹⁴ Jare jocua ñee jei jocua ángel trompeta umiñee ramo vae pe:

—Iyora jocua irundi ángel i usiri vae Eufrates pe uñeapīti vae reta.

¹⁵ Jayave oyora jocua irundi ángel reta. Jare reta uñemicuatīro ma uyuca vaerā mbite seri ivi pegua reta. Uicuaa reta año jare yasi jare ara jare ora uyuca reta vaerā. ¹⁶ Jare uyepapa sundaro cavayu re opo vae reta. Ayandu doscientos millones co ñugüinoi.

¹⁷ Jare aecha jocua cavayu uyecuaa cheve vae reta. Aecha vi opo jese vae reta ipitía rupi güinoi icamisa fierro pegua pīta vae jare jovi vae jare iyu vae. Jare cavayu reta iñāca yaguapīta iñāca echa. Jare cavayu reta iyuru güi oē tata jare tatāti jare azufre. ¹⁸ Jare tata jare tatāti jare azufre cavayu reta iyuru güi oē vae uyuca mbite seri ivi pegua reta. ¹⁹ Echa'ā jocua cavayu reta güinoi mbaepuere uyuca vaerā ivi pegua reta iyuru pe jare juguai pe. Echa'ā juguai mboi rami co. Güinoi iñāca ipuere vaerā uichuu ivi pegua reta.

²⁰ Jare opaete ivi pegua reta uyeyucaca mbae vae cua mbaepuruyuca reta pe vae ueya'ā etei icavi mbae vae jecuaeño uyapo vae. Jecuae umbiadora reta aña reta jare tumpa-raanga oro pegua jare corepoti pegua jare bronce pegua jare ita pegua jare ivira pegua, yepe tēi tumpa-raanga reta ipuere'ā uecha jare ayandu jare uguata. ²¹ Jare eta jecuae upuruyuca jare uyapo paye reta jare uyapo aguasa jare imonda.

10

Ángel jare libro michi vae

¹ Jare aecha ĩru ángel ipirāta ete vae ugüeyi ou ara güi. Jemimonde co jae penti amapītu jare iñāca re oĩ penti yii. Jova guarasi echa jare ipi mocui tata jendi vae echa. ² Jare güinoi ipo pe penti libro michi vae uyepea oĩ vae. Jare ou uyemboi i guasu re jare ivi re. Ipi iyacata oĩ i guasu re jare ipi iyaso oĩ ivi re. ³ Jayave tanta usapicai penti yaguapīta uñee rami. Jare ángel usapicai ma yave, jiapu ara siete vese.

⁴ Jare siete vese ma jiapu ara yave, añemicuatīro mbae aicutía vaerā. Ērei ayandu ñee ara güi jei cheve:

—Agüiye emimbeu quía pe mbae siete ara jiapu reta jei vae. Agüiye icuatía mbae jei vae —jei.

⁵ Jare jocua ángel aecha uyemboi i guasu re jare ivi re vae uupi ipo ara coti. ⁶ Jare jei Tumpa jee re opata uyeyapo imambae. Tumpa co jae imeño mai ico vae. Jare uyapo ara jare opaete ara re oĩ vae, jare ivi jare opaete ivi pe oĩ vae, jare i guasu jare opaete i guasu pe oĩ vae. ⁷ Ērei ĩru ángel umiñeeta trompeta. Siete ma co cua re. Jare jocua ara reta pe jocua ángel umbipi umiñee yave, Tumpa opata uyapo jocua tenonde yave uyecuaa'ā vae. Echa'ā Tumpa uicuaaca cua iñee araca umimbeu vae reta pe. Echa'ā jae reta uyeyocui Tumpa pe.

⁸ Jare ayandu ye ñee ara güi jei cheve:

—Eua ángel i guasu re jare ivi re uyemboi oĩ vae pe ipisi jocua libro michi vae uyepea oĩ vae ángel ipo pe oĩ vae.

⁹ Jayave aa ángel coti jare jae chupe:

—Emee cheve jocua libro michi vae.

Jayave ángel jei cheve:

—Ipi opa jeu. Ndeu ma yave, nderie jasita ndeve, Ērei ndeyuru pe jēeta co ei rami —jei.

¹⁰ Jayave aequi jocua libro michi vae ángel ipo güi jare opa jau. Jare cheyuru pe jēe ete co ei rami. Ērei jau ma yave, cherie jasi cheve.

¹¹ Jayave ángel jei cheve:

—Nemimbeu yeta co Tumpa iñee jeta ete vae ivi ambiembie pegua pe jare mburuvicha guasu reta pe.

11

Mocui cuimbae umimbeu Tumpa vae reta

¹ Jare uñemee cheve penti ivira mbaembae amiaanga pipe vaerã. Jare ayandu ñee jei cheve:

—Epüa ecua emiaanga Tumpa jo jare uñemeearenda, jare ipapa Tumpa jo pe umbiadora Tumpa vae reta. ² Ërei agüiye emiaanga Tumpa jo joca. Echa'ã jocua oca uñemee judío mbae vae reta pe. Jare jae reta güinoita mbaepuere tenta guasu uñeñoño tee Tumpa peguarã vae re cuarenta y dos yasi pegua —jei—. ³ Jare ameeeta mbaepuere jocua mocui cuimbae chemimbeuta vae reta pe, jare jae reta umimbeuta chiñee mil doscientos sesenta ara pegua. Jare mocui reve uyemondeta temimonde jü vae pe —jei.

⁴ Jocua mocui ivira oliva jee vae uyemijaanga jocua mocui cuimbae reta re. Jae ramiño vi jocua mocui vela iguapica Tumpa ivi uyapo vae jovai uyemboi vae uyemijaanga jocua mocui cuimbae reta re. ⁵ Jare ime yave quía iquirëi tēi uyapo icavi mbae vae jocua mocui cuimbae reta pe vae, oēta tata jocua mocui cuimbae reta iyuru güi jare opata uapi jovaicho reta. Jucuarãita umano iquirëi tēita uyapo icavi mbae vae jocua mocui cuimbae reta pe vae. ⁶ Cua mocui reve güinoita mbaepuere ara re agüiye vaerã oqui opaete ara reta Tumpa iñee umimbeu reta rambueve. Jae ramiño vi güinoita mbaepuere i re uyapo vaerã tugüirã. Jae ramiño vi güinoita mbaepuere uiporaraca vaerã ivi pegua reta pe ipotave mbaerasi jae reta uipota rupiño.

⁷ Jare opa ma Tumpa regua umimbeu yave, jocua maemimba ivicua quipe ete vae güi oēta vae uñerãrota jae reta ndive jare umiamirita jare uyucata. ⁸ Jare jocua mocui cuimbae jetecue upitata calle pe jocua tenta guasu yandeYa curusu re uyecutu vae pe. Yandepuere yambijee jocua tenta guasu Sodoma jare Egipto. Echa'ã jocua tenta guasu pegua reta oyovaicho Tumpa ndive. ⁹ Jare opaete ivi ambiembie pegua reta umaeta jocua mocui cuimbae jetecue re mbapi ara y medio pegua. Ndarau umaño reta quía re oñoti vaerã. ¹⁰ Jare ivi pegua reta uyeroviata jocua mocui cuimbae jetecue re. Uypota reta fiesta jare omondota uyupe regalo reta. Echa'ã ndei umano mbove, jocua mocui Tumpa iñee umimbeu vae reta uiporaraca ete ivi pegua reta pe.

¹¹ Jare mbapi ara y medio uasa ma yave, Espiritu Santo Tumpa güi ou vae umee tecove jocua mocui jetecue pe, jare mocui reve upüa uyemboi. Jare cua uecha vae reta uquiye ete co. ¹² Jare uyendu ñee ara güi. Iñeeãta reve jei:

—Piyupi cua pe.

Jayave jocua mocui reve uyupi ara pe amapütu reve. Jare jovaicho reta uecha yugüiraa.

¹³ Jare jocua ora pe etei ivi tanta ucãta jare jeta catu tenta reta usururu jocua tenta guasu pe. Jare jocua ivicãta pe umano siete mil cuimbae reta. Jare tenta guasu pegua umano mbae vae reta uquiye ete jare umbiadora Tumpa ara pe ico vae.

¹⁴ Uasa ma mocui susere. Ërei ñru mbaesusere imambae uyeyapota.

Trompeta taicuegua vae

¹⁵ Jare ñru ángel umiñee trompeta. Siete ma umiñee. Jare uyendu ñee reta ara pe. Iñeeãta reve jei reta:

—Ivi pegua iporoyocuaia reta uyeyapo ma yandeYa iporoyocuiarã. Uyeyapo ma Cristo iporoyocuiarã. Jare jae oporoyocuita jaeño mai pegua —jei reta.

¹⁶ Jare jocua veinticuatro tenondegua reta Tumpa jovai iguapia reta pe uguapi ñugüinoi vae uyeatica Tumpa jovai umbiadora vaerã. ¹⁷ Jare jei reta:

—OreYa Tumpa. Nde co jae opaete mbaepuere güinoi vae. Nde co jae iyipi güive jare añave jecuaeño ico vae. Nde co jae jecuae oita vae. Numee yasurupai ndeve. Echa'ã ndicuaaca ma quirã nembraepuere tuicha ete co, jare añave ndeporoyocui neñ —jei reta —. ¹⁸ Jare ivi pegua reta pochí ndeve. Ërei nde vi ndepochí chupe reta. Jare ou ma uvãe ara umanocue vae reta uñeãaca vaerã, jare nde neme vaerã imbaerã ñiñee umimbeu vae reta pe - echa'ã jae reta uyeyocui ndeve - jare uñeñoño tee ndeve peguarã vae reta pe. Jae reta co sambiaí reta jare ucuacuaa vae reta uipiu reve nembiaadora vae. Ou ma uvãe ara nde nembai vaerã ivi urucumegua vae reta —jei reta.

¹⁹ Jare Tumpa jo uyepa oñ ara pe jare uyecuaa Tumpa jo pe ita reta Tumpa uicuatía mboroyocui reta jese vae jiru. Jare uvera jare jiapu ara. Jare ivi ucãta. Jare oa jeta amandau.

12

Cuña jare maemimba guasu pita vae

¹ Jare uyecuaa ara re chepiacañi ete jese vae. Jae co penti cuña. Jemimonde guarasi co, jare uyemboi oñ yasi iárambo, jare icorona doce yasitata reta co. ² Ipurúa jare imembi oata ma oñ. Jãse imembirasi ramo.

³ Jare uyecuaa ye ara re ĩru chepiacañi ete jese vae. Jae co penti maemimba guasu pĩta vae. Siete co iñaca reta jare diez jati reta. Jare penti penti iñaca re güinoi corona. ⁴ Jare juguai uipisi mbite seri yasitata reta omombo ivi coti. Jare jocua maemimba guasu uyemboi cuña imembita vae jovai, opa vaerã tẽi jou imembi, oa ma yave. ⁵ Jare cuña imembi cuimbae co. Jocua imembi cuimbae oyocuita opaete ivi pegua reta ipopoca fierro pegua pe. Jare cuña imembi uyereraaca Tumpa pe Tumpa iguapia oĩ vae pe. ⁶ Jare jocua cuña osi ñana coti. Echa'ã joco pe Tumpa umicuaatĩro chupe jendarã. Jare amocue vae umingaru jocua cuña mil doscientos sesenta ara.

⁷ Jare uyeyapo penti ñerãro ara pe. Miguel jare ángel chupe uyeyocui vae reta uñerãro jocua maemimba guasu ndive. Jare maemimba guasu jare ángel chupe uyeyocui vae reta uñerãro jae reta ndive. ⁸⁻⁹ Ĕrei jae reta ipuere'ã umiamiri Miguel jare ángel chupe uyeyocui vae reta. Jare maemimba guasu uyemomboca ara güi. Mbaeti ye ma jendarã ara pe. Jocua maemimba guasu jocua mboi aracae Eva umingueta vae co. Jae co aña guasu. Jae co Satanás. Jae umbitavi opaete ivi pegua reta. Ĕrei jae uyemomboca ma ara güi ivi pe, jare ángel chupe uyeyocui vae reta vi uyemomboca ara güi jae ndive.

¹⁰ Jare ayandu ñee ara pe. Iñeeãta reve jei:

—Ou ma uvãe Tumpa upurumbiasa vaerã. Echa'ã jae güinoi opaete mbaepuere. Ou ma uvãe Tumpa oporoyocui vaerã Cristo imbaepuere rupi. Echa'ã Satanás umbijecose yanderivi reta Tumpa jovai ara rupi jare pĩtu rupi. Ĕrei añave uyemomboca ara güi —jei—. ¹¹ Jare yanderivi reta umiamiri Satanás Ovecha-rai jugüi rupi jare Tumpa iñee ĩru vae reta pe umimbeu vae rupi. Uicuaa reta umanota co, Ĕrei uquiye'ã umano vaerã —jei—. ¹² Jáeramo piyerovia pe reta ara pe pico vae. Ĕrei ivi pe pico vae reta jare i guasu pe pico vae reta piporara eteta co. Echa'ã aña guasu ugüeyi ma pepite pe. Jare jae pochi ete. Echa'ã jae uicuaa michi peguaño ma ipuere uparaviqui —jei.

¹³ Jare jocua maemimba guasu uicuaa yave uyemomboca ma co ivi pe, uaicuemoña jocua cuña imembi cuimbae vae. ¹⁴ Ĕrei uñemee cuña pe mocui güiraquee tuicha vae ipepo, ipuere vaerã uveve ñana pe uñemi vaerã jocua mboi güi. Jare joco pe amocue vae umingaru mbapi año y medio.

¹⁵ Jare jocua mboi omombo jeta i iyuru güi. Uipota tẽi jocua iporu uepiti vaerã cuña jare güiraa vaerã uyuca. ¹⁶ Ĕrei ivi etei ombori cuña. Echa'ã ivi uyepea, yande yaipea yandeyuru vae rami, jare iporu jocua maemimba guasu iyuru güi oẽ vae opa ucañi ivi uyepea vae pe. ¹⁷⁻¹⁸ Jayave maemimba guasu pochi cuña pe, jare oo uñerãro cuña imembi ndeiño umano vae reta ndive. Echa'ã jae reta uyapo Tumpa iporoyocui reta jare umimbeu Jesús regua.

13

Mocui maemimba guasu reta

¹ Jare jocua maemimba guasu uyemboi oĩ i guasu jembei pe. Jare aecha ĩru maemimba guasu oẽ i guasu güi. Siete co iñaca reta jare diez jati reta. Jare güinoi corona penti penti jati re. Jare iñaca reta re güinoi tee reta. Jare jocua tee reta uicuaaca quirãi jocua maemimba guasu jecuaeño jei icavi mbae vae Tumpa coti. ² Jare maemimba guasu joco pe aecha vae penti yagua echa. Jare ipi oso ipi echa, jare iyuru yaguapita iyuru echa. Jare maemimba guasu tenonde aecha vae umee cua ĩru maemimba guasu pe imbaepuere. Jare umaeño jese uguapi vaerã iguapia pe jare güinoi vaerã mbaepuere tuicha vae.

³ Jare aecha penti jocua maemimba guasu i guasu güi oẽ vae iñaca ipere umano vaerã tẽi. Ĕrei ucuera ma jocua ipere mano pegua güi. Jare opaete ivi pegua reta ipiacañi jocua maemimba guasu re. ⁴ Jare opaete ivi pegua reta umbiadora maemimba guasu tenonde aecha vae. Echa'ã jae umee mbaepuere tuicha vae ĩru maemimba guasu pe. Jae ramiño vi opaete ivi pegua reta umbiadora jocua ĩru maemimba guasu. Jae reta jei:

—Mbaeti co quía ye cua maemimba guasu rami. Mbaeti etei quía ipuere uñerãro jae ndive.

⁵ Jare Tumpa umaeño jocua ĩru maemimba guasu re uyembutuicha vaerã jare jei vaerã icavi mbae vae Tumpa coti. Jare uñemee chupe mbaepuere jucuarãi uyapo vaerã cuarenta y dos yasi. ⁶ Jare jecuaeño jei jeta icavi mbae vae Tumpa coti jare Tumpa jee coti jare Tumpa jenta coti jare ara pe yugüireco vae reta coti. ⁷ Jare Tumpa umaeño jese uñerãro vaerã uñeño tee Tumpa peguarã vae reta ndive jare umiamiri vaerã. Jare uñemee chupe mbaepuere opaete ivi ambiembie pegua reta vae re. ⁸ Jare umbiadora opaete ivi pegua reta jee uyecuatia'ã oĩ Ovecha-rai ĩlibro tecove opa mbae vae pegua pe vae. Ovecha-rai uyeyucaca co ndei ivi uyeyapo mbove.

⁹ Uipota uyandu vae tuyapisaca cua re. ¹⁰ Upurumiamiri vae reta uyucata amocue vae quisepecu pe, jae reta etei quisepecu pe upuruyuca ramo. Jare upurumiamiri vae reta

güiraata İru vae reta ivi güi jembiocui retarã. Jáeramo icavi co uñeño tee Tumpa peguarã vae reta ipiaguasu vaerã jare jecuaeño mburugüirovia güinoi vaerã.

¹¹ Jare aecha İru maemimba guasu oë ivigüi güi. Jare mocui co jãti penti ovecha rami. Èrei uyemingueta jocua maemimba guasu tenonde aecha vae rami. ¹² Jare imbaepuere oyovaque jocua İru maemimba guasu i guasu güi oë vae imbaepuere ndive, jare oyocui opaete ivi pegua reta umbiadora vaerã jocua İru maemimba guasu ipere mano pegua güi ucuera vae. ¹³ Jare maemimba guasu taicue aecha vae uyapo jeta miacañi reta. Echa'ã jae mbae uyapo tata ou vaerã ara güi ivi pegua reta jovaque. ¹⁴ Jare imbaepuere pe uyapo miacañi reta jocua İru maemimba guasu jovaque. Jare jucuarãi umbitavi ivi pegua reta. Jare jei ivi pegua reta pe uyapo vaerã jocua İru maemimba guasu jaanga. Echa'ã umimandúa reta quirãi ipere ete penti quisepucu pe, èrei icove ye. ¹⁵ Jare jocua maemimba guasu taicue aecha vae güinoi mbaepuere umee vaerã tecove jocua İru maemimba guasu jaanga pe, jocua jaanga uyemingueta vaerã. Jare uyucaca opaete ñatëi umbiadora maemimba guasu jaanga vae reta.

¹⁶ Jare oyocui opaete vae - sambiaï reta jare ucuaucua vae reta, icocatu vae reta jare iparavete vae reta, uyeyocui mbae vae reta jare uyeyocui vae reta - güinoi vaerã penti marca ipo iyacata re ani isiva re. ¹⁷ Jare ime yave quia jocua İru maemimba guasu imarca ani jee ani jee inúmero mbaeti güinoi vae, ipuere'ã mbae ogua jare ipuere'ã mbae umee. ¹⁸ Icavi co penoi vaerã aracuaa. Uicuaa cavi vae tuipapa maemimba guasu inúmero. Echa'ã penti cuimbae inúmero. Inúmero co seiscientos sesenta y seis.

14

Ciento cuarenta y cuatro mil vae reta icanta

¹ Jare aecha jocua Ovecha-rai uyemboi oï ivitu guasu Sión re, jare joco pe ñügüinoi jae ndive jocua ciento cuarenta y cuatro mil vae reta. Jae reta isiva re uyecuatía oï Ovecha-rai jee jare Ovecha-rai Tu jee. ² Jare ayandu ñee ara güi. Tanta jiapu i guasu jiapu rami jare ara jiapu rami. Jare ayandu vi arpa ombopu vae reta iarpa ombopu ñügüinoi.

³ Jare ucanta reta penti canta ipiau vae Tumpa iguapia jare jocua irundi mbaembae icove vae reta jare tenondegua reta jovai. Jare mbaeti quia ipuere uicuaa jocua canta, jaeño jocua ciento cuarenta y cuatro mil vae reta. Echa'ã Cristo uepi jocua reta ivi pegua reta ipite güi. ⁴ Jae reta uyeminguia'ã cuña reta re. Echa'ã güireco'ã etei cuña. Jae reta yugüiraa Ovecha-rai jaicue jae que rupi oo vae rupi. Jae reta uyerepica co ivi pegua reta ipite güi. Jae reta rani uyeyucaca, Tumpa jare Ovecha-rai pe uyeyocui ramo. ⁵ Jare jae reta upurumbitavi'ã etei. Mbaeti quia ipuere umbijeco reta mbae re.

Ángel reta ñee reta

⁶ Jare aecha İru ángel uveve ara mbite rupi. Tumpa umee ángel pe umimbeu vaerã ñee icavi vae opa mbae vae ivi pegua reta pe. Umimbeu opaete ivi ambiembie pegua reta pe. ⁷ Ñeeãta reve jei chupe reta:

—Pequiye Tumpa güi jare pemiadora. Echa'ã ora ou ma uvãe upuruãa vaerã. Pemiadora. Echa'ã jae uyapo ara jare ivi jare i guasu jare icua i oë vae reta —jei.

⁸ Jare jocua ángel jaicue uveve İru ángel jare jei:

—Jocua tenta guasu Babilonia jee vae opa ma uyembaï. Jocua Babilonia pegua reta umbiadora tumpa-raanga reta, jare uicuaaca opaete İru ivi pegua reta pe jucuarãi uyapo vaerã. Jáeramo Tumpa pochi chupe reta —jei.

⁹ Jare İru ángel uveve jaicue, jare ñeeãta reve jei:

—Ime yave quia jocua maemimba guasu i guasu güi oë vae jare jaanga umbiadora jare imarca isiva re ani ipo re güinoi vae, ¹⁰ jae uiporara eteta. Echa'ã Tumpa pochi eteta chupe jare uiporarata eteta chupe. Jocua nunga uiporarata tata jare azufre ángel uñeño tee Tumpa peguarã vae reta jare Ovecha-rai jovai —jei—. ¹¹ Jare tatãti uyupita jaeño mai pegua jocua reta uiporarata ñügüinoi vae güi. Jare jae reta ndarau ipuere uputuu ara rupi jare pïtu rupi. Echa'ã umbiadora reta jocua maemimba guasu jare jaanga jare güinoi maemimba guasu jee imarca —jei.

¹² Icavi co ipiaguasu vaerã uñeño tee Tumpa peguarã vae reta. Jae reta uyapo Tumpa iporoyocui reta jare güirovia Jesús re.

¹³ Jare ayandu penti ñee ara güi jei cheve: —Icuatía cuarã: Uyeroviata co cua güive yandeYa re güirovia reve umanota vae reta.

—Uyeroviata co —jei Espiritu Santo—, Echa'ã uputuuta reta iparaviqui güi. Jare Tumpa uicuaacata jae reta uyapocue vae —jei.

Ou ma uvãe nembaviro vaerã

¹⁴Jare aecha amapĩtu tĩ vae jare jocua amapĩtu re uguapi oĩ cuimbaerã uyeyapo vae echa vae. Jare ifãca re güinoi corona oro pegua, jare uipisi penti hoz jaimbe vae. ¹⁵Jare penti ángel oẽ Tumpa jo güi jare ifñeeãta reve jei amapĩtu re uguapi oĩ vae pe:

—Iporu jocua hoz nenoĩ vae nembraeviro vaerã. Echa'ã ou ma uvãe nembraeviro vaerã. Echa'ã yagüiye ma ivi pe oĩ vae. Icavi co nembraeviro vaerã —jei.

¹⁶Jare amapĩtu re uguapi oĩ vae uiporu hoz güinoi vae ivi re jare uaviro ivi pe oĩ vae. ¹⁷Jare İru ángel oẽ Tumpa jo ara pe oĩ vae güi. Jae vi güinoi hoz jaimbe vae. ¹⁸Jare İru ángel oẽ uñemearendã güi. Jae güinoi mbaepuere tata re. Jare ifñeeãta reve jei ángel hoz jaimbe vae güinoi vae pe:

—Iporu hoz jaimbe vae nenoĩ vae jare eaviro ivi pegua uva reta. Echa'ã yagüiye ma uva reta —jei.

¹⁹Jayave jocua İru ángel uiporu ivi re hoz güinoi vae jare uaviro ivi pegua uva reta. Jayave omombo reta uva uñetami pipe vae pe. Jocua uyemijaanga Tumpa İarasi re. ²⁰Jare jocua uva uñetami pipe vae oĩ tenta guasu güi ñana coti. Joco pe uitami uva. Jare tugüi oẽ jocua uva uñetami pipe vae güi, jare uvãe cavayu reta iyayu rupi jare usiri sesenta legua rupi.

15

Ángel reta jare siete mbaesusere taicuegua vae reta

¹Jare uyecuaa ve ara re chepiacañi ete jese vae. Aecha joco pe siete ángel siete mbaesusere taicuegua vae güinoi vae reta. Echa'ã jocua reta re opata co Tumpa İarasi.

²Jare aecha i guasu vidrio pegua vae tata ndive uyea vae echa vae. Jare jocua maemimba guasu i guasu güi oẽ vae jare jaanga jare imarca jare jee inúmero uniamiri vae reta uyemboi ñugüinoi jocua i guasu vidrio pegua vae re, jare güinoi arpa reta Tumpa umee chupe reta vae. ³Jare ucanta reta Moisés Tumpa pe uyeyocui vae icanta jare Ovecha-rai icanta. Jei reta:

—Nde ndiyapo vae oremipiacañi ete, oreYa Tumpa. Nde nenoĩ opaete mbaepuere. Nde ndiyapo vae jupi co jare añete vae pegua co. Nde co jae opaete ivi pegua reta Juvicha Guasu —jei reta—. ⁴Opaete vae uquiyeta ndegüi, oreYa. Opaete vae umbiadorata nderee. Echa'ã ndeño co jae iyoa mbae vae. Opaete ivi pegua reta yugüeruta nembiaadora vaerã. Echa'ã uyecuaa ma quirãi nde nepuruãa jupi vae rupi —jei reta.

⁵Cua jaicue rupi aecha uyepea oĩ ara pe ita Tumpa uicuatia mboroyocui reta jese vae reta jiru oĩ vae. ⁶Jare jocua siete ángel reta oẽ Tumpa jo güi. Güinoi reta jocua siete mbaesusere. Jemimonde nieso tĩ vae iquia mbae vae co, jare ipitia rupi güinoi icuacuaa oro pegua. ⁷Jare jocua irundi mbaembae icove vae reta güi penti umee jocua siete ángel reta pe siete copa oro pegua. Jocua copa reta tinee ñugüinoi Tumpa İarasi pe. Tumpa co jae imeño mai ico vae. ⁸Jare Tumpa İyaruandaa jare imbaepuere jeco pegua Tumpa jo tinee tatãti pe. Jare mbaeti quia ipuere uique Tumpa jo pe ndei jocua siete mbaesusere jocua siete ángel reta güinoi vae uyeyapo mbove.

16

Siete copa Tumpa İarasi güinoi vae reta

¹Jare ayandu penti ñee Tumpa jo güi. Ifñeeãta reve jei jocua siete ángel reta pe:

—Pecua pepiyere ivi re jocua siete copa Tumpa İarasi güinoi vae reta.

²Jayave penti ángel oo upiyere copa güinoi vae ivi re. Jare opa ituyutuyu ivi pegua reta jocua maemimba guasu imarca güinoi vae. Echa'ã jae reta umbiadora jocua maemimba guasu jaanga.

³Jare İru ángel upiyere copa güinoi vae i guasu re. Mocui ma upiyere. Jare i guasu uyeyapo umanocue vae jugüi ramĩ. Jare opaete mbaembae i guasu pe yugüireco vae reta umano.

⁴Jare İru ángel upiyere copa güinoi vae i usiri vae reta jare icua i oẽ vae reta re. Mbaipi ma upiyere. Jare i usiri vae reta jare icua i oẽ vae reta uyeyapo tugüirã. ⁵Jare ayandu ángel i re mbaepuere güinoi vae jei:

—Jecuaeño iyipi güive jare añave nde co jae jupi vae, oreYa. Nde co jae iyoa mbae vae. Jáeramo ndiporaraca chupe reta —jei—. ⁶Echa'ã jae reta uyuca uñeño tee ndeve peguarã vae reta jare niñee umimbeu vae reta. Jáeramo neme ma chupe reta tugüi i ipepica pe. Icavi co ndiyapo vaerã jucuarãi —jei.

⁷Jare ayandu İru ñee uñemearendã güi jei:

—Icavi co, oreYa Tumpa. Nde nenoĩ opaete mbaepuere. Jecuaeño nepuruãa añete vae jare jupi vae rupi —jei.

⁸Jare İru ángel upiyere copa güinoi vae guarasi re. Irundi ma upiyere. Jare uñeme mbaepuere guarasi pe ipuere vaerã uapi ivi pegua reta tata pe. ⁹Jayave guarasi jasi ete jare uapi ivi pegua reta. Jáeramo ivi pegua reta jei icavi mbae vae Tumpa jee coti. Echa'ã jae

güinoi mbaepuere opaete cua susere reta re. Ĕrei ivi pegua reta ueya'ã iyemingqueta icavi mbae vae ipia pe oĩ vae. Umbiadora'ã etei Tumpa.

¹⁰ Jare İru ángel upiyere copa güinoi vae jocua maemimba guasu iguapia re. Pandepo ma upiyere. Jayave pĩtumimbi ou opaete maemimba guasu iporoyocua rupi. Jare opaete maemimba guasu pe uyeyocui vae reta uiporara ete. Uñecũsuu reta uiporara ete ramo. ¹¹ Jare jei reta icavi mbae vae Tumpa ara pe ico vae coti, uiporara ete jasi jare opa ituyutuyu ramo. Ĕrei jeseve ueya'ã reta icavi mbae vae uyapo vae.

¹² Jare İru ángel upiyere copa güinoi vae i usiri vae Eufrates jee vae re. Tuicha co jocua Eufrates. Seis ma upiyere. Jare tipa voi Eufrates. Jucuarãi Tumpa umicuatĩro mburuvicha guasu reta guarasi oẽ vae coti güi yugüeruta vae japerã. ¹³ Jare aecha jocua maemimba guasu tenonde aecha vae, jare jocua İru maemimba guasu i guasu güi oẽ vae, jare jocua İru maemimba guasu ivigüi güi oẽ vae - jae jei umimbeu co Tumpa İñee, Ĕrei upurumbitavi. Jare aecha penti añã iquia ete vae oẽ iyuruyuru güi. Mbapi pĩte echa jocua añã reta. ¹⁴ Jare eta co añã miacañi ipuere uyapo vae reta. Jare eta yugüiraõ opaete ivi rupi mburuvicha guasu reta jenta jenta rupi. Jare eta umbati opaete mburuvicha guasu reta uñerãro vaerã Tumpa opaete mbaepuere güinoi vae ndive. Uñerãrota reta co Tumpa ndive jocua ara pe.

¹⁵ —Mase —jei yandeYa—, che aa yeta immbae, penti imonda vae ou mbaembae oñomi rami. Piyeroviata co jecuaeño piñemicuatĩro yave. Jecuaeño piyapicatu peremimonde, agüiye vaerã pemara İru vae reta perecha penani pei yave —jei.

¹⁶ Jare Tumpa umbatica reta hebreo İñee pe Armagedón jee vae pe.

¹⁷ Jare İru ángel upiyere copa güinoi vae ivitu re. Siete ma upiyere. Jare uyendu penti ñee Tumpa jo ara pe oĩ vae güi Tumpa iguapia güi. İñeeãta reve jei:

—Opa ma uyeyapo.

¹⁸ Jare tanta japu ara. Jare uvera. Jare ivi tanta ucãta. Ivi pegua reta yugüireco güive jucuarãi'ã ucãta ivi. Echa'ã jocua ivicãta tanta ete co. ¹⁹ Jare jocua tenta guasu uyembiyao mbapi pe jare opaete ivi rupi jeta tanta guasu uyemba. Jare Tumpa imandúa jocua tenta guasu Babilonia jee vae re uiporaraca ete vaerã chupe. Echa'ã Tumpa pochĩ ete chupe. ²⁰ Jare opaete ivi i mbĩte pe ñugüinoi vae reta opa osi, jare mbaeti ma uñevãe ivitu guasu reta. ²¹ Jare oa ara güi amandau tuicha tuicha vae ivi pegua reta re. Jare amandau penti penti poi irundi arroba rupi. Jare ivi pegua reta jei icavi mbae vae Tumpa coti amandau jeco pegua. Echa'ã amandau uiporaraca ete ivi pegua reta pe.

17

Cuñã iaguasa vae

¹ Jare jocua siete ángel jocua siete copa güinoi vae reta güi penti ou jei cheve:

—Eyu cua pe. Taicuaaca ndeve quirãi uñeeacata co jocua cuñã iaguasa vae i guasu reta re uguapi vae —jei—. ² Ivi pegua mburuvicha guasu reta uyapo aguasa jocua cuñã ndive. Ivi pegua reta uipota ete uyapo aguasa jae ndive, usavipo vae uyúe ete vino rami —jei.

³ Jayave ángel cherera Espĩritu Santo imbaepuere pe ñãna coti. Jare joco pe aecha penti cuñã opo oĩ penti maemimba guasu pĩta vae re. Jare jocua maemimba guasu re uyecuatia oĩ jeta jee jare jocua cuatia reta rupi jei icavi mbae vae Tumpa coti. Jare siete co jocua maemimba guasu İñãca jare diez jãti. ⁴ Jare cuñã jemimonde pĩta, jare güinoi oro jare ita ipõra ete vae reta jete re. Uipisi penti copa oro pegua. Ĕrei jocua copa tinee oĩ mbaembae pichĩ vae pe. Echa'ã jocua cuñã iaguasa vae co. ⁵ Jare isiva re uyecuatia oĩ jee cuarãi: “Babilonia mbaepuere tuicha vae güinoi vae. Jae co iaguasa vae reta ichi. Jae co ivi pegua pichĩ vae uyapo vae reta ichi.” Jucuarãi uyecuatia oĩ. Jaeramo uyecuaa jocua cuñã jee.

⁶ Jare cuñã usavipo echa cheve. Echa'ã jou ma uñeñoõ tee Tumpa peguarã vae reta jugüi. Jare eta uyeyucaca umimbeu Jesús re ramo. Jare aecha yave jocua cuñã, chepiacañi ete jese.

⁷ Jare ángel jei cheve:

—¿Maera pa nepiacañi? Tamimbeu ndeve ndeño uyecuaa vae cuñã regua. Jare ramiño vi tamimbeu ndeve ndeño uyecuaa vae jocua maemimba guasu cuñã opo jese vae regua. Siete co jocua maemimba guasu İñãca jare diez jãti —jei—. ⁸ Maemimba guasu ndeecha vae icose, Ĕrei ico'ã ma. Ĕrei oẽta ivicua quipe ete vae güi. Ĕrei oo yeta cañitei pe. Jare ivi pe yugüireco vae reta uecha yave jocua maemimba guasu icose vae, ipiacañita reta. Echa'ã jae reta jee uyecuatia'ã oĩ libro tecove opa mbae vae pegua pe ivi uyeyapo güive. Jocua maemimba guasu mbaeti ma ico. Ĕrei ico yeta co —jei—.

⁹ Jare iyaracuaa vae uicuaata cua: Jocua siete İñãca uyemijaanga siete ivitu guasu cuñã uguapi jese vae re —jei cheve—. ¹⁰ Jare ramiño vi uyemijaanga siete mburuvicha guasu reta re. Pandepo mburuvicha guasu reta uasa ma. Pentĩ imeño ico, jare pentĩ ndeño ico. Jare jae ou yave, michi peguaño güinoita mbaepuere —jei—. ¹¹ Jare jocua maemimba guasu icose Ĕrei mbaeti ma ico vae icota İru mburuvicha guasurã. Ocho co jocua re. Ĕrei jae

oyovaque jocua siete vae güi penti ndive. Jare jae vi oota cañitei pe —jei—. ¹²Jare jocua diez jãti ndeecha vae uyemijaanga diez mburuvicha guasu reta re. Cua diez reve ndeiño güinoi iporoyocua. Ërei güinoita reta mbaepuere yugüireco vaerã mburuvicha guasu retarã penti ora pegua jocua maemimba guasu i guasu güi oẽ vae mbaepuere güinoi yave —jei cheve—. ¹³Opaete cua diez mburuvicha guasu reta penti ramiño co, jare omborita reta jocua maemimba guasu opaete imbaepuere pe. ¹⁴Cua reta uñerãota Ovecha-rai ndive, jare Ovecha-rai umiamirita. Echa'ã Ovecha-rai co jae opaete vae iya reta iYa. Jae co opaete mburuvicha guasu reta Juvicha Guasu. Jare Ovecha-rai ndive ñugüinoi vae reta Tumpa uiparavo vae reta co. Echa'ã Tumpa uiparavo jocua reta uyeyocui cavi vaerã Ovecha-rai pe —jei cheve ángel.

¹⁵Jayave jei cheve:

—Ndeecha ma jocua cuña iaguasa vae uguapi oĩ i guasu reta re. Jocua i guasu reta uyemijaanga opaete ivi ambiembie pegua reta re. ¹⁶Ndeecha ma vi jocua maemimba guasu jãti diez co. Jocua diez jãti reta uyemijaanga diez mburuvicha guasu reta re. Jae reta umitarẽita jocua cuña iaguasa vae. Ueyata reta jaeño upita vaerã. Jae nanita co. Jayave jocua diez mburuvicha guasu reta jouta cuña isoo jare opata uapi tata pe —jei—. ¹⁷Echa'ã Tumpa umiquirẽi jocua diez mburuvicha guasu reta umee vaerã iporoyocua penti ramiño jocua maemimba guasu pe. Jare maemimba guasu güinoita iporoyocua reta Tumpa iñee reta uyeyapo regua. ¹⁸Jare jocua cuña ndeecha vae uyemijaanga jocua tenta guasu opaete ivi pegua mburuvicha guasu reta re mbaepuere güinoi vae re —jei.

18

Babilonia uyembai ma

¹Jare cua jaicue rupi aecha İru ángel ugüeyi ou ara güi. Ángel imbaepuere tuicha ete co. Tembipe oi ivi rupi ángel umiembipe ramo. ²Jare ángel iñeeãta reve jei:

—Tenta guasu Babilonia jee vae uyembai ma. Añave yugüireco joco pe aña reta. Penti peresoriru rami co. Echa'ã opaete aña mbaembae pichii vae uyapo vae reta jare opaete güira mbaembae pichii vae uyapo vae reta yugüireco joco pe, pereso reta peresoriru pe yugüireco rami —jei—. ³Opaete ivi pegua reta uipota ete uyapo aguasa Babilonia pegua reta ndive, usavipo vae uyue ete vino rami. Jáeramo Tumpa pochí chupe reta. Jare ivi pegua mburuvicha guasu reta uyapo aguasa Babilonia pegua reta ndive. Jare opaete ivi rupi umaemee vae reta icocatu ma Babilonia pegua reta jeta mbaembae jepi ete vae ogua ramo —jei.

⁴Jare ayandu İru ñee ara güi jei:

—Peẽ joco güi, chembae reta, agüiye vaerã piyapo mbaeyoa reta jae reta uyapo rami, jare agüiye vaerã piporara mbaesusere reta chupe reta uyeyapota vae —jei—. ⁵Jae reta uyapo jeta ete mbaeyoa reta. Tumpa uiporaracata chupe reta imbaeyoa reta jeco pegua —jei—. ⁶Tuiporara reta, jae reta uiporaraca peve rami. Tuiporara ete reta opaete icavi mbae vae uyapo vae jeco pegua. Jeta ete icavi mbae vae uyapo reta İru vae reta pe. Jáeramo tuiporara ete reta. ⁷Jae reta uyembicate ete jare ogua jeta mbaembae jepi ete vae. Jáeramo tuiporara ete reta jare tipiatiti ete reta. Echa'ã jae reta jei iyupe ipia pe: 'Yaico mburuvicha guasu reta yugüireco rami. Yaico'ã co cuña ime umano vae reta yugüireco rami. Ndarau etei yandepiatiti' —jei reta, jei—. ⁸Jáeramo penti ara peño uyeyapota chupe reta jeta mbaesusere. Outa chupe reta caruai. Jae reta ipiatitita jare amanota. Jare jenta guasu opata ocai. Echa'ã yandeyã Tumpa uãata reta jare opaete mbaepuere güinoi —jei—.

⁹Jare ivi pegua mburuvicha guasu reta ipiatitita jese jare uyaota, jatãti uecha yave. Echa'ã jae reta uyapo aguasa joco pe, jare joco pe yugüireco yave, uyerovia ete opaete mbaembae jepi ete vae re. ¹⁰Ërei jae reta uyemboita mbiri tenta guasu güi, agüiye vaerã uiporara jocua guasu tenta pegua reta uiporarata rami. Jare jeita reta: 'Paravete. Babilonia penti tenta guasu tuicha ete vae co tẽi. Penti ora peño Tumpa uiporaraca chupe' —jeita reta, jei—. ¹¹Jare opaete ivi rupi umaemee vae reta ipiatitita jese jare uyaota. Echa'ã ndarau ma quã ogua imbaembae —jei—. ¹²Ndarau ma quã ogua mbaembae oro pegua jare corepoti pegua jare ita ipõra ete vae reta pegua, jare temimonde reta nieso ipõra ete vae jare seda, jare temimonde pita vae reta, jare mbaembae ivira icavi ete vae pegua. Ndarau ma quã ogua mbaembae maemimba tuicha vae elefante jee vae jãi pucu pegua jare ivira jepi ete vae pegua jare cobre pegua jare fierro pegua jare ita tanta ete vae pegua —jei—. ¹³Ndarau ma quã ogua mbaembae ipiche cavi vae reta, jare vino, jare aceite, jare harina ipu ete vae, jare trigo. Ndarau ma quã ogua mburica reta, jare ovecha reta, jare cavayau reta, jare carro reta, jare cuimbae reta, jare cuña reta —jei—.

¹⁴Babilonia pegua reta jecuaẽño uipota mbaembae jepi ete vae jare ipõra ete vae. Ndarau etei ma güinoi jocua mbaembae icavi vae —jei—. ¹⁵Ogua reta jeta ete jocua

mbaembae icavi vae. Jáeramo jocua mbaembae umee vae reta icocatu. Ērei umaemee vae reta uyemboita mbiri Babilonia güi agüiye vaerã uiporara jocua tenta guasu pegua reta uiporarata rami. Ipiatitita jese jare yuaota —jei—. ¹⁶ Jare jeita: ‘Paravete. Penti tenta guasu tuicha ete vae co tēi. Jare tenta guasu pegua reta jemimonde reta nieso ipōra vae co. Omonde reta temimonde pīta vae reta jare oñono reta iyee mbaembae oro pegua jare ita ipōra vae reta pegua’ —jeita reta, jei—. ¹⁷ ‘Icocatu ete reta. Ērei penti ora peño umicañi reta opaete imbaembae icavi vae’ —jeita reta, jei—. Jare opaete chalana guasu iya reta jare chalana guasu pe uparaviqui vae reta - opaete i guasu rupi uguata umaemee vaerã vae reta - uyemboita mbiri Babilonia güi —jei—. ¹⁸ Jare usapicaita reta tenta guasu jatāti uecha yave. Jare jeita reta: ‘Jocua tenta guasu tuicha ete co tēi opaete ĩru tenta guasu reta güi’ —jeita reta, jei—. ¹⁹ Jare oñonota reta ivicuii ināca re usapicai reve. Jae reta ipiatitita uyao reve jare jeita: ‘Paravete. Penti tenta guasu tuicha ete vae co tēi. Jocua tenta guasu pegua reta ogua jeta mbaembae jepi ete vae. Jáeramo opaete chalana guasu iya reta umaemee vae icocatu ma. Ērei penti ora peño opa ma imbaembae’ —jeita reta, jei—.

²⁰ Piyerovia jese, ara pe pico vae. Pe reta co jae temimondo reta jare Tumpa iñee umimbeu vae reta jare ĩru uñeñono tee Tumpa peguarã vae reta. Echa’ã Tumpa uiporaraca chupe reta, jae reta uiporaraca peve ramo —jei.

²¹ Jare penti ángel ipirãta ete vae uipisi penti ita. Tuicha co jocua ita umbaesio pipe vae rami co. Jayave ángel omombo ita i guasu pe jare jei:

—Jucuarãita uyembai imambae ete jocua tenta guasu Babilonia jee vae. Ndarau ye ma quía uecha —jei—. ²² Jare uyemimbi vae reta ndarau ye ma uyemimbi joco pe. Jae ramiño vi uparaviqui vae reta ndarau ye ma uparaviqui joco pe. Jae ramiño vi umbaesio vae reta ndarau ye ma umbaesio joco pe. ²³ Jae ramiño vi ndarau ye ma jendi joco pe mechero. Jae ramiño vi ndarau ye ma quía umenda joco pe. Echa’ã umaemee vae joco pe yugüireco vae reta uyembutuichacase ĩru vae reta pe. Ērei Babilonia pegua reta umbitavi opaete ivi pegua reta paye reta uyapo vae pe —jei.

²⁴ Jare Babilonia pe uñevãe Tumpa iñee umimbeu vae reta jugüi jare ĩru uñeñono tee Tumpa peguarã vae reta jugüi. Opaete ivi pe uyeyucaca vae reta jugüi uñevãe joco pe.

19

Ara pegua reta umbiadora yandeYa Tumpa

¹ Cua jaicue rupi ayandu jeta vae ara pe ñugüinoi vae reta iñeeãta reve jei:

—YandeYa tuyembiaadoraca. Echa’ã jae yanembiasa. YandeYa Tumpa opaete mbaepuere güinoi. Tuyembiaadoraca opaete vae pe —jei reta—. ² Jae upuruãa añete vae rupi jare jupi vae rupi. Echa’ã jae uña jocua cuña iaguasa vae mbaepuere tuicha vae güinoi vae. Echa’ã jocua cuña uyapoca mbaeyoa opaete ivi pegua reta pe aguasa uyapo vae rupi. Ērei Tumpa uiporaraca ma jocua cuña pe, jae uyucaca Tumpa jembiocui reta ramo —jei reta.

³ Jare jae reta jei ye:

—YandeYa tuyembiaadoraca. Tatāti uyupita jaeño mai pegua.

⁴ Jare jocua veinticuatro tenondegua reta jare jocua irundi mbaembae icove vae reta uyeatica jare umbiadora Tumpa iguapia pe uguapi oĩ vae. Jae reta jei:

—Amén. YandeYa tuyembiaadoraca.

⁵ Jare ou penti ñee Tumpa iguapia güi jei:

—Pembiaadora yandeYa Tumpa. Pe reta co jae Tumpa jembiocui reta. Pe reta co jae sambiai reta jare ucuacua vae reta uipiu reve umbiadora Tumpa vae —jei.

⁶ Jayave ayandu mbae ye. Jeta ete vae uyemingueta ñugüinoi echa cheve. Tanta jiapu i guasu jiapu rami jare ara jiapu rami. Jare ayandu jei:

—YandeYa tuyembiaadoraca. YandeYa Tumpa opaete mbaepuere güinoi vae oporoyocui ma —jei—. ⁷ Yayerovia ete jese jare yambiaadora. Echa’ã ou ma uvãe Ovecha-rai umenda vaerã jare jembirecorã vae uyeyapicatu cavi ma —jei—. ⁸ Jare uñemee jembirecorã vae pe omonde vaerã penti temimonde nieso ipōra vae. Jocua jemimonde iquia mbae jare tĩ asi. Echa’ã jocua nieso ipōra vae uyemijaanga jupi vae uñeñono tee Tumpa peguarã vae reta uyapo vae re —jei.

Ovecha-rai umendata

⁹ Jare penti ángel jei cheve:

—Icuatía cuarã: Ovecha-rai umenda yave, Tumpa uiparavota amocue vae ucaru vaerã jae ndive. Uyerovia eteta jocua reta —jei—. Cua ñee Tumpa iñee etei co —jei.

¹⁰ Jayave che ayeatica ángel jovai ambiadora vaerã. Ērei jae jei cheve:

—Agüiye chembiadora. Che vi ayeyocui Tumpa pe, nde ndiyeyocui chupe rami. Che vi amimbeu Jesús regua, yanderivi umimbeu jesegua rami. Tumpaño embiadora. Echa’ã

Jesús regua umimbeu vae reta umimbeu co Tumpa ifíee, Tumpa ifíee aracae umimbeu vae reta umimbeu rami —jei.

Cavayu tĩ vae re opo vae

¹¹ Jare aecha ara uyepoa oĩ. Jare aecha vi joco pe penti cavayu tĩ vae. Jare opo cavayu re yandeYa. Jae co jecuaeño jei vae uyapo vae. Jae co jecuaeño umimbeu cavi Tumpa regua vae. Jae upuruãa jupi vae rupi jare uñerãro jupi mbae vae uyapo vae reta ndive. ¹² YandeYa jesa tata jendi oĩ vae rami co, jare iñãca re güinoi jeta corona reta. Jare uyecuatía oĩ jese penti tee. Jaeño uicuaa jocua tee. Mbaeti quía ye uicuaa. ¹³ Jare jemimonde tugüi pe uñemipita vae co. Jare jae jee co Tumpa Ifíee. ¹⁴ Jare jeta ete vae yugüeru ara güi yandeYa jaicue jeta ete sundaro reta rami. Opo reta cavayu tĩ vae reta re. Penti penti jemimonde nieso ipõra vae co. Tĩ jare iquia mbae jocua jemimonde.

¹⁵ Jare yandeYa iyuru güi oẽ penti quisepecu jaimbe vae. Pipe uyucata jeta ivi pegua reta. Jare oporoyocuita ipopoca fierro pegua pe. Uiporaraca eteta opaete jovaicho reta pe. Echa'ã Tumpa opaete mbaepuere güinoi vae pochi ete chupe reta. ¹⁶ Jare yandeYa jemimonde re jare iu re uyecuatía oĩ penti tee. Jae co cua: "Mburuvicha guasu reta Juvicha Guasu jare opaete vae iya reta iYa."

¹⁷ Jare aecha penti ángel uyemboi oĩ guarasi re. Jare jae ifíeeãta reve jei opaete güira uveve ñugüinoi vae reta pe:

—Peyu piyembati. Tumpa opaete mbaepuere güinoi vae pemingaruta. ¹⁸ Peyu peu mburuvicha guasu reta jeteceue, jare sundaro reta juvicha reta jeteceue, jare cuimbae ipirãta ete vae reta jeteceue. Peyu peu cavayu reta jeteceue, jare opo jese vae reta jeteceue. Peyu peu jeta ete cuimbae reta jeteceue - uyeyocui mbae vae reta jeteceue jare uyeyocui vae reta jeteceue, sambiai reta jeteceue jare ucuaacuaa vae reta jeteceue —jei.

¹⁹ Jare aecha jocua maemimba guasu jare ivi pegua mburuvicha guasu reta jare opaete isundaro reta uyembati ma ñugüinoi uñerãro vaerã cavayu re opo vae jare isundaro reta ndive. ²⁰ Jare uyepisica jocua maemimba guasu jocua ñru maemimba guasu jei umimbeu co Tumpa ifíee upurumbitavi vaerã vae ndive. Echa'ã jocua upurumbitavi vae tenonde yave uyapo miacañi reta jocua maemimba guasu jovai, umbitavi vaerã maemimba guasu imarca güinoi vae reta. Echa'ã jae reta umbiadora jocua maemimba guasu jaanga. Jayave cua mocui reve uyemomboca jecove reve tata guasu pe. Joco pe jendi oĩ azufre. ²¹ Jare opaete maemimba guasu isundaro reta uyeyucaca cavayu re opo vae iquisepecu pe. Echa'ã jocua quisepecu oẽ iyuru güi. Jare opaete güira reta uyemingapiita jeteceue reta re.

20

YandeYa oporoyocuita mil año pegua

¹ Jare aecha penti ángel ugüeyi ou ara güi. Jae güinoi ivicua quipe ete vae illave, jare ipo pe aecha penti cadena tuicha vae. ² Jare ángel uipisi jocua maemimba guasu tenonde aecha vae. Jae co jocua mboi aracae Eva umingueta vae. Jae co año guasu. Jee co Satanás. Jare ángel uipocua Satanás mil año pegua. ³ Jayave omombo ivicua quipe ete vae pe. Jayave uyequenda ivicua jonque jare oñono jese mbae agüiye vaerã quía ipuere uipea ye. Jucuarãi uyapo agüiye vaerã Satanás umbitavi ivi pegua reta mil año pegua. Ërei mil año opa ma yave, Satanás uyeyoraca yeta michi pegua. ⁴ Jare aecha guapia reta jare amocue vae joco pe uguapi vae reta. Jare uñemee chupe reta upuruãa vaerã. Jare aecha Jesús regua umimbeu ramo uñeãcasiaca vae reta. Echa'ã jae reta umimbeu Tumpa ifíee. Jae reta umbiadora'ã jocua maemimba guasu i guasu güi oẽ vae, jare umbiadora'ã jaanga, jare mbaeti etei vi güinoi imarca isiva re jare ipo re. Jare jae reta icove ye yugüeru umanocue vae reta ipite güi jare oporoyocui Cristo ndive mil año. ⁵ Jocua reta tenonde icove ye yugüeru umanocue vae reta ipite güi. Ërei ñru umanocue vae reta icove yevi'ã jae reta ndive. Mil año uasa yave ramo icove ye ñru umanocue vae reta. ⁶ Uyeroviata reta co tenonde icove yeta yugüeru umanocue vae reta ipite güi vae reta. Echa'ã uñeñoño tee Tumpa peguarã vae reta co. Jocua mano mocuia ndarau ipuere jese reta. Jae reta yugüirecota sacerdote retarã, uyeyocui vaerã Tumpa jare Cristo pe. Jare oporoyocuita reta Cristo ndive mil año pegua.

⁷ Jare mil año opa ma yave, Satanás uyeyoraca yeta jare oẽta jocua peresoriru rami vae güi. ⁸ Jayave oota opaete ivi rupi umbitavi vaerã jeta ivi ambiembie pegua reta. Oota Gog pe jare Magog pe. Jare umbatita jeta ete vae uñerãro vaerã Cristo ndive. Jae reta jeta eteta co, ivicuñti i guasu jembei pe oĩ rami. ⁹ Jare aecha quirãi jae reta yugüeru opaete Israel pegua reta iivi rupi jare uyere ñugüinoi jocua tenta guasu Tumpa uau vae re. Echa'ã joco pe yugüireco uñeñoño tee Tumpa peguarã vae reta. Ërei Tumpa ombou tata ara güi, jare tata opa uapi reta.

¹⁰ Jare año guasu umbitavi reta vae uyemomboca tata guasu azufre jendi oĩ pipe vae pe maemimba guasu jare jocua ñru maemimba guasu jei umimbeu co Tumpa ifíee

upurumbitavi vaerã vae ñugüinoi vae pe. Jare joco pe mbapi reve uiporarata ara rupi jare pïtu rupi jaeño mai pegua.

Guapia tï vae

¹¹ Jare aecha penti guapia tï vae. Tuicha co. Jare aecha vi guapia pe uguapi oï vae. Ivi jare ara opa osi jae jovai güi. Jare mbaeti ma ivi jare ara jendarã. ¹² Jare aecha umanocue vae reta uyemboi ñugüinoi Tumpa jovai. Sambiaï reta jare ucuacuaa vae reta uyemboi ñugüinoi joco pe. Jare uyepea oï libro reta. Jae ramiño vi uyepea oï ñru libro. Jocua libro uicuaaca quía tecove opa mbae vae güinoi vae. Jare umanocue vae reta uñeãaca penti penti uyapocue vae rupi. Echa'ã penti penti uyapocue vae uyecuatía oï libro reta pe. ¹³ Jare i guasu umaefio opaete umanocue vae pipe ñugüinoi vae reta re oë vaerã chugüi. Jare mano jare cañitei umaefio opaete umanocue vae pipe ñugüinoi vae reta re oë vaerã chugüi. Jare penti penti uñeãaca uyapocue vae rupi. ¹⁴ Jare mano jare cañitei uyemomboca tata guasu pe. Cua co jae mano mocuia. ¹⁵ Jare jee uyecuatia'ã jocua libro tecove opa mbae vae pegua pe vae penti penti uyemomboca tata guasu pe.

21

Ara ipiau vae jare ivi ipiau vae

¹ Jare aecha ara ipiau vae jare ivi ipiau vae. Echa'ã ara tenonde ico vae jare ivi tenonde ico vae mbaeti ma. Jae ramiño vi mbaeti ma i guasu. ² Jare che etei aecha jocua tenta guasu uñeño tee Tumpa peguarã vae - jae co Jerusalén ipiau vae - ugüeyi ou Tumpa oï vae güi ara güi. Uyeyapicatu oï penti cuñatai umendata vae rami.

³ Jare ayandu penti ñee ara güi. Iñeeãta reve jei:

—Mase, Tumpa ime ma ico ivi pegua reta ndive. Jae icota jae reta ndive. Ivi pegua reta yugüirecota Tumpa imbaerã, jare Tumpa icota jae reta ndive. Tumpa eteño icota jae reta iTumparã —jei—. ⁴ Jare Tumpa oyoeta opaete jesai reta. Ndarau ye quía umano. Ndarau ye quía ipiatiti. Ndarau ye quía uyao. Ndarau ye mbae jasi quía pe. Echa'ã mbaembae tenonde ico vae reta mbaeti ma —jei.

⁵ Jare Tumpa uguapi oï iguapia pe jare jei:

—Ayapopiauta opaete mbaembae.

Jayave jae jei cheve:

—Cua icuatía. Echa'ã chiñee añete co. Opaete vae ipuere güirovia catu —jei.

⁶ Jare jei vi cheve:

—Uyeyapo ma. Che co jae Alfa jare Omega jee vae. Che co jae tenondegua vae jare taicuegua vae. Ime yave quía uipota i tecove opa mbae vae pegua jou vae, tamee tou jepi mbae reve —jei—. ⁷ Upurumiamiri vae reta pe ameeta imbaerã opaete mbaembae. Che etei aicota jae reta iTumparã jare jae reta yugüirecota cherai retarã —jei—. ⁸ Erei uquiye vae reta, jare güirovia mbae Tumpa vae reta, jare pichii vae uyapo vae reta, jare upuruyua vae reta, jare iaguasa vae reta, jare ipaye vae reta, jare umbiadora tumpa-raanga vae reta, jare opaete iyapu vae reta yugüiraata tata guasu azufre jendi oï pipe vae pe ñru vae reta ndive. Cua co jae mano mocuia —jei.

Jerusalén ipiau vae

⁹ Jare jocua siete ángel siete copa tinee siete mbaesusere taicuegua vae pe vae güinoi vae reta güi penti ou che aï vae pe jare jei cheve:

—Eyu cua pe. Taechaca ndeve Ovecha-rai jembirecorã vae.

¹⁰ Jayave ángel chereraa Espiritu Santo imbaepuere pe penti ivitu guasu re. Ivate ete jocua ivitu. Jayave uechaca cheve jocua tenta guasu Jerusalén jee vae ugüeyi ou ara güi Tumpa oï vae güi. Jocua tenta guasu uñeño tee Tumpa peguarã. ¹¹ Tumpa umbiyaruanda ma. Jare uvera penti ita ipõra ete vae uvera rami. Ita ipõra ete vae jaspe jee vae echa. Jocua jaspe jee vae jesãca vidrio rami. ¹² Jare tenta guasu uñequese vae tuicha jare ivate, jare güinoi doce jonque. Jare jonque reta pe ñugüinoi doce ángel reta. Jare jonque reta re uyecuatía ñugüinoi Israel pegua reta jee. Echa'ã doce ati co jocua Israel pegua reta. ¹³ Guarasi oë vae coti tenta guasu jonque reta mbapi co. Norte coti tenta guasu jonque reta mbapi vi. Sur coti tenta guasu jonque reta mbapi vi. Guarasi uique vae coti tenta guasu jonque reta mbapi vi. ¹⁴ Jare tenta guasu uñequese vae iguapica reta doce co. Jare iguapica reta re uyecuatía ñugüinoi Ovecha-rai jemimondo reta jee. Echa'ã doce co jocua Ovecha-rai jemimondo reta.

¹⁵ Jare imiari cheve vae güinoi penti ivira oro pegua umiaanga vaerã tenta guasu jare jonque reta jare uñequese vae. ¹⁶ Jare guarasi oë vae coti jare norte coti jare sur coti jare guarasi uique vae coti tenta guasu uñequese vae oyovaque. Jare ángel umiaanga tenta guasu ivira pe. Jare ipucucue jare ipiguasucue jare ivatecucue oyovaque. Penti penti cuatrocientos sesenta legua rupi. ¹⁷ Jare ángel umiaanga tenta guasu uñequese vae. Ivatecucue ciento

cuarenta y cuatro codo. Penti cuimbae jendivanga uyemiaanga yave, jae co penti codo. Echa'ã jucuarãi umiaanga ángel.

¹⁸Jare tenta guasu uñequẽse vae ita ipõra ete vae jaspe jee vae pegua co. Jare tenta guasu etei oro catuui. Jesãca vidrio rami. ¹⁹Jare tenta guasu uñequẽse vae iguapica reta ita ipõra ete vae pegua co. Uyuavi reta uyugüi. Penti jaspe jee vae. Ìru zafiro jee vae. Ìru ágata jee vae. Ìru esmeralda jee vae. ²⁰Ìru ónice jee vae. Ìru cornalina jee vae. Ìru crisólito jee vae. Ìru berilo jee vae. Ìru topacio jee vae. Ìru crisopraso jee vae. Ìru jacinto jee vae. Ìru amatista jee vae. ²¹Jare jocua doce tenta guasu jonque reta doce ita ipõra ete vae perla pegua co. Penti penti onque uyeyapo penti perla güi. Jare tenta guasu icalle reta oro catuui. Jesãca vidrio rami.

²²Jare mbaeti etei Tumpa jo joco pe. Echa'ã yandeYa Tumpa opaete mbaepuere güinoi vae jare Ovecha-rai yugüireco joco pe penti Tumpa jo ipepica pe. ²³Jare tenta guasu pegua reta ueca'ã guarasi jare yasi umiembipe vaerã. Echa'ã Tumpa jare Ovecha-rai jocua tenta guasu pegua reta jembipe co. ²⁴Opaete ivi pegua reta uguata cavita joco pe, tembipe oïta ramo, jare ivi pegua reta juvicha guasu reta yugüeruta joco pe umbiadora vaerã Tumpa. ²⁵Jare ndarau etei uyeyuquenda tenta guasu jonque reta ara rupi. Jare ndarau vi pïtu joco pe. ²⁶Jare opaete ivi pegua reta yugüeruta joco pe umbiadora vaerã Tumpa. ²⁷Èrei ndarau etei uique jocua tenta guasu pe ipotave iquia vae jare ipotave pichü vae uyapo vae jare ipotave iyapu vae. Jaeño Ovecha-rai i libro tecove opa mbae vae pegua pe jee uyecuatía oï vae reta uiqueta joco pe.

22

¹Jayave ángel uechaca cheve i usiri vae iquia mbae vae. Jesãca ete. Vidrio echa cheve. Tecove opa mbae vae pegua co jocua i. Oë usiri Tumpa jare Ovecha-rai iguapia güi. ²Jare tenta guasu icalle mbite rupi jare i usiri vae jembei reta rupi ñugüinoi ivira tecove opa mbae vae pegua reta. Jocua ivira ía doce uyuavi vae reta co jare yagüiye opa yasi rupi. Jare ivi pegua reta ipuere uiporu ivira joqui reta moarã agüiye vaerã imbaerasi.

³Jare ndarau ma oï yepipeyu ivi re. Echa'ã Tumpa jare Ovecha-rai iguapia oïta joco pe. Jare Tumpa jembiocui reta uyecocuita chupe. ⁴Jare jae reta uechata Tumpa. Jare güinoita reta isiva re Tumpa jee. ⁵Jare ndarau pïtu joco pe. Ndarau uiporu mechero jare guarasi jembipe. Echa'ã yandeYa Tumpa umeeta chupe reta tembipe. Jare jae reta oporoyocuita jaeño mai pegua.

Cristo ou yeta imambae

⁶Jare ángel jei cheve:

—Cua ñee reta añete co. Yandepuere yarovia catu. Aracae yandeYa Tumpa uicuaaca mbaembae iñee umimbeu vae reta pe. Echa'ã jae oñono tee reta iyupeguarã iñee umimbeu vaerã. Jae ramiño vi yandeYa Tumpa chembou aicuaaca vaerã jembiocui reta pe imambae uyeyapota vae. Che co jae penti ángel Tumpa pe uyecocui vae —jei—. ⁷Mase, aa yeta imambae' —jei yandeYa, jei—. 'Piyapo yave ñee cua tupapire pe ñugüinoi vae reta, piyeroziata co. Echa'ã cua ñee reta umimbeu peve uyeyapota vae' —jei, jei.

⁸Che etei aecha cua mbaembae jare ayandu vi. Jare aecha jare ayandu yave, ayeatica ángel cua mbaembae uicuaaca cheve vae jovai ambiadora vaerã. ⁹Èrei jae jei cheve:

—Agüiye chembiadora. Che vi ayecocui Tumpa pe, nde ndiyecocui chupe rami. Che vi amimbeu Tumpa iñee, yanderivi umimbeu rami. Echa'ã jae reta vi uyapo ñee cua libro pe uyecuatía oï vae reta. Tumpaño embiadora —jei.

¹⁰Jare jei vi cheve:

—Emimbeu Ìru vae reta pe ñee cua libro pe ñugüinoi vae reta. Echa'ã cua ñee reta umimbeu uyeyapota vae jare coiño ma ou uyeyapo vaerã —jei—. ¹¹Jupi mbae vae uyapo vae jecuaeño tuyapo jupi mbae vae. Jae ramiño vi pichü vae uyapo vae jecuaeño tuyapo pichü vae. Jae ramiño vi jupi vae uyapo vae jecuaeño tuyapo jupi vae. Jae ramiño vi uñeño tee Tumpa peguarã vae jecuaeño tuñeño tee Tumpa peguarã —jei—.

¹²Mase, aa yeta imambae —jei yandeYa, jei—. Jare ameeeta opaete vae pe imbaerã penti penti uyapocue vae rupi —jei, jei—. ¹³Che co jae Alfa jare Omega jee vae. Che co jae tenondegua vae jare taicuegua vae —jei, jei—. ¹⁴Piyapo yave yandeYa iporoyocui reta, piyeroziata co. Echa'ã piyapo yave, pepuereta peu ivira tecove opa mbae vae pegua ía, jare pepuereta pique jocua tenta guasu pe jonque reta rupi —jei—.

¹⁵Echa'ã tenta guasu pe ndarau uique Tumpa iñee ndive oyovaicho vae reta, jare ipaye vae reta, jare iaguasa vae reta, jare upuruyuca vae reta, jare tumpa-raanga reta umbiadora vae reta, jare opaete iquirëi reve iyapu vae reta —jei.

¹⁶Jare yandeYa Jesús jei cheve:

—Che etei amondo penti ángel cheve uyeyocui vae umimbeu vaerã peve cua mbaembae upurugüirovia vae uyembatimbati vae reta rupi. Che co jae David Iyipi jee vae. Che co jae David ifñemoñaã reta pegua. Che co jae yasitata guasu jembipe vae neimbove asi uyecuaa vae —jei.

¹⁷ Jare Espiritu Santo jare Ovecha-rai ndive umendata vae jei:

—Eyu.

Jare uyandu vae tei:

—Eyu.

Iúe vae ipuere ou cua pe. Ipotave vae ipuere jou i tecove opa mbae vae pegua jepi mbae reve. ¹⁸ Ñee cua tupapire pe ñugüinoi vae reta uicuaaca uyeyapota vae. Che amimbeu opaete cua ñee reta uyandu vae reta pe cua: Ime yave quía cua ñee reta ndive ñru ñee reta umiñruta vae, Tumpa umeeta chupe uiporara vaerã susere cua tupapire pe uyecuatía ñugüinoi vae reta. ¹⁹ Jare ime yave quía ñee cua tupapire pe ñugüinoi vae reta uipotata umbai vae, Tumpa ndarau umaño jese jou vaerã jocua ivira tecove opa mbae vae pegua ía. Ndarau vi umaño jese uique vaerã tenta guasu uñeño tee Tumpa peguarã vae pe. Ndarau vi umaño jese güinoi vaerã imbaerã mbaembae icavi vae cua libro pe uyecuatía oñ vae.

²⁰ YandeYa umimbeu cheve opaete cua. Jae etei jei:

—Añete co, aa yeta imambae.

Yande yae:

—Amén. Eyu, yandeYa Jesús.

²¹ YandeYa Jesús tumee ipiacavi opaete imbae reta pe. Amén.